

DANIELIS WILHELMI TRILLERI

PHILOSOPHIAE ET MEDICINAE DOCTORIS CONSILIARIUM
AVLICI ELECTORIS SAXONIAE MEDICINAE PROFESSORIS
PRIMARIUM IN ACADEMIA WITTEBERGENSI ET ILLVSTRIS
ACADEMIAE SCIENTIARVM BONONIENSIS
SODALIS

OPVSCVLA MEDICA

AC

MEDICO PHILOLOGICA,

ANTEA SPARSIM EDITA

NVNC AVTEM IN VNVM COLLECTA ATQVE DIGESTA

AB

AVCTORE IPSO PRIVS RECOGNITA

AVCTA CASTIGATA ET EMENDATA

CVRAVIT ET PRAEFATVS EST

CAROLVS CHRISTIANVS KRAVSE

PHILOSOPHIAE ET MEDICINAE DOCTOR IN ACADEMIA LIPSIENSI ANATO-
MIAE ET CHIRVURGIAE PROFESSOR PVBLICVS EXTRAORDINARIVS FACVLTATIS
MEDICAE ASSESSOR MINORIS PRINCIPVM COLLEGII COLLEGA HOC
TEMPORE PRAEPOSITVS.

VOLV MEN I.

FRANCOFVRTI ET LIPSIAE

SVMP TIBVS IOANNIS GEORGII FLEISCHERI

MDCCCLXVI.

ENTRANCE WITH THE TITLES

OF THE MEDICAL DOCTORS OF THE
UNIVERSITY OF CAMBRIDGE
IN THE YEAR 1841

OF PHYSICAL MEDICINE

MEDICO PHILOLOGICA

AND THE SPANISH LETTERS

BY THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.

AND THE REV. J. H. W. L. D. D.



A D
VIRVM ILLVSTREM ET EXPERIENTISSIMVM
GEORGIVM GOTTLOBIVM
RICHTERV

REGIVM CONSILIARIVM AVLICVM ARCHIATRVM
ET PROFESSOREM MEDICINAE PRIMARIUM
IN ACADEMIA GOETTINGENSI

THEOLOGVM PHILOSOPHV
ORATOREM POETAM

ET
QVOD HIS LAVDIBVS OMNIBVS LONGE PRAESTANTIUS
VIRVM PIVM PROBVM AC HONESTVM
AMICVM SVVM VETEREM VERVM FIDVM ET CONSTANTEM
SENV

ET
AMICI INTEGRIMI DEDITISSIMI QVE

DANIELIS WILHELMI TRILLERI
DISSERTATIO EPISTOLARIS.

UNIVERSITY OF MICHIGAN

ORIGINALS

LIBRARY

THE UNIVERSITY OF MICHIGAN
LIBRARY

LIBRARY

LIBRARY

LIBRARY

LIBRARY

LIBRARY

LIBRARY

LIBRARY



Iam dudum quidem animum nostrum honesta incessit cupiditas, monumentum quoddam publicum statuendi priuatae nostrae amicitiae, olim ante hos quinquaginta annos, Lipsiae, in iuuentute, candide inchoatae; deinde in virili aetate, disiunctissimis licet per iniqua fata, et spatiosa locorum interualla, corporibus, coniunctissimis tamen semper animis, diligentissime cultae, atque nunc demum in vltimam vsque senectutem, sine vlla querela et offensa, seruatae atque continuatae. Haud enim mihi sufficebat, nobismet ipsis eam solum cognitam esse, aut nonnullis aliis nobis amicis perspectam; sed cupiebam potius vel maxime, ingenuae laudis cupidine incensus, ipsam, si fieri vnquam posset, ferae quoque posteritati, imo ipsi orbi, vbique innotescere: ne scilicet priscum aeuum solos suos iactaret Orestes, ac Pylades, Damones, et Pythias paucaque id genus alia rarissima verae sanctaeque amicitiae exempla, adeo, vt ex omnibus saeculis vix tria, aut quatuor, nominentur paria amicorum; quin potius, ex ipsius nostrae recentiore documento liquidissime constaret, nec nostra, licet forte vitiosiore alias aetate, defecisse prorsus eiusmodi memorandae amicitiae plus quam Pyladeae, exempla. Sed excussa mea paupercula supellectile litteraria, nihil equidem dolens eheu! inueniebam, quod mihi vel placeret, vel T V I S praefertim meritis ac virtutibus dignum esset. Leuem enim, aut subitam T I B I dedicare dissertatiunculam, aut ista adhuc leuius quoddam ac frigidius carmen licet iam alibi a me tentatum, nec mihi satis conuenire videbatur, nec T E imprimis decere:

praecipue, quum eruditis tantum non omnibus notum sit, *quantus sis in poëtica*, vti de Vespasiano quondam dicebat PLINIVS, vt adeo merito cum PAPINIO STATIO Hexametros meos timerem. Ille enim in vasti ingenii ingentisque spiritus poëtam, LVCANVM, Panegyricum Scripturus, ita se modeste non minus, quam acute et ingeniose, excusabat: *Ego non potui maiorem tanti Auctoris habere reuerentiam, quam, quod laudes eius dicturus, Hexametros meos timui*, in quibus tamen pangendis alias, ceu notum, haud infimus esset aut infelicissimus. Omni igitur splendido satis atque idoneo apparatu, ad TE digne laudandum, nostramque rarissimi exempli amicitiam annis, animisque inprimis contractam ac firmatam, decenter extolendam, sic destitutus, generosum animi impetum moestus interea repressi, atque commodiorem felicioremque occasionem opperiendam censui, quae et paullo post, praeter omnem spem et opinionem, mihi oblata fuit. Elapso enim proxime anno, forte fortuna accidit, vt Clariss. et Experient. D. KRAVSE Profess. Lips. celeb. atque FLEISCHERVS, dilectissimus meus gener, gratissimi certe hospites, me inuiserent atque nonnullas mearum dissertationum, inter alias doctas, aut indoctas chartas, in mensa obiter positas, forsan conspicientes, me iteratis precibus enixe rogarent, vt omnia mea scripta iuuenilia et academica olim sparsim edita, vno quidem corpore comprehensa, ipsis publicanda permetterem; Ceterum sese interea omnes curas sumtusque edendi illius operis lubentissime in se esse suscepturos atque erogaturos. Ego vero parcus meorum scriptorum amator, ac durus rigidusque forsan nimis, foetuum meorum

rum

rum pater, plane negavi, digna quidem vsquequaque esse illa opuscula, partim olim iuuenili calore immature et rudi adhuc facie ac imperfecta, producta, partim postea inter alios labores academicos, subito impetu effusa potius, quam cum cura ac lima elaborata, quae Vno volumine collecta, publico offerrentur aut rectius obtruderentur; ut enim ingenue fatear, mea scripta semper mihi ieiunitatis et ficitatis eorum satis conscio, displicuerunt, etiamsi aliis interdum placerent: ideo simul ac chartis perituris a me illita sunt, mox etiam oblita et obtrita iacent; ut mei familiares norunt; praesertim, quum mihi molestissimum taediique plenissimum onus eo ipso simul imponeretur, in hac senili mea aetate, omnia illa scripta denuo recognoscendi, emendandi, augendi, minuendi atque castigandi, cui ferendo vix me parem sentirem. Illi vero ad haec tanto instantius me compellare, imo tanto acrius compellere et flagitare, donec me sic diutius, sed frustra, renitentem ac repugnantem tandem expugnarent ac peruincerent. Omnia igitur mea scripta tam iuuenilia, quam senilia et academica, quotquot nempe ad manum erant, multa enim, dudum perdita, comparari non poterant, tanta fuit mea negligentia, quaedam etiam aliunde petenda erant, diligenter recensui, subinde multis accessionibus auxi, amplificaui, passim correxi, emolliui, immutavi, idque omne non sine molesto ingentique labore, tandem cum Deo, perfeci. Si quid igitur forsan utilitatis, aut certe voluptatis, ex hac noua veterum opusculorum meorum sylloge, percepturi sint lectores, id profecto omne solum binis istis honestissimis Viris supra laudatis KRAVSIO nempe atque genero meo

meo FLEISCHERO imputandum vnice erit, quorum quippe imperiosis veluti precibus, eo tandem adactus fui, vt arduum illum ac molestum laborem in me inuitus fere susciperem, de quo alias ne per somnium quidem, vnquam cogitaueram: licet mihi non deessent praeuia eiusmodi collectionum exempla, vt ROLFINCII, HOFFMANNI, STAHLII, SCHVLZII, SEBIZII, BOHNII, RIVINI, ADOLPHI, PLATNERI, et aliorum, vt illas multas magnasque *Collectiones Hallerianas* iam taceam, quod quidem institutum nec laude caret, nec vtilitate, modo delectus rerum accuratius teneatur, nec vilioris fortis, ac peioris monetae scripta, et dignis indigna, velut infelix lolium laetis fatis, temere intermisceantur. Volebam quoque simul TIBI met ipsi, charissime RICHTERE, hac mea opera, exemplo et incitamento quasi esse, vt TVAS nitidissimas et stilo et argumentis dissertationes et programmata doctissima, praesertim vero suauissima TVA poëmata et elegantissimos Elegos plusquam Lotichianos, aut Heinbianos, meo quoque perituro nomini a TE nimis benigne, ex parte, inscriptos, vno quoque Volumine comprehensos in publica commoda et oblectamenta, quam primum euulgares. Quod si precibus meis his publicis a TE impetrauero, vt certe spero, imo confido; tum certe plurimum mihi debebit vniuersus orbis litteratus et eleganter solideque doctus. Data igitur semel fide, vt dixi, de hac quidem opusculorum meorum collectione adornanda, TV statim mihi rursus occurrebas, cum primis post ipsas postremas TVAS litteras, mirum amorem ac candorem erga me spirantes, et blando humanitatis sale abunde sparsas, cuius nomini clarissimo, mihi

hique

hique praesertim carissimo, eundem ante omnes alios, inscribendam et dedicandam merito censebam: ut sic nempe monumentum aliquod perenne, si non propter praestantiam, tamen propter molem, aliquamdiu forte duraturum, statuerem nostrae integerrimae et rarissimi exempli amicitiae et religiosi animi cultus, quo TE iam per integros quinquaginta annos, propter eximias ingenii dotes, atque animi virtutes, digne prosequutus sum. Perenne igitur mihi monumentum erecturus es, mi Bone! ita forte ridendo, me interrogabis amicissime RICHTERE! Perenne omnino, inquam ego, sed audi modo, ex meo certe desiderio ardentissimo, voluntate honestissima et cupiditate TVVM illustre nomen aeternitati tradendi flagrantissima. Quod si igitur forte saeculi potius ingrati vitio ac liuore, quam mea culpa, perenne illud haud futurum sit, tamen eo bono et candido animo condidi, tanquam perenne foret. Sicut quondam similem in modum, de MARTIALE scripserat PLINIVS ab ipso carmine laudatus. *At non erunt aeterna, quae scripsit. Non erunt fortasse: ille tamen scripsit, tanquam essent futura. Dedit enim mihi, quantum maxime potuit, daturus amplius, si potuisset.* Atque id ipsum mihi solatio erit, si hoc meum quaecunque monumentum aeternum forte non fuerit, quoniam illud ea propensissima quidem voluntate ita tamen scripsi, tanquam tale omnino esset futurum, aeternitatem Tibi daturus si potuissem quidem, ipse eheu! homo periturus. Licet igitur scripta mea ipsa quippe breui interitura, aeternitatem Nomini TVO haud promittant, nec promittere vnquam possint, quoniam nempe longissime absum a stolidi illa APIONIS, Gram-

matici, istius tinnuli cymbali mundi, aut publicae famae tympani, arrogantia, et ridiculo fastu, qui, teste PLINIO ridente, *immortalitate donari a se scripsit, ad quos aliqua componebat*; animum tamen TVI in me amoris, fidei atque candoris aeternum memorem TIBI tanto certius polliceor; quo quidem munere, haud contemnendo, quoniam illo praestantius, meliusque nihil quidquam ab homine mortali et caduco iure exigipotest, TE satis contentum fore, interea certissime confido. Ceterum vero, si non omnia, tamen quaedam forte, ex his ipsis nostris opusculis, TIBI aliquantum placitura esse, fere persuasus sum; namque TV a longo iam tempore, solebas meas esse aliquid putare nugas; praesertim, quum in quibusdam eorum, olim a TE perlectis, *et rerum delectum et stili robur*, per litteras, ad me datas, laudares, vtrum severo ac veraci iudicio, an vero blando potius ac fallaci praeiudicio, quia, censente SYMMACHO, *rarum esse solet in amante iudicium*, equidem iam non definio. Eandem tamen fauorabilem de iisdem sententiam partim tulerunt quoque ipsa vestra diaria litteraria, alias quidem nimis profecto rigida ac seuera, ne quid grauius dicam, contra meam iustam ac vi quasi extortam *Apologiam pro Habenis et Arundinibus Suetonianis*, dum scilicet effusis veluti irarum habenis, in eam violentissime irruerent; quum tamen penitus nescirent, ipsas illas clandestinas famae obtrectatorum technas et machinas, quibus oblique me peterent, per conductitium illum adgressorem: ceu TIBI amicissime RICHTERE, forsan haud ignotum erit. Sed nolo iam olidam illam Camarinam denovo hic commouere, transeant ergo haec cum ceteris erroribus.

Sed

Sed et Lipsienses, aliaeque Ephemerides litterariae benignius iudicarunt, de his nostris dissertationibus, praesertim vero bini isti illustres et splendida meritorum gloria per orbem florentissimi Viri, *Liber Baro van SWIETEN*, et Venerabilis *MORGAGNVS*, in nouissimo scilicet praestantissimo opere, *de causis et sedibus morborum*; praeterea quaedam quoque ex iisdem dissertationes alibi iam denuo impressae fuerunt, veluti exercitatio ista satis, opinor, nota, *de veterum Chirurgorum Arundinibus, et habenis*, quae Amstelaedami, 1751. splendide recusa fuit, item dissertatio *de pleuritide aestiua*, quae vna cum ipso de eodem Argumento, libello, satis, vt puto, cognito, Venetiis nuper 1759. prodiit, me tamen inscio et inconsulto, sed parum nitide, quod doleo, parumque emendate; vt iam de aliis taceam, quae potissimum *Collectionibus dissertationum Hallerianis* dudum insertae fuerunt, ne forte vanus nimis et intempestius friuolorum meorum opusculorum laudator et amator, si non *TIBI*, at aliis forsitan, mihi iniquioribus, vt sane sunt multi, esse videar. Inde ergo aliqua mihi subnata est fiducia, vt rogatus, hanc ipsam syllogen typis permittendo, tantisper crederem, forsitan nunc non displicitura penitus in vnum corpus collecta, quae antea sparsim et membratim veluti edita, haud parum passim placuissent. Igitur

Si illud, quod volumus, eueniet, gaudebimus;

Sin secus, patiemur animis aequis.

Id vero potissimum ad aliquam forte horum opusculorum commendationem, facere nobis videbitur, nisi fallimur, quod in iis componendis, semper quam diligentissime eo respiceremus, vt

res nouae, et verba vetera, vna arctissime coniungerentur, hoc est, vt res quidem haud plane nouas et inauditas; sed tamen non prorsus vulgares, aut in scholis nimium decantatas, aut etiam in Commentariis plurimum protritas produceremus, simul vero quantum scilicet, in his fieri posset, dictione plana, pura, perspicua, ornata et Latina, vteremur, ne lectoribus eruditis stilo horrido, aut barbaro, fastidio essemus aut ludibrio, praefertim, quum iusta cum indignatione, passim animaduernerem, in plerisque, quae hodie quidem vulgantur, scriptis medicis, vtramque hanc maximi momenti rem admodum socorditer esse neglectam ac prorsus praetermissam. Quotidie enim ad fluentem vsque nauseam, eiusmodi macrae, ieiunae et steriles dissertationes de vulgatissimis quidem et millies iam pertractatis vbi- que argumentis, in publicum prodeunt, v. gr. de Febribus, Scabie, Phthisi, Colica, Cephalalgia, aliisque id genus morbis vulgo cognitissimis et in omnibus libris medicis vbi- que obuiis, et vberrime iam dudum explicatis, in quibus tamen nihil prorsus noui, quod non dictum sit prius millies, deprehenditur; quin potius chorda semper eadem stridula vbi- que tangitur, raucaeque palumbes, vt cum poëta loquar, eundem lessum gemere non cessant. Sed narrabo hic TIBI, amicissime RICHTER, pace quidem TVA, lepidam historiam, quae mihi ante complures iam annos, Lipsiae obtigit. Meministi adhuc forsan boni istius Viri, crassi, ventrosi, claudicantis, grandi capite et toruo vultu, nobis quotidie in aedibus Riuiianis obuii, qui, ipso RIVINO, communi nostrum praeceptore venerando, defuncto, victum deinde quaerebat ex venditione variorum

variorum scriptorum Veterum, minorum rariorum, vndique collectorum. Is igitur, stipatus duobus famulis, me aliquando accedebat, mihiq; ad renouandam amicitiam veterem, dono offerebat, centum et quinquaginta sex dissertationes de *sola pleuritide* scriptas; forte enim fama perceperat, me de eodem argumento esse aliquid commentatum. Ego vero tanta quidem farragine dissertationum, de vno eodemque morbo laterali, scriptarum, merito vehementer exterritus, stuporem meum fere damnare coepi, quod scilicet veluti Iliadem post Homerum frustra scripsissem, atque demum argumentum nimis fero adgressus essem, quod iam a centum et pluribus auctoribus, summo haud dubie studio, pertractatum penitusque exhaustum esset. Verum, plurimum tum fallebar iudicii et praesagii: paullo enim post, die quodam, ab officiis vacuo, animum incessebat cupido, comparandi inter se has ipsas dissertationes, atque diligentius simul inquirendi, ecquid tandem singulae singulare haberent, et quid inprimis nouum atque hucusque ignotum, me docerent. Decem igitur aut aliquanto pluribus, ex immensa illa strue obiter forte protractis, et inter sese paullo attentius collatis, protinus, attonitus fere, animaduerti, omnes inter se non solum rebus et erroribus, sed et paene verbis ipsis, exactissime conuenire, nullaue in re, a se inuicem multum differre, nisi sola forsan aetate, et externa forma, aut denique stili, nunc horridioris, nunc paullo tolerabilioris, varietate. Quare mox iusto taedio captus, merito abstinui a reliquis indagandis, et conferendis, ne scil. tempus tam carum ac pretiosum male sic perderem. Vides igitur, mi optime RICHTERE, de sola

pleuritide ducentas fere conscriptas esse dissertationes, nam vetus ille amicus tum ipse non omnes habebat, quae postea in Belgio, Gallia et alibi, hac nostra aetate, magna quoque copia, prodierunt. Quid igitur putes, o charissimum caput, si reliquarum quoque dissertationum v. g. de febribus, Tertiana Quartana, Coryza, Dysenteria, aliisque id genus morbis vulgarissimis scriptarum, numerus forte ineatur; quam immensa propemodum copia exinde sit enascitura? Quid autem, obsecro, mirum, tam vberem quidem eiusmodi miserarum ac vulgarium dissertationum, ceu ranarum illarum memphiticarum sibi inuicem foede superimpositarum esse hodie vbique proventum? quum tamen alicubi forte non desint inistitores nonnulli, famelici, fordido illo ingenii sterilis largitore, ventre nempe, impulsu, qui in eiusmodi ineptis disputationibus producendis, strenue occupati sunt, quas deinde ex armariis repletis depromtas ieiunis et egenis Candidatis ad libram et lancem, care satis diuendunt, veluti aromatarii, vt sic loquar, rugosum piper, et pallentis grana cumini, aut bonae vetulae malas, nuces, haleces, ac cucumeres, si ita quidem libere iocari liceat. Verum sunt rursus alii, qui loco dissertationum, meras Homilias, vt sic dicam Medicas, aut Chrias veluti Aphthonianas, nobis proponunt, dum leui faciliq̃ue cuidam argumento medico longum quidem, sed insulsum simul insipidumque ius frigide superfundunt, atque multo quidem, inani tamen et superuacuo sermone verbisque rerum cassis, parum, aut rectius, nihil dicunt, sedulo simul sibi cauentes, ne quenquam meliorum auctorum in sua loquendi fartagine, honoris aut auctoritatis causa,

alle-

allegent, aut se veteres nouosque scriptores legisse ostendant. Malunt quippe per se soli desipere, quam ab aliis probis Auctoribus adiuti et meliora edocti, rectius sapere, atque ad instar araneorum inaniter operosarum, ex se ipsis pertexere casses, subtiles quidem; sed laxos a quouis lenioris aurae afflatu facile dissipabiles, et omni fere vtilitate aut probabilitate cassos frustra contendunt.

Verum adhuc alii denique noua quidem et rariora in scriptis suis tractant, sed plerumque curiosa magis, quam fructuosa, et subtilia potius, quam vtilia. Qualia nimirum inter alia, sunt de intima plantarum variarum structura, diuersis organis, artificiosissimis staminibus, fibrillis, pistillis, sexus differentia, amoribus, connubiis, puerperiis, forsan et, si iocari quidem liceat, adulteriis, vetitisque hymenaeis, adeo, vt hinc forte proxime, nouam quoque Legem Iuliam contra ista noua plantarum adulteria, vt sic dicam, habituri simus, quemadmodum iam olim ipse PLINIVS sic acutissime scripsit: *Ob hoc insita, et arborum quoque adulteria excogitata sunt.* Haec tamen cuncta parce nempe et modice, nec ad inanissimam vsque subtilitatem, tractata, laudanda potius sunt, quam penitus vituperanda, quoniam scilicet legentium spectantiumque animos oculosque oblectant, et absconditam plantarum naturam scite illustrent ac manifestant.

Idem quoque iure censendum est de variis nouis experimentis chemicis curiosis, nostra quidem aetate, non exigua copia, publice productis, quae, licet ipsi humano generi, ad ipsam salutem, aut fortunam augendam, parum profint; tamen eidem
etiam

etiam haud multum nocent; sed iucundo potius oculorum spectaculo inferuiunt, atque inprimis variam metallorum rerumque naturalium indolem et conditionem reconditam per potentes ignes exploratores, recludunt et in clariore luce collocant.

Tanto autem peiores et nocentiores per Deum! istae sunt nouae Apologiae et commendationes, nimia eheu! abundantia, in hunc vsque diem, promulgatae, nobisque prorsus inuitis, imprudenter impudenterque, pudet sane pigetque fateri, obtrusae, scilicet de omnis generis venenis, alias atrocissimis ac pestilentissimis, v. g. de diua illa, seu rectius, dira, *cicuta*, ista inquam efficacissima, si Diis placet, omnium fere morborum hucusque insanabilium, panacea, item de *Belladonna*, tam bello quidem nomine prorsus indigna, de *Colchico*, *Hyoscyamo*, *Napello*, *Datura*, aliisque id genus plantis dirissimis et venenatissimis, quae hodie proh dolor! heu! vbi pudor! iudicium, modestia et conscientia? praestantissimis tamen et securissimis alias remediis quibusuis, inaudita fere audacia, longissime praeferuntur, adeo, vt inde benignissima salutaris Medicinae beneficia, maxima saeculi peruersi calamitate, in malignissima veneficia turpissime conuertantur. *Ceu vero Remedia desint, ut scelera contrectent Medici: sed ista praetexunt noxio instrumento; tantumque impudentiae est, ut venenum artis esse persuadeant; Quis autem quaeso, sanus mente, Veneficia innocentiora effecit, quam ipsa remedia?* Tam feuerie ac vere iam suae aetatis Medicos veneficos increpuit PLINIVS: Quid autem obsecro, nunc esset dicturus, si in nostrum quidem longe corruptius aeuum delatus, nostros videret Medicos venenarios, venerandos scilicet illos inquam Ci-

cutarios, Colchicarios, Nappellarios, et Belladonnarios, prohi-
 Deum hominumque fidem! quam latrantia, horrida et formi-
 dabilia nomina. Quid vero, obsecro, nunc grauius satis at-
 que vehementer dicam exhausto fere iam omni verborum incre-
 pantium et lancinantium fonte, de noua ista arte nefaria et exi-
 tiosa, siue rectius noua et inaudita antehac Carnificina ac Tor-
 tura, innumeris paene libellis famosis ac fumosis hucusque, ef-
 frenata licentia, laudata, et impudentissime, etsi plane incassum,
 defensa, qua scilicet sanis Venis, praeter omnem rationem et ne-
 cessitatem, nocentissimarum Variolarum venenum proterue in-
 funditur, certissimumque Vitae periculum, sic crudeliter indu-
 citur, ad auertendum aliquando adhuc incertum et nunquam
 forte venturum. Quum tamen iam dudum sapientissime mo-
 nuerit ipse S O C R A T E S, *quod pessimus ille Morborum sit Medi-
 cus, qui idem cum morbo ipso grassante, Remedium usurpet*, hoc
 est, vt haec commode huc applicentur, qui variolas temere
 curet, per ipsas Variolas, et variolas certas cum summo vitae
 periculo, sanis corporibus inferat, ne aliquando incertae, for-
 san sine periculo, adueniant. Quod sane curiosum dicam? an
 furiosum. Quis vero, obsecro, hic iustis temperet a lacrimis?
 quis inquam, serio non ingemiscat saeculo nostro corrupto,
 sua sponte, in exitium suum ruenti, atque per indubitata mor-
 tis pericula sordido artis illius nefandae ministerio, violenter
 introducta, dubiam admodum et ambiguam salutem quaerenti
 et expectanti? sed quoniam haud ita pridem, publicae vtilitati
 pro virili mea, etiam in vltima iam senectute, consulturus, ipse
 contra dirum hoc nefas et insanabile paene Cacoëthes, posito

omni seruili aut anili metu, publice animosius insurrexi, iusto-
que Volumine metrico id ipsum acriter impugnaui, et solidissi-
mis, vti certe persuasus, existimo, argumentis instructus, for-
titer expugnaui, funditusque euerti, sicque meam conscientiam
hoc insustentabili fere onere per longius tempus, vehementer
pressam ac paene oppressam feliciter tandem liberaui; nolo hic
plura de hac maximi momenti re incassum praefari. Neque
vero minore animorum irritatione concertatum hucusque fuit,
de famosa ista *Irritabilitate*, cum latranti nomine, si ita quidem
cum PLAVTO hic iocari licet, aliis nobile illud scilicet inuen-
tum acriter impugnantibus, aliis contra acrius propugnantibus,
sed perquam exiguo, nisi fallor, vtramque in partem, cum fru-
ctu. Namque vt cum poëta ingenue fatear, hic

Bella geri placuit, nullos habitura triumphos.

Siue enim vera fuerit ista quidem *Irritabilitas*, siue falsa; ne-
que sane tunc magis proderit mortalibus, neque minus noce-
bit. Longe leuius tamen periculum interea iisdem ex eadem
imminet, quoniam scilicet, strenuis nostri saeculi Herophilis et
Erasistratis hodie amplius non licet, vt illis nempe priscis, vi-
vos homines crudeliter incidere, ab ipsa natura clausa adyta vio-
lenta manu recludere, profanisque oculis nimis curiose introspi-
cere, atque in palpitantia adhuc praecordia visceraque calentia
audax minaxque ferrum immisericorditer demittere. Tanto
maius autem certiusque exitium et excidium ex eadem impen-
det miserandis et crudelissimo fato perituris canibus, quippe
qui experimentorum vano eheu! consilio et inani opera, facien-
dorum causa, cateruatim vbique ad saeuissimam lanienam rapi-
untur,

untur, ibique compuncti, vellicati, lacerati, pressi, irritati, tracti, contorti, vstulati, et mille aliis miris dirisque modis diutius ficcis oculis, cordeque paene ferreo, excruciat, ut scilicet se mori sic longius sentiant, tandem, post lentas dilatae mortis moras, fera nimis misericordia, trucidantur, heu! frustra ac sine vlllo in ipsum genus humanum vfu, sic acerbissime torti et interemti.

Deplorat rigidis perituram bestia cultris

Infauftam sobolem.

Ab miser! extremum cui mortis munus iniquae

Eripitur, non posse mori.

Sed rixarum metuens, prudenter nolo iam plura, de hac ipsa immani et inani lite disceptare, ne scilicet Crabrones irritentur, imo potius ne ipsi Medici nonnulli, qui de hac ipsa irrita ut plurimum irritabilitate tanquam pro aris et focis, acerrime inter se digladiantur. Non solum enim *vatum genus est irritabile*, ut HORATIVS ait ipse vates; sed et saepissime ipsorum Medicorum, quibus frequentius, vel levis causa, aut suspicio tantum, sufficit ad grande irarum irritamentum. Sed fatis nunc de ipsis dissertationum et Exercitationum medicarum argumentis, partim vulgaribus, et ad nauseam saepissime iteratis; partim novis quidem et curiosis, sed parum vtilibus; partim autem prorsus noxiis cauteque vitandis ac vetandis.

Iam vero etiam quaedam adhuc monenda tandem restant, de externo ipsarum mundo, siue cultu et ornatu, in ipso dicendi genere latino, adhibito et observato. Sed hic eheu! piget quidem taedetque ingenue fateri, plerumque infelix lolium et

steriles dominantur auenae: paucissima ibi rident ac nitent; plurima vero sordent, ac stiuam magis olent, quam stilum: lütulenta potius fluunt, quam luculenta, limosa, quam limata, et polluta denique quam polita. Nonnulli ex istis Autoribus, macros tantum turdos in fumido igne versant, vt sic loquar, veluti ille male sedulus hospes apud HORATIUM, aut pingui Minerua sordide pingunt, aut ad instar mali illius extemporalis poëtae tragici ALCESTIDIS, foecundi nimis festinatique cursus scripta protrudunt, in triduum tantummodo, imo vix trihorium, suffectura, et mox intra primas memoriae metas corruitura. Quin et nonnunquam ipsum adeo bonum Priscianum sibi infestum prorsus habent, atque iratum. De hac vero putida sua cultioris stili negligentia, vel blandius admoniti, vel seuerius reprehensi et castigati, protinus suae socordiae, ceu velamen aliquod, etsi lacerum et male sartum, praetendunt illud notissimum, vulgi dicterium: *Morbos non verbis curari, sed herbis.* Nonnulli quoque, illis nonnihil doctiores, ad ipsum prouocant CELSUM, pariter alicubi dicentem: *Morbos non eloquentia, sed remediis, curari, et elinguem quoque Medicum, usu ipsius artis, probe edoctum, magnum in sua scientia, fieri posse artificem.*

Sed boni illi aut mali forte, simul non cogitant, frustra ab ipsis fuisse allegatum omnium Medicorum disertissimum et stilo puro nitidoque latino politissimum, hincque semper in illustre exemplum omnibus in posterum Medicis quam diligentissime ad imitationem, proponendum, praesertim, quum idem ipsum adeo HIPPOCRATEM nostrum scite vereque vocauerit, *Virum et Artem, et Facundia insignem*: quem quippe ipsum diligenter HO-

MERVVM legisse, stiloque expressisse, testantur vbique ipsius scripta, et confirmatur insuper auctoritate EROTIANI, GALENI et aliorum, vt in his ipsis opusculis, non vno tantum in loco, fufius et solidius probauimus: quale quid etiam de ARETAEO constat, Medico disertissimo, et dictione quoque HomERICA vbique ornatisimo ac florentissimo, vti post PETITVM et WIGANVM, alibi ostendimus. Hinc frustra pariter in suae ignauiae tutamentum, ad illud acutum SENECAE effatum confugiunt; *Non quaerit aeger medicum eloquentem, sed sanantem*: Subdole vero simul omittunt verba illa notatu digna, statim ibidem subsequencia, *sed si ita competit, vt idem ille, qui sanare potest, comte de his, quae facienda sunt, differat, boni consulet*, et quae ibi plura leguntur. Vnde nunc liquido, opinor, patet, artem bene medendi, beneque simul meditandi, loquendi ac scribendi, commodissime in vna morari sede posse, nec elegantiora studia stilique nitidioris praesertim culturam, officere quidquam ipsi arduo sanandi officio. Inde recte et sapienter mihi videtur pronunciaffe magnus ille IOSEPHVS SCALIGER: *Homines, qui sine litteris, Medicinam tractant, esse similes iis, qui in alieno foro litigant*. Vtut vero in Medico pure sic dicto practico, forsan sufficiat, si non male prorsus scribat, aut loquatur; in Medico tamen vere docto, et professoria praesertim dignitate conspicuo, necessario haud dubie requiritur, vt non solum non male, sed et insuper etiam bene, imo et optime, scribat, atque differat, quoniam scilicet docendo atque scribendo, illustri debet esse exemplo suis discipulis et Auditoribus, qui suorum Praeceptorum vitia ac virtutes adscita sensim consuetudine,

dine, facile omnino imitantur. Nihil igitur mirum, ab omni fere aevo, repertos esse Medicos complures, et artis suae praestantia, et stili purioris elegantia ceterisque humanitatis artibus, iuxta celeberrimos. Quis enim quaeso nescit magna illa profecto nomina, FERNELIOS, CRATONES, LANGIOS, TVLPIOS, BALLONIOS, LOMMIOS, SPONIOS, PATINOS, LINDENIOS, BARLAEOS, BARTHOLINOS, BORRICHIOS, WORMIOS, HOFFMANNOS, DRELINCVRTIOS, PETITOS, MEIBOMIOS, CHIFFLETIOS, RHODIOS, FREINDIOS, MEADIOS, BERGEROS, MORGAGNOS, PECHLINOS, VALLERIOLAS, PINCIEROS, SCHVLZIOS, ALMELOVENIOS, aliosque plures, quos haec angusta pagina vix capit, maxima dudum copia, singularibus scriptis, merito laudatos, a GEORGIO FRANCO, IACOB. BVRCKHARDO, LOESCHERO, *van* SEELEN, VINCKIO, LAMPE et aliis. Quorum praestantissimorum in vtraque arte Medicorum, insigniumque ducum laudatissima vestigia, TE mi ornatissime RICHTERE, indefessa tua industria, non solum presse sequutum, sed et proxime felicissimeque assequutum esse, ipse sum testis ocularis, et studiorum conscius; ipsa vero tua scripta, tam medica, quam metrica, summa gratia, lepore, eloquentia, sale ac venustate affatim condita, tanto luculentius vberiusque testantur, quibus proinde merito convenit illud PLINII elogium de cultissimis poëmatis Spurinnae venerandi pariter senis, ac poëtae pii atque casti: *Mira illis dulcedo, mira suauitas, mira hilaritas, cuius gratiam cumulat sanctitas scribentis.* Adeo, vt mihi hinc animus, forsan non vane,

vane, iam iam praefugiat, TE annorum, opum et honorum tandem saturo, atque feliciter relato inter illa rarissima senectutis longaeuæ, simul tamen viridis vegetæque, exempla, a PLINIO, VALERIO MAXIMO, LUCIANO, CICERONE, PLUTARCHO aliisque commemorata, aliquando rebus humanis exempto (utinam id quam ferisime et nonnisi saeculo Vitæ exacto, fiat!) vix quenquam tam eleganter doctum ac politum Medicum repertum iri, qui perdigne Tibi in locum vacuum succedat. Sed absit malum omen! Indies enim, heu! piget fateri, magisque deficere incipiunt eiusmodi Medici, solide in sua arte docti, et cultioribus simul litteris non leuiter tincti, sed penitus imbuti, quorum quippe prohdolor!

Numerus vix est totidem, quot

Thebarum portae, vel diuitis ostia Nili.

Quoniam optimae hae litterae hodie in hoc optimo quidem Mundo, sic vulgo, sed non optime, dicto, nihil quidquam ferre amplius valent: quin potius fastose fastidioseque contemnuntur, prae nimio solius fere vernaculae linguae cultu, variis luxuriantis ingenii lusibus frigidis vt plurimum, ambiguis et ieiunis sententiolis, argutulis, imo rectius obtusis, declamatiunculis tinnulis, ineptis Cordis formationibus, vt quidem ridicule vocantur, item inanibus subtilitatibus, vulgo sic dictis aestheticis, ingeniosis nequitiiis, et id genus aliis offuciis, affaniis, inaniis, bullis, ampullis, bracteis, nubibus, vmbris, plasmatis et Phantasmatis, quibus hodie incauti iuuenum nec rerum nec verborum adhuc satis peritorum, animi, maximo suo damno, aliquando nimis sero, emerfuri, misere in fraudem inducuntur, vt nubem
pro

pro Iunone, amplectantur, et, vt PETRONIVS pulchre et acute ait : *et rerum tumore, et sententiarum vanissimo strepitu, hoc tantum proficiant, vt, quum in forum venerint, ad res nempe grauiiores perite tractandas, tum plane attoniti putent, se in alium terrarum orbem delatos.* Nihil igitur altum, nihil magnificum, ac diuinum, nec per omnem postea vitam, suscipere possunt, quia suas omnes cogitationes abiecerant antea, in res tam humiles, contemptas, futes, steriles, aridasque et usu fructuque carentes, vt CICERO fere alicubi, vere ac seuerè dixit. Sed haec pauca obiter, de hoc saeculi nostri nubes tantum et inania captantis, insanabili paene quiduis, modo nouum et insolitum, nolim dicere stolidum sit, scribendi ac loquendi, item philosophandi, Cacoëthe; ne communi senum more, nimis difficilis, querulus, laudator temporis acti, et morosus praesentis vituperator, si non TIBI; at certe aliis, nouorum praesertim admiratoribus, videar.

Quantum vero, aut quantulum, ego ipse forte profecerim in his ipsis amoenioribus litteris, si modo de me ipso quidquam hic interponere liceat, quas a prima statim pueritia, incredibili plane amore et ardore deperii, et per omnem deinde Vitam, inexpugnabili prorsus constantia, colui; mei sane pudoris non est, ambitiosius hic enarrare, aut ampullari; alii potius, qui me meosque mores propius norant, de eo libere et ingenue iudicent. TE vero inprimis hic fidum, candidumque Vitae meae academicae testem appello, amicissime RICHTERE; TV ergo ipse vere ac seuerè pronuncies, quam negligenter, aut diligenter haec ipsa suauissima humanitatis studia olim tractauerim,

rim, atque in meos vsus conuerterim. Ipse forte adhuc probe meministi, omnes nostros sermones, disputationes, tam publicas quam priuatas, et Exercitationes scriptas, imo et ipsas adeo nostras ambulationes nunc in amoenos illos hortos suburbanos clausos, nunc vero in apertos ac liberiores campos, nunc denique in circumiectos Lipsiae pagos, villas ac rusticationes, benignam semper ac vberem materiam nobis praebuisse, de his ipsis cultioribus litteris, sine quibus omnis eruditio manca omnino mutila et imperfecta est, aut Corpus sine capite, aut Caput sine oculis, diligentius agendi, et intentius disceptandi. Erat enim tum in nobis, in quo nempe, iudice C I C E R O N E, *omnis vis amicitiae est, Voluntatum, studiorum, sententiarum summa consensus, et commune studium acerrimum, cognoscendi semper aliquid atque discendi, in quo remoti ab oculis populi, otiosum tempus conterebamus.* Inde pari fere animorum contentione et aemulatione honesta, perpetua, quae ingenia alit, acuit et exstimulat, vna tractabamus studia philosophica, historica, Linguarum etiam Orientalium, Physica, Oratoria, et alia, praesertim poëtica, in quibus felicissime perdiscendis, adeo vsque fauentes T I B I habuisti ipsum Apollinem, alias perquam difficilem, et omnes Musas Gratiasque omnes, vt hinc inter praestantissimos ac cultissimos nostri aeui poëtas, inprimis elegiacos, connumerari summo iure, promerueris, atque proinde Celeberrimo T V O nomine, in posterum etiam insigne prorsus augmentum et ornamentum additurus sis eleganti T H O M. B A R T H O L I N I libello, de *Medicis poëtis.*

Ego autem minora tantum trepide ausus, heroas illos supra laudatos ac Medicos suae artis et humanitatis studii iuxta peritisimos e longinquo saltem sequebar, passibus haud aequis, et quem, denegata forte mihi a natura, ingenii velocitate ac felicitate, attingere desperabam, summum claritatis aut perfectionis gradum; improbi tamen laboris pertinacia, tandem vtcunque assequi contendebam, fatis iam contentus, si non primas, secundas tamen, aut tertias, quartasue partes obtinerem, *summum enim culmen affectantes*, iudice COLVMELLA, *satis honeste vel in secundo fastigio conspiciuntur*, et, si non inter primipilares, saltem inter velites, aut postremum agmen, connumerarer. Sed dum haec ingenti nisu ausuque, mecum sic agito, iam spe veluti diuite laetus ac beatus, animumque incensus famae venientis amore, ecce! turbo quidam infestus subito exortus, mihi tum formidabilis; nunc vero perquam ridiculus, omnia mea praeclara consilia simul vehementer disturbavit, qui meum istum flagrantem in bonas litteras amorem pectore moesto penitus paene excussisset, illumque prorsus extinxisset, nisi tanta mentis constantia mediis in turbis istis, mox adfuisset. Paucis igitur hic TIBI, pace tua, narrabo lepidam ac iucundam historiam istam iuuenilem, forsan, nisi fallor, contractae frontis senilis seria blando risu iocoque TIBI explicaturam.

A Schola itaque Cizensi, ductu et exemplo B. mei HERZOGII, viri graece inprimis, doctissimi, adhuc calens, imo feruens, ab assidua vtriusque linguae auctorum lectione, Anno 1713. Lipsiam delatus, noctes diesque, serio cogitabam, quomodo

modo istos tantopere mihi adamatos auctores, praesertim graecos, modico pretio, commode compararem. Interea vero a Curatoribus meis viginti aliquot imperiales acceperam, ad ligna, candelas, ocreas, et nescio, quae alia, contra tum instantem rigidam hiemem, praesidia necessaria, conquirenda. Commodum autem eo ipso tempore, forte accidebat, ut Bibliotheca melioribus libris instructissima, (credo fuisse illam B. OLEARII, nisi fallor) publice diuenderetur: Quo laetissimo mihi nuncio, vix audito, protinus ego illuc accurrebam, imo aduolabam, ibique abunde inueniebam, quo ardentissima fitis mea plene tandem sedaretur. Oblitus ergo prae summo isto gaudio, lignorum, candelarum et ocrearum mearum, imo cibi et vitae paene ipsius, leui profecto aequoque satis pretio, duodecim tantum, aut quindecim Imperialium, (equidem non satis adhuc memini, nec multum refert) comparabam mihi varios utriusque linguae auctores, veluti DIODORVM SICVLVM, THVCYDIDEM, SOPHOCLEM, et DIOGENEM LAERTIVM HENR. STEPHANI, LVCIANVM, et PHILOSTRATVM ALDI, SVIDAM PORTI, DEMOSTHENEM BASIL. HERVAGII, et nonnullos alios; item TACITVM LIPSII, SVETONIVM CASAVBONI, PLINIVM, cum Notis Varior. paucosque alios iam mihi oblitos. Tum vero adeo me beatum putabam ac praedicabam, ut miram meam felicitatem omnibus in triuiis ac compitis etiam vix de facie mihi notis, forsan tunc obuiis, ore hiantem ac ridente enarrarem, quin et montibus et Syluis imo, ut perditii isti amatores apud PLAVTVM, ni fallor, nocti ac diei, soli, lunae ac sideribus, meas

illas novas delicias opesque iactarem, quas sane eo quidem
 temporis puncto, nec cum Croesi Crassique thesauris, nec cum
 optimis istis conditionibus Attalicis facile permutassem. Sed
 gaudium exsuperantissimum breui moesta admodum calamitate
 vehementer eheu! interturbatum fuit. Percepto enim paullo
 post, per nescio, quem malignum delatorem, de hac mea ni-
 mis scilicet profusa prodigientia, rumore, Curatores isti mei,
 Viri alias optimi, et iuris quoque peritissimi; sed his quidem
 amoenioribus studiis haud satis imbuti, mox per litteras seue-
 ras, atroces et minaces, adeo usque me increpabant, quasi ve-
 ro, impium sacrilegium commissem, aut ipsam bonam patriam
 male prodidissim; et parum sane aberat, quin me perduto illi
 filio, post pudendam bonorum suorum dilapidationem, aridis
 filiquis, paneque secundo misere pasto, digne adiunxissent.
 Addebant etiam acerba scommata et argutula dicteria: Artes
 videlicet has inglorias grammaticas solis Scholarum Moderato-
 ribus relinquendas, nec panem habere, nec pannum, nec pe-
 num, nec pecuniam, sed penuriam, et breuem quidem famam,
 longiorem vero famem, pauperesque Camenas non facile auro
 implere vacuas Crumenas; nihil quippe ex illis addisci, quam
 splendidam vanitatem, et curiosam inertiam. Hac igitur su-
 bita, vehementi et amara obiurgatione, fulminatus quasi, ac
 totus perterritus, primum ipse putabam, me, licet inscium,
 grande forsan flagitium commisisse, seria poenitentia, et cita prae-
 fertim malorum scilicet istorum librorum venditione, religiose
 expiandum: et sane crediderim, si tum, primo isto terrore,
 mox commodus emtor, parata inprimis pecunia instructus,
 presto

praesto fuisset; quod illi bonos istos meos libros, oculis paene ipsis mihi cariores, quamuis aegerrime et inuitissime, rursus vendidissem. Sed primis illis fluctibus sensim tandem compositis, et collecto rursus animo, mihiq; post istam trepidationem, denuo paullatim redditus, serio mecum cogitare coepi, me tamen nobile potius ac laudabile facinus, quam indignum, aut illiberale, perpetrasse, nec sumtus illos cum probro ac dedecore effudisse, quod scilicet honesto discendi studio incensus, maluerim lignis, candelis, et ocreis ipsis, aliisque vitae commodis carere, quam libris; et docte potius esurire, quam indocte ligurire; quin imo, cum bonis libris, male algere, quam sine eis, bene calere. Haec ergo finis Priami fatorum, hic inquam, verae illius, sed ludicrae, historiae exitus; cuius postea, elapso interea tanto temporis spatio, toties singulari cum voluptate, recordatus fui; quoties ipsos illos Libros, mihi olim paene capitales, quos in perpetuam rei gestae memoriam, diligenter adhuc asseruo, aut forte conspexi, aut in ipsos meos usus adhibui. Ab eo autem tempore, more mihi meo, vixi, imperturbatus, nec amplius curavi inanes de mea fama, aut fame, Curatorum meorum Curas: quin potius, exinde nocturna diurnaue manu versavi Exemplaria Graeca et Latina, praesertim tamen priora, quae scilicet cum CATONE, iam sene, *sic auide arripui, quasi diuturnam sitem explere cupiens.* Etiam si enim, ut cum FAVORINO apud GELLIVM, loquar, *opera mihi princeps, et prope omnis, in litteris disciplinisque Graecis, sumta est; non infrequens tamen quoque fui Latinarum litterarum, quas quippe non subcisiuo, aut tumultuario stu-*

dio colui, vna cum Hebraicis et aliis, quod adii cere hic, sine omni vana iactantia, mihi liceat.

Liberrimo igitur cursu, et effusis veluti habenis, assidue peruagatus sum optimos illos prisca aevi Auctores, tanquam amoena Vireta fortunatorum nemorum, sedesque beatas, ut cum poeta loquar, atque duplicem ex illis fructum cepi vberissimum, nempe variae doctrinae incrementa, variarumque potissimum virtutum splendida exempla et incitamenta.

Quare minime possum hic assentiri feroci illi Mario, frustra, ita apud SALLUSTIUM, affirmanti, imo et inaniter gloriant: *Neque litteras Graecas didici: parum placebat, eas discere, quippe quae ad virtutem, doctoribus nihil profuerunt.* Quod si enim ipsis forsitan doctoribus parum, aut nihil, profuerint, profuerunt tamen haud dubie, multis discentibus ac legentibus, et etiamnum plurimum usu prodesse possunt ac prodesse solent. Inde longe veriore et aequiore istam merito existimo CICERONIS sententiam, etiam pueris ipsis, in scholis, vulgo notissimam, nec tamen ideo spernendam: *Haec studia Adolescentiam alunt, Senectutem oblectant, secundas res ornant, aduersis perfugium ac solatium praebent.* Id quod vel ipse inprimis, plus semel, per longam meam Vitam, luculentissime sum expertus, praesertim vero, in diuturno isto duroque bello, et maxime, ipsa dira obsidione; tum enim nostris quidem acerbissimis doloribus, variisque, et vndique circumfusus molestiis, alia fere nulla potuit inueniri leuatio, nisi post ipsum sacrum Codicem, vnicum istum omnis veri solidique solatii fontem plenissimum, ex assidua harum meliorum et elegantiorum litterarum

terarum tractatione; hae enim tunc nobis erant summorum dolorum solatia, hae inquam, fomenta et auocamenta.

Mirum ergo in modum, mihi semper placuit generosa illa et ingenua MURETI eloquentissimi confessio, in praefatione suarum *Variarum Lectionum*, non sine voluptate singulari, legenda: *Vere hoc tibi affirmare possum, si quis mihi Deus omnes opes, omnia commoda, omnem potentiam proponat, ea lege, ac conditione, ut semel deponam haec studia, et has qualescunque litterulas, altrices adolescentiae meae, fidissimas meorum omnium temporum comites deferam; nunquam id faciam, neque quidquam tanti esse ducam, quod mereri velim, ut a suauissimo earum amplexu et contubernio abducar.* Ad quae aurea plane verba, iam senex, laetus video, me in tenera adhuc aetate, haec olim in margine, adscripsisse: *Haec et mea mens semper fuit, semperque erit, donec viuam.* Nunquam igitur, per omnem meam Vitam, satis quidem longam, me poenituit, aut suscepti olim consilii, aut impensae postea operae in diligenter colendis istis studiis, quae in adolescentia honestissima sunt, in iuuentute optima, et in ipsa denique senectute iucundissima, cui nempe in ipso senili otio, pabulum veluti praebent longe suauissimum, quod semper reficit, et nunquam deficit, nec quidquam satietatis aut fastidii adfert. Hae enim ipsae mansuetiores litterae, ipsi arti salutari seueriori opportune iunctae, non solum frigus, duramque famem depulerunt, ut sic loquar; sed et, si non magnam, tamen aliquam, nisi omnis fallor, famam mihi circumdederunt. Nimirum istae ad instar salis sunt, aut sacchari, quae dapibus, condimenti loco,

loco, parcé ac tempestiue adiectae, omnia cibaria faciunt conditiora, nec vllum ipsis insuauem saporem facile conciliant. Dant enim vetustis nouitatem, nouis auctoritatem, fastiditis gratiam, obsoletis nitorem, obscuris lucem, sterilibus fecunditatem, aridis succum, frigidis calorem, dubiis fidem, et amarum dulcedinem: *Veluti absinthia tetra Medentes, quum dare conantur, prius oras pocula circum, Contingunt mellis dulci flavoque liquore*, vt eleganter LUCRETIVS. Vbique ergo, vel in his ipsis *opusculis medicis*, operam dedi quam diligentissime, vt, quantum fieri commode posset, aut liceret, paullo ingratioris et austerioris argumenti Exercitationes, amoeno isto humanitatis sale modice conspergerentur, atque sic vel ipsi morosi ac fastidiosi nimis Lectores, his iucundis quidem exfurdati quasi palati blandimentis, ad breuem modo earum lectionem placide inuitarentur: sequutus sic, sed nescio, an etiam assecutus, prudentissimum illud poëtae consilium satis vbique notum:

Omne tulit punctum, qui miscuit utile dulci.

Age igitur, mi optime RICHTERE, antiquos nostros mores haud exuamus, quin potius constanter seruemus, et pergamus, etiam iam senes facti, in nostris quidem studiis, tenere istam meliorem viam, quam olim in iuuentute; instituimus; quid enim quaeso iucundius esse potest senectute, iuuentutis studiis stipata? Nec demum in sera senectute, male dediscamus, quae quondam in iuuentute, bene didicimus, beneque iuuenes nos audientes docuimus. Hinc ne vnus quidem assis faciamus invidos

vidos illos et inficetos humanitatis contemptores, finamusque eorum inconditos et tumultuarios garritus, aut barritus generoso potius contemptu, praeterfluere, qui ad has ipsas suauissimas litterarum Epidorpidēs, torpidum callosumque prorsus habent palatum, ac sicut PLINIVS ait, *optima quaeque contemnere malunt, quam discere*, et tamen, vt sapere scilicet putentur, Coelum ferme ipsum vituperant, foedaque inde alienae scientiae, sibimet ipsis ignotae, obtrectatione, famam sibi aucupari student, sed vani et inani aucupio, et facere quae ipsi non possunt, verbis proterue eleuant, ad instar scilicet notissimae vulpis illius Aesopiae, quae vuam altius pendentem, et iamiam mitem ac maturam, quam imbecilli humilique nimis saltu assequi non poterat, contemtim, sed frigide et inepte, nondum maturam proclamabat. Vnusquisque enim, iudice ipso HIPPOCRATE nostro, ex his, quae ipse non habet, existimat, id quod in alio abundat, superfluum esse, quin et simul vitiosum et inde vituperabile. Nec enim pauper diuitiis elatum libenter intuetur, nec equitandi peritum imperitus, nec valentem imbecillus, nec loripes rectum, aut formosum deformis, ac balbus denique disertum, ex acuta MAXIMI TYRRI, et THEMISTII sententia; finamus ergo illos moro suo more viuere, nosque nostro rectiore, et prudentiore potius viuamus, si non forsan a praesenti ingrato saeculo, at certe, a futuro aliquanto gratiore et aequiore, dignam laudem habituro. Inde igitur insanis mentitisque praeconiis extollant alii, hodie mutatis moribus et studiis, insitas arte nefaria Variolas; nos contra perpetuo seruemus, et alamus insitam variae scientiae

cupiditatem, atque inprimis nos ipsos concutiamus cum poëta noto, *num quia nobis Vitiorum inſeuerit olim Natura aut etiam conſuetudo mala.*

Irritent porro alii miſeranda animalia fruſtra, in lentam ac crudelem necem; nos contra irriteremus, et exſtimulemus animos noſtros ad honeſtas virtutes, ac perpetuam beatae mortis meditationem. lactent denique nonnulli Colchica venena, ceu ſumma remedia; nos e contrario, forti conſtantique animo perferamus, ſi quis nos innocentes odio, inuidia, morſuque maligno venenat. Vitae tandem ipſius puritatem et elegantiam prius ſectemur; deinde etiam ſtili ac ſermonis, et relinquamus ex aduerſo, aſperam illam tetramque ſcribendi ac loquendi ſcabritiem, ſtribliginem horridamque barbariem, pluribus ſaeculorum ſuperiorum Philoſophis ſcholasticis, nonnullis item Mathematicis, imo et quibusdam Theologis, qui graecarum latinarumque litterarum, ipſiusque diuinae artis poëticae rudes, ruſ potius loquebantur, quam roſas, et hinc foeda barbarie omnia conſpurcabant, adeo, vt eorum obſcura ſcripta Lecturis ſemper vere et vbique incedendum aut reptandum ſit per loca ſenta ſitu, denſas vmbras, noctemque profundam; nihilo minus tamen inani faſtu tumidi, haec amoena humanitatis ſtudia inhumaniter aſpernabantur, omnesque generatim poëtas, pro meris fatuis fatue habebant, non bene ſecum perpendentes, ſua etiam potiffimum cauſa, longe plures eſſe fatuos, qui non ſint poëtae, quam quidem poëtas, qui ſint fatui; vnde nunc ad ipſos illos frigidos rigidosque poëſeos oſores eo facilius concludere licebit: qui nempe, vt dixi, poëtae non erant, et ta-
men

men etc. Iure igitur spretis ac contemptis raucis istis declamatoribus, nos interea laeti, securi ac tranquilli, cum poëta cantemus:

*Mibi parua rura, et
Spiritus Graiae tenuem Camoenae
Parca non mendax dedit, et malignum
Spernere vulgus.*

Sed nolo nunc TE pluribus obtundere, mi *amabilissime* Senex, ne nimium TYA patientia abusus videar, quod tamen, me non aduertente, iam fortasse factum fuerit; sed ipse nosti, senes ut plurimum garrulos esse, querulosque, ac citius finem viuendi inuenire, quam loquendi, aut scribendi. Accipe igitur quaeso hunc ipsum meum librum, eo maxime animo, quo a me TIBI mittitur, hoc est, sincero atque beneuolo. Non tamquam a viro docto, in vanam tantum ostentationem, scriptum; sed potius, tamquam a bono honestoque viro, atque candido veroque simul amico, quod omnino pluris est aestimandum; pulcherrime enim monente alicubi SENECA, *Magno quidem impendio temporum, magna alienarum aurium molestia, laudatio haec constat! O HOMINEM LITTERATVM! simus autem hoc potius titulo rusticiore contenti: O VIRVM BONVM!* Postremum ergo, nunc alloquor hunc ipsum librum meum, a me iam abiturum, TE que, auctoris sui heu! nimis remoti loco, propius salutaturum, notis his poëtae, illius exulis suoque ingenio miseri, verbis:

*Parue, (sed inuideo) sine me, Liber ibis in urbem,
Heu mihi! quo Domino non licet ire tuo.*

Ah! vtinam per iniqua tempora, dubiam valetudinem, languidam senectutem, aliaque impedimenta, ipsum comitari, tibi que mea manu, meo osculo et amplexu, simul offerre liceret! O qui complexus! o gaudia quanta tum nobis futura! heu! dura fata obstant, et obstiterunt nobis iam per triginta amplius annos. Nosti ipsemet *Amice dilectissime*, per omne hoc diuturnum tempus, nos iter molitos esse, ad nos inuicem videndos, amplectendos, et vltima eheu vice, in vita salutandos. Sed meditati tantum semper fuimus hoc desideratissimum diu iter; nunquam vero proh dolor! re ipsa exsequuti sumus, genio, nescio quo maligno, aut fato sinistro, nunquam non nobis contrario. Deinde me iam itineri isti accinctum ac paratum subito oppressit horrida illa funesti belli tempestas, quae per sex amplius annos, in nos crudelissime desaeviit, adeo, vt tandem etiam cum vltimo vitae discrimine, moenibus ceu captiui, inclusi, dirissimam obsidionem passi simus, quod, recte iudicante apud LIVIVM, Eumene, ipso experto, *omnino in belli calamitate est miserrimum*. Mox ad augendum meum dolorem, insequutus filiae meae dilectissimae desponsatae in longinquas oras abitus, quam suauissimam itineris ad TE instituenti, comitem mihi adiungere decreueram; intervenere post, vt fit, curae variae, publicae, priuatae ac domesticae, quae omnem commodam proficiscendi occasionem nobis eripuerunt, et generosum animi impetum represserunt. Senes interea vterque facti sumus, et quidem grandaeui, septuaginta iam annorum et vltra, in ancipiti, imo praecipiti stantes, aut trepidantes; capitis nostri niues, propinquae mortis gelidae hiemis nos admonent,

nent, et aetatem hanc nostram properare ad vltimam suam metam, vitaeque nostrae solem, emenso longiore spatio, dudum fessum proxime forsan declinare in occasum. Mors non patitur moram, aurem nobis iam vellens, ait, venio. Sarcinae ideo ocys sunt colligendae, vt accincti simus, paratique, tanquam ex longa nauigatione in exoptatum portum subito venturi. Heu! non licet nobis amplius spes inchoare longas, rapiamus ergo praesentes dies fugaces, rapiamus inquam, horas fugaciores, imo rapiamus denique fugacissima horarum momenta, quam minimum creduli postero diei aut inuidae infidaeque aetati. Maturemus igitur iter nostrum festinanter et rapide, non segniter et delicate, priusquam iter illud longum ac postremum nobis sit ingrediendum, vnde negant redire quenquam. Forte Deus nostrum tandem misertus, nos diu diuulsos ac disiunctos benigna vice forteque in vnam sedem reducet, ad extrema nempe oscula carpenda. TE cum, mi RICHTERE, viuere amem, tecum obeam libens.

Interea vero, quantulumcunque nobis forte vitae precariae spatium a diuina indulgentia adhuc prorogabitur; id sodes, cum CICERONE agamus, vt, *si esse vna minus possimus, ac quidem vellemus, animorum tamen coniunctione iisdemque studiis ita fruamur, vt nunquam non vna esse videamur.* Quod si autem contra, fors mea fatalis, fortasse citius exitura sit, quam tua; tum ne indefletum, nec inhonoratum quaeso, finas amicum TRIBI per omnem olim vitam, deditissimum, nec ipsum cum nobili illo poëta, mansuris tuis chartis inornatum fileri patiaris; quin potius vitam morte ereptam ipsi benigne reddas Elegis prae-

fertim tuis aeternum victuris, quibus nihil facile mundius, venustius, limatius atque pressius: Musa enim T V A quenquam a T E laudatum mori omnino vetat. Quo facto, nihil gratius iucundiusque ad meam vmbram perueniet, *quam pauca RICHTERI mei verba, sed a pleno venientia pectore veri.* Commode igitur hic mihi iterare liceat, preces illas a B V C H N E R O quondam nostro, ad O P I T I V M suum, magnum illum et primum Poëtam, directas: *si quid nobis acciderit humanitus, tamen Frater optime, memoriam nostri comiter habebis, et dabis operam, ut beneficio calami tui, parte aliqua, superem.* Haec ille ad O P I T I V M primum; Haec ego ad te, O P I T I V M alterum. Sed plura heu! intimus animi fracti faucisque dolor ac moeror iam prohibet. Ideo nunc tandem Vale o desiderium meum ac delictum! o animae dimidium meae! o rarissimi carissimique amici exemplum incomparabile! Vale, inquam, et interea semper recordare Trilleri tui, RICHTERI sui perpetuum memoris, ipsiusque memoriam ferissime demum cum Vita ipsa, depone! Ah! salue aeternum mihi, aeternumque Vale! Scribebam moestus, Wittebergae, D. X. Februar. ipso Natali meo septuagesimo secundo. Anno clc lccclxvi. quo, ut ipsemet probe nosti, ante Quinquaginta annos, quondam inclyta Academia Lipsiensis me summis in philosophia honoribus condecorauit, quae, ut ille sapienter ait, *Mentis debet esse Medicatio, et Meditatio Mortis.*



LECTVRIS

S.

CAROLVS CHRISTIANVS KRAVSE.

Non dubito, fore permultos, qui, cum *Illustris Viri*, adhucdum inter viuos agentis, *Opuscula* haec a me curata et edita esse legent, haud parum mirentur. Quamuis igitur ea res apud bonos nulla magnopere excusatione indigere videatur: tamen cum nemo facile, etiamsi optima quaeque curet, ab omni invidentium liuore et obtreſtatione tutus esse possit, placet paucis exponere, quibus demum adductis causis quaque occasione a Celeberrimo Auctore petierim, ut varii argumenti ſcriptiones, a multis retro annis ſeorſim et ſparſim editas, in vnum volumen colligere, eiusque edendi curam mihi committere vellet. Res vero fere habet ſic. Cum ego inde uſque, ex quo et *Medicinae* et aliarum artium doctrinarumque ſtudiis animum addixi, ſatis intellexiſſem, non facile quenquam poſſe ad doctrinae maturitatem non contemnendam adſpirare, niſi animum, primis doctrinarum et artium principiis

cipiis imbutum, protinus ad Veterum libros studiosius legendos
 conuerteret: ipse non iis tantummodo sedulam operam nauauit,
 sed, cum in iis multa dubia, difficilia et obscura, multa deprava-
 ta deprehenderem, ex Recentioribus quoque diligentius versauit
 scripta eorum, qui Antiquorum libros commentando, emendando,
 explicando et illustrando prae caeteris inclarauerunt. In illis au-
 tem longe eruditissimus TRILLERVS est etiam clarissimus. Eius
 igitur scriptiones, ornatae illae, et uberrima multiplicis lectionis
 copia iucundaque varietate plenae ac fere abundantes, ex iis-
 demque maxime hae, per quas aut Veterum locis obscuris lucem
 intulit, aut alia lectu iucunda et scitu necessaria de iis proposuit,
 mihi mature innotuerunt, quamuis non omnibus aequae facile li-
 cuerit compotiri. Accidit autem, ut, cum Virum Illustrem anno
 superiori Wittebergae inuiserem; liberaliterque habitus, inter
 varios sermones mentionem quoque iniicerem de utilitate et iucun-
 ditate atque raritate priorum ex doctissimis eius scriptionibus,
 earumque desiderio non paucos teneri asseuerarem, una mecum
 adesset FLEISCHERVS, Illustris Auctoris gener, vir honestissimus.
 Is ergo ad verba nostra sumtus descriptioni suggerendos ultro
 offerebat; ego vero, cum Vir modestiae studiosior non tanti pu-
 taret sua, FLEISCHERI precibus meas iungebam, et curam edi-
 tionis, si mihi ea quidem demandaretur, praefandique munus
 memet suscepturum pollicebar. Precibus tandem nostris victus
 Venerabilis Senex conditionem accepit, sic tamen, si ego et pro-
 missis starem, et omne quoque huius rei consilium a me profectum
 esse palam profiterer. Quorum nihil detrectaui, confidens plane
 fore, ut bonarum litterarum et veteris Medicinae cultores mihi
 gratias habituri essent, si tot libellos paucarum chartarum, quos
 sparsim extantes post paucos annos nusquam reperire licuisset,
 non modo in unum collectos, sed auctos etiam (nam id Illustris
 Auctor simul promittebat) ornatioresque expositos haberent, et
 legere possent. Quae quidem spes cum vana non sit, nulla am-
 plius

plius commendatione praefationisque prolixitate opus esse videtur. Ne quis tamen Auctoris amore tantummodo dicta a me illa esse putet, non alienum erit, hoc loco quaedam proponere, quae his, qui Veteres eorumque Commentatores doctissimos non ita, ut par et aequum est, legunt et appetunt, stimulos addant, qui eos faciant appetentes. Quod si hac opera mea fuero consecutus, erit, de quo vehementer gaudebo. Dolent enim omnes litterarum fautores, in plurimis adeo iam frigere earum studia, ut, nisi a paucis foueantur et excitentur, tantum non emori videantur. Ac iure sane et merito illi dolent. Nam doctorum hominum monumenta, paucis ante nos seculis edita, eorumque temporum historiae docuerunt, desertis litteris neglectisque Antiquorum libris, artes ipsas et doctrinarum studia inculta esse et relicta, neque denuo coli, vitamque quasi recipere potuisse, antequam bonae litterae renascerentur. Neque vanus metus est, ne, si Veterum lectio prorsus negligatur, spissae denuo tum caeteris artibus, tum vero maxime salutaribus obducantur tenebrae. Haec enim cum in usu potissimum et experimentis posita sit, nec tamen unius vel paucorum hominum aetas ad capienda experimenta colligendasque observationes, et condendas morborum historias sufficere queat; ars profecto salutaris non potest non maximum capere detrimentum ex neglectu eorum librorum, qui multorum seculorum observationes, et longo usu confirmatam medendi rationem continent. Quam tristis fuerit artis conditio ante eius per restauratas litteras emendationem, IANVS CORNARIUS docet in praefatione Versioni librorum PAULI AEGINETAE praemissa. Imo vero etiam post illarum restorationem, cum Medici non, ut debebant, illis veterum monumentis uterentur, optimas subinde medendi vias ignorarunt, hominibusque, cum salutem vellent, pestem attulerunt. Quod vel ex eo solo intelligi potest, quod AMBROSIVS PARAEVS de sanguinis, cum impetu ex venis et arteriis maioribus ruentis, fluxu cohibendo memoriae prodidit. Ea enim

aetate cum illam promptam et facilem medendi rationem, quae canalium deligatione fit, ad unum omnes ignorarent, misere vulneratos aut medicamentis adurentibus et adstringentibus aut ferro ignito diu saepe et frustra excruciarunt, et tormentis affecerunt, sic ut ex ita ambustis, posteaquam tormenta illa iterum iterumque admota pertulissent, vix unquam tertia pars conualesceret, et id admodum aegre, quod ambusta vulnera difficillimè ad cicatricem deducerentur. Ipse autem PARAEVS se edoctum Dei numine arbitratur illam venarum arteriarumque deligationem, cum legisset apud GALENUM, ad sanguinis fluxum sistendum nihil esse praesentius, quam vasa ipsa, quorum ductibus fit ipsa fluxio, versus radices suas, hepar nempe et cor, reliigare. Sed ante GALENUM, CELSVS noster idem genus auxilii oratione perspicua admodum proposuit. Quot autem miseros per tot annos in tam truculentis bellis putas, ignorata illa medendi via, periisse? Sed fortasse dicent nonnulli, illis quidem temporibus lectionem veterum necessariam fuisse, nostris non esse, cum tot clarissimorum virorum opera erudita et eximia ubique terrarum venalia prostant, e quibus ea, quae Medici, artem facientes, impune nescire nequeunt, ubertim hauriri compendio temporis possint. Sed quamuis neminem laude sua fraudandum esse iudicem, et a patribus nostris libros Veterum diligenter lectos, ex iisdemque pleraque excerpta esse lubenter fatear; aetate tamen nostra fuere, qui a priscis admoniti, novas utilesque medendi vias ingrederentur. RAVIVS certe, homo Germanus, inter Batauos clarus lithotomus, cum calculi curandi rationem subtiliter excoleret, per CELSI lectionem se profecisse palam professus est. Cum nuper in Galliis viri periti novum genus suffusionem oculorum curandi proponerent, id multis novum visum est et inauditum; quod tamen ab AVICENNA luculentis verbis memoriae proditum est. „Nam homines quidem, inquit AVICENNA, habent vias „diuersas in exercendo curam aquae, quae fit cum instrumento, „ita,

„ita, ut quidam sint, qui disrumpant inferiorem partem corneae,
 „et extrahant aquam per eam; et hoc est, in quo est timor, quo-
 „niam cum aqua, quando est grossa, egreditur albugineus. „
 Aqua autem AVICENNAE interpretibus dicitur suffusio ipsa, albu-
 gineus vero vitreum sic dictum humorem significat. Lique-
 tur, non ita a prioribus excussa esse Veterum scripta, ut non sub-
 inde utilia et pro novis incognitisque habita ex iis colligere lice-
 ret. Quae quidem spes etiamsi vana fuerit, verum tamen sem-
 per erit illud verbum, „Dulcius ex ipso fonte bibuntur aquae „
 dum recentiorum medicorum optimi et integerrimi quique, doctri-
 nae medicae fontes purissimos in Antiquorum libris quaerendos
 esse, ingenue profitebuntur, ipsique auctores erunt suasoresque, ut
 iuniores, perceptis artis principiis, fontes illos ipsos adeant, nec
 solos riuulos sectentur. HERMANNVS BOERHAAVIVS certe,
 at quantum nomen! medendi rationis fundamentis iactis in Insti-
 tutionibus medicinae, ab se monstratam viam medendi ab HIP-
 POCRATE, GALENO, ARETAEO aliisque Veteribus plane et
 accurate ostensam esse diserte docet. IOANNES DE GORTER
 in praefatione chirurgiae repurgatae, „Morborum internorum,
 „inquit, solida scientia cum rudi quadam duntaxat anatomica
 „cognitione, qualem veteres possederunt, multo plus vitae et sa-
 „nitati confert (videlicet quam subtilior anatome aliaque subti-
 „litates theoreticae) cum non solum cognitionem morbi in viuen-
 „tibus, verum etiam curationes sistat. Cui hoc videtur pard-
 „doxon, comparet modo HIPPOCRATEM nostrum in arte me-
 „dendi cum hodiernis Anatomicis; is enim nullibi subtilitatem
 „anatomicam crepat, sed candide, quae in morbis detexit, me-
 „moriae tradidit, et in chirurgicis fuit expertissimus. Neque
 „CELSVS minus in chirurgia quam in cognitione morborum in-
 „ternorum praestans fuit. Quibus grauissimis in arte medendi
 „auctoribus satis colligi potest, cognitionem morborum externo-
 „rum cum rudi intelligentia anatomica satis valuisse ad cogno-

„scendos morbos et curandos eosdem, modo scientia ea ulteriori
 „obseruatione practica in morbis internis confirmetur. Hoc si
 „quis neget, HIPPOCRATEM, CELSUM, GALENUM et multos
 „alios artis principes inscitiae arguit, e quibus tamen ad hoc us-
 „que tempus scientiae medicae fundamenta petuntur.„ Possẽm
 nubem testium non minoris auctoritatis adducere. Omni enim
 aetate doctos et graues viros video de neglectu veterum librorum
 esse conquestos. GALENVS suo iam tempore scripsit: „Multa
 „inuenio ab antiquis ad unguem demonstrata, quae tamen hodie
 „a plerisque nec propter ignorantiam intellecta, nec propter so-
 „cordiam intelligi tentata sunt. Et alibi, „Quinimo, inquit,
 „et inuidi nonnulli veterum libros vel abscondunt, vel prorsus
 „abolent. Quidam vero id ipsum faciunt, ut, quae in ipsis scri-
 „pta vel tradita sunt, sua esse dicant. Alii vero, quia, cum
 „ipsi in primis doctrinae lineis haereant, neque solidioris doctri-
 „nae Auctores exponere sustineant, libellos nullius frugis compo-
 „nant Auctores miserabiles.„ Cuius rei causam GALENVS rur-
 sus alibi optime explicat, his utens verbis. „Si quis Veteres negli-
 „git aut contemnit, neque proprie neque perspicue interpreta-
 „tur.„ Non autem luctor cum larvis. Nam istius farinae Scri-
 ptoribus, qui, ut SCALIGERI verbis utar, omnia scire volunt et
 nihil legerunt, et quorum tamen inanis loquacitas animos iuue-
 num veluti pestilenti quodam sidere afflat, tantum abest, ut ca-
 reat aetas nostra, ut potius abundet; quanquam et sint, pauci
 quidem, qui HIPPOCRATI Magno, et Docto GALENO, aliisque,
 quas meruere, laudes restituant. Non ignoro, quosdam dicere,
 Veterum diligentiam in rebus ad artis exercitium pertinentibus
 suspiciendam quidem esse, eam vero, quae in contemplatione et
 causarum inuestigatione posita sit, non usque quaque esse laudan-
 dam. Sed haec fors communis omnium fere et Auctorum et tem-
 porum est, etiam recentissimorum, ut theoria mutetur in horas.
 Percurras, mi Lector, artis medicae historiam; obstupebis opi-
 nionum

nionum monstris, ut summam Medicorum inconstantiam satis mirari non queas. Quorum memoriam non modo fastidit mens, sed horret et refugit. Nonne nostra quoque aetate cum HERMANNVS BOERHAAVIUS, adhibito acri iudicio, medicinam dogmaticam optime condidisse videretur, secuti sunt, qui ea, quae Vir summus artificio mirabili et diligentia summa adstruxerat, subruere conarentur, quo iure quae iniuria, alii viderint. Habentque adeo et Medicorum opiniones ac libri fata sua, neque alia eorum conditio est, quam vestimentorum, ut AVG. QVIR. RIVINVS, Medicorum Lipsiensium decus quondam summum, in praefatione operibus BALD. TIM. A GULDENKLEE praemissa monet, pilei magnitudinem mutabilem in rei exemplum faceta et eleganti oratione proponens. Quo quidem dictum a me putare noli, aut nihil omnino certi in principiis artium et doctrinarum esse, quod nuperrime aliquis, qui omnium minime debebat, dixit, aut tot eximia Recentiorum inventa in anatomicis, physicis, et chemicis nullius pretii, atque adeo susque deque habenda esse. Attamen nescio quomodo, post tot praeclara diligentissimorum hominum opera, fiat, ut cum MORTONO hodieque iis, qui de illis inventis nimis gloriantur, illud FONTANELLI, ex quinto dialogo priscorum mortuorum cum recentioribus, reponi iure quodam possit, quod ERASISTRATVS HARVAEO obiecit. „Vos magis estis „Physici, at peritiores inde Medicos euasisse inficior; aegros „enim eodem ac vos successu sanauimus.„ Sed de his quidem satis dictum sit, ne nimia diligentia et studio Veteres iunioribus commendandi nobis ipsis noceamus, neque idem nobis, quod olim PROTOGENI, nobilissimo pictori, accidat; qui, quod manum de tabula tollere nesciret, habitus fuit indoctior. Nihil igitur restat, nisi ut pauca quaedam de hac opera et cura mea dicam. Quo enim minus aut scriptiones has aut earum Auctorem pluribus laudibus prosequar, prohibet singularis eius modestia; quae quippe putidam in os laudationem vehementer auersatur. Cu-

ram autem egi, ut, cum errores temerantium operarum in huius generis libellis describendis vix caueri possent, eorum pauciores relinquerentur. Hos vero, qui forte insunt, propediem notabimus. Supersunt enim ex Auctoris nostri dissertationibus quaedam, quae, quod, mercatus tempore aduolante, a festinantibus licet operis, nobisque urgentibus, describi ac perfici non possent, volumine singulari eodemque secundo conclusae et comprehensae post paucas dierum septimanas venum habeantur. In eius fine inuenies, quae in priori errata sint. Ego vero nihil magis in votis habeo, quam ut Numen Benignius Auctori horum Opusculorum doctissimo eas animi corporisque vires in senectute largiri velit, quae HIPPOCRATIS editionem diu speratam et exoptatam nunc re ipsa molienti et instruenti, ad pertexendum, sarcinendum, et absolendum opus illud ingens, sufficiant. Interim TV, mi Lector, his utere et vale. Scripsi in Academia Lipsiensi in ipso mercatus vernalis strepitu. A. P. C. N. clc lccclxvi.



CONSPECTVS
DISSERTATIONVM
PARTIS PRIMAE
CVM IPSIS NOMINIBVS
CANDIDATORVM RESPONDENTIVM.

Differt.	1.	de Fame lethali,	Ephraim Frid. Bulifius	pag. 3
— —	2.	de Cancri Extirpatione.	Io. Carol. Christian. Titius	41 56
— —	3.	de Pleuritide aestiua.	Frid. Henr. Krieger	86
— —	4.	de Hippocratis studio anatomico.	Traugott Balth. Christian Stentzel	107
— —	5.	de Veritate paradoxo Hippocr.	Ernest. Samuel Wehle	133
— —	6.	de Cortice peruuiano.	August. Mildreich Barthius	173
— —	7.	de Tumoribus singularibus.	Io. Tob. Deterici	198
— —	8.	de Tabaci ptarmici abusu.	Aug. Ludou. Vnwürde	220
— —	9.	de Morte subita ex Violarum odore.	Petrus Rensch.	237
— —	10.	de Morbo Coeliaco Celsi.	Christian. Immanuel Loescher	281
— —	11.	de Pinguedine ceu succo saperfluo	Diff. inaugural. ipsius Auctoris.	293



CONSPECTVS
EXERCITATIONVM MEDICO-PHILOLOGICARVM
S E V

P R O G R A M M A T V M,

PARTIS SECVNDAE

CVM IPSIS CANDIDATORVM NOMINIBVS.

- Exercitat. I. de Veterum Chirurgorum Arundinibus atque Habenis, pag. 317
- — II. Vberior de eodem Argumento, sub auspiciis muneris academ. publicata. 328
- — III. de Clysterum nutrientium Antiquitate et vsu. Frid. Aug. Immanuel Zinckernagel 399
- — IV. de Pityriasi Vesicae, Io. Wilhelm Frid. Iahn 413
- — V. de Gibbo ex Nephritide potius, quam ex phrenitide orto, apud Hippocr. Traug. Balth. Christ. Stentzel. 431
- — VI. de Scarificatione et Vstione oculorum apud Hippocr. Gottlob Andreas Pasche 463
- — VII. de Scarificationis Oculorum Historia, Antiquitate et origine, Io. Traugott Boehme 485
- — VIII. de Remediis Veterum cosmeticis, eorumque noxis, Carolus Gottlieb Magnus 496
- — IX. de Morbo per Sapientiam mori, apud Plinium, Samuel Auguft. Wagner. 508
- — X. de Mensibus per Nares Leonidae Filiae erumpentibus, ab imprudentiautem Medico cum ipsius interitu infelicitate repressis, ad Hippocr. Io. Tobias Deterici 524
- — XI. de Vino modico Hypochondriacis salutari, ad illustrat. i Timoth. V, 23. Frid. Gotthelf Schroeerus 534
- — XII. de Macie Corporis ex Obsidione contracta, ad Galenum. Io. Fridericus Sinz. 544
- — XIII. de Planta quadam venenata eiusque furioso effectu λιδοστερόφω, copiis Antonianis olim exitiali, ad Appianum. Io. Frid. Gottlieb Friederici. 556

OPVSCVLORVM
MEDICORVM

PARS PRIMA

COMPREHENDENS

DISSERTATIONES.

OPUSCULUM
MEDICORUM

PARS PRIMA

COMPTON

DISEASES



DISSERTATIO MEDICA PRIMA.
DE
F A M E L E T H A L I
EX CALLOSA
O R I S V E N T R I C V L I
A N G V S T I A .

P R O O E M I V M .

Vna tantum nascendi lex proposita est cunctis mortalibus; mille autem moriendi necessitates iisdem sunt impositae, adeo, ut hinc, ex quorundam veterum Philosophorum opinione, natura ipsa circa hominum finem operosior atque ingeniosior fuisse videatur, quam circa eorundem ortum atque progenerationem. Inde igitur SENECA Pater *Lib. III, Controuers. XVI.* et *Lib. VII, Cont. I.* iam olim, ita haud praeter omnem rationem, conquestus est: *Multas rerum natura vias aperuit, et multis itineribus fata decurrunt: et haec est conditio miserrima humani generis, quod nascimur uno modo, multis morimur: laqueus, gladius, praeceps locus, venenum, naufragium, mille aliae mortes insidiantur huic miserrimae animae.* Qualia etiam in hunc sensum plura leguntur passim, apud PETRONIVM, *Cap. CXV*, PLINIVM maiorem, *Lib. VII, cap. I.* et LIII. VALERIVM MAX. *Lib. IX, cap. XII.* IV-

LIVM FIRMICVM, *Lib. I, Astronom. cap. IV.* HYGIVM, in *Fabulis*,
 PLVTARCHVM, AELIANVM, STOBÆVM, aliosque plures; pleni
 enim sunt vbiuis Veterum libri eiusmodi querelarum. Conf. huc inprimis
 IO. PRICÆI *Observat. ad APVLEII Metamorph. Lib. XI. p. 687.*
 sqq. vbi plurima veterum loca de his innumeris caducae humanae vitae
 casibus fortuitis, quam diligentissime congeffit.

Bene autem hic addit SENECA *mille alias mortes.* Quis enim,
 quaeso, vel enumerare, vel coniectura tantum assequi valeat omnes illos
 innumeros fere numero casus subitos, repentinos, improuisos, insolitos
 atque inexpectatos, qui ab externa violenta causa atque iniuria illati, mi-
 seros incautosque mortales, festinatis fati, ante diem, ocyssime media
 e vita rapiunt, adeo, vt animi corporisque infirmo admodum filo cohae-
 rens societas velocissime dirimatur? Plena quidem, vt notum est, eius-
 modi fatalium casuum subitaneorum spatiosa sunt volumina et theatra sic
 dicta tragica, quae ingenti numero exposita patent oculis eruditorum;
 et tamen, quod merito dolendum, post vberimam illam messem, residui
 adhuc spicilegii atque

materiae tanta abundat copia,

Labori faber ut desit, non fabro labor.

Hinc missis his, ad ipsos potius accedamus morbos, assiduos illos
 lethi fabricatores, vt belle ait LVCRETIVS, qui scilicet singulis fere
 momentis, perquam foecunda foetura, intra nosmet ipsos, progeneran-
 tur, totque tantisque copiis atque quasi cateruis, nos miseros infesto
 impetu quotidie adoriuntur, vt exactissimus eorum numerus vix, ac ne
 vix quidem, iniri queat. Inde et summus, post Deum, nostrae artis
 salutaris conditor, HIPPOCRATES, illos temerarios, qui certum
 morborum numerum definire frustra conati fuerunt, iam sua tempestate,
 haud immerito ita increpuit, in aureo Libro *de Vitu Acutor.* haud pro-
 cul ab initio: *Ἐγώ τοι τὰς ἀειδμενὰς ἐκάτ' τῶν νοσημάτων σάφα φεράζων*
ἔδειλοντες, οὐκ ὀρθῶς ἔγραψαν. Nonnulli singulorum morborum numeros
 clare et perspicue pronunciare volentes, haud recte scripserunt. A qua
 verecundi et prudentis Senis verissima sententia haud longius abest
 Stoicorum Philosophorum princeps SENECA, in diuina fere *Epistola*
XC V, perquam lepide atque acute, pro more suo, ita scribens: *Innu-*
merabiles

EX CALLOSA ORIS VENTRICULI ANGVSTIA. 5

merabiles esse morbos, non miraberis; coquos numera! PLINIUS tamen maior, binis his maximis viris paullo audacior, omnes morbos ad exactiorem quendam numerum redigere ausus est, his quidem verbis, *Lib. XXVI, cap. I. Parum erant homini certa morborum genera, quum supra CCC essent, nisi etiam noua timerentur?* Sed *Libro XXV, cap. III.* siue poenitentia, siue verecundia, siue vtraque, ductus, mutata sententia illa decretoria, incertum potius, quam certum morborum numerum, ita posuit: *Qua quidem in reputatione misereri sortis humanae subit, praeter fortuita casusque, et nomina, quae omnis hora excogitat ad millia morborum, singulis mortalium timenda.* Quo et maxime pertinet grauissimum illud et verissimum ipsius ST. AVGVSTINI effatum, *Lib. XXII. de Ciuit. Dei, cap. XXII. pag. 1087.* Iam vero de ipso corpore tot existunt mala, ut nec libris Medicorum cuncta comprehensa sint, ubi vid. *LVD. VI- VES, in not. p. 1088. et inprimis LEON. COQ. pag. 1089. seq.* Huc et SENECA, *Lib. VI. Nat. Quaest. cap. XXVIII.* Inde subitae continuæque mortes, et monstrosa genera morborum, ut ex nouis orta caussis. Conf. et maxime ipsius *Epist. 95. item CELSI praefat. pag. 5. et pag. 13.* ut et *PLVTARCH. Sympos. Lib. VIII. Quaest. 9.* vere quoque et acute, et si breuiter pronunciauit *DIO CHRYSOST. Orat. VI. pag. 91.* *Ζῆν δὲ ἀνθρώπους νοσημάτων γέμοντας, ἃ μὴδὲ ὀνομάσαι ῥᾶδιον:* *uiuere vero homines, morborum plenos, quos omnes ne nominare quidem facile.* Conf. et eiusdem *Orat. xxx. p. 302. et Orat. XXXIII. pag. 409.* Add. his e recentioribus Auctoribus *IO. LANGII Epist. med. 13. Lib. II. CLAVD. SALMAS. de Ann. Climat. pag. 726. sq. DIEMERBROEK Lib. I: de peste, cap. 8. pag. 19. Not. HOFFMANN. opp. med. Tom. I. pag. 187. MATTH. ad HIPPOCR. de Dec. Orn. p. 238. seq. aliosque plures, quos iam praetereo, praesertim LINNAEVM ac SAUVAGES, qui Catalogum morborum immane quantum auxerunt.*

Recentiore autem aeuo, saeculo scilicet post Chr. N. xiv. decantatae illius arcanæ artis aurificæ seu verus possessor, ut multi prudentiores dubitant, seu vtnus iactator, ut plures contra adfirmant, ARNOLDVS inquam VILLANOVANVS, numerosas aegritudinum copias non intra hos angustos quasi limites timide coercuit; quin potius, liberius et vltius excurrendo, atrum tristemque earum catalogum immane quan-

tum auxit, dum nempe morbis bis mille a se obseruatis, additamenti loco, centum adhuc et viginti quatuor adiecit. Quod equidem tantopere mirandum haud videtur, modo quis secum reputauerit, in sola illa tenerrima dulcissimae lucis visusque officina, in vnico inquam oculo, CXII. diuersos morbos iam olim obseruasse GALENUM PERGAME-
NUM, superioribus autem saeculis, CXX. in eodem adnotasse RENATUM LAURENT. BARREVM; et nostro denique aeuo, longe adhuc plures detexisse et descripsisse celeberrimos ocularios, GVIL. COWARDVM, ANTONIVM, CAROL. DE SAINT YVES, THOM. WOOLHOVSIVM, TAYLORVM aliosque plures. Ipse vero TAYLORVS, vt id obiter hic adiiciam, me ipso tum praesente, quum anno 1750. magna cum pompa, hic Wittebergae esset, spem, forsan incertam, Vitae Visusque miseris luce egentibus, daturus; sed eo certius lucrum ex hac liberali et splendida promissione, secum ablaturus, CCCLXIII. morbos oculorum confidenter enumerabat, ingens eheu! et paene nimius numerus, ad vnius tantum hominis oculos turbandos ac vexandos; quod et de eodem Ophthalmiatro famoso iam adnotauit ill. HALLERVS in *Commerc. Litt. Med. Norimb. de anno 1734. pag. 354.* Conf. huc et ill. MORGAGNI praestantissimum et vtilissimum opus, *de Sedibus et causis Morborum*, praefat. ad *Libr. IV. pag. 254.* vbi hanc ipsam nostram Dissertationem laudat, quod et alibi saepius fecit in isto eximio plane opere. WOOLHOVSIVM autem numerasse CCXL. oculorum morbos, obseruat MAVCHART. in *Dissert. de Scarificatione Oculorum.*

Quodsi igitur a parte ad totum, et ab vnico corporis membro, tot tantisque morbis obnoxio, ad vniuersum eiusdem ambitum, concludendum fuerit; tum sane illico, opinor, liquido patebit, nondum accuratum omnium morborum numerum esse definitum, nec omnes hactenus in iustum censum referri potuisse, in primis, quum noui indies et singulares morbi nascantur, sed inexplicabiles, diuersi et multiformes, qui noua quasi nomina sibi adhuc quaerunt, nouasque hinc sibi medelas exposcunt, adeo, vt inde tanta materiae vbertate inducti et inuitati merito fuerint Medici quondam clarissimi, PETRVS SALVS DIVERSVS, CAROLVS PISO, et praesertim ARNOLDVS BOOTIVS, *de particularibus morbis, hactenus nondum tractatis, item de praeteriitis huc usque*

vsque morbis, et denique de affectibus omissis, integros tractatus conscribere, et in commoda publica diuulgare.

Licet enim quamplurimis eiusmodi casibus insolitis, nouis et inobseruatis referti sint nimium innumeri paene obseruationum medicarum rariorum libri; nondum tamen exhausta penitus est praediues illa materia, quin semper nouum incognitorum haecenus morborum agmen vbiuis gentium late emergat, et funestum aegritudinum catalogum subinde largiter augeat atque amplificet. Quod vel inter alia innumera, bini illi rarissimi prorsus exempli casus, nec visi haecenus, nec prius descripti, manifestissime testantur, quos inimitabili fere elegantia, ordine ac industria, depinxit verius, quam calamo adumbrauit rediuius quondam, heu! quondam, in Belgio HIPPOCRATES, HERMANNIS inquam BOERHAAVIUS, Amicus et Fautor noster summus, dum fata Deusque sinebant. Quid autem, quaeso, mirum, nos iam quotidie novos, et omni aevo priore incognitos, morbos experiri, quando iam sua tempestate, de eiusmodi variis morbis nouis et ignotis, quos furiosa illa terrarum marisque vastatrix, luxuria, inauspicato, ceu totidem supplicia, inuexerat, quo, saginati quasi in poenam, carius perirent incauti mortales, acerbè conquesti sunt ipsi veteres a diis quasi adhuc recentes, nempe CICERO, SENECA, PLINIVS, TACITVS, PLVTARCHVS, PLATO, ATHENAEVS, AELIANVS, alique plures? quibus et acute succinit VENVSINVS vates, Lyricorum princeps:

*Macies et noua febrium
Terris incubiuit cohors:
Semotique prius tarda necessitas
Lethi corripuit gradum.*

Sed legi in primis hic meretur hanc in rem venustissimi Latini HIPPOCRATIS, CORNELII inquam CELSI, egregius plane locus, *in praefat. aeternum victuri de Medicina, operis: Saepe uero etiam noua incidere genera morborum, in quibus nihil adhuc usus ostenderit, ut ideo necessarium sit, animaduvertere, unde ea coeperint; ceu sine quo nemo mortalium reperire possit, cur hoc, quam illo, potius utatur.* Haecenus iste Medicorum TULLIVS,

et illom

Quodsi

Quodsi autem praestantes illi et sapientes viri, factorum indulgentia, in hoc nostrum aeuum delati forent, adeo, vt fuisset ipsis oculis contemplarentur, quot nouis insanabilibusque plerumque morbis nos miseri hodie infestaremur; tum sane et sui saeculi felicitatem haud dubie praedicaturi essent, nostri autem e contrario infelicitatem merito deploraturi.

Vt enim alia taceamus, ex nouo praesertim orbe non solum novae opes, illa malorum irritamenta, nouaque aromata et odoramenta, ad nos, ex veteris nostri orbis contagio iam intercutibus vitiis maldentes, transfretata sunt; sed et, quod merito dolendum, nouae simul pestes, morbique peregrini teterrimi et immedicabiles, nouaeque et repentinae mortis species, quin et atrocissima et inexpugnabilia venena, damno profecto lucro, ad nos exportata fuerunt, quasi videlicet parum ad interitus nostros, terra late pateret.

Sed quis erit nobis lucri pudor? inde petuntur

Huc Libycae mortes, et fecimus Aspidam mercem.

Bonos igitur mores marcida desidia et voluptuosa luxuria adeo sensim vitiauerunt, corporaque nostra torosa antea atque habitiora ita vna eneruarunt ac effoeminarunt, vt insoliti morbi, subitae mortes, et intestata senectus, exinde nunc frequentius apud nos exoriantur. Ipsa denique tenerima et artificiosissima vniuersi corporis nostri machina ex innumeris paene partibus particulisque scite composita, per se, tot tantisque casibus perpetuo patet, vt nulla in ea sit fibra, nulla vena, nullus tubulus, nullum denique vasculum tam exiguum atque exile, quin, vbi quid ex iisdem, distortum, contractum, obstructum, vel quocunque demum modo deprauatum fuerit, inextuperabiles morbi mortesque ineluctabiles exinde aboriri facile possint.

Quod licet mille exemplis e solertiorum Medicorum obseruationibus collectis, nullo paene negotio, ostendi et confirmari posset; in praesenti tamen, ex amico breuitatis studio, vnus tantum, isque singularis plane et perquam rarus casus, ad istud probandum, sufficiat, qui paullo plenius, Lectorum pace, enarrabit gulosi cuiusdam helluonis miseranda et truculenta fata, quem medias inter lautissimas epulas, et suauissima
mollioris

mollioris potius, quam melioris, vitæ blandimenta, dira tamen atque crudelis fames acerbissime oppressit, vitamque eius in medio cursus sui spatio, ante diem, atrocissime abrupit.

Supremum autem, quod omnia moderatur, Numen supplices oramus ac obtestamur, vt huic nostro labori, in ipsius potissimum gloriam, deinde artis salutaris incrementum, et aëgrotorum denique emolumentum, a nobis suscipiendo, secundos prosperosque successus clementissime velit elargiri.

CASVS SINGVLARIS

^A PRAESIDE IP SO

ANNO CID ID CCXXXII. OBSERVATVS.

Vir quidam nobili genere natus, annorum xxxvii. opibus fortuna relictis, haud labore partis, abundans, pinguioris aqualiculi iuxta ac ingenii, et ingeniosioris gulæ, quam capitis; erat nempe ex isto desidiofo hominum male viuorum genere, qui viuunt potius, vt edant, quam edunt, vt viuant, et propter sola conuiuia nati esse videntur: Hic, inquam, nepotum altissimus gurgēs, iam ab aliquot retro annis, gravem quandam glutiendi molestiam secum perceperat, praesertim, quoties solidioris quid cibi in vacuum demittere stomachum vellet.

Tunc enim primum confusus, et insoliti affectus nouitate quasi attonitus, animaduvertebat, alimento non libero et iucundo lapsu in eundem deferri; sed potius in primo veluti itinere, pertinacius haerere, et in ipso aditu aliquamdiu acrius luctari: donec tandem aliquo post tempore, vel difficillimo nisu, sensim descenderent, vel, quod saepius accidebat, violentiore vomitione, cum sudore frigido, capitisque acerbō dolore, semesa et indigesta redderentur; adeo, vt saturum esse, liberet quidem, mox tamen saturum esse, ob summos angores et molestias, rursus pigeret.

Quod quum tanti adhuc mali ignarus, ceu leue quid suaque sponte iterum mox transiturum, ab initio contempsisset; inualecente tamen in dies auctis subinde viribus, molestissima illa cibos detru-

dendi difficultate, non omnia hic tuta esse, moestus anxiusque recte coniecit.

Tum igitur, ancipiti mentem formidine pressus, serio circumspicere coepit fera nimis Medicorum consilia et auxilia, ut scilicet infidiosum illum hostem, adhuc incognitum, liberiores ciborum ingestorum descensum ab aditu importune arcen-tem, prompta strenuaque manu, extemplo abigerent et expugnarent. Aegerrime enim omnino ferebat, tantopere adamatam gulam iugulumque sibi ipsi nunc peti, in cuius tamen voluptuosa passione vnicum quasi totius vitae suae tabernaculum hactenus firmiter collocauerat.

Verum haec omnia vano consilio speque inani sic agitabantur; quoniam nempe morbi non intellecti nulla erat curatio speranda. Quo magis enim arte medendi pugnatum fuit a peritissimis artis salutaris magistris, a remotissimis fere mundi angulis, ingenti sumtu, frustra arcessitis; eo minus tamen laudabili conatui respondebat laetabilis euentus. Exitium enim superabat opem, quaesitaeque potius nocebant artes, adeo, ut omnes salutiferi auxiliores, postquam varia, nunc bene, nunc male, tentassent, inglorii hinc discederent.

Quin potius eousque quotidie increfcebat insuperabilis mali dira saevitia, ut, quoties ad mensam lautis admodum opiparisque dapibus onustam ministeriisque instructam, accederet hic helluo miserrimus, toties ad cibos capiendos adeo usque inhorresceret, uti ad formidatas aquas intremiscere, foedo spectaculo, solent a cane rabioso clanculum adinorsi. Acerrimis enim licet stimulis vacui ventris impulsus, nihil tamen in tanto ciborum lautiorum apparatu usquam reperiebat, quo latrantem stomachum lenire posset; immo potius gulosis quasi oculis, inter lamentabiles questus et lacrimosa suspiria, adpositas dapes, inani saltem pastu, ventriculo ipsi nihil profuturo, deuorabat,

Epulaeque ante ora paratae.

Regifico luxu: Furiarum maxima iuxta

Accubat, et manibus prohibet contingere mensas.

Ipsi igitur melioribus ferculis alias adsueto, ad vitam miseram ut-
cunque sustentandam, mortemque ipsam aliquantisper adhuc arcen-
dam, confugiendum denique vel inuito, fuit ad liquidissimas solum
forbi-

DE CALLOSA ORIS VENTRICVLI ANGVSTIA. II

forbitiones, quas tamen et ipsas tanta quidem cum molestia et anxietate, per lentissima interualla et temporis spiramenta, subinde sensim ingessit, vt vel duodecim tantum earundem cochlearibus exsorbendis, longissimum sex septemue horarum spatium aliquando vix sufficeret: obortis tamen interea simul crebris vomendi conatibus, tetris artuum tremoribus, sudoribusque tractuosus, fronte potissimum, tergo atque pectore, ingenti copia expressis.

In hac denique deplorata rerum suarum conditione, me quoque ipsum, vix tum e longinqua peregrinatione reducem, accessit, montesque aureos, immo dimidiam bonorum suorum haud mediocrium partem mihi munificentissime pollicitus, querulo ore, irriguo fletibus vultu, et submisso paene poplite, per omnia sacra me rogabat, vt sibi mortalium omnium miserrimo, et foeda, nec voluntaria fame proxime perituro, quantumcunque possem, opis quid adferrem, obturatumque hucusque per quaedam praepedimenta saeua incognita, ostium, cibis capiendis alias liberum et apertum, auxiliatrice manu potenter referarem, neque vllis proinde parcerem sumtibus, ad salutarem illum scopum citissime consequendum: se quippe malle omnino pane secundo siliquisque, pauperem viuere, quam fame opulenta, diuitem interire.

In hunc autem fere modum, istum suum atrocem insolitumque affectum viuide satis describebat: scilicet sese omnes oblatos cibos perquam commode et sine vlla offensa, ab initio, demittere posse, ast, vbi recto cursu per gulam descendissent, tunc denique omnes simul immotos plane perstare, neque vllam amplius eosdem detrudendi potestatem sibi superesse; postque subito oriri dolores acres pressione quadam grauantes vehementes vomendi conatus, et perpetuas praecordiorum anxietates sudore saepe frigido comitatas. Hinc igitur sese iure vereri, ne oppositum forsan sit ipsi quidem ventriculi ostio aliquod peregrinum et insolitum repagulum, aut remoramen, quo cibi per gulam demissi ab vltiore in stomachum ipsum introitu violenter arceantur, et contra, turbato naturae ordine, repulsi, ad superiora retro agitentur.

Quibus omnibus id etiam denique addebat, sese per omnem fere vitam, niue atque glacie adeo supra modum, delectatum hactenus

fuisse, ut per omnes aestiuos dies, et potionibus niuatis, et bellariis glacie conditis, largissima copia sese quotidie impleuisset; quo scilicet nouum voluptatis sensum reciperent fauces quasi emortuae et cibis ardentibus occallatae. Interim tamen minime credere, veram et unicam hanc esse causam tam funesti euentus, quin alium potius subesse fontem, quo ista clades sit deriuanda.

Ad quae ego, quum alte ingemuisssem, occidit, occidit spes omnis eheu! mecum tacite exclamaui, ipsique perquam exigua ingentis luctus solatia dedi, quoniam ex hactenus relatis facile colligere et praeuidere poteram, fida iamiam experientia aliquoties probe edoctus, superius ventriculi osculum ita summa vi esse constrictum, coarctatum, longoque temporis tractu, adeo usque intractabile fuisse factum, ut nulla amplius medicina locum commode habere posset; sed omnia nunc potius desperata et penitus conclamata essent.

Ideoque ipsi exitio iam suo quasi destinato, suspensis non nihil ac obscuris verbis, vltimam propemodum necessitatem denunciaui, atque, ne sese vanis longioris vitae blandimentis frustra amplius induci pateretur, serio monui.

Ne tamen ex spes plane a nobis dimitteretur, ipsius rogatu, praescripsi, quasi in speciem, clysmata quaedam, ventrem flatibus turgidum commode exoneratura, nec non externa fomenta atque epithemata delenifica, quibus atrox malum, si non penitus tolleretur, quod nempe nulla amplius medicina, ut modo dixi, efficere poterat, at leuaretur tamen aliquantum et mitigaretur: quod et per aliquod tempus, ita vtcunque successit ac profuit.

Neque tamen multum post fefellit triste nostrum augurium: anno enim nondum plene exacto, misellus iste homo in tam diras durasque demum angustias reductus fuit, ut itinere illo cibario interea penitus clauso et obsepto, ne minimam quidem vel tenuissimae forbitionis particulam, in debilem tantum vitae ruentis fulturam, intromittere amplius posset. Et miserandum sane erat spectaculum cunctis, quum cibos, haustus, et omnia vitae oblectamenta imperiosa fames simul fastidiret, et posceret.

Hinc

Hinc exhausto sic per longa ieiunia, omni paene spiritu vitali, famisque plusquam Erisichtoniae lentitudine, viribus sensim fractis et confectis, animam tandem ieiunam indignantemque cum gemitu reddidit, magnas inter opes inops, et medias inter luxuriosas dapes famelicus. In cuius enim plura poscentem ventrem Lucrina conchyliis, Afra auis et attagen Ionicus haecenus, rabida cum voluptate, descenderant, ut cum poeta loquar, is inquam fatali necessitate eo demum miseriarum adactus fuit, ut ad tenuem spiritum sustinendum, mortemque differendam, ne minimam quidem panis mollissimi buccellam ingerere amplius valeret, sicque luxuriosae gulae promeritas quasi poenas daret, qui antea per eandem, nimia liguritione, peccauisset.

Sic corpus clade horribili absuntum extabuit.

Aperto autem post fata, cadauere, rugosa macie horrido et sola lurida cute tecto, illico dictis nostris aut diuinationibus vera constitit fides. Namque mox cum ingenti Visorum praesentium stupore, prehensum liquido fuit, in ventriculo flatibus congestis, vesicae ad instar, distento, superius eiusdem os ita a naturali et consueto sui ordine monstruose deflexisse, ut potius cartilagineam, immo paene osseam naturam iuduisse videretur, tanta quidem cum coarctatione, callosaque duritie, ut ne summum quidem specilli acumen, aut extrema pennae scriptoriae pars, nisi suprema vi adnota, per istud angustatum nimis maleque peruium ostium, in ipsum ventriculum cominode demitti posset.

Immo adeo usque durum atque renitens repertum fuit exiguum illud atque contractum ventriculi osculum, ut vix ipsius acuti scalpelli acie discindi a chirurgo potuerit, stupentibus cunctis, atque hinc ineluctabili fato merito ingemiscantibus.

Sic enim manifestissime patuit et mali inexpugnabilis immensa magnitudo, et vanum infructuosae medicinae conamen, et veridicum denique futuri tristicius eventus praesagium, ipsa nempe experientia et oculata quasi fide, affatim confirmatum. Istud namque latens malum opinione prius, quam oculis, et suspitione ante, quam manibus, prehenderamus.

R E S O L V T I O H V I V S S I N G V L A R I S C A S V S

C V M

Q V A D A M E P I C R I S I.

§. I.

Adeo usque misera, fluxa et caduca humana est natura, totque ac tantis casibus ac vicissitudinibus perpetuo patet, ut aerumnosum mortalium genus semper quasi sub ictu ferali trepidet, districtumque ens sem super fragili ceruice pendentem, singulis fere momentis, extimescat. Intra vero nosmet ipsos, quod tanto profecto peius, saevi isti ac insidiosi nostrae precariae vitae hostes atque tyranni, veluti arbores occulto aevo, nascuntur, atque a nobis ipsis, plerumque tamen insciis, aluntur, fouentur atque sustentantur, donec collectis sensum viribus, subito ferocissime prorumpant, atque omnia circum se late deuastent ac depopulentur.

§. II. Nimirum corpus nobis circumiectum, supremum istud atque luculentum diuinae maiestatis opificium, ex partibus solidis fluidisque, siue, ut vulgo loquuntur Medici, continentibus ac contentis, artificiosissime et inenarrabili prorsus sapientia, compositum esse atque conflatum, inter omnes, putem, constat. Inde vix necessarium videtur, spatiosum earum Catalogum hic operose nimis, ad fluentem usque nauisem, pertexere, crambemque toties coctam recoquere.

§. III. Haec autem fluida solidaque ita inter sese comparata atque aequali naturae lege distributa sunt, ut amicabile et adiutabile consortium semper ineant, sibi inuicem mutua officia praestent, quo nempe exinde sanitas, omnium rerum mortalium pretiosissima, intemerata conseruetur, ipsiusque vitae spatium ad feram usque senectutem, si pote, prorogetur.

§. IV. Verum tam miseranda nostrae humanae machinae est conditio, ut innumerae propemodum causae casusque tam iatus, quam extra, quotidie, immo singulis fere horis, incidere et oriri possint, quibus utrarumque istarum partium infirmo admodum vinculo cohaerens societas,

fatietas, si non plane dirimi, at facile tamen, maximo cum sanitatis et ipsius vitae detrimento, relaxari et interturbari queat.

§. V. Calida nempe iuuenta, frigida et effoeta senectus, ingluuio-
sa nimium et licentiosa victus ratio, immodicus vini venerisque vsus, im-
portuniores animi agrotantis affectus, caelum nocens et graue, insalu-
bris aer et ager, ancipites et venenosi cibi, aquae amarae, asperae, coe-
nosae, paludosae, tabo infectae, mortiferae, morbi ipsi innumeri sua
sponte nati, nec humana culpa contracti, et mille aliae causae, quas
memoria vix suggerere omnes valet, utraque illas partes, praesertim
tamen fluidas, adeo usque continuo, velut agmine facto, exagitant, con-
turbant ac deprauant, ut inde profecto vel maxime mirum sit, misellum
hominem, inter tot continua aestuosissima turbamenta tam interna,
quam externa, vnum saltem diem, nedum complures annos, saluum ac
incolumem viuere posse, aut adeo extremam canae senectutis lineam
attingere valere. De quo stupendo paene miraculo vid. passim HOFF-
MANN. item STAHLII *sched. de mixti et viui corporis vera diuersitate*,
ut et in *Theoria medica vera* p. 53. *sqq.* praecipue vero KUNDMANN.
in *Rar. Nat. et Art. Sect. III. obs. med. singul. Artic. XVI. p. 899. et Artic.*
XXVII. p. 1010. sqq. Conf. et Cel. HALLERI *praelect. Acad. Boerhaau.*
Vol. II. pag. 335. et poem. nostr. Tom. IV. pag. 27. in Not. et pag. 464.
ut et *Tom. II. pag. 482. in Not.* quibus add. DIONIS CHRYSOSTOM.
Orat. XXX. pag. 302. vbi locus elegantissimus, qui huc maxime spectat.

§. VI. Fluidae autem istae partes plerumque ex duplici causa et ra-
tione vitium contrahunt, nimirum vel ex quantitate, vel denique ex
qualitate.

§. VII. Quantitas igitur earum vel nimia est ac superflua, vel rursus
minima et praeparca, ita, ut in utramque partem, iustum sic ubique defi-
ciat aequilibrium, in quo tamen vnice consistit ipsa sanitas.

§. VIII. Si itaque nimia est ac exuberat, tum vasa atque canales,
quibus illa fluida continentur, mox ultra modum, copiosiore eius afflu-
xu opplentur, grauiore mole premuntur, distenduntur, expanduntur,
et hinc saepius rumpuntur et dilacerantur. Corpus autem ipsum vna,
foeda saburra ac inertis sagina praegrauatur, suspectisque quasi bonis obrui-
tur, adeo, ut inde repentini morbi et subitae mortes frequentius oborian-
tur.

§. IX.

§. IX. Sin autem ista quantitas contra aequo contractior fuit et circumscriptior; tum vasa illa seu receptacula, iusta fluidorum mensura haud repleta, nec satis irrigua, sensim concidunt, flaccescunt, contrahuntur ac interarescunt, adeo, vt ipsum exinde corpus humoribus defectum, viribusque desertum, pedetentim frangatur et depascatur.

§. X. Fluidorum vero qualitas potissimum deprauatur, quando vel in glutinosum lentorem compingitur, vel contra in aquosam aut pituitosam colluuiem resoluitur, vel in mucidam vappam hebetatur, vel in edacem acrimoniam exacuitur, vel aliis denique modis inuertitur, ac in peius mutatur. Vnde nempe diuersi morbi, acuti pariter ac longi et diuturni, pro diuersa scilicet istius vitiosae qualitatis ratione, et conditione, prognerantur, qui vel cito finiunt, aut finiuntur, vel e contrario, per ambitiosiora longi temporis spatia exporriguntur, ac lenta tabe marcescentia corpora conficiunt.

§. XI. Non tamen hae ipsae fluidorum mutationes vitiosae ita vbiuis comparatae sunt, vt omnis prorsus medelae sint impatientes: quin potius adhuc per Dei gratiam, nonnulla supersunt valentiora auxilia et praesidia aduersus illas directa, quae vel ex ordinatiore et prudentiore diaeta, vel e laboriosa arte gymnastica nitidaque palaestra, vel denique e selectiore apparatu medicamentario commode peti, et a Medicorum artis peritorum solertia in vsum oportune aduocari possunt.

§. XII. *Tenuis enim homo, ex salutari et sapienti CORNELII CELSI consilio, Lib. I. cap. 3. implere se debet, plenus extenuare, calidus refrigerare, frigidus calefacere, madens siccare, siccus madefacere, vel ex simillimo facundi QVINCTILIANI praecepto, Declamat. VIII. Si viscerum nimius ardor stricta circa se membra durauit, adhibe remedia laxantia; Si fluitat nimis aeger humoribus, praesto sint, per quae, pressis clusisque venis, in nouas vires corpus arescat. Si parum prodest abstinentia, rursus ciborum qualitate foueatur. Si spiritus receptis premitur alimentis, ad puriores meatus ieiunio fameque tenuetur.* Quoniam nempe, teste VEGETIO, contraria nonnisi contrariis medicinis, curantur. Quod tamen vnicum solidissimumque rationalis medicinae fundamentum hic ab utroque laudatum, desumptum est ex ipso medicorum maximo et naturae peritissimo indagatore, HIPPOCRATE; cuius hanc in rem egregia prorsus
loca

loca sedulo legi merentur in libris bonae frugis plenissimis, de *Natura humana*, de *Locis in homine*, de *Morbis epidemicis Lib. v i.* de *Diaet. Lib. i.* de *Elatibus*, et aliis, quae hic digito potius solo indicare praestat, quam operose exscribere, quoniam scilicet alterius sunt loci et temporis. Vid. interim, si placet, *poem. nostr. Tom. vi. pag. 573. in Not. ad Epicedium ILL. MEADII*, vbi vberius et exactius de summa ista prudentia medica et sanitatis iusto aequilibrio tractauimus.

§. XIII. Haec interim pauca de partium fluidarum immutationibus ac affectationibus morbofis, maioris potius ordinis, et lucidioris perspicuitatis causa, quam ex duro vrgentis necessitatis imperio, hic ideo, eum praesertim in finem, generatim praemittenda duximus, vt nempe nobis eo expeditiorem aditum pararent ad ipsam de partibus solidis, earundemque mirandis prorsus, saepiusque monstruosis a naturali ordine aberrationibus, tractationem, de qua nobis in sequentibus sermo potissimum est instituendus.

§. XIV. Partes autem solidas hic nos praecipue istas intelligimus, quae locum quasi intermedium obtinent inter durissima ossa, et ossibus rigida tenacitate fere proximas cartilagineas, et nunc vel plus, vel minus, sunt molles, aut asperae, tenaces, aut friabiles, leues, aut graues, humidae, aut siccae, et quae id genus alia plura.

§. XV. Ista nimirum solida intermedia sunt omnia viscera, tribus illis notissimis ventribus, nempe capite, thorace, ac abdomine, comprehensa, scilicet cerebrum, cor, pulmo, hepar, ventriculus, lien, pancreas, renes, vesica, intestina et alia, item omnia vasa, arteriae, venae, nerui, canales lactei et lymphatici, glandulae, carnes, seu muscoli, tendines, membranae, ligamenta, verbo, omnia illa instrumenta, sustentacula ac fulcimenta, quae mox in prima artificiosissima corporis fabricatione, tam mirando prorsus nexu inter se apta et colligata fuerunt, vt scilicet sanitatem ab omni offensa tutam praestarent, valido tenore omnia membra firmarent, atque ipsam, denique vitam tenuissimo pendentem filo, quantum liceret, perpetuarent.

§. XVI. Sed hae ipsae solidae partes, licet plerumque tam tenebrae, tam lubricae, molles ac flexiles sint; tamen, quis credere ausit? ex causis nondum ad liquidum perductis, nec vnquam, credo, perducen-

dis, adeo usque saepissime a consueto ordine et statâ naturae lege desciscunt, ut in aliam prorsus atque insolitam formam ac figuram mutatae, nunc in tenacem callum compingantur, nunc in solidam cartilaginem, aut rigidum os indurescant, nunc denique, horrendum dictu et auditu, in asperum lapidem obrigescant.

§. XVII. Hinc itaque in vniuerso corpore humano, nulla fibra tam tenuis est, nulla vena et arteria tam flexilis, nullus nervus tam ductilis, nulla membrana tam tenera, nulla glandula tam friabilis, nullum ligamentum tam lentum, nulla caro tam succosa, nullum cerebrum tam glandulosum, nulla lingua tam fungosa, nullum cor tam musculosum, nullus pulmo tam spongiosus, nullum hepar tam laeue, nullus ventriculus tam villosus, nullum omentum tam reticulatum, nullus lien tam textilis, nullus ren tam canaliculatus, nullum intestinum tam voluminosum, nullus testiculus tam glomeratus, nulla mentula tam cauernosa, atque in molliore ac venustiore sexu, nulla mamma tam teres ac delicata, nulla clitoridis tam sensilis, nullus vterus tam flexuosus, nullum ouarium tam vesiculosum, et nullus denique foetus tam tener et exos; quin omnia illa et plura alia, ex rationibus omni mentis humanae indagini quam solertissimae plane incomprehensibilibus, turbato rerum ordine, ingeneratam sibi naturam sensim exuant, atque nunc in torpidum callum condensentur, nunc in duras cartilagines, aut his duriora ossa, solidentur, nunc denique, abominando prorsus spectaculo, in lapidosas crustas indurentur, ut inde inexplicabiles ac immedicabiles morbi subito exardescant, mortesque inexsuperabiles rapidissima pernecitate subsequantur. Vnde forsan haud incommode huc illud trahendum SENECAE, *Lib. III. de Ira, cap. 15. Quaeris, quod sit ad libertatem iter? Quaelibet in corpore tuo vena: Quod tamen, praemollita duriore rigidi Stoici sententia, ita potius invertere liceat: Quaeris, quod sit ad morbum et mortem iter? Quaelibet in corpore tuo vena. Verum haec obiter, et quasi in transitu.*

§. XVIII. Sed erunt fortassis hic nonnulli, ut sunt incredula plerumque pinguiora mortalium ingenia, qui, tantarum in corpore nostro mutationum prorsus ignari, omnia haec pro febriculosis quasi insomniis, aut plusquam anilibus deliramentis sint habituri. Illi vero, meliora edocti,
-nunc

nunc sciant, nihil ficti aut mentiti hic traditum fuisse, sed omnia potius diligentissimis praestantiorum Medicorum obseruationibus valide innixa esse, quorum intemeratam fidem in dubium vocare velle, iniuriosum omnino nefas fore existimamus.

§. XIX. Vt igitur dictis nostris eo luculentior fides constaret, singularia quaedam et selecta exempla, ex immensa fere obseruationum medicarum congerie, huc transferre et in concinniore paullo ordinem dirigere placuit. Vnde nempe liquido, vt spes est, apparebit, nihil prorsus in medium a nobis allatum fuisse, nisi quod firmissimis testimoniis, et inexpugnabilibus probationibus solide esset praemunitum.

§. XX. Ordiamur itaque, melioris ordinis gratia, ab ipso capite, et quod intra eius ambitum praecipue reconditur, cerebro, Daedalea illa vitae, mentisque ac ingenii officina. Illius autem crassae membranae, siue durae sic dictae matri, induratae quandam materiam et lapideam, instar rupis cuiusdam inaequalem et asperam, aculeis multis, et veluti cati vnguibus, conchyliis, variisque figuris distinctam et variegatam, firmiter adhaerescensem, vidit, descripsit et depinxit quoque, ISAACVS CATTIERIVS *Obs. xv. Obseruationum Medicinalium*, PETRI BORELLI *Obseruationibus Medicophysicis* sub finem adiectarum, ex quo illud stupendum naturae miraculum, memoratu sane dignissimum, solita facundia repetiit elegantissimus Medicorum, NICOL. PECHLINVS, *Obseruat. Med. xli. Lib. ii. pag. 314.* vbi simul id genus plura, quae huc praesertim faciunt, scite obseruata leguntur. Quin et sex eiusmodi officula aspera, ipsi adeo piaae matri tenaciter inhaerentia, sese conspexisse, memoriae prodidit testis oculatus et fide hinc dignissimus, THOMAS BARTHOLINVS, *Histor. Anat. rar. lxxxv. Cent. ii. pag. 323.*

§. XXI. Intra ipsius etiam septum sic dictum falciforme, osseam substantiam, immo et officula quamplurima aspera, ferrata et rupis ad instar inaequalia et acuminata, stupentes aliquoties deprehenderunt, LEONARDVS BOTALLVS, IOANNES AB HORNE, et modo laudatus PECHLINVS, *Obseruat. Med. xl. Lib. ii. pag. 312.* quae tota huc spectat et conferri sedulo meretur, ac denique celeberrimus quondam noster ADAMVS BRENDDELIVS, praematturo fato huic Academiae nostrae, ingenti damno, ereptus, *Obseruat. Anatom. vi. Decad. pri-*

mae, vt alios iam taceamus, qui idem passim diligenter obseruarunt. Conf. *Acta Med. Berolinens.* Vol. I. p. 44. *sq.* et inprimis THOM. BARTHOLINI *Anat. Renou. Lib. III. cap. 2. pag. 466.* vbi ipse ad suam *αὐτοψίαν* prouocat.

§. XXII. Sed parua profecto adhuc loquimur: Ipsum enim adeo cerebrum, mollissimum illud ac tenerrimum viscus, non solum in callosum et glandulosum fungum ac scabrum tophum coaluisse; sed et adeo, quis non ad haec, quaeso, obstupescat? maximam sui partem, in perquam rigidum lapidem, mori fructui figura simillimum, obduruisse, testes sunt grauissimi, IO. KENTMANNVS, THOM. BARTHOLINVS, GEMMA, HOLLERIVS, WIERVS, MARCELL. DONATVS, NICOL. PECHLINVS, loco supra indicato, p. 314. item IO. IAC. WEPFERVS, et ex eo magnus BOERHAAVIUS, in *Institut. Med.* 264. vbi tamen vid. Celeb. HALLERVS, in *Praelect. Academ.* Vol. II. p. 494. alique plures, laudati iam modo allegato BARTHOLINO *Hist. Anat.* xci. Cent. VI. pag. 357. vbi nempe rarissima historia de integro bouis Suecici cerebro, in saxeam molem et massam prorsus immutato, relata legitur; quale et, teste eodem Cl. HALLERO, obseruauit postea DVVERNEY iunior, in *Memor. Academ. Scientiar. Reg. Paris. An. 1703. pag. 314. sqq.* Sed plura hanc in rem exempla collegit in primis citatus supra KENTMANNVS, in *Lib. de Lapidibus seu Calculis*, qui in corpore ac membris hominum innascuntur, item SENNERTVS noster, *Lib. II. Instit. Med. part. II, cap. 9. add. MEIBOM. in iusiur. Hipp. cap. XVI. pag. 153. BONET. in Sepulchret. et alibi, item DAN. VINK, Amoenit. philos. Med. Sect. III, cap. I. pag. 201. vbi ad ipsius magni BAGLIIII experientiam prouocat, et maxime STALPART VAN DER WIEL, *Obs. med. varior. Cent. prim. Obs. XII. pag. 54. sqq. in Not.**

§. XXIII. Nihil igitur plane mirum, si etiam illa angusta nimis animae augustae sedes, a summo cetera Cartesio, sine prudentiorum tamen suffragio, perperam ipsi assignata, sanctissima nempe illa, vt vulgo putatur, glandula pinealis, nunc rigide occalluit, nunc in tophaceum lapidem induruit, nunc denique arenulas ac lapillos secum inclusos tenuit, illaesa tamen prorsus acuta mentis acie; quod plusquam vigesies solus obseruauit REGNERVS DE GRAEF, item SYLVIVS, BARBETVS,

EX CALLOSA ORIS VENTRICVLI ANGVSTIA. 21

BETTUS, IOAN. VAN HORNE, WILLISIUS, PECHLINVS aliique viderunt, laudati iam THOM. BARTHOLINO, *Anat. Ref. Lib. III, cap. 6. pag. 496.* et praesertim ISBRAND. DIEMERBROECK, *Lib. III. Anat. cap. 6. p. 353. Opp. cum aliis*; quibus accedat RAYMUND. VIEVSSENIUS, *Lib. I. Neurograph. vniuers. cap. XI. pag. 139.* Quinimo FLORENTINVS SCHVYL, portentosioris illius opinionis Cartesianae perquam strenuus calidusque alioqui defensor, imperiosae tamen veritatis praepollente virtute actus et impulsus, ingenue fassus est, in erudita *Praefatione ad Cartesii Librum de Homine*, a se latinitate donatum: se in illa decantata glandula pineali lapillum aliquando inuenisse, qui plusquam dimidium ipsius glandulae occupauerit. Sed plura hanc in rem collecta vid. apud laudatum STALPARTVM VAN DER WIEL, *Cent. I. Obs. 12. pag. 33. sqq. in Not.* Quale quid et nostra ipsa aetate obseruarunt bini isti Anatomicorum antesignani, FRID. RVYSCHIVS, in *Theaur. Anat. v. pag. 28.* et IO. BAPT. MORGAGNVS, in *Aduers. Anat. VI. Obs. XI. pag. 10.* vbi prioribus exemplis supra productis noua aliquot addit, a se ipso quondam visa et diligenter adnotata: plura vero mirandae istius rei exempla et historias tum ex propria experientia, tum aliorum Medicorum fide dignissimorum scriptis depromtas, exhibet idem Vir maximus in opere incomparabili, *de Sedibus et Caussis Morborum*, Tom. I. Lib. I. *Epist. v. pag. 40. sqq.* praesertim vero Tom. II. Lib. V. *Epist. LXI. pag. 405. sqq.* quibus potissimum add. B. SALZMANNI, Amici et Fautoris nostri summi, quum Argentorati olim essemus, dissertat doctissima, *de Glandula pineali lapidescente*, item B. GVNZII *prolusio acad. de Lapillis Glandulae pinealis, in quinque mente alienatis, inuentis.*

¶ XXIV. Inde nunc minus mirabilia esse videntur ea, quae, de arteria aspera tota in os conuersa narrant CARDANVS de epiglottide illius, seu lingula et operculo, vt CICERO et CELSVS scite loquuntur, pariter ossea, PAAVIVS, de cartilagine scutiformi in osseam duritiem mutata, FVIRENVS, PECHLINVS, BARTHOLINVS, et alii, de thyroide et cricoide, FALLOPIVS, de arytaenoide, RIOLANVS, et de aliis cartilaginibus, eidem fato semper expositis, et ipsa sua rigida iam natura, in proximam rigidiores osseam mutationem semper pronis, alii plures, apud BARTHOLIN. *Anat. Ref. Lib. IV, cap. 2. p. 696.* Prae-

fertim autem illas sterni cartilagine, cum quibus ipsae costae, ut notum, committuntur, flexiliorem suam naturam saepius exuere, et continuum quasi os formare, pridem notatum est a PAVIO, HILDANO, FALLOPIO, PECHLINO et aliis: et nosmet ipsi, paucis adhuc annis, inoestissimi obseruauimus in celsissimo Duce, quo iustior alter nec pietate, nec bello et armis maior, fuit, cuius praematura fata adhuc acerbè deploramus. Illius enim cartilagine sterni adeo usque in osseam dritem obriguerant, ut ne acutissimo quidem scalpello, uti mos est alias, discindi, sed stridula potius ferra secari potuerint, ut alia iam mittamus passim obuia et cognita. Conf. IO. RHODII, *Mantissa Anat. ad THOM. BARTHOLINVM, Obs. VIII. et CLOPTON HAUERS Osteolog. Disc. V. pag. 317.*

§. XXV. Sed haec quidem nec subitum nec funestum nec vitae ipsi detrimentum inferunt; grauioris autem discriminis res est, ubi vel callosa, vel ossea, aut lapidea materia peregrina ipsius spongiosi pulmonis

Vitalesque vias et respiramina clausit,

cuius perquam calamitosi fati, iam sua olim tempestate, frequentius meminere Medici praestantissimi, GALENVS, *Lib. IV. de Loc. affect. cap. 8.* ARETAEVS, *Lib. I. de Morb. chron. cap. 12.* PAVLLVS AEGINETA, *Lib. III, cap. 28. et 31.* et ALEXANDER denique TRALLIANVS, *Lib. V. cap. 4.* Nostra vero aetate, longe plures Observationum Medicarum industrii Scriptores innumera paene exempla, notatu sane dignissima, in literas relata nobis subministrarunt. Quos inter eminent. REINER. SOLENANDER, CAROL. PISO, DOMIN. PANAROLVS, SALMVTH, *Obs. 7. Cent. I.* DODONAEVS, PLATERVS, SCALIGER, alique plures, quos longa serie collectos exhibent IO. RHODIVS, *Obs. Med. III, Cent. II. et IO. SCHENCKIVS, Obs. XLIX, Lib. II.* item THOM. BARTHOLINVS, *Anat. Ref. Lib. II, c. 9. p. 418. et Hist. Anat. XXXIII, Cent. I.* nec non DIEMERBROECK, *Anat. Lib. II, cap. XIII. pag. 306.* et maxime BONETVS, *Tom. II. Med. Septent. Lib. II, Sect. XI, capp. 6. et sqq. pag. 365. sqq. et Sepulchret. Tom. I, L. II, Sect. VII, Obs. II. p. 687. Obs. 79. p. 723. et Obs. 86. p. 726. sqq.* item ZACVT. LVSITANVS *Hist. Med. princ. XXXVII, Lib. II. pag. 381. sqq.* praesertim vero huc vid. STALPART VAN DER

DER WIEL, *Obs. med.* 28. *Cent.* I. *pag.* 116. *sqq.* et quae ibi in *Notis* congeffit ex variis auctoribus exempla paria copiosissime et diligentissime. Sed in primis memoratu dignus est sequens singularis casus, quem de Presbytero quodam asthmatico, his ipsis verbis refert IO. BART. HELMONTIVS, de *Asthmate et Tussi*, 43. *pag.* 349. *Dissecto pulmone, inuenitur sinistri lateris lobus posterior, durus, et e pumice lapidescens: intusque, quasi grumus per pulmonem occalluisset. Vbi autem aspera arteria in quatuor lobos dispergitur, grumi caseosi erant, inter cartilaginem et pumicem medii, pluresque eius modi lapilli, sparsim per pulmonis regionem visi.* Hactenus ille. Sed et bronchi particulam osseam obseruauit GERARD. BLASIVS, in *Obseruat. Med. rarior.* 6. *Part.* VI. in quo egregio libro et plura alia, quae huc spectant, singularia legi omnino merentur.

§. XXVI. Neque vero perennem illum vitae salutisque fontem ac dispensatorem, cor inquam ipsum, pulmonibus proxime vicinum atque socium, ab illa pestifera labe prorsus immune esse; quin potius saepe in tenacem callum obtorpescere, vel in lentam cartilaginem solidari, vel in rigidum os indurari, vel denique potiore sui partem in asperum lapidem obrigere, complura sane affatim docent exempla memorabilia, per solertiores Medicos summa fide publice consignata. Cor igitur cartilaginosum ipse vidit ac descripsit RIOLANVS, et ex eo THOM. BARTHOLINVS, *Epist. Medicinal.* LXVI. *Cent.* I. *pag.* 273. vbi et plura, quae huc spectant, leguntur. Cordis valuulas sic dictas semilunares in osseam plane duritiem degenerasse, cum stupore, deprehendit Anatomicorum princeps, FRID. RVYSCHIVS, *Obs. Anatom. Chirurg.* LXIX. *pag.* 65. et dudum ante eum, HENR. A MOINICHEN, in *Epist. ad Bartholin.* XCVII, *Cent.* II. *Epistolar. Medicinal.* THOM. BARTHOLINI, item et PECHLINVS, *Obs.* XL, *Lib.* II. *pag.* 313. post hoc autem ill. MORGAGNVS, *Epist.* 30. *pag.* 22. *Tom.* II. magni operis praestantissimi. Osseam, aut lapideam concrefcentiam, sinistri cordis ventriculi substantiae musculosae innatam et concretam, conspexit GERARD. BLASIVS, *Obs. rar.* 13. *Part.* VI. *pag.* 80. Pericardii, vel etiam ipsius Cordis concretionem osseam in MARIA MEDIC. et GASP. SCHOMBERGIO post fata, obseruatam fuisse ex THVANO et MEZERAEO, adnotauit DRELINCVRTIVS, in *Libitinae Tropaeis*, *Part.* I. *pag.* 219. *Opuscul. Med.*

Med. per BOERHAAV. editor. alia plura hic similia obseruauit collegitque ill. MORGAGN. de *Sed. et Caus. Morb. Tom. 1. Epist. 27. p. 290. sqq.* Ossâ, cartilagine, massas informes carnosas, adipatas, nerueas, membranaceas, aliaque peregrina corpora, immo et adeo lapidosa coagmenta, saepius in iisdem ventriculis reperta fuisse, testantur RIOLANVS, IO. TRVLLIVS, SIMON PAVLLI, HOLLERIVS, PLATERVS, WIERVS, SALIVS, SEVERINVS, SMETIVS, alique plures, magno numero iam laudati THOM. BARTHOLINO, *Anat. Ref. L. II, c. 7. p. 394.* et in *Epist. Med. supra allegata, LXVI, Cent. 1.* in primis autem ISBRAND. DIEMERBROECK, *Lib. II. Anat. Cap. IX. pag. 278. sqq.* vbi et ipse Cl. Auctor rariores suas in hanc mirandam rem obseruationes fideliter subiunxit. add. MARCELL. DONATI, *Med. Hist. mirabil. Lib. V, cap. 4. pag. 570. sqq.* Et quis, quaeso, terribiles illos iniussos cordis incolas, crudelis perniciosissimae mortis fabricatores, nescit, polypos inquam istos grandes, crassos, radicosos, cartilagineos, carnosos, membranaceos, tenaces et veros, non ex sanguine glutinoso temere concretos? quales accurate descripserunt nobis Tulpus, BARTHOLINVS, BONETVS, DIEMERBROECK, VELSCHIVS, MALPIGHIVS, PASTA, ZOLLICOFFERVS, RIVERIVS, SENACIVS, PECHLINVS, STALP. VAN DER WIEL, *Obs. med. 38. Cent. 1. p. 115. sqq.* vbi plura in *Not. exempla*, et alii nouissime vero GOHLIVS, in *Descriptione mirandi polypi, Berolin. 1710.* item GOETZKE, de *polypo Cordis, Spiraë, 1764.* et Cel. ANT. DE HAEN, *Rat. Med. Part. II, c. 7. p. 101. sqq.* item HOFFMANNVS, *Opp. med. Tom. III. p. 278. sqq.* BOHN, *diff. de Exper. fallaci, p. 669. et p. 671. append. ad Circ. anat.* praecipue vero ill. MORGAGNVS, *Epist. 24. p. 257. sqq.* et quos ibi allegat auctores plures et nosmet ipsi bis, acerbè dolentes, vidimus, in binis personis splendidis, longiore immo longissima vita, in publica commoda, dignissimis. De quibus lethiferis eheu! polypis, vid. si placet, *Poëmat. nostr. Tom. V. pag. 406. in Not. item Tom. IV. pag. 595. ibique Not. add. et Tom. II. pag. 217. sq.* et quae ibi obseruata.

§. XXVII. Sed ipsam quoque arteriam magnam, ramosam illam ipsius cordis progeniem, naturam suam flexiliorem saepius degenerasse, atque nunc circa sui exortum, nunc circa progressum ac descensum, nunc

nunc procul ab origine, vel cartilaginofam rigiditatem induiffe, vel osseum solidamentum contraxiffe, res sane est extra omnem controuersiam posita, et quam plurimis variorum auctorum fide dignorum testimoniis liquidissime confirmata, nimirum magni HARVEII, RIOLANI, WILLISII, VESLINGII, BONETI, CAROL. OFFREDI et aliorum, quorum laudatissima nomina relata leguntur apud THOM. BARTHOLINVM, *Anat. Ref. Lib. II, Cap. VII. p. 406. et Epist. Med. XC VII, Cent. II. p. 722.* NIC. PECHLINVM, *Obs. iam saepius citata XL, Lib. II. pag. 313.* et IO. RHODIVM, *Obs. Med. LXIII, Cent. III. p. 154.* qui ipsi eiusmodi abnormia naturae, saeuo quasi cum ioco ludentis, portenta perspicue viderunt, et candide adnotarunt, quale et legere licet apud GERARD. BLASIVM, *Obs. Med. rar. 5. Part. VI. p. 77.* et cum primis in *Act. Med. Berolin. Decad. II, Vol. VIII. p. 21. sqq.* et in *Annal. Wratislau. Ann. 1725. Class. IV, Art. XI. p. 659.* Praesertim vero huc conf. laudati modo MORGAGNI ILL. *Epist. 27. Tom. I. de Sedibus et Causis Morb. p. 292. sqq.* vbi plura, quae huc spectant, lectu dignissima. Singulare quoque exemplum Arteriae magnae ossesactae descriptum a IAC. ANDREA BEGGI, vid. in ANTON. PACCIONI, *Epistolis physico-anatom. pag. 217.* et aliud a GODEFRED. THOMASIO observatum in *Epist. ad Lochnerum de Concretis vermiformibus per vesicam egestis, pag. 29.* vid. rursus MORGAGN. *Ep. 30. p. 22. Tom. II.* Quid, quod nobismet ipsis probe adhuc notum est triste eiusmodi exemplum Reu. cuiusdam imperii Principis, sine praeuio morbo, noctu, subito extincti, in cuius corde non solum sinistra auricula occallata; sed ipsa etiam arteria magna emergens, maximam sui partem ossea plane, atque passim imperuia, fuit deprehensa. Quin et calculum adeo mirabiliter prorsus figuratum in illo arteriae magnae ramo, qui vergit ad Eustachii glandulam sinistro reni impositam, sese quondam reperisse, testatur vir et arte et facundia insignis, NICOL. TVLPIVS, *Obs. Med. Cap. XXV, Lib. II. pag. 136.* qui et similem fere lapidem scabruin in vena thoracica externa hospitantem animaduertit, vt ibidem plenius enarrat *Cap. XXII, Lib. IV. p. 312.* Sed et arteriam iliacam, item et splenicam, variis in locis, tofi ad instar induratae, obseruauit et descripsit testis oculatus NIC. PECHLINVS iam saepius laudatus, *Obs. XLI, Lib. II. pag. 314.* Huc

D

et

et potissimum refer B. CRELLII, nostri doctissimam *Diss. de Arteria Coronaria, instar ossis indurata Witteberg. 1740.* merito laudatam a magno MORGANO, *Epist. 24. Tom. I. pag. 253.* qui ipse ibi plura ea de re. Sed et eodem pertinet altera B. nostri STENZELII *Diss. de steatomatibus in principio Aortae Witteberg. 1723.* contra quam tamen vid. quae monita sunt, in *Act. Med. Berolin. Decad. II. Vol. V. pag. 7. sqq.* Nempe omnes omnino venae ac arteriae illi fatali necessitati subiectae sunt, ut occalescere vel in cartilagineum, steatoma, os, aut lapidem quoque indurescere possint. Hinc venam portae ex parte osseam vidit, descripsit ac depinxit anatomicorum maximus, RVYSCHIVS, *Obs. Anat. Chirurg. LXX. p. 66.* ut alia iam taceam exempla apud BONETVM, SCHENCKIVM, STENTZELIVM nostrum, Auctores *Act. Med. Bero-linens.* et alios passim obuia; quia nobis iam properandum.

§. XXVIII. Carnosae septi transversae, seu diaphragmatis parti os duriusculum adnatum, externa cartilagine tectum, conspexit THOM. BARTHOLINVS, *Hist. Anat. LXXXV, Cent. II.* ipsius vero partem nerveam paene osseam factam magnus observavit MORGAGN. *de sed. et Causs. Morb. Tom. II. Epist. 70. pag. 450.* mesenterium maximam sui partem plane osseum, IO. RHODIVS, *Obs. XCVI. Cent. II.* totum autem lapidosum, PANAROLVS, *Obs. p. 313.* apud BONET. *Sepulchret. Anat. Tom. I. Libr. II. Sect. 7. Obs. 136. pag. 750.* et alias vehementer induratum, idem MORGAGNVS, pancreas quoque in tenacem scirrhum ac cartilagineam duritiem mutatum, ibidem *Obs. XCVII.* quod ipsum et lapidosum vidit PANAROLVS *Obs. med. pag. 52.* quale triste fatum et omnibus generatim glandulis frequentissime contingere sole-re, notissimum est, ut videre licet apud PARAEVM, HILDANVM et alios plures, quos laudat TH. WHARTONVS, in *Adenographia Cap. XI.* et XXXIX. item alibi. Lienis membranam non solum cartilagineam, sed et adeo lapidosam valde, et ferro usque renitentem, ut et cum sonitu resiliret, obstupescens fere, inuenit PECHLINVS, *Obs. XLI. Lib. II. p. 314.* ubi de membranarum et arteriarum tosis agit, uti in antecedenti *Obs. XL.* de tendinum, membranarum, cartilagineum et ligamentorum ossificatione, ut nempe loqui amat: quae observationes totae huc vel maxime spectant. Eandem vero lienis tunicam et osseam et cartilagi-neam,

neam, immo et corii bubuli ad instar crassam, deprehendit THOM. BARTHOLINVS *Anat. Ref. Lib. I. Cap. 16. pag. 159.* et post eum alii, vt HELLWIGIVS, *Obs. med. 97. pag. 286.* ibique in *Schol. SCHROECKIVS*, item HARDER. in *Apiar. Obs. 61. pag. 244.* vt et HOFFMANN. *Opp. Med. Tom. II. pag. 216.* et nouissime ill. MORGAGN. laudato iam supra *Op. Epist. 36. pag. 67. Tom. II. vbi plura exempla:* quibus add. MARCELL. DONATI *Hist. med. memorab. Lib. V. Cap. 4. p. 574.* Sed et ipsum peritonaeum, variis arenosis particulis vndique conspersum, obseruauit FRID. RVYSCHIVS, *Obs. Anat. Chir. LXX.* quod et de omento complures Autores adnotarunt, vid. in primis PANAROL. *Obs. pag. 134.* cum quibus conferendus DIEMERBROECK, *L. I. Anat. Cap. 6.* Aliam eiusmodi membranam lapillis exilibus obductam vidit ac descripsit TVLPIVS, *Lib. II. Obs. med. Cap. XLVIII.* Ipsum illud molle alias ac blandum teneri foetus receptaculum ac hospitium, vterum nempe, nunc praeter naturam cartilaginofum, nunc callosum, nunc denique adeo vsque lapideum deprehensum fuisse, vna cum ipsa tenella prole, in rigidum plane lapidem conuersa, quod sane omnium portentosissimum a variis praeclaris Autoribus est passim adnotatum, quorum ipsa loca lectu digna sedulo collegit MARTIN. SCHVRIGIVS, in *Mulierib. Hist. Med. Sect. III. Cap. 2. pag. 232. 267. 270. et sqq.* Add. THOM. BARTHOLIN. PARAEVS, HELMONTIVS, SACHSIVS, KVNDMANNVS, et in primis IO. ALBO-SIVS, de *LITHOPAEDIO Senonensi.* Qualem et praegrandem vteri virginalis XVIII. librarum molem ex pinguedine cartilaginosa totam congestam, horrendo spectaculo, a se ipso visam, delineauit BLASIVS, *Obs. Med. rar. 7. Part. I. p. 12.* qui et ibidem *Obs. 9. p. 13. sqq.* osseam plane testiculi-puellaris praetumidi substantiam, a se quondam repertam, fuse descripsit. Quod etiam obseruatum STALPARTIO VAN DER WIEL, *Obs. Med. Anat. Chir. XXXIIIV. Cent. poster. part. prior. p. 389.* item et DIEMERBROECK, *Lib. I. Anat. Cap. XXIV. p. 131.* Sed magis profecto adhuc dictu et auditu horrendum illud erat portentum, quum idem BLASIVS, vt refert ibidem *Obs. 6. pag. 10. 11.* et depingit, vniuersum mulieris cuiusdam tabidae abdomen in cartilaginofam eiusmodi materiam, abominando auctu et incremento, prorsus muta-

tum inueniret. Verum et pruriginosam istam muliebris pudoris columellam, seu clitoridem, osseam aliquando conspectam fuisse, commemorat TH. BARTHOLIN. *Hist. Anat.* 69. *Cent.* III. *pag.* 137. *Epist. Med.* 94. *Cent.* III. *p.* 407. et *Anat. Ref. Lib.* I. *Cap.* 34. *p.* 292. atque ex eo DIEMERBROECK, *Lib.* I. *Anat. Cap.* 26. *p.* 153. item SCHVRIG. in *Gynaecologia*, *Sect.* II. *Cap.* I. *pag.* 128. qui et ibidem *pag.* 107. aliam singularem PAVLLINI obseruationem in medium adfert de particula virili falaci in osseam pariter rigiditatem consolidata: quem ipsum vid. *Obs. Med. phys.* 72. *Cent.* I. *pag.* 88. vbi et de Clitoride ossea.

§. XXIX. Hepar quoque ipsum nunc in pertinacem scirrhum indurescere, nunc diuersis figuram ac colorem calculis, aut materia lenta viscida ac gypsea intus oppleri, nunc denique lapidoso quasi cortice extus incrustari, plura docent exempla a PARAEO, HOLLERIO, HORSTIO, DODONAEO, BELLONIO, aliisque allata, apud BARTHOL. *Anat. Ref. Lib.* I. *Cap.* 14. *p.* 143. item *Epist. Med.* 2. *Cent.* III. et *Ep.* 56. *Cent.* II. *pag.* 586. et in *Artis Med. Berolin.* vt et *Naturae Curiosorum*: in primis autem in iis lepidis et eruditis libellis, quibus hepatis mendacem purpuram fortiter detraxit, eiusque exequias celebravit, idem anatomicorum princeps fui quidem temporis, THOM. BARTHOLINVS, nempe de *Hepate defuncto*, de *Hepatis exauctorati desperata causa*, vt et de *difficili Hepatis Resurrectione*, aliisque: Vid. et DIEMERBROECK *Anat. Lib.* I. *Cap.* 14. *pag.* 70. item ill. MORGAGNVM in magno illo et praeclare *op. de sedibus et Causis Morb.* *Epist.* 37. *pag.* 75. *sqq.* *Tom.* II. vbi plura, quae huc spectant, et magnum VESALIVM, in longa illa ac docta ad IOACH. ROELANTS *Epistola*, *pag.* 674. *Tom.* II. *Opp.* item eo nil minorem RVYSCHIVM, *Obs. Anat. Chir.* LXXXVI. et LXXXVII. qui et calculum durum in ipso hepatis parenchymate a se quondam repertum fuisse testatur, *Obs. Anat. Chir.* XXIV. Idem vesiculae quoque felleae, calculosa materia intus prorsus obductae, meminit, *Obs. Anat. Chir.* XXXI. cuius non insolitae rei complura exempla ex variis Auctoribus studiose collecta profert IO. RHODIVS, *Obs.* 2. *Cent.* III. qui et *Obs.* 3. vesicam felleam plane osseam, in puella ictero diuturno confecta, sese obseruasse affirmat. Quin et nosinet ipsi ante complures iam annos, in strenuo vini praesertim spiritus

ritus potore, in publica platea subito extincto, stupentes, cum aliis, deprehendimus hepar eiusmodi ingens, praedurum, ponderosum et albario quasi opere externam sui superficiem adeo usque obductum, ut vel acutissimo scalpello vix discindi posset. Conf. huc Cl. RICHTERI iun. *Dissertatio*, quae tota huc spectat, de *intumescente et calloso pyloro*, cum *triplici hydrope*, pag. 19. et quos ibi laudat Auctores.

§. XXX. In simile autem lapidosum duramentum diriguisse tunicam lieni circumiectam, paullo superius, ex ornatissimo PECHLINO, commemorauimus. Adhuc tamen altius pestem istam saepe penetrasse, atque ipsum lienis corpus interius, tenerum illud ac cancellatum, adeo usque durum ac rigidum reddidisse, ut vix cultro cederet, nisi maxima vi intruso, singulari exemplo, inter alia, ostendit THOM. BARTHOLINVS, *Hist. Anat.* LX, Cent. IV. pag. 358. GEORG. quoque QVECCIVS, item et SCHENCKIVS, ac RIOLANVS, viderunt lienes, media sui parte, substantia cartilaginea incrustatos, referente DIEMERBROECK, *Lib. I. Anat. Cap. XVI. p. 83.* et alii. Conf. huc Celeb. RICHTERI veteris nostri et coniunctissimi amici et studiorum olim Lipsiae focii suauissimi, doctiss. *dissert. de Tremore*, item et de *Cardialgia*. Istas quoque lubricas humidisque immundioris liquoris eiectionis officinas, vesicam nempe atque renes, eiusmodi tunica quasi molesta lapidosa intus non raro circumuestiri, id neminem, spero, solertiorum Medicorum fugit; praesertim, quum innumera paene ea de re vbiuis prostant exempla, ceu videre est apud SACHSIVM, in *Gammarologia*, p. 901. in *Addend.* et ex illo et aliis, apud BONETVM, *Med. Septent. Tom. I. Lib. III, Sect. 24. Cap. 5. pag. 738. sqq.* et in *Sepulchret. Tom. II, Lib. III, Sect. 22. Obs. 9. pag. 560. sqq.* et alibi; qui et ibidem, *Sect. 24. Obs. 10. p. 627. sqq.* Callosi oris et colli vesicae varios funestos casus ex Auctoribus fide dignis refert, quale et obseruauit IO. RHODIVS, *Obs. XXVI. Cent. III. de crasso callo vesicae ori arctissime circumnato*, qui liberum lotio iter occlusit, et mortis contra viam aperuit. Similes quoque tetros callos in ipsa vrethra excrescere, acerbissimo cum dolore, ceu dignam tamen in suum exitium mercedem, isti saepius experiuntur pretiosi dedecorum emtores, qui cum publicatae pudicitiae feminis foedum et damnosum habuerunt commercium; qua de re sin-

gulare extat exemplum apud STALPART. VAN DER WIEL, *Obs.* XL. *Cent. post. Part. I. p. 410. sqq.* item et HILDANVM, SCVLTE-TVM, BONETVM et alios. Ex quibus etiam aliisque abunde constat, illa ipsa inchoandi hominis rudimentorum et incunabulorum conceptacula, seu testiculos, saepissime in enormem, praegrandem et ponderosam molem callosam, osseam immo et gypseam, et lapidosam molestissime intumuisse. Quod et de ipsis Mulierum testibus, seu Ouariis notum satis est, quae quippe saepius visa sunt scirrhusa, sebacea, saxea, et tunica quoque quasi cartilaginea cincta, vid. ill. MORGAGNI, *Epist.* 35. *Tom. II, pag. 60.* et alibi passim in isto immortalis opere, de *Sedibus et Caussis morborum*. Quale etiam notissimum est de sinuoso intestinorum volumine, in cuius nempe gyratis orbibus, cartilagines, callos, lapides ossaque saepius reperta fuisse, exemplis ex pluribus Auctoribus petitis affatim probat laudatus modo BONETVS, *Med. Septent. Tom. I. Lib. III. Sect. 12. Cap. 7. pag. 581. sqq.* et *Cap. 14. pag. 589. sqq.* item *Sepulchret. Tom. II, Lib. III, Sect. XIV. Obs. 9. pag. 218. sqq.* et aliis istius operis praestantissimi locis. Sic Intestinum ieiunum cartilaginosum vidit ac descripsit BALLONIUS, ille Gallorum Hippocrates redivivus, *Lib. I. Epidem. pag. 58.* Simile fere de Intestino duodeno, observavit quoque BOERNERVS, de *disquisitione de tabe sica lethali*, a mirabili duodeni angustia, et praeternaturali plane ventriculi situ, quae tota omnino huc spectat. Scirrhusum vero duodenum in Monacho observavit laudatus modo MORGAGNVS *Epist. xxx. pag. 22. Tom. II.* Sed haec haecenus. Longe plura quidem his ipsis iam allatis adijcere hic potuissimus, si, florilegarum apum ad instar, per omnia illa *Naturae Curiosorum, Transactionum Anglicanarum, Actorum Eruditorum*, item BONETI, SCHENCKII, MANGETI, et aliorum spatiosa Volumina, libere circumuagari libuisset, aut per angustos Dissertationis academicae cancellos, licuisset:

Verum animo satis haec vestigia clara sagaci

Sunt, per quae possis cognoscere cetera tute.

§. XXXI. Haec autem cuncta, solius potissimum ventriculi caussa paullo vberius praemittenda existinauimus, ut nempe eo luculentius, exinde cognosceretur, tanto minus mirandum fore, si vel ipsa haec sum-

sum-

sumtuosa vitae humanae culina, focusque quasi perennis, pari calamitoso fato, priorem suam naturalem formam exueret, et in nouam prorsus atque insolitam transfiret; quanto magis reliqua viscera omnia, ipso ventriculo, dignitate et vsu vitaeque commodis, partim praestantiora, partim et inferiora, eiusmodi luctuosissimis exitiis et atrocissimis casibus obnoxia esse deprehenderetur.

§. XXXII. Passim nimirum constat ex industriorum Medicorum Observationibus, publicis literis monumentisque consignatis, illum ipsum ventriculum nunc circa stomachum, siue oesophagum, nunc circa superius, seu sinistrum sui ostium, nunc denique circa inferius, siue dextrum, vulgò pylorum, seu ianitorem, dictum, vel rigide occallescere, vel cartilaginosa aut ossëam duritiem induere, vel in materiam gypseam aut lapideam obrigere, vel tuberosa carne oppleri, vel denique intractabili scirrho obsideri: vnde frequentius accidit, vt, his transuersis quasi pessulis atque repagulis fortiter contra nitentibus, ea, quae accepta sunt ore, haud sine offensa ac querela, recta via, in ipsum ventriculi fundum illabi queant; sed in ipso potius aditu pertinacius haereant, atque incocta et incocta protinus reddantur; quamobrem nulla stomacho ruenti fultura accedit; quin potius lenta tabes vitales liquores sensim exhaurit, artusque ipsos crudeli edacitate tandem depascitur: vt vel ex nostro singulari casu, superius proposito, vberius patescit.

§. XXXIII. Quod et ex aliis similibus exemplis, apud probatos Auctores hinc inde obuiis, multo adhuc validius confirmatur, quae inter inprimis eminent binae istae luctuosae historiae, de oesophago occallato et cartilaginoso, ex HENR. SAMPSONIO atque NIC. GUIL. BECKERS fideliter relatae, et postea suis aeternum victuris Operibus studiose insertae a saepius iam laudato THEOPH. BONETO, *Tom. I. Med. Septent. Lib. III, Sect. I. Cap. I. et 3. p. 504. et in Sepulchret. Anat. Tom. II, Lib. III, Sect. IV. Obs. 8. et 9. pag. 32.* quorum ipsa verba in compendium missa hic infra, Lectorum quidem pace, adscribere haud pigrabimur: *Femina diu difficultate deglutiendi praepedita Medicum adiuit, qui explorato per stilum, ex osse balenae confectum, loco prorsus imperuio, illam merito pro deplorata habuit: post paucos etiam menses obiit fame enecta. In dissecto caduere, totus oesophagus a clauicularum regione, ad ipsum stomachum, inuen-*
tus

tus est pura puta cartilago; neque erat peruius, nisi cavitare valde minuta, vix setam porcinam admittente, eaque labyrinthea, sed integra substantia cartilaginea solidus. Cui singulari prorsus historiae gemina est sequens: Mercator Hippolitanus, sesquianno, de deglutiendi difficultate, mucronata sub cartilagine, dolore grauabili indies augesciente, languore ac totius corporis contabescencia, nullo in faucibus tumore vel dolore apparente, conquestus, atque ad fata vitanda, quam plurimis tam internis, quam externis, a diuersis Apollinis filiis, tractu temporis, sibi praescriptis, ac incassum adhibitis remediis, corpore, ob deglutiendi facultatem plane interceptam, sanguine ac spiritibus destituto, tabitudine violenta exspirare cogitur. Cadauere dissecto, tribus ab ore ventriculi digitis, oesophagus a cartilagine annuliformi exiguo foramine praedita, ab ipso oesophago enata, obturatus repertus fuit. Haec illi. Quas quidem binas memorabiles historias nostro praesenti casui perquam presse et aequabiliter respondere, nemo, ut spes est, facile negauerit.

§. XXXIV. Quo et vel maxime profecto spectant binae aliae a IOANNE RHODIO ita commemoratae, *Obs. Med.* 47. et 48. Cent. II. Anno CIO IO CXXVII. Patavii, nobilis virgo, Deo sacrata, iam septem ac decem annis, vix aliquot guttulas liquoris demittit. Oesophago nempe ab officulo auiculae olim saucio, scirrhusus tumor, affluente materia genitus. Haec prior RHODII historia; sed en et alteram: Adolescentulo octenni per febrem ardentem abolita libera deglutiendi potestas ab oesophagi angustia; quae tanta, praesente Ioanne Preuotio, ut gula, cadauere aperto, aquam non admitteret. Haec ille, Medicorum eruditorum haud postrema gloria; ex quo singulares has historias transumfit, et operi suo immensae frugis plenissimo, *Sepulchreto nempe Anatomico*, intexuit diligentissimus BONETVS, *Tom. II, Lib. III, Sect. IV, Obs. XIV. p. 33. sqq.* Conf. huc etiam IANI NICII ERYTHRAEI *Pinacothec. Part. III. p. 303. in Addendis.*

§. XXXV. At omnium tamen proximam et quasi coniunctissimam affinitatem cum hoc nostro casu ista habet perquam notabilis historia, quam candide enarrat vir medicarum iuxta et poeticarum rerum peritissimus, et dignissimus magni IANI GRVTERI Socer, HENRICVS SMETIVS A LEDA, in *Miscellaneis Medicis, Lib. X. p. 529.* his quidem verbis: Anno MDLXXIII. Praefectus Venatorum illustris Lippensium Comitum, de dolore circa dextram oesophagi partem, querebatur, prae quo ne micam quidem

quidem panis madefactam sorbendo haustam, ferre potuit, immo vix ipsum solumque potum, nisi paulatim, et per cochlearia singula sumeret. Aeger causam in frustum tendinis bouilli subduri deuoratum referebat. Ego tuberculum durum intra oesophagum, ea in regione, succrescere occepisse existimo. Acute hic ac vere haud dubie, coniecit S M E T I V S. Sed iure dolendum, nec mortem huius miserandi Venatoris, nec cadaueris, post eam, sectionem hic adiectam fuisse. Tum sane exactior vtriusque casus inter sese conuenientia, procul dubio, longe pressius accuratiusque enituisset. Ceterum simillimum fere casum tragicum ante complures iam annos, ad me beneuole perscripsit Cel. I O. S T E P H. B E R N A R D, Medicus apud Amstelodamenses praestantissimus. Sed vehementer nunc doleo, literas illas doctissimas hoc quidem tempore oportuno, non esse ad manus. Inter continuos enim bellicos eheu! tumultus et calamitates publicas, quibus ob ambiguam dubiamque securitatem, omnia raptim conuasanda et transportanda saepe erant, vel disiectae illae et aliorum translatae fuerunt; vel, quod tanto magis lugendum, plane deperditae. Interim vero huc vel maxime referendus par ferme casus de oesophago principis cuiusdam German. interius cartilagineo, stomachum vero versus, ad pollicis latitudinem osseo, a Cl. V I C T O R I O G O R N I A, relatus ILL. M O R G A G N O, *Epist. anat. med.* XXVIII. pag. II. Tom. II. op. de *Sedibus et Causis Morborum*. Alium vero simillimum de oesophago toto cartilagineo, et hinc adeo usque coarctato, ut vix setam equinam transmitteret, ex Tom. I. *Memor. Acad. Reg. chirurg.* pag. 489. opportune retulit ill. B A R O V A N S W I E T E N, *Comment. in Aphorif. Boerhaau.* Tom. II. pag. 649.

§. XXXVI. Sed callosarum eiusmodi et carnosarum extuberationum, nunc circa oesophagum, nunc autem circa ipsum ventriculi ostium, infelici foetura subnatarum, iam tum sua tempestate meminit C L A V D. G A L E N V S, cuius ea de re perquam memorabilis locus dignus omnino est, qui hic legatur, e *Libro* nempe III. de *Symptomatum Causis*, Cap. II. pag. 87. Tom. VIII. Opp. Συμβαίη δ' ἐνίοτε καὶ βλάβη μὰ τι σαρκᾶδες κατὰ τὸν στόμαχον, οἷα κακτὸς ὄρεται πολλάκις γενομένα, ὥς ἦτοι πάντα πᾶσιν ἀποφράζει τὴν ὁδὸν τῶν σιτίων, ἢ παραβλάψαι κατὰ τι. Sane accidit aliquando, et carnosum aliquod tuberculum, qualia

saepe foris videmus, in stomacho nasci, quod vel omnino ciborum viam obstruit, vel aliquatenus impedit. Neque ignotum prorsus fuisse videtur subdolum clandestini huius mali ingenium ipsi CAELIO AVRELIANO; scribit enim aperte et dilucide: *Lib. II. de Morb. Chron. cap. 2. pag. 445. Magis, cum initia atque summitas stomachi callosa, videbuntur vehementiore modo curationis indigentia, et adhuc luculentius atque distinctius Lib. III. de Morb. Chron. cap. 2. pag. 453. sin in superioribus partibus stomachus durescens aruerit; erit transuorandi difficultas, donec ad eius fundum accepta perueniant.* Forfan et cum eodem atroci stomachi occlusi malo conflictatus fuerit ille, cuius in miraculis S. Gengulphi mentio facta est apud diligentissimum et doctissimum CANGIVM, *Tom. IV. Glossar. Med. et Inf. Latinit. pag. 1054. his quidem verbis: Per tres nimirum hebdomadas infirmitatis lectum tenuit, nec cibi aliquod genus deglutire valuit.* Conf. GELLII *Lib. XVI. Noct. Att. cap. 3.* Verum ambigua haec tantum est coniectura. Tanto autem certiora ista sunt, quae de similibus circa dicta ventriculi loca superiora, excrescentiis duris callosis, vel carnosis, sensim subortis, ac libero ciborum descensui damnose oppositis, ex variis recentiorum Medicorum fide et laude dignorum observationibus diligenter collecta, exhibet praestantissimus BONETVS, saepius iam ad partes vocatus, *Tom. II. Sepulchreti Anat. Lib. III, Sect. IV. Obs. 2. et sqq. pag. 30. 31. et sqq. vt et in Medicina Septent. Tom. I, Lib. III, Sect. I. et alibi saepius; vid. et FRANCISC. SYLVII prax. Med. Lib. I, cap. 5. pag. 165. praesertim autem ZACVT. LVSTITANVS, de Medic. Princ. Hist. LXV, Lib. II. pag. 579. sqq. Quibus nunc longe plures adhuc addendi, nimirum FELIX PLATERVS, Lib. I, Obseru. med. p. 207. sqq. BENIVENIVS, de abdit. morb. caus. Capp. 36. et 37. p. 239. sqq. REMBERT. DODONAEVS, Med. Obs. c. 36. 37. p. 191. sqq. MARCELL. DONAT. Hist. med. Lib. III. c. 8. p. 261. et L. IV, c. 3. p. 314. sqq. et L. V, c. 3. pag. 542. BARTHOLIN. Act. med. Hafn. Vol. I. pag. 212. STALP. VAN DER WIEL, Obs. med. 27. Cent. post. pag. 279. sqq. vbi plura exempla in Notis, VIT. RIEDLINVS, Lin. med. Ann. 1699. Obs. 9. pag. 1067. sqq. HAGENDORN, Obs. med. 78. Cent. I. p. 112. sqq. CHESNEAV, Obs. med. pag. 498. praesertim vero SCHVRIGIVS, in Chylologia, Cap. v. sqq. et ill. MORGAGNVS, de*

Sed.

Sed. et Causs. Morb. Epist. 28. pag. 10. sqq. Tom. II. vbi et hanc nostram dissertationem supra meritum laudare benigne dignatus est. Maxime autem Celeb. ANTON. DE HAEN, iam eximium Aulae imperat. decus, in doctissima diff. de Deglutitione, vel deglutorum in Cavum Ventriculi descensu impeditis, Hag. Comit. 1750. vbi XII. singulares hanc in rem casus diligentissime vndique collectos, simul exhibet, atque acute et prudenter de iisdem iudicat. Quo et denique pertinent ZIESNERI rarius oesophago Morbus, Regiomont. 1739. MAVCHART. Diff. de struma oesophagi, eiusque coalitu, difficilis et abolitae deglutitionis causa, item STEGNERI diff. de Triga obseruat. rarior. Argent. 1725. Obs. II. de pyloro obstructione et aliis deglutitionis in oesophago impedimentis, pag. 19. sqq. et B. nostri VATERI Diff. de Deglutitionis difficilis et impeditae caussis abditis, Witteberg. 1750. vbi plura. Sed ohe! iam satis est, et plus satis.

§. XXXVII. In iisdem quoque locis nonnunquam seuosa steatomata intractabiliora, immedicabilia carcinomata, et indissolubiles scirrhus, aut denique duriores strumas, exsurgere, atque liberiora ad ventriculum ipsum itinera adeo insidiosae circumclaudere, vt nulli cibi, ore licet auide accepti, inde impune descendere, atque cocti ac redacti in sanguinem, corpus ipsum alere ac irrigare possint, pluribus exemplis, studiose congestis, idem ostendit BONETVS, Tom. II. Sepulchret. Lib. III. Sect. IV. Obs. 21. 22. et Obs. 2. addit. pag. 38. sqq. item maximus BOERHAAVIVS, Prax. Med. Tom. IV. pag. 40. et pag. 246. sqq. et ingenti publici boni commodo et lucro, rediuius BOERHAAVIVS, siue, quod idem, GERARD. VAN SWIETEN, in immortalis opere Commentar. in Aphorismos Herm. Boerhaave, Tom. I. pag. 856. sqq. et Tom. II. pag. 649. alique plures meminerunt: Conf. TVLPII Obs. Med. Lib. I. Cap. 44. item ZACVTI LVSITANI Hist. LXIV, Lib. II. pag. 574. sqq. et quos ibi laudat Auctores plurimos.

§. XXXVIII. Duros etiam, aridos ac subliuidos carbunculos, crustasque carbunculosas rubicunda inflammatione cinctas, circa idem superius ventriculi ostium pertinacius haesisse, obseruarunt, praeter supra laudatos, HELMONTIVS, in Tumulo pestis pag. 217. sqq. qui et alibi,

Libro forsan de *Lithiasi*, facculi lapidibus referti, ipsique ventriculo adnati, a seipso visi, meminit, referente BARTHOLINO, *Anat. Ref. Lib. I. Cap. 9. pag. 67.* qualia multa etiam reperire licet apud DIEMERBROECK, *Anat. Lib. I. Cap. 8. pag. 23.* longe plura autem apud BONET, *Tom. I. Med. Septent. Lib. II. Sect. XI. Cap. 10. pag. 368. sqq.* et maxime, *Tom. II. Sepulchret. Lib. III. Sect. 7. Obs. 27. et sqq. pag. 75. et rel.*

§. XXXIX. Praesertim autem inferius istud ostium, quo ima ventriculi pars paullum in dexteriores partem conuersa, in summum intestinum coarctatur, quam iuncturam pylorum Graeci, vt notum, vocant, a cunctis his aerumnosis calamitatibus crebro admodum infestari, frequentioribus Medicorum Observationibus hinc inde constat. Sic steatomata ibi inuenerunt BARTHOLINVS, HILDANVS, SCVLETVS et alii, item BONETVS, *Tom. I. Med. Sept. Lib. III. Sect. II. Cap. 12. pag. 517.* praeduros scirrhus, idem, *Tom. I. Sepulchret. Lib. II. Sect. VII. Obs. 143. pag. 752. sqq.* et *Tom. II. Lib. III. Sect. VI. Obs. 7. pag. 95. sqq.* vt et STEPH. BLANCARDVS, *Anat. pract. rational. Obs. LXII. pag. 185.* nec non magnus RVYSCHIVS *Obs. Anat. Chirurg. XXXIX. pag. 39.* item WILLIS de *Med. Operat. P. I. pag. 28.* HARDER. *Apiar. Obs. 62. pag. 249. sqq.* SALMVTH. *Obs. med. 20. Cent. I. STEGMAYER. de pylori obstruct. Obs. II. pag. 19.* SCHVRIG. *Chylolog. cap. V. VATERVS, de Deglutit. difficil. ILL. praesertim MORGAGNVS Epist. anat. 29. pag. 17. Tom. II. de sed. et causs. Morb. alique plures, in primis autem HELMONTIVS, in Tract. de Pyloro Rectore.* Tetra ac indomita carcinomata ibidemprehenderunt HILDANVS, PARAEVS, BONETVS, BOERHAAVIUS et alii. Callum etiam nonnulli, mox laudandi. Materiam denique duram, gypseam ac paene lapidescentem, digiti transuersi crassitiem excedentem, ibidem arctius impactam, obseruauit NIC. DE BLEGNY, in *Zodiac. Med. Gal. An. 1679. pag. 46.* referente ex eodem BONETO, *Tom. II. Sepulchret. Anat. Lib. III. Sect. VIII, Obs. I. Addit. pag. 124.* Quo et in primis illa singularis pertinet historia nouissima, relata a celeberrimo PETRO PAULLO MOLINELLO, et inserta *Commentariis de ill. Bononiensi Scientiarum et Artium Instituto atque Academia, ingentis frugis plenissimis, Tom. II, Part. I. pag.*

pag. 157. de femina quadam extrema macie confecta, in cuius monstroso fere ventriculo, circa pylori regionem, tumor ingens repertus fuit, qui ad initium duodeni excreuerat ex illis glandulis, quae ibi frequentiores esse solent; quaeque in illa miserabili muliere praeter modum auctae, duritiem ubique fere scirrhosam, aliquibus in locis etiam osseam, obtinebant. Erant autem glutinatae adeo, compactaeque, ut omnem aditum a stomacho intercluderent, ut ipsius praestantissimi MOLINELLI verbis loquamur. Callosos tandem praeduros, arctosque pyloros, in cadaueribus repertos accurate descripserunt ill. MORGAGNVS, *Epist. anat.* 30. pag. 22. sqq. BONNETVS, SCHVRIG. in *Chylol.* BARTHOLINVS et BOHN, it. CellANGVTH in *Commentat. de Tabe sicca letali ex Callosa pylori angustia*, et nouissime Cl. RICHTERVS iun. in *diff. de Casu medico intumescens et Callosi pylori cum triplici hydropo*, Goetting. 1764. quae tota huc spectat, ne iam de aliis dicamus. Verum hic tandem modus terminusque constituendus. Licet enim longe adhuc plura supersint, his ipsis iamiam allatis nec inferiora, nec abiectiora, aut vsu eximio caritura; magis tamen placet, haec ipsa nunc premere potius, quam promere, ne scilicet fastidiosa nimiorum exemplorum copia molestam iniucunditatem pariat Lectoribus, qui nos forsan iure admonituri sint veteris illius dicti praecleari: *Nou minus magnam virtutem esse, scire desinere, quam scire dicere.*

§. XL. Nunc autem ad illas ipsas tantarum in corpore humano imutationum ac transfigurationum causas atque origines absconditas transeundum potius videtur. Enim vero

Fert animus, causas tantarum expromere rerum,

Immensumque aperitur opus: Quid saxea reddit

Viscera, quid tactis inducit marmora rebus.

Verum mox in limine ipso, feruidus iste impetus subito conceptus, subito confescescit, animusque timide refugit, trepida desperatione affequentae veritatis, merito deterritus. Non cura laborque noster scire valet. Licet enim SCHENCKIVS, SACHSIVS, HELMONTIVS, ALBOSIVS, FROVANCHERIVS, LICETVS, immortalis noster SENNERTVS, alique plures clarissimi Viri, omnes ingenii vires, acerrimo studio, eo potissimum contulerint, ut veras mirandarum istarum immu-

tationum et conuersionum causas indagarent, et indagatas in clara luce locarent, quarum nempe ministerio et adiumento, viscera humana molliora et sequaciora in naturam prorsus sibi contrariam, cartilaginofam scilicet, ossileam, aut plane lapideam transfirent; tamen isthaec omnia, si verum quidem fateri liceat, subtilioris potius ingenii sunt formamenta, quam demonstratae veritatis firmamenta. Non enim isti comprehensa, neque definita, neque satis percepta dicunt; sed lubrica potius atque ambagiosa coniectatione nitentes, inter falsa veraque medii, quasi per tenebras, titubanter ingrediuntur. Hinc et hic, sicut in mille aliis rebus nobis abstrusis plane atque incomprehensibilibus, praestat, nostram caliginosam ignorantiam candide ac verecunde fateri, nostraque vanae ac vagae curiositati fibulam quasi imponere; quam tantum ingeniosa quaedam figmenta, omni tamen fide vsuque caritura, audacter comminisci, quae celeriter, tanquam solstitiales flosculi, decidunt ac euanescent. Multa enim, immo quam plurima, sunt, quae esse concedimus, qualia autem sint, prorsus ignoramus. Latent profecto ista omnia, latent et latebunt semper, crassis occultata et circumfusa tenebris, ut nulla humani ingenii acies tanta sit, quae citatim in naturae circumuelatae inaccessa adyta, flectuososque inaeandros penetrare possit, aut caecas illius operationum reconditarum causas euoluere valeat. Nam

Sic placuit Superis, quaerere plura nefas.

§. XLI. In nostro tamen praesenti casu, et atrocitatis, et periculi mortiferi nouitate, in primis memorabili, aliquam sat probabilem reperiri posse causam confidimus, quam forsan animus, praeiudicatis opinionibus exoneratus, aut re ipsa veram inueniat, aut certe haud procul a vero.

§. XLII. Existimamus nimirum, diram illam insanamque glaciem niuemque rodendi atque potandi cupidinem, in exaestuantis stomachi perbreue solatium, per tot annos continuos, furiose expletam ac extensam, et illius crudelis famis, et sequutae exinde lacrimosae mortis, primariam fuisse causam ac fabricatricem.

§. XLIII. Nihil enim magis pestiferum, nostraeque sanitati, quin immo ipsi adeo vitae, damnosius exitiosiusque esse eiusmodi cibis glaciatis potionibusque niuatis, aestuanti stomacho, ac feruentibus intestinis ingenti copia, subito ingestis, res est ynanimi omnium Medicorum
rectius

rectius sentientium suffragio dudum confirmata, et mille tristibus exemplis vberime probata, adeo ut de tam confessa et explorata veritate ne dubitare quidem liceat, vid. interim praeter alios, plures, PETRI BORRELLI *Obs. Med.* XI. Cent. III. et ZACVT. LVKITANI *Hist. Med.* 98. Lib. II. pag. 876. *sqq.* et *Hist.* 4. Lib. III. pag. 40. *sqq.* item *Hist.* II. Lib. 4. pag. 304. *sqq.* et BARTHOLINI *Obferuat. de Niuis usu medico* capp. 35. 36. et 37. pag. 199. *sqq.* ut et BERTI *Diff. de Frigid. pot. cap. ult.* Tabem namque et morbos sensim atque in diem longum, visceribus infeminare eiusmodi gelidissima torpentis gulae blandimenta, aut irritamenta, quae ingeniosa sitis, ut MARTIALIS ait, immo potius furiosa, commenta est, ex ARISTOTELE potissimum philosopho, rei omnis humanae peritissimo, praeclare solideque pluribus ostendit AVL. GELLIVS, *Lib. XIX. Noct. Att. Cap. v.* et ex eo MACROBIVS, ut solet, *Lib. VII. Saturn. Cap. 12. pag. 435.* Sed iam pridem ante ARISTOTELEM, verissime ac grauissime ita pronunciauerat summus noster HIPPOCRATES, *Aph. 24. Sect. v.* Τὰ ψυχρὰ, οἷον χιὼν, κρύσταλλος τῷ στήθει (adde τῇ κοιλίᾳ ἢ τῷ στομάχῳ) πολεμία, frigida, veluti nix, glacies, pectori inimica: et in primis *Lib. de Humidorum Usu*, pag. 602. Εἰκότως ἄρα καὶ αὐτὸς ὁ θώρηξ, καὶ αὐτὴ ἡ κοιλίη, κρατεμένη ὑπὸ τῆ ψυχρῆς, μάλιστα ἀγανακτεῖ καὶ θανάτῳ, merito etiam ipse thorax, et ventriculus ipse a frigida potione superatus, molestissime fert, et mortis periculum incurrit. Inde et ipse CAELIVS AVRELIVS, *Lib. II. de Morb. acut. cap. 13. pag. 110.* ipsam quoque acutissimam pleuritidem, inter alias causas, oriri, rectissime asserit, ex plurimo niuis potu, quomodo ibi rectius legendum esse pro vulgatis, plurimo nimis potu, alibi pluribus accurate demonstrauimus: quo et vel maxime spectat, quod infra rursus, *Lib. III. de Morb. acut. cap. I. pag. 180.* ipsam diram Synanchen, etiam ex Niuis potatione, funestam suam originem saepius trahere, obseruauit, vnde haec ipsa nostra coniectura, aut emendatio superioris loci, haud leue, opinor, robur, aut fulcrum accipere videtur. Sed haec obiter. Cuius funesti gelidi haustus copiosi effectus exemplum memorabile de ISTHENE OABDERITANO, palaestrae custode, idem refert, *Lib. VI. de Morb. Epid. Sect. VIII. pag. 822.* de quo vid. ZACVT. LVKITAN. *Hist.* 98. Lib. II. dub. 5840. pag.

pag. 876. *sqq.* Quem sequitur, ut solet, CELSUS, *Lib. I. cap. 3.* Ex labore sudanti frigidae potio perniciosissima est: item PLINIVS *Lib. XXXI. Cap. 6.* Hinc et frigidam nimis aquam, praesertim aestate anni flagrantissima, aut aestuante nimium intus corpore ipso, confertim confestimque ingestam, inter perniciosissima perniciosissimaque venena iure numerant DIOSCORIDES, in *Praef. ad Alexipharm.* pag. 402. QVINTILIANVS, *Declamat. CCCL. IO.* CHRYSOSTOMVS, *Homil. LXXV. in Cap. XXIII. Matth. Tom. I. Opp. in Nou. Test. pag. 794. et Tom. VI. pag. 948.* SENECA, *Lib. II. de Benef. cap. 14. et alibi,* GALENVS, AEGINETA alique plures. Cuius rei plura luctuosa exempla exstant apud ARRIAN. *Lib. VI. de Expedit. Alex. pag. 427.* PLVTARCH. in *Anton. Cap. 66.* APPIAN. *Lib. V. de Bell. Civ. pag. 1166. Tom. II.* LVCAN. *Lib. IV. Pharsal. 368.* CVRT. *Lib. VII. Cap. 5.* multosque alios. Inde FLAV. VESPASIANVS, quum super urgentem valetudinem, creberrimo frigidae aquae usu, intestina vitiaisset, subito inter manus subleuantium extinctus est, teste SVETONIO, in eius *Vita, Cap. 24.* Quo miserrabili fato etiam THEOPHILVM Imperatorem periisse, memoriae prodidit CEDRENVS, *Tom. II. pag. 532.* Nonnihil etiam, et ex parte quidem, huc pertinet illud, quod ad VALENTINIANVM Imp. in *Epistola* scripsit VINDICIANVS: Illico infuso sale aquam frigidissimam obtuli eius ardori, qui quum desiderio recentis, quo cruciabatur, totum, quod ei oblatum fuerat, ebibisset, Autores Medicinae magni, qui id spectabant, exclamauerunt, occidisti hominem! vid. SCHREINER Not. ad Theodori de *Diaeta, Cap. XVI. pag. 80.* ibi enim praeter opinionem, salutaris effectus sequutus narratur, conf. CASP. AREIUS, *Quaest. Med. LXXIV. pag. 1005. sqq.* BARTHOLIN. *Obs. de Niuis usu med. Cap. 23. pag. 135. sqq.* et PAVLLINI *Obs. med. 66. Cent. I. pag. 79. sqq.* et quos ibi citat Auctores, item *Obs. 68. pag. 81. sqq.* ibique laudatos Medicos: ut et PETR. BARRA *Lib. de usu frigidi, glaciei et niuis,* quem laudat SPON. in *Nouis Hippocratis Aphorismis. pag. 364.* item RESTAVRANT *Lib. de usu glaciei apud Hippocratem,* in quo tamen multa paradoxa.

§. XLIV. Quum igitur asperioris frigoris ea potissimum vis sit ac consuetudo, ut, quod vulgo notissimum est, omnia generatim corpora, tam fluida, quam solida ac flexibilia, arctius constringat, pressius contra-

hat,

hat, et rigidius induret; inde nunc facile mente solerti concipere licebit, quo nempe pacto in nostro miserando popinone, dum niues glaciemque insatiabiliter ligurit atque potat, poenasque montium in voluptatem gulae, sed et in eiusdem exitiosam poenam vertit, adeo usque coangustatum, atque in pertinacissimum callum permutatum fuerit superius ventriculi osculum ostiumque, ut liberum lubricumque ciborum iter plane intercluderetur, hincque exsucca totius corporis macies lethalisque tandem fames subsequeretur. Rigidissimo enim illo gelu glaciali, feruentibus extis continuo avidissime ingesto, id demum calamitosum fatum exortum esse videtur, ut fibrae praesertim stomachi, siue superioris osculi, orbiculatim circumductae, carnosae ac crassae, una cum intextis nervis, subito vehementius constringerentur, ac deinde sensim in rigidissimum callum, aut durissimam cartilaginem coagmentarentur.

§. XLV. Quale quid iam sua tempestate, observavit GALENVS, *Comment. in Lib. vi. Epidem. Hipp. pag. 445. Tom. ix. Opp. per CHARTER. et alibi: item et SENECA, Epist. xcv. cuius in primis verba notatu digna: Quid? Tu illam aestivam Nivem non putas callum iecinoribus obducere?* quod si enim his adiecisset: *et ventriculis*, tum ipsum profecto nostrum casum praesentem, brevissime quidem, at plenissime tamen, descripsisset. Sed recentiore in primis aevo, exitialis eiusmodi gelidi potus efususque glaciei effectus frequentius observatus fuit ab IO. VARANDAE O, *Tract. de Morbis Ventriculi, Cap. i. sqq. iisque praesertim Auctoribus, qui de Potus Frigidi Noxis et Abusu, ex instituto, commentati sunt, quo vel maxime pertinent NIC. MASINIVS, de quo vid. ERYTHRAEI Pinacothec. i. pag. 275. IO. PHILIPP. DELIGNAMINE, et alii, magna copia laudati ZACUTO LVSITANO, Hist. Med. princ. LXVI. dub. 32. pag. 503. sqq. et Lib. iii. Hist. 4. p. 40. sqq. quibus add. IO. MATTHAEI Qu aest. Med. XLII. pag. 150. sqq. BENIVEN. de abditis morborum Causis, pag. 221. sqq. RIEDLIN. Lin. med. ann. 1695. Obs. 21. pag. 54. praecipue B. RIVINI, praeceptoris olim nostri doctissimi, diss. de Frigoris damno, et denique, si placet, diss. nostra, de pleuritide aestiva, rarius occurrente, §. viii. et sqq. item WEDELII Exercit. Med. philol. 9. Decad. ix. pag. 66. sqq. de Frigore morbifico. Conf. Acta Med. Berol. Decad. ii. Vol. ii. pag. 83. sqq. Binae quoque singulares hanc in rem*

F

historiae

historiae consignatae leguntur apud I O. RHODIVM, *Obs.* XLVII. *Cent.* II. et *Obs.* LXXI. ibidem; quas, quia breues, hic infra, Lectorum pace, adscribere iuuat: *Murani, nobilis virgo ab intempestiuo refrigerantium, ad inflammationem, usu, contracto gulae scirrho, assumpta aegerrime deglutiebat.* Altera haec est: *Iuuenem gracilem cardialgia inuasit exquisita, a potu frigidae, contractis orificii ventriculi nervis.* Quod et iam olim cuidam Imperatori pari modo, accidisse, refert ita CEDRENVS *Tom.* II. *Hist.* pag. 707. *Ἀνεγκλὼν ὕδωρ πιεῖν, ἐπεζήτησε ψυχρὸν, λαβὼν δὲ καὶ πικρὸν ἐλήφθη καρδιωγμῷ, καὶ μετὰ ἡμέρας β'. Ἰνέσκει.* Quam in rem perquam notabilem quoque historiam refert GALEN. *Lib.* VII. *de Methodo Med.* *Cap.* 8. *pag.* 170. *Tom.* X. ad quem locum vid. in primis ZACVT. LVGITAN. *de Med. princip. Hist.* LIV. *Lib.* II. *pag.* 504. *sqq.* vbi plura. Sic etiam e solo gelidae cereuifiae haustu, lethalem gulae resolutionem, seu paralyfin, aliquando obortam fuisse, obseruauit HELWIGIVS, *Obs.* 49. *pag.* 177. apud BONET. *Tom.* I. *Med. Sept. Lib.* I. *Sect.* XVIII. *pag.* 171. vbi legi meretur adiectum a SCHROECKIO Scholion. Quaelia fere etiam adnotarunt THOM. WILLISIVS, *de Medicament. Operat. Sect.* III. *Cap.* 3. *pag.* 28. NIC. TULPIVS, *Lib.* I. *Obs. Med. Cap.* 42. FREIND, *Hist. Med.* *pag.* 498. STALPART. VANDER WIEL, *Obs.* 27. *Cent. post. Part.* I. *pag.* 280. *sqq.* STEPH. BLANCARD. *Coll. Med. Phys.* *Cent.* III. *pag.* 45. IO. LANGIVS, *Epist. Med.* XLIII. *Lib.* II. *pag.* 689. et *Epist.* XXVII. *pag.* 608. item *Epist.* XXXI. *Lib.* I. *pag.* 129. aliique plures. Quare, vt et hoc problema hodie certe perquam controuersum, paucis attingam, mihi, si a maximis quidem Viris, BOERHAAVIO, LANCISIO, HAENIO aliisque modeste dissentire liceat, nondum satis probabile aut credibile videtur, calidis in primis Theae vel Caffae potionibus, hodie, saeculi vitio, iusto frequentius vbique ingestis, vnice adscribendas esse illas quidem Oesophagi, Ventriculi et Pylo-ri affectiones deterrimas et pertinacissimas, nempe Callos, Scirrhos, can-eros, steatomata, contractiones et duritias; quum calida potius partes praesertim membranofas et neruofas, emolliant, relaxent, debilitent, extendant atque effoeminent, vti praeter quotidianam experientiam, testatur ipse grauissima sua auctoritate HIPPOCRATES, dum *Lib.* *de Humidorum usu, pag.* 601. *sqq.* et *Aph.* 16. *Sect.* V. calidis σαρκῶν ἐκδή- λουσιν

λυσιν καὶ νευρῶν ἀκράτειαν, *Carnis nempe effoeminationem et Nervorum debilitatem* attribuit, quum frigida e contrario, easdem partes contrahant, indurent ac rigidas reddant, vt ibidem solide docetur. Et quid multa? ipsum contrarium manifestissime quoque vbiuis probant omnes gentes Eoae, Turcae, Arabes, Sinenses, Persae et aliae, quae quippe vel domi, vel in publicis Thermopoliis desides sedentes, per totas dies, imo, per totam fere vitam, adamatam vnice Caldam strenue auideque potant; et tamen nec Callis, nec Scirrhis, nec carcinomatis denique Oesophagi, aut Ventriculi exinde infestantur, adeo, vt moesta eiusmodi exempla apud ipfas ne quidem nota esse, perhibeatur; vti etiam nec frequentius occurrunt apud Italos, Anglos, Belgas, Hispanos, et alios audiores caldipotiores, ne ipsis quidem Germanis meis prorsus hic exclusis. Vnde etiam hanc valde dubiam adhuc et mere coniecturalem istorum atrociorum affectuum causam, a nimio caldarum potionum vsu, aut abusu, desuntam, ceu nondum satis exploratam et probatam, in medio merito reliquit sapientissimus et modestissimus senex ille MORGAGNVS, *Epist. anat. 28. pag. 11. Tom. 11. magni et eximii plane operis, de sedibus et causis Morborum*, nec nostram hanc coniecturam de potu potissimum frigido petitam, ceu frigidam, aut improbabilem ibidem prorsus spernit, quin potius hanc ipsam dissertationem, supra omne meritum, ingenti elogio, nimis benigne ornat. Sed haec obiter.

§. XLVI. Verum hic tandem terminus esto! Longius enim praeter opinionem, nos iam prouexit materiae vbertas, quam animo primum destinaueramus. Hinc et nihil nunc de ipsa atrocis symptomatis medela adlicere licet, quae tamen re ipsa, ambigua plerumque ac inefficax est. Quamuis enim mox ab initio, ars salutaris quaedam spondeat praesidia, aliquam partem iam indicata a CAELIO AVREL. *Lib. III. de Morb. Chron. Cap. 2. p. 445. sqq.* et aliis, in primis vero a celeb. HAENIO, in aliquoties iam merito laudata *diff. egregia de deglutitione impedita*, ibique *Cap. IV. p. 45. sqq.* item SCHVRIGIO, in *Chylologia*, et b. nostro VATERO, in *dissert. supra iam cum debito elogio citata, de Deglutitionis impeditae causis abditis*, *Thes. VIII. pag. 23.* vbi et clysteres praefertim nutrientes in vsu aduocandos esse monet, de quibus et nos peculiari Exercitatione, satis, ni fallor, accurate olim egimus. Verum re



penitus iam conclamata, et ipsa illa ciborum officina arctius contracta, rigida, callosa et obthurata, ipsi sane illi clysteres nutrientes, tantopere heu! frustra, laudati, nihil quidquam ad vitam longius prorogandam, proficient, multo autem minus indomitae morti moram ullam afferent; id quod praeter alia plura, a BONETO, WILLISIO, WEDELIO, GRAAFIO, HELMONTIO et aliis, commemorata, luculenter in primis comprobatur triste istud exemplum, ab elegantissimo TVLPIO quondam relatum, *Lib. I. Obseru. Med. Cap. 42. pag. 78.* qualia et alibi passim leguntur: Conf. FREINDII *Hist. Med. pag. 498. sqq.* Attamen, ubi pertinacissima illa mala iamiam inueterauerunt, ac per longiores moras inualuerunt, tum prorsus esse semper fere solent immedicabilia, ut modo, liquido, uti spero, a me ostensum. Ponendum igitur, ut cum CELSO finire liceat, *Lib. VIII. Cap. 13. hunc singularem funestum casum hic esse credidimus, non, quo curatio eius rei ulla sit; sed ut res indicibus cognoscere- tur, et non putarent, sibi Medicum defuisse, si qui sic aliquem perdidissent.*

T A N T V M.

NOBILISSIMO EXPERIENTISSIMOQUE
V I R O,
IO. EPHRAIM FRIDERICO BVLISIO,
V I T E M B E R G E N S I,
MEDICINAE CANDIDATO DIGNISSIMO,
S. P. D.
P R A E S E S,
DANIEL WILHELMVS TRILLERVS.

*P*raeclare, uti fere semper solet, scripsit quondam Cicero: Ut leuitatis est, inanem aucupari rumorem, et omnes umbras, etiam falsae gloriae, consuetari: Sic levis est animi, lucem splendoremque fugientis, iustam gloriam, qui est fructus verae virtutis honestissimus, repudiare.

Quod si igitur verum est prudentissimum hoc Viri eloquentissimi effatum, sicut sane verissimum videtur; inde rem potius laudabilem, quam vituperabilem, fecisti, Vir Experientissime, quod summos in arte salutari honores dudum

dum promeritos, non solum modeste ambires; sed etiam iure quasi tuo, affectares.

Licet enim Gradus Doctoris sic dictus neminem ad verum illum arduumque virtutis, sapientiae et doctrinae gradum euehat, nisi qui pectus generoso Honesto quasi incoctum et ingenti literarum flumine inundatum attulerit; tamen vel interna animi ad humanitatem exculti et doctrinis perpoliti merita per externa quoque praemia ac honestamenta, splendido quasi aliquo paludamento circumiecto, magis exornantur, et fulgentiore lumine circumfunduntur.

Quae vero ubi defecerint, tum sane eiusmodi mentita ornamenta, indignis impertita, inania prorsus sunt, et ignominiosa potius, quam gloriosa.

Praesertim autem id genus male locati honores ipsi adeo humano generi damna inferunt longe atrociora, quando Medicis imperitis indoctisque, uti saepenumero fieri solet, tribuuntur, quoniam nempe tunc, iure quasi sceleri dato, publicam veluti licentiam nanciscuntur, impune ac officiosissime occidendi, ac dira experimenta per festinatas miserorum hominum mortes, faciendi.

Animo enim ac re ipsa, non titulo, aut nomine, Medicum esse oportet, consilio scilicet, fide, gravitate, vigilantia, cura, experientia, pietate, diligentia, aliisque praecclaris virtutibus, quas in vero ac perfecto Medico iure requirunt Medicorum maximi et praecipui, HIPPOCRATES, inquam, noster, GALENVS, CELSVS et alii plures.

Quas quum in te quoque, Vir clarissime, arctissimo quasi vinculo aptas ac consociatas, dudum deprehenderit gratiosus noster Ordo medicinalis: ideo summos in arte medica honores animo aequo, immo etiam gaudenti ac libenti, hodie tibi confert, atque de iisdem simul candide gratulatur.

Cuius ingenuis votis et ego praesertim, serena fronte menteque laeta, accedo, Deumque supremum imploro ac obtestor, ut omnibus tuis consiliis et negotiis in aegrotorum salutem in posterum suscipiendis successus prosperos clementissime addere velit, quo multi tuo auxilio, sub diuinis auspiciis, ad sanitatem reducti, habeant, de quo et sibi impense gratulentur, et tibi: sibi quidem, de superato feliciter periculo; tibi autem, de officio rite ac sapienter praestito, atque splendido honore lucroque honesto exinde merito reportato.

Ceterum in publica Commoda, quam diutissime, bene vale, mihi etiam absenti ac a te disiuncto, fauere perge! Scribebam, raptim, Vitembergae, d. III. April. CIO IO CCL.

DISSERTATIO MEDICA SECVNDA.

DE

NOCIVA CANCRI INVETERATI
EXSTIRPATIONE

NOVIS EXEMPLIS DEMONSTRATA.

P R O O E M I V M.

Nihil quidem frequentius apud Medicos Chirurgoſque inprimis, reperitur, prompta teterrimi Cancrī Exſtirpatione: ſed nihil tamen eadem eſſe vt plurimum incertius, damnosius et periculoſius, ſimul moeſto cum corde fatendum eſt. Adeo enim uſque immitte atque intractabile prorſus abominandi illius Mali plerumque eſſe ſolet ingenium, vt nulla fere humana ope et arte ſuperabile ſit, vnde veriſſime quondam ceciniffe videtur notiſſimus ille feliciore ingenio, quam fato, poëta Sulmonenſis:

*Vlceris id genus eſt, quod, quum ſanabile non ſit,
Non contrēctari tutius eſſe puto.*

Profecto, ne potentiffima quidem Naturae et Artis instrumenta et praefidia, Ignis nempe atque Ferrum quidquam ſaepeius valent ad foecundam illam et immortalem quaſi luem penitus extinguendam. Neque enim atrociffima illa peſtis exſcinditur ferro, aut exurit igni; quin potius

*Per damna, per caedes, ab ipſo
Ducit opes animumque ferro:
Non Hydra, ſectō corpore firmior,
Vinci dolentem creuit in Herculem:*

Quam Hydra illa Cancrorum plus quam Lernaea, in Medicos Chirurgoſque, vinci dolentes, adauctis ſubinde viribus, ferociter inſurgit, omniaque illorum machinamenta, quantumuis valentiſſima, eludit atque retundit. Tam late enim ſerpit dirum iſtud immedicabilis Mali contagium, vt, licet vno loco, vindice ferro, reſciſſum fuerit, mox tamen altero, acrius reſurgat, immo et hoc repurgato, paullo poſt tertium, quartumue foediſſima ſua tabe infeſtet et contaminet, ita, vt in hoc numeroſo

numeroſo et feraci Malo plane eradicando, vna fere ſalus ſit, nullam prorsus ſperare ſalutem, et *maxima hic ſcientiae medicae pars eſſe videatur, ſanare non poſſe*, vti ſcite loquitur QVINCTILIANVS. Non enim eo ipſo ſolum loco, vbi peſtiferi illi, liuentes ac ſubfuſci Cancri ramices latius diſperſi conſpiciuntur, propria ac deſtinata eiufdem ſedes eſſe deprehenditur: ſed per omnem potius corporis affecti et infecti ambitum, vbi muſculi, pinguedines et glandulae potiffimum repositae ſunt a Natura, latiſſime circumſperſa latent contagioſa Cancri edacis ſemina exitium paritura: Inde ſaeuum virus

urit corpore ſerpens

Quamcunque arripuit partem, repitque per artus.

Mutua namque tabe mox omnia inficiuntur, et exſtirpato vno Cancro, protinus alibi aliter, immo et tertius, vt dixi, foeda foetura ſuccreſcit, exhauſto nempe ſic Mali inexſtirpabilis riuo, non ipſo integro eiufdem fonte obturato, et hoc eſt, quod SENECA de ipſo AVGVSTO, dixit, ſenſu licet ibi morali et allegorico, *Lib. de Breuitate Vitae, cap. v. Haec ulcera cum ipſis membris, abſciderat; alia ſubnaſcebantur.* Vnius igitur Cancri exſtirpationem plerumque alterius eſſe generationem, ex his ipſis ſequentibus tribus Exemplis notatu certe digniſſimis, a me ipſo quondam, cum cura obſeruatis, nunc, ſpero, liquidius pateſcet. Ramo enim

- - - *primo amulſo, non deficit alter*

Peſtifer, et ſimili frondeſcit Virga veneno.

HISTORIA PRIMA.

Fabro cuidam ferario, annorum XLVI. oris pallidi, corporis macilenti, exſanguis et debilis, forte in labio inferiore, enatum erat exiguum Tuberculum, mediocris lentis, aut piſi magnitudine, nonnihil durum, colore liuidum et quandoque leuiter dolens: Haec nempe erat venturi prima fauilla Mali. Quod quum ille ſaepius, vt fieri ſolet, manu improba incautius contrectaſſet, atque ſubinde compreſſiſſet; paulo poſt accidit, praeter omnem ſpem et opinionem, vt exiguum hoc primam frontem, malum mox acrius exaſperaretur, dolores vehementius increſcerent,

scerent, illudque paruum modo Tuberculum in patentiorem ambitum sese latius explicaret, adeo usque, ut ipsum totum labium foedo admodum adspectu, alte intumesceret, lividam duritiem indueret, atque demum per ruptas passim sua sponte fissuras, sanguinem atrum, foetidum ac corruptum sensim exstillaret.

Futuri ergo metuens quidem; sed graui simul paupertatis incumbentis onere deterritus, ut Medicum peritum, aut Chirurgum in Arte exercitatum, uti decebat nimirum, tempestiue accederet, varia mox ipse adhibuit contra augescens malum, remedia ut plurimum domestica, nunc bona, nunc mala, ut nempe fieri consuevit, nullo prorsus delectu habito: quibus tamen omnibus nihil quicquam proficientibus, tandem de salute anxius, in consilium aduocauit tonsorem quendam sibi vicinum, qui, ex pravo nonnullorum istorum hominum more, per mortes et caedes, dira experimenta facientium, Mali praesentis ignarus, et futuri improuidus, varia ipsi vnguenta et emplastra, quorum virtutes, aut noxas ipse tamen nesciebat, liberali admodum manu, suggessit: sed tam sinistro quidem cum euentu, ut loco sperati promissique auxilii, omnia potius quotidie in peius ruerent, ipsumque labium, pereunte prorsus figura pristina, in deformem plane visuque terribilem tumorem attolleretur.

Exacto igitur inter tot aerumnas atque misérias, integro paene anno, tandem infelix iste et exspes fere aegrotus in ipsum anno 1735. accessit, meam etiam qualemcunque opem imploraturus.

Vix autem viso horribili illo atque monstroso plane labio, mihi protinus frigidus horror

Membra quatit, gelidusque coit formidine sanguis.

Ingentis enim farciminis ad instar, sanguine infarcto turgidi, eousque foede propendebat, ut graui eius pondere pendulo ipsum subtus mentum, teterrimo quidem spectaculo, penitus occultaretur. Vel ad leuissimum autem digiti admoti contactum, sanguineae guttae tanta quidem copia, vnde que emicabant, ut timide tangentes manus atro horrendi foetoris tabo ubique affatim commacularentur.

Quibus omnibus ancipitis praecipitisque mali momentis curatius exploratis atque expensis, ipsi statim candide et sine ambage, exposui intractabilem prorsus immedicabilis huius Cancris cruenti indolem ac naturam,

ram, addidique, omnem salutis spem in solo esse ferro repositam, eo-que aut confestim ipsam illam teterrimam pestem esse iugulandam, aut eum ipsum proxime, indomabili eiusdem saevitia fore iugulandum. Non enim aliud plane dari inevitabilis fati effugium, nec bene nunc convenire lenta remedia alia rapidissimae intus furentis Veneni pernicipitati.

Quam duram decretoriamque quasi sententiam quum iste imperterritus prorsus accepisset; statim nos serio atque efflictim rogavit, ut nulla interposita mora, arduo isti et generoso operi exsequendo alacriter accingeremur, seque ad blanda venturae salutis gaudia, sic excruciaremus; seuerè adiiciens, se quidem ad omnia discrimina, aut tormenta intrepide subeunda, promptum satis paratumque animum iamiam induisse, malleque citam mortem fuisse, quam vitam diutius tolerare mille omnino mortibus deteriore: sese enim non tam viuum esse hominem, quam potius ambulans quasi insepultumque adhuc cadauer, quod et sibi et ipsi, et omnibus aliis hominibus abominabili esset terribulamento.

Praeparato igitur sic prius per iustam sanguinis missionem, et repurgato leniter inferius corpore, potionibusque corruptam sanguinis massam emendaturis, largiter propinatis; nihil quidquam amplius cunctati sumus, inexpugnabilem istam hactenus pestem stricto ferro animose excindere: quod quidem per peritam solertis chirurgi dextram, tam fausto cum successu, peractum fuit, ut temporis fere puncto, vno prope modum ictu, labium illud tabifica labe infectum a parte sui sincera concinne diffociatum, excideret, mirantibus nobis merito ferream quasi fabri illius constantiam, et inconcussam animi intrepidi firmitudinem, qua *SCAEVOLAE* alicuius ad instar, luctibus atque doloribus impetrabilis, siccis plane et irretortis oculis, lacrimabilem sui iacturam, et particularem quasi corporis laceri funerationem hucusque spectauerat: Nullos enim eiulatus, nullas complorationes, et ne vllas quidem voces indecoras hactenus, inter illam lanienam Hippocraticam, ediderat.

Recens interea vulnus rite curatum, mundatum et obligatum blandum sensim atque laudabile pus reddidit, et iusto demum tempore, pulchram satis ac decoram cicatricem duxit, succrescente nempe miraturae fictricis solertia, ceu quodam amissi labii imitamento. De quo dubitare quidem nonnihil videtur *CELSVS, Lib. VI, cap. 15. et Lib. VII,*

cap. 9. luculenta tamen in contrarium exempla attulerunt PARAEVS, *opp. Chirurg. Lib. VI, cap. 29. p. 219.* TIMAEVS A GULDENKLEE, *Cas. medicinal. 38. Lib. I, pag. 71.* et ILL. VAN SWIETEN, in *Comment. in Aphorif. Boerhaau. Tom. I, pag. 896.* aliique inferius allegandi. Praesertim autem celeb. ille TALIACOTIVS, in *Chirurgia noua curtorum, Lib. II, cap. 19. p. 531. sqq.* quibus add. B. PLATNERI *Chirurg. pag. 161.* et ill. HEISTERI absolutum Opus Chirurg. Tanto igitur vitae discrimini exemptus, plenaeque, vt videbatur quidem, sanitati aliquo post tempore, redditus, laetus, et quasi ex Orco reuocatus, ad suos domum reuersus est, positoque omni ambigui futuri metu, per integrum fere annum, satis probe commodeque valuit. Illo autem vix exacto, suspecta admodum raucedo atque ardua cibos ingestos detrudendi difficultas sese illico prodidit; inspectoque diligenter ipso quidem ore ac collo, cum ingenti visentium stupore, tristissimum illud apparuit spectaculum, pestiferum nempe istud canceris virus adhuc intus residuum, obturato illo externo oris ostio libero, nunc maiore longe periculo, ipsos interiores faucium collique recessus inuasisse, ibique vuulam, palatum, atque vtrasque tonsillas, non intactis plane externis quoque pone aures, glandulis parotidibus, immedicabili lue infecisse.

Licet igitur mox potentissima remedia tam interna, quam externa, vt linctus, potiones, gargarismata, aliaque profutura, in vsum assiduum, sine vlla cunctatione, aduocarentur, non exclusis simul Medicamentis ex mirifico illo, vt creditur quidem, Ligno sancto, atque Hydrargyro ipso, volubili sua mobilitate omnes tenuissimos corporis canales et recessus liberrime permeante et penetrante paratis; frustra tamen omnino solertissimae etiam manus medicae adhibebantur, Arsque ipsa salutaris victa inoestaque iacebat. Quoniam enim ob caecos difficilesque angustiarum aditus atque recessus, nemo facile summum tetri vlceris interni os ferro acuto rescindere poterat, licet quoddam in faucibus carcinoma vstione adhibita, feliciter sese olim extinxisse, scripserit HIPPOCRATES noster, *Lib. de Morbis Epidem. VII, p. 873.* quem postea nostro quidem aeuo, fortiter feliciterque imitatus fuit magnus FRED. RVYSCHIVS, *Observat. Anatom. Chirurg. LXXVI, p. 70.* quod

quod ipsum nec ignorauit CELSVS, *Lib. VI, cap. 15. pag. 391.* hinc vitium insanabile tanto magis alebatur, viuebatque validius tegendo, atque latius quaquaueversum proserpendo, diuagabatur, adeo, vt tandem iste mortalium miserrimus, in se tumescentibus paullatim faucibus, et impedito hinc libero animae meatu, macie, fame, aestu, aegritudine et febre lenta confectus et attritus, mortem in tot malis, ceu portum ac finem miseriarum, anxie quaereret, ac toties quaesitam et expectatam demum, post aliquot hebdomadas lamentabiliter transactas, auspicato inueniret. Manifesto nimirum argumento, tardiora scilicet saepe esse Remedia, quam Mala, quaeque dudum corrupta, in malum vlcus veterauerunt, longe difficilius curari posse, et nusquam hinc tutam prorsus fore fidem de exstirpando penitus Cancro, temere conceptam. Serpit nempe, vt dixi, pascendo, crescens illa pestis, neque amputato vno letifero ramo, deficit alter mox successurus.

*Vlcus enim viuescit, et inueterascit alendo,
Inque dies gliscit furor, atque aerumna grauescit.*

HISTORIA SECVNDA.

Pari quidem tetro oris dehonestamento deturpatus; dispari tamen animi fortitudine praemunitus, me anno *MDCCXXXV.* accessit nobilis quidam Venator Nassauicus, annorum *LII.* vigentis adhuc aetatis et valentis satis corporis. Trepidabat enim vehementer atque exhorrebat vel ad solam mentionem de amputando nempe labio, atro Cancris serpentis veneno taboque corrupto, a nobis tum factam, adeo vsque, vt animi fere defectionem pateretur.

Quum autem ipsi argumentis haud proleteriis liquido demonstravissem, nullam aliam facile sperandae salutis amplius superesse viam, quam quidem istam, quae acuto ferri minacis mucrone aperiretur, atque in eiusmodi malis conclamatis, singulisque fere momentis, augescentibus, nihil tutius festinatione reperiri, hincque facto magis, quam consulto, opus esse: mutata statim sententia, imperiosae sese necessitati lubentiore animo morigeraturum, sancte spopondit, fractus praesertim atque expugnatus flagrantissimis charae vxoris filiaeque vnicae precibus, lacri-

misque coortis vberrimis: Addebat praeterea, se tanto magis nunc certius aliquod, etsi paulo durius, sui pertinacis Mali expetere Remedium, quod haecenus per tres fere annos, promissis medicorum splendide mendacibus verique inanibus, miserabiliter circumductus fuisset, atque ex sumtuosis eorundem medicamentis, specioso quidem ac decepturo fūco circumlitis, intra autem nihil prorsus fronti suae simile habentibus, largissima licet copia sibi subinde ingestis, plus semper damni, quam emolumenti, indignabundus morarumque pertaesus, percepisset.

Oportuna igitur sanguinis missione, ventrisque impuri expurgatione praemissa, aliisque pro ipsa rei praesentis natura, in tempore, decenter circumspectis ac prouisis, mox sine mora, ipsum opus fortiter aggressi sumus, labiumque illud ferali iam liuore corruptum, tēterrimique odoris tabo turgidum eiusdem solertis chirurgi manu adiutrice, a parte sui sincera, vna cum aliqua carnis adhuc sanae portione, ex accuratis artis scilicet regulis, feliciter resecuimus, idque tanta quidem cum pernicitate peractum fuit, ut longe citius metu suo atque sollicitudine exsolutus esset ipse aegrotus, quam spe antea praecepisset, uti cruento adhuc ore, nobis laetus gratusque fatebatur: quum interim haecenus inexpectata certe animi constantia, perpeffus esset et cohibuisset coërcuissetque intra sese effrenati doloris violentias, nec vlllos praeter spem, lamentabiles gemitus edidisset.

Ceterum recens hoc a sanguine adhuc vulnus eodem, ac superius fabri, modo, rite curatum ac tractatum, dein probe suppuraui, sensim pulchre resanuit, et quandam quasi deperditi labri imaginem, Naturae emendatricis beneficio, mirantibus et gaudentibus nobis, scite reduxit, ita, ut egesto plane, quidquid turbidum, corruptum ac cariosum fuerat, faciei pristina sua forma maximam quidem partem, rediisse videretur.

Peracta igitur sic feliciter, ut quidem blanda nobis inierat persuasio, curatione, paullo post, sanatus noster Venator, cum omni sua familia, a nobis, domum recessit, laetiore multum animo, facieque aspectu meliore, quam ad nos ante aliquot hebdomadas, accesserat, ingentis iam de restituta salute, spei plenus, suae autem tam propinquae cheu! fortis tristioris adhuc ignarus.

Licet enim, nobis serio suadentibus, nihil interea prorsus neglexisset, quod ad laudabilem succum sanguinemque vitalem aut conservandum, aut denuo ingenerandum, vlllo modo faceret, licet quoque imperiosioris, exquisitoris et curatoris diaetae multum obseruantior esset misero isto Fabro superius commemorato, dura nempe et amara paupertate nimium presso, quum ipse contra diuitiis, facultatibus, vitaeque melioris et mollioris commodis abundaret, licet denique Thermis Emb-sensibus, fontibusque natura medicatis aliis, ex nostro quidem salutari consilio, subinde vsus fuisset: tamen his omnibus prudenter interea adhibitis, obstante nempe dura inexorabilis fati inclementia, prohibere nullo pacto potuit, quò minus pestifer ille Mali male soporati fomes sub cineribus quasi dolosis adhuc absconditus, in nouam et atrocio rem subinde flammam erumperet.

Biennio enim vix plene exacto, paria tristia fata, cum miserando isto Fabro, ipse sane miserandus, subiit, delato nempe mortifero Carceris acrius reuiuifcentis veneno in ipsas Colli tumentis glandulas, in asperum veluti saxum induratas, et ipsam denique, horresco referens, Linguam multis tuberculis liuentibus foedissimamque faniem plorantibus, horrendo plane spectaculo, oppletam, non intactis vna ipsis gingiuis, similibus tetrissimis vlcusculisque pariter scatentibus: quale quid etiam olim obseruasse videtur ipse HIPPOCRATES noster, *Lib. IV. de Morb. Epidem. pag. 754.* et vt GALENUM et AEGINETAM iam taceam, potissimum VALENTINVS RVLANDVS, apud HILDANVM, *Obs. Chirurg. 84. Cent. III. pag. 351. sqq.* item et THOMAS BARTHOLINVS, in *Act. Med. Hafniens. Vol. II. Obs. 40. pag. 115.* vt et IO. SCVL-TETVS, in *Armament. Chirurg. Declarat. Tabulae XLIII. pag. 187. sqq.* Quum igitur sic renatum hoc malum omni arte salutari valentius, omni-que ope humana insuperabile prorsus esset; hinc

inuieta Mente placebat

Rebus in aduersis, exceptum pectore Letum.

Ideo afflictissimus hic homo, post diros magis durosque, quam longos lentosque cruciatus, animam tandem tot malis et aerumnis fessam, gaudenti propior, quam lugenti, Deo reddidit, suo nempe corpore, quod hactenus inuita quasi et coacta, inhabitauerat, longe puriorem atque incorruptiorem.

HISTORIA TERTIA.

Atrocius multum tristiufque nobis spectaculum praebuit Anno CIOIOCCXL. nobilis quaedam natalibus, animo et forma corporis Foemina Alfatica, annorum XXXIII. per septem iam annos, vidua, immo potius per omne id nouem annorum spatium, quo ex rigidorum parentum duro magis imperio; quam libera fui ipsius voluntate, impari connubio, faeuo cum ioco, male iuncta fuerat bono, quidem divitique marito, sed vetulo simul, et in feruidam venerem frigido iam imbellique athletae, ex cuius laxis lassisque nimium amplexibus et praenunciis tantum mentitae robustioris voluptatis blanditiis, osculisque ieiunis et inefficacibus, nullum plenum licentiae coniugalis gaudium decerpserat haec misella ista laetioribusque hymenaeis dignior puella, septem tantum decemque annos tunc nata.

Composito igitur tandem hoc suo Marito, nomine magis tali, quam opere, animum quidem a Venere haecenus nempe indegustata, non prorsus alienum ad secundas prioribusque secundiores nuptias lubens adplicuit; sed curis interim discordiisque domesticis, ex opima illa hereditate, ut fieri solet, ipsi subnatis, circumuenta ac praepedita, euentuique litis ambiguo intenta, negotium istud in iusto longius tempus extraxit, atque inculta quasi consenuit, inprimis, quum dubia ac suspensa haereret, cui nam potissimum e tanta procorum tam opulentae praedae auide inhiantium turba, se suasque fortunas tuto committeret, donec tandem temporis processu, primus ille acris noui foederis connubialis ineundi impetus cunctatione interiecta, sensim relanguisset, et potior aureae libertatis aestimatio in eius quidem locum successisset, dulciusque hinc visum fuisset, collo impofterum resoluta, viuere, nullaue arctiora coniugii ambigui vincula sustinere.

Sed absterrebat adhuc magis Foeminam optimam a coepto proposito, improspera corporis delicati valetudo, interim suborta, pedum nempe durus rubicundusque tumor, et mensium inprimis ad statas Naturae leges haud amplius iuste respondentium inordinatus motus ac devius error: Nunc enim parcius erumpebant, nunc immoderatus rursus, et nunc denique per aliquod tempus, plane suppressi fiebantur.

His praesertim accedebat Tuberculum quoddam durum, fabae mediocris magnitudine, in dextra mamma subito sua sponte obortum, dolore quidem primum carens; sed postea tamen imminente in primis sanguinis menstrui fluxu, dolore omni haud vacuum. Quod quum ab initio, tantum exiguum, mox tamen, procedente tempore, in maiores auctus altioresque tumores sensimque assurgeret, doloresque lancinantes quasi, etiam extra consuetum mensium proditurorum tempus, increbescerent; tum nobilis illa foemina suae nunc salutis, etsi paulo ferius, curiosior, sibi aliquantum metuere, atque idonea contra ingrauescens malum, remedia solícite circumspicere coepit; sed adeo aduersa potius, quam secunda, fortuna, ut adhibitis incautius varii generis fomentis, emplastris, epithematis, vnguentis, liquoribus ac spiritibus, ut quidem vulgo vocantur, Malum illud solatis potius, ac mollium remediorum ratione tractandum, nunc latius serpens, magis exasperaretur, cancerque ipse haecenus occultus, tot autem irritamentis praepostere exstimulatus, exitiosas suas vires virusque nunc manifestius proderet. Amabilis enim haec et Pario marmore alias candidior Mamma adeo saxeam quasi naturam induerat, et in tam immensam fere molem monstrofe excreuerat, intercurrentibus passim inflatis et quasi recuruatis venis, colore partim pallentibus, partim liuentibus, non sine horrore conspicuis, ut insolitum illud et molestissimum pondus vel lata fascia aegre substrictum, maximo cum taedio, portandum esset.

Quare confestim vnanimi peritiorum Medicorum et Chirurgorum in societatem adscitorum suffragio, sententia decretoria lata fuit, ferro nempe atque igne eradicandum omnino esse insanabile illud Carcinoma, ne partes adhuc sinceræ una in exitium mutuum traherentur. Quam propositam conditionem, etsi durissimam, molliori praesertim sexui, Foemina illa ingens animi, mox lubens et interrita prorsus accepit, seque, ut corpus redimeret, asperum ferrum iuxta saeuosque ignes fortiter passuram, constantissime asseueravit. Haud igitur ignara, quae sibi tormenta pararentur, formidabile illud ferine sinu intrepide accepit, atque dirissimos cruciatus animo plus quam virili, pertulit, in nullos prorsus degeneres questus, aut flebiles lamentationes molliter soluta.

Quum

Quum igitur omnia in patentis iam vulneris curatione rite instituta, ex voto succedere viderentur, praesentibus tum firma quidem, sed falsa tamen, inerat persuasio, omne iamiam periculum feliciter esse superatum, cunctaque in posterum in vado fore: Verum spe irrita prorsus et opinione inani sic argutabamur:

Sed non idcirco flammæ atque incendia vires

Indomitas posuere:

Quin potius male obrutum resurrexit mox incendium. Anno enim vix circumacto, inexsaturabilis cancri indomiti voracitas et alteram denique Mammam ab illa detestabili quidem labe adhuc immunem, atrocissime adorta est, atque sic illaefas vitiatas partes addendo, similes lugubres prorsus atque lacrimosas Tragoedias vel ibi concitavit.

Trepidantibus ergo, consiliique atque auxilii ambiguis inopibusque tum Medicis atque Chirurgis, ipsa illa imperturbatae firmitudinis Foemina, in singulare plane constantiae plusquam masculae, exemplum, omni aevo memorandum, nata, et quasi malorum adfuetudine iam indurata, labantes consilio Medicos suo valide firmavit, seque et alterius mammae crudele quamvis excidium toleraturam, quo generosius nempe periret, placida ore, intrepida verbis, et intempestivas suorum lacrimas coercens, pronuntiavit. Vnde attonitis iure miraculo hoc paene inaudito, Medicis, illa infelix pesti deuota iam futurae, nec muliebriter ferrum iterum expauit, nec pectus atque ora singultu quatiens, visendo tormenta sua iam cognita, ad impatientiam delapsa fuit: sed vultu potius sereno fortis, duratoque, ad instar Marpesiae cautis, aduersus acerbissimum quemque dolorem, animo, et alteram illam mainmain putri tabo iam liquentem et horrendum foetidam intrepide praebuit excindendam; nec miserabiliter sibi indoluit, geminum illud formae suae haud quotidianae eximium ornamentum, sororiantes nempe mamillas, iam ante sui ipsius funus, foede, fuisse funeratum, nudamque tantum atque desolatam earum aream, miserando prorsus spectaculo, esse relictam.

Quod summum formae decus est, cecidere Mamillae;

Ac letalis hiems paulatim in pectora venit.

Verum

Verum curatis licet et prouisis maxima quidem circumspeditione et indefessa medendi artis industria ac solertia, vniuersis singulisque, tamen proh dolor! nec intra hos, tametsi latissimos limites, atrox inexpugnabilis mali stetit faeuities; quin potius depopulatis iam superioribus corporis partibus, ferri quasi nunc metuentior, lumbagine, lassitudine et insolito aerique locorum muliebrium pruritu, praeuiis, ad inferiores, vterum nempe ipsum, aliquot post, mensibus, relapsa est, quo scilicet primo quasi fonte deriuata terribilis illa clades in mammas haud dubie confluxerat. Dolebat enim, vti paullo superius iam commemoratum, exiguum illud tuberculum prius in mamma enatum, vel maxime, eo inprimis tempore, quum natura consueto ordine, per menses exsolueretur.

Ad eo inenarrabiles autem atque insustentabiles fere cruciatus in ista vteri dira labe affecti, regione alias perquam sensili, subito exoriebantur, vt tantis doloribus diutius ferendis tenerum hoc muliebre corpus impar omnino videretur. Inprimis vero lentum, acre et vrens virus continuo ab vlceroso inguine destillabat, siue ex sic dicta vteri vagina emanabat, quod non solum saeuam olidamque exhalabat mephitim, vt miseram illam tetris odoribus foeminam famulae adstantesque in auxilia medici aliique saepius longe fugitarent; sed et edaci sua ac dentata quasi acrimonia vel ipsas circumiacentes corporis partes carnosas, ceu crudeli tabe, peredebat; atque insuper, horrendum dictu et auditu! ipsa quoque subiecta stragula lintea contactu illo immundo, sanieque aeruginosa, cinericea, flaua, variaque ac tabo sanguine atro permixto, foeda sensim corrodebat.

Licet igitur contra durissimum hunc hostem omni medendi arte perquam strenue pugnaretur, licet praestantissima remedia intus et extra, continuo in vsum diligenter aduocarentur; nempe interius, potiones sanguinem corruptum vitiosumque purificantes, et potentissima alias medicamenta ex ipso ponderoso Mercurio liquido studiose parata, cum aliis id genus pluribus: exterius autem varii liquores balsamici, vulnerarii, emundantes, putredini aduersantes, et anodynii, vt vocantur, per siphones, in laborantem, foedisque et Chironiis quasi vlceribus scattentem naturam muliebrein perpetuo iniicerentur, non exclusis salutaribus

bus pectus, in eundem nempe scopum efformatis, similesque fatus partibus mordaci tabo exesis adinuerentur: Victa tamen hic succubuit medicina malis, atque haec omnia incassum plane, dolentibus merito praesentibus cunctis, adhibebantur, et infructuosa prorsus opera tentabantur a medicis sedulis quidem, sed infelicibus, sine vlla spe viuendi mali peruicacis relicta: proserpente quippe indies longius ista peste, cedere nescia et vires maiores eundo, adquirente.

Vnde inquietae plerumque et infomnes noctes, longa ciborum fastidia, crebriores animi labantis defectiones, rigores et tremores artuum, inexplebiles fere bibendi cupidines, et insequutae mox molestae rursus vomitiones, atque innumera alia mala misellam istam iureque deplorabilem foeminam, miserandum in modum, sine vlla fere intermissione, exercebant et excruciabant.

Illam tamen omnia haec tormenta, quantumuis faeuissima, pervincere prorsus haud potuerunt, ut mente solida quateretur, aut ex acrioris doloris impatientia, vocem degenerem, vel coeli vindicis irreuerentiolem ederet, decoram sui famam foede corrupturam: donec tandem biennio fere integro, inter tot infandas aerumnas et horrendas calamitates, exacto, infelix illa inclementia fati, exterrita foemina, mortem, ceu vicium miseriarum portum atque effugium, placide oraret, ipsamque nonnihil taederet, suo quasi funeri interesse, et male viuum suum cadauer omnibus foetore horrido abominabile secum diutius circumferre: Arebat enim vbique sicca cutis, et rigidi nudique nerui stabant, infecto quoque ore exsanguis funereoque colore.

Omnipotens ergo Deus longum interea miseratus dolorem difficilemque obitum, placidam tandem facilemque mortem tanto laudabilius periturae imminuit, adeo, ut tenuem iam spiritum, dormiturae propior, facile exprimeret: relicto interim non tam caduco foedoque illo tetrus ulceribus corpore, fugitiuo animi perennaturi desertore; quam potius tam fortis exitus constantiaeque inconcussae illustri plane et diutius mansuro exemplo. Ita enim hic a nobis narrata posteritati et tradita, superstes quasi erit, si non in longissimum aeuum; tamen, si illud quidem a venturi saeculi benignitate sperare fas fuerit, per alicuius saltem atque angustioris temporis spatium.

*Si modo ferre diem, serosque videre Nepotes
Vilia nostra valent, nec famam inuidit Apollo.*

Sed de his haecenus! ne scilicet scriptoris Medici muneris obli-
alienas Oratoris, aut Historici partes intempestive inuolasse, non nemi-
ni videamur. Vt enim ingenue nihil celemus, sola Virtutis e duris
asperisque pulchrius enitescens iusta aestimatio hic nos aliquanto lon-
gius prouexit, ac animo primum destinaueramus.

OBSERVATIONES PRACTICAE VARIAE

EX

HIS IPSIS ENARRATIS HISTORIIS

DE DVCTAE.

§. I.

Ex his igitur tribus miserandis historiis nunc, liquidius, putem, con-
stabit, quam parum scilicet certioris fiduciae pleniorisque salutis, in
sola Cancri pertinacis et intractabilis Exstirpatione fuerit reponendum,
et quanto tutius sit ex aduerso, immedicabile malum non temere con-
tractare, aut intempestiuis remediis adhuc magis accendere, nec foe-
dam hanc Camarinam, aut olidam anagyrin infeliciter plane, nulloque
cum fructu, commouere.

§. II. Licet enim paucissimi, raro Coeli clementioris munere, post
illius excisionem, ad sanitatem pristinam reuersi fuerint, vti varii mox
laudandi auctores, fide alias haud indigni, memoriae prodiderunt: ta-
men longe plures contrarium experti, praecipitatis eo ipso properan-
tius fati, misere extincti fuerunt: quum nempe efferatum illud et
omnes omnium medicorum artes eludere solitum Cancri insidiosi Ve-
nenum, ex vno loco armata quasi ferro et igne manu, expulsum, mox
aliud longe periculosiorem occuparet, vbi ob difficiliorem locorum ab-
strusiorum aditum, nulla arte, aut ope humana, laboranti et succumbenti
tandem Naturae succurri commode possiet, nec sese praestantiores illi
et valentiores in arte chirurgica, Magistri facile inuenirent, qui, vt AR-
NOBIVS, *Lib. I. aduersus Gentes, pag. 30. de re foeda, satis eleganter*
loquitur, Contumaciam Canceris saevi, ad subeundam cicatricem, circum-
scriptis euaginationibus, compellerent.

§. III. Inde verissimum quidem notum illud tristissimum durissimum-
que CORNELII CELSI effatum *L. v. cap. 28.* prout nempe ex ill. MORGAGNI
nostraque emendatione, legendum ibi videtur: *Carcinomata*
curationibus irritantur, et quo maior vis adhibita est, eo magis: Quidam ferro
adusserunt: quidam scalpello exciderunt: neque vlla unquam Medicina profuit:
sed adusta protinus concitata sunt, et increuerunt, donec occiderent. Excisa
etiam, post inductam cicatricem, tamen reuerterunt, et caussam Mortis attule-
runt. Hactenus CELSVS, de quo vid. ill. MORGAGNI modo lau-
dati, *Epist. anat. 50. Tom. II. pag. 278. op. egregii de Sedibus et caussis*
Morborum. Vix ergo crediderim, quenquam inter prudentiores Me-
dicos et peritiores Chirurgo facile repertum iri, qui nouam illam, sed
iusto audaciorum et violentiorem Cancris sanandi et extirpandi metho-
dum, a WILHELMO NORFORD, Chirurgo Anglo, singulari Libro,
Lond. 1753. publice expositam, penitus sit approbaturus, qua non so-
lum Mammarum; sed et, quod longe difficilius, imo fere incredibi-
lius, ipsorum quoque vterorum, foedissimos et pertinacissimos cancris
feliciter sese ac perfecte aliquoties curasse, confidenter affirmat. Sic
narret, inter alia, sese fungum Mammae cancrosum, imposito vnguento
ex Rad. Cataputiae, cum Mercurio dulci, in aqua Calcis viuae praeci-
pitato, parato, fausto cum successu sanasse et funditus extirpasset: Imo,
quod tanto magis mirandum, infelici cuidam Virgini, ex ipsa vteri va-
gina, Sarcoma quoddam Carcinodes foetidum, et multa materia putri-
da olidaque scatens feliciter excidisse, licet alias, recte statuatur, ipsa
quidem vteri Carcinomata plerumque esse immedicabilia atque demum
lethalia. Ipsum igitur haec omnia fauste ac perite peregisset, plane non
dubito; oblitus vero potissimum mihi videtur, quod vel maxime scire
cupiam, qualis nempe demum fuerit euentus, post aliquot menses, aut
annos, et an nullus iustus metus, proditis nouis indiciis, subsequutus
sit, reuersuri loco alio forsan periculosiore, ipsius tetri cancri, ex parte
tantum extirpati? Hoc enim erat vel maxime in Quaestione. Sed
de hoc WILH. NORFORDOS, eiusque socio et sympatriota, RICHAR-
DO GUY, nouis Cancrorum oppugnatoribus celebr. infra rursus quae-
dam mouebuntur. Iam ergo haec sufficiant.

§. IV. Quot et praesertim pertinet graphica illa et spirans quasi lactei LACTANTII descriptio Cancri illius viuacis ac verminosi, planeque inextirpabilis, quo truculentissimum illum et cruentissimum Tyrannum, GALERIVM MAXIMIANVM, in meritissimam scelerum poenam, diu excruciauerat iustissima Dei ultoris vindicta, *Lib. de Mortibus Persecutorum, Cap. xxxiii.* his quidem verbis: *Incipit vulnus non sentire Medicinam; proxima quaeque Cancer inuadit, et quanto magis circumsecatur, latius saeuit; quanto curatur, increscit.*

Cessere Magistri,

Phillyrides Chiron, Amythaoniusque Melampus.

Vndique Medici nobiles trahuntur: nihil humanae manus promouent. Computrescunt forinsecus viscera, et in tabem sedes tota dilabatur. Non desinunt tamen infelices Medici, vel sine spe vincendi Mali, fouere, curare. Repercussum Medelis Malum recidit introrsus, et interna comprehendit, vermes intus creantur. etc. Quomodo nempe postrema verba rectius legenda nobis videbantur quondam, pro vulgatis quidem, *Repercussis medullis, malum recidit introrsus:* vti iamiam monuimus, ac nonnihil probauimus, in Libelli nostri de pleuritide, adiecta Appendice, ad Theodori Prisciani Cap. i v. pag. 198. Ceterum, vt id obiter hic adiiciam, eandem Cancri saeuissimi et foetidissimi descriptionem vberiore legendam nobis exhibuit EVSEBIUS, *Lib. viii. Histor. Eccles. Cap. 16. pag. 315.* item *Lib. i. de Vita Constantini, Cap. 57. pag. 437.* atque ex eo SVIDAS, in suo Glossario, Tom. ii. pag. 494. vbi videndus KVSTERVS.

§. V. Instar autem omnium hic potissimum esse potest veridicum illud HIPPOCRATIS ipsius nostri Oraculum Medicis doctioribus elegantioribusque dudum cognitissimum, *Aphorif. 38. Sect. vi. ὀκρόσοισι κρυπτοὶ καρκῖνοι γίνονται, μὴ θεραπεύειν βέλτιον. Θεραπεύόμενοι γὰρ ἀπόλλυνται ταχέως μὴ θεραπεύόμενοι δὲ πλείω χρόνον διατελέσει,* h. e. *Quibus occulti Cancri fiunt, eos non curare melius est. Curati enim citius pereunt: Non curati autem longius tempus perdurant.* Ad quem singularem locum, alibi quoque a Nostro repetitum, *Lib. nempe ii. Praedict. etc.* legi praesertim in amplissimo Commentario, meretur ipse GALENVS, *Tom. ix. Opp. Part. ii. pag. 272.* item SITONVS, in *Iatrosoph. Miscellan. Tract. vi. pag. 30. sqq.* et nouissime, Cl. LANGE, in *dissert. eximia,*

de *Dubis Cicutae vexatis*, pag. 27. *sqq.* vbi lugubria quaedam huius infastae medicationis exempla, notatu certe dignissima. Vel maxime autem GUILIELM. FABRIC. HILDANVS, *Observat. Chirurg.* 87. *Cent.* III. pag. 369. *sqq.* et pag. 381. ibique etiam SEBASTIANVS MEYERVS, in doctissima sua ad ipsum HILDANVM, *Responsione*, pag. 384. *sqq.* qui ipsi nempe eximii duumviri in arduum nonnihil illum Aphorismum Hippocraticum perquam egregie commentati fuerunt: cuius tamen inconcussam plane veritatem labefactare oppugnare ipsumque HIPPOCRATEM rectiora scilicet docere, temerario prorsus ausu, conatus est frigidus ille per ignem philosophus, PETR. IO. FABER, in *Chirurgia sic dicta spagyrica*, Cap. 14. pag. 49. Quibus supra laudatis omnino suo merito, addendus doctissimus ac diligentissimus DIETERICHVS, in *Iatreo Hippocratico*, opere bonae frugis plenissimo, pag. 587. *sqq.* et pag. 654. vbi certe plura, quae ad hoc nostrum Argumentum in primis spectant, vna collecta exhibentur: nec non GORRAEVS, in *Definit. Med.* pag. 209. FOESIVS, in *Oeconomia Hippocratica*, p. 187. *sqq.* cum aliis pluribus. Conf. huc et IO. IAC. BAIERI *Adag. medicinal.* LXXI. pag. 150. *sqq.* vbi notum illud Graecorum prouerbium $\mu\eta\ \kappa\iota\nu\epsilon\iota\nu\ \kappa\alpha\kappa\acute{o}\nu\ \epsilon\nu\ \kappa\acute{\epsilon}\mu\epsilon\nu\omicron\nu$, scite ad ipsos occultos et dormientes Cancros, nulla admota intempestiua medela irritandos, applicat. Eiusmodi occulto autem tacitoque Cancro ob vehementiores planctus pectori illatos, irritato, IULIAM Imperatricem extinctam fuisse, ita narrat DIO CASSIVS, L. 78. p. 1332. *Tom.* II. opp. $\acute{\upsilon}\pi\omicron\ \tau\tilde{\epsilon}\ \kappa\alpha\rho\kappa\acute{\iota}\nu\omicron\varsigma$, $\acute{o}\nu\ \epsilon\nu\ \tau\tilde{\omega}\ \mu\alpha\sigma\tilde{\omega}\ \epsilon\kappa\ \pi\acute{\alpha}\nu\tau\iota\ \pi\omicron\lambda\lambda\tilde{\epsilon}\ \chi\rho\acute{o}\nu\omicron\varsigma$, $\eta\sigma\omicron\chi\alpha\zeta\omicron\nu\tau\acute{\alpha}\ \pi\omega\varsigma\ \epsilon\chi\epsilon\sigma\alpha$, $\tau\acute{o}\tau\epsilon\ \eta\gamma\acute{\epsilon}\delta\iota\sigma\epsilon\nu\ \epsilon\kappa\ \tau\tilde{\eta}\varsigma\ \pi\lambda\eta\gamma\tilde{\eta}\varsigma$, $\eta\nu\ \epsilon\pi\acute{\iota}\ \tau\tilde{\omega}\ \tau\tilde{\epsilon}\ \pi\alpha\iota\delta\acute{\epsilon}\varsigma\ \Theta\alpha\nu\acute{\alpha}\tau\omega\ \kappa\omicron\psi\alpha\mu\acute{\epsilon}\nu\eta\ \kappa\alpha\tau\alpha\ \tau\tilde{\omega}\nu\ \tau\acute{\epsilon}\gamma\epsilon\nu\omega\nu\ \epsilon\pi\acute{\epsilon}\pi\lambda\eta\kappa\tau\omicron$. Obiit a cancro, quem in mamilla, a longo iam tempore, quiescentem habebat, tum vero irritabat ex illata vehementiore plaga, quum pectora, ob charissimū filii, Getae, necem, saevioribus verberibus pertunderet. Quae vero sic ridicule prorsus olim verterat GVIL. BLANCVS: *Acceleravit ei mortem Carcinus, cuius ipsa, quum eum iam multo tempore, quiescens, haberet in sinu, pedus percussit, eumque crebris ictibus ad mortem ei inferendam, irritavit.* De quo lepidō errore vid. REINES. *Var. Lect.* III, 6. p. 464. et DIETERIC. *Iat. Hipp.* p. 655.

Quam quidem verissimam HIPPOCRATIS sententiam, de Cancrorum occulta vi saeuientium et serpentium ancipiti ac damnosa curatione, sapienter quoque in immortale suum opus transtulit Histori-
 corum prudentissimus ac stilo nitidissimus, POLYBIUS, cuius proinde testimonium, maioris scilicet ornatus gratia, ceu fulgentiorem aliquam gemmulam, his dictis nostris interserere, nihil, spero, prohibebit. Ita vero ille, *Lib. I. pag. 114.* Ἐπὶ τε γὰρ τῶν ἑλκῶν, (Καρκινῶδων,) εἰ μὲν Σεραπείας τοῖς τοιούτοις προσάγη τις, ὑπ' αὐτῆς ἐνίοτε ταύτης ἐρεθιζόμενα θάπτον ποιεῖται νομὴν. Ἐὰν δὲ πάλιν ἀφῇ, κατὰ τὴν ἐξ αὐτῶν φύσιν φθείροντα τὸ συνεχές, ἐκ ἰσχεί παῦλαν, ἕως ἂν ἀφανίσει τὸ ὑποκείμενον. *In canerosis quidem ulceribus, si curationem ita affectis admoneas, illa ipsa irritatur Malum, ut tanto serpat velocius. Rursus, si curatio omittatur, proxima quaeque loca corrumpendo, ut natura est horum ulcerum, non ante finem faciunt, quam corpori subiecto perniciem attulerint.* Haecenus POLYBIUS. Atque id ipsum est, quod ita scite, ut solet, expressit ARETAEVS CAPPADOX, *Lib. II. de Morb. diuturn. Cap. XI. pag. 64.* Ἀγχιαίνει Καρκίνος ψαύσει τε καὶ φαρμάκοις, καὶ χαλεπαίνει, πῶς καὶ ἰητερίῃ. h. e. *Efferatur Cancer manuum attrectatione, et Medicamentis, et quolibet Medelae genere magis exasperatur; vbi videatur, si quidem libet, commentarius longe doctissimus Medici ornatissimi et elegantissimi, PETRI PETITI, pag. 210.* ut iam breuitatis studio, PAVLLVM AEGINETAM, AETIVM AMIDENVM, GALENVM, mox laudandum, NONVM, ACTVARIVM, aliosque Veteres Medicos taceam, apud quos nempe similes plane sententiae frequentius leguntur. Inprimis autem facundissimus et acutissimus orator ac philosophus MAXIMVS TYRIVS, eodem, ac ipse laudatus ARETAEVS, modo, loquutus est elegantissime, *Dissert. XLI. pag. 416.* Τὰ ἐρπυστικά τῶν ἑλκῶν τοῖς σώμασιν ἐμπεσόντα, πρὸς ὧν νέμεται, καὶ τῷ ὑγιαίνοντος τί ἀεὶ προσάπολλυσι, καὶ πρὸς τὰς ἰάσεις ἀγχιαίνει, κ. τ. λ. Quale quid et saepius occurrit apud DION. CHRYSOST. *Orat. XXXII. p. 366.* BASIL. MAGN. *Tom. III. opp. pag. 495.* GALEN. *Lib. IV. de Method. Med. c. 5. pag. 93. Tom. X. Phot. Bibl. p. 567.* PHILONEM IVD. *Lib. de praem. et poen. pag. 708.* aliosque plures, quibus add. MVRATORI *Anecdota Latina Tom. IV. pag. 65.* vbi elegans hanc in rem locus ex S. MAXIMI Tau-

rinatis Episcopi sermonibus, ibi primum editis, occurrit, legi omnino dignus. Sed haec de his nunc sufficiant.

§. VII. His autem grauissimis Medicorum praestantissimorum praeceptis et interdictis seuerissimis licet vel maxime obstantibus; tamen et antiquiore iam aevo, et hac nostra quoque recentiore aetate, nonnulli mirandorum eiusmodi arcanorum aut veri possessores, aut forsitan rectius, vani promissores, subinde reperti fuerunt, quibus ne adnoto quidem supremo illo ferri acuti remedio, sese cuiuscunque cancerum generis saeuas nocendi ac depascendi vires infringere ac debilitare posse, gloriarentur. Sic vetustissimus Auctor M. PORCIVS CATO venerendae suae et aliis omnibus vel praestantissimis plantis, praelatae Deae, quae ipsi nempe in hortis nascebatur, scilicet Brassicae, inuidendam hanc laudem in debellanda omnis cancri saeuitia, tribuit, C. CLVII. *de Re Rust. pag. 118. Eadem vulnera putida, Cancresque purgabit, sanosque faciet, quod Medicamentum aliud facere non potest: quod ex ipso repetit PLINIVS, Lib. XX. Cap. 9. ubi tamen sapienter addit: Siluestris Brassicae immenso plus effectus laudat Cato.* Longe vero cumulatius inflatusque extollit ac commendat adhuc SCRIBONIUS LARGVS mirificam illam, vt ipse iure vocat, compositionem nullius paene in medendo, virtutis expertem, ac praecipue a PACCHIO ANTIOCHO auditore PHILENIDIS CATINENSIS, quae stuoso valde vsu illustratam, Cap. XXIII. *Composit. Med. CII. pag. 62. his quidem magnificis verbis: Quid dicam duritias in Mammiis Mulierum, cum dolore, consistentes, quas nullum Medicamentum leuat, quemadmodum ex toto, in perpetuum interdum sanat? quas plerique Medicorum insanabiles adfirmant, καρκινώματα et κακόνθη, appellant. Poteram nominare honestas foeminas, quas aut ille, aut ego, hoc Medicamento sanauimus: nisi crederem, fidem te habere nobis, alioquin ipse tibi iam dixissem: ubi vide, si placet, acutissimi IO. RHODII Not. et Emen-dat. p. 170. Qualem efficacissimam pariter Medicinam cognitam quoque ac perspectam habuisse quondam videtur nobilissimus ille Medicorum Crotoniensium, DEMOCEDES, quum in mamma ATOSSAE DARRII Regis Persarum, vxoris, subnatum malignissimi moris cancerum, iam iam nempe disruptum et exulceratum, hincque vix, ferro igneque amplius expugnabilem, nullo tamen, vt colligere quidem licet ex ipsis*

Historici

Historici verbis, admoto prorsus ferro, folis tantum adhibitis Remediis efficacibus et exquisitis, feliciter persanaret: Nullam enim Vstionis Sectionisue mentionem iniicit, qui memorabilem hanc historiam diserte retulit, HERODOTVS, in *Thalia*, seu *Lib. III. cap. 133. et 134. pag. 211. Edit. Gronou.* cuius nempe haec sunt verba: Ἀτόσση, τῇ Κύρῃ μὲν θυγατρὶ, Δαρεῖς δὲ γυναικὶ, ἐπὶ τῇ μαστῇ ἔφυ φῦμα· μετὰ δὲ, ἐκτραγὲν, ἐνέμετο πρὸσω· ὁ δὲ Δημοκίδης, φὰς ἡγίᾳ ποιήσῃν ὡς δὲ ἄρα μιν μετὰ ταῦτα, ἰώμενος, ὑγίᾳ ἀπεδέξατο, hoc est: *Atossae, Cyri quidem Filiae, Darii autem Vxori, exortum erat in mamma, Tuberculum; deinde vero disruptum, depascendo, late proserpebat. Spondebat autem Democedes, sese illam sanaturum: Confestim ergo idonea medicamenta applicuit, eamque ipsam exiguo interiecto tempore, integræ sanitati reddidit.* Quam singularem Historiam ex hoc ipso HERODOTI loco, maximam quidem partem, desumptam, in suum quoque Lexicon transtulit Suidas. ATHENAEVS autem, eandem perquam felicem DEMOCEDIS curationem enarrans, leuiter nimis leniterque de re graui atque atroci, loquutus fuisse videtur; vt ex his ipsis eiusdem verbis luculentius patet, *Lib. XII, cap. 4. p. 522.* Θεραπεύσας ὁ Δημοκίδης Ἀτόσσαν, τὴν Δαρεῖς μὲν γυναῖκα, Κύρῃ δὲ θυγατέρα, τὸν μαστὸν ἀλγύσασαν. *Sanasse dicitur Democedes Atossam, Darii Coniugem et Cyri Filiam, quum ex mammae dolore aegrotaret.* Quae certe parum digne respondent vberiori isti et accuratiori ipsius HERODOTI relationi superius modo propositae. Sed haec obiter! transeamus potius, si lubet, ad alia.

§. VIII. Si igitur et apud ipsum CORNELIVM nostrum CELSVM, *L. IV. Cap. 15.* commendatur valens aduersus Cancerem Intestinorum, Remedium, qui et in sequentibus *Libris V. VI. VII.* varia tam interna, quam externa Medicamenta dilaudat, quibus singularem virtutem et efficaciam tribuit in persanandis diuersi generis Cancris adhuc, vt ipsi quidem videtur, sanabilibus. Commemoratur quoque PLINIVS, *Lib. XXVIII. Cap. 4.* AESCHINIS Atheniensis singulare, sed simul fere pudendum, Remedium, Botryon dictum, quo ille carcinomatis feliciter medebatur. Sed apud PLINIVM ipsum, in vasto varioque Historiae Naturalis opere, innumera paene Medicamenta ex Plantis, Animalibus, atque Metallis adeo ipsis petita, passim occurrunt, quibus indomitam diri

Cancris ferociam fortiter fortunateque debellari posse, ingenti quidem, nisi forsan nimia, quod vereor, fiducia, traditur. **SEXTVS** quoque **PLACITVS**, rectius, quam **Platonius**, in *Libello, de Medicina ex Animalibus*, apud ill. **FABRICIVM**, *Bibl. Graec. Vol. XIII. Lib. VI. C. 9.* non solum *cap. XVII. 22. p. 414.* sordidum illud **AESCHINIS** Arcanum in extinguendo penitus carcinomate, superius ex **PLINIO** productum, summis laudibus extollit, quod et fecisse constat **CONSTANTINVM AFRICANVM**, *Lib. de Animalium Virtutibus naturalibus, ab Aesculapio acceptis*; sed etiam ipse *Cap. XI. p. 401.* de sua penu aliud promit praestans virtute Remedium contra cancrofa, ut ipse quidem ait, vulnera et Carcinomata. Quale et legitur apud **PLINIVM VALERIANVM**, aliosque plures. Praesertim autem longum vastumque eiusmodi Remediorum tetrus Cancris eradicandis repertorum Indicem passim pertexuerunt veteres Medici Graeci, **GALENVS**, **PAVLLVS AEGINETA**, **AETIVS AMIDENVS**, **DIOSCORIDES**, **ACTVARIVS**, **NONVS**, **ORIBASIVS**, aliique, quorum eximia loca, huc vel maxime spectantia, hic cuncta exscribere, aut specialius indicare, iam nec lubet, nec vacat: imprimis, quum haec ipsa nemini paullo humaniori et in Medicina Veterum peritiori incognita aut obscura esse arbitremur. Utinam autem tam vera essent ista laudata nimis ab Auctoribus Graecis et Latinis aduersus Cancros, remedia, quam varia illa quidem sunt ac multiplicia. Sed sic copia nos inopes fecit, et congesto quasi in auro, adhuc tamen pauperes sumus.

§. IX. Neque enim ditiores felicioresue exinde redditu fuimus tanta nouorum Remediorum accessione facta, quorum eximia prorsus virtute, indomitum alias carcinomatum virus, vel sine ferro adhibito, perdomari facile posse, publicis quoque scriptis, ingenti verborum grandisonorum apparatu, recentiore aetate, diuulgatum fuit. Sic artis ostentatione et portentosa scientiae venditatione insignes illi triumviri, **HIERON. CARDANVS**, **THEOPHRASTVS PARACELSVS**, atque **HELMONTIVS**, quorum societati, ceu quartus, merito adiungendus **PETR. IO. FABER**, in *Chirurg. sic dicta Spagyrica Cap. 17. pag. 143.* item *Cap. 14. pag. 49.* sese talia nosse miranda Remedia arcana, quibus omnes omnino Cancros funditus delerent, iactantius confidentiusque asseuerarunt. Quos inter et mirabilis ille Vir iure censeretur,

retur, qui, referente eodem HELMONTIO, *Tract. de Ideis morbofis*, 38. pag. 518. Tom. 1. Opp. *Cancrum quemlibet sanabat, insperso puluere indolente: atque tum demum emplastro incarnante solidabat: Cuius ars secum sepulta est.* Quae si ita sint, ponamus enim tantisper, vera esse, tum sane inhumanus iste homo, quisquis demum fuerit, turpiter vitam fraudare voluit alienis etiam bonis, atque vniuerso hominum generi maligne inuidens, temere credidit, neminem ex posteris docere, in scientiae esse auctoritatem. Sed certiora haec vix istis esse iure videntur, quae de famosi illius BUTLERI lapillo mirifico ridicule ac superstitiose nimis idem perhibet HELMONTIVS, in *Butlero*, vt Libellum nempe lepide, aut frigide potius, inscripsit, pag. 558. cui nimirum adeo diuinam stupendamque prorsus virtutem inditam fuisse, serio asserit, vt vel leuissimo linguae ad ipsum attactu, siue solo gustatu, siue denique vntione ex isto facta, non solum omnes, etiam immedicabiles alias morbi perfecte persanarentur; sed et inextirpabiles alioquin Cancris temporis fere puncto, si credere quidem dignum, felicissime extirparentur. Sic enim, ne quid scenae nempe, aut mino desit, ipse ille mirificus BUTLERVS ampullatur ad credulum nimis ac superstitiosum HELMONTIVM, ibidem, pag. 555. *Charissime, nisi eo deuenias, quod unico remedio queas curare quemlibet morbum, manebis in tirocinio, utcunque senex euaseris.* Cuius portentosi quidem capitis vagam vitam et aspera, forsitan et promerita, fata omnium accuratissime descripsit elegantissimus MORHOFIVS, in doctissima *Epistola de Metallorum Transmutatione*, pag. 158. *sqq.* Sed haec obiter. Vnde nunc clarissime, opinor, patet, ad quemnam singularem ac mirabilem hominum classem iste pertineat BUTLERVS, beatus scilicet tam lepidi lapidis panchresti possessor, qui rarissima et inaudita fere felicitate, vna, quod dicitur, fidelia non duos, sed omnes omnino parietes confestim dealbare potuit: iste profecto

Gallinae filius albae;

Nos viles pulli, nati infelicibus ouis.

§. X. Nec defuerunt vnquam plures eiusmodi magno, sed inani plane hiato, promissores, splendidis quidem pollicitationibus prompti, vbi vero ad rem ipsam praestandam, ventum fuerit, ignaua opera torpidi atque imbelles. Qualis ille fuit vanus certissimae sanitatis sponsor, qui

referente et dolente AMBROS. PARAEO, *Opp. Chirurg. Lib. VI. Cap. 30. pag. 221.* nobilissimam matronem leui tantum et exiguo adhuc mammae Cancro affectam, perperam medicando, miserandum in modum, perdidit: cui respondet similis historia, apud TIM. AGULDENKLEE, *Cas. 40. Lib. IV. pag. 238.* et apud PECHLINVM, *Obs. 70. Lib. I. pag. 185. sqq.* item IO. AGRICOLAM, in *Chirurgia parva, Tract. V. pag. 499.* quibus add. inprimis VIT. RIEDLINI, *Lin. Med. de Ann. 1695. Obs. 29. pag. 355.* et de *Ann. 1697. Obs. I. pag. 581.* passimque alibi in illis opusculis Riedlinianis variis. Nec non alter ille Aretalogus, cuius meminit ANT. BENIVENIVS, *Cap. 72. de abdit. Morbor. Causs. pag. 239.* qui infelicem textorem pari modo, atrociter tandem interemit. Quo et pertinet temerarius ille Chirurgus, qui notante HILDANO, *Obs. Chirurg. 86. Cent. III. pag. 367.* intempestiua damno- faque Vnguenti Aegyptiaci applicatione, honestam matronam iugulauit: quod triste fatum et alteri similiter contigit, referente eodem, *Obs. sequenti, 87. pag. 370.* nec non miserrimo illi infanti, apud FORESTVM, *Observat. Med. 6. Lib. XIII. pag. 317.* conf. VERZASCHE *Obs. med. 89. pag. 229. sqq.* et rursus FOREST. *Obs. 26. Lib. XVII. pag. 485. sqq.* et *Obs. 47. Lib. XXVIII. pag. 292. sqq.* item AMMAN. *Med. Crit. Cas. 94. pag. 470. sqq.* et exinde VALENTINI, *Pandect. Med. Leg. Cas. XI. pag. 761. sqq. part. I. BONET. Sepulchr. Anat. om. III. Lib. IV. Sect. II. Obs. 7. pag. 268.* vt et HAGENDORN, *Obs. med. 62. Cent. III. pag. 376. sqq.* vbi Casus valde notabilis, qui huc potissimum spectat, denique BARTHOL. BOSCHETTI *Dissert. de Saluat. Mercurial. Cap. III. Artic. 7. Hist. 7. pag. 167.* In idem fere vitae discrimen alia temeraria Medicina, inducta fuit infelix illa filia GOROPHII illius BECANI, portentosis suis opinionibus celeberrimi, narrante latinissimo et experientissimo TVLPPIO, *Obs. med. Cap. 47. Lib. I. pag. 88.* Nec non altera illa longe infeliciores foemina, impudentissimi cuiusdam Agyrtae insanis consiliis et damnosis auxiliis funilem in modum, miserrime decepta ac circumuenta, cuius tristissimam historiam more solito, hoc est eruditissime et elegantissime, retulit Vir et splendidissima amplissimi muneris dignitate, et vasta inprimis consummataque rerum et medicarum, et doctorum, scientia, eminentissimus, suoque merito celebratissimus, ill.

GERARDVS VAN SWIETEN, in illis suis optinae frugis plenissimis Commentariis aeternum haud dubie victuris, in immortalis HERM. BOERHAAVII *Aphorif. Med. pract. Tom. I. pag. 881. quem et vid. pag. 889. 892. et pag. 900. sqq.* vbi nempe arduum hoc argumentum de singulari et abscondita canceri nascentis natura, pertinaci et intractabili indole, atque difficili tandem ac vix sperabili eiusdem curatione, solidissime doctissimeque, vt semper nempe consuevit, data quidem opera, pertractauit. Quod et dudum antea fecerat summus tanti discipuli, Magistro suo, maximo iure, aequiparandi, praeceptor, ipse nimirum BOERHAAVIUS, *Tom. II. Prax. Med. pag. 238. sqq.* ex quo sequentia inprimis verba notatu sane dignissima, e *pag. 243.* huc translata, legi omnino ob argumenti affinitatem, merentur. *Hic vero tota Chirurgia et Medicina desiderant Medicamentum ad Cancrum, vt suppuretur, vel in ambitu, vt aliquando in anthracibus fit, vel, vt substantia eius vertatur in pus, et tamen continuum non soluatur: sed proh dolor! nullum datur; quidquid nonnulli, vt inprimis Chemicis, iactent. Sic habui Medicum Chemicum mihi amicum; ille dicebat, se habere Medicamentum suppurationem bonam efficiens: Sed vidi eum in tribus casibus, aequae infelicem fuisse, ac vllum alium Empiricum: se tamen adhuc curare posse suo Medicamento putabat, licet contrarium videret.* Haecenus quidem BOERHAAVIUS, qui prudentissime inde merito dubitat de eiusmodi medicamento suppuratorio, quod contra inueteratum praesertim et pertinacem cancerum, securum efficaxque auxilium praestare vnquam possit. Qui enim in ipsa rerum Natura reperiundum aliquando sit eiusmodi potentissimum et diuinum prorsus Remedium, quod scirrhum inprimis vetustum, contumacem et saxea paene durie intractabilem, qui semper fere funestam suam originem praebet ipsi cancro, in blandam facilemque suppurationem resolvere tandem feliciter valent; id vero omnem spem, fidem, expectationem, imo ipsam rationem longissime superat. Quod si autem tale forte daretur; tamen tum in tam spatioso mammae ambitu, tanta haud dubie sequutura esset suppuratio, vt ipsum corpus macie et febre lenta consumtum, breui succumberet.

§. XI. Tale tamen Remedium a BOERHAAVIO iure desideratum, nullo aere mercabile, nullo inquam, auro aestimabile, habuisse

vnice rarissima quidem felicitate, videtur celeberrimus iste faeui Cancro domitor, vti vocabatur, PETRVS ALLIOT, Barroducaeus, rerum medicarum et chemicarum scientissimus, qui generosioris cuiusdam Foeminae mamillae sinistrae a crudelissima Cancro teterrimi pertinacissimique tabe per integrum iamiam quadriennium, immane quantum peresae *inspersit quotidie albicantem quendam puluisculum sibi soli notum, unde post horulae spatium, levis coorta febricula, quae tamen mox cessauit, et quietem aegrae indulxit. Ita continua pulueris huius inspersione, sesquimense, effecit, ut vulneris labra ex livido, in rubicundulum terminarentur colorem, et ichor serosus paullatim in coctum laudabiliter pus verteretur. Quo facto, vulgari- bus sarcoticis, ministrante Chirurgo, plagam consolidauit.* Quae sunt ipsa verba testis non auriti, aut rerum harum imperiti, sed oculati potius, praesentis, et, *qui visa sibi loquitur*, vt ipse scribit, simulque rerum medicarum ac chemicarum iuxta peritissimi, hincque tanto magis fidem plenam meritori, nimirum doctissimi illius et celeberrimi per orbem Viri, OLAI BORRICHII, qui haec ipsa suo tempore, Parisiis, ipso quoque ill. nostro BOHNIO tum ibi praesente, publice gesta, miraculo tamen propiora, quam rei naturali, aut ordinariae, candide, docte, copiose atque simul ornate, memoriae prodidit, in *Actis med. Hafniens.* per THOM. BARTHOLINVM, Virum summum, publicatis, *Vot. I. Obs. LXXII. pag. 160.* ex quibus eandem mirabilem Historiam in Medicinam suam septentrionalem transtulit THEOPHIL. BONETVS, *Tom. II. Lib. IV. Sect. XI. Obs. 6. pag. 158. sqq.* Vehementer autem cum eodem laudato BORRICHIO, dolendum, illum ipsum admirandae virtutis puluerem, saeculo tantopere profuturum, cum suo Auctore, lucri perituri cupidior, quam famae aeternum mansurae, iamdudum in puluerem cineremque abiisse. Ne enim posteris prodesse voluisse videretur PETRVS ille ALLIOTVS, quod sane dictu turpissimum creditumque difficillimum, ad pessimum alterius illius inuidi et maligni Viri exemplum, cuius supra ex HELMONTIO mentionem fecimus tam illiberali faciuore dignam, maluit thesaurum istum foede abscondere, suppressere, secumque sepulchro seruare, quam in publicos vsus, vt decebat nempe, large liberaliterque effundere. *Tantum scilicet, quod merito cum PLINIO, reprehendendum, ab excogitandis*

cogitandis Novis ac iuvanda vita, mores absunt. Turpissima enim causa raritatis, quod etiam, qui sciunt, demonstrare nolunt, tanquam ipsis perituum sit, quod tradiderint aliis, ut idem ille sapienter et severe monet, *Lib. xxv, cap. 2.* Sed ut ad ipsum illum ALLIOTVM paulisper regrediamur, tolerabiles nunc nobis videtur arcani illius tantopere iactati iactura: quantum enim ex illius publica scheda, laudatis modo *Actis Hafn.* inserta, intelligitur, bonus iste Vir, communi fere illo, de Acido et Alkali, errore, qui tum passim in scholis med. vigeat, secum nimis inductus, credidit potius, quam probavit, Malum illud Carcinomatum ex Acido peculiariter corrupto pronasci; ideoque Alkali quodam, seu Lixivio peculiariter temperato, ceu Acido illi maxime contrario, vniice sanari et expugnari posse ac debere. Sic enim illi suae schedulae Titulum fecit mirandum, aut rectius, ridiculum: *An φαιόμενα Carcinomata ἀγωνιστικῶς, curari possunt Arcano Alkali ἡγεμονικῶ Remedio?* Et respondeatur mea certe, aut potius ipsius magni nostri BOHNII, HOFFMANNI, BOERHAAVII et aliorum ill. Medicorum opinione, aut sententia. Quod non! Quis enim quaeso, sanus, prudens et ingenuus Medicorum, abiecto prorsus pudore, arroganter et proterve salibus illis alcalinis fatuis, fordidis et inefficacibus, tribuat tam immensam paene, incredibilem et prorsus inauditam virtutem, Cancros illos inueteratos, duos, faxeos, pertinacissimos, vel etiam ruptos iam, cruentos et saniosos, atque hinc omnium confessione, prorsus inexpugnabiles, facili tamen negotio expugnandi, atque perfecte sanandi? Et tamen iudice BARTHOLINO, *Lib. II. Anat. renou. cap. I. pag. 334.* decantatum illud ALLIOTI Arcanum ἀντικαρκινῶδες, ut sic loquar, fuisse dicitur *merum sal Alkali fixum, et in aqua insolubile.* Sed aliud contra Carcinomata Arcanum habuisse traditur illius ALLIOTI filius, nempe *Magisterium Saturni*, de quo nempe ita ill. noster BOHNIVS, *Epist. I. ad SCHELHAMMER. pag. 114.* *An fama ad te peruenerit illa de Allioti iunioris dexteritate, curandi Cancrum mammarum exulceratum, quam ante paucos menses, binis Parisiensibus Monialibus comprobavit per pulueris cuiusdam adspersionem, quaeso, rescribas, et si forsan de pulueris huius praeparatione aliquid tibi innotuerit: Ab amico equidem satis curioso accepi, esse illud Magisterium Saturni, cum rore maiali summe edulcoratum, Pater huius*
medici

medici meo tempore, Parisiis, per eandem Cancro curam celebris admodum, Alcalia edulcata in ore gerebat, ut dissertatio eius docet, de hac materia, tum temporis edita, et Act. Hafn. inserta. Haec igitur brevis est, nec iniucunda, opiner, Historia de binis illis eo tempore celeberrimis καρκινο-μαχαις, ut sic loquar, patre nempe et filio, ALLIOTIS. Quod si vero iunior ille ALLIOTVS, bono suo patre haud melior filius, forsan crediderit, se per sanctum illud Saturni Magisterium, cum ipso etiam ro-re maiiali summe edulcoratum, perfecte solideque extirpare potuisse inextirpabiles alias sua malignitate, vetustate, et pertinacia, Cancros; nae! ille tum aequè vehementer falsus fuit, ac ipse suus pater. Saturni enim Magisterium et omnia generatim Saturnina, faeuissimos quidem edacis cancro dolores ac lancinationes aliquantulum mitigare ac pacare posse, inter omnes dudum constat Medicos ac Chirurgos, et nemini est ignotum; ast idem Saturni Magisterium cum omnibus saturninis, perfectam ipsius cancro sanationem praestare posse, nemo sanus facile crediderit. Sed haec obiter, data hic occasione commoda.

§. XII. Commemoranda quidem nunc etiam essent varia alia Remedia ex vulgo tribus sic dictis Regnis, nempe plantarum, Animalium atque Metallorum, larga copia, deprompta, atque ad indomitam diorum carcinomatum ferociam refrenandam, passim impense commenda- data, a diuersis Auctoribus Medicis, v. g. MYNSICHTO, SCHROEDERO, WEEKERO, FRAVNDORFFERO, MERCKLINO, PENOTO, RVLANDO, SENNERTO, ROLFINCIO, BARTOLETO, IONSTONO, RIVERIO, HARTMANNO, PARAEO, DOLAEO, BARBETTE, WALDSCHMIDIO, GOCKELIO, BONETO, MICHAEL, aliisque pluribus, quos sciens lubensque iam praetereo, item et GILBERTO KNOWLES, Vate atque Medico iuxta celeberrimo, in Materia medica botanica, tersissimo carmine conscripta, pag. 24. nec non ALPHONS. FERRO, de Morbo Gall. Lib. II, cap. 24. pag. 430. in Sylloge Aphrodisiac. per ALOYS. LVISINVM, Tom. I. Edit. Boerhaau. Sed quoniam ista omnia, speciosis licet titulis insignita, plerumque plus praesidii promittunt, quam re ipsa, praestant, dirumque illud malum potius nonnihil emolliunt, quam funditus tollunt; licet nonnulla in contrarium, exempla singularia producta legantur, apud FOREST.

Obs.

*Obs. med. 2. Lib. XIV. pag. 372. VERZASCHAM, Obs. med. 89. pag. 229. sqq. SCVLTE TVM, Armament. Chirugr. part. II, Obs. 46. pag. 100. sqq. OVERCAMP. in Chirurg. Nou. part. II, cap. 12. et 15. inprimis autem RIVERIVM, Obs. Med. 97. Cent. I. pag. 584. et SAM. FORMIVM, Obs. Chirurg. 20. et 21. apud eundem RIVERIVM, p. 678. Opp. item CHRISTOPH. GVARINONIVM, Consultat. Med. 513. pag. 591. et ILL. HOFFMANNVM, Med. rat. system. Tom. IV. part. V. cap. 6. pag. 458. Tom. III. Opp. item, Med. Consult. Cas. 58. Cent. I. pag. 177. sqq. vt alios taceam; ideo ea merito hic censui praetermittenda. Inde etiam nec longius iam excurram in *Phytolaccae*, ignorati hactenus in Medicina, vsus, laudes, quae nuperrime, ceu vnica illa salutis ancora, in feliciter persanando teterrimo Cancro, in Anglia potissimum, impensiore praeconio nobilitari coepit: Longior enim dies, vberiorque atque fidelior experientia docebunt demum Medicos solertiores, ecquid denique veri solidique insit his ipsis commentis tam pulchra praeclaraque minantibus. Sed subita bonae huius *phytolaccae* fama haud diu viguit, vt dudum scilicet verebar, quin potius repente neglecta et oppressa, cessit potentissimae illi, si Dis placet, panaceae, *dirae* nempe, aut rectius forte *diuae Cicutae*: de qua nimirum sparsis in vulgus credulum variis Libellis encomiasticis, non solitae et credibiles mendendi virtutes; sed incredibilia prorsus et inaudita miracula, ac plusquam Thessala portenta, plenis veluti buccis confidentissime effunduntur. Istam enim omnibouam et omnimorbiā plantam, vt sic cum ISIDORO loquar, frequentius diutiusque intus assumtam, plusquam faexos scirrhus resolueret, dudum inueteratos et pertinacissimos canculos occultos, et apertos ac cruentos, dissipare atram oculis caliginem, et ipsam cataractam, abstergere, arthritidem, podagram, luem venereā, scabiem ferinā, hydropem, phthisin, anginam, paralytin, hemicraniam, melancholiam, scorbutum, et in vniuersum omnes paene morbos chronicos, in hunc vsque diem, fere insanabiles, cito, tuto et iucunde persanare; quin et, quod omnium sane lepidissimum, ipsos quoque steriles vteros foecundos reddere, audacissime perhibetur: quibus ego adhuc addo, illam mortuos quoque ipsos in vitam reuocare posse. Quod scilicet tam verum est, quam vera reliqua omnia. Quae speciosa pro*

inde commenta et suauius per deum! insomnia dum nuper ad feuerius examen ipsamque fidam experientiam vocauit cl. LANGE, editis *dubiis Cicutae vexatis*, deprehendit vbique attonitus, nihil fere ibi veri omniaque contra ficta esse, veluti in pictorum pergula. Vt enim nihil iam de aliis morbis dicam, quos, ipso teste, cicuta non sanauit; sed peiores reddidit, de ipsis inprimis scirrhis ac canceris obseruauit, illos post diuturnum ipsius usum, intractabiliore et intolerabiliore fuisse factos, succedentibus quippe symptomatibus dirissimis. Inde ergo etiam ill. de HAEN per *centum ac decem experimenta* diligenter capta, contrarium pariter edoctus *cicutam* merito vocat *remedium plane ineptum*. Idem quoque affirmat RICH. GUY, in *practical observations on Cancers, and disorders of the breast*. Lond. 1762. vbi noxium semper fuisse internum Cicutae usum, in curandis canceris, aperte fatetur. An vero ipsius methodus suppurationis, qua centenos cancros se perfecte sanasse gloriatur, certior sit alii viderint: suppurationem enim tunc excitare, perquam difficile, imo paene incredibile videtur, vt supra monitum. Nec probabilior em illam crediderim audacioris medendi rationem alterius chirurgi Angli, WILHELMI NORFORD, propositam in *Lib. An essay on the general method of treating Cancerous tumors*, etc. Lond. 1753. Nec denique securam ac felicem esse canceri curationem, herba quadam adurenti institutam, sapienter monet ill. MORGAN. *Epist. anat.* 50. Tom. II. p. 278. *de sed. et caus. Morb.*

§. XIII. Quum igitur, vti quidem longe lateque hactenus persequuti fuimus, omnia isthaec Remedia in mitigando, aut extinguendo edaci cancro, tantopere celebrata, aut incerta valde sint atque ambigua, aut nociua ac discriminis plena, aut denique obscura, incognita atque ex tetro liuore, publicis commodis subtrahita; proinde cum optimis quibusuis Auctoribus Medicis ac Chirurgis, merito censendum, omnem in ferro solo salutem esse repositam, locumque tunc vel maxime habere illud Virgilianum:

*Non tamen vlla magis praesens fortuna laborum est,
Quam, si quis ferro potuit rescindere summum
Viceris Os: alitur Vitium, viuuntque tegendo.*

Nam,

Nam, vt verissime quondam noster pronunciauit HIPPOCRATES, *Aph. 6. Sect. VIII. et Lib. de Arte, p. 8. ὅσα φάρμακα ἐν ἤνται, σίδηρος ἤνται. Quaecunque Medicamenta non sanant, ea ferrum sanat.* Vix ergo vllum superest dubium, quin Cancer potissimum, recens modo natus, adhuc mobilis, angusto limite circumscriptus, locoque inprimis oportuno sensibusque exposito conspicuus, intactis autem simul ante omnia, a contagiosa ipsius labe mutuaque tabe, reliquis sane adhuc corporis partibus, feliciter plerumque, secure atque perfecte ferro stricto excindi possit. Conf. CELSVS, *Lib. V, Cap. 26.* PAVLL. AEGINETA, *Lib. IV, Cap. 19.* item GALENVS, AETIVS, NONVS, vt omnes iam recentiores Medicos et Chirurgoſ taceamus. Inter quos tamen maxime vid. ill. BOERHAAVII *prax. med. T. II. p. 256. ſqq.* et ibi ill. ipſius Commentatorem, *Com. I. p. 890. ſqq.* vbi omnia ſigna et indicia prudentiſſime praefcripta ſunt, quando nempe Cancer, praefertim recens, tuto et ſalutariter extirpari poſſit.

§. XIV. Quod praefertim de labiorum Cancro, propter ipſius loci oculis manibusque exſerti oportunitatem facilemque acceſſum, et minorem nimiae ſanguinis profuſionis metum, tanto confidentius aſſerendum. Quis enim, quaefo, tuto non credat ſummo illi in Arte noſtra dictatori venerando, ill. VAN SWIETEN, in aureis *Commentariis in Aphoriſm. Boerhaau. Tom. I. pag. 896.* ita grauiffime pronuncianti: *Vix credi poteſt, quantaſ magnitudinis Cancroſ a peritiſſimis Chirurgiſ aliquando ex labiis reſecti fuerint, et feliciter curati, abſque inſigni deformitate. Vidi ſic hominem, cui binæ tertiae partes Labii inferioris ſic fuerunt ablatæ; et tamen ſatis pulchra cicatrice coaluerat tantum vulnuſ.* Qualia eiufdem feliciſ amputationis exempla plurima paſſim quoque relata leguntur apud PARAEVM, *Opp. Chirurg. Lib. VI, Cap. 29. pag. 219.* TIMAEVM AGULDENKLEE, *Lib. I. Caſ. medicinal. 38. pag. 71. et Lib. VI, Caſ. 13. pag. 271. ſq.* PETRVM FORESTVM, *Obſ. med. 26. Lib. XVII. p. 486.* GERARD. BLASIVM, *Part. VI. Obſ. med. variar. 15. pag. 82.* FABRIC. HILDANVM, *Obſ. Chirurg. 87. Cent. III. pag. 379. ſqq.* STALPART. VAN DER WIEL, *Obſ. med. Chir. rar. 13. Cent. poſt. Part. I. p. 105. ſqq.* FRID. LOSSIVM, *Obſ. med. 30. Lib. I. pag. 84. ſqq.* SCHARSCHMIDIVM, *Relat. Med. Part. II. Obſ. 42. pag. 325.* vbi et plura, quae huc pertinent,

pertinent, praesertim magnum FRED. RVYSCHIVM, *Aduers. Anat. med. chir. Obs. 5. Decad. II. pag. 14.* vt iam taceam FALLOPIVM, SOLINGIVM, OVERKAMPIVM, GVIDONEM CAVLIACVM, SEVERINVM, ipsum Chirurgorum principem, HEISTERVM, aliosque plures.

§. XV. Verum, quod merito acerbè dolendum, numero quoque haud pauciora passim eorum miserorum occurrunt exempla, quibus foedi eiusmodi labiorum liuentium ac tumentium Cancrì apte licet, perite et decenter recisi, post inductam etiam pulchre iam cicatricem, tamen praeter omnem spem et opinionem, confestim reuerterunt, et miserae mortis causam attulerunt, vt sic verum esset illud Poëtae:

Latius excisae pēstis contagia serpunt.

Ex quibus fere innumeris, si quis aliquot tantum insigniora et diligentiore attentione digniora legere aueat, is quaeso, euoluat, nisi graue, SCVLTE TI *Armament. Chirurg. Part. II. Obs. 33. pag. 77. sqq.* PLATERI, *Obs. med. Lib. II. pag. 369. sq.* vt et maxime HILDANI, *Obs. med. chirurg. 84. Cent. III. pag. 265.* apud ill. VAN SWIETEN, *Comment. Boerhaau. Tom. I. pag. 901.* item BONETI *Opp.* passim, praesertim autem *Actorum Med. Berolinens. Decad. II. Vol. II. p. 91.* et *Vol. V. p. 87.* vbi bina praecipue tristissima eiusmodi exempla Cancrì labiorum post felicissimam quoque, vt videbatur quidem, exstirpationem, cum ipsius Vitae detrimento, subito renati, consignata leguntur, quae affatim luculenterque ea ipsa comprobant, quae superius, *Historia I. et II.* eundem in modum, candide et fideliter enarrauimus.

§. XVI. Nec dispar certe est ratio atrocioris illius Cancrì Mammarum, frequentissimae istius mollioris ac venustioris sexus calamitatis. Licet enim eiusmodi Mammæ ponderosas, horrendum rigentes, Venisque inflatis, atroque vel liuido tabo foede turgidis intercurrentibus deformes, nonnunquam feliciter, et sine spe redituri mali, vindice ferro, excisas fuisse, non desint exempla, passim hinc inde, apud Auctores Medicos et Chirurgos obuia, veluti apud ipsum AEGINETAM, *Lib. VI. cap. 45. pag. 88.* et GALENVM, item HILDANVM, *Obs. Chirurg. 79. Cent. II. p. 298. sqq.* FORESTVM, *Obs. med. 27. Lib. XVII. pag. 493.* MARC. AVREL. SEVERINVM, *de Abscess. Lib. IV, cap. 9.*
pag.

pag. 222. SCVLTVM, *Armament. Chirurg. Part. II. Obs. 44. p. 93. sqq.* BONETVM, *Sepulchret. Anat. Tom. III. Lib. IV. Sect. II. Obs. 7. p. 268.* THOM. BARTHOLINVM, *Hist. Anat. 100. Cent. V. p. 285. sqq. Anat. renou. Lib. II. cap. I. pag. 334. et Act. Med. Hafn. Vol. I. Obs. 27. p. 58.* NICOL. TVLPIVM, *Obs. Med. Lib. I. cap. 53. pag. 97.* item VIDIVM, CABROLIVM, GVIDONEM, ARCAEVM aliosque, apud ZACVT. LVSITANVM, *Med. princ. Histor. 28. Lib. II. pag. 308.* ut plures recentiores Chirurgos, venerabilem inprimis HEISTERVM, in *Dissertat. de optima cancrum mammarum exstirpatione, Helmstad. 1720.* iam studio taceam : Praesertim autem huc Conf. ill. MORGAGNI, *Epist. anat. 50. T. II. p. 270. op. de sedibus et caus. Morb.* ubi memorabile exemplum cancrofae mammae a Celeb. VALSALVA feliciter quidem excisae haud sine omni tamen metu redituri olim alibi mali : quare et ipse ill. Auctor hanc nostram *diff. de nociua Cancri Exstirpatione*, ibi benigne approbat et elogio ornat. Attamen ne ipso quidem stricto ferri minacis mucrone, inexpugnabiles eiusmodi Mamillarum putridarum pestes semper expugnari potuisse, tametsi dirum malum cum ipso corpore, exsecaretur, ex totidem pariter exemplis luctuosis in contrarium, ingenti copia, facile producendis, nemini non protinus constabit, quicumque Auctores istos vel supra laudatos, vel etiam alios, mox laudandos, paullo diligentius euoluere haud grauatus fuerit, videlicet SEBAST. MEYERVM, apud HILDANVM, *Obs. Chirurg. 87. Cent. III. pag. 386.* SCVLTVM, *Arm. Chirurg. Part. II, Obs. 45. pag. 98. sqq.* EBERHARD. GOCKELIVM, *Consil. Med. XXIII. pag. 272. sqq.* BONETVM, in *Sepulchret. Anat. Tom. III. Lib. IV. Sect. II. Obs. 7. pag. 268.* et in *Medicina Septentr. Lib. IV. Sect. XI. Obs. 7. pag. 159.* item HAGENDORN, *Obs. med. 62. Cent. III. pag. 378. sqq.* praesertim vero, FELIC. PLATERVM, *Lib. II. Obseruat. pag. 489. et pag. 495. sqq.* ubi horrendi prorsus exempli Historia relata legitur, uti et, ut omnia in pauca contraham, PETR. FORESTVM, *Obs. med. 26. Lib. XVII. p. 483. sqq.* ibique grauissimum LEONHARD. BERTAPALIAE, vetustissimi Auctoris Chirurgici, hanc in rem, testimonium, et denique ILL. VAN SWIETEN, *Comment. in Boerhaav. Tom. I. pag. 895.* et laudatissimum MORGAGNV, *Epist. anat. 50. Tom. II. p. 278.* ubi plura, quae huc

spectant. Sed neminem tam veterum, quam recentiorum Chirurgorum, facile repertum iri crediderim, cui non simile frequentius sit observatum.

§. XVII. Rarissime enim intra arctiorem vnius solum mammae ambitum circumscripta continetur foecunda ista repullulantis Cancris lues; quin potius excisa feliciter una, riteque perfanata, confestim pestiferas suas fibras adhuc residuas et doloso quasi sub cinere latentes in alteram vicinam, a vitio adhuc immunem, late dispergit, eamque ipsam simili tabe cadauerosa per mutuam contagionem, contaminat, quod et probe observavit exemplisque a se ipso visis vberius confirmavit venerandus nobis, vel post ipsa fata, HOFFMANNVS, in *Med. rat. Systemat. Tom. IV. Part. v. Cap. 6. pag. 448. et pag. 451. Tom. III. Opp.*

Sicque malum late solet immedicabile Cancer

Serpere, et illaefas vitiatis addere partes.

Immo nec intra hos, etsi spatiosiores limites, indomita effrenataque ipsius ferocia perstat: quod si enim et altera illa Mamma contagiosa transitione pariter vitiata ac corrupta, exsecta fuerit; tunc teste ipsa frequentiore experientia, mortiferum illud Cancris late saeuientis virus, sede potius nonnihil emotum, quam corpore penitus remotum, saepe citato impetu, versus ipsum vterum partesque generationi dicatas, ruit, ibique deinde tragoedias excitat luctuosissimas, nulla prorsus humana arte opeque postea sedandas. Quale triste oppido atque funestum exemplum supra retulimus, Historia III. Cui geminum plane aliud, a se ipso pari modo, quondam observatum, memoriae mandavit Vir summus, HERM. BOERHAAVIUS, *Prax. Med. Tom. II. pag. 259. atque ex eo, ipso haud minor, ill. VAN SWIETEN, in Comment. in Aphorism. Boerhaav. Tom. I. pag. 875.* Sed et dudum PRIMEROSIVS simile lacrymosum exemplum de quadam equitis miseranda vxore, adnotavit, ceu ex ipso refert THEOPHIL. BONETVS, in *Polyalth. Tom. III. Lib. v. Cap. 30. pag. 402.* Conf. FRID. HOFFMANNI, patris, *Method. Med. Lib. II. Cap. 2. pag. 415.*

§. XVIII. Neque sane id mirum: arctissimum enim et sensibus quoque paene ipsis manifesto obuium mammas inter atque vterum ipsum, intercedere consensum, mutuamque communicationem et connexionem

nem, inter omnes vberime constat rerum medicarum et anatomicarum peritiores indagatores, id quod post ipsum nostrum HIPPOCRATEM, GALENUM, SORANVM aliosque veteres, luculentius, latiusque demonstrarunt Viri in arte summi, FALLOPIVS, VESALIVS, RIOLANVS, HARVEVS, BONETVS, HOFMANNVS, LAVRENTIVS, SYLVIVS, HIGHMORVS, FORESTVS, BARTHOLINVS, MERCVRIALIS, BOTTONVS, et inprimis ROLFINCIVS, *Lib. v. Dissertat. anat. Cap. 27.* vt et disertius, in *Ordine et Methodo Generationi dicat. Partium etc. Part. II. Capp. 16. 17. et 18.* item MOEBIVS, *Physiol. Cap. 20. pag. 539. sqq.* et PAVLLINI, *Obs. med. 68. Cent. II. pag. 246.* et alibi, vt recentiores iam taceam, REGNER. DE GRAAF. *de Mulier. Organ. Generat.* IOANN. FREIND, in *Emmenologia*, SCHVRIGIVM, in *Parthenologia et Gynaecologia*, DELIVM, *de consensu pectoris cum infimo ventre*, aliosque plures, quos inter tamen suo merito, eminet ill. VAN SWIETEN, *Comment. in Boerhaav. Tom. I. pag. 853. et pag. 875.* Hinc nunc facile, opinor, sua sponte, patebit ratio, cur vnus ex illis, partis cancer mutua transitione, ad alteram propagetur, feliciterque, vt videbatur quidem, in mammis curatus, saepe infelicitur in vtero repullet, non aequè feliciter ibidem curandus. Plerique enim Mammarum Cancris ex praua ipsius Vteri conditione, atque mensium degenerum vitiorumque inprimis fluxu, nunc iusto parciorè, aut inordinatiore, nunc plane intercepto atque suppresso, itemque frigido viduoque cubili, ac vita sine licentia coniugali, diutius peracta, funestam suam originem trahunt, vti Medicorum peritiorum nemini non cognitissimum, atque superius quoque demonstratum. Nec desunt sane lugubris istius rei exempla quam plurima, fidem abunde factura, si quis forsan, quod neutiquam tamen speramus, in dubiam sententiam discesserit, veluti apud FORESTVM, *Obs. med. 26. Lib. XVII. pag. 487. sqq.* BALLO-
NIVM, *Lib. I. Epidem. et Ephemerid. p. 57.* HILDAN. *Obs. 87. Cent. III. pag. 369. sqq.* LOMMIVM, *Lib. II. Obs. med. pag. 272.* BLANCARDVM, *Anat. Pract. Obs. 16. Cent. II. pag. 286. sqq.* TIM. A GULDEN-
KLEE, *Cas. 39. Lib. IV. pag. 237.* CHRIST. GVARINONIVM, *Consult. med. 371. pag. 396. item Consult. 403. pag. 461. et Consult. 513. pag. 590. ill. HOFFMANN. Med. rat. System. Tom. IV. Part. V. cap. 6. pag.*

pag. 446. et pag. 458. Tom. III. OPP. IDON. WOLFIVM, *Obs. med. Chir.* 35. Lib. I. pag. 121. BONETVM, *Polyalth.* Tom. III. Lib. V. c. 30. p. 402. et in *Med. Septentrional.* Tom. II. Lib. IV. Sect. XI. *Obs.* 7. p. 159. MICH. LEYSERVVM, apud THOM. BARTHOLIN. *Epist. medic.* 94. Cent. II. pag. 713. sqq. MARTIN. AKAKIAM, *Lib. I. de Morb. Mul.* cap. 19. p. 769. in *Gynaeciorum Sylloge* ISRAEL. SPACHII, vbi et MERCVRIALIS, MONTANVS, TRINCAVELLIVS, BOTTONVS, MERCATVS, alique, qui de Morbis Mulierum accuratius scripserunt, istoque grandi Volumine continentur, eandem in rem, diligenter sunt euoluendi.

§. XIX. Tum vero demum maximum omnino et miserrimum omnium est miseriarum, et re ipsa, ἀπίστος ἢ συμφορὴ, *incredibilis plane calamitas*, vt scite vereque ait ARETAEVS, *Lib. II. de Morb. Chron.* cap. XI. pag. 64. vbi plura de hoc acerbissimo casu legenda; Quando scilicet acerrimum illud Cancrī mordacis Venenum ipsos secretiores Vteri recessus violenter inuadit, crudelique tabe obscenos locos muliebres adeo vsque peredit, vt horresco referens, sanies teterrima, olida, atra, flava, viridis, rufa, verbo versicolor, vlceroso ab inguine, impatibili dolore et foetore, destillet, quae omnia circumiacentia voracitate auidissima, depascitur, atque rapidissime depopulatur. Quod ipsum iam sua tempestate, probe animaduertit PAVLLVS AEGINETA, *Lib. III. cap. 67. pag. 54.* ἐκκρίνεται, inquit ille, διηνεκῶς ἀπ' αὐτῆς καρκίνε τῆς ἡλκωμένε τῆς ὑτέρας, ἰχῶρ λεπτὸς, ὑδατώδης, μέλας, ἢ πυρρὸς, δυσώδης· ἐνίοτε δὲ καὶ αἷμα φέρεται. Τὸ μὲν ἐν πάθος ἀνίατον, ὥς περ καὶ Ἰπποκράτης ἀπεφάνηατο. In quo tamen loco vitiose scriptum πυρρὸς, ignis, quod sensu commodo hic caret, pro πυρρὸς, *rufus*; quale mendum etiam ex HESYCHIO olim fustulimus, apud quem aequē deprauate legabatur, p. 530. Κίρρον, πῦρ ἐρυθρὸν pro πυρρὸν, ἐρυθρὸν, vt iam ostendimus, *Lib. IV. Obseruat. Crit. cap. 20. pag. 433.* Sed haec obiter. Ipse vero NONVS, siue THEOPHANES, nunc emendandus est ex hoc AEGINETAE loco, ex quo sua maximam partem, hausit: vulgo enim ibi legitur, cap. 207. de Vteri Cancro, p. 238. ἐκκρίνει δὲ ἰχῶρα μέγαν, perperamque vertitur: *magnamque tenuis saniei copiam emittit*: quum tamen praeeunte ipso AEGINETA, et praecipue experientia ipsa, extra omnem contro-

controuerfiam, omnino legendum fit, ἰχῶρα μέλανα, *saniem atram*: praefertim, quum neminem elegantius literatorum, opinor, fugiat, frequentiffime in antiquis Libris manu descriptis, propter arctiorem puta, literarum affinitatem, confufa inter fefe deprehendi, τὸ μέγα, τὸ μέλαν: id quod poft CANTERVUM, LEOPARDVM, SALMASIVM aliofque, fingulari exemplo oftendit IAC. GRONOVIVS, in *Obferu. ad Herodot. Lib. III. pag. 905.* plura vero iftius confufionis collegit CL. IO. ALBERTI, ad HESYCHII *Lexicon, Tom. I. p. 205. Not. 9.* Idem vero NONVS etiam in antecedentibus, eiuſdem Capitis, alio grauiffimo vitio, quod ſenſum turbat, inquinatus eſt, in iſtis nimirum Verbis: Ἐλκομένοις δὲ ὄντος τῆ παγκίνε, πρὸ ταῖς ὀδύναϊς καὶ σκληρίαι καὶ ὄγκῳ διαβεβρωμένα καὶ νομῶδη εὐρίσκεται; quae ſcilicet hunc potius in modum, reſcribenda et interpungenda ſunt, ex eodem PAVLLO AEGINETA: Πρὸς ταῖς ὀδύναϊς, καὶ σκληρίαις, καὶ ὄγκῳ, διαβεβρωμένα καὶ νομῶδη εὐρίσκεται. Verum, mittamus iam iſthaec critica, hac commoda tamen occasione, vt quidem ob argumenti dignitatem, merito videbatur, haud plane negligenda, aut repudianda: Quin potius illico ad noſtrum inſtitutum, ſi placeat, reuertamur.

§. XX. Quodſi igitur eiufmodi inmundiſſima teterrimi iuxta foetoris et abominandi coloris mixti colluuiſ in exulcerato ipſius Naturae muliebris ſinu, collecta haeret, ibique inexhauſta ſcaturigine exundat, omniaque peredit et abſumit; tum ſane vnanimi prudentiorum Medicorum conſenſu,

Spes nulla, tantum poſſe leniri malum,

quoniam tunc ἀνίατον plane eſt πάθος, ὅπερ ἔτε δυνατόν, ἔτε συμφέρον ἐπὶ χειρουργεῖν, *immedicabilis prorsus morbus, cui nulla opera chirurgica cum fructu, mederi poſeſt*, fatentibus modo laudato AEGINETA, *Lib. VI. cap. 45. pag. 88.* et NONO, AETIO, ACTVARIO, ARETAEO, ORIBASIO, et inprimis GALENO, *Comment. in Aph. Hipp. 38. Sect. VI. Opp. T. IX. Part. II. p. 272.* aliisq; pluribus, apud HENR. STEPHANVM, *Dictionar. Med. pag. 356. ſqq.* quibus, e recentioribus, addantur LAZ. RIVERIVS, *Lib. XV. Prax. Med. cap. X. pag. 463. ſqq. Opp.* BRVNO SEIDELIVS, *de Morb. incurabil. pag. 25.* HENR. SMETIVS, *Lib. VII. Miscell. med. p. 335.* IDO WOLFIVS, *Obs. Chirurg. Med. 35. Lib. I.*

pag. 117. *sqq.* 10. VARANDAEVS, *Tractat. de Morb. et Affect. Mulier. Lib. I. cap. 9. pag. 117.* et qui idem argumentum diligenter tractarunt, MERCVRIALIS, MERCATVS, ACACIA, MONTANVS, BOTTONVS, aliique apud SPACHIVM, in *Gynaec.* item ROD. A CASTRO, PRIMEROSIVS, et praesertim FRANCISC. MAVRICEAV, *Lib. III. de Morb. puerper. Cap. 13.* cuius locum insignem huc vel maxime spectantem latine retulit BONETVS, qui et ipse conferri debet, in *Polyalth. Tom. III. Lib. Cap. 30. pag. 402. sqq.* tandem, vt innumeros fere alios iam mittam, ipse BOERHAAVIUS, *Tom. II. Prax. Med. pag. 260.* vbi et triste huius rei exemplum ex HARVEO adducit, eiusque prudentissimus Explicator, ill. VAN SWIETEN, in *Comment. T. I. p. 895. sqq.* et Vir denique suo merito maximus, B. FRID. HOFFMANNVS, *Tom. IV. Med. rar. Systemat. Part. V. cap. 6. pag. 447. Tom. III. Opp. item Tom. II. pag. 161. sqq.* Quare, vt id obiter hic adiiciam, fidem aegre habitura videntur, quae de noua et certa sua omnis generis Cancris *medendi methodo*, peculiari Libello, *Lond. 1753.* in vulgus edito, confidenter iactat WILHELM NORFORD, chirurgus Anglicus, qua non solum mammarum, sed et ipsius adeo Vteri durissimos dirissimosque Cancros a se feliciter sanatos fuisse, audacter asserit: de quo vid. paullo superius dicta.

§. XXI. Quam tantorum Auctorum decretoriam sententiam tristissimam exemplis aliquot funestissimis, illique ipsi a nobis Historia III. proposito, maximam quidem partem, simillimis, vberius confirmarunt et illustrarunt Medici pariter celeberrimi, PETR. FORESTVS, *Obseru. Med. 46. et 47. Lib. XXVIII. p. 283. sqq.* 10. HEVRNIVS, in *Not. ad Aph. Hippocr. 56. Sect. V. pag. 390.* STEPH. BLANCARDVS, *Anat. pract. rat. Obs. 16. Cent. II. p. 286.* NICOL. TVLPIVS, *Lib. III. Obs. Med. cap. 33. et 34. pag. 237. sqq.* item RIEDLINVS, *Obs. med. 81. Cent. III. pag. 431. sqq.* vt et BOERHAAVIUS, *Consil. med. V. pag. 27. sqq. Edit. Paris.* praesertim autem ornatissimus PECHLINVS, *Obs. med. 22. Lib. I. pag. 51.* et HENR. AB HEER, *Obs. med. rar. 14. p. 180. sqq.* itemque SCHVRIGIVS, qui ista ex ipsis repetit, in *Muliebr. Hist. Med. Sect. III. cap. 2. pag. 271. sqq.* add. *Act. Med. Berolin. Decad. I. Vol. 5. pag. 26.* et *Decad. II. Vol. V. pag. 85.* vt et ILL. VAN SWIETEN, *Comment.*

ment. in Boerhaau. Tom. I. pag. 886. Quo et inprimis pertinet notabilis oppido locus, in Vita S. PHILIPPI NERII, to. 6. Mai. pag. 633. apud longe doctissimum et laboriosissimum CANGIVM, in Glossario Med. et infimae Latinit. Tom. III. pag. 1280. quem, quoniam ipse brevis est, huc infra adscribere haud pigrabimur: *Per annos plures variis morbis conflictata Foemina, eoque praesertim, quem Hystericum appellant, cum acri quadam destillatione, ex qua deinde putridum malignumque ulcus exortum est.* Quo ipso eiusmodi teterrimum et insanabile prorsus Vteri demum exulcerati Carcinoma intelligendum esse, neminem rerum istarum scientiorem fore arbitramur, qui vel leuiter tantum dubitare ausus fuerit.

§. XXII. Quamobrem, ut omnia diffuse hactenus dicta, in vnum tandem cogamus, apprime gnari, cunctationem hic saepius plus prodesse, quam quidem temeritatem, aut festinationem, nemini vnquam Chirurgorum auctores suasoresque facile fuerimus, ut sine omni discrimine, omnes generatim cancros, praesertim autem inueteratos, et ex diuturniore mora, altius partibus infixos ac latius iam circumductos, iusto properantius, cruenta amputatione, deleat; nisi ex saluberrimo HILDANI, FORESTI, PECHLINI, BOERHAAVII, HEISTERI, VAN SWIETEN, et aliorum magnorum virorum consilio, prius perquam solícite et studiose explorauerit, qualem potissimum habitum faciemque reliquae inprimis corporis glandulae, v. g. colli, faucium, aurium, axillarum, inguinum, cum ceteris, induerint: quarum nempe omnium mira arctaque inter sese est societas ac coniunctio, ut scilicet ex anatomicis et pathologicis notissimum, quod et egregie, pro solito more, docent viri iterum cum cura et obseruantia, dicendi, BOERHAAVIUS, atque SWIETENIVS, in *Tract. de Cancro*, item SEVERINVS, MALPIGHIVS, RVYSCHIVS, HALLERVS, WHARTONVS, iique praesertim scriptores, qui data opera, de partium corporis humani consensu, commentati fuerunt, veluti BAVSNERVS, LYGAEVVS, BALLONIVS, LINDENIVS, ELSHOLTIVS, DELIVS, et ut alios iam mittamus, b. noster parens, IO. MAVRITIVS TRILLERVS. Conf. et si placet, *poëma nostrum de humani corporis structura artificiosissima* Tom. I. *poëmatum* p. 168. in Not.

§. XXIII. Quodsi enim earum nonnullae, aut omnes iam in scirrhum quendam intractabilem pertinaciter induruerint, aut alio modo, sus-
spectae,

spectae, aut a statu suo naturali degeneres deprehensae fuerint; tunc propter iustum mali proxime alibi, et peiore longe atque periculosiore loco, resurrecturi, metum, omnis sane exstirpatio non solum nihil prorsus emolumenti; sed etiam adeo plurimum insuper damni et exitii certissime illatura est: quoniam vlceris curatio tum grauior ipso vlcere esse plerumque solet, vt luculento inter alia, exemplo, ipse ostendit HIPPOCRATES noster, *Lib. Epidem. vii. pag. 875. Opp. de infelicissima foemina quadam Abderitana: conf. huc HAGENDORN. Obs. med. 62. Cent. III. pag. 379. PANAROL. Obs. med. 33. pentecost. IV. pag. 260. SCHVRIG. BONET. et alios.* Id quod fidissima rerum magistra, liquida nempe experientia, tot iam tristibus exemplis aliis, hactenus ex parte, ingenti copia, allatis, confirmauit, et per omne in posterum tempus, amplius haud dubie est confirmatura. Quapropter omnino prudentis est hominis, eum, qui seruari non potest, non attingere, nec subire speciem eius, vt occisi, quem sors ipsius interemit, vt sapientissime praecepit CORNELIVS noster CELSVS *Lib. v. cap. 26.*

§. XXIV. Vt enim arbores quaedam recisae pullulant; ita vnus inueterati Carcinomatis intempestiua Exstirpatio auget plerumque Cancrorum nouorum aliis in locis, foeda foetura, regerminantium numerum, tollendo. Quare omnibus tam anceps, ambiguum ac crudele remedium in posterum forsan tentaturis acclamandum potius illud Pacuianum, apud CICERONEM, *Lib. II. Quaes. Tusculanarum:*

Operite, abscedite, iamiam dimittite:

Nam attrectatu et quassu saeuum amplificatis dolorem.

Semper enim in his desperatis et conclamatis malis, tutior est quies et abstinentia, at perniciosior contra temeritas ac festinatio: Inde hic cauta potius consilia cum ratione, sequenda; quam prospera interdum, ex mero casu fortuito, vt sapienter quondam, monuit TACITVS, *Lib. II. Historiar. Cap. 25.* Rectissime enim in hunc ipsum sensum, TITVS LIVIVS, *Lib. XXII. Cap. 38.* *Temeritas, praeterquam, quod stulta sit, etiam infelix, et Festinatio improuida est et caeca.* Οὐ προμηδὲς μὲν γὰρ τὰχος βλαβερὸν, βραδύτης δὲ μετ' εὐελπίστας, ὠφέλιμον, quod pariter prudentissime effatus est PHILO ille Iudaeus, *Lib. de Plantat. Noë, pag. 184.*

§. XXV. Sed tempus ipsum tandem monet, vt longiore haecenus excursione veluti nonnihil fessi fractique, iam finiamus, et quidem pio et ardenti cum voto, vt nempe supremus Deus pro sua immensa gratia ac misericordia, omnibus iis ipse mederi velit, qui ab omni humana arte opeque deserti et defecti, sine vlla fere mali vincendi spe, ineluctabili isto exitio, per vitam miserrimam, conflictantur. Quale singulare et memoria perquam dignum praesentissimi diuini auxilii exemplum luculenter enarrauit S. AVGVSTINVS, *Lib. XXII. de Ciuitate Dei, Cap. 8. pag. 1047. Tom. II.* quo ipso huic Exercitationi nostrae academicae summam veluti coronidem imponere, vt spes est, iuuabit: *In Carthagine, Innocentia, foemina religiosissima, de primariis ipsius ciuitatis, in Mamilla Cancrum habebat: rem, sicuti Medici dicunt, nullis medicamentis sanabilem. Aut ergo praescidi solet, et a corpore separari membrum, ubi nascitur; aut, vt aliquanto homo diutius viuat: Nam, vt inde mortem, quantumlibet tardius affuturum, confidamus, secundum Hippocratis, vt fertur, sententiam, omnis est omitenda curatio. Hoc illa a perito Medico, et sui domui familiarissimo, acceperat, et ad solum Deum se, orando, conuerterat. Admonetur in somnis, appropinquante Pascha, vt in parte foeminarum, obseruanti ad baptisterium, quaecunque illi baptizata primitus occurrisset, eundem locum signo Christi signaret: Fecit, et confestim sanitas sequuta est.* Haecenus venerabilis ille Praeful Hipponensis. Ad cuius singularem hunc locum, qui tamen non ex omni quidem parte, sanus atque integer videtur, (post illa enim, aut, vt, aliquanto - - - viuat, quaedam deesse videntur, forsan v. g. intactum relinqui, vel non attingi, vel non contrectari, aut simile quid) legi utique dignus doctissimus Commentarius praestantissimi IO. LVDOVICI VIVIS, *pag. 1058.* Verum nunc manum tandem de Tabula!



DE PLEVRITIDE AESTIVA
DISSERTATIO MEDICA TERTIA
DE
PLEVRITIDE AESTIVA RARIUS
OCCURRENTI.

P R O O E M I U M.

Acutissimum illum Morbum Lateralem, quem vulgo Graece, Pleuritidem vocant, per omne fere Anni tempus, impune saeuire, hincque parcius quidem, primo frigidulo vere, frequentius autem horrido sordidoque autumno, omnium denique frequentissime, gelida ac glaciali hieme, miseros mortales subito inuadere, fida constantique experientia, adeo quidem cognitum vbique et exploratum est, vt de ista solida veritate nemo facile Medicorum, siue veterum, siue recentiorum, dubitare amplius audeat, vt ex eorum scriptis abunde patet. Quod vel ipso suo tristi exemplo vberius confirmat iste ingenio suo miserrimus Poëta exul, *Lib. v. Trist. Eleg. XIII.*

Per uae dies multos, Lateris cruciatibus uror,

Sed quod non modico frigore laesit Hiems.

Quorsum et istud forsan EVRIPIDIS spectet, ex Tragoedia incerta, apud summum Virum, HUGONEM GROTIUM, in *Excerptis veterum Tragicorum et Comicarum*, pag. 431.

Λυκ. Η' παῖς νοσεί τε κα' πικινδύνως ἔχει

B. Πρὸς τῷδε; τίς μιν πημονὴ δαμάζεται;

Μῶν Κρυμὸς αὐτῆς πλευρὰ γυμνάζει χολῆς;

Hoc est, eodem Viro maximo, interprete felicissimo:

Lyc. Non sine periculo, Filia aegrotat mea:

B. Quae causa? quale est hanc quod affligat, malum?

An latera vexat frigus e Bile excitum?

Sed luculentius adhuc ille facetiarum Comicarum Pater et Princeps licet nec satis castus, nec satis modestus, ARISTOPHANES, in *Ecclesiazusis*, seu *Concionatricibus*, p. 736. quem insignem locum laudat quoque SVIDAS, voce Κναφεὺς, Tom. II. pag. 333. Edit. Küster. Conf. et WEDELII, *Exercitat. Med. philol.* 9. Dec. IX. p. 68. Nihil vero ibi interpretes, nec Graeci vett. nec Latini recentiores, vt FLORENS

CHRISTIANVS KVSTERVS, SPANHEMIVS, NAT. FABER, et nouissime quoque STEPH. BERGLERVS. Neque fane id mirum. Medici enim non erant; ideo ex hunc singularem locum e Medicis foliis intelligendum, necessario intactum praetermiserunt.

Ἦν γὰρ παρέχουσι τοῖς δεομένοις οἱ Κναφεῖς

Χλαῖνας, ἐπειδὴν πρῶτον ἥλιος τράπη,

Πλευρίτις ἡμῶν εἰδὲν ἂν λάβοι ποτέ.

Si enim praebeant indigentibus Fullones

Togas crassas, postquam primum Solstitium hibernum aduenerit,

Pleuritis nostrum neminem unquam inuaderet.

Quorsum et omnino spectare videtur vetus illa Inscriptio singularis in Agro Vincentino, in Castello Arzignano reperta, atque a GRVTERO, in vasto Inscriptio-num corpore, fol. M XV. T. II. No. 8. exhibita; quam mutilam et deprauatam etiam, hac quidem commoda occasione, quantum licebit, supplere atque emendare modeste conabor:

MIRTILLAE ACMENE a)

SORORI PISSIMAE

SANCTISSIMAE

VIX. AN. XVIII. M. II. D. XIII

HAEC. NOCTV. SVMMANO. VISO

ADMONITA. VT. TEMPL - - - ARC - - b)

- - - ERET. IBIQVE. PRIMVM

IANVM. EX. PRAECEPT - - - c)

DE. SALVT - - - CONSVLE

RET. INTRA. EVNDEM. DOLORE d)

LATE - - - - CONFECTA - - - e)

FATO. MALO. FACTVM. EST. VT

NEVTRVM VIDER. f)

ARCEI - - - - VTA - - - SOLO. g)

Huc

a) Poffet hic facile legi ALCMENE, seu ALCMENAE; sed et illud ACMENE rectum et passim obuium, nempe a Graeco, ἀκμήνη, ab ἀκμή, ceu notum.

b) Legendum videtur, TEMPLVM ACCEDERET, vel et TEMPLVM ARCEMOVE ACCEDERET, vti mox ex altera Inscriptio-ne Muratoriana clarius patebit.

c) Supplendum esse PRAECEPTO, quiuis statim videt: et mox DE SALVTE.

d) Legendum hic haud dubie: INTRA

EVNDVM, alias enim sensus non constat.

e) Supplendum hic omnino LATERVUM, vel LATERIS, aut LATERALI, sed prius praestat.

f) VIDERET, hic legendum, nemo non statim perspiciet.

g) Haec valde mutila ita supplenda videntur: ARCEIANO OBRVTA SOLO. Ex mox sequenti simili, nisi forsan eadem, Inscriptio Muratoriana.

Huc et propter miram eiusdem arggumentum similitudinem, quam maxime pertinet sequens plenior Inscriptio, in *Nouo Veterum Inscriptio-
thesauro* MVRATORII, opere splendidissimo, Tom. I. pag. XXXIX.
obuia:

METELLI
ARGENTILLA VXOR
SVMMANVM VISVM PERGENS
AD SERGIAM ARCEM IANI
DECLINAVI VT VBI IANVM
PRIMVM CONSVLEREM. SED
LATERVM DOLORE CONFOSA
PERII FATO FORTASSE VT
NEVTRVM VIDEREM. SED
ARCEIANVM ME OBRVERET SOLVM.

Diligenti ergo inter vtramque hanc Inscriptionem comparatione instituta, protinus manifesto patebit, vnum idemque fatum et vnum eundemque laterum morbum de diuersis quidem nomine tantum foeminis ibi narrari: adeo, vt suspicio hinc forte suboriatur, vnam ex altera fuisse descriptam ac suppletam, praesertim, quum vtraque vno eodemque loco sit reperta, testibus GRVTERO et MVRATORIO, qui tamen illius Gruterianae ibi non meminit. Vtraque quidem notas quasdam ac characteres habet Antiquitatis, potiores tamen ac luculentiores, me certe iudice, prior illa GRVTERIANA; adeo, vt MVRATORIANA ex ista forte efformata et adumbrata videri possit, licet nihil certi hic definire liceat. Illa certe *Arx Sergia*, et praecipue vltimum illud *Arceianum*, perquam obscurum, non leuem suspicionem ac dubitationem de ipsa inscriptionis fide, iniicit, quod tamen solertioribus in ardua illa arte epigraphica et epitaphia Viris diiudicandum relinquo. Interim infelices istae foeminae vtraeque, iam aegrotae, sed viso nocturno admonitae, dum summarium Ianumque ex praecepto, de salute consulturae, matutino forte frigidoque tempore, domo digrediuntur, in longa illa via, inter eundem, saeuo laterum dolore, seu acutissima pleuritide confossa, misere perierunt, aut periisse certe creduntur. Sed haec amoena varietatis gratia, Lectorum benigniorum, vt spes est, pace, data quidem occasione commoda, hic opportune, nisi fallor, interiecta funto, praesertim, quum nemo, quantum equidem sciam, has ipsas inscriptiones

inscriptiones subobscuras nonnihil illustrare adgressus fuerit, qua tamen solerti cura haud indignae prorsus videbantur, ideo potissimum, quod ex illis simul colligi aliquo modo possit, aurae praesertim matutinae gelidiori ipsam diram pleuritidem funestam suam originem saepius debere.

Neque sane id mirum: quum enim saeva pleuritis aëri inprimis gelido rigidoque per citam nimis festinamque inspirationem, iusto copiosius hausto intus et ingesto, infaustum suum ortum potissimum tribuat, uti post complures alios Auctores, mea quoque frequentiore experientia affatim edoctus, liquido demonstraui, in Libello sat cognito, *de Pleuritide eiusque Curatione*, anno *MDCCCL*. edito, cuius iam altera auctior longe atque ornatiorque editio paratur: licet iam *Veneti* 1759. nouam illius procurarint, vna cum hac ipsa dissertatione in fine adiecta, sed nec nitidam satis, nec vitiis typographicis, praesertim circa graeca, carentem: quod dolentes hic monemus. Nemo non, opinor, causam confestim videt, cur gelidioribus illis praesertim anni tempestatibus, atroces Pleuritides tanto acrius insurgant, tantoque effrenatius vbique dominantur.

Inde et contrario, facile patebit, nisi fallor, ratio, quare arida feruidaue aestate, Pleuritis, ceu dira rigidi algoris progenies, saeuas suas nocendi vires vel plane non exerat, vel rarissime certe suscitet, lateraque acuto quasi telo, perfodiat.

Hinc nulla fere apud priscos Medicos, Graecos ac Latinos, Pleuritidis aestiuæ mentio fuit iniecta. Sic enim aperte scribit *ARETAEVS*, Medicus et arte, et facundia, et miro stili venustioris nitore, prorsus insignis, *Lib. I. de Morbis acutis, cap. X.* φέρει δὲ τὴν νόσον πλευρίτιν, ὥς μὲν, χειμῶν μάλιστα πάντων, δεύτερον φθινόπωρον, ἢρ δὲ ἡσόν, ἢν μήποτε ψυχρὸν γίγνοιτο. Θέρος δ' ἥκιστα. *Inter Anni tempora, Hiems maxime Morbi huius pleuritici ferax est; secundo, Autumnus; Ver vero minus, nisi interdum frigidum sit; Aestas autem omnium minime.* Idem postea censuit *CAELIVS AVRELIANVS*, Siccensis Afer, a solida potius doctrina et experientia medica, quam cultioris scribendi generis inaffectedata puritate, commendabilis, cuius in eundem paene sensum, haec ipsa leguntur verba, *Lib. II. celerum vel acutarum passionum, Cap. XIII. pag. III.* *Frequentat pleuritis etiam hiberno magis, quam Autumni tempore, quod Hiemi vicinatur: Aestate vero difficulter occurrit:* Ad quem Auctoris grauissimi

locum videndae omnino sunt nostrae Notae, in *Appendice, ad dictum de pleuritide, Tractatum, pag. 153.* vbi consueta illa pleuritidis tempora expenduntur. Silentibus ergo sic de pleuritide aestiua, antiquis illis Medicis antesignanis, primisque in arte nostra salutari ducibus, quid inde quaeso, mirum, si vel apud ipsos recentiores Auctores medicos, aut nulla plane, aut vaga tantum, dubia atque obscura, item brevis admodum pleuritidis aestiuae mentio rarissime deprehendatur? Licet enim celeberrimus quondam WEDELIVS scripserit in *Diff. de pleuritide, Ienae, MDCCCLXXIII.* olim edita, *cap. IV. Hieme pleuritides fieri, HIPPOCRATES Lib. III. Aph. 23. ait. Fiunt etiam Autumno, Vere autem et Aestate, minus: Neque tamen et haec tempora penitus sunt indemnita, teste experientia:* Istam tamen, ad quam prouocat, experientiam nullo, quod iure dolendum, luculentò aliquo et fide digno exemplo confirmavit. Immo, et ipse summus cetera Medicorum, THOMAS SYDENHAM, licet idem statuissè videatur, nullum tamen in tanta rerum practicarum copia, quod iure quis miretur, casum singularem, aut exemplum notatu vel maxime dignum in medium attulit, quo suae nonnihil probabili alias sententiae munimentum aliquod circumponeret, aut solidam auctoritatem conciliaret. Sic enim grauissime pronunciat Vir iste incomparabilis, in aureo plane *de omnis generis febribus, Tractatu, Sect. VI. cap. 3. pag. 289.* *Hic Morbus, pleuritis, quo nec alius frequentior, nullo non tempore infestat; potissimum vero Anno, inter Ver et Aestatem, ambigente. Nam per id temporis, sanguis a noua solis vicinia, excalesfactus, in efferuescentias et inordinatos motus effrenatius ruit. Quam singularem Viri immortalis sententiam calculo suo adiecto, adprobatam et laudatam exinde repetiit Medicus longe praestantissimus, THEOPHILVS BONETVS, in Polyalthie, seu Thesauro Med. practico, Tom. II. Lib. III. cap. X. pag. 94. vt plures iam alios studio taceam, qui tantum ducem sequuti, ac reuerentia tam illustri Nominis ducti, idem passim tradiderunt, atque rem istam adhuc aliquanto ambiguam leuiore quasi brachio, attigerunt.*

Sed vt omnia breuiter strictimque nunc complectar, per paucos equidem, quantum sciam, Auctores medicos reperire, hucusque mihi licuit, qui pleuritidem illam aestiuam rarissime fane obuiam, data nempe opera, fideliter descripsissent, atque in breui quasi tabella, totam eius imaginem

imaginem viam amplexi fuissent: quos inter tamen suo merito, facile eminet PETRVS FORESTVS, qui nempe *Lib. xvi. Observat. medicinal. 29. 31. et 32. pag. 163. sqq.* trium singularium exemplorum eiusmodi insolitae pleuritidis, per menses aestiuos, Iunium, Iulium et Augustum, quondam obseruatae meminit: quale et apud FRANCISCVM IOELEM occurrit, *Lib. iii. Opp. med. Sect. i. pag. 274.* pleuritidem quoque cum letali Angina coniunctam Mense Iunio, Ann. 1592. in fene quodam Iuris Consulto, strenuo alias potatore, vidit et descripsit FELIX PLATERVS, *Lib. ii. Observat. med. pag. 391.* Conf. et, si placet, IO. FRID. ORTLOBII, *Dissertat. de pleuritide, §. xiii. Lipsiae, A. MDCCXCVI.* publicatam, docteq. conscriptam; ne paucos alios hic iam commemorem.

Quum igitur singularem eiusmodi rarissimumque omnino pleuritidis aestivae casum diligenter olim a me obseruatum in Aduersaria mea medica, ex more consueto, retulissem: mox non defuerunt, qui memetipsum modestis iteratisque precibus adirent, vt istum in publica quidem commoda euulgandi nullam praetermitterem occasionem. Nulla ergo interposita mora, honestae ipsorum petitioni mox placide subscripsi, iamque casum istum notatu quidem dignissimum, cum omnibus ac singulis suis circumstantiis, in commune bonum, diuulgandum, lubenti animo, concessi, quem proinde statim hic infra, cum omnibus momentis, Lectorum, vt spes est, pace, sum relaturus. Summum autem Numen interea supplices imploramus, vt nostro huic labori gratia sua atque auxilio clementissime adesse velit, quo haec ipsa nostra Exercitatio Academica conferat nonnihil ad artis nostrae salutaris ampliora incrementa, atque multorum praesertim aegrotorum, blanda solatia, dulciaque dolorum leuamenta.

CASVS SINGVLARIS

DE

PLEVRITIDE AESTIVA

ANNO MDCCXL. OBSERVATVS.

Maximopere quondam miratus fueram, vel ipso adulto iam vere, faeuisse atrocem pleuritidem, vt ex *Historia x Libelli nostri de pleuritide*, vberius constat: Quamuis postea, anno MDCCXLII. per inte-

grum mensem Maium, iusto frigidiorum et horridiorum, plures mihi oblati fuerint pleuritici, ex quibus, licet in summum vitae discrimen, per faeuientis morbi atrocitatem, plerique essent adducti, nullus tamen per Dei gratiam, morte occubuit.

Sed mirari nunc desii, ex quo mediis adeo aestatis caloribus ipsis, eandem insurgere posse, nuper admodum fida experientia, certius didici.

Licet enim pleuritidem aestate, difficulter occurrere, tradiderint ARETAEVS, CAELIVS AVRELIANVS et veterum alii, pluresque fere recentiorum; nec me de aestiua pleuritide, quidquam in medicorum Libris distinctius quidem et accuratius pertractatum, legisse meminerim, praeter ea, quae parce de hoc argumento, occurrunt apud PETRVM FORESTVM, FRANCISCVM IOELEM, GREGOR. HORSTIVM, paucosque alios; verissima tamen, his non obstantibus, ea est, quam iam propositurus sum, Historia.

Ecquid vero mirum, Morbos adeo ipsos ingenium mutare suum; quando ipsae anni tempestates alienos et inconfuetos plane mores induunt?

Quem enim quaeso fugit, annum illum CIOIOCCXXXIX. gelidissima et pertinacissima hieme fuisse adeo insignem, vt et ipsum sequentis anni nouum ver non pro more solito, gemmulis floridis cuncta depingeret, aut purpureo nitore prata vestiret, aut blando tepore laetum et amabile quidquam spiraret; sed potius crebro fordidarum niuium casu, et imbrium violentius fusorum lapsu, horridum atque deforme esset?

Ipsa namque medio mense Maio, acre gelu adeo vsque inhorruit, vt et placidae aquae frigore mundo in crustas glaciales coirent. Non laetior vero aut mitior successit his aestas, quae nomen tantum mentita parum ceterum, aut nihil habuit ex feruida alias indole aestatis.

Rarissimi enim per menses Iunium atque Iulium praesertim, blandi et temperati etesiarum flatus: quin potius aquilonum procelloforum et austrorum nimbosorum horriferi stridores noctes diesque iuxta, impune tumultuati, illas quidem gelidissimas reddebant; hos vero tristes admodum atque inamoenos, acta inprimis aliquoties in terras, cum iimbribus, grandine glomerata.

Vnde

Vnde et laeta fata vbiuis fere solito tardius exsurgebant, ita, vt hinc annonae difficultatem summamque rei frumentariae inopiam merito extimescerent pallentes agriculatores, et iamiam quasi vaticinarentur prudentiorum oeconomorum plurimi.

Sed haec quia cuius nostrum, credo, notissima sunt, pluribus nunc persequi omnino piget: nunquam enim, spero, memori mente excidet plane faeuissimae illius Hiemis moesta memoria, iam dudum quippe factis adeo ipsis diligenter inserta.

Quid igitur, obsecro, mirum, vt redeam, vnde digressus non nihil fueram, quid, inquam, mirum, insolita et immutata quasi caeli annique facie, et morbos ipsos consuetum sibi morem adeo migrasse, vt et ipsa hinc pleuritis, prolatis veluti faeui sui imperii finibus, non contenta fatis autumnio, Hieme atque Vere, vel in aestatem adeo ipsam effrenum impetum faceret, sicque miseros mortales liquido edoceret, nullam prorsus anni partem, si fata quidem velint inclementiora, a sua faeuitia et detestabili nocendi arte tutam fatis esse atque immunem, letiferumque suum virus nec blando floridi veris tepore permulceri, nec acri Aestatis fertilis feruore exuri, nec humida sordidi autumnii aura dilui, nec denique penetrabili glacialis Hiemis rigore obtundi penitus atque infringi posse? Sed de his quidem haecenus! Nunc ad ipsam sine ambage, Historiam.

Sartor itaque, Vir x x x i x. circiter annorum, temperiei cholericco-sanguineae, procero et macilento nonnihil corpore, pectore alias infirmo, d. 18. mensis Iulii, ann. c i o i o c c x l. post laetum prandium, animi reficiendi gratia, extra oppidum, citatiore, vt solebat, gressu, spatiatus, flantibus subinde ventis aliquantum gelidis, subito mox horrore, et acutissimo praesertim dextri lateris dolore, quasi maligno quodam fidere afflatus, adeo vsque praeter opinionem, afflctatur, vt vix lentissimo gradu, inter difficillimos anhelitus, domum repetere valeat.

Quo facto, statim arcessitur Chirurgus, qui cita suffocatione alias perituro, vt videbatur quidem, venam pertunderet, viamque salutis sic ferro quasi, aperiret.

Ille autem insanientis suae sapientiae, vt ita loquar, solum consultus, Medico perito inconsulto, dextri pedis venas percutit, et emissā ali-

qua tantum Cruoris nigri quantitate, vulnus iterum obligat, de euentu ceterum securus, et nescio, quae magnifica, pro more, vane pollicitus. Tantum enim aberat, vt eo ipso generoso alias remedio, saeua Morbi vis frangeretur; vt potius eo acrius excandesceret, et per singulas fere horas, vehementius insurgeret: Vnde nox inter acerbissimos cruciatus, et continuum anxiae suffocationis metum, misere consumpta, ne leuem quidem suauissimi somni gustum indulsit afflictissimo aegroto.

D. 19. igitur summo mane, aduocatus ego, miserandum fane conspicio spectaculum: Iacebat aeger moribundo iam similis, in dorso resupinus, facie decolorata, lingua arida, scabra, albida, pulsu exili, tremulo, inaequali, sterno tumido atque eleuato, et intercluso adeo spiritu, vt prae acerbissimis quidem doloribus, nec animam libere reciprocare posset, multo minus tussire, aut sputorum quid commode emoliri valeret.

Alteram ergo venam, ob nimiam iam virium iacturam, incidere non ausus, nec satis adhuc de ipsa morbi praesentis indole instructus, mitissima potius atque tutissima remedia interna tentanda censui.

Praescripta sic mox pro vsu interno, Mixtura nostra antipleuritica, Ptisana hordeacea, cum Oxymelite, aliaque pauca, in ipso meo de pleuritide, Libello, aliquoties iam laudata. Pro externo vero vsu, oleum seminis Lini calidum Lateri dolenti frequentius affricare iussi: sub noctem quoque Clyisma refrigeratorium ex mero hordei decocto, Melle, Oui Vitello, et Nitro, commode fuit injectum.

Successit enim nox aliquanto melior, nec omni somno orbata; licet rigidae thoracis distentiones parum adhuc laxatae essent, acresque lateris dolores et puncturae per intervalla, acerbe lancinantes nihil quidquam fere remisissent; nec vllum consuetae alias tussis et salutaris excreationis indicium hucusque apparuisset, nec faustum denique signum vrinae valde rubrae, limpidae et crudae prorsus, prodidissent: quod rem omnem admodum suspectam et periculosaе aleae plenam nobis omnino faciebat.

Nihilo tamen minus D. 20. integer fere dies sine graui oppido querimonia, aegroto ducebatur, adeo, vt in spem laetiozem ingrederetur ipse, maximum minacis morbi periculum iamiam feliciter esse superatum:

tum: Inanem autem atque subdolan illam fuisse, subsequuta statim nox tristi fati euentu affatim declarabat.

Tum enim omnia adeo in peius relapsa videbantur, vt nihil, nisi suprema, augurarentur adstantium tantum non omnes vnamini certe consensu.

Recaluerant namque subito ardores febriles, laterisque affecti dextri dolores acerrimi adeo vsque increuerant, vt spiritus per coarctatos nimis meatus, haud solita laxitate discurrens, interceptus paene esset omnis, citamque omnino suffocationem minaretur.

Quibus malis accedebat adhuc tussicula intolerabilis, arida, inanis et aspera, qua nihil fere, praeterquam parum spumosi et sanguine striati sputi, exscreabatur, in augmentum potius dolorum, quam in eorundem leuamentum.

Nec hilum sane proficiebant fomenta, vnctiones, frictiones, Ptisana, iuscula, decocta, clysmata, aliaque id genus plura alias faeuis doloribus compescendis idonea satis et diuturno vsu comprobata remedia, magna cum cura et solertia, per spatiosas integrae noctis moras, ast incassum, applicata.

D. 21. igitur, dubia adhuc luce, subido accitus ego, deprehendo aegrotum in summum vitae ambiguae discrimen adductum, facie tumida, et tetro rubore suffusa, extantibus oculis, vsque ad horrorem formidinemque visentium, spiritumque ingenti quidem, at inani plerumque nisu, cum stridore horrido, ducentem.

Omnia feruebant aestu flagrantissimo, venarumque salientium ictus frequentes, duri et praecipites intestinam sanguinis accensi luctam acerrimam satis manifesto prodebant.

Nulla ergo interposita mora, ad vnica illam sacram pleuriticorum anchoram, ad Venae inquam Sectionem, confugiendum censeo, edoctus primum, vt fatear verum, his manifestioribus indiciis, hunc Morbum atrocem ipsam esse pleuritidem, et quidem dirissimam, pessimam et curatu difficillimam, siccam nempe et ἀπειροτάτην, quam ipse HIPPOCRATES, GALENVS, ALEXANDER TRALLIANVS, PAVLVS AEGINETA, et veterum omnes pro immedicabili vt plurimum, frequentiore tristi experientia admoniti iure summo, habuerunt.

Licet

Licet igitur et ipse Aegrotus ex iterata sanguinis missione plus sibi metueret, quam speraret; licet ipsa vxor eius querula et anxia, alique praesentes me per omnia quasi sacra, efflictim rogarent, ne spiritum tenui adhuc filo pendentem intempestiua sanguinis detractio, festinatis veluti fatis, misello corpore exturbarem; durus tamen et inexorabilis quasi, in suscepto semel consilio perstabam, nullam aliam, ostendens, facile nobis superesse salutis viam, nisi quae stricto ferro aperiretur, nec alio prorsus praesidio mortem iam propinquam coërceri atque exarmari posse, nisi scalpello phlebotomo acuto, et manibus cruentis.

Quid multa? Vena mox secta in brachio dextro, sanguinisque spissi, picei quasi et combusti, vigenti tamen impetu, horizontem versus, sese eiaculati, emissae sunt vnciae praeter propter, duodecim, et paullo amplius; donec ex labantibus nonnihil venis, vultusque pallore, leuem animi defectionem instare coniceremus, et aeger ipse de nimio languore conquereretur.

Sanguis autem ipse simulac refrixit, largo quidem sero subflauo, solidae et compactae massae ad instar, innatabat, nulla tamen crusta albi-da alias consueta intectus apparebat, licet in altum profiluisset, nec perpendiculari modo, lente et pedetentim emanasset, vt magnus quidem tradebat quondam SYDENHAMVS, *Cap. de pleuritide, pag. 292.* cuius tamen singularem hac de re opinionem modeste et placide, vt decebat nempe, examinare conati sumus, in ipso nostro, *de Pleuritide, Libello, Cap. II. pag. 27. sqq. add. ibidem Cap. v. Hist. VIII. p. 107.*

Quaeret forsitan nunc solícite curiosus, ni fallor, Lector, qualisnam nimirum effectus tum insequutus sit ambiguam hanc et periculosam, vt primam quidem frontem videbatur, sanguinis aliquanto largius educti missionem?

Dicam itaque ingenue neque mentiar turpiter, ita me Deus amet! Hora vix integra post istam Venae sectionem, elapsa, aegrotus ipse hilari vultu, laetoque omine, nobis statim aperuit candide, dolorem istum acerrimum hactenus in dextro pectoris latere, pertinaciter fixum, nunc sese quasi sensim explicare et diffundere, versusque tergum proserpere, inprimis autem dextram scapulam adscendendo, petere, ibique altius veluti impactum, immanes cruciatus et puncturas saeuissimas excitare:

Haec

Haec enim ipsissima eius erant verba, quibus nihil ego hic addidi, praeterquam, si dicere quidem fas sit, cultum aliquem Romanum.

Quo laetissimo nuncio ex ipso percepto, eum mox bono esse animo iussi, certainque fere salutem intrepide ipsi spopondi, toties namque iamiam fida experientia edoctus, nullum paene pleuriticorum dolentem ac moestum periisse, cui scilicet scapulae doliissent; de quo singulari plane signo salutari, in pleuritidis decursu, semper quam diligentissime obseruando, vberius ac distinctius a nobis quondam actum fuit, in saepius iam allegata *Commentatione, de pleuritide, Cap. II. pag. 37. sqq.* atque praesertim, *Cap. v. passim*, ac diuersis locis aliis.

Ceterum hic ipse dies per interualla, sat placide et tranquille agebatur: Succedebat quoque respiratio multo expeditior, liberiorque facultas tussendi, sputaque egerendi humidiora quidem, florido tamen sanguine adhuc multum tincta. Vrina, vt ante, itidem valde rubra, flammea, limpida, nubeculae tamen lente assurgentis quid in fundo, ostendens. Propinata sunt eadem remedia interna et externa, superius iam aliquoties laudata, additis tantum pulueribus temperantibus et nitrosis, cum Sulphuris Floribus.

Deficiente iam die, Aluus enemate refrigeratorio blande sollicitata, commodum his soluta est, exturbatis simul multis flatibus crepitantibus.

Nox sat placida et quieta, nec somno omni carens; inquieta tamen circa aurorae exortum, ob vehementiores Capitis dolores interea obortos, qui aufugerunt tamen cum volitantibus Noctis umbris.

D. 22. Orto iam die, largior et facilior excretio; sputa tamen adhuc spumosa magis, quam cocta, et sanguine plurimum colorata: Vrinae ipsae flammeae adhuc et liquidae; maiore tamen, ac hactenus, nubecula praeditae.

Infurgebant quoque pungentes pectoris dorsique dolores, per interualla, acrius, maximo cum aegroti ipsius incommodo et sensu molestissimo.

Praescriptus tum commodum Linctus noster pectoralis consuetus, *Cap. v. Hist. II. pag. 78. Libelli nostri de Pleuritide*, et alibi; commendatus: Nec Calda nostra tum omissa fuit ex Herbis et Radicibus pectoralibus

ralibus parata, per interualla, cum melle puro, fumenda, cuius descriptionem pariter in eodem *Tractatu*, tradidimus, *Cap. III. pag. 46. Cap. IV. pag. 55.* Tempus enim iam videbatur iustum, nimiam tussis rebellis pertinaciam tandem frangendi, sputorumque tenacem lentitudinem expugnandi, quod et auspiciato successit.

Nox, licet alius clysmate blando elota esset, inquieta tamen praeter spem et opinionem, atque infomnis, ob acerrimos pectoris dorsique dolores: quibus tamen primo diluculo, fenescantibus, aegrotus corporis lassitudine iam fatigatus, marcentes oculos ita demisit in soporem, ut toto veluti pectore, somnum proflaret.

D. 23. hinc laetior longe rerum facies, relictis nimirum per benigna somni munera, viribus: Excretio tum liberior; sputa multa sine sanguine, facile proiecta, cruda quamvis adhuc et spumosa magis, quam cocta, aut flaua. Urinae rubrae quidem, et ut hucusque, liquidae; multo tamen pallidiores, ac ante, spissa insuper nubecula insignes. Venter quoque nihil admonitus, debito suo officio bis respondit. Totus hinc dies hic placidus et hilaris, sine vlla querela.

Sed ipso in noctem iam praecipiti, aestus febrilis magis recaluit cum intolerabili fere capitis dolore, soluto tamen paullo post larga sudatione feliciter sua sponte succedente; et iniecto commodum clysmate refrigeratorio, similique aridae frontis epithemate, ex acetis quibusdam parato. Vnde per integram fere noctem, somnum vidit aegrotus placidum, licet a stimulante tussi nonnunquam interpellatum.

D. 24. Urina summo mane reddita, rubella et clara; sed multum pallidior, ac hactenus, cum extantiore nubecula.

Sputa quoque nunc primum cocta, flaua, pinguis et parcissimo tantum sanguine virgata, copiose egerebantur.

Sicque cuncta euidenter in melius procedebant, redeunte inprimis hoc ipso fausto die, naturali ciborum appetentia, hactenus paene inter-morta.

Horis tamen pomeridianis, recanduit febricula hucusque soporata, cum acerrimis Capitis doloribus et saeuissimis pectoris coarctati anxietatibus, sputorumque suspectis admodum suppressionibus; ita, ut
hinc

hinc merito timeremus; dies enim agebatur septimus, inter spem metumque, a nobis expectatus.

Sed nos tandem circa solis obitum, omni metu, sicuti ipsum aegrotum omni dolore ac periculo, liberabat largissima et saluberrima sudatio critica, qua omne aegroti corpus ubique ita quasi inundabatur, ut maderent et scaterent foeda illuie omnia subiecta stragula, necessario hinc cum recentioribus et mundioribus, permutanda.

Successit inde nox laeta et quieta, cum ingenti dulcis somni cupiditate, si eadem frui semper ex voto, licuisset, per importunas saepius tussis asperioris interpellationes; qua tamen plurimum sputorum coctorum, pinguium et flauorum, insigni cum leuamine, fuit reiectum.

D. 25. Urina mane emissâ, nunc primum lateritia, et sedimento copioso, crasso, et ex rufo, albicante, grauida, perspicue satis ostendebat nobis laetantibus, plenam et perfectam crisin iamiam esse absolutam, morbique atrocis crudelem saeuitiam a natura victrice feliciter nunc expugnatam atque obtritam.

Fidem autem plenae victoriae magis adhuc faciebant sputa hac die, incruenta plane, cocta, flaua, et ingenti copia, sine omni fere incommodo, aut pectoris dolore, extussita.

Nec non auida cibi hactenus fastiditi, cupiditas, et sudor praesertim criticus per vniuersum corpus aequaliter diffusus, in singulare aegroti solatium et alleuamentum.

Hinc nullum amplius circa meridiem, subdolae febris vestigium; hinc omnes illi acerbi capitis dolores semel simulque extincti, alias fere sub solis occasum, increbescere soliti.

Nox quoque successit placida et suauissimo somno laeta et amoenâ, tranquillior tamen omnino futura, si per tussim quasi oblatratricem, semper licuisset, quâe tamen modica potius emolita est cocta et matura; quam quidem multa.

D. 26. Urinae mane vase exceptae, nunc primum flauae, citrinae, pellucidae et sanis simillimae, una cum consueta nubecula in fundo, comparuerunt; securo omnino liquidoque indicio, superato feliciter morbo, expectatam hactenus sanitatem iam demum ex voto rediisse.

Hinc et aeger hucusque noster hoc die, laute pransus et deinde placide meridiatus, adeo sese viribus reffectum persensit, ut nunc primum lecto laetus exsurgere aliquotque lentos gradus in cubiculo, perficere commode valeret.

Aluus quoque sua sponte soluta, noxque sequuta nullis plane vigiliis, aut doloribus, inquietata.

D. 27. denique, (hic enim finire placet,) sputa multa cocta, matura, pingua atque flava tussi mane reiecta, nullo cum negotio: Aluus per se sui officii probe memor, sine monitore: Urinae citrinae, pellucidae, sanis prorsus similes: verbo, vires adeo reparatae, ut per aliquot horas, extra lectum, in sella erectus considerare posset aegrotus: unde breui, praeter omnem paene spem atque expectationem, ad pristinam integram sanitatem feliciter remigravit.

Haec igitur illa est historia prorsus singularis Pleuritidis aestivae, et quidem atrocissimae, siccae nimirum, ἀπὲρ τοῦ ὕδατος καὶ ἀπὸ ὕδατος, (Latine enim scite id exprimere, vetat sermonis egestas, de re ipsa autem vid. magni GEORG. HIERONYM. WELSCHII *Curat. et Consil. medicor.* x. *Decad.* v. *pag.* 276.) Historia, inquam, ista, nec facile alibi, hunc nempe in modum, obuia, nec enarrata saepius, maximo, si dicere quidem liceat, studio, nec minore profecto candore, a me hic fusius descripta. In qua sequentia imprimis, probe notari, et memori semper mente reponi merentur:

I.) Quarto adhuc die, venam incisam fuisse, cum maximo aegroti ipsius commodo, et certissima salute: Huic enim soli oportunae sanguinis missioni secunda morbi difficillimi sanatio tribuenda vni-
ce videtur.

II.) Emissum venis sanguinem consueta illa pleuriticorum crusta fevosa intectum haud fuisse; et tamen servatum esse aegrotum ipsum. Quod contra maximos cetera viros, LANCISIUM, BAGLIVUM, aliosque, summa tamen cum modestia et reuerentia, notandum. Qua de re videantur, si quidem lubet, quae diximus quondam, in *Libello nostro de Pleuritide*, saepius iam ex necessitate potius, quam vano inanis laudis studio, allegato, *Cap.* 11. *pag.* 23. *sqq.* et *Cap.* v. *Histor.* ix. *pag.* 113.

III.) Licet

III.) Licet omnia ambigua, dubia atque turbata viderentur; Septimo tamen die, plenam atque perfectam crisin affulisse, qua aeger a proximo mortis limine, in desuetam iam fere vitam reuocaretur.

IV.) Simplicissima, facile parabilia, domestica et inemta ferme Remedia huic atrocissimo morbo debellando, vti alias. plane fuisse, nempe Aquam, Hordeum, Acetum, Mel, Oleum et Nitrum, cum herbis et radicibus quibusdam, etiam plurimam partem domesticis et ante pedes natis, de quibus rursus, si placet, vid. *Cap. 11. Lib. de Pleuritide, pag. 16. et praesertim, Cap. IV. pag. 50. sqq.*

Igitur ex his nunc, o Boni! discite, (vt cum grandifono LVCANO, *Lib. 1 v. Pharsal.* finire mihi hic liceat,)

*Quam paruo liceat producere Vitam,
Et quantum Natura petat: Non erigit aegros
Nobilis, ignoto diffusus Consule, Bacchus;
Non auro, murrhaque bibunt; sed munere vili
Vita redit.*

R E S O L V T I O H V I V S S I N G V L A R I S C A S V S

C V M

Q V A D A M E P I C R I S I.

§. I.

Sic igitur ex hac rarissima pleuritidis aestivae Historia vberius haecenus fusiusque enarrata, abunde, opinor, liquet, vel in ipsis mediis torridae Aestatis ardoribus, nonnunquam tamen oriri posse ipsam saevam pleuritidem, rigido licet penetrabilique frigori alias funestos suos natales debentem, vt supra iam monitum fuit; id vero tunc vel maxime, vbi Hiems modo praecesserit aliquanto asperior, pertinacior, iustoque diuturnior, qualem illam praesertim fuisse, supra commemorauimus, qua non solum annus C D C C C X X X I X. vltra iustum modum consuetumque tempus, riguit, sed et ipsum adeo nouum sequentis Anni Ver, vna cum meliore adultae iam aestatis parte, quod sane tanto magis mirandum, adhuc foedius tristiusque torpuit.

§. II. Inde ergo nunc eo minus dubitare, credo, licebit, quin in iis praesertim horridioribus Mundi habitabilis plagis, quae gelida sub Aëto sitae sunt, et illis generatim regionibus, quae aquiloniis flatibus rigidioribus obiectae iacent, ventoque aspero et pruina frequentius tunduntur, atque hinc vel in ipsis aestiuis temporibus remissione longe ac temperatiore aestu intepescunt potius, quam incalescunt, quoniam nempe frigidioribus auris magis perflabiles sunt, quin, inquam, vel in ipsa media aestate, Sirioque ardente, acrius saepe insurgere saeviusque dominari possint illae ipsae dirae pleuritides.

§. III. Hinc nuper admodum, quum haec ipsa nostra Dissertatio typis describenda esset, e Polonia, ad me ipsum, sequentem in modum, scripsit Nobilissimus Experientissimusque Archiater, D. CAROLVS PHILIPPVS GESNERVS, celeberrimo per orbem, Patre suo dignissimus Filius, cuius ipsa verba, quoniam hoc nostrum, quod iam sub manu est, argumentum egregie plane illustrent, et validissime confirmant, pace quidem Lectorum, ut spes est, hic infra referre mihi, quaeso, liceat:

Aurei Libelli Tui de Pleuritide, veritatem toties sum expertus, quoties pleuritides curandae obtigerunt. Epidemice grassatus est hic Morbus, in his oris, primo Vere Anni proxime elapsi, usque ad satis adultam Aestatem. Inprimis, quod attinet Venae sectionem in Latere affecto instituendam; ita Naturae conueniunt, quae tradis, ut unica saepe morbum iugulet: Cum, contra Tua praecepta, si administretur, tribus, quin quatuor, opus fuerit, quod multis Experimentis probatum habeo.

Hactenus quidem praestantissimus et ornatissimus GESNERVS.

§. IV. Ex his itaque ipsa ratio, ut equidem arbitror, iam affatim patet, cur in eiusmodi regionibus gelu et perpetuo paene rigore horrentibus, ex Caeli potissimum algentis ac nocentis intemperie, sicque ineuitabili fere necessitate, et aliena culpa, vel in ipsa languida praesertim tepidaque aestate, in acutum istum morbum lateralem subito iniici possint miseri suo fato, mortales.

§. V. Sed et alia insuper aestiua quaedam pleuritis interdum occurrit, quam sua praesertim culpa, ex effrena scilicet intemperantia caeque inconsiderantia, confestim sibimetipsis contrahunt incauti et vitae suae

suae nimium quasi prodigi homines, quando nimirum vel perniciosiore cursu, vel frequentiore et acriore corporis exercitio, vehementius agitati fatigatique, ex imis pulmonibus anhelantes, pulvereque ac sudore simul perfusi, vel calidum adhuc corpus in frigidas undas subito demittunt, vel praegelidos, aut ex iniecta niue diluta, magis refrigeratos spumantesque potus arentibus siti faucibus, iuncto continuoque haustu, rapide ingerunt, feruentibusque intus visceribus vno impetu, ingenti copia, furiose infundunt: Quo facto, non subitas solum pleuritides, vt sexcentos alios fuuectos morbos iam taceam, exortas saepius esse; sed et subitas adeo mortes irruisse, ex innumeris fere exemplis, in solertiorum Medicorum Libris et Obseruationibus, passim hinc inde obuiis, luculentissime patet. Verissimum enim sane illud est CORNELII CELSI effatum, *Lib. 1. cap. 3.* *Illud quoque nosse oportet, quod ex labore sudanti frigidae potio perniciosissima est: atque etiam, cum sudor remisit, itinere fatigatis inutilis.* A balneo quoque venientibus Asclepiades inutilem eam iudicavit. etc. Vbi vid. plura in sequentibus: quale quid etiam legitur, apud PLINIVM, *Lib. xxxi. cap. 6.* QVINTILIANVM, *Declamat. ccccl. pag. 701.* aliosque plures; inprimis autem apud ipsum HIPPOCRATEM, *Lib. de Humidorum Usu, pag. 602. et Aph. 24. Sect. v.* locisque aliis: Qua de re plenius disertiusque tractauimus, in *Dissertat. de Fame letali ex callosa Oris Ventriculi angustia, p. 37. sqq.* ante biennium hic publice habita; vbi et data commoda occasione, plures in istam rem Auctores laudantur.

§. VI. Aestiuae igitur eiusmodi pleuritidis ex intempestiuo Balnei praegelidi usu, siue rectius abusu, subito obortae, bina singularia prorsus et notatu perquam digna Exempla, solita fide et integritate, retulit quondam Chirurgorum sui aevi praestantissimus, GVILIELMVS FABRICIVS HILDANVS, *Obseruat. et Curat. Chirurg. xc v. Centur. 1. p. 286.* quae ipsa, quoniam breuia, neque praeterea iste Liber utilissimus omnium manibus teritur, Lectorum quidem, vt spes est, pace, hic integra adscripturus sum.

§. VII. Sic itaque ille: *Anno 1597. ineunte Iunio, Nobilis quidam in Rol, ad lacum LEMANNVM, SAMVEL ARPEAV nomine, quum vehementer incaluisset, et in lacum sese, refrigerandi gratia, immisisset, mox febre continua*

tinua et pleurisi periculossissima correptus est. Quem accersitus, diuino fauore, restitui. Sequitur ibidem, mox altera Historia, priore adhuc notabilior: Miserabile etiam spectaculum, Anno 1601. Studiosi aliquot Lausannae, prae-buerunt: qui, dum in diebus canicularibus, calefacto corpore, in frigidam aquam insilirent, post lotionem, in pleurisin letalem inciderunt. Hactenus quidem HILDANVS: Conf. si placet, B. RIVINI, Medici vel post funera, adhuc immortalis, Dissertatio doctissima, de Frigoris damno, quae est XLVIII. Sylloges ipsius Dissertationum Medicarum, pag. 911. item WEDELII Exercitat Med. philolog. 9. Decad. IX. pag. 66. sqq. de Frigore morbifico.

§. VIII. Alteram denique pleuritidis aestiuæ speciem, quam sibi saepe ex improviso, consciscunt isti intemperantes potores, qui toto corpore exaestuantes adhuc et anhelantes, vel gelidissimas natura sua, potiones cupido nimis haustu, trahunt, vel ex perniciosi illo more consueto, non sorbere solum niuem, sed etiam esse, et frustra eius in scyphos deicere solent, vt acute ait SENECA, Lib. IV. Quaest. Nat. cap. 13. item Epist. LXXVIII. vnde et ipse CAEL. AVRELIANVS dirum hunc morbum lateralem, inter alia ex plurimo quoque Niuis potu oriri, rectissime monuit, Lib. II. de Morbis acut. cap. 13. pag. 110. ita enim ibi rectius legendum esse, pro vulgatis: plurimo nimis potu, alibi ac curatius docuimus, istam, inquam, pleuritidem propria potius, quam aliena culpa, contractam, ita ex laudabili sua consuetudine, accuratissime descripsit, seu viuis verius, coloribus, quasi depinxit Vir omni laude longe superior, HERMANNVS BOERHAAVE, Part. IV. Praxeos Med. p. 172. sqq. cuius ipsa pariter verba notatu certe dignissima, hic repetere haud pigrabor.

§. IX. En igitur ista: *Est et frequentissima huius Morbi pleuritici causa, si quis maxime aestuans a labore, itinere, exercitiis, etc. ita, ut toto corpore fere diffuat sudore, subito, magna in copia, ingerat potum frigidum; tunc enim vasa intercostalia, (quae ad Oesophagum directe sita sunt,) sese statim constringunt, et humores coagulantur: Vidi optimos Equos intra unam horam, periisse, et nobilem iuuenem, intra duas horas, potatis gelidis: Hoc norunt illi, qui equos alunt, quando haec animalia incaluerunt, tegunt stragulis, donec sensim frigescant, dant potandum; sed aquam calidam: Verum, quando frigori exponuntur, paullo post pleuritici fiunt, etc. Mox ibidem, paucis interiectis:*

teriectis: *Haec reuera est huius Morbi pleuritici frequentissima causa in iis, qui se multum exercent, aut iis, qui Aestate, aestuante Caelo, longa itinera pedibus absoluunt: sed omnium maxime, in operariis, baiulis, rusticis, et in omnibus illis hominibus, qui graui et duro labore, victum sibi quaerunt: Hinc, si aestuante corpore, pro refrigerio et leuamine sitis, frigidum potum ingerunt, (quo fere nihil peius corpori humano accidere potest,) tunc statim ab assumpto tali potu, maxime horrescunt, et diro hoc Morbo corripuntur, etc. etc.* Haecenus quidem ille. Aliquot autem exempla eiusmodi aestiuæ pleuritidis, post nimiam corporis exercitationem et exaestuationem, a gelido praefertim potu, ingenti copia, repente ingesto, obortae, relata leguntur apud PETRVM FORESTVM, *Lib. XVI. Obseruat. Medicinal. 28. p. 155.* GREGOR. HORSTIVM, *Lib. III. Obseruat. 10.* et FRANCISC. IOELEM, *Lib. III. Opp. med. sect. I. pag. 274.* et inprimis NICOL. MASINVM, *Lib. de gelidi potus abusu,* de quo vid. ERYTHRAEI *pinacothec. part. I. pag. 275. add. ORTLOBII Dissertat. de Pleuritide, §. XIII. vt alios iam taceam. conf. et THOM. BARTHOLINI, Obsf. de usu Niuis medico, capp. 35. 36. et 37. pag. 199. sqq. et tamen, quod mirum, cap. 26. pag. 150. probare cum nonnullis videtur, glaciem atque niuem non nocere in pleuritide et peripneumonia, quin potius non nunquam iuuare. Quod quidem aliis diiudicandum relinquo. Mihi certe anceps, desperatum et praeceps videtur horum acutorum morborum remedium, in nostris certe frigidioribus regionibus, a nemine prudentiorum Medicorum impune tentandum. Nec ipse illud sine cautione admittit BARTHOLINVS. Sed vid. plura in *Lib. nostro de pleuritide,* saepius iam citato.*

§. X. Praefertim vero vel maxime notari, aureisque, et quidem maiusculis, Literis, omnibus beatiorum Principum Magnatumque lautis coenaculis splendidisque ministeriis inscribi ista quidem merentur verba, quae ibidem, p. 174. sequentem in modum, grauissime pronunciat idem et aetate, et arte, et facundia venerabilis senex, et HIPPOCRATES Batauorum rediuius: *Inter causas pleuritidis remotas, (immo proximas,) referri quoque potest damnabilis ille mos Magnatum et laute viuentium, qui, vt luxui et voluptatibus suis magis indulgeant, aquam prius coquere iubent, vt postea infusa glacie, vel Nitro, magis frigescat: tum potum Lagenis inclusum*
huic

huic aquae immittunt, quam, postquam frigidus et fere glacialis est redditus, aestiuo tempore, aestuante Caelo, avidissime ingurgitant. Quae pessima consuetudo in causa est, ut tot homines, quibus nimia vitae luxuries abundat, in flore et vigoraе vitae periclitentur, aut derepente extinguantur: Vel si adhuc euadant, postea miserrimam vitam trahant: Hinc potum frigidum corpore calido, assumere, absolute dammandum, praesertim, si copiosis spiritibus non abundet. Haec ille Vir maximus, verissime per Deum! et sapientissime.

§. XI. Haec vero cuncta eum potissimum in finem, in medium haecenus allata a nobis sunt, ut exinde scilicet liquidius pateat, quid Medico solerti et prudenti praesertim agendum sit, ubi forsan eiusmodi Aegros aestiua quidem pleuritide subito correptos, curandos susceperit. Ne scilicet vulgari illa opinione temere inductus, aut nunquam, aut certe rarissime, in mediis aestatis caloribus solisque candentis vaporibus, occurrere saeuam pleuritidem, vel negligentia peccet nimia, vel nimia securitate, ipsumque illum morbum pleuriticum, ex isto fallaci admodum praeiudicio, pro alio plane habeat morbo, ac tum ipsam suam curationem, praepostero et nocituro consilio, aliorum dirigat, sicque sibimet ipsi ignominiam creet, Aegroto vero suo aut summum vitae discrimen, aut ipsam denique funestam mortem inducat.

§. XII. Vbicunque enim consueta alias et manifesta verae pleuritidis signa adfuerint, Febris nempe peracuta, fixus lancinansque lateris dolor, respiratio fracta, anxia, suspiriosa arduaque, pulsus durus, frequens, ferratus, inaequalis et fluctuans, sputum vel cruentum totum, vel striis tantum virgisque sanguineis quasi distinctum, aliaque eiusmodi atrocia et suspecta symptomata: tunc nulla plane vel feruidissimae quidem Aestatis ratione habita, certissime tamen exinde concludat, re ipsa diram pleuritidem adesse, atque celerrima sibi exposcere remedia et Artis salutaris praesidia, a praestantissimis Medicis, et me quoque ipso, si id quidem hic adiicere liceat, fatis accurate descripta.

§. XIII. Perniciosissimae enim in hoc praecipue Morbo acutissimo, sunt occasiones, quae, nisi raptim et tempestive praesenti ingentique animo, captentur, tum certe plerumque euadunt perniciosissimae: Momentis namque, momentis, inquam, valetudo et salus Pleuriticorum constat,

constat; igitur gnauiter potius hic est laborandum, quam ignauiter diu deliberandum. Quare hic vel maxime locum habet suum istud SENECAE verissimum et prudentissimum effatum, *Epist. LXXVIII. Breuis Morbus ac praeceps alterutrum faciet: aut extinguetur, aut extinguet: quod ipsum dudum ante, ita scite expresseerat CORNELIVS noster CELSVS, Lib. III. Cap. I. Breues acutique Morbi vel cito tollunt hominem; vel ipsi cito finiuntur.*

T A N T V M.

DISSERTATIO MEDICA QVARTA.
DE

H I P P O C R A T I S
STVDIO ANATOMICO SINGVLARI.

I.

Tantum multi tribuunt aetati nostrae, vt ea vnice delectati, contemnunt veteres, quos imperitos putant multarum rerum, ab nostris hominibus felicius excultarum. Hi si veteres accuratius nossent, eorumque monimenta versarent diligentius, antiquos facile magistros omnis doctrinae a contemptione temeraria vindicarent. Quamuis enim inuentis addere procliue sit, quod dies diem docet, priscos tamen homines, qui fundamenta artium iecerunt, quis ideo spernet? Nec vero me poenitet huius esse sententiae, quae sui habet modum, suum cuique pretium adiudicat. Iam relictis disciplinis aliis, in arte mea, quam vsque ad hoc tempus, colui, immorabor, eiusque singulari specimine demonstrabo, quantum iniuriae priscis inferatur interdum, vbi nostrae memoriae merita de re publica literata nimis cumulantur laudibus. Quid Anatomia praeclarius? quid magis necessarium medico, ad artis suae decus tuendum, propterea quod nemo, sine accurata machinae corporis humani artificiosissimae cognitione, eius incolumitatem, conseruare potest, aut restituere? Fieri profecto non potest, vt aedes vetustate collapsae, aut vitio alio collabefactae, firmentur, ac reficiantur, nisi ab architecto in hac arte versato. Pari modo, corporis humani partes tot casibus expositae, morbisque, partim occultis, partim manifestis, corruptae,

ptae, ab illo demum possunt emendari, atque in integrum restitui, qui statum naturalem fabricae corporis longo usu compertum habuerit atque exploratum. Quid multa? GALENVS enim, et rationis praeceptis, et usu rerum longo, edoctus, hunc locum tam persequitur excellenter, ut nihil possit addi. Quo consilio, librum maxime tertium de anatomicis administrationibus, composuit, statim ab initio demonstrans, quantum valeat corporis secandi prudentia, tam in minoribus, quam in maximis artis salutaris partibus. Haec qui cogitat secum, vix exigui nominis medico tantam tribuet imprudentiam, ut aliqua in arte sua spatia se facturum credat, expers artis anatomicae. Tantum abest, ut HIPPOCRATEM, qui cunctis suffragiis, Medicorum tenet et Chirurgorum principatum, in huius scientiae ignoratione versatum, vel somnians, putet.

II. QVAE tam etsi in promptu sunt, ut vix cuiusquam dubitatio possit ea conuellere, tamen multi sunt inuenti, artis salutaris gloria longe lateque celebrati, qui HIPPOCRATIS scientiam minuerent, corporum dissectorum usu confirmatam. Nec vero tam iniqui sunt, in HIPPOCRATIS manes, ut reliquas eius laudes velint in dubium reuocare, quas cunctis suffragiis comprobant, et comprobatas extollunt. Dant enim ipsi principatum Medicorum, eosque amplos et claros in arte sua tum demum fore iudicant, si propius ab HIPPOCRATIS et cognitione absint, et gloria. Hi tamen iidem temperare sibi non possunt, quin COM- dicant omnis anatomiae expertem, quam nostrae aetatis hominibus sponte largiuntur. Quae quidem sententia secum pugnat ipsa, lectoremque trahit in ancipitem curam cogitandi. Nam quod HIPPOCRATI decoris adiudicat, statim rursus demit, ac dum laudare videtur, reprehendit grauissime. Neque eo fecius viri praestantissimi in eam sunt ingressi sententiam, ac si HIPPOCRATIS anatomia conceptam de se expectationem parem sustineat. Horum in numero CLERICVS est, in bonae frugis historia Medicinae, ex instituto persequens HIPPOCRATIS Anatomiam. ^{a)} Hic etsi magno studio colligit varia specimina, praesertim ex egregio plane Libello *de Corde*, quem ob summam suam praestantiam, totum gallice vertit et Notis doctissime passim

a) *Part. I. Lib. III. Cap. III.*

passim illustrauit, ex quibus appareat, quid in Anatomia HIPPOCRATIS effecerit industria, et magnopere queritur, opus GALENI de Anatomia HIPPOCRATIS, temporis iniuria, periisse, postea tamen pleraque iudicat obscuriora, eorumque diligentiam, qui nostrae aetatis inuenta quaerant in HIPPOCRATE, confert cum consilio eorum, qui omnis sapientiae fontes ex HOMERO deriuent, ac Philosophorum lapidem in omnibus veterum monumentis sibi reperisse videantur. Clarius suam de HIPPOCRATE sententiam significat Illustris de HEVCHER, ^{b)} a quo parum in rebus Anatomicis, solatii expectat, quod eius anatomica admodum rudia, cruda, et fere tanto viro sint indigna. Quo fit, vt IOANNIS HERMANNI partibus faueat, qui, quicquid anatomici operis HIPPOCRATI tribuitur, commentitium putat, ac suppositum. Quod generatim dicitur hic, ad circuitum sanguinis inprimis transfert PITCARNIVS, doctissimus Scotus. ^{c)} Eum vt probet, HIPPOCRATI perspectum non fuisse, multa affert HIPPOCRATIS anatomicae peritiae non satis honorifica. Neque mitius sentit de HIPPOCRATE, FALLOPPIVS, nominatus ab LINDENIO, ^{d)} qui HIPPOCRATEM negat valde in hominum anatome exercitatum. Quid de BARCHVSENIO dicam? cuius dissertationes de medicinae origine et progressu, varietate doctrinae, lectores alliciunt, allectisque magnopere placent. Qui cum de HIPPOCRATE verba facit, eius Anatomiam primum controuersam iudicat, quod alii, eam tribuant HIPPOCRATI, negent alii. Deinde scriptis HIPPOCRATIS studiose peruestigatis, in quibus multa repugnent corporis humani coagmentationi, vehementer dubitat, num vnquam cadauer humanum dissecuerit; sin fecerit, COWM negligentiae accusat ^{e)}. Aliquanto meliorem laudem HIPPOCRATI tribuere videtur CONRINGIVS, subministrans introductionem in vniuersam artem medicam ^{f)}. Hic ipse tamen vir summus non satis sibi constat. Nam antiquis Philosophis et Medicis humani corporis sectionem in vsu plane fuisse negat. Ad quod probandum, prouocat ad HIPPOCRATIS scripta atque ARISTOTELIS. Statim

O 3

vero

b) In Operibus pag. 637. seqq.

d) In Med. Physiolog. pag. 306.

c) In Opusculis Med. pag. 91. sqq.

e) Dissert. Med. IX §. III. pag. 126.

f) Pag. 147. Cap. IV. §. IX.

vero excipit libros de fracturis, articulis, vulneribusque capitis, in quibus legantur peregregia. Adeo manifesta est HIPPOCRATIS in hoc studio, diligentia, ut, eam si velis infitari, vel inuitus confiteri debeas. Tot ambagibus SCHULTZIVS non utitur in historia medicinae g). Indicat enim nobis animi sui recessus, qui nondum sit persuasus, HIPPOCRATEM homines dissecuisse. Cuius dubitationis duas affert causas, quae fat graues ipsi videntur, ad HIPPOCRATEM Anatomiae laudem priuandum. Vna sumitur e scriptis HIPPOCRATIS, quae vestigiis indubitatis huius prudentiae vacent. Altera impedimenta, Graecis omnibus obiecta, repetit, quibus ab hoc studio fuerint retracti ac deteriti. Addam triumuiros, cum iis, quos enumerari, neque iudicio, neque doctrina, comparandos. Primus est GOELICKIVS, cuius industria in historia Anatomiae noua atque antiqua, versatur. HIPPOCRATEM quidem primum libros quosdam anatomicos composuisse, largitur: Sed in iis tamen reperit nihil, quod primae fronti conueniat, quod anatomica HIPPOCRATIS partim cruda sint ac rudia, partim falsa, aliena et confusa. Itaque eos omnes parasitorum atque adulatorum numero habet, qui ab HIPPOCRATE, cum ALMELOVEENIO, proficere velint h). A quibus ut discedat, pauca anatomiae HIPPOCRATIS specimina profert, satis ieiuna, ex quibus elucet quidem, HIPPOCRATEM dormitasse interdum; temere vero ei omnem anatomiae scientiam denegari, nisi nostra quoque tempora penitus repudiari velis. Quo fit, ut ipse GOELICKIVS inter multas HIPPOCRATIS falsas doctrinas, hinc inde, micam quasi veritatis inueniat, inuenturus plures, si animum voluisset aduertere. STOLLIVS certe manifesto documento, GOELICKIVM nimis acerbe tractasse HIPPOCRATEM, confirmat, quod ipsum plane situm hepatis scribat ignorasse, falsa thoracis interpretatione, deceptus i). Tanto magis STOLLIO cauendum fuisset, ne in idem crimen incideret, SCHULTZII auctoritate permotus. Hoc enim duce, HIPPOCRATEM negat in hominum sectione versatum, ob eamque rem pauca afferre ad huius disciplinae spatia extendenda. Agmen claudat PASCHIVS, de nouis inuentis k), cui etiam non satisfacit HIPPOCRATIS

g) Pag. 225.

h) In Historia Anatomiae pag. II. et Hist. Med. pag. 525. sqq.

i) In Historia Med. pag. 392.

k) Pag. 348. Conf. BARTHOLIN. Anat. Lib. II. pag. 323. DACERII Not.

CRATIS anatomia. Quam vt crudam fuisse demonstret, librum eius de offibus, vel, solum exempli causa, commemorat, satis infeliciter, vt postea docebimus. Absit denique, vt nonnullos hic moremur morosos et inficetos censores, qui **CICERONEM** in peritia anatomica, vel **HIPPOCRATI** ipsi praeferunt, vel illi tamen parem fuisse, temere pronunciant. Si quis enim ipsius **CICERONIS** *Lib. II. de Nat. Deorum*, vel obiter euoluat; protinus sane intelliget, eum nil, nisi generalia quaedam et saepius quoque admodum manca et imperfecta, de ipsis corporum animalium partibus internis, tradidisse, quae **PLATO**, **ARISTOTELES**, et alii nonnulli veterum philosophorum, eodem paene modo, antea, de iisdem commemorauerant. Vnde liquido satis, opinor, nunc apparebit, infelices istos censores, bonum **CICERONEM** obiter tantum olim legisse; **HIPPOCRATEM** vero ipsum aut rarius, aut forte nunquam. Sed satis.

III. In aliam certe sententiam vt pedibus irem, viri omnis aetatis praestantissimi me cominouerunt, et, scriptis **HIPPOCRATIS** cum cura perlectis, docuerunt satis clare, pro ratione et indole illius, quo vixit, saeculi aliquanto remotioris, anatomiam ab eo neglectam non fuisse. Ordinar a **GALENO**, qui **HIPPOCRATIS** et **PLATONIS** decreta comparans inter se, **HIPPOCRATEM** illis adiungit, qui corporum resectorum contemplationem, quae priorum saeculorum incuriosorum vitio, neglecta iacuerit, restituisse in integrum videantur¹⁾. Facit cum **GALENO**, **ANDREAS LAVRENTIVS**, in historia anatomica. Is **HIPPOCRATEM** primum, quasi diuino afflatum numine, et sua fretum magnitudine ingenii, multa, tradit, artis anatomicae specimina memoriae mandasse. Nihil curat aliorum, qui forte hic fremant, iudicia, negat potius ingenue, quicquam vere eorum, quae ad artis usum spectare videantur, eum ignorasse. Facit enim discrimen, cum **GALENO**, inter anatomen, vtilem medico, et fructuosam, eamque separat ab illa, quae plus ornamenti, quam frugis, habeat, et postea demonstrat, de priori accurate eleganterque **HIPPOCRATEM** scripsisse

ad **HIPPOCR.** pag. 450. Tom. I. et in praefat. item **DN. PRAESIDIS** mei *Epist. II. de Anthracibus et Variolis veterum*,

pag. 16. sqq. et denique **ALMELOVENII** *Noua Antiqua Inuenta*, pag. 81.

1) *Lib. VIII. Cap. I. pag. 96.*

scripsisse ^m). Inde perquam egregie et iuste hunc in sensum, ANTONIVS PONCIVS SANTA-CRYZ, in *Comment. in Hippocr. Lib. de Morbo Sacro*, Text. XXXIII. *Anatomes peritia, (ut aliae Artis partes,) ab HIPPOCRATE incepit. Quae incipiunt, non valent statim ultimam obtinere perfectionem, ita contingit, ut posteritas multa adiciat.* Conf. LINDANI *Physiol. Med. Lib. I. Cap. V. pag. 96.* et ill. HEISTERI *Diss. de Anatomes maiori necessitate, in Chirurgia, quam Medicina, item de Subtilitatibus anatomicis:* add. KESTNERI *Lexicon Med. pag. 404.* sub HIPPOCRATE. Haec igitur sapienter monita diligenter, suadeo, expendat, et erubescat inde; si possit, arrogans quidam in vicinia, doctor, qui in praelectionibus suis, ingloria opera, et infelici temporis iactura, nihil fere aliud agit, nisi ut ipsius HIPPOCRATIS auctoritatem proterue deprimat, cum nec in anatome imprimis, nec in ceteris Medicinae partibus, quidquam laude dignum soluisse, ostendere allaboret; sed frustra omnino, inepte ac ridicule. Ille enim aeternae famae Hippocraticae impudentissimus obtrectator, ipsum HIPPOCRATEM sua lingua loquentem, ut credere par est, forsan nunquam legit; multo vero minus intellexit. Quid ergo scarabaeus contra aquilam, pygmaeus aduersus gigantem, aut denique mus, aut lepus contra leonem? Miseret me profecto, miseret tam frigidi et inepti declamatoris, qui vituperare audet HIPPOCRATEM, quem omnia saecula praeterita laudarunt, et futura laudabunt. Sed haec obiter. Neque aliter sentit IOANNES RIOLANVS, in *Enchiridio Anatomico* ⁿ). Incepturus enim ab osteologia, quod ossa fundamenta sint omnium partium corporis, neminem habet, quem praestantiores sequatur ducem, HIPPOCRATE. Hunc enim anatomicen hominum negligentia obsoletam, restituisse, in anatome scribit ^o). Quo consilio GALENUM citat testem, operam HIPPOCRATIS corpora incidendi laudantem. Neque minus DEMOCRITVM, HIPPOCRATIS aequalem, commemorat, qui sic animalium dissectionibus studuerit, ut Chameleontem in singula membra diuisum, libro singulari describeret, autore PLINIO ^p). Inde colligit, anatomicen cum medicina

ortam

m) Pag. 28.

n) Pag. 6.

o) Pag. 445.

p) Lib. XXVIII. *Hist. Nat. Cap. VIII.*

Add. ipsius HIPPOCRATIS *Epist. ad Damagor. pag. 914. et p. 917. Tom. II. Opp. ubi plura, de Zootomia DEMOCRITI leguntur.*

ortam reliquas medicinae partes antecessisse, vel ipso HIPPOCRATIS studio. Quam existimationem non amisit HIPPOCRATES, aetate nostra, sed auxit. Quis BOERHAAVIO excellentior? Hic ipse tamen, quin anatomen calluerit, non dubitat, etsi scripta de ea non ediderit ex instituto. Neque dissentit summus eius interpret HALLERVS, qui CLERICI et SCHVLZII partibus non fauens, manifestum putat, corpora humana, idque de industria, ab HIPPOCRATE incisa, ex clauicula hominis propria, atque ab HIPPOCRATE commemorata, in indubitato de articulis, libro ^{q)}. Succedat ALMELOVEENIVS, in libello nitido, qui inuenta nouantiqua indagat. Is, quemadmodum HIPPOCRATEM nihil vulgare, neque tritum, scribere voluisse, cum GALENO sentit ^{r)}, et antiquos anatomes ignarissimos fuisse negat ^{s)}, ita COVM defendit a criminatione crassae ignorantiae, propter hepar in thorace collatum ^{t)}. Praecipue aegre fert, HIPPOCRATIS libros temporum iuiuria, et loquacis GALENI fama, misere corruptos ^{u)}. Quod nisi euenisset, nos ex HIPPOCRATE multo plura cognituros putat, eamque sententiam confirmat opinione, corpus esse meram vasorum texturam, ideoque secundum omnes humores, omnesque partes, confluere. Quod quidem inuentum ALMELOVEENIVS detrahit aetati nostrae, HIPPOCRATI satis perspectum ^{x)}. Laudibus non minoribus COVM MOEBIVS ornat ^{y)}. Nam iure meritoque laudat, quod non in vsu acquieuerit solo, sed adiunxerit rationem. Ea vero de causa in corporis humani cognitione accuratius versatum praedicat, et cadauerum sectioni sedulam operam impendisse, quo certius morborum causas inuestigaret. Percurramus Elysium iucundarum quaestionum campum, quem CASPAR A REIES aperuit, et in quo HIPPOCRATIS gloria passim laetissime viret ^{z)}. Nam praeter ceteras virtutes complures, quibus HIPPOCRATES alios superauit, anatomiam affert, eius adeo propriam, vt omnium primus corpora secuerit.

Qua

tur. Conf. huc inprimis HARTMANNI Orig. anat. cap. 6. p. 40. sqq. et passim in sqq et VAN LEEMPOEL Specimen de Anatomies origine et progressu, pag. 59. sqq. item nouissime KVRELLA, in Collect. Dissertat. de Re anatomica Veterum, vbi plura.

q) In Prael. Acad. pag. 24. Vol. I. Conf. AND. VESALII Opp. T. II. p. 635.

r) Pag. 218. s) P. 14. t) P. 81.

u) Pag. 43. x) Pag. 218.

y) In Fundamentis Med. Physiologicis p. 10.

z) Quaest. IV. pag. 74.

Qua in praestantia HIPPOCRATI concessa, PAVSANIAM sequitur et GALENUM. Neque aliter sentit IOANNES LANGIVS, artis salutaris gloria magnopere celebratus, in epistolis medicinalibus ^{a)}. Nam causas allaturus medicinae deprauatae, queritur maxime de fastu inani multorum, qui remedia nescio quae, venditare, quam ignorationem fateri malint. Hominibus tam inflatis HIPPOCRATIS modestiam proponit, qua se futuris cranii deceptum, ultro, ac sponte fateatur, eo minus errorem celans, quo magis doctrinae satis alias spectatae fiducia feratur. Quo tandem pacto hic labi potuisset HIPPOCRATES, nisi interiores corporis humani latebras excutere studuisset? Quomodo in futuris cranii aberrasset a vero, Anatomia neglecta? Itaque quin LANGIVS HIPPOCRATIS Anatomiam habuerit certam, quis est, qui dubitet? Sed profecto nihil euidentiùs hanc in sententiam dici potest MARSELLII CAGNATI variis observationibus ^{b)}. Ibi MALIENSIS cuiusdam historiam ex quinto libro, Epidemion, enumerat, et verborum vi expensa, interpretatur. Ita vero cuncta explicat, ut quilibet intelligere possit facile, hunc praestantissimum virum HIPPOCRATI non solum anatomen non denegasse, sed ideo clare tribuisse, quod quaedam dici non possint ab HIPPOCRATE, sine corporis mortui sectione. Sed hoc de loco deinceps plura. Transeo ad alium non minoris famae Medicum, iustis HIPPOCRATIS Anatomiam laudibus prosequentem. Est hic CAROLVS DRELINCVRTIVS, qui cum passim in opusculis suis, HIPPOCRATI multum studii tribuit, corpus humanum sectione diuisum cognoscendi, tum praecipue in praeludio anatomico, quid de veterum diligentia iudicandum sit, maximeque HIPPOCRATIS, egregie demonstrat. Magnopere enim delectatur ^{c)} Hippocratea Medicum cum nauclero comparatione ^{d)}. Naucleri prudentiam nullam in re magis elucere putat, quam in tempestatibus naues hinc inde iactantibus. Pari modo

a) *Lib. I. pag. 15.*

b) *Lib. IV. Cap. x. pag. 625.*

c) *Pag. 8.*

d) Quae desumpta est ex *Lib. HIPPOCRAT. de Vet. Med. pag. 22.* Coniungunt vero saepius et alii Auctores, ex eodem scopo, *ιατρικὴν καὶ κυβερνητικὴν τέχνην*, ut

ipse PLATO, in *polit. pag. 132.* MAXIMVS TYR. *diff. XXII. pag. 227.* et passim alibi, IAMBlichVS, *de Myster. Aegypt. cap. 26. p. 95.* et ibi THOM. GALE in *Not. p. 247.* ORIGENES *contra CELS. Lib. IV.* inprimis APOLLINARIS SIDONIVS, *Epist. 10. Lib. VIII. pag. 231.* et alii plures, alibi a me

modo Medici diligentiam tum maxime credit spectari, cum graues morbi periculofique nos affligerent. Sed nihil effici posse ait, nisi a Medico Anatomiae perito. Nihil concedit in HIPPOCRATE celebrando, DRELINCVRTII modestiae, ASELLIVS. Is, etsi vasorum lacteorum primum sibi tribuit inuentum, HIPPOCRATEM tamen in huius laudis societatem conuocat. Testis est de lactibus, liber, in quo multis locis, quantum HIPPOCRATI tribuat, ostendit ^e). Eiusdem est sententiae Medicus eruditissimus VAN DER LINDEN, auctor medicinae physiologicae ^f). Tantam enim Anatomiae antiquitatem cum RIOLANO, adiudicat, ut eam diu ante HIPPOCRATEM, Sacerdotum diligentia, cultam esse censeat, atque ab animalibus ad hominum corpora, transiisse. Id quod pluribus quam diligentissime persequitur allatis vndique testimoniis veterum grauissimis liquidissimisque celeb. PHIL. IAC. HARTMANNVS, in Originibus Anatomicis, lectu dignissimis iuxta et iucundissimis ^g). Nec vero ab hac opinione abhorret vir eruditissimus DACERIVS, quia aliquot HIPPOCRATIS opera Gallice conuertit elegantissime. Praemisit HIPPOCRATIS vitam, in eaque cum caeteras eius praedicauit dotes, tum Anatomiae studium, ab HIPPOCRATE tractatum. merito commendauit. Hanc eandem laudem deinde passim in operibus ipsis, pluribus probauit documentis, quoties in observationibus, quibus HIPPOCRATEM illustrauit egregie, occasio dabatur Anatomiae commemorandae. Loci sunt plures, quam ut hic breuiter possint contrahi, neque opus est longiori enumeratione, quod deinceps figillatim a nobis describentur. Pari breuitate IACOBVM SPONIVM percurreremus, eodem consilio ducti. Collegit eximio studio, HIPPOCRATIS

P. 2

Apho-

me iam laudati. Plura vero de hac lepidissima et iustissima comparatione inter nauis gubernatorem tempestatum gnarum, et Medicum morborum peritum, vid. in eximia *Dissert.* IV. ill. RAMAZZINI, *Medicam artem Nauigatoriae similem esse*, p. 106. *sqq.* item CASPAR. HOFMANNI *Var. Lect. c. 31. Lib. VI. pag. 330.* et COCCHII *Epist. Med. cap. I. pag. 23.* ut alios plures iam taceam eadem similitudine frequentius vfos.

e) Conf. ISAAC. CATTIERII *Observat. Med. XVIII. pag. 55. sqq.* vbi multis do-

ctissime ostendit, vasa sic dicta lactea dudum priscis Medicis graecis cognita ac perspecta fuisse: quod et magno eruditionis apparatu pariter egregie praestitit ALMELOVEENIVS, *Inuent. Nou. Antiq. §. XXII. pag. 184. sqq.* item LINDENIVS, quibus add. si placet, *poemat. Trillerian. Tom. I. pag. 181. in Not.* vbi plura de hac re, pluresque Auctores laudantur.

f) *Pag. 179.*

g) Conf. SALMASII *Lib. de Calculo contr. Beueronic. pag. 52.*

Aphorismos novos, ordine apto digessit, notisque declarauit. His in notis studium HIPPOCRATIS anatomicum et animaduertit saepius, et pro merito, defendit laudauitque. Vix pagina est, quae hanc HIPPOCRATIS diligentiam non spiret, vt postea docebimus. Neque minus honorificum de HIPPOCRATE Anatomiae studio, reperitur iudicium in Medico, qui cum doctrina solida, elegantiorē copulauit humanitatem. THOMAM dico BARTHOLINVM, qui magno labore anatomen ex omnium veterum recentiorumque obseruationibus collegit. Quo ductus proposito, HIPPOCRATIS pluribus locis animaduersiones enumerat, meritisque laudibus extollit. Sic corporis humani distributionem in partes, ex HIPPOCRATE decerpit, vnde pateat, eum Anatomiae negligentem non fuisse. Quid dicam de hepatis situ, habitu et colore, quem HIPPOCRATES, corporibus non dissectis, non perspexisset? inprimis, quum accuratam inter hominum et brutorum animalium hepar, instituerit comparisonem, illudque prae hoc, rubicundius et sanguine plenius esse, scite obseruauerit^{b)}. Inprimis commemorabilis est magnitudo viscerum ab HIPPOCRATE non sine cura definita, quae satis declarat, HIPPOCRATEM anatomiam praetereundam non putasse.

IV. Iam, quo facilius intelligatur, quae nobis de HIPPOCRATIS Anatomia stet sententia, varia sunt anatomici studii genera probe discernenda. Namque vnum subtilius magis est, quam vtile, et plus sollicitudinis habet, quam frugis. Cui studio aetate nostra dediti sunt illi, qui partium corporis minimarum rationem habent assiduam, et laborant

^{b)} *Lib. de Anat. pag. 288. Tom. I. vbi vid. inprimis Comment. DN. PRAESIDIS nostri, pag. 20. Sed et hic, pro more, meras tenebras vidit GOELIKE, Hist. Med. Period. v. pag. 525. quoniam graeca haud intellexit; vnde et omnium elegantius solidiusque doctorum Medicorum iudicio ac suffragio, arduo illi negotio, verae plenaeque Historiae Medicinae scribendae, ex dignitate, cum laude famaue mansura, exsequendo, impar omnino visus est. Quare et factum, vt ipsius quidem Historia Medicinae neglecta prorsus atque obli-*

ta hodie iaceat, et paucis adhuc nota sit. Praesertim, quum ipsi ab Auctoribus Bibliothecae Nou. Miscell. Halens. tam spissa amplaque grauium, saepe et ridiculorum, errorum nubes, ex ista Hist. Med. vndique collecta, obiecta fuerit, vt illis omnibus aut diluendis, aut vindicandis, per omnem suam Vitam, vix sufficerit. Sed haec haecenus, data nempe occasione. Haud decet enim tranquillos pie defuncti manes importune turbare. Quiescat ergo in pace! et sit ipsi terra leuis!

rant magnopere, ne qua venarum, arteriarum, fibrarum, ne quis nervorum ac muscutorum, ne quod ligamentorum et vasculorum, eorum fugiat conspectum. Tanta quidem ac tam anxia quasi et scrupulosa cura in HIPPOCRATE non fuit, qui memor artis suae, ac breuitatis vitae, in cognoscendis partibus corporis praestantissimis, atque ad vitam tuendam, maxime necessariis, nauiter fuit versatus. Quis vero hanc scientiam remoueat ab HIPPOCRATE, quam vel in HOMERO non desiderant artis nostrae periti. GALENVS enim hoc ad liquidum perduxit ⁱ⁾, quo cum iungendus est BRENDELIVS noster, Medicus eruditissimus, de HOMERO Medico, disputans elegantissime. Quo minus est dubitandum, quin HIPPOCRATES hoc in campo se exercuerit, cuius scripta iam percurreremus. Nitemur vero partim illis monumentis, quae sine dubio, referuntur ad HIPPOCRATEM, partim illis, quae ab ipso profecta, admodum probabile est, inde ab antiquissimis temporibus, eius operibus inserta praesertim, quum ex diuersis plane MERCVRIALIS, LEMOSII, FOESII, aliorumque sententiis ac iudicijs, de ipsis HIPPOCRATIS scriptis, nunc pro veris, nunc contra pro falsis, aut incertis, habendis, nihil quidquam solidi exploratique sit colligendum: De qua re, ne inter psos quidem Veteres satis constitit, vt ex SORANI *Vita HIPPOCRATIS*, patet, et ex ipso GALENO, pluribus locis. Quam inanem fere ac vix ad liquidum perducendam litem docte, acute et solide tractat inprimis SPONIVS, in praefat. *Aphorismis Nouis* praemissa: item et data opera, ipsi nos, in *Epistola Medico-Critica*, ad Cl. IO. FREIND, item in *Commentat. de Noua Hippocratis Editione adornanda*, Sect. I. et denique in *Apologia contra Atheismum Hippocrati falso imputatum*, quondam scripta, passim, data ibidem occasione. His in libris qui HIPPOCRATIS, Anatomiam non animaduertit, coecus sit oportet.

V. Omnem autem tractationem, facilioris ordinis causa, in duas diuidemus sectiones, quarum alteram generalem vocaueris, alteram spe-

P 3

cialem.

i) *Comm. II. in HIPPOCR. de natura* pag. 138. *Tom. III. Conf. huc maxime* *Auētor Vitae Homeri*, in *Collect. Opuscul. Mytolog. phys. et eth.* per THOM. GALE pag. 390. *sqq.* item REIMMANNI *Ilias post*

Homerum, Sect. IV. cap. I. pag. 159. *sqq.* vt et SCHVLZII, *Hist. Med.* pag. 166. et denique nostra *Epist. Med. Crit.* ad Clariss. FREIND, pag. 21.

cialem. Illa demonstrabit, HIPPOCRATEM non modo humana secuisse corpora, sed etiam partes imprimis externas, apertiores, et maiores, cognitae habuisse perspectasque. Haec clarissime efficiet, ne partes quidem corporis interiores ac delicates, administras sanitatis atque adiutrices, HIPPOCRATI fuisse obscuras. Quicquid vero scripserimus, eo pertinebit, ut consulamus memoriae viri, qui, dum florebit ars nostra, immo dum stabit ipse orbis, gloriam sui propagabit.

S E C T I O I.

DE

ANATOMIE HIPPOCRATIS GENERALI.

I.

Veniamus igitur in rem praesentem, et generatim, quid valeat HIPPOCRATIS Anatomie, consideremus. Nullus enim dubito, quin officium, musculorum, tendinum, nervorumque praecipuorum gaudeat insigni scientia. Nec facile quisquam mecum dissentiet, qui coram legerit libros, immortalitate dignos, maxime chirurgicos. Horum in numero monumenta sunt de articulis, fracturis, capitis vulneribus, Mochlico, de officina medici, alimento, et aliis generis eiusdem. Quae coram scripta legere non potuit GALENVS, quin ei maximam Anatomies gloriam cum RIOLANO, tribueret. Utinam temporis iniquitas GALENI de HIPPOCRATIS Anatomie, libros non sustulisset, quorum meminit ipse^k). Sic quanta in hoc studiorum genere diligentia versatus sit HIPPOCRATES, ipsis oculis cerneremus. Sed restituit iacturam HALLETVS illustris, atque in animaduersionibus ad praelectiones academicae BOERHAAVII^l), satis clare demonstravit, magnam HIPPOCRATI facere iniuriam, qui ab Anatomia eum segregent. Fusius autem idem vir summus singulari programme, ex his ipsis libris coram veris comprobatur, eum humana dissecuisse corpora, quia et musculus brachii Deltoideum, claviculam, soli homini, praeter simiam^m), propriam, et alia ossa accuratissime descripseritⁿ). Quae demonstratio tam est evidens,

k) Lib. VII. de placitis HIPPOCR. et PLATONIS Cap. III. pag. 212. Tom. V.

l) Vol. I. pag. 24.

m) GALEN. Tom. IV. pag. 129.

n) Tom. II. pag. 756. 769. Opp. HIPPOCRAT.

dens, vt ne CLERICVS quidem negare eam audeat o). Quibus id breuiter adhuc addo, ipsum quoque HIPPOCRATEM generatim musculorum naturam ac structuram probe accurateque cognitam atque perspectam habuisse, dum in illis obseruauit ventrem, tendinem et nervos, ceu clare patet, *Lib. de Arte, pag. 10. Tom. 1. et in Coac. praenot. p. 573. vt et alibi.*

II. Quid multa? HIPPOCRATES ipse causam agat suam, et quid sensibus perceperit, nobis exponat. Nam de ossium natura scribens, tam accurate versatur in iis, vt ea distincte enumeret p). Neque vero alienis videt oculis, sed suis vtitur, maioris fidei causa interferens: *Quae nos ipsi ex hominis ossibus attendendo didicimus.* Quis haec legens, COM liberet ab iactationis crimine, nisi eum studuisse fateatur Anatomiae q). Idem vero, quem commemorauimus, liber satis declarat, non esse vana, quae HIPPOCRATES dixit de se, et nos de ipso praedicauius. Eius enim initio, quantum sit discrimen inter manus et pedes, eleganter describit. Nos ceteris praetermissis, solam tenebimus patellam, specie nodosa, seu rotunda. Hanc quomodo HIPPOCRATES nosse potuerit anatomia neglecta, equidem non video r). Multo minus intelligo, qua ratione iudicium ferre potuerit de rarissimo tristissimoque casu in caluaria fracta, quod vulgo contrasissuram vocant. Rem pluribus describit verbis et HIPPOCRATES ipse s), et SPONIVS tam in itinerario, quam in aphorismis t). Quem locum nunquam tracto, quin mihi certissime persuadeam, fieri non potuisse, ut HIPPOCRATES tam expressam proderet imaginem euentus adeo commemorabilis, nisi caluarias eiusmodi suis denudatas integumentis aridasque semel iterumque circumspexisset. Quaeret fortasse quispiam, quid, osseumne scelton HIPPOCRATEM, dices suis oculis vsurpasse? Non difficile est, hoc

o) CLERIC. pag. 34. Conf. VESALII Opp. Tom. II. pag. 635.

p) Conf. REINESII Var. Lect. Lib. I. Cap. XIX. pag. 75. et MARSIL. CAGNAT. Lib. IV. Var. Obseru. Cap. x.

q) De Ossium Natura pag. 297. Quem tamen memorabilem oppido Locum frustra in dubium vocauit doctissimus cetera, nobisque olim amicissimus, SCHVLZIVS,

in Hist. Med. pag. 225. vt mox luculentius docebitur ex diligentissimo HARTMANNO et aliis. Conf. KYRELLA, Collect. Dissertat. de Anatome Veteri.

r) de Ossium Natura pag. 294.

s) Tom. II. pag. 693. de Vuln. Cap.

t) Pag. 340. Aphorif. Nou. in Itinerario vero, Part. II. Lib. VI. pag. 71.

hoc credere, quod rationes graues sunt in promptu. Nam GALENVS nos facit certiores, Medicos quondam Alexandrinos sceleta praeparasse, quo facilius certiusque salutaris artis alumni fabricam corporis humani artificiosissimam cognoscerent^{u)}. Vt non sine probabili ratione, colligit quoque ex PLINIO, pro insigni doctrina sua, PETRVS PETITVS, in obseruationibus^{w)}. Nec quicquam dubitabit, qui Anatomes studium singulari floruisse Aegyptiorum diligentia didicerit a PLINIO, GEL- LIO, AELIANO, GENSORINO, EVSEBIO, aliisque pluribus. Lo- cos horum scriptorum nihil opus est afferre, quos duumiri, hic inter se consentientes, selegerunt, CONRINGIVS de Hermetica medicina, et BORRICHIVS contra CONRINGIVM. Quibus praesertim pri- mo loco, addantur perquam eximiae doctissimaque PHILIPP. IAC. HARTMANNI Exercitationes, de Originibus Anatomicis, et peritia veterum anatomica, iam supra ex merito laudatae. Iam quis est, quem fugiat, HIPPOCRATEM more veterum, historiae studiorumque caus- sa, peregrinantium, longius excurrisse, ad medicinae cursum facilius fe- liciusque conficiendum? Quis igitur dubitabit, ad Aegyptios quoque accessisse, eorumque studiis excitatum, anatomiae diligentem operam nauasse? quale etiam fecisse constat ipsum DEMOCRITVM, HIPPO- CRATI nostro σύγγεγονον, amicum, imo et ex parte praeceptorem: de quo vid. laudat. HARTMANN. *Cap. VI. Orig. anat. pag. 40.* Omnes certe scrupulos hic euellunt MERCVRIALIS, BOERHAAVIUS, SCHVLTZIVS. Neque vero opus est, hoc pluribus persequi, quod nemo, nisi plane hospes in rebus antiquis, temere negauerit. Nam plerique concedunt, ab animalium sectione, HIPPOCRATEM non abhorruisse. Id quod quam maxime patet ex *Lib. de Artic. pag. 771. Tom. II. item de Intern. Affect. pag. 227. de Morbo Sacro pag. 338.* et alibi inprimis

u) *Lib. I. Cap. II. de Administ. Anat. pag. 27. Tom. IV. Opp. per Charter.* Sed conf. huc inprimis doctissimi HARTMANNI *Diff. ult. de peritia Veterum anatomica spe- ciali, cap. XVIII. pag. 101. sqq.* vbi fuse, solide atque docte docet, Veteres Medicos, praesertim autem Alexandrinos, tam in suum, quam discentium praesertim, vsum, sceleta nitide composita, domi habuisse,

non tantum hominum, sed et animalium quod pariter egregie ostendit idem lauda- tus HARTMANNVS, *Diff. II. de perit. Ve- ter. anat. generali, cap. V. pag. 61. sqq.* Quae omnia inprimis contra SCHVLZIVM, contrarium frustra statuentem, in *Hist. Med. pag. 225.* iure notanda sunt.

w) *Pag. 28. Cap. VII.*

inprimis autem perpetua fere instituta est comparatio inter hominum et brutorum partes corporis internas in Libello, *de Anatome*, vt diligenter obseruauit praeses, in *Comment. pag. 23.* et passim alibi: vid. et huc magni inprimis VESALII *Opp. Tom. II. pag. 635.* At maxima lis est, de corporibus humanis, vtrum in his manus HIPPOCRATIS sit versata. Eam vero sine mora dirimit et liber de venis ^{x)}, et liber Epidemiorum ^{y)}. Quibus in locis hominum intestina a caninis ita discernit, vt humana intestina crassa canina magnitudine superent. SCHVLZIVS ^{z)} quidem id reprehendit, atque emendatione quadam sanare studet. Sed irritum esse consilium, quilibet locis citatis perlectis, intelligit. Ideo et ipsum mox suae infelicis coniecturae poenituit. Add. quae supra, de differentia, inter hominum et brutorum hepar, ab HIPPOCRATE obseruata, monuimus: et quae mox de humore crystallino tam hominum, quam animalium, dicturi sumus ^{a)}. Omnium vero, grauissimum est argumentum, HIPPOCRATEM corpora quoque mortua consecuisse, quod ex libro quinto Epidemiorum sumit, et manifestis argumentis amplificat MARSILIUS CAGNATVS, in *Lampade Critica GRVTERI, Tom. III. Part. II. pag. 625. sqq.* Dignus est locus, qui totus laudetur, obseruationibus viri doctissimi illustratus. Mortuo incisus venter est, resecta cute, cauerna apparuit magnitudine tanta, vt ad vtramque partem abdominis, ad renem, et ad ossa procederet, atque tum cognitum est, morbum, non sub cute tantum, vt fortasse, dum curabatur, creditum est, sed vltra cutem, patere, quia videlicet abdominis carnem insigniter exulcerauerat. Et *pag. 626.* Deinde, aut oculis, aut specillo cauernae illius progressus deprehensus est, at quis credat, tam immanem in viuo corpore sectionem factam esse, vt abdominis internae partes, et renes, seu ex his alter, oculis adspici poterint? debuisset enim abdomen inuerti, et necesse fuisset, attollere et versare intestina: quam immanitatem, vt viuens aliquis ferre possit, ne cogitationi quidem vllus est locus. Quibus in vtramque partem cogitatis, omnes in sententiam nostram pedibus ituros spero, HIPPOCRATEM

x) *Lib. de Ven. Tom. I. pag. 297.*

y) *Lib. VI. Sect. IV. pag. 808.*

z) *Hist. Anat. Specim. I. pag. 22.*

a) *Lib. de Carn. pag. 123. Tom. I.*

CRA TEM generatim partes corporis praecipuas et cognouisse, et anatomiae studio perfecisse. Sed omnium luculentissimum huius rei testimonium, primo omnino loco, ponendum exstat Libro de Corde, pag. 292. Tom. I. his quidem verbis, notatu certe dignissimis: *Si quis veteris moris, cor mortui eximendi gnarus, etc.* vbi morem veterem et dudum vsitatum vocat, corda mortuorum eximere, et viscera frigentium corporum interna diligentius perscrutari. Quo et illud maxime pertinet, *Lib. de Articul. pag. 800. Tom. II. de gibbositate corrigenda: Haec quidem in mortuo fieri facile possunt; in viuo autem non ita.* Quid ergo his clarius, quid inquam, his manifestius? Quare venio ad sectionem secundam.

S E C T I O I I.
DE

ANATOME HIPPOCRATIS SPECIALI.

Iam enim id mihi video negotii imponi, vt comprobatum dare possim HIPPOCRATEM non solum corpus humanum quasi aliud agendo, pertractasse; sed etiam abstrusiores et teneriores corporis interni partes sectione anatomica rimatum. Id quo facilius concedatur, liceat per singulas corporis nostri partes ire, et quid in illis cognouerit HIPPOCRATIS industria, percensere. Sequar hoc in proposito ordinem partium naturalem, situmque consuetum, ne quid videar praeterisse. Ordiam a cerebro. Huius substantia glandulosa a MALPIGIO ac BOERHAAVIO inuenta dicitur a multis, veterum scriptorum expertibus. Hi si legissent attente HIPPOCRATEM, hanc vetustatis laudem in tempora nostra non transferrent. Quid clarius HIPPOCRATIS de glandulis loco ^b? Caput ipsum glandulas quoque habere diserte scribit, cerebrumque simile glandulae. Esse enim cerebrum tradit, album ac friabile, instar glandularum, magna corporis nostri commoditate. Quin eo processit HIPPOCRATIS in cerebro cognoscendo, studium, vt Meninges quoque eius binas obseruarit. Quorsum pertinet liber *de locis in homine* ^c). Hic membranas cerebri duas enumerat, quarum al-

tera

^b) Tom. I. pag. 418. Conf. SPON. *Aph. TIS*, pag. II. et KESTNERI *Lexic. Med. Nou.* pag. 21. et WHARTON. *Adenogr.* pag. 404.
Cap. III. pag. 9. item PAUL. AMMANI
Irenicon. NYMAE POMPIL, et HIPPOCRA- ^c) Tom. I. pag. 365.

tera superior crassior sit, tenuis altera, tangens cerebrum. Neque minori opera cerebri falcem perquisiuit, sicut ex libro *de morbo sacro*, statim patet. Sed imprimis medulla cerebri me vocat ad se, quam HIPPOCRATIS curam non fugisse discas e libro *de principiis* ^{d)}. Hic primo medullae, quae dicitur dorsalis, originem ducit de cerebro. At eandem negat proprie medullam vocandam, duabus ex causis, quarum prior similitudinem cum cerebro vrget, posterior discrimen medullae proprie dictae. Quae sane tam subtiliter HIPPOCRATES discernere non potuisset, si fuisset ab anatomia destitutus. Eadem duce, oculorum indolem naturamque non ignorauit, neque tunicas modo diuidit eorum, sed humorem etiam crySTALLINUM detexit. Ac tunicarum quidem formam nobis proponit, alio tantum nomine Meningum expressam ^{e)}. Quin enumerat easdem, sed pro instituti ratione, quae numerum exactum non postulabat. Tum situm nobis ostendit, variaque quibus expositae sunt pericula, et tandem officium earum, ne quid desit. Pergit ad humorem crySTALLINUM ^{f)}, quem glutinosum nominat, humidum, quam diu calet, siccum, vbi refrigeratus est. Eum vero HIPPOCRATES ipse, non raro, sed saepius, vidit, ruptis oculis exeuntem, tam in brutis, quam in hominibus, suae testis anatomiae certissimus grauissimusque. Ab oculis veniamus ad nares, in quibus os cribriformae non praetereundum est, quod, situm in parte capitis aduersa, cernitur, qua in nares sese aperit. Noli credere, HIPPOCRATEM nihil eius cognouisse, quod partim liber de locis in homine ^{g)}, partim de carnibus ^{h)}, te certiores potest reddere. Illic enim in naribus foramen esse negat, sed fungosam quandam naturam, instar spongiae. Hic cauis narium partibus praetendi non os aliquod, non carnem, docet, sed cartilaginem mollem, ad spongiae similitudinem. Succedat auris, eiusque tympani membrana tennerrima, cum osse petroso. Tam admirabilis est huius constitutionis auris internae fabrica, vt non potuerit HIPPOCRATIS solertiam

Q 2

effugere.

d) Siue de Carnib. §. v. p. 114. sqq. T. I.

e) Tom. I. pag. 365.

f) Tom. I. pag. 123. Conf. DN. PRAESIDIS Epist. II. de Anthrac. et Variol. Venerum, pag. 17. et HARTMANNI Diss. vlt. de peritia Veterum anatomica speciali, Cap.

xvi. pag. 94. sq. et LEEMPOEL Specimen de Anatomies Origine et progressu, pag. 60. item KVRELLA, in Collect. Dissert. de Anatomie Veteri, passim.

g) Tom. IV. pag. 364.

h) Lib. de Carnib. Text. xvi. pag. 121.

effugere. Quo duce, meatus aurium pertinent ad os durum et siccum, quod petrae formam habet, facta in eo cauitate fistulosa. Iam soni ad partem duram alliduntur, cauumque os resonat per duritiem. At pellicula, iuxta os petrosam aure inclusa araneae subtilitatem imitatur, ficcior alia membrana ⁱ⁾. Quae legens LINDENIVS ^{k)} miratur HIPPOCRATIS acumen, paucis omnia complectens. Neque minore admiratione nos afficimur, ubi ductus salivales iam in eo non obscure invenimus. Nam de diaeta, libro tertio ^{l)}, repletionis indices designans ac signa, mukum maxime et salivam nominat. Haec, corpore quiescente, spiritum intercludere, ubi vero caluerit labore exercitatum, attenuari atque excerni. Quae sane nunquam HIPPOCRATES tam distincte de saliva praecepisset, nisi ductus salivales intellexisset. Adeo verum est illud, quod BARTHOLINVS monet, multa nobis videri noua, quae trita sint veterum usu. Idem tamen altius potuisset ascendere ductusque salivales non e GALENO petere, vel AVICENNA, sed ex ipso HIPPOCRATE. Sed nihil facile iucundius, nihil spectatius, imagine arteriae, pulcherrime ab ipso expressa, initio loci de Anatome, libri de structura hominis ^{m)}. Primo situs arteriae quam est accuratus, cuius initium ab vtrisque faucibus ducitur, donec desinat in fuminum pulmonem.

i) *De Carnib. Text.* XVI pag. 121.

k) LINDEN. pag. 525. Conf. DN. PRAESIDIS *Not. ad Anonymi Isagog. Anat.* pag. 121.

l) Pag. 249. Tom. I. Sed luculentiora et clariora de his ipsis glandulis et ductibus salivalibus, loca, leguntur apud ipsum HIPPOCRATEM, *Lib. de Glandulis*, pag. 417. et *Lib. de Dentitione*, p. 591. nec non alibi. Plenius vero atque accuratius salivales hos fontes postea descripsisse HEROPHILVM atque EVDEMVM, liquido testatur GALENVS, *Lib. II. de Semine*, c. 6. *de usu part.* *Lib. IX. cap. I. de Aliment. Facultat.* *Lib. III. cap. 5.* ubi ipse accuratissime hac de re tractat, ut multis egregie ostendit ALMELOVEENIVS, *de Inuent. Nou. ant.* §. 17. pag. 153. seqq. et quem ibi merito laudat IAN. LEONICENVUS, nomine, ut creditur, ficto sic di-

ctus, in *Metamorphosi, Aesculapii et Apollinis pancrat.* p. 77. ubi quidem iusto acerbius WHARTHONO atque STENONI, anatomicis praestantissimis, omnem laudem et gloriam in ductibus salivalibus inveniendis et describendis, eripit idem ille inclemens nimis atque rigidus aduersarius, LEONICENVUS. Sed plura de horum riuulorum salivalium antiquitate, vid. apud HARTMANN. *de peritia veterum anat. in specie*, Diff. II. cap. 7. pag. 48. seqq. item DIEMERBROEK, *Anatomiae*, *Lib. III. c. 24.* pag. 433. ut et SCHVLZ. *Hist. Med.* p. 348. ac SCHROECK, in *schol. ad HELWIGII Obs. med.* 64. pag. 216. ut alios iam taceam.

m) Pag. 287. ubi vid. DN. PRAESIDIS *Comment.* pag. 12. seqq. et van LEEMPOEL *Specim. de Anat. Orig. et progressu*, pag. 60.

monem. Additur forma, qua ex annulis componitur, finilibus, atque inter se vndique in superficie coniunctis. Pari felicitate ab eo illud arteriae asperae tegumentum artificiosissimum et detegitur, et explicatur. Lingulam puto, quae dicitur epiglossis, non permittens potum iusto profusorem vllō modo penetrare ⁿ⁾. Festino ad conspiciendum pulmonem, quem HIPPOCRATES non sine cura, per partes eleganter describit, libro *de resectione* ^{o)}. Ecce tibi quinque apices, quos dicunt lobos, et summitates. Nec vero hic conquiescit cor labor, sed notas quoque cauernosas obseruat, quibus pulmo quasi compunctus est. Hae pertinent ad vesiculosam pulmonum substantiam, de qua inuenta vehementer gloriatur MALPIGHIVS ^{p)}. Sed magnam huius gloriae partem sibi vindicat COVS, si locum a me commemoratum consideres. Relictis pulmonibus, se nobis pericardium aperit, ab HIPPOCRATE distincte expositum, vbi de corde agit ^{q)}. Nominat illud venuste tunicam leuem, cor vestientem, tuentem sanumque conseruantem. Huc enim spectare videt eius liquorem, vrinae similem, tanta copia, quanta aestuanti mederi potest. Neque ignota fuit COO musculosa cordis substantia, sicut ex eodem libro ^{r)} manifestum est, neque insignis differentia, inter hominum et brutorum corda ^{s)}. Namque ideo cor appellat musculus valde robustum, constringente carnis densitate. Addit statim binos ventriculos, in vno amiculo, distinctos, ne quid ad plenam rei cognitionem

Q 3

nem

n) *De Corde* pag. 289. *Tom. I. et Lib. IV. de Morb.* p. 158. *Tom. II.* Quo posteriore loco, ipse HIPPOCRATES ipsam *Epiglottidem* elegantissime comparat τῆς κισσῆς φύλλον, seu *hederæ folio*, ad quem locum HESYCHIUS respexisse videtur, ita nimirum scribens, p. 759. πέταλον, φύλλον, καὶ τῆς ἐπιγλωσσίδος τὸ καλύπτον τὸ σόμα, h. e. πέταλον, folium in genere significat; et in specie, illud, quod apertum *Epiglossidis osculum obteggit*; quod tamen, quantum equidem memini, in splendida alias HESYCHII Editione postrema Cel. ALBERTI, observatum haud fuit. Ceterum autem accuratam ipsius *Epiglottidis* descriptionem ex GALENO, vid. apud ORIBASIVM, *de Anat.* pag. 62. Edit. Cl. DVNDASS. et THEODO-

RET. *Orat. III. de prouident.* p. 64. Conf. et poëm. TRILLER. *Tom. I.* pag. 171. in Not.

o) *Tom. I.* pag. 287. vbi vid. DN. PRAESIDIS *Comment.* p. 14. *sqq.*

p) Sed frustra, vt multis ostendit DN. PRAESES in *Comment.* dicto, pag. 16. *sqq.* Conf. THOM. BARTHOLINI, *Tract. de pulmonibus*, Sect. I. et poëm. *Trill. Tom. I.* pag. 177. in Not.

q) *Tom. I.* pag. 289.

r) Pag. 290. *Tom. I.* conf. maxime SPON, *Aph. Nou.* pag. 23. *sqq.* et PAVL. AMMANNI *Irenic.* pag. II. *sqq.* item KESTNERI *Lex. med.* pag. 404.

s) Vid. *Lib. de Anat.* p. 289. et ibi *Comment.* DN. PRAESIDIS, p. 17.

nem deesse videatur. Quid dicam de cordis auriculis, quarum situm naturamque satis declarat. Eas enim oriri dicit propè venarum originem, circa ventriculos. Easdem demonstrat esse corpuscula mollia et cauernosa ^{t)}. Superest, vt ex HIPPOCRATE latentes cordis pelliculas excutiamus. Eas enim cognitione dignissimas iudicat ipse, maximaque cura obseruatas, perstringit. Quam compositae, breuitate venusta, valuulas mitrales, siue, vt iam loquimur, episcopali mitrae similes, enarrat. Tres reperit pelliculas, in superioribus partibus rotundas, instar circuli semisecti, quod re uera clausae videntur ^{u)}. Abeant iam contemptores veterum, et, quantam illis faciant iniuriam, si eos dicant Anatomiae imprudentes, hoc locuplete exemplo discant. Quod mihi facilius credes, si te systolen cordis et diastolen ex HIPPOCRATE indiciis ipsa luce clarioribus docuero. Rationem enim redditurus variorum colorum in corpore animato, eam a corde partim astringente venas, partim laxante ducit. Sic colores rubicundi fiunt et pellucidi, corde remittente, sed pallidi et liuidi, corde se constringente ^{x)}. Idem cor quoniam fons est circuli sanguinis, huc me totum rapit, vt, num HIPPOCRATES hunc perspexerit, paucis excutiam. Nam a quo hic locus tractatus non est artis salutaris perito? Ceteris locis dimissis, insistam in vno aphorismo quinquagesimo primo ^{y)}. Ibi alimentum transire in pilos et vngues extimamque superficiem ab internis partibus dicitur, ac rursus ab externis partibus ad internas recedere. Vid. *Lib. de Aliment. pag. 594. Tom. I.* ad quem insignem prorsus de circulatione sanguinis HIPPOCR. cognita, saepius respiciunt et alludunt THEODORETUS *de Prouident. Orat. III. pag. 73.* GREGOR. NYSSEN. *de Hom. Opificio cap. 30. pag. 135. T. I.* et *Orat. de Mort. pag. 627. T. III.* TIMAEVS LOC RV S, *de Anima mundi, pag. 560. Collect. Galen.* item LVCRET. *Lib. VI. pag. 947.* MACROB. *Lib. VII. Saturn. cap. 4. pag. 415.* et alii: inprimis vid. huc LINDANI *Exercit. XIX. de HIPPOCRATIS Circuitu Sanguinis*, vbi plura,

t) *Tom. I. pag. 291.* Conf. huc LINDANI *Physiol. Med. pag. 179. sqq.* vbi singularem HIPPOCR. solertiam mire meritoque dilaudat: vt et VAN LEEMPOEL, in *Specimine de Anatomies Origine et progressu*, pag. 60. vid. et saepius iam citati

KVRELLAE *Sylloge Dissertat. de Re anatomica Veterum*, vbi plura.

u) *Tom. I. pag. 292.*

x) *Tom. I. p. 311. Lib. de Ven.* Conf. BAL-
LONII *Lib. I. Epidem. pag. 106.*

y) SPON. *pag. 44. et pag. 46.*

plura, quae huc maxime spectant. Iam res docet ipsa, aliique HIPPOCRATIS loci inter se collati, comprobant, alimentum, quod hic dicatur, de sanguine accipiendum. Secus ipsa alimenta cursum per corpus late patentem, quomodo quaeso conficiant, neque sanguis peragere hoc iter HIPPOCRATI videatur, circulationis huius experti. Dicerem plura, nisi doctissimorum hominum, veluti BARTHOLINI, WALLAEI, SPONII, DRELINCVRTII, WEDELII, et inprimis LINDENNII^{*)}, vt et ALMELOVEENII, DACERII, PETRI BARRAE, BERNARDIN. GENGAE, et aliorum studium hunc laborem occupasset, beatique parentis mei disputatio *de circulo sanguinis*, contra SCHULTZIVM habita, HIPPOCRATIS gloriam satis vindicasset, quibus praefertim add. HARTMANNI *Diff. II. de peritia veterum anatomica speciali*, Cap. x. pag. 62. *sqq.* Item, si placet, *Poemat. TRILL. Tom. I. pag. 173. sqq. in Not. vbi plura: vt et celeb. HEISTERI programma: An Sanguinis Circulus Veteribus fuerit cognitus? Helmstad. 1721. vbi illud solide affirmat: sicut et ipse HOFFMANNVS noster, in Med. rat. system. Tom. IV. in ipsius Opp. Tom. II. pag. 248. et 318. Liceat mihi ad omentum properare, eiusque vasa adiposa ab HIPPOCRATE discere. Facit eorum mentionem de locis in homine^{z)}, ad morbos splenis felicius percurandos. Itaque causas splenis florecentis percontatus, omentum vidit simul cum corpore consumi, quo facto, pinguedo in omento colliquescat. Quae postrema verba sicut vasa adiposa satis indicant, ita neminem dubitare sinunt, quin HIPPOCRATES opinione studiosius, in anatomia elaborarit^{a)}. Eiusdem scientiae praesidiis adiutus, in libro *de principiis*, aut *carnibus*^{b)} vasa lactea distinguit. Etenim venas ex ventre atque intestinis, vbi cibi potusque fuerint calefacti, duplicem colligere materiam tradit. Tenuissimam quidem ac liquidissimam ad se trahere, crassissimam*

*) Cuius inprimis lectu dignissimae sunt dissertationes XXIX. de HIPPOCRATIS *Circuiri sanguinis*, sed rarissime visae, aut venales expositae, fatente ALMELOV. pag. 226. et SCHVLZIO ipso, *Hist. Med. pag. 223.* qui eas nunquam videre potuit: quod mihi tamen obtigit apud DN. PRAESIDEM, qui eas feliciore fato, in suis variis itineribus, nactus est.

z) Pag. 384. Tom. I. Conf. SPON. *Apb. pag. 17.*

a) Vid. MALPIGHII *Exercitat. de Omento*, pag. 39. et 43. Tom. II. *Opp. fine.* add. CAECIL. FOLIVS ac SCHENCKIVS.

b) Pag. 119. Conf. DACERII. *Nor. pag. 362. Tom. I. et poem. TRILL. Tom. I. pag. 181. in Not.*

crassissimam vero fecem inferioribus relinquere intestinis, ubi computrescat. Longiores sunt lites de vasis lymphaticis, quas egregie, sicut solet, tangit et componit BARTHOLINVS ^{c)}. Nam ingeniose voculam ὀχετός, affert, quae non incommode de canalibus vasorum lymphaticorum, accipiatur. Ad quod probandum, prouocat ad librum sextum *de morbis vulgaribus*, sectione tertia, aphorismo quarto, quo in loco, signum exercitationis sufficientis vocat sudorem, qui e poris cutis guttatim effluat, e perenni vasorum lymphaticorum riuulo dimanans, pro quo, pari elegantia, LIBANIUS, *Epist.* 319. pag. 154. dixit: ὀχετός ἰδεῖν, sed hoc obiter. Clarius est testimonium ex libro *de glandulis*, Cap. 1^{d)}. Hic luculenter scribit, humorem ex reliquo corpore colligi in glandulis, quae multis sint et raris venis repletae. Quis vero est, qui nesciat, plurima vasa lymphatica in glandulis reperiri? Neque minus recte iudicat idem de natura lienis et constitutione, *Sect.* ix. *de Carnibus*. Ibi profecto ab anatomiae praesidiis destitutus, fibras in liene obseruandas non detexisset, quae faciunt ex ipsius sententia, ut mollis sit lien, ac fibrosus ^{e)}. Multo minus fontes quatuor humorum deprehendisset, sanguinis in corde, pituitae in capite, aquae in splene, et, quod inprimis memorabile videtur, bilis in loco folliculi, in hepate ^{f)}. Hoc idem pluribus

^{c)} Tom. III. pag. 272. *Epistol. Medicinal.* ubi SEGERVS BARTHOLINI sententiam magis confirmat: ut et *Tractat. de Hepate defuncto*, ad DEVSING. p. 576. in *Opuscul. Conf. DN. PRAESIDIS Comment.* pag. 23. in *Libell. Hipp. de Anatome*. Sed vide GOELIKE, *Hist. Med. Period.* v. pag. 499. *sqq.* ubi, pro more vix laudando, HIPPOCRATEM atrociter impugnat, ast incassum, et telis plumbeis magis, quam ferreis, ut ibi clarissime cuius a praeiudiciis libero, protinus, spero, patebit.

^{d)} Ipso fatente GOELIKE, *l. c.* p. 500. et multis inprimis probante HARTMANNO, *de peritia Veterum anatom. in specie, Dissert.* II. cap. 5. pag. 43. *sqq.* ubi de cognitis iam HIPPOCRATI, aliisque Medicis priscis, vasis lymphaticis, docte et acute tractat: quod et pari fere industria fecit

IO. THEODOR. SCHENCKIUS, in *Synopsi Institut. Med.* pag. 137. vid. et SPON. *Aph. Nou.* pag. 78. et pag. 98. Quin et ipse HIPPOCRATES, *Aph.* 14. *Sect.* VI. de Hydrope loquens, per φλέβας, seu Venas, secundum quas aqua in aluum fluxerit, stilo ipsi consueto, haec ipsa vasa lymphatica intellexisse videtur, bene quoque obseruante Auctore doctissimo *Comment. in Aph. Hipp. Paris.* 1724. Tom. II. pag. 441. Sed illas ipsas φλέβας lymphaticas clarius ipse descripsit HIPPOCRATES, loco illo primario e *Lib. de Glandulis*, pag. 414. superius laudato.

^{e)} Conf. inprimis, *Lib. de Venis*, p. 311. Tom. I. et ibi LINDAN. in *physiol.* p. 69. *sqq.* item FOESII *Oecon. HIPPOCR.* p. 56. nec non MALPIGH. *de Liene* Cap. IV. pag. 110. *Opp. Tom.* II.

^{f)} *De Morbis Libro* IV. pag. 121.

pluribus verbis, inferiore loco, explicat, pag. 123. loc. cit. vt demonstret, quomodo et qua re, crescat in corpore, et quemadmodum locus folliculi in hepate ipsam ad se trahat. Quibus perspicue eleganterque traditis, tandem recte monet, praecipue ibi bilem a cibis ac potibus fecerini, et folliculum secundum naturam, bili maxime esse consentaneum^g). Tam claros HIPPOCRATIS locos comparans SPONIUS, esse putat in promptu, non recentiores demum haec vidisse, sed iam HIPPOCRATEM idem felici industria comperisse^h). Quae gloria viri post hominum memoriam, in arte sua, maximi, nouas capit accessiones, ex vesiculis seminalibus. Etenim semen velut fauum, ab vtraque vesicae parte, reperiri, apud eum legimus relatum, in libro *de venis*ⁱ). Quis igitur non aegre ferat, HEROPHILO vesicarum seminalium primam tribui observationem, quam HIPPOCRATES iam loco laudato, affert? Quis non multo vehementius indignetur, recentioris aetatis homines haec pronouis, venditare, quae renouata sunt, non noua? Quorsum et, vt id commodè hic adiiciam, pertinet inprimis ipsa illa perquam curiosa et artificiosa testiculorum substantia ex meris vasculis et filis subtilissimis composita, quam primus detexit, aut descripsit cel. ille Anatomicus, REGN. DE GRAEF, *Tract. de Virorum Organ. genital. pag. 30. sqq.* quam tamen iam olim, eodem prorsus modo, accuratissime descripserat THEOPHILVS PROTOSPATHARIVS, *Lib. v. de Corpor. humani fabrica, cap. 28. pag. 903. Bibl. Graec. ill. FABRICII, Tom. XII. vbi οἱ ὄγκαις, seu Testiculi, ἀδένες, seu glandulae vocantur ἀγγεῖα πολλὰ τεῖχοειδῆ καὶ ἀραχνοειδῆ κατεσπαρμένα ἔχοντες, quae vascula multa tenerrimis cupillis et aranearum telis ac filis similia, hinc inde per ipsam substantiam dispersa habent.* Qui locus notatu fane dignissimus, etiam probe obseruante ipso

ALMELOV.

g) Pag. 130.

h) In *Aphor. pag. 15.* Conf. AMMANNI *Irenic. pag. 16.* et BARTHOLINI *Anat. Lib. I. c. 14. p. 147.* ipsiusque varios Libellos contra Hepatis officinam officiumque, scriptos, ac iunctim editos, *Hafn. 1670. de quibus vid. PRAESIDIS poem. Tom. I. pag. 178. Not.*

i) *Tom. I. pag. 297.* Conf. SPON. *Aph. Nou. pag. 43.* et Celeb. MORGAGNI

Epistol. Anat. I, 88. pag. 102. Sed SCHVLZIVS hic, vt solet, iterum in contraria est sententia, in *Hist. Medicinae, pag. 224.* heu frustra! omnino: Clarius vero contrarium pro HIPPOCRATIS gloria, docente diligentissimo HARTMANNO, *Diff. II. de peritia Veterum anatomica, cap. XII. pag. 73. sqq.* Sed sufficit profecto hic sola magni MORGAGNI auctoritas.

ALMELOV. *de Inuent. Nou. ant. pag. 137.* vbi tamen ipse de ipsius exemplaris THEOPHILI graeci defectu vehementer queritur. Conf. et si placet, praesidis *poemat. Tom. I. pag. 185. sqq. in Not.* Verum, excepto etiam THEOPHILO, ipsum tamen GRAEFIVM haud primum fuisse, qui ita describeret Testium substantiam, praeclare solideque ostendit ill. MORGAGNVS, *Aduers. anat. I. pag. 21. in Not.* Sed haec obiter et opportune, ni fallor, occasione, ab ipsis vesiculis seminalibus vicinis, nobis hic commode subministrata. Habes vero novum peritiae Hippocraticae argumentum in duobus vreteribus. Hos quam scite informat imagine canalium obliquorum ac ferme triangularem, ad summum vesicae fastigium pertinentium^k). Clarius, quid sentiat de renum venis, exponit. Nam renis situm, cauam sui partem ad venas magnas habentis, monstrans, ex ipso enasci narrat, venas in vesicam^l). Agerem nunc de sphinctere ani et vesicae, nisi Praeses illustris singulari industria, hunc tractasset locum^m). Nam libro de Anatome, hanc corporis nostri partem *COVS* ita describit, vt quilibet intelligat, eius acumen hic quoque elucere. Potius ad portum propero, et, quid de glandulis obseruarit constans HIPPOCRATIS diligentia, venerabundus mecum cogito. Quam docte glandularum naturam indagat, quae sit spongiosa. Easdem raras reperit et pingues, corpori reliquo dissimiles, friabiles, et venis repletas. Quas si dissecueris, sanguinem proflueri largum docet, instar pituitae, album. Tangenti lanae mollitiem praebere, humoremque oleosum emittere, vbi magna vi, digitis comprimanturⁿ). Neque vero glandulas generatim perspexit HIPPOCRATES, sed eas per partes corporis sparsas, detexit. Ecce glandulas in pectoribus, quae mammae vocantur, attolluntur, et lac faciunt, multo cum discrimine virorum, ac mulierum, quod mulieribus tenuis est glandularum natura alimentum in lac commutans^o). Praeter has, glandulas commemorat intestinorum, de quibus ex HIPPOCRATE, PEIERVS eleganter

k) *De Anat. p. 288.* vbi vid. DN. PRAESIDIS *Comment. pag. 23.* item GOELIKE, *pag. 535.*
 l) *Physiol. pag. 135.*

1) *Pag. 298. Tom. I.* vbi per venas postremas, consueto more, ipsos rursus intelligit vretes, vid. CELS. *Lib. IV. Cap. I.* Conf. LINDAN. *Physiol. pag. 134.* et DN.

m) *In citato saepius Comment. in HIPPOCRAT. Lib. de Anat. p. 27.*

n) *De Glandulis, Tom. I. pag. 414.*

o) *Loc. cit. pag. 421.*

ganter disputauit, ex laudato HIPPOCRATIS loco p). Ibidem breui post glandulas renum subiungit, quarum inuentionem sero nimis sibi vindicauit Cl. BELLINI, cum aliis, recte monente SPONIO q plura dicturus, ut ait ipse, si instituti ratio postulare. Postremo, ut intelligas, HIPPOCRATEM partium corporis humani aptam inter se connexionem animaduertisse, consilium HIPPOCRATIS tibi propono, quo, venas mammarias in angina, cum leuamine, incidi iubet, id profecto non suafurus, nisi venas mammarias ab ipsis iugularibus oriri vidisset r). Sed magno- pere lapsus est HIPPOCRATES, si credis CAELIO AVRELIANO, de morbis acutis s). At enim dignitatem viri strenue defendit FREINDIVS t), quam FALLOPIVS non obscurabit, in obseruationibus anatomicis, sibi hanc laudem tribuens inuentae societatis mammariarum venarum et iugularium. Equidem haec, atque omnia, ante a me dicta, summatim reputans, HIPPOCRATEM quotidie maioris facio, eiusque merita, cum in omnem medicinam, tum in anatomiam, immortalia, summa veneratione prosequor, nunquam eorum sententiam probaturus, qui COI famam, in quam, pia manu, flores spargere debuissent, aeternum virentes, iniecto potius puluere fordido, heu! pudet fateri, contaminare et obruere nihil quidquam verecundantur u).

R 2

CLARISSI-

p) P.83. Exerc. II. q) In Aph. Nou. p. 22.

r) Tom. II. p. 102. Lib. III. de Morbis.

s) Lib. III. Cap. IV.

t) Comment. II. in HIPPOCR. Lib. I. et III. de Morbis Epidem. pag. 30. et 34.

u) Haec quoque *Dissertatio Hippocratica* me Auctorem habet; et etiam non habet: Habet nempe, quod ad primam ipsius dispositionem, delineationem atque ordinem spectat, item ad iudicia omnium quidem locorum, ex HIPPOCRATE potissimum, aliisque Auctoribus multis, opportune desumptorum: Non vero e contrario, habet, quod ad ipsam illius compositionem et singularem proponendi et demonstrandi modum attinet; quod quiuis facillime, credo, ex diuersa, a nostra, scribendi ratione, diiudicabit. Igitur illa mihi praesertim debet interna quasi nobiliora viscera, item neruos, toros ac muscu-

los; externa vero integumenta, velamenta ac ornamenta, ipsi B. STENZELIO, tum Respondenti. Ideo ergo illam inter ipsos meos foetus germanos lubens adoptaui, quod vitam nempe et nascendi opportunitatem quasi mihi debeat, praesertim quum iam denuo impressa, multis magnisque accessionibus, vbique a me aucta sit. Quod tamen semel tantum in hoc vniuerso opere, a me hic factum est; quum plus semel, id ex iisdem rationibus, pariter fecerit RIVINVS, praeceptor olim noster adhuc in cineribus nobis sancte venerandus, ut clarius ex ipsius praefatione amoenissima et facetissima Lectoribus patet, suis dissertationibus medicis iunctim editis; praemissa. Sed vid. si placet, quae iamiam ea de re monuimus, in *specimine nostro Hippocratico*, paullo inferius, suo loco opportuno, reperiundo.



CLARISSIMO
CHARISSIMO QVE
STENTZELIO SVO
PRAESES.

Reddo hic Tibi Tuam Dissertationem, vere Tuam, Tuo siquidem ingenio Tuaeque industria scite elaboratam. Indicatis Tibi a me Hippocraticis potioribus, materiam Tibi operis dedi; Tu vero materiae dedisti formam, et formae nitorem, adeo, ut cuncta apte et concinne a Te digesta ac disposita, in pulchrum splendidumque aedificium quasi exsurgerent.

Celeberrimi quondam apud nos Parentis Tui laudatissima vestigia presserunt, optimos Auctores veteres Medicos ita diligenter legisti, ut novos bonos haud sperneres: Neque enim omnia Veteres illi, per aetatem, habent, quae Novi; nec Novi rursus omnia, quae Veteres: Ideo hi cum illis felici connubio semper sunt coniungendi, et studiose inter se comparandi. Haec enim sola est via, paucissimis licet hodie calcata, ex qua Medico, non nomine, sed re ipsa, tali, vera demum laus nascitur et solidum decus.

Hac ardua, sed praeclara Arte innixi, arces illas igneas, ut Poëta ait, attigerunt magna olim, et in hunc usque diem, nomina, BARTHOLINI, BALLONIVS, DVRETUS, HOLLERIVS, FERNELIVS, BORRICHIVS, CONRINGIVS, REINESIVS, HOFMANNVS, LINDENIVS, SPONIVS, BAGLIVVS, SYDENHAMVS, FREIND, MEAD, WIGAN, BOERHAAVIVS, alique, quorum laudes in se vno, coniunxit omnes, qui per Dei gratiam, in publica commoda, adhuc superest, magnus ille Vienneusum Aesculapius, GERARDVS VAN SWIETEN.

Notum illud est QVINCTILIANI dictum: Ille se profecisse sciat, cui CICERO valde placebit: Ego vero constanti experientia dudum edoctus, haud mentiar, si dixerò: Ille se demum in Arte salutari profecisse sciat, cui HIPPOCRATES valde placebit, quique illum nocturna diurnaue manu versabit, et eius oracula penitus perspecta habebit. Quod quanta a Te diligentia factum fuerit, luculenter quidem ostendisti in hoc Tuo egregio specimine, omnium hinc solide doctorum Medicorum eximia laude dignissimo; de quo, et coniuncto cum illo, nouo Doctoris Medicinae honore, Tibi quoque

quoque ipse ex animo gratulor, qui Te semper ob cultiores mores, erectum ingenium et praeclara studia, singularem in modum, merito dilexi.

Illa igitur Tui ingenii, virtutis ac diligentiae laude macte, perge ire, qua coepisti, via, neque unquam dubita, quin Te digna Tuis egregiis studiis praemia proxime sint sponte sequutura: quod equidem candide voueo, immo certam spe praesumo. Vale itaque, Experientissime D. STENTZELI, ut per Te in posterum valeant plurimi, Tua arte sanati, mihiq; ut hucusque probe fecisti, fauere quaeso, perge! Scribebam Wittebergae, die XXXI. Mai. A. O. R. CIO DCCCLIV.

DISSERTATIO MEDICA QVINTA.
DE
VERITATE PARADOXI
HIPPOCRATICI
NULLAM MEDICINAM INTERDVM
ESSE OPTIMAM.
PROOEMIUM.

Licet Medicina, post sanctam Theologiam, vnicam illam contaminatae animae Emendatricem; omnium fere scientiarum Artiumque sit praestantissima et vtilissima; quoniam ipsius ope operaque carere nunc nequit humanae Vitae, post lacrimabilem lapsum, variis morbis obnoxiae, indigentia: quaeritur enim merito, iudice QVINCTILIANO^{a)}, quid omnibus prosit? sit Philosophia res summa! ad paucos tamen pertinet: sit Eloquentia res admirabilis! non pluribus tamen prodest, quam nocet: sola, sola est Medicina, quia opus sit omnibus: ergo et aequaliter ad omnes Medicina pertinet, et nulla tam necessaria est omni generi hominum, quam Medicina: Haud raro tamen accidit, ut varii subinde occurrant Morbi, medelae omnis adeo quidem impatientes, ut per Medicinam exterius praesertim adhibitam, magis exacerbentur et peiores reddantur; quam quidem mitigentur, aut plane tollantur, quod, sapienter

R 3

iudicante

a) Declamat. CCLXVIII. add. CASSIODORI Formul. Archiatr. ibique MEIBOM. in Commentario et praesertim ARISTIDIS Orat. Platon. II. pag. 288. Tom. II.

Opp. per SAM. IEBB, vbi eadem paene graece leguntur; quae hic Latine, apud QVINCTILIANVM.

iudicante TACITO^{b)}, *Natura infirmitatis humanae, tardiora sint Remedia, quam mala ipsa.* Saepius ergo praestat, illos intactos prorsus relinquare, quam intempestiua Medicina adoriri; adeo, ut interdum, hoc certe respectu, *nulla Medicina sit optima Medicina.*

Quod et ipse ingenue fassus est summus Artis nostrae stator et conditor HIPPOCRATES^{c)}, sequenti quidem sapientissimo et acutissimo effato: Ἀγαθὸν ἐνίοτε φάρμακον, τὸ μὴδὲν φέγειν φάρμακον, *Bonum interdum est Medicamentum nullum adhibere Medicamentum*, quod pari acumine, de Deo, ceu Medico, ita scite expressit ORIGENES^{d)}, βοηθῶν αὐτοῖς κάμνουσιν, ὃ βοηθεῖ, *curat aegrotos, dum non curat.* Quo et aliquo modo pertinet illud EURIPIDIS, HIPPOCRATI nostro fere aequaeui^{e)}, κρεῖσσον δὲ νοσεῖν, ἢ θεραπεύειν, h. e. *praestat aegrotare, quam sanare*, siue, ut illud scitius versu tereti reddidit summus Virorum, HUGO GROTIUS^{f)}:

Grauius morbo est, velle mederi.

Cuius cothurnati Tragici et dicitur ista eximia gnome, in *Hypsipyle*, iudice BARNESIO, *Tom. II. Opp. Euripid. pag. 499.* ad incertum vero Auctorem eandem referente potius laudato modo GROTIO, in *Florilegio Stobaeano, Tit. XX. pag. 107.*

Ὅστις γὰρ ἐν κακοῖσι θυμῶδεῖς βροτῶν
Μεῖζον προσάπτει τῆς νόσου τὸ φάρμακον,
Ἰατρὸς ἔστω ἐκ ἐπιτήμων κακῶν.

Hoc est, eodem summo Viro, et poëta incomparabili, interprete:

*Aduersitati quisquis iratus suae,
Medicamen aptat grauius aegritudine,
Non est peritus ille sanandi artifex.*

Quo et illud egregie spectat PLUTARCHI, *Lib. de Cupiditate Diuitiarum, pag. 523. Tom. II. Opp. τὸ φάρμακόν σε τὴν νόσον μέζο ποιεῖ, Remedium tuum*

b) Vit. AGRICOLAE, Cap. III.

c) *Lib. de Articulis, pag. 791. Tom. II. opp. per LINDENIVM.*

d) in *Philocalia, Cap. XXI. pag. Edit. GVILIELM. SPENCERI.*

e) in *Hippolyto Coronigero, vers. 186.*

f) in *Excerptis Veterum Tragicorum et Comicorum, pag. 204. Conf. SOPHOCLES Ajax Mastigophor. et ex eo SVIDAS in πῆμα, item ERASMI Chil. I. Cent. II, Adag. 6. et 7. pag. 74. sqq. ut et BAIERI Adag. Medicinal. LXXII. p. 151. sqq. et ibidem, pag. 149.*

tuum morbum grauiorem facit. Quod scite sic expressit in sententiis ethicis, PUBLIVS SYRVS, pag. 12.

Grauiora quaedam sunt Remedia periculis.

Vbi plures similia, in *Notis postumis*, collegit IANVS GRVTERVS, pag. 173.

Quod licet valde paradoxon, aut oxymoron videatur; veritati tamen ipsi admodum consentaneum esse, ab iis facile deprehenditur, qui ipsam sedulo Artem tractant medicam, et fida quotidiana experientia edocti, probe didicerunt, non inaniter aut poëtice tantum, cecinisse quondam NASONEM:

Interdum docta plus valet Arte, malum.

Item MANILIUM, *Lib. IV. Cura nocet: cessare iuuat.*

Nec non GRATIVM: *Curâque potentia maior.* Vbi vid. PETR. BURMANNI *Not. pag. 292. Tom. I. poët. Latin. minor.*

Quo et illud spectat veteris e medio aevo, poëtae, qui vulgo SALVTARIS inscribitur, apud BARTHIVM, DAUMIVM, aliosque:

Pessima ne tollas, mala peiorare caueto:

Saepe necem generat instimulata febris.

Item istud alterius poëtae non ignoti:

Grauiora Morbis, patimur Remedia:

Nec Vita tanti est, viuere, ut possis mori.

Quem in sensum pariter quoque cecinit SANCTVS PAVLINVS, *Natal. XII. apud MVRATORIUM, Anecd. Latin. Tom. I. pag. 60.*

Saeuior et morbis et vulneribus Medicina,

In corpus grassata meum est, velut accidit illis,

Quos humana manus suspecta visitat arte etc.

Vbi conf. subiectas laudati MVRATORII *Notas.*

Vnde recte quaerit BALLONIVS, *Lib. II. Epidem. p. 175. Au, quod optima Medicina sit, non uti Medicina?* conf. et pag. 182. item REINESII *Var. Lect. Lib. III. cap. 9. pag. 482.* et HENR. AB HEER, *Obs. med. rar. XXIII. pag. 272.* vbi illud laudat, ceu Liuianum: *Summum quandoque esse Medicamentum, nullo uti Medicamento.* Habet enim, habet profecto Medicina suos, et quidem perquam arctos saepius atque exiguos fines, quos omni licet adhibita vi et contentione acerrima, transili-

re haud licet. Hos scire inprimis decet probum Medicum, ne potentius malum impotentiori arte temere adgrediatur, remediaque infanabilibus adhibere frustra conetur, sicque miserrimum aegrotum inani et infructuosa Medicina excruciet, aut in maius discrimen medendo, coniciat: quod tum potissimum metuendum, *ubi potentius iam Malum apparet, quam ut minores per magistratus sedari possit*, ut LIVII huc verba applicare liceat *). Saepius enim nulla adhibenda sunt medicamina, quod usque adeo Naturae beneficio, aegroti conualescant, aut longius Vitam extrahant, ut eis nocitura sit cura, ut fere loquitur VEGETIVS §). Quare TROPHILVS, Medicus, quondam interrogatus, quis perfectissimus esset Medicus? sapientissime per Deum! respondisse fertur: ^{h)} ὁ τὰ δύνατὰ καὶ τὰ μὴ δύνατὰ δυνάμενος διαγινώσκειν, qui scilicet probe dignoscere valeret ea, quae per artem fieri possent, et non possent: Quod et ipse noster HIPPOCRATES ⁱ⁾ passim grauitur monet, qui omnium optime, longo rerum usu et diuino iudicio adiutus, cognouit, quousque Medicinae fines pertingerent, uti ex ipsius scriptis, immensae sane frugis plenissimis, vberius patet. Quo et potissimum pertinet HIPPOCRATIS illius rediuiui, summi inquam BOERHAAVII, Amici quondam et fautoris nostri aeternum colendi, grauissimum testimonium, dignissimum profecto, quod et hic, et alibi, saepius legatur ^{k)}: Sed neque magis suos laudat ipsa Matheſis artifices, qui extricant, quod fieri per rerum naturam, potest; quam illum, qui certa ratione probat impossibilitatem rei propositae. Ipsum hinc etiam HIPPOCRATEM, qui Mathematicarum disciplinarum ubique laudatur studiosissimus, sua quoque in arte, similia professum legimus. Ille enim, dum sapienter super officio Medici commentatur, haud minus inclarescere peritiam medicantis asserit, quando impossibilem prorsus curatu morbum fuisse, re demonstrat ipsa, quam ubi, curatione in sanitatem producta, malum arte superabile sustulit. Modum enim uero habet, certosque agnoscit fines, quibus definitur sua cuique arti potestas, quos ultra nil valet. Haec-

nus

f) Lib. xxv, cap. 1.

g) Art. Veterinar. Lib. iv. cap. 7.

h) apud STOBÆVM, sermon. C. pag. 557.

i) v. g. Lib. de Arte, pag. 8. sqq. de Vet. Med. in praenot. pag. 447. init. et alibi, in-

primis, Lib. de Articulis. pag. 822. et Lib. i. de Morb. pag. 7. Conf. DIETERICI latr. Hippocr. pag. 240.

k) In atrocis rarissimique Morbi Historia altera, mox ab initio.

nus ille. Haud igitur, opinor, ab re plane erit, hic aliquot tantum exemplis, ex innumeris fere, selectis, Medicorum iuniorum potissimum in gratiam, demonstrare, *Nullam Medicinam interdum optimam esse*. Faxit summum Numen feliciter! Ceterum ad hoc nostrum Argumentum hic a nobis tractandum apprime quoque faciunt GEDEONIS HARVEI Tractatus satyricus notissimus, *de Arte curandi Morbos, Expectatione*, cum vtilissimo STAHLII commentario, 1730. item similis argumenti *Dissertatio* B. nostri VATERI, Collegae quondam coniunctissimi, *de Curatione Morborum quae peragitur Expectatione*, Witteberg. 1746. et denique nouissime FRID. LUDOVIC. CAROLI SCHMIDT *Dissertatio, de Morbis Expectationem in medendo desiderantibus*, Goetting. 1759. Praefertim vero huc conferri diligenterque legi meretur DOMINICI RAYMOND *Traité des Maladies, qu'il est dangereux de guerir*, Avignon 1757. item WEDELII *Exercitat. Med. philol. v. Decad. ix. de Expectatione Medica*, pag. 34. sqq.

§. I. Sic igitur in *Morbis*, per successiones quasdam quasi traditis, vt eleganter iunior ait PLINIVS, et tristi onerosaque veluti haereditate acceptis, v. g. Epilepsia, Podagra, Arthritide, Calculo, Phthisi aliisque *nullam Medicinam optimam plerumque esse*, ecquis quaeso est, qui negare ausit? Laterem enim et aethiopem incassum lauabit, qui omnem massam sanguineam, omnes humores, omnes fibras nervosque, immo totum quasi hominem invertere et denuo veluti creare conatus fuerit. Id quod recte solideque pluribus probavit BRVNO SEIDELIVS, integro Libro de *Morbis incurabilibus*, qui totus huc ad nostrum quidem argumentum spectat, vt et b. nostri RIVINI doctissima *Dissertat. de Morbis haereditariis*, quae est xxxv. in ipsius *Dissertat. med. Sylloge*, vbi plurima huius rei exempla miranda et notatu dignissima passim occurrunt. Namque, vt SENECA¹⁾ sapienter monet, *Naturam quidem mutare difficile est, nec licet semel mixta nascentium Elementa conuertere: Nunquam enim reciduntur plane vitia corporis, quae nobiscum creuerant.* Νῆσοι γὰρ ἀνθρώποις συγγενῆς καὶ ζῦντροφοί, ζυνεφεβέυσαι, ζυγκαταγενέσθαι, καὶ ζυναποθνήσκειν αὐτοῖς, *Morbi enim hominibus congeniti et connutriti, una cum illis*

1) Lib. 11, de Ira, cap. 20. et cap. 18.

illis pubescunt, consenescent, et tandem commoriantur, ut saepius elegantissime loquitur HIPPOCRATES, uti nuper admodum fufius ostendimus ^{m)}.

§. II. Par est ratio in *Naevis* sic dictis *maternis*, inprimis extantioribus et partibus musculosis et nervosis altius impressis, quos nullo fere modo eluere, aut eradicare licet: quin potius semper paene deteriores fiunt medendo, et nulla lima nullaue politura exteri possunt, ut mille propemodum exemplis probari hic facile posset, quae in variis solertiorum medicorum observationibus, ubiuis, legentibus occurrunt, veluti apud SEPTALIVM, SCHOOCKIVM, FINELLAM, GIANNINIVM, SCHENKIVM, HELLWIGIVM, BONETVM, THOMAM FIENVM et alios plures ⁿ⁾.

§. III. In *Rhachitide* ipsa, communi fere illa misellorum infantum peste, Medicinam operosam plus saepe nocere, quam iuuare, notius profecto est, quam ut hic vberius doceri debeat: Serius enim ad sanitatem perueniunt illi, qui nimis Medicamentis vexantur, quam, qui nullis, et sibi ac Naturae relinquuntur, prout multis argumentis atque exemplis egregie ostenderunt Medicorum praestantissimi, GLISSONIVS, MAYOW, SYDENHAM, BOERHAAVE, et nouissime, senior HAHNIVS, celebris ille per Silesiam, φίλνδρος καὶ φιλόλατρός, in *Cyrtonoso*.

§. IV. *Varii oculorum Morbi*, variaeque Ophthalmiae, lippitudines et suffusiones, item, ubi pupillam crassior iam nubes superducta texit, et Gutta praesertim serena sic dicta, frustra plerumque et cum periculo, adnota Medicina inprimis externa, impugnantur, quum aegerime expugnari queant, uti notissimum: Quare perquam bene in hunc quidem modum scripsit olim SENECA ^{o)}: *Nec Oculos tumentes tentabimus,*

m) In *Programmate* nempe nostro, de *Gibbo ex Nephritide potius, quam ex Phrenitide, orto*, adiecto dissertationi Med. Inaugurali Stentzelianae de *HIPPOCRATIS studio anatomico singulari*.

n) Conf. Cel. ALBERTI Dissertat. de *Morbis Noli me tangere*, haud ita pridem Halae publicata, quae generatim tota huc spectat: praesertim vid. SCHROECKII

Additament. ad HELLWIGII Obs. Med. xxxv. pag. 126. sqq. Item BARTHOLINI *Act. Med. Hafn. Vol. III. Obs. 83. p. 152.* et STALPART VAN DER WIEL, *Obs. Med. xxxvi. Cent. poster. Part. I. p. 384. sqq.* Conf. si placet, *poem. nostr. Tom. IV. pag. 28. sqq. in Not.*

o) *Lib. III. de Ira, Cap. 39.*

mus, vim rigentem mouendo, incitaturi: nec cetera Vitia, dum feruent: quod ipsum, quod ad sensum spectat, scite sic expressit THEANO PYTHAGORICA, in Epistola lectu dignissima, ad NICOSTRATAM P): Τῆς νόσου τῶν ὀφθαλμῶν ἀπέχειν δεῖ τὰς χεῖρας: Ab oculorum Morbo manus importunae sunt cohibendae. Oculi enim, bene monente CELSO, Praefat. Lib. VII. a Medicis diu vexati, sine his, interdum sanescunt. Conf. BAL-
LONII Lib. I. Epidemior. pag. 63. et Lib. II. pag. 262. item SEPTA-
LII Caut. Med. Lib. VI. pag. 173. atque ibidem plenius, RHODII Ana-
lecta, pag. 297. sqq. vbi plures simul Auctores hanc in rem, laudantur.
Quibus add. DOMIN. PANAROLI Obs. med. 9. Pentecost. IV. pag. 229.
et imprimis RIEDLINI Lin. Med. de Ann. 1699. Obs. 12. pag. 146. sqq.
vt et SALMVTHI Obs. med. 9. Cent. III. pag. 116.

§. V. Sic ante aliquot annos miseram vidimus feruam, cui oculo-
rum inflammatione vehementissima laboranti, a temerario nimis chirurgo
quodam in auxilium aduocato, frigida collyria et adstringentia epithe-
mata crebro applicata fuerant: Vnde ipse oculi bulbus, horresco refe-
rens, in lapideum quasi scirrhum adeo vsque induruerat, vt ipse oculus
pugno fere maior, ad horrorem formidinemque visentium, rigidus at-
que immobilis, per plura simul loca, foedissime fissus, extaret: Quo de-
nique factum, vt ipse neruus opticus, vna cum ipso cerebro, adeo affli-
geretur, vt insultus epileptici et atrocissimae capitis collique conquafla-
tiones, artuumque tremores, et dirae tandem totius corporis contorsio-
nes, nullis prorsus remediis superabiles, subsequerentur, donec demum
miserrima illa famula inter terribiles clamores ac furores, animam tot
S 2 malis.

p) In Opusculis Mythologicis physic. et
ethicis, a THOMA GALE editis, pag. 746.
add. DIONIS CHRYSOSTOMI Orat. XVII.
pag. 247. vbi similis extat sententia, de
Oculis aegris medelae impatientioribus.
Quorsum et spectat illud, PLAVTI in
Persa, Act. I. Scen. I. Sed quasi lippo oculo
me herus meus manum abstinere haud quit
tamen, item in Bacchid. Act. IV. Scen. 8.
Lippi illic oculi seruus est simillimus, si est,
abstinere quin attingas, non queas. Bene
quoque monuit in hunc ipsum sensum,
CAELIVS AVRELIVS, Lib. III.

de Morb. acut. cap. 18. pag. 249. Lippien-
tes manuum contactum affectare frequentant
Vnde et natum notum istud Graecorum
Adagium: Ὅπου τις ἀλγεῖ, κείσε καὶ τὴν χεῖρ'
ἔχει, vbi quis dolet, ibidem et manum habet,
vel breuius: vbi dolor, ibi manus: de quo
plura vid. apud ERASMVVM ROT. Adag. 44.
Cent. I. Chil. II. pag. 446. sq. item BAIERI
Adag. Med. LXXXII. pag. 169. et alios pa-
roemiographos. Sed haec hac quidem oc-
casione, obiter, et amoenae tantum va-
rietatis gratia.

malis faevis fessam laboriöse exprimeret, vt alia exempla plura olim a me obseruata, iam breuitatis studio, omittam.

§. VI. In *Auditus* quoque *Vitiis*, inprimis a nerui acustici, aut membranae tympani nimia relaxatione, aut etiam tensione, aliaue causa intus latente, obortis, item in absconditis auris interioris inflammationibus, et fordidis praesertim vlceribus, emanare solitis, optimam pariter saepius esse medicinam nullam externam, abunde compertum est. Per nimias enim liquidorum et oleosorum praesertim, remediorum iniectiones, oriculariosque Clysteres, vt CELSVS ait, seu Ottenchyas, meatum auditorium magis obstrui, fordibus oppleri, et inde ex furdastris, furdos prorsus demum fieri, vt alia pericula atrocia exinde vtique metuenda, iam taceam, alii pridem obseruarunt, et nosmet ipsi haud semel vidimus, praecipue vero in virgine quadam nobili, quae nimium medicando et infundendo, auditum sic tandem penitus perdidit. Conf. huc SCHNEIDERI nostratis *Tract. de Osse cribriformi*, pag. 484. et alibi. Quare fots potius oriculares, quam infusiones, prudenter hic commendauit GALENVS, et ex illo, ALEXANDER TRALLIANVS^{q)}. Conf. HIPPOCR. *Lib. VII. Epidem. pag. 857.* et BALLON. *Lib. II. Epidemior. pag. 270.* et in *paradigmat. Tom. III. pag. 320.* item SEPTALII *Caution. Med. Lib. VI. pag. 174. sqq.* ibique copiosius, RHODII *Analecta, pag. 305. sqq.* vbi plures simul auctores in nostram sententiam proni, diligenter allegantur. Add. THOM. BARTHOLINI *Hist. anat. 77. Cent. VI.* et RIEDLINI *Cur. Med. 237. Centur. III. pag. 139.* item *Lin. med. de ann. 1700. pag. 1255.*

§. VII. *Erysipelas* porro, vulgare et leue illud malum, vt quidem nonnullis, periculi haud satis gnaris, perperam videtur, cautissime etiam tractari debet; ne externa inprimis humida et refrigerante medela retro pellatur: vnde saepius gangraenam et sphacelum, delirium, suffocationem, epilepsiam, apoplexiam, immo mortem adeo ipsam nonnunquam successisse, ex fidis Medicorum monumentis constat^{r)}. Hinc CEL-

SVS

q) *Lib. III. Cap. 2. pag. 175. sqq.* Add. ZACVT. LVSITANI *Hist. Med. LXI. Lib. I.*

r) Vid. FRID. HOFFMANNI *Medi-*

cin. Rat. Systemat. Tom. III. Sect. I. Cap. 8. pag. 187. quod Caput totum huc spectat. Agit enim de *damnis ex cuticulari Excretionē cohibita*, vbi varia notatu digna exempla. Vid.

SVS^s), ORIBASIVS^t), veterumque alii vix audiendi sunt, qui refrigerantia et reprimentia hic imponenda suadent, ne ipsa quidem aqua gelida exclusa, consilio certe, quantum equidem intelligam, nec satis tuto nec satis prudenti.

§. VIII. Ita vidimus olim in Aula Nassauica centurionem quendam, qui ex Erysipelate, per humida acriaque cataplasmata et epithemata, male tractato, et in feralem gangraenam sphacelumque paene ipsum conuerso, in atrocissimum malum, cum summo vitae discrimine coniunctum, quondam inciderat, adeo, vt ipsum tandem tibiae os crudeli tabe exesum, sensim excideret, et ipsius loco, quod iure mirandum, benigniore naturae sua damna solerter reparantis munere, crassissimus callus succresceret, vt iste sic ex insperato seruatus, pede, licet aliquantum debili, tamen per omnem vitam, ceu altero, adhuc sano atque integro, commode uti potuerit. De qua memorabili historia proxime, oblata opportuna occasione, disertius aliquanto atque distinctius tractare animus est, allatis ibi simul paribus prodigiosis fere casibus, internati, post elapsam tibiam, crassioris calli, ex BARTHOLINI *Aët. Med. Hafn. Vol. III. Obs. I.* et STALPART. van der WIEL, *Obs. Med. 96. Cent. I. pag. 391. sqq.* aliisque pluribus. Ceterum similia fere Erysipelatis sic male curati et in tetram gangraenam mutati, exempla deploranda, a se olim obseruata, candide retulerunt HILDANVS^u), et SCHELHAMMERVS^v).

§. IX. *Guttam* itidem *Rosaceam*, (tam venusto floridoque nomine vix dignam) crudelem illam formarum elegantiorum vastatricem, item et impetigines, lentigines, seu lenticulas, lichenes, varos, et ephelidas, ceteraque vitia, quae faciem decoram maculant, vt SERENVS ait SAMO-

S 3

NICVS

Vid. et Tom. IV. Sect. I. Cap. 13. p. 309. sqq. Add. SIMON. PAVLLI *Quadripart. Botan. Class. III. pag. 214.* praesertim vero p. 488. et GABELCHOVERI *Cent. III. Curat. Med. XII. et XIII.* item IO. LANGII *Epist. Med. XXXII. Lib. I. de falsa Erysipelatis Curatione*, et SAPORTAE *Lib. II. de Tumor. praeter Nat. Cap. 4.* Add. imprimis HAGENDORN. *Obs. med. 38. Cent. I. pag. 66.* et RIEDLINI *Lin. Med. de ann. 1700. pag. 7. sqq. et pag. 278. sqq.*

s) *Lib. V. Cap. 26. n. 33.*

t) *De Morb. Curat. Lib. III. Cap. 47.*

u) *Cent. I. Obseru. et Curat. Chirurg. 82. pag. 225.*

v) *Lib. de Natura, Part. II. Cap. 7. p. 302.* Add. B. RIVINI *Diff. de Morbo retrogrado, pag. 742.* *Sylog. Dissert. Med. vbi plura exempla ex variis Medicis collecta, quibus add. laudatos modo a nobis Auctores, et DOMINICVM RAYMONDVM, iam supra citatum.*

NICVS, externae imprimis medelae intempestive admotae, vim impetumque ferre non posse, tristi passim experientia vberime confirmatum legitur. Vid. huc imprimis RIEDLINI *Lin. Med. de ann.* 1698. pag. 623. *sqq.* et *Cur. Med.* 166. *Cent.* II. pag. 67. item et *Lin. Med. de ann.* 1700. *obs.* 22. pag. 1444. quibus exemplis sequens praesertim perquam memorabile iure addendum.

§. X. Nouem iam praeter propter anni elapsi sunt, quum nobilissima quaedam et natalibus, et ingenio, et fausto denique connubio foemina, formae conseruandae suique cultus curae iusto forsan studiosior, faciem rubris maculis crebrisque ac subitis tumoribus passim deturpatam aqua quadam cosmetica albida, forte ex Mercurio sublimato, aut arsenico ipso parata, a balneatore quodam ipsi ingenti pretio vendita, quotidie aliquoties lauaret; sed tam funesto eheu! cum euentu, ut faciem quidem nitidam recuperaret; subito vero dulcissimum ante omnia, oculorum usum amitteret, simulque atrocissimis capitis doloribus, sine ulla intermissione, faeuientibus, infestaretur, donec inter dirissimas convulsiones et miserrimos cruciatus et eiulatus, frustra quidem conuocatis medicis, ut attentissimo consilio, ambiguae salutis remedia, at nimis fero, circumspicerent, in ipso viridis aetatis flore, ita festinantibus fatis, extingueretur matrona illa, omnibus, dum vixit, ob virtutes, amabilis, et, cum excessit, desiderabilis, nobisque ipsis perquam flebilis. Plura vero similia eiusdem moesti euentus exempla collecta exhibet HIERONYMVS MERCVRIALIS^{x)}, et ex eo PLATNERVS^{y)}, nec non RIVINVS, praeceptor quondam noster venerandus^{z)}.

§. XI. In *Scabie* quoque, foedo illo mortalium malo, idem fere obseruare saepius licet, dum scilicet per intempestiuam Medicinam, subito versus interiora pulsa, diras admodum Tragoedias excitare solet. Hinc optime iam olim monuit VEGETIVS^{a)}: *Nascenti Scabiei Medicamentis non oportet occurrere, ne praecclusa cute, in visceribus residens,*
con-

x) *Lib. de Decorat. Cap. XII. pag. 18.*
add. IAN. NIC. ERYTHRAEI *Exempl. Virt. et Vit.* 172. pag. 326.

y) *Programm. de Pallore, per aduersam Valetudinem quaesito, pag. 8.* Conf. *Programma nostrum de Remediis Veterum Cos-*

meticis, eorumque Noxis, Witteberg. 1757. pag. 10. sqq.

z) *In Dissertat. de Morbo Retrogrado, quae tota huc spectat, pag. 741. Syllog. Diff. Med.*

a) *De Arte Veterinar. Lib. III. cap. 71.*

couertatur in morbum: quae ipsa ex *Hippiatricis graecis*, vt plura alia, transfumit; ita enim ibi ABSYRTVS et HIEROCLES^{b)}: εἰ ψώρα ἐπιγίγνοιτο, εἰ δὲ παραχρῆμα αὐτὴν θεραπεύειν, ἀλλὰ εἶσαι, μέχρις ἂν ἔξω τραπῇ πᾶσα. κ. τ. λ.

§. XII. Innumera autem fere mala immedicabilia ab incautius retro acta, per externa potissimum remedia, scabie, subito subnata fuisse, in diligentiorum Medicorum Obseruationibus fide dignis, vbiuis adnotatum legitur. Ita ipse HIPPOCRATES noster^{c)}, Viri cuiusdam meminit Atheniensis, qui teterrima et pertinacissima scabie per totum corpus obsitus, post intempestiuum Thermarum Meliarum vsum, tandem in letalem incidit hydropem. Caecicatem, febrem, et demum mortiferam Epilepsiam eiusmodi peruersae scabiei medicationi succedaneam fuisse, obseruauit SENNERTVS noster^{d)}, et ex eo BAGLIVVS^{e)}, item TRINCAVELLIUS^{f)}, RIEDLINVS^{g)}, HILDANVS^{h)}, et ex illis RIVINVSⁱ⁾, atque HOFFMANNVS^{k)}, qui plura imprimis habet huiusmodi funestae curationis exempla. Paralyfin inde obortam fuisse, adnotauit HOECHSTETERVS^{l)}, summam vero spirandi difficultatem, vna cum insigni oris amarore, sine febre, BINNINGERVS^{m)}, vehementissimam vertiginem et grauissimam totius corporis lassitudinem,

b) *Lib. II. Cap. 69. pag. 187.*

c) *Lib. V. de Morb. Epidem. pag. 769. Tom. I. Opp. LIND. Conf. BALLONII Lib. I. Epidem. pag. 47. et ANTON. COE-LESTIN. COCCHII Epistol. physico med. cap. 4. pag. 44.*

d) *Prax. Med. Part. III. Sect. II. c. 44. vbi plura, qua huc faciunt.*

e) *Lib. II. Prax. Med. pag. 228.*

f) *De Rat. Cur. part. corp. human. affect. Lib. II. Cap. 6.*

g) *Lin. Med. Ann. 1696. pag. 205. item Ann. 1695. pag. 126. Ann. 1697. pag. 459. Ann. 1698. pag. 1008. Ann. 1699. p. 541. p. 626 sqq. et pag. 1315. sqq. denique Ann. 1700. pag. 25. sqq. et pag. 1094. in quibus locis omnibus vbique tristitia scabiei retro pulsae exempla.*

h) *Cent. III. Obsf. Chirurg. x. p. 56.*

i) *Diff. saepius laudat. de Morbo retro- grado, pag. 741.*

k) *Med. Rat. Systemat. Tom. III. Sect. I. Cap. 8. pag. 182. Quem et imprimis vid. Tom. I. Opp. pag. 336. sqq. Tom. III. p. 29. et pag. 428. et Tom. IV. pag. 47. vbi complures diui luctuosique effectus scabiei intempestiue retro actae diserte enarrantur: vt et apud HAGENDORN. Obsf. med. 9. Cent. I. pag. 17. et Obsf. 92. pag. 133. item COCCHIVM, Epist. med. modo citat. pag. 41. sqq. et rursus laudati iam RIEDLINI Obsf. med. 38. de Ann. 1682. pag. 85. praesertim in Ephem. Nat. Cur. Dec. II. A. VIII. Obsf. 116. et Cent. VIII. Obsf. 32. et Cent. IX. Obsf. 9. et passim alibi; sunt enim istae tristes obseruationes vbique longe frequentissimae.*

l) *Decad. VIII. Obsf. Med. pag. 245.*

m) *Cent. V. Obsf. et Curat. Med. 38. p. 602.*

nem, GABELCHOVERVSⁿ⁾, sensuum stuporem, mentis alienationem, post Cachexiam, inde Hemiplegiam, et tandem mortem ipsam hinc insequutam fuisse, exemplo perquam flebili monstravit amicus quondam noster suauissimus, nunc eheu! desiderabilis, B. SCHVLZIVS^{o)}, letalem denique apoplexiam, vt finem tandem faciam, exinde successisse, memoriae prodiderunt MOEBIVS^{p)}, item Auctores MISCELL. NATVRAE CVRIOS.^{q)} BONETVS, BARTHOLINVS, FORESTVS, AMATVS LVSITANVS, et alii plures. Cum primis vero tota huc pertinet LVD. CHRIST. IVNCKERI, *Dissertatio de Damno, ex scabie repulsa, et Remedio illud euertente, Halae, 1750.* vbi complura, quae huc spectant, lugubria eiusmodi exempla, memoratu dignissima, coniunctim habentur.

§. XIII. Sic, vt nos quoque ipsi, consueto more, symbolum nostram huc conferamus, vidimus olim venustam et opulentam Virginem, filiam vnicam, quae, vt nuptiis familiaris sibi puellae interesset, et mundatum nitidaque appareret, quum foeda ipsam scabies antea nonnihil inquinasset, suae salutis puellariter nimis incuriosa, ex peruerso vnguento cuiusdam sulphurati, aut Mercurialis vsu, primum in grauissimas animi defectiones, mox autem in atrocissimas totius corporis conuulsiones incideret, quae nec per apposita grandia vesicantia, nec per largam venae sectionem, nec per valentiora enemata, nec per acriores phoenigmos ac dropacismos, nec vlla denique alia artis praesidia, quantumuis potentissima, compesci ac subigi poterant, donec breui post, mors ipsa dira raperet misellam illam puellam, vitae sic suae iuuenilis nimis prodigam. Verum aliquanto felicius haud ita pridem, imminens vitae periculum euasit puella nobis domestica, quae scabie pariter foedata, diuturnioris autem securiorisque curationis iusto impatientior, per futes quasdam vetulas, sagasque male sagaces, turpiter inducta, me prorsus inscio, clanculum quoque vnguento quodam antipforico mercuriali sese incaute inunxerat, vnde ipsa scabie resiccata ac retro pulsa, statim insequuta varia symptomata dirissima, scilicet saeuissima perpetuaque cephalalgia, rubor

n) Centur. II. Obs. Med. 42. pag. 61.

o) In diff. de Casibus aliquot notabilibus Aegrotorum mente alienatorum, aut peruersorum, Cas. I. pag. 5.

p) Institut. Med. p. 65. et ex eo HOFFMANNVS, l. c. pag. 182.

q) Dec. I. Ann. I. Obs. 58.

bor tumorque totius faciei, oculi exstantes, turbidi, sanguineisque striis hinc inde suffusi, asthma anhelum, vomitus continuus, omnium ciborum nausea et reiectio, aestus, cum siti arida, perpetuus, delirium per intervalla, noctes prorsus insomnes et vigiliae continuae, aliaque mala gravissima, ita, ut de tristissimo euentu merito metueremus. Ego vero veram huius tam subitae catastrophes causam sensim odoratus, precibus tandem minisque infelicem illam puellam de salute sua nunc fero nimis anxiam, eo adeg, ut culpam poenitens fateretur, et in lacrymas soluta, deprecaretur. Quo facto, protinus bina praegrandia vesicatoria utrique furae applicandae censui, idque tam salutare cum effectu, ut quasi ex apertis fontibus, serum acre foetidumque per complures dies noctesque, vberima copia, emanaret. Vnde, additis nonnullis remediis internis salutaribus, omnia illa deterrima symptomata sensim sopita remiserunt, sicque demum, Dei beneficio, e mediis veluti orci faucibus erepta fuit imprudens illa puella, moesto exitio iamiam deuota.

§. XIV. Pariter, ante hos decem fere nunc annos, iuuenis me accessit mercator, auxilium meum frustra eheu! imploraturus, qui eodem pruriginoso cutis asperatae malo nonnihil foedatus, morae impatientior, ad eiusmodi vnguenta damnosa ac feralia confugit, spe vana inflatus, quod per illa, ad citam salutem contendere posset: sed tam lugubri cum euentu, ut protinus tantam vocis raucedinem contraheret, ut ne verbum quidem clarum ac sonorum effari valeret. Sequebantur illico asthma pectoris siccum, respiratio fracta et impedita, languidum ciborum omnium fastidium, tussis ferina, per noctes prorsus insomnes, inprimis molesta, sudores nocturni copiosi, olidi et colliquescentes, tandemque post tot malorum coniunctorum cateruam, ineuitabile fatum, quum nondum annum aetatis vicesimum quartum expleuisset mercator ille, sic, suo quasi aere, mortem suam improuide mercatus.

§. XV. Quo et pertinent frequentia illa, sed salutaria plerumque tenellorum puerorum mala sordida, scilicet *achores*, *tinea*, *fauis*, seu *ceria*, *melicerides*, et alia id genus acris et impuri humoris abundantis recrementa, quae nimirum per externa remedia refrigerantia et exsiccantia, subito intempestiue repressa et intro pulsa, atrocissimos morbos, veluti ophthalmiam, ipsam caecitatem, coenosa aurium inflammatarum vlcera,

T

edaces

edaces faucium linguaeque aphthas, tussim violentam, lentam tabem, catarrhum suffocabilem, saeuum delirium, febres omnis generis pertinacissimas, epilepsiam dirissimam, conuulsiones distortissimas, apoplexiam perniciosissimam, surditatem repentinam, foeda serpentiaque narium labiorumue vlcera, aliaque plura mala, et mortem denique ipsam frequentissime pepererunt, prout id multis funestis exemplis lectu dignis potius, quam iucundis, e variis scriptoribus medicis opportune petitis, affatim probarunt Viri non sine laude et honoris praefatione, nominandi, RIVINVS^{r)}, HOFFMANNVS^{s)}, atque demum STAHLIVS^{t)}. Quibus praesertim addatur HAGENDORNIVS, *Observat. med.* 8. Cent. I. pag. 15. *sqq.* et quem ibi simul laudat, FRANKVS, *Ephem. German. Ann. v. Dec. 11. Obs.* 224. Periculosam febrem achoribus intempestiue exsiccatis subito successisse, obseruauit RIEDLINVS *Curar. med.* 879. Cent. IX. pag. 612. cuius et vid. *Lin. Med. de Ann.* 1700. pag. 1256. vbi simul adnotauit, pertinacem auditus difficultatem a superuenientibus naturae beneficio, opportune achoribus, feliciter tandem penitus sublatam ac curatam fuisse. Alia vero atrociora mala subitam achorum exsiccationem protinus insequuta, enarrat SPINDLERVS, *Obs. Med.* XXIII. pag. 41. *sq.* vbi inprimis vid. *Scholium.*

§. XVI. Teterrimam quoque illam narium delicatiorum pestem, trucem nimirum *alarum olidarum caprum*, et immundum praesertim *pedum prurientium sudorem*, sit venia dicto et honos auribus! per externa remedia refrigerantia, adstringentia et exsiccantia, protinus repressum ac cohibitum, eadem plerumque lacrimabiles traegoedias concitare, pariter prudenter adnotatum fuit a diuersis medicis diligentioribus. Vid. huc inprimis DOMINI PANAROLI *Obseru. med.* 16. *pentecost.* III. pag. 147. et VIT. RIEDLINI *Lin. med. de ann.* 1700. *Obs.* 22. pag. 1443. *sqq.* Memorabile inprimis huius rei exemplum, loco paene alieno, et vix ibi obseruabili, retulit SIMON PAVLLI^{u)}, de Sororio suo, qui

r) In *Diff.* saepius laudat. de *Morbo Retrogrado*, pag. 741.

s) *Medicin. Rat. Systemat.* Tom. III. *Seç.* I. *Cap.* 8. pag. 181.

t) In *Collegio Casuali* sic dicto *minore*, *Cas.* LXIX. pag. 335.

u) In *Quadripartit. Botanic. Class.* III. p. 196. voce *Anagallis*: quis vero ibi quaerit istam practicam *Obseruationem* notatu certe dignissimam? Ceterum conf. PAVLLI *Obs. Med.* 39. Cent. I. et *poem. nostr.* T. IV. pag. 35. in *Notis*, vbi plura exempla.

qui ex simili foetido pedum madore, per limaturam ferri frequentius magna copia inspersam et ingestam, e praepostero male seduli chirurgi consilio, mox in anxiam molestamque cordis palpitationem, postea in atrocem et nodosam podagram, et lapidosam denique arthritidem incidit, qua ruptis cum summo dolore, digitorum condylis, materia gypsea, lenta, alba, in spiras, aliamue formam contortilis, quotidie affatim egerbatur, donec inter atrocissimos illos dolores, vitae male viuae pertae-
sus, mortem tandem exoptatam inueniret, ceu vnicum miseriarum suarum ineluctabilem portum: quam singularem historiam ex eodem repetiit, cum prudentissima epicrifi, HOFFMANNVS v).

§. XVII. Simile fere lamentabile exemplum quondam ipsi vidimus, Francofurti ad Moenum, in nobili quodam aulae imperatoriae scriba, iuvene negotiorum publicorum supra aetatem, peritissimo, atque hinc meliore fato dignissimo, qui, quum sordidum eiusmodi pedum olentium sudorem, propter quotidianum cum ipsa aula, commercium, ferre diutius non posset, remedia staltica et styptica externa, in sua damna, petiit a chirurgo quodam temerario, et sui potius lucelli, quam alienae salutis, studioso: vnde pariter mox subsequebatur rauca ac suspiriosa vox, asthma siccum, cum tussi arida rebelli, totius corporis ossea quasi macies, noctes exsomnes et turbulentae, molestissimae, tractuosi olidique sudores, insignem artuum omnium languorem post se relinquentes, intolerabilis capitis, praesertim autem ceruicis, grauitas, obtusus sensuum stupor, atque inde omnium rerum menti olim impressarum, aut caliginosa obliuio, aut confusa et obscura recordatio, manuum tremores, crurumque vacillationes, et alia tristissima mala. Licet igitur, quam solertissima cura, perpetim adhibita, per balnea, fots, scarificationes, frictiones, dropacismos, vesicantia, immo et denique fonticulos ipsos, repressus iste fatalis sudor, perquam arduo labore, tandem in pedes auspicato reduceretur: nihil quidquam tamen dira ista symptomata remittebant; quin potius vno eodemque modo, prae fracte semper decurrebant: quoniam nempe acris illa madoris materia, semel subito percussa, altius iam impacta haerebat pulmonibus vitiatis, quam vt vlla humana ope, aut arte, in pedes desertos reuocari denuo

T 2

potuisset:

potuisset: non licet enim, acute monente SENECA^{x)}, *latentem morbum, et in medio iam sedentem, ad extrema reuocare*. Ceterum, similem in modum, ex suppressio intempestive pedum sudore, insequutam illico fuisse pertinacem vocis corruptae raucedinem, vertiginem, et ipsam denique ophthalmiam, obseruauit BONETVS, cum aliis. Saepius autem ipsam diram Epilepsiam exinde obortam fuisse, adnotauit nouissime CL. DOMINICVS RAYMOND, in Tractatu suo gallico doctissimo, *de Morbis, quorum curatio summo cum periculo suscipitur, Avignon. 1757*. vbi et plura alia, quae ad hoc nostrae Dissertationis Argumentum generatim spectant, occurrunt, lectu non minus digna, quam iucuuda, vt iam supra a nobis, suo loco, opportune monitum fuit.

§. XVIII. Ecquis vero potissimum, quaeso, nescit pestilentissimum illud et inexpugnabile prorsus *cancris edacis teterrimi virus*, quod nec vllis medicamentis internis, quantumuis generosissimis, facile obtemperat, nec potentissima omnium totius naturae et artis instrumenta, vrentes inquam, flammis et strictos ferri mucrones trepide reformidat; sed potius, ad omnem paene tactum, acrius excandescit, saeuius insurgit, et admotis ignibus atque ferramentis, effrenatius rebellat? Quare verissimum semper fuit, semperque erit, heu! piget fateri, tristissimum istud CORNELII CELSI nostri^{y)} effatum, a quotidiana quippe experientia satis superque vbique confirmatum: *Carcinomata curationibus irritantur, et quo maior vis adhibita est, eo magis: Quidam ferro adusserunt: quidam scalpello exciderunt: neque vlla unquam medicina profuit; sed adusta protinus concitata sunt, et increuerunt, donec occiderent. Excisa, etiam post inductam cicatricem, tamen reuerterunt, et causam mortis attulerunt*. Quis ergo, quis, obsecro, nunc temere negauerit, nullam medicinam in carcinomatibus actandis, solam, solam, inquam, esse optimam? Qua propter omnibus illis mortalium miserrimis, qui vel vana prorsus spe immedicabilis istius mali vincendi, frustra illecti, vel a splendide mendacibus salutis restituendae promissoribus infeliciter inducti, medicinam in sua certissima damna, ac festinantia fata, applicari sibi passi sunt, commode aptari illud potest, quod in veteri lapide Romano exaratum legitur^{z)}:

x) Epist. xcvi.

y) Lib. v. Cap. 28.

z) Vid. GVIL. FLEETWOOD In.

Irrita
script. Antiquar. Sylloge, pag. 523. Conf.
similem fere locum ex ST. PAVLLINI
Natal. XII, iam supra obseruatum.

*Irrita letiferos auxit medicina dolores,
Crevit et humana morbus ab arte meus.*

Sed quoniam de hoc ipso argumento moestissimo, haud ita pridem, data opera, egimus, eiusque inconcussam veritatem exemplis fere innumeris, cum ex aliena, tum propria quoque experientia, depromptis, solide, opinor, corroborauimus^{a)}; ideo fufius ibi dicta, ob metuenda inde lectorum fastidia, iam hic repetere nolumus.

§. XIX. Sed idem fere obseruandum est de *Scirrhis*, praesertim longiore temporis tractu, in duritiem insuperabilem iam coactis. Isti enim remediis emollientibus, resoluentibus et discutientibus nimium tractati ac vexati, nec mitescunt, nec loco semel occupato cedunt: sed medelis admotis acrius exasperati, quasi vitiosi parentes, plerumque daturi sunt progeniem longe vitiosiore, diros nempe cancos et truculenta carcinomata, nulla plane humana ope et solertia subigenda aut extirpanda, ceu paullo ante paucis, vberius vero alibi, demonstratum est. Quorsum et *strumae*, seu *choerades*, imprimis pertinent, quae vel praecipue fatigare Medicos solent, quoniam nec febres mouent, (sic enim legendum videtur, pro et,) nec unquam facile maturescunt; et, si ferro, siue medicamentis curantur, plerumque iterum iuxta cicatrices ipsas, exsurgunt; multoque post medicamenta, saepius, vt vere eleganterque scribit CORN. CELSUS, *Lib. v. cap. 28, 7. add. GALEN. Lib. i. de Loc. affect. cap. 6. p. 396. Tom. VII. PAVLL. AEGINET. Lib. iv. cap. 53. ACTVAR. Lib. ii. de Cognit. affect. cap. 37. ORIBAS. Synopsis. VII, 29. aliosque plures, iam olim a nobis laudatos, in Obs. crit. Lib. ii. cap. 22. pag. 135. sqq. vbi hac ipsa de re, plura. Hinc et hic, omnium rectius sentientium Medicorum vnanimi suffragio, nulla Medicina optima esse solet, prout e contrario, innumera fere calamitosa docent exempla, in Obseruationum Medicarum Auctoribus passim obuia.*

§. XX. De *Morbis* etiam *articularibus* contumacioribus, speciatim autem acerbissimo illo pedum distortorum tormento, *podagra* nempe,

T 3

praesertim

a) In *Dissertat. nostra, de nociua Cancri inueterati exstirpatione nouis Exemplis demonstrata, Wittebergae, 1752.* quam supra meritum, nuperrime vehementer laudauit laudatissimus Medicorum et Anatomicorum, illustr. MORGAGNVS, in opere praestan-

tissimo, *de Sedibus et causis Morborum, per Anatomen indagatis, Tom. II. Lib. iv. Epist. 50. pag. 270. vbi et plura, quae huc potissimum spectant, de pertinaci Cancri natura, et curatione difficillima ac fallacissima, scitu sane ac notatu dignissima.*

praesertim inueterata, verissimum adhuc est in hunc usque diem, istud vel pueris notum, *Ovidianum*:

Tollere nodosam nescit Medicina podagram.

cui geminum plane illud GRATII FALISCI, in *Cynegetico*:

Aut incuratae siqua est tutela Podagrae.

Hinc et ipse HIPPOCRATES noster^{b)} morosi illud et pertinacis morbi genus summo iure ita describit: Ποδάγρα βιαιτότατον μὲν τοιούτων πάντων, ὁκίσα περὶ τὰ ἄρθρα, καὶ πολυχρονιώτατον καὶ δυσάπαλλακτότατον, Podagra violentior est omnibus eiusmodi circa articulos morbis, per longissimum tempus durans et difficillime cedens morbus. Alibi vero^{c)}, ipsam suae artis impotentiam in expugnanda Podagra, apertius, more suo candido, fatetur: Γέροντες ποδαγριῶνες, καὶ περὶ τοῖσιν ἄρθροισιν ἐπιπρωῶματα ἔχοντες, ἔτοι πάντες ἀδύνατοι ὑγιέες γίνεσθαι ἀνθρώπινη τέχνη, ὅσον ἐγὼ οἶδα, Senes podagrici, et circa ipsos articulos, callos tofaceos concretos iam habentes, hi omnes sani fieri non possunt humana arte, quantum ego ipse noui. Quo et praesertim spectat viua illa spiransque dirae podagrae pictura, apud CASSIODORVM, Lib. x. *Variar. sect. 29. pag. 668.* Haec passio insanabilis, et sanitas passibilis, ligat solutos, contrahit nervos, et decrescere facit corpora, quae nulla sunt mutilatione truncata. Constantibus membris proceritatis mensura perit, et minor cernitur, cui nihil subductum esse sentitur. Haec viua mors supra omnia tormenta, sana dicitur. Deserit quidem dolor; sed dimittit reliquias fortiores, et nouo infelicitatis exemplo, passio videtur abscedere, et aeger non desinit aegrotare etc. vbi vid. si lubet, reliqua, bene multa. Inde et Podagra, ceu dea omnium potentissima et inuictissima, a facetissimo LVCIANO^{d)}, in scenam producta, inter alias plures magnificas nimis et gloriosas ostentationes et iactationes, quae ibi per otium, cum voluptate, legi possunt, sese vocat ἀνίκητον δεσπότην πόνων, ἢν ἔτε Παιὰν φαρμάκοις νικᾷν σθένει, ἔτε πολυμαθὴς Αἰσκληπιδὸς, Insuperabilem plane morborum Reginam, quam nec ipse PAEAN, nec doctissimus AESCVLAPIVS medicamentis vincere possit, et interiectis multis aliis, tandem ita finit:

Γιγνωσκέτο

b) De Affect. pag. 180. Tom. II. Opp. per LINDEN.

c) Praedict. Lib. II. pag. 498. Tom. I.

d) In Tragopodogra, Tom. II. Opp. pag.

805. sqq. item in Ocyro, ibidem, p. 824. sqq. Conf. BYNKERSHOEK Obsf. Iuris Rom. Lib. III. Cap. I. pag. 214. et FELTMANN, de Dea podagra, Cap. XX. pag. 107. sqq.

Γινωσκέτο δὲ πᾶς τις, ὡς μὲν Θεῶν
 Ἀ' τεγκλος ἔσα φαρμάκοις ἔ πείδομαι.
*At norit unus quisque, me solam omnium
 Illacrimabilem et immedicabilem deam.*

§. XXI. Tradunt quidem ARISTOTELES^{e)}, et ex eo IULIUS POLLEX^{f)}, item ALEXANDER TRALLIANVS^{g)}, DEMETRIUS PEPAGOMENVS^{h)} vt et ex parte CELSVSⁱ⁾, CAELIVS AVRELIANVS^{k)} veterumque alii plures, nullam paene podagram esse insanabilem; inde et ipse PLINIVS^{l)} haud veretur ita scribere: *Insanabilis non est credendus Podagrae morbus, quippe quoniam et in multis sponte desit, et in pluribus, cura.* De quo remedio antipodagrigo certo ac securo, aliquando, feliciore aeuo, adhuc inueniendo, nec ipse dubitat SYDENHAM, a podagra ipsa faeuissime per vitam excruciatu, *Tract. de Podagra*, in fine: quamuis ibi simul ingenue fateatur, illud quidem desideratissimum Remedium specificum in profundo DEMOCRITI puteo adhuc altius demersum latere, atque in abdito Naturae sinu reconditum occultari, adeo, vt ipse inde dubitet, nesciatque, quando, et a quibus, illud tandem, laetioribus auspiciis, in commoda publica, protrahatur: quod et nos optamus magis, quam speramus. Quale tamen re ipsa habuisse dicitur magnus ille diuesque chemicus, IO. BAPTISTA BARTOLVS, de quo mirandam podagrae pertinacissimae, a se perfecte persanatae, historiam, facunde, vt solet, enarrat elegantissimus ille IANVS NICIVS ERYTHRAEVS, *Pinacothec. II. pag. 75.* Quorum splendida auctoritate inductus, idem, recentiore aeuo, affirmare sustinuit Vir eleganter doctus, GERHARD. FELTMANNVS^{m)}, ipse tamen tandem in se ipso fallaciam artis expertus, et vana vincendi mali inexpugnabilis spe misere delusus. Sed, siue deteriores nunc facti sint homines, quam olim fuerint; siue Medicina ipsa iam inefficacior depre-

e) *Lib. VIII. Hist. Animal. Cap. 22.*

cum eruditis Notis, *Lugd. Bat. 1743.* denuo edito.

f) *Onomastic. Lib. v. Cap. 8. pag. 505.*

i) *Lib. IV. Cap. 24.*

Tom. I. vbi vid. variorum Notas. conf. TITII Obss. ad GRATII FALISCI *Cyneget.* pag. 291. Edit. BURM.

k) *Lib. v. de Morb. Chron. Cap. 2.*

g) *Lib. XI. Cap. I. pag. 598. sqq.*

l) *Lib. XXVI. Cap. 10.*

h) *Lib. de Podagra*, a celeb. nobisque amicissimo Viro, IO. STEPH. BERNARDO,

m) In lepido et lectu iucundo *Libro, de Dea Podagra*, Capp. XXIII. et XXXII. etc. vbi plura, quae huc spectant.

deprehendatur, quam priscis fuerit temporibus; hodie certe vix vllum inuenitur remedium, quantum mihi quidem constat, quod certam salutem in hoc conclamato morbo abigendo et superando, spondeat, et faevissimum hunc pedum tyrannum perfecte expugnet, quidquid etiam pauperculi opulentorum arcanorum antipodagricorum possessores, et certissimorum auxiliorum promissores magnifice mendaces temere iactent, dum, ut illae fatidicae et mirifica Gallicenae, apud MELAMⁿ), sanare audent, quae apud alios, insanabilia sunt: quorum amplum catalogum pertexuerunt LINDENIVS, MERCKLINVS, atque alii: quos inter forsan et referendus nouissime fuerit iste DALE INGRAM, chirurgus Britannus^o), qui podagram per balnea et fonticulos, eluere, atque per cauteria, exurere studuit; frustra omnino, si quid rectius iudicem, et inani opera: neque enim podagricis, ut sic loquar,

sub gurgite vasto

Infectum eluitur scelus, aut exuritur igni.

§. XXII. Melius ergo ac sapientius e contrario, in hunc sensum scripsit olim SENECA^p): *Non perueni ad sanitatem, ne perueniam quidem: delinimenta magis, quam remedia, Podagrae meae compono, contentus, si rarius accedit, et si minus verminatur.* Quod locum inprimis habet in Podagra illa deplorata, quae, ut CAELIVS AVRELIANVS^q), eleganter ait, *genuino cursu in posteros migrat cum semine, et propterea succedentes inuadit.* Quod ipsum multiplici experientia probe edoctus, grauissima sua auctoritate, praeter ipsum HIPPOCRATEM, iam supra laudatum, inumerosque alios, confirmat ARETAEVS noster^r): *ἢν δὲ ἐκ πολλῶν μὲν ἤδη χρόνων ἔη ἡ ποδάγρα, ἀτὰρ καὶ ἐκ διαδέξις πατέρων φανῇ, ξυναποθνήσκει ἡ νόσος.* Quod si a multis iam annis, inueterauit, vel a maioribus, per successionem, descendit podagra; tunc aegrotum ad mortem usque comitatur. Sic ille verissime.

§. XXIII.

n) De situ Orbis, Lib. III. Cap. 6.

o) Cuius extat An Essay, on the cause, and Seat of the Gout, h. e. Exercitatio, de Causa et Sede Podagrae, de qua vid. ACT. ERVDIT. de Anno 1746. Mens. Septembr. pag. 502. sqq.

p) Lib. de Vita Beata, Cap. xviii. add. SEREN. SAMMON. Carm. de Podagra depellenda, pag. 25. vbi vid. ROBERT. KEVCHEN. in Notis, pag. 249. sqq.

q) Lib. v. de Morb. Chron. Cap. 2. p. 558.

r) Lib. I. de Cur. Morb. diuturn. Cap. 12.

§. XXIII. *Nullam ergo medicinam hic optimam esse, iam per se, putem, liquet: Ferendum igitur potius taedium ex morbi mora: quam maiora semper pericula ex nimia medelae properantia, immineant. Nec enim infusis, nec affusis medicaminibus, excutitur podagra, vinci quasi indocilis; quin potius intempestiua medicina nimium vexata, vehementius exasperatur, et violenter retro acta, ipsa corporis interiora, ut ventriculum, mesenterium cum intestinis, lienem, hepar, pulmones, cor, immo et cerebrum ipsum insidiosè odoritur, unde faeva illa pestis visceribus et intimis medullis concepta, non solum atrociores morbos, sed et repentinas adeo mortes progenerat, nulla quidem humana arte facile auertendas. Quod ipsum innumeris propemodum funestis exemplis, apud diligentes observationum medicarum scriptores, ubique obviis, abunde confirmari hic posset, nisi temporis, spatii, institutique nostri ratio potissimum esset habenda. Haud tamen illud tacite praetereundum censemus exemplum singulare, a SIMONE PAVLI^{s)} relatum, de Pastore quodam sacro, qui ab argilla lotio subacta, pedibus ex podagra laborantibus incaute imposita, mox in dyspnoeam, cordis palpitationem atque animi defectionem incidit, ex his vero in epilepsiam, et ex hac denique, in lethalem apoplexiam. Cui geminum plane istud de altero pastore, a RIVINO^{t)} commemoratum, qui pari fatali successu, a spiritu vini, pedibus dolentibus intempestive applicato, hemiplegia aliquoties tactus, vitam tandem miserrime finiuit. Vbi et plures allegantur auctores, qui similia exempla exitialia frequentius obseruauerunt: Conf. HOFFMANNVS^{u)}, BRVNO SEIDELIVS^{x)}, BONE-TVSY,) SCHENCKIVS et alii multi, inprimis HAGENDORNIVS, *Obs. med.* 28. *Cent.* I. *pag.* 50. PLATERVS, *Obs. med. Lib.* I. *pag.* 15. RIEDLINVS, *Lin. Med. de ann.* 1695. *pag.* 418. *sqq.* item ETTMÜLLERVS, *Prax. med. Lib.* II. *pag.* 364. De infelici vero ipsius Arthritidis curatione, per externa potissimum remedia frigida et humida, vid. eiusdem*

s) *Quadripartit. Botan. Class.* III. *p.* 197.

v) *Lib. de Morbis incurabil.* *pag.* 83.

t) *Differt. de Morbo Retrogrado*, *p.* 743.

sqq.

Syllog. *Differt. Med.*

x) *Med. Septent. Part.* II. *Lib.* VI. *Sect.* 3.

u) *Medic. Rat. Systemat. Tom.* III. *Sect.* I. *Cap.* 8. *pag.* 191.

Obs. 40. *p.* 268. et *Lib.* VII. *Obs.* 15. *p.* 574. et alibi.

eiufdem RIEDLINI *Cur. med.* 29. *Cent.* 1. *pag.* 15. et *Cur. med.* 659. *Cent.* VII. *pag.* 410. item *Lin. med. de ann.* 1699. *pag.* 1298. vt et de *ann.* 1700. *pag.* 1442. vt alia plura nunc fileam.

§. XXIV. Quibus vnicum tantum hic subiungere liceat exemplum perquam memorabile, licet longe plura fuppetant in Aduerfariis noſtris, viri cuiufdam literatiſſimi, nobiſque, dum viueret, amiciffimi, qui, quum per complures annos, a dira podagra, per temporum interualla ac ſpiramenta, incredibiles cruciatus et indigniſſima tormenta pateretur, cetera tamen ſanus ac vegetus; tandem morbi et morae iuſto impatientior, remedia ſibi varia vndecunque quam ſtudioſiſſime conquiſiuit, ſpecioſa quidem verbis, re tamen ipſa inania, aut ſubdola, et magno aere redempta, vt quaſi eo certius prodeſſent pretioſa et charius vendita. Inter quae liquorem praefertim mire laudabat ex Anglia, ſi recte memini, allatum, colore aureum, ſuauique ſapore perquam gratum, quo ſcilicet interior remedii noxa ſub his externis palati decepti blandimentis, eo facilius velaretur, erat enim, mea certe opinione, ex ſomnificis, opiatis ac narcoticis confectus: quem quum ſaeuientibus pedum rubentium doloribus, cochleari menſura, ſubinde ſumeret, mox adeo inſigne et praefentiſſimum veluti leuamen ſentiebat, vt acerrimi morbi impetus, quaſi potentiſſimis carminibus Haemoniis incantati, miteſcerent ac conſopirentur, corpusque ipſum expectatione maturius, priſtinum ſuum vigorem recuperaret, vt nihil vnquam incommodi pertuliſſe putaretur. Praefertim, vbi ſimul pedibus exterius adhibitum eſſet emplaſtrum quoddam antipodagricum refrigerans leniensque, quod diuinum plane et ſupra omnes laudes longiſſime poſitum credebatur. Haec quum per aliquod tempus, cum fauſto quidem, ſed ſubdolo et mox calamitoſo ſucceſſu, ita adhibita frequentius eſſent; licet ego ſemper acriter repugnarem, quod velox iſta medicina mihi iure fallax et infelix videretur, hincque Virum optimum enixiſſime ſubinde rogarem, ne auderet experiri remedium, quod propter nouitatem, poſſet eſſe ſuſpectum, et nimia feſtinatione periculum augeret: Euenit aliquando, poſt repetitum aliquoties iſtius ancipitis remedii uſum, vt, quum ſe aeger lecto mane leuare vellet, omnis quidem pedum ſenſus, uſque ad genua, adeo penitus ſublatus eſſet, vt ipſe Socratis quaſi diram gelidae cicutae ſorbitionem hauſiſſe

hausisse videretur. Aderant vna irriti vomendi conatus, sudores frigidi, praecordiorum anxietates, et respirationes impeditissimae. Concurritur ergo protinus vndique a Medicis, tacito timore mussantibus, frigentia membra mox fricantur, vnguntur, immittuntur balneo ferventi, applicantur tandem vesicantia, cucurbitae, sinapismi, phoenigmi, dropacismi, et omne genus alia remedia validissima, intus et extra: sed omnia, proh dolor! incassum, et bono quidem, sed nihil profuturo conatu, ac meliore voluntate, quam facultate: Cuncta enim, quantumvis efficacissima, remedia anteibat mali ipsius velocitas. Retro acta namque per emplastrum illud admirandum scilicet, podagra, et per liquorem illum anodynum, intimis fibris et visceribus nobilioribus impacta, nullis nunc amplius remediis, etiamsi valentissimis, in externos artus reuocari poterat. Vnde breui post, inter crebros singultus, sonoros stertores, sensuum stupores, animique defectiones, Vir ille doctissimus et longiore vita suo merito dignissimus, saeva morbi intus furentis, vi oppressus, subitaque morte correptus, magno sui desiderio cunctos adfecit mansuetiorum Musarum iustos aestimatores, meque ipsum inter illos potissimum. Similes autem tristissimos casus, ab emplastro praefertim TACHENII, pedibus podagricorum incautius applicato, observavit ac descripsit HAGENDORNIUS, *Obj. med.* 27. *Cent.* III. *pag.* 316. item a pulvere quodam arcano antipodagrigo Empirici cuiusdam chemici, HOFFMANNUS, *Med. rat. system.* Tom. II. *part.* II. *cap.* 8. *pag.* 292. vbi intempestivum illius fatalis pulveris usum internum eadem ferre letifera symptomata insequuta fuisse, relatum legitur; qualia hic post usum illius liquoris anodyni, et emplastri paregorici, oborta demum, cum ipsius aegroti interitu, fuisse, exacte commemoravimus. Cui non dissimilis funestus ille casus, a FELTMANNO commemoratus, *de Dea podagra, cap.* 34. *pag.* 198. de amico quodam, qui ab eiusmodi nociuis remediis antipodagricis, a peregrino empirico sibi commendatis, podagra quidem caruit; sed paullo post, ipso sanae rationis usu; succedente mox totius corporis tabe, et tandem morte ipsa. FELTMANNUS vero ipse, accepto ab eodem agyrta, vnguento quodam myrrhato, a podagra quidem aliquamdiu immunis fuit; sed grauissimam contra vertiginem per integrum semestre, molestissime pertulit, ceu refert ipse, ibidem

dem *cap. 24. pag. 134. et 131.* Est ergo, ut ex hisce liquidissime patet, optime monente CAELIO AVRELIANO ^{y)}, *Passio podagrica non facilis curatione, et aliquando magnitudine insanabilis.* Sed longius profecto, lento quasi gressu, nos secum abduxit tardigrada podagra: Ideo iam tanto celerius properemus ad alia, si lubet quidem, et parciores simus, in sequentibus paucis, adhuc dicendis.

§. XXV. *Haemorrhoides* tam caecae, quam apertae ac fluentes, item sic dicta Condylomata, Rhagadia, Exochadia et id genus alia obsecnarum extremi ventris partium tubercula, taedii plena, cautissime quoque semper tractanda sunt, ne medicina peior sit ipso malo, et grauiora periculis sint remedia, quoniam, si inueterauerunt haec mala, non sine magna mole insignique discrimine, discutiuntur. Caecae enim Haemorrhoides et Condylomata remediis acrioribus, septicis, rodentibus, reprimentibus, causticis, aut admoto etiam stridulo cauterere, subita vi discussa ac sedata, saepissime in ulcera maligna, fordida, callosa, depascentia et serpentia, immo demum, in sinuosas fistulas, et ipsa adeo carcinomata teterrima abire consueuerunt, vix vlla amplius arte sanabilia: vid. huc in primis LOSSII *Obs. med. Lib. 27. Lib. III. p. 235. quae enim, recte indicante SENECA* ^{z)}, *in malum ulcus veterauerunt, difficilius, immo, difficillime, inquam ego, curantur.*

§. XXVI. Nimius autem Haemorrhoidum fluxus medicamentis adstringentibus et repellentibus subito violenter repressus, dirissimos et tantum non mortiferos morbos saepius progenerare solet: unde sapienter dudum monuit CORNELIVS noster CELSVS ^{a)}: *In quibusdam parum tuto supprimitur istud vitium, qui sanguinis profluvio imbecilliores non sunt: habent enim purgationem hanc, non morbum. Ideoque curati quidam, quum sanguis exitum non haberet, inclinata in praecordia ac viscera, materia, subitis*

y) *Lib. v. de Morbis Chronicis, Cap. 2. pag. 560.* Vide singulare huius rei exemplum apud PHILOSTRATVM, *Lib. 1. de Vitis Sophistarum, Sect. xxv, II. pag. 543.* ubi de miserandi POLEMONIS Sophistae Latomiis artuum, Medicis prorsus inexpugnabilibus, tristis narratur Historia. Conf. huc in primis SVIDAS, in POLEMONE; item IO. PRICAEI *Not. ad APVLEII Lib. v. Me-*

ramorphos. pag. 262. et poem. nostr. Tom. IV. pag. 35. in Not.

z) *Consolat. ad Marciam, Cap. I.*

a) *Lib. VI. Cap. 18, 9. Conf. huc HOFFMANNI Opp. Med. Tom. I. pag. 174. ut et ALOYSII MVNDELLAE Annotat. in ANTON. MVSÆ BRASAVOLAE simpl. Med. Examen, pag. 200 seqq.*

Subitis et grauib. morbis correpti sunt. Quapropter HIPPOCRATE^{b)}, AEGINETA^{c)}, GALENO^{d)}, ACTVARIO^{e)}, AVICENNA^{f)}, aliisque prudentissime suadentibus, at solo fere frustra contra nitente AETIO^{g)}, in supprimendis Haemorrhoidibus, eo semper caute respici debet, vt consuetae purgationis gratia, vna illarum nunquam non aperta maneat. Quod si enim omnes semel simulque obstruantur, metuendum est omnino, ne hydrops, aut tabes, aliaque grauiora mala, HIPPOCRATI, ARETAE^o aliisque diligenter commemorata, veluti vertigo, cachexia, asthma, suffocatio, mictio cruenta, sanguinis sputum et vomitus, anorexia, aphonia, tormina ventris, podagra, malum hypochondriacum, paralyfis, nephritis, apoplexia, scirrhi, ani exulcerationes et fistulae, pleuritis, peripneumonia, phagedaena, furunculi, lepra, vitiliginis, aliaque tubercula, herpes, epilepsia, delirium, immo mania ipsa, et id genus alia plura atrocissima symptomata, exinde suboriantur, de quibus vid. LOSSII *Obs. med.* 26. *Lib. III. pag.* 234. *sqq.* item RIEDLINI *Obs. med.* 25. *pag.* 53. *de Ann.* 1682. aliosque plures. Sic enim verissime ipse noster HIPPOCRATES, laudato modo Aphorismo, pronunciauit: Αἱμορροΐδας ἰηθέντι χρόνίᾳ, ἢν μὴ μία φυλαχθῇ, κίνδυνος, ὕδρωπα ἐπιγενέσθαι ἢ φθίσιν, *Ex Haemorrhoidibus diuturnis sanato, si non una venarum sanguinem fundentium aperta fuerit seruata, periculum est, Hydropem aut tabem succedere:* siue, vt elegantius, pro more, latine id reddidit CELSVS, latinus ille HIPPOCRATES^{h)}, *Si ora venarum, sanguinem solita fundere, subito suppressa sunt, aut aqua inter cutem, aut tabes sequitur.* Cuius oraculi Hippocratici solidam veritatem tristissimo suo exemplo, quondam abunde confirmauit imperatorum omnium optimus, et meliore hinc fato iure dignissimus, TRAIANVS, qui, narrante EDIONE CASSIO, XIPHILINO *) ἐπισχεθέντος αὐτῷ τῷ αἵματος, ὃ κατ' ἔτος, κάτω

V 3

die-

b) *Aphorif.* 12. *Sect.* VI. et *Lib. de Victu Acutor.* pag. 322. *Tom.* II. *opp.*

c) *Lib.* III. *Cap.* 59.

d) *Comment.* in dictum HIPPOCR. *Aph.* 12. *Sect.* VI. *pag.* 254. *Tom.* IX. *opp.* et alibi, *Cap.* nempe 9. *Lib. de Venae Sect. contra ERASIST.* et in IV. *de Praesag. ex pulsibus, etc.* item *Comment.* in *Lib.* HIPPOCR. *de*

Humorib. Conf. SEVERIN. *de Abscess.* *Lib.* IV. *Cap.* 30. *pag.* 350. et ZACVT: LV-SITAN. *Hist. Med.* 110. *Lib.* II.

e) *Lib.* I. *de Method. Medend.* *Cap.* 20.

f) *Lib.* III. *Fen.* 17. *Tr.* I. *Cap.* 4. *p.* 653.

g) *Tetrabibl.* IV. *Serm.* II. *Cap.* 5.

h) *Lib.* II. *Cap.* 7. *pag.* 62.

) In *Epitome Histor.* *pag.* 350. nempe ex

διεξώρει, ἐγένετο ἀπόπληκτος, ὥτε καὶ τῷ σώματός τι παρῆναι, τὸ δὲ ὅλον ὑδρωπίασε, a represso subito sanguine, qui quotannis ipsi per inferiora secedebat, in apoplexiam incidit, adeo, ut pars quaedam corporis inde resoluta esset; tandem autem in uniuersum hypoplicus factus, periit. Quali etiam mortis genere, ex haemorrhoidibus nempe intenso frigore subito suppressis, oborto, rapidissime postea extinctum fuisse Imper. VALENTINIANVM, tradiderunt quidam apud AMMIANVM MARCELLINVM Lib. XXX. p. 427. scilicet arefactis ideo membris, quod meatus aliqui, quos haemorrhoidas nunc appellamus, obserati sunt gelidis frigoribus con crustati. Ita nempe ipse AMMIANVS, ubi tamen doctissimus cetera VALESIVS in Notis elegantissimis pag. 408. sq. frustra omnino dubitare videtur de ipsis haemorrhoidibus sensu quidem vulgari et communi vsu recepto, hic sumendis: de quo certe mihi nullum plane relinquitur dubium. Licet alias probe sciam, non vnā eandemque de ipso morbi mortisque genere ipsius VALENTINIANI causam ac rationem traditam fuisse ab AVREL. VICTOR. EVTROP. HIERONYMO, SOTOMEN. et aliis, de quibus vid. VALES. loc. cit. SALMAS. ad IVL. CAPITOL. M. ANTON. PHIL. pag. 346. T. I. Hist. August. et ANNA FABRI, et praesertim IS. CASAVB. ad AVREL. VICT. Epitom. cap. XVI. pag. 92. et cap. XLV. pag. 156. ut et alia iam omittam.

§. XXVII. Hinc igitur nullum quoque nobis est dubium, quin monstruosum illud et horrendum plane steatoma Haemorrhoidibus, etsi blandissime suppressis, funestam suam originem debuerit, quod post acerbissima fata, repertum fuit cum ingenti adstantium visentiumque stupore, in utroque Thoracis thalamo, illustris quondam *Marchionis de Saint-Auban*, vel *Sancto Albano*, tanta quidem magnitudine ac pondere, ut, compressis et coarctatis vndique pulmonibus, non solum omnem respirationis usum prorsus interceperit; sed et praegrandi sua mole, septem enim fere Libras pendebat, naturalem nobiliorum pectoris viscerum

ex DIONIS. CASSII *Histor. Rom. Lib. LXVIII. pag. 1147. Tom. II. Edit. FABRIC. et REIMAR. V. V. C. C.* Alio vero Morbi Mortisque genere extinctum fuisse Traianum, narrat EVTROPIVS, AVRELIVS VICTOR, EVSEBIVS, HIERONYMVS, OROSIUS, et alii: sed cum DIONE CASSIO et

XIPHILINO, maximam quidem partem, consentit ZONARAS, cum aliis nonnullis. Verum de his dicendi et disceptandi hic iam non est locus. Sicut nec de ipsius VALENTINIANI Mortis genere, ut iam paucis monuimus,

rum situm adeo vsque peruerterit, vt, quod omnem paene veritatis fidem excedit, turbato rerum ordine, totum diaphragma deorsum pressum esset, intra abdominis cauum, atque mediastinum, item pericardium, cum suis vasis sanguiferis, et corde adeo ipso, horresco referens, detrusum versus inferiora, haereret infra ipsius vmbilici altitudinem. Quam atrocis rarissimique morbi historiam nobis nitidissime descripsit, siue vividissime potius depinxit, Vir et arte, et facundia iuxta, insignis, semperque cum cura dicendus, HERMANNVS BOERHAAVEⁱ⁾; qui, ceu oculatus testis, omni exceptione maior, haec ipsa dira prodigia non solum perspicacissimis suis oculis vidit; sed ipsa quoque admota peritissima sua manu, ipsum defuncti cadauer dissecauit. Ceterum binas similes prolapsi versus inferiora cordis historias mirandas, imo stupendas plane, obseruauit descripsitque perquam accurate cel. ANTON. PACCHIONVS, in *Epist. phys. anat. pag. 209. sqq. et pag. 214.* De his vero miserrimis, quibus cor ita delapsum fuerat, commode satis proprieque dici potest notissimum illud Homericum: *παρὰ ποδὶ κάππεσε θυμός*, item *καρδίᾳ*, vel *γνώμῃ*; *Animus*, siue *Cor*, *decidit in pedes*, de quo vid. ERASMI *Adag. MENAGIAN. Tom. III. pag. 124. et Obss. crit. nostras cap. 28. Lib. IV. pag. 501.* Sed haec obiter, et amoenae tantum varietatis gratia.

§. XXVIII. Sic etiam Haemorrhoides incautius repressae impetum aliquando fecerunt in ministri cuiusdam sacri nasum, ibique tantum subito excitarunt tumorem carneum, vt non solum ipsius nasi forma demersa, quasi euanesceret; sed et ipsum adeo os mentumque sub ista tuberosa mole propendula, foedissimo spectaculo, penitus occultatum lateret: donec, ex iusto suffocationis minacis metu, informis illa atque peregrina massa, vltimo omnium remedio, nempe ferro, feliciter excinderetur. De qua perquam memorabili Historia, singularis extat Cl. ALBERTI *Dissertatio*^{k)} vna cum figura aenea teterrimi illius et tuberosissimi

i) In *Atrocis rarissimique Morbi Historia altera*, Lugd. Bat. 1728. et deinde saepius alibi recusa, vt omnino merebatur Vbi et simul de ipso infelicissimi huius Marchionis patre narratur, ipsum, extirpatis prius vrendo secandoque, haemorrhoidibus molestissimis, per annum quidem satis bene valuisse; postea vero per duos menses,

spirandi difficultate laborasse; deinde autem in enormes sanguinis vomitus incidisse, qui post decem dies, ipsum tandem peremerint. Quae memorabilis oppido Historia ad hoc nostrum argumentum apprimè facit, vt nemo non statim animaduertit.

k) De *Excrescentia Nasi, cum Haemorrhoidum Anomaliis connexa*, Halae 1729.

rosissimi Nasi, omnium certe Nasorum Aui et Patriarchae, vt sic iocando loqui liceat, quae licet mortua spirituque carens, sua tamen insigni prorsus foeditate horridum profecto terrorem incutit cunctis viuentibus videntibusque. Vbi et plura simul id genus alia funesta exempla sedulo ex Auctoribus collecta, leguntur, vt et in aliis variis eiusdem, de eodem Argumento, scriptis ^{l)}, quorum scilicet hoc nostrum, quod viuatur, saeculum feracissimum est, vt cuius notum: quibus vtique addendi, HILDANVS ^{m)}, FORESTVS ⁿ⁾, SCHENCKIUS ^{o)}, RIEDLINVS ^{p)}, PARAEVS ^{q)}, ALPHONSVS DE SANTACRUCE ^{r)}, DIETERICHIVS ^{s)}, et quos ibi allegat, Auctores plures, PROSPER ALPINVS ^{t)}, HOLLERIVS ^{u)}, et tandem, vt finem faciam, nec alios plures mihi bene notos, laudem, B. RIVINVS ^{x)}, et quos ibidem citauit Scriptores medicos. Quo et singulare illud spectat exemplum luctuosum, ipsi magno nostro HOFFMANNO ^{y)}, quondam cum stupore, visum, de quodam Viro perquam generoso, qui ex haemorrhoidibus, per Remedia opiata et martialia, intempestiue repressis et cohibitis, protinus vocis ac rationis vsum amisit, et paulo post inter diras conuulsiones, vitam ipsam. Vbi post mortem, sectione instituta, stupen-

l) Nempe in Dissertationibus diuersis, ibidem publicatis, de Haemorrhoidum Anomaliis, de Haemorrhoidum insolitis Viis, de Haemorrhoidum suppressionibus, et id genus aliis Scriptis Academicis: Vt vastos illos spatiososque nimium de eodem immundo et iniucundo Argumento, commentarios in vulgus editos iam taceam.

m) Cent. II. Obsf. XI. et LXXV. Conf. BONETI Med. Septent. Part. I. Lib. III. Sect. II. Cap. I. pag. 569.

n) Lib. XXIII. Obsf. 5. 6. sqq. cum Scholiis doctissimis, ibidem. Conf. SOLENANDER. Sect. IV. Consil. Med. XX. et exinde VERZASCHA, Obsf. Med. 29. Cent. I. pag. 90. item RIVERIVS, Lib. X. Prax. Med. Cap. 10. pag. 275.

o) Obsf. Med. 158. 159. sqq. Lib. III. Tom. I. pag. 639, sqq.

p) Lin. Med. Ann. 1696. pag. 133.

q) Opp. Chirurg. Lib. XII. Cap. 24. p. 393.

r) De Dignot. et Cura Affectuum melancholicorum, pag. 29.

s) In latreo Hippocratico, p. 141. sqq.

t) Lib. I. de praesagienda Vita et Morte, Cap. XI. pag. 53.

u) Comment. in Aphor. HIPPOCR. 12. Sect. VI. pag. 337. sqq.

x) In Dissertat. de Morbo retrogrado, pag. 745.

y) Med. Rat. System. Tom. III. Sect. I. Cap. 9. pag. 208. vbi plura egregia, quae huc inprimis spectant. Cuius et vid. Med. Consult. Cent. II. et III. Cas. XIV. p. 181. Tom. IV. Opp. vbi quoque tristissimum huius suppressionis haemorrhoidum intempestivae exemplum enarratur, vt iam STAHLIVM, ALBERTVM, IVNCKERVM, STORCHIVM, aliosque scriptores taceam, qui vasta spissaque de ipsis haemorrhoidibus, Volumina certatim ediderunt, ceu notissimum, et iam supra notatum.

stupentibus cunctis praesentibus, apparuit, non modo intestinum re-
ctum, sed et totum coli tractum in sinistro latere, ita constrictum fuisse,
vt digiti crassitiem vix superaret: alia vt taceam funesta signa, quae ibi
legi commode possunt. Isto autem aliquanto felicior fuit *Alcippus* ille
apud HIPPOCRATEM nostrum^{z)}, qui pariter, ex suppressis praepro-
pere haemorrhoidibus, in atrocissimum quidem furorem delapsus, mox
a superueniente febris acuta salutaris ac critica, ad mentis corporisque
iuxta sanitatem auspicio reuersus est. Tanto autem infelicior contra
fuit alter ille *Eudemus Larissaeus*, apud eundem^{a)}, cui ex perfunctis pa-
riter ab infausta manu, haemorrhoidibus, teter edaxque cancer illico
subnascebatur, vna cum febre vehementissima, quae ante non desuit,
quam vitam inale viuam miserrimo eripuisset. In his ergo cunctis,
omnium rectius sentientium Medicorum vnanimi suffragio, *nulla Medi-
cina omnino erat optima*. Sed nolo de re cuius, puto, notissima et ex-
ploratissima, plura nunc incassum huc congerere exempla ac testimo-
nia: Quare haec iam de Haemorrhoidibus, sufficiant.

§. XXIX. Ex eadem vero ratione, nec tutum semper est, nec salutare
ipsas quoque sordidas *ani fistulas*, praesertim inueteratas, et in corpore
potissimum senili et effoeto, vel acuto ferro excindere, vel candenti
lamina exurere, vel aliis denique remediis repellentibus, adstringentibus,
aut exsiccantibus, perfunctis ac consolidare. *Veteres enim*, bene monente
PARAEO^{b)} et quae per multos annos fluxerunt, fistulae, si subito occludan-
tur, mortem inferunt, in corpore praesertim senili et infirmo. A cuius vera
omnino sententia haud alienus est SCVLTETVS^{c)}, multo minus au-
tem FORESTVS^{d)}, qui singulari potius exemplo ostendit, quam atro-
cia symptomata illico insequuta sint fistulam eiusmodi suppressam, et
quam salutaria e contrario signa confestim apparuerint, eadem denuo
reclusa:

z) Lib. IV. de Morb. Epidem. pag. 766.
Tom. I. Opp. per LINDEN.

a) Lib. V. de Morbis Epidemicis, p. 775.
Tom. I. Opp.

b) Opp. Chirurgicor. Lib. XII. Cap. 21.
pag. 391.

c) Armament. Chirurg. Part. I. Tab. XLV.
pag. 179.

d) Obs. Med. 14. Lib. XXIII. pag. 493. vbi
vid. et inprimis adiecta Scholia. Add.
RIEDLINI Lin. Med. de Ann. 1696. Obs. 19.
pag. 131. sqq. et HAGENDORNII Obs. med.
Cent. III. Hist. 60. pag. 366. sqq.

reclusa: quod ipsum nouis aliquot exemplis illi prorsus geminis, nostra quidem aetate, vberius confirmarunt STAHLIVS, HOFFMANNVS, STORCHIVS, DRANIVS, GARENGEOTVS, ipse HEISTERVS, et alii. Neque fane id mirum, aut rationi et experientiae contrarium. Sunt enim huiusmodi fistulae canales quasi ac re vera fistulae, per quas omnia totius corporis purgamenta, in vnum veluti alueum ac receptaculum, ibi deriuata et collecta, saluari prouidae ac solertis naturae consilio et beneficio, sensim corpore eliminantur. Quod licet, pro more, breuissime, tamen sapientissime, ita dudum ipse noster pronunciauit HIPPOCRATES^e), ἀλλὰ ἀποσάσεις, οἷον σύριγγες, ἐτέρων ἄκος, alii abscessus, veluti fistulae, aliorum abscessuum ac morborum medelae sunt: quod egregie prorsus et copiose ibi explicuit GALENVS^f). Vnde nunc sua sponte sequitur, illas apertas relictas, et aptis subinde lotionibus ac fomentibus, seu fomentis, frequentius emundatas, ne scilicet neglectae, sordescant, aut computrescant, corpus ipsum a repentino variorum morborum incurfu diutius per vitam, tutum et imune praestare; occlusas contra et obstructas, ob denegatum nempe sordibus illis consuetum liberum exitum, hincque in corpus ipsum, interius subito refluens ac retrogradis, et atrociores morbos, et festinatas mortes saepius inducere. Inde et probe hanc in rem obseruauit scriptor ille personatus, elegantissimus et latinissimus, IAN. NICIVS ERYTHRAEVS *Pinacothec.* III. c. 135. de infelici isto GEORGIO PORTIO: *Ex Fistula, quum fluere ea desisset, tandem interit: qualia moesta exempla quam plurima passim occurrunt alibi, ceu notum. Immo rursus apud laudatum ERYTHRAEVM Pinacothec. I. pag. 224. de IO. MATTH. CARIOPHILO: Quam diu ulcus, coxendici haerens, unde, tanquam e fistula, noxii corporis humores defluabant, ad apertum patuit; tamdiu licuit illi lucis huius usura frui; sed simulac ulcus idem clausum, nullum defluenti puri, ad exeundum, aditum praebuit; statim vitae est illi usus ademptus. Quare, vt ex hactenus dictis manifesto, opinor, liquet, praestat omnino, eiusmodi perpetuam priuatae quasi cloacae seruitutem, quamuis ingratam et nonnihil molestant, patienter tolerare,*

e) *Lib. de Humor. pag. 326. et Lib. VI. Epidem. Sect. III. pag. 806. qui quidem locus ex isto priore, emendari debet.*

f) *In Comment. in Lib. de Humor. Conf.*

huc imprimis MARC. AVREL. SEVERINI, *Lib. IV. de recondita Abscessuum Natura, Cap. 30. pag. 305. sqq. vbi plura, quae huc spectant, lectu digna.*

tolerare, ob speranda inde vitae salutisque commoda; quam eandem impatienter amoliri, ob metuenda exinde inualetudinis et mortis ipsius pericula. *Vidi enim, recte inquit VALESCVS g), aliquos eiusmodi fistulam habentes, quam non multum curabant, et parui faciebant, (idque ex consilio peritorum) per multum tempus viuentes. Immo, multos vidimus, scribit HIERONYMVS FABRICIVS ab AQUAPENDENTE h) qui fistulas habuere circa annum, per XV. aut plures annos, et saluberrime vixerunt. Quin et nobismet ipsis notus quondam fuit Vir illustris et literatissimus, qui ultra viginti annos, illius modi fistulam apertam sustinendo, inoffensa prorsus sanitate, inter arduos et continuos variorum amplissimorum munerum labores, vltimam vegetae senectutis lineam attigit, donec senili demum marcore, dormienti propior, quam morienti, placide solveretur.*

§. XXX. Eodem vero cum illis, fere loco, etiam habenda sunt *ulcera* ista annosa, fordida, humida, pruriginosa, callosa, in pedibus cruribusque maxime enata, *Chironia* vulgo etiam prouerbio, dicta, item *Telephia*, nec non *Luporum* quoque nomine nonnunquam insignita: quae quippe incurata sibi que relictæ, nisi maligna facta fuerint, in corporibus praesertim senilibus, sanitatem saepe diutius praestant integram; intempestiue autem curata ac consolidata, grauissimis morbis iuxta mortibusque ipsis repentinis funestam frequentius praebent originem, quoniam isti errores irreuocabiles circa eiusmodi temerarias curationes commissi, maximis vitae et sanitatis detrimentis plerumque expiantur i). Sunt enim ista ulcera chironia, aequae, ac nonnullae fistulae, superius commemoratae, quaedam veluti conceptacula, seu emissaria, in quae quidquid vitiosi corruptique humoris, corporibus inprimis effoetis et senio iam confectis, inest, in salutarem expurgationem, corriuatum, singulari natu-

X 2

rae

g) Apud FORESTVM, in Schol. ad Obseruat. XIV. Lib. XXIII. pag. 496.

h) Lib. III. Pentateuchi Chirurgici, Cap. XI. ex quo memorabilem istum locum denuo retulit IO. SCHENCKIVS, Obs. Med. CCXXV. Lib. III. Tom. I. pag. 692.

i) Conf. huc SEIDELIVS, de Morb. incurabil. pag. 88. HILDANI Obs. 39. Cent. III. pag. 181. TIMAEI A GULDENKLEE,

Cas. 28. Lib. I. pag. 61. praesertim autem CRATONIS A KRAFTHEIM Epistol. Medicinal. et HEISTERI Institut. Chirurg. Part. I. Lib. V. Cap. I. pag. 327. et Cap. 7. pag. 342. sqq. item RHODII Analecta in SEPTALII Caut. Med. Lib. VIII. pag. 611. sqq. ut et RIVINI Diss. de Morbo retrogrado, pag. 744. quibus add. Auctores mox laudandos.

rae sagacis prouidentia, sensim deponitur, ac tandem, per statas temporum vices, exterminatur. Cuius rei illustre inprimis ac memorabile habemus exemplum in celeberrimo illo THEODORO BEZA, de quo haec refert magnus IOSEPH. SCALIGER, in *Scaligeranis* II. pag. 31. BEZA fuit pulcher valde senex. Erat 86. annorum et 114. dierum. Habebat fontem in pede, qui ipsi Vitam prorogauit. Est genus lupi: habebat a natura, ipse mihi dixit. Quem praesertim locum singularem eximie huc facere, nemo non, opinor, statim videbit. Ceterum miror, hanc ipsam peculiarem SCALIGERI obseruationem silentio praeteriisse diligentissimum PETRUM BAYLIVM, in *Dictionary Hist. Critic.* vbi tamen accuratissime alias et copiosissime de huius THEODORI BEZAE vita tractauit. Sed haec obiter. Hinc solers prudensque medicus intentissimo cauere debet studio, ne salutare eiusmodi fontes, licet sordidos, remediis praepostere admotis, subito arefaciat, ac cum extremo periculo auersi et retropulsi humoris saniosi, plane exstinguat, sicque cum fero ac nihil profuturo pudore, et inani poenitentia, causam repentinae mortis ipse subministret euidentissimam. Nam extrinsecus coepta Medicamenta, optime monente VEGETIO^k), morbum non eximunt; sed ad interiora compellunt, et hac ratione periculum generant. Hinc memor potius sit ille istius effati Ouidiani prudentissimi^l):

*Vlceris id genus est, quod, quum sanabile non sit,
Non contrectari, tutius esse puto.*

§. XXXI. Innumera enim paene mala atrocia et immedicabilia ex male sedula maleque sana vlcenum id genus vetustorum ac pertinacium, sanatione, illico oborta fuisse, vbiuis, exemplis quam plurimis funestis, luculentissime docent docti industriorum medicorum commentarii, e quibus pauca tantum de permultis, eaque insigniora et attentione digniora, iam quidem in medium adferre animus est. Sic diram protinus successisse maniam, in viro, vidit AMATVS LVSTITANVS^m), in puella, FORESTVSⁿ), Epilepsiam et conuulsiones, post HIPPOCRATEM ipsum^o), PECHLINVS^p), zoster, seu zonam, hoc est, teterrimam illam

k) *Lib. I. de Mulomed. Cap. 9.*

l) *Lib. II. ex Ponto, Eleg. 2.*

m) *Curat. 67. Centur. II. vbi hanc in rem, plura.*

n) *Obs. Med. 24. Lib. x. pag. 201. sqq.*

o) *Lib. VII. de Morbis Epidem. pag. 872.*

p) *Obs. Physicomed. 30. Lib. II. pag. 291.*

lam et plerumque letiferam, Erysipelatis speciem LANGIVS ^{q)}, intolerabiles prius capitis dolores, deinde mox tristem ipsius dulcissimi luminis orbitatem, TIMAEVS A GULDENKLEE ^{r)}, faeuam pleuritidem, dyspnoeam et alia grauiora thoracis mala mortifera, post ipsum HIPPOCRATEM, BALLONIVS ^{s)}, et praesertim HILDANVS ^{t)}, qui simul ibidem, cum summa admiratione, obseruauit, materiam istam ab illo misero aegroto, durante isto fatali morbo, ore continuo reiectam, eandem plane odore, colore et externa specie formaque fuisse, qualis antea, ex aperto cruris sinistri vlcere, insigni istius Viri leuamine, emanauerit. Quale dirissimum etiam symptoma, post intempestiuam infelicemque vetusti eiusmodi vlceris cruralis consolidationem, pariter obtigisse narratur ^{u)} LEOPOLDO Quarto, Duci Austriaco, vulgo superbo ac glorioso, item et pingui, aut crasso, dicto, qui vna cum foeda sanie, atro sanguine permixta, patente cruris vlcere alias effluere solita, indignantem animam per os iuxta naresque, ceu totidem noua ostia, teterrimo omnium aspectu, terribili foetore, horresco referens, flebiliter emisit: cuiusmodi saniosum foetidumque saporem, praesertim ieuno adhuc ore, idem ille miserrimus Caecus percepit, cuius supra ex TIMAEO mentio fuit iniecta. Sed forsan ipsi Lectori gratius erit iucundiusque, ipsum illum praestantissimum Annalium scriptorem,

X 3

fide

q) *Epist. Medic.* 32, *Lib.* I. pag. 133.

r) *Cas. medicinal.* 28. *Lib.* I. p. 61.

s) *Lib.* II. *Epidemiorum et Ephemeridum*, pag. 130. Ipse vero ille singularis HIPPOCRATIS locus, quem obiter tantum ibi allegat BALLONIVS, non indicata tamen ipsius sede propria, extat *Lib.* IV. de *Morb. Epidem.* initio, pag. 742. et lectu est dignissimus: Vid. autem alios memorabiles hanc in rem, casus, apud eundem BALLONIVM, ibidem, pag. 209. item pag. 247, p. 248. et p. 249. denique pag. 256. item apud SALMVTH. *Obs. med.* XI. *Cent.* III. pag. 117. et HAGENDORN. *Obs. med.* 64. *Cent.* I. pag. 240. et maxime, *Obs.* 67. *Cent.* III. pag. 368. sq. ibique VOLCKAMER in *Ephem. Germ. Ann.* V. Dec. II. *Obs.* 152. pag. 317. plurima vero tristissima huius

rei exempla inprimis collecta leguntur apud RIEDLINVM, videlicet *Lin. Med. de Ann.* 1695. *Obs.* 10. pag. 238. sq. et de *Ann.* 1696. *Mens. Ian. Obs.* 3. pag. 5. et *Mens. Octobr. Obs.* 8. pag. 483. vt et de *Ann.* 1699. *Obs.* 23. pag. 626. sqq. item *Obs. med.* 77. *Cent.* II. pag. 218. praesertim *Obs.* 38. pag. 84. sqq. de *Ann.* 1682. et denique *Cur. med.* 167. *Cent.* II. p. 97. et inprimis *Cur. med.* 984. *Cent.* X. pag. 698. vt plura iam studio ta- ceam loca similia, passim in scriptis illis Riedlinianis, lectu non inutilibus, et alibi quoque saepius, occurrentia.

t) *Obseruat. Chirurg.* 39. *Centur.* III. pag. 182.

u) a GERARDO DE ROO, in *Annalibus Austriacis*, *Lib.* IV. fol. 163. sqq. Edit. vero *Halens.* pag. 133.

fide facundiaque iuxta insignem, hic loquentem audire. Sic igitur iste: *Habebat Leopoldus in altero crure fistulam, quam vocant, suppurantem, ex vulnere olim arcus dissplosi, nervis illato, quam contumacem admodum, exquisitissimis quibusdam remediis expugnari, fluxumque sisti, omnino volebat. Quancquam vero Medici et Chirurgi, summum in ea curatione, Vitae periculum esse, dicerent; ille tamen extrema remedia adhiberi iussit. Obducto itaque vulnere, sanguis et sanies, quae semel eo deriuari adsueuerat, intercluso meatu, per os ac nares, ea vi ebullit, ut obitum illi, quod Medici praedixerant, ea res maturauerit.* Haecenus ille GERARDVS DE ROO. Qui funestus admodum casus in tam splendida illustrique summi Ducis persona, notatu certe dignissimus, et ad cauendum abstinendumque, quam diligentissime est obseruandus. Denique, ut finem tandem faciam, ADRIANVS narrat SPIGELIVS, apud RHODIVM^{x)}, sese Viennae, quondam vidisse puellam, cui ex male persanato pedis vlcere, letiferum fere sanguinis sputum obortum fuerit, quod et alibi notarunt BONETVS, PLATERVS, alique plures. Ipsum quoque magnum illum Historicum ac Politicum, IOANNEM SLEIDANVM, simili cruris vlcere vetusto, aut arte, aut sua sponte, arefacto ac persanato, subito extinctum fuisse, tradunt nonnulli Biographorum ac Lexicographorum, licet non desint, sat scio, qui ipsam mortis causam tribuant potius consueto illi Cibo Deorum, aut Regum, scil. veneno, aut etiam dirae pestilentiae, tum 1556. Argentorati faeuienti. Sed haec obiter.

§. XXXII. Quibus omnibus nunc subnectere liceat tria tantum exempla recentiora, notatu certe perquam digna, a nobismet ipsis quondam, non sine animi dolore, obseruata. Ante hos ergo septemdecim quasi annos, principem quendam vidimus imperii venerabilem, bello olim strenuum, qui cetera quidem recte valebat, quantum nempe eius admittebat aetas, in senium iam decliuus, nihilque ex occidua illa senectute, sentiebat incommodi, praeter vlcus huiusmodi Chironium, quod per complures iam annos, in dextro crure, animi virtute, sat patienter sustentauerat. Tandem autem, ut sunt morosi plerumque ac difficiles senes, lentitudinis et continuatae illius exulcerationis prurientis pertaesus, opem poscebat a Medicis Artis suae peritissimis, ut scilicet

inex-

x) *Obs. Med.* 35. *Cent.* 11. *pag.* 72.

inexplicabili morbo confestim liberaretur: Illis autem *nullam hic Medicinam optimam esse*, uti par erat, vere pronunciantibus, serioque hinc suadentibus, ut nihil desideraret, quod vel moerore, vel poenitentia nimis fera, dignum esset, ac licet taedium ex mora nasceretur, pericula tamen semper maiora ex properantia fore metuenda: Nihilo minus tamen infausto prorsus consilio, in nocium veluti auxilium, accitur Chirurgus quidam temerarius, qui lucro potius suo fordido, quam pretiosae Principis salutis, intentus, Remediis valentioribus, ex adstringentium et exsiccantium classe, vlcus illud rebelle et perucax utcunque consolidat, et ad indecoram cicatricem imprudenter perducit: sed tam sinistro quidem cum euentu, ut paullo post, praecordiorum totiusque pectoris grauitas, spiritus difficultas, continua vigilia, longum cibi fastidium, torpidus artuum languor, lenta totius corporis macies, grauis moestusque veternus, et mors tandem ipsa, omnibus suis perquam luctuosa, subsequerentur; quum tamen antea, omnia fere vitae suae tempora, per hoc molestum licet, Naturae in sua commoda vigilacis, beneficium, inoffensa valetudine, peruixisset.

§. XXXIII. Similis autem intempestiua vlcerum cruralium curatio, decem nunc fere anni elapsi sunt, festinauit fata celebris cuiusdam per Europam, Bibliopolae. Rogatus ergo ab amicis, ecquid spei ad salutem tam chari ipsis quoque principibus, capitis, adhuc superesset? ex lurido vultus pallore, spirandi plurima difficultate, tussi vehementi et arida, voce obtusa et rauca, thoracis grauedine, odoris tetri spiratione, calore per vices, febrili, hypochondriorum duritie, aqualiculo extante, ciborum fastidio, aliisque id genus signis admodum suspectis praesentibus, candide tum praedixi, iam sensim labi spiritum misero, nec ultra sex hebdomadas forsan duraturum. Neque sane postea multum fefellit augurium. Quinta enim hebdomade exeunte, in via, suffocatione subita extinctus fuit, quum ex nundinis Francofurtensibus redux, exoptatum in patriam reditum meditaretur, repugnantibus tamen fati, longissime ab hac sua destinatione, nequicquam mente, heu futuri ignara! concepta, in terra peregrina tumultus, et a suis domi relictis, laetumque chari mariti ac patris aduentum frustra expectantibus, tanto acerbius defletus. *Nempe Hic proxima luce, patrimonii sui rationes inspexit;*
nempe

nempe diem etiam, qua venturus esset in patriam, animo suo fixit. Dii Deaeque! quam longe a destinatione sua iacet. Ita hic merito exclamandum cum PETRONIO ARBITRO, *Satyr. Cap. CXV.* Conf. huc, si placet, *poëmat. nostr. Tom. IV. pag. 155. sqq.* vbi alieno quidem nomine, hunc ipsum subitum lugubremque casum enarrauimus atque luximus; sed haec obiter.

§. XXXIV. Circa idem fere denique tempus, morte quasi haud simplici, miserrime periit alius Vir generosus, cui pariter vetustum pedis vlcus infelicitè persanatum fuerat. Quum igitur materia illa vitiosa corruptaque, versus interius corpus refluat, nares eius teterrimo tumore adeo oppleuisset, faxeisque veluti nodis et tofosis humore verrucis protuberantibus, horrendum foedasset, ut tam deformè ingenui oris deonestamentum diutius placide ferre haud posset; blanda, at inani, pro se sperandi, dulcedine illectus, in sua demum damna, arcessiuit chirurgum, artis suae plane imperitum, qui medicamentis violentissimis, rodentibus nempe et adurentibus, durum illum atque intractabilem tumorem, iam per se malignum, adeo usque exasperauerat, ut in insanabile prorsus carcinoma tandem degeneraret, quod celeriter serpendo, penetrandoque, usque ad ipsa ossa, corpus voraret, vnde febre tabifica, et asthmate spastico, aliisque luctuosis malis succedentibus, mors tandem exoptata ineluctabili illi calamitati finem imposuit desideratissimum. Qui diro suo exitio sic deuotus, iure hinc exclamare poterat notum istud poetae, patria pulsi et exulantis y):

Sed vereor, ne me frustra sanare labores:

Nec iuuer admoti, perditus aeger, ope.

§. XXXV. Credibile igitur, immo vero etiam probabile videtur, his omnibus aliquamdiu spiritum adhuc prorogari potuisse, nisi intempestiue iuuando, prouidae solertisque naturae officia interrupta fuissent, istis nimirum fontibus salutiferis in pedibus potissimum exortis, praeter ullam rationem, aut necessitatem, obstructis et obturatis. Nulla enim hic medicina optima potius erat, et verissimum illud SIRACIDAE effatum z) Μαγνὸν ἀπώστημα σκώπτει ἰατρεὼν, Magnus et inueteratus Morbus Medici est ludibrium, vel, Medici Artem plane eludit, ut nos quidem locum

y) Lib. I. ex Ponto, Epist. III, 321.

z) Cap. x. n. 10.

locum illum controuersum legendum esse, vere forsan censemus: licet in alia opinione versentur Viri magni, HUGO GROTIUS ^{a)}, et IOACHIM. KÜHNIVS ^{b)}. Vidimus tamen postea gaudentes, eandem quoque coniecturam, dudum ante nos, subnatam et approbatam fuisse Viro longe doctissimo IOANNI PRICAEIO ^{c)}: Ceterum eiusdem fere sententiae, cum isto sacro loco, est illud DIONIS CHRYSOSTOMI ^{d)}, Νόσημα ἐκ πολλῆς συμπεφυκὸς ὃ ῥᾶδιον ἀπαλλάξαι τῷ σώματι, *Morbum a longo iam tempore concretum et inueteratum haud facile sane licet e corpore expellere.* Quo et potissimum pertinet istud CLAVDIANI ^{e)}.

Veteri post obruta morbo

Corpora, paeonias nequicquam admoueris herbas,

Nec non illud quoque alterius poëtae, si recte memini:

Non est in morbo facilis Medicina vetusto.

Sed haec quidem philologica, dulcissima elegantiorum literarum memoria, vti, lectorum paece, hic interponeremus, sola effecit.

§. XXXVI. Verum vnum tantum adhuc allegare nunc liceat *Casum Chirurgicum*, de *Aure fracta*, vbi ipso quidem inalo deterior solet esse Medicina: quem in communes humani generis vsus, ad cauendum praecipue, ac vitandum, candide et perspicue ipse exposuit HIPPOCRATES ^{f)}, cuius tamen sententiam verbis potius latinis, quam graecis, referre hic placet, ne scilicet ipsa graeca, locus enim aliquanto longior ac verbosior est, nimia sua copia, fastidium forsan pariant ipsius huius vberriimae et venustissimae Linguae haud satis gnaris, vt nempe sunt perquam rari hodie philograeci. Sed en ipsa nunc HIPPOCRATIS verba: *At vero, si Auris fracta fuerit, deligationes omnes inimicae sunt. Neque enim ita laxam quis circumdare poterit. Si vero magis premat, maius malum operatur. Nam et sana Auris, deligatione compressa, dolore, et pulsatione, et febre afficitur: sed et cataplasmata pessima quidem omnino sunt,*

quae

a) In *Comment.* ad istum SIRACID. locum, pag. 119. Tom. III. *Commentar. in Vet. Test.* GROTII autem coniecturam nonnihil iuuat PLVTARCHVS, in *Catone minore*. pag. 780. Tom. I. item MAX. TYR.

b) *Quaest. Philol.* IV. *Pentad.* I. p. 10. sqq.

c) In *Commentario* ad LVCAE Cap. VIII. 43. pag. 286. operis in N. T.

d) *Orat.* XLI. pag. 500.

e) *Lib.* II. in *Eutropium*, v. II. sqq.

f) *Lib. de Articul.* §. XXXV. pag. 791. Tom. II. *Opp.* per LINDEN.

quae gravissima fuerunt. Verum et alia pleraque omnia mala sunt, et abscessus inducunt, et mucum largiorem suggerunt, et deinde suppurationes noxias: His autem fracta Auris minime indiget. Proximum tamen locum obtinet, si quid imponi debet, farina viscosa, quam neque ipsam grauem esse oportet. Contingere vero, quam minime conducit. Quibus demum verbis subiungitur saluberrimum illud praeceptum, cuius potissimum occasione, nostram hanc commentationem supra exorsi sumus: Ἀγαθὸν γὰρ ἐνίοτε φάρμακον, τὸ μηδὲν φέρειν φάρμακον, καὶ πρὸς ἑς, καὶ πρὸς ἄλλα πολλὰ: Bonum enim aliquando medicamentum est, etiam nullum adhibere Medicamentum, et ad aures, et ad multa alia: Haec tenus quidem ille. Quorsum et respexit PAVLLVS AEGINETAS), de eodem tractans argumento: Ὁ μὲν Ἱπποκράτης παραινεί, μηδὲν αὐτοῖς προσφέρειν, Suadet quidem et monet Hippocrates, nihil quidquam remedii auribus fractis applicare. Quibus consona fere sunt illa notissima OVIDIANA^{h)}:

Curando, fieri quaedam maiora videmus

Vulnera, quae melius, non tetigisse, fuit.

§. XXXVII. Superfunt quidem nonnulli adhuc morbi, quibus illa HIPPOCRATIS ac poetae commode aptari possunt, quum nempe medendo, grauius inualescant, et cohibendo, latius serpant, dum illos maior quasi armat saeuitia, quam vt tuto feliciterque expugnari possint: Sed ne longior digressio confusionem taediumque magis legentibus, quam instructionem, afferat, illos ipsos nunc quidem intactos relinquere praestat, manumque tandem de tabula tollere placet. Longum enim hic nimis esset, ire per singula: sufficiant igitur haec vel pauca, de plurimis; fatisque sit, nos et in praecipuis, non subtraxisse veritatem, et in multis, diligenter vitasse fastidium. Interim ex haecenus commemoratis iam abunde, opinor, liquebit, Nullam medicinam interdum esse longe optimam ac tutissimam: praesertim vero in illis morbis, quos, vt cum ipso nostro HIPPOCRATEⁱ⁾ loquar, μὴ δεῖ κινέειν, μηδὲ νεωτεροποιέειν, μήτε φαρμακείησι, μήτ' ἄλλοις ἐρεθισμοῖσιν, ἀλλ' εἶναι, nec mouere oportet, nec nouare, neque Medicamentis, neque aliis Irritamentis, sed potius intentatos praeterire: ex quorum nempe classe, quosdam iam supra, cursim recensuimus.

§. XXXVIII.

g) Lib. III. Cap. 23. pag. 37. Edit. Graec. Aldinae.

h) Lib. III. ex Ponto, Epist. 7.

i) Aphorif. 20. Sect. I.

§. XXXVIII. Prudens igitur, pius, probusque medicus, famae atque conscientiae inprimis suae, recte consulturus, videat potissimum, ne noceat, dum prodesse cupit, nec salutis humanae praefide arte, non solum pestem, sed hanc etiam atrocissimam, alicui sua culpa, inferat, ita, ut ea, quae sanare nequit, potius foede exulceret, vetusque malum hinc nouo malo augeat: quin contra, auream illam ingeniosissimi LVCIANI^{k)} regulam, ad instar metae praefixae, ad quam enixe contendat, semper irretorto veluti oculo, contempletur, pedeque inoffenso sequatur, quam ille facetiarum et urbaniorum salium pater, suauissimis quidem verbis, olim, in medicorum usus, ita proposuit: πάντων πρώτον διδασκόμεθα συνορᾶν, εἴτε ἰάσιμόν ἐστι τὸ νόσημα, εἴτ' ἀνήκεστον, καὶ ὑπερβηκὸς τῆς ὀρθῆς τῆς τέχνης. Καὶ τήνικαῦτα, ἢν μὲν εὐμεταχείριστον ἢ, ἐπιχειροῦμεν, καὶ πᾶσαν σπεδὴν ἐσφερόμεθα, σῶσαι τὸν νοσῶντα· ἢν δὲ κεκρατηκὸς ἤδη καὶ νενικηκὸς τὸ πάθος ἴδωμεν, εὐδὲ τὴν ἀρχὴν προσεπλόμεθα, νόμον τινὰ παλαιὸν τῶν προπατόρων τῆς τέχνης ἰατρῶν φυλάττοντες, οἱ φασι, μὴ δεῖν ἐπιχειρεῖν τοῖς κεκρατημένοις. *Omniū primum observare docemur, sanabilisne sit morbus, an insanabilis, transfiliatque ipsos artis terminos? Ac tum, si eiusmodi sit malum, ut commode possimus adgredi, adgredimur, totoque adnitimur studio, ut aegrotum quidem seruenius. Sed si morbum iam inualuisse superasseque viderimus, nec manum omnino admolimur, sic vetustam quandam primorum medicinae parentum legem observantes, qui negant, tentandos esse morbos, qui iam iam inualuerint.* Quibus postremis verbis, respicit haud dubie LVCIANVS, ut id obiter hic adiiciamus, ad HIPPOCRATEM ipsum^{l)}, ex quo, ceu perenni vberique fonte postea eandem sapientissimam sententiam certatim quasi hauserunt, suosque veluti hortulos eadem irrigarunt, ARETAEVS, GALEVS, ALEXANDER TRALLIANVS, BASILIVS MAGNVS, IOANNES CHRYSOSTOMVS, ISIDORVS PELVSIOTA, et ex Latinis, CICERO, et alter Medicorum Cicero, CORNELIVS inquam CELSVS, APVLEIVS, alique plures: qua de re plenius doctiusque olim iam tractavit CONRADVS RITTERSHVSIVS^{m)}.

Y 2

§. XXXIX.

k) In *Abdicato*, pag. 162. Tom. II. Edit. Operum nouissimae et nitidissimae, per Clarissimos Viros, REITZIVM atque GESNERVM, ingenti rei literariae Commodo, curatae ac publicatae.

l) *Lib. de Arte* §. xiv. pag. 8. Tom. I. *Opp. per* LINDENIVM.

m) *Lib. IV. Lectionum Sacrarum*, Cap. 22. pag. 342.



§. XXXIX. Imitentur ergo, serio seduloque suadeo et hortor, omnes prudentiores Medici nobile illud FABII istius CVNCTORIS exemplum, sique, ut ille quidem, rem non restituant cunctando; at caveant tamen, ne perdant eam festinando: sequanturque hinc potius semper, quoties nempe summa necessitas exegerit, prudentissimum ipsius monitum, apud LIVIVMⁿ⁾, quo ipso nunc huic nostrae Dissertationi colophonem tandem imponere placet:

Medicos plus interdum quiete, quam mouendo atque agendo, proficere.

NOBILISSIMO ATQVE DIGNISSIMO
C A N D I D A T O S V O
P R A E S E S.

Iam Tibi priuatim testatus, quantam animi voluptatem ceperim ex instituto Tecum nuper examine, quod, omnium unanimi suffragio, eximia plane cum laude, sustinuisti; nunc publice quoque lubens gaudensque proficeor, me, inter paucos, Te censere omnino dignissimum, cui summi in Arte nostra salutari, honores conferantur. Quare iam ex animo ipso, et non consueto inani ac vulgari gratulantium more, gratulor Tibi de noua ista dignitate, meritis Tuis iure impetrata: Gratulor quoque Venerando Tuo PATRI, de tam bonae indolis et egregiorum in Medicina profectuum Filio: Gratulor pariter, ipsi nostro Ordini, de tam erudito et Artis perito Candidato: Potissimum vero gratulor patriae Tuae, immo omnibus illis locis, in quibus in posterum facturus es Medicinam, de Medico tam docto, solerti et prudenti, ad publica commoda provehenda, unice nato ac formato. Neque inde unquam dubito, licet in hac Tua Dissertatione Inaugurali solide docueris, nullam medicinam interdum esse optimam, omnem tamen Tuam medicinam circumspecte et sapienter adhibitam, semper fore optimam: Adeo, ut, quod certissime quidem ominor, nunquam Tibi in posterum defutura sint praemia, singulari Tua industria ac doctrina dignissima. Ita vale in publicam salutem, quam diutissime, quam iucundissime, Tuoque Praesidi, Tui, crede mihi, amantissimo, et uniuerso imprimis ordini nostro, absens quoque, fauere, quaeso, perge! Scribebam raptim Wittembergae, d. XII Decembr. A. O. R. c i o I o C C L I V.

DISSER-

ⁿ⁾ Lib. XXII. Cap. 18. Conf. 10. BENEDICTI SINIBALDI Antiphon. HIPPOCRATIS, Lib. II pag 53.

DISSERTATIO MEDICA SEXTA.
DE
CORTICIS PERUVIANI VSV SENIBVS,
GRAVIDIS ET INFANTIBVS SALVTARI.

§. I.

Ec ipsa Medicamenta sua habent fata, suaque placendi, aut displicendi, tempora, quibus nunc commendata, aliquandiu vigescunt, nunc vero rursus contenta, subito vilescunt. Praesertim, si generosiora fuerint, aut noua, vel compositione, vel ortu ac nascendi origine, ex peregrinis nempe oris serius aduecta atque hinc nondum satis cognita et explorata.

§. II. Tum enim ex variis praeiudiciis et affectibus, ut scilicet diversa sunt hominum ingenia et iudicia, vel nimis laudantur et extolluntur; vel ex inuidia, properantia, timiditate, ignorantia, aut foeda obloquendi libidine, vicissim nimis vituperantur et deprimuntur, quum pauci omnino reperiantur, qui aequitatis aut modestiae amantiore, medium, idque tutissimum, iter sectentur.

§. III. Si quis ergo vastam illam atque spatiosam materiae medicae siluam vel obiter tantum peruagetur; tum sane vbique sat luculenta deprehendet exempla eiusmodi remediorum, quae a splendida nonnullorum medicorum commendatione subitam famam indepta, nunc aliquandiu viguerunt; nunc vero ab aliorum obtrectatione, aut suspecta reddita, aut prorsus damnata, subitam quoque famae, vix aliquantulum adultae, iacturam rursus fecerunt: adeo, ut inde Medici, praesertim Tirones, dubii omnino suspensique haerent, quasnam in partes tutius concederent: inuitati quippe atque allekti hinc largis promissis et opimis laudibus; hinc vero rursus suspecta fide et iniecto minacium periculorum metu deterriti, maluerunt tandem, securius consilium eligendo, eiusmodi sublestae fidei Remedia plane non experiri, quam ambiguum ipsorum euentum trepidantes quasi, praestolari. Hinc multa egregia Medicamenta nunc oblita et obtrita, iacent, quae inter ipsa laeta crescentis famae initia, per tetram inuidiam et diram obtrectandi libidinem, ingenti humani generis damno, oppressa fuerunt. Alia contra, praesertim Chemica vehementiora, qualia multa HARTMANNVM inprimis

inprimis, FABRVM et alios, praeparasse constat, ob metuendam inde noxam, iure meruerunt, vt sic opportune perirent, et in ipsa veluti herba adhuc tenera, suffocarentur *).

§. IV. Ex quibus plura nunc exempla nec inutilia, nec iniucunda hic oportne producere possemus, nisi instituti nostri probe memores, intelligeremus, nobis angusto iam limite clausis, conscribendam potius esse Dissertationem breuioris spatii academicam, quam spatiosum Volumen in publicam lucem protrudendum. Quare iam pauca tantum e multis, summis veluti digitis, attingere nobis licebit.

§. V. Sic de *Stibio*, seu *Antimonio* satis, opinor, cognitum est, quam acres internecinae paene lites superiore saeculo, concitatae fuerint Batauorum Medicos inter atque Gallorum, quorum antesignanus potissimum fuit amoeni ingenii et faceti oris Medicus, GVIDO PATINVS^{a)}, illis inter saluberrima remedia, his contra magna quidem ex parte, inter periculosissima medicamenta, quin et venena ipsa istud referentibus. Quae feruida *Stimmimachia*^{b)} multos in vtramque partem peperit libellos et apologias, etiam inter ipsos medicos Parisienses, plurimum dissidentes, tanta quidem animorum contentione et aestu conscriptas, vt ipsa fere olim ecclesia per haereticos, *Nomomachos*, vel *Antinomos*, vulgo dictos, vix vehementius turbata fuerit, quam quidem medicorum inprimis ipsorum Parisiensium, scholae, eo infelici tempore, per istos implacabiles quasi *Antimoniomachos*, vt ita dicam, concussae et in partes distractae fuerunt. Sed, vt ingenue fatear,

Bella geri placuit, nullos habitura triumphos.

Quorsum et potissimum pertinet istud *Antimonii Vitrum ceratum* dictum, nuperius a medicis Edinburgensibus repertum et impense commendatum, vnde et ipsi eximias plane medendi virtutes larga veluti manu, tribuerunt CHARAS, GMELINVS, BILFINGERVS, BASTERVS, alique

*) De quibus vid. si placet, quae nuper diximus in *Prolegomenis, ad Thesaurum pharmaceuticum vniuersalem*, et in ipso illo laborioso opere, passim data occasione.

a) In *Epistolis* passim: Vid. praesertim *Epist.* 46. *Vol.* I. pag. 195. et *Epist.* 96. pag. 381. item *Ep.* 310. pag. 610. *Vol.* II.

b) Conf. huc inprimis poema illud Gallicum satyricum lepidissimum: *La Stimmimachie, ou le grand Combat des Medecins modernes, touchant l'usage de l'Antimoine, à Paris, 1656.* Add. dicta a nobis in *Thesaur. pharm. part.* I. et II.

que viri clarissimi: dissentientibus licet nouissime, LVDOV. FAKRAT-
TO^c) et aliis nonnullis. Verum longior dies atque vberior diligentior-
que experientia aliquando certius docebit, vtrum tantae expectationi
faustus semper constansque respondeat euentus? an vero isti, qui ni-
mium confidit fragili illi Antimonii Vitro Cerato, aptari potius possit
istud HORATII:

*Ceratis ope daedalea
Nititur pennis, vitreo daturus
Nomina ponto.*

§. VI. *Opii* quoque opem frequentissime olim implorabant pleri-
que medicorum, ad pertinaciorum morborum ferociam mitigandam,
blandumque somnum prouocandum. Vnde in amplissimas ipsius lau-
des certatim quasi effusi sunt WEDELIVS, DOERINGIVS, TILIN-
GIVS, HARTMANNVS, SYDENHAMVS, FREYTAGIVS, HEI-
GELIVS, alique paene innumeri, a ZORNIO, in Botanologia, dili-
gentissime laudati; quibus nouissime accessit ALEXANDER THOM-
SON, Britannus et Celeb. TRALLES. Verum per examina accura-
tiora cum opio instituta, demum patuit, ipsum dolores potius ad tem-
pus aliquod, obtundere, quam penitus tollere; stuporem magis sensi-
bus inducere, quam verum placidumque somnum, praetereaque cor-
pori ipsi plura damna inferre, quam commoda. Inde cautiores Medi-
ci rectius censuerunt, ista quidem soporifera rarius esse opifera, fre-
quentius autem mortifera, et non solum partium *υδρωσιν* producere,
sed et saepius *νεκρωσιν*. Rarissime enim Medicina velox est felix; fre-
quentissime autem fallax et grauissimorum periculorum ferax; ceu de
opio ipso notissimum. De quo plura nos quoque nuper diximus in
Dispensat. pharmaceutico vniuersali, part. I. pag. 261. *sqq.* quae, si placet,
videantur et expendantur.

§. VII. De ambiguo *Mercurialium* vsu, nemini, credo, ignotum
erit, quantae a longo iam tempore, agitatae fuerint controuersiae, quae
neque in hunc vsque diem, plane compositae sunt. Nihilominus tamen
magnus ille Viennensium Aesculapius, seu, vt rectius dicam, BOER-

HAAVIUS

c) In *Thesibus ex Mat. Med. et Chymia*. monuimus in dicto *Thesauro pharmaceutico*,
Basil. 1757. Conf. si lubet, quae pariter *part. II. in fine, pag. 854.*
modeste de eodem *Vitro Antimonii cerato*,

HAAVIVS rediuius, nuperrime, non formidauit, vt nempe magnos magna et ardua decent, vel ipsum illum formidabilem *Mercurium sublimatum*, ceu summum vnicumque praesidium atque asylum, a Venere impura saeuissime fauciatas enixius commendare, multisque eam in rem institutis experimentis, sublimem ipsius sublimati vsum diligenter ostendere, licet haud ita pridem contra ipsum insurgere ausus fuerit MALOVIN, in *Chemia medica*; vt et POMME, *Traité des affections vaporeuses*, adeo, vt inde euentus sit expectandus. Huc vero inprimis pertinent BLASCKE, Viennensis, et GORDON, Anglus, qui de ipsius exinio in morbis venereis, vfu, diligenter scripserunt. Veronae quoque 1758. prodiit IOANNIS BONAE *Historia aliquot curationum Mercurio sublimato corro- denti perfectarum*, vbi varia personarum illustrium exempla recensentur: quod et pariter luculenter postea factum in Libro gallico: *Memoire, pour servir à l'histoire de l'usage interne de Mercure sublime corrosif*, par Mr. BEQVE DE PRESLE, à Paris, 1764. conferendus quoque huc EHRMANNVS, qui Mercurii huius sublimati Historiam, à Rhaze, vsque ad nostra tempora, perquam accurate ac diligenter descripsit. Vid. et Cl. GMELINI, *Dissert. de specifica methodo recentiore, Cancrum sanandi*, Tubing. 1757. item, si placet, *Thesaur. pharm. vniuersal. nostr. Part. II. pag. 403.* et quae ibi a nobis obseruata; inprimis autem a Cl. LOCHERO, Medico Viennensi cel. qui in nosocomio ad ST. MARCV, intra octo annos, ingentem aegrotorum 4880. cateruam isto quidem Mercurio sublimato, feliciter sanatam et a foeda scabie Venerea liberatam vidit. Vide interim Monitum Cl. CARTHEVSEI, in *Pharmacolog. Sect. 7. pag. 447.* item Cl. HVNDERTMARK, in *Comment. de Ozaena Venerea*, pag. 18. item WILLIAM BROMFIELD. *Obs. de Solano*, Londin. 1757. et Cl. TRALLES, in vexatissimo argumento de *Insit. Variolor. pag. 233.*

§. VIII. *Cinnabarinis medicamentis* multas magnasque medendi virtutes ab omni fere aeuo, tributas vulgo fuisse, inter omnes sane liquido constat. Inde ergo *Specificum Cephalicum* MICHAELIS, *Aurum horizontale* ZWINGERI, item *Panacea* KORNMANNI, et *Pulvis cordialis Cellensis*, vt et *epilepticus rubeus Norimbergensium*, nec non *antilyssus rubicundus moschatus*, *antispasmodicus* denique STAHLII ruber, vbique notif-

finus,

finus, aliaque plura eiusmodi remedia e Cinnabari potissimum parata, iam dudum magno in pretio haberi et contra atrociores cerebri, cordis et neruorum affectiones enixe commendari coeperunt. Ex quo vero haud ita pridem, singulari CARTHEVSE^{d)}, HVNDERTMARKII^{e)}, TRALLES^{f)}, FAKRATI^{g)}, aliorumque clarissimorum medicorum industria et indagine, liquidius innotuit, ipsam quidem Cinnabarim pulchram tantum et speciosam aspectu massam, ceterum autem inertem fere et inutilem esse sarcinam, de qua vix quidquam praesidii aut virtutis medicac in corpore aegroto, expectari possit; tum certe illa plurimum de dignitate sua pristina amisit, splendidaque ipsius purpura exinde sensim pallescere quasi coepit: licet illi nouum veluti colorem inducere tentauerit SCHVLZIVS^{h)}: scilicet post VITVM RIEDLINVMⁱ⁾, CLAVDERVM^{k)}, TILINGIVM^{l)}, aliosque plures, alibi iam commemoratos, nempe in *Thesauro pharmaceut. vniuers.* part. I. pag. 29.

§. IX. In eundem quoque censum venit *Aethiops ille mineralis*, a medicis praesertim Anglicanis, subitae potius, quam mansurae famae traditus: quorum auctoritate inducti etiam nonnulli ex nostratibus, vti SCHROMMIVS^{m)}, SCHVLZIVSⁿ⁾, paucique alii, quos lubens praetereo, nescio quas singulares virtutes in resoluendis omnis generis inveteratis viscerum et glandularum obstructionibus, et morbis praecipue puerorum curandis, ipsi adscripserunt. Docuit vero e contrario BOERHAAVIUS^{o)}, at quantus vir, duce ratione, et experientia comite, atque vna cum ipso, CARTHEVSEVS^{p)} et GMELINVS^{q)}, vt alios iam taceam,

d) In differt. de Cinnabaris inertia medica: item in *Pharmacolog. Sect. VII. pag. 457.* et in *Fundament. Mat. Med. Part. II. Sect. XVI p. 593. sqq.* add. *Thesaur. pharm. part. II. pag. 97. et pag. 666. et part. I. pag. 29.* vt modo dictum.

e) In *Diff. de Mercurii viui cum Salibus mixti summa in corpus humanum Vi, eiusque cum Sulphure laxius vel arctius coniuncti Virtute in idem nulla: Lips. 1757.*

f) In *Examine Absorbent. rigoroso, p. 81.*

g) *Thes. de Mat. Med.*

h) In *Praelect. ad Dispensat. Brand. p. 62.*

i) *Lin. Med. Ann. 1695. p. 428. sqq.*

k) *Differt. de Cinnabari natua.*

l) In *Scrutinio Cinnabarino.*

m) In *Diff. de Aethiope minerali, Altdorf. 1725.*

n) *Praelect. in Dispensat. Brand. p. 7.*

o) *Element. Chem. Tom. II. part. III. process. 101. pag. 431.*

p) *Fundament. Mat. Med. Part. II. Sect. 16. cap. 4. pag. 597.*

q) *Diff. de Botanica et Chemia ad medicam praxin applicata, Tubing. 1755.* quibus laudatis supra Auctoribus add. si placet, quae diximus ingenue, de hoc inertis et inepti aethiope, in *Dispensat. pharm. vniuersal. part. II. pag. 8. sq.*

taceam, nulla alia medendi facultate pollere hunc aethiopem; aspectu tristem ac tetrum, et effectum ipso pigrum et imbellem, quam quidem perquam exigua vermes pellendi; quam tamen et ipsi eripere tentauit RIEDLINVS^{r)}. Quare aethiopem forsan lauabit, quisquis huius aethiopis defensionem in posterum suscepit, eiusque desperatam veluti causam denuo egerit, quoniam, ut bene poeta:

Qui niger est, nulla candorem sumit ab arte.

§. X. *Magnesia* illi *albae* olim quoque celeberrimae primam fere medendi palmam detulit COMES DE PALMA, primus ipsius si non inventor; tamen commendator, quem, ut nouitas miram habere solet gratiam, plures deinde sequuti laudatores, diligenter a clar. HUNDERTMRK^{s)}, enarrati, quibus nuperrime nouus veteris *Magnesia* encomiastes accessit IOSEPHVS BLAK^{t)}, sed, ut verum equidem fatear, plus lucri commodique captabant *Magnesiam* praeparantes ac vendentes; quam quidem eadem vtentes. Namque ex crebro ipsius vsu, ventriculi praesertim et intestinorum querelae non tollebantur, quin potius nonnunquam vehementius insurgebant, et nouis insuper malis variis adaugebantur: quod praeter alios multos, inprimis solide docuit magnae famae Chemicus, NEVMANNVS^{u)}, et post eum nouissime Cl. GME-LINVS^{w)}. Hinc *Magnesia* ista magnam potius, quam diuturnam, laudem adeptam, sensim rursus euiluit, ut illi inde illud poetae apte conueniat:

Stat magni nominis umbra.

§. XI. Nouum istud *Lithontrypticum Anglicanum*, a Virgine STEPHENS inuentrice, ingenti praemio prius accepto, tandem publicatum, splendida illa elogia, quibus per totam fere Europam, ad tempus, inclaruit, haud diu cum dignitate, sustinuit. Postquam enim CHARAS^{x)}, SCHVLZIVS^{y)}, THIERY^{z)}, alique praestantissimi medici, grauissimis ratio-

nibus,

r) *Lin. Med. Ann.* 1698. Obs. 2. pag. 6.

s) In *Exercitat. de Sacchari Saturni Vsu intern.* pag. 4. sqq.

t) In *Diss. de Humore acido a Cibus orto, et Magnesia alba*, Edinburgi, 1754.

u) In *praelect. Chemic. P. V. Regn. mineral.* Cap. 27. p. 1659. sqq.

w) In *Dissert. de Botan. et Chem. ad praxin med. applicata*: add. *Dispensat. Brand.*

pag. 100. in *Not. vbi et vid. praelect. Schulzii*, pag. 183. ut et *Dispensator. nostrum vniuers.* part. II. pag. 391. sqq.

x) In *pharmacop. Regia*, Part. II. p. 866.

y) In *Dissert. de Lithontryptico*, nuper in Britannia iuris publici facto, Halae, 1739. Conf. *Dispensat. pharm. vniuers. nostr.* part. II. pag. 517.

z) In *Medicina extemporali.*

nibus, et multis experimentis malè succedentibus, conuicti, fidem ipsius, utpote saepissime fallacem, merito suspectam reddiderunt; nunc inter alia id genus *Lithontryptica* quam plurima, quae plus nempe promittunt, quam praestant, neglectum fere et illaudatum iacet, frustra licet fragilis huius et testacei quasi praesidii lithontryptici defensione am- plissimam nuperrime denuo suscipiente Anglo quodam Anonymo ^{a)}.

§. XII. *Puluis* ille *Palmarii* notissimus, qui tamen rectius auctorem habet IAC. SYLVANVM, DOMINVM DE PYROV, pro palmario olim remedio habebatur contra diram hydrophobiam: sed nunc nemo credit medicorum peritiorum, tantas inesse virtutes pulueri illi, non malo quidem; sed ad hos magnos tamen vsus haud satis idoneo, generoso atque efficaci ^{b)}. Sicut nec *Vermes*, seu *scarabaeos maiales*, pretiosa licet mellis conditura propemodum regie sepultos, nec *lichenem terrestrem cinereum* cum pipere mixtum, nec *Anagallidem*, nec *Acetum antilyssicum* HANNEMANNI, nec *puluerem antilyssum rubrum* ex duplici Cinnabari atque Moscho compositum, cuius iam supra facta fuit mentio, nec denique turpissimum illud *Turpethum minerale*, aliaue remedia plura, vulgo quidem iactantius laudata, rabiem illam caninam ferocissimam, et terribilem aquae frustra appetitae metum vilo modo compescere potuisse, magno medentium dolore, ac moerore, hodie compertum est ^{c)}.

§. XIII. *Aurum fulminans*, *Antihecticum* POTERII, *Tincturam antiphthisicam* GRAMANNI, *Aquam benedictam* RVLANDI, et *puluerem* denique CORNACHINI, in vnā nunc classē coniiciam simul, quoniam haec omnia eiusdem paene sunt vsus, id est, nullius, aut certe ambigui; certioris autē damni atque periculi: Et mirum profecto est, tanta quidem cum fiducia ac securitate, diutius commendari potuisse haec ipsa medicamenta, quae tamen in perniciem potius, quam salutem generis humani, reperta esse videntur. *Aurum* enim *fulminans* ob atroces, quos edit in tenellis praesertim infantum corporibus, effectus, ut alia iam ma-

Z 2

la,

a) Londini, 1755.

b) Vid. HERM. BOERHAAVE, *prax. Med.* T.V.p. *sqq.* ill. VAN SWIETEN, *Comment.* Tom. III. pag. 586. *sqq.* *Commerc. litt. med.* Norimb. Ann. 1735. pag. 83. et *Thesaur. pharm. vniuers.* part. II. p. 551. *sq.*

c) Vid. CHARAS *Pharm. Reg. Tom. I. pag.* 210. VAN SWIETEN, *Comment. Tom. III. pag.* 588. MEAD, *de Venen. Essay III. of the Mad Dog.* pag. 165. *sqq.* LOESEKE, *Mat. Med.* pag. 199. et alios plures. add. *Thesaur. pharm. part. I. et II.*

la, ab ipso metuenda, taceam, fulmine omnino et execratione merito dignum a peritioribus quidem et cautioribus medicis, censetur^{d)}. Videtur namque esse dolosum illud aurum Tholosanum, de quo ita pronunciat AVL. GELLIVS^{e)}: *Quisquis illud Aurum attigit, misero cruciabilique exitu perit.*

§. XIV. *Antihecticum* vero POTERII licet nouissime a CAROLO ALSTON Anglo, denuo in lucem defuetam reductum, et forsan ob Iovem, vt ita loquar, indigenam, seu stannum patrium Anglicanum, impensius commendatum, tantum abest, vt febres hecticas tollat, vt potius faciat, aut iam factas augeat, plerumque enim tabidi pereunt, quos *malus hic Iupiter urget*^{f)}. Sicut et *Tinctura antiphthifica* GRAMANNI, quae phthisin tamen perfectissime sanat, nempe per beatam mortem, quae ex lento illo sacchari Saturni Veneno, ipsi copiose adiecto, certissime tandem expectari debet^{g)}.

§. XV. *Aqua benedicta* RVLANDI in omnibus paene morbis, imo in ipsa quoque pleuritide, quod vero mirandum potius, quam imitandum,

d) Vid. DAN. LVDOVICI *Pharmac. pag. 182. et pag. 288.* HOFFMANN. *Med. Rat. Syst. Tom. II. pag. 290. sqq. et Tom. III. pag. 487.* RIVIN. *Med. Officin. Censur. p. 115.* BOERHAAVE, *Elem. Chem. Tom. II. pag. 436. et Consult. Med. p. 365.* SCHVLZ. in *Praelect. p. 46.* CARTHEVSE. *Pharmacol. p. 480.* BVCHNER. *Fund. Mat. Med. pag. 180.* GEOFFROY *Mat. Med. Tom. I. p. 318.* LOESEKE, *Mat. Med. pag. 146.* VALENTINI, *Nouell. Med. Leg. pag. 482. sqq.* EWALDT et STAHL, item ALBERTI, *Diff. de Auro fulminante, Dispensat. Prag. p. 86.* vt alia plura scripta taceam, laudata iam a nobis in *Thesaur. pharmaceut. vniuersali, Part. II. pag. 93. sqq.* vbi et ipsi iustissimum indignationis fulmen haud plane imbelli, vt opinamur, dextra, in hoc ipsum dirum *Aurum fulminans* merito emisimus, vt inde nempe sibi caueant prudentiores Medici, ne fulminante veluti manu, crudelissime perimant miserrimos aegrotos, praesertim autem teneros innocentesque infantes.

e) *Noct. Att. Lib. III. cap. 9.* De quo notissimo prouerbio, plura videsis collecta apud ERASMV M Roterodam. *Chil. II. Cent. I. Adag. 98 pag. 384.*

f) Vid. STAHLII *Mat. Med. Part. I. pag. 83. et p. 92.* GOETZ. *Obs. Med. pract. Stahl. p. 162.* LVDOVICI *Pharm. pag. 285.* BOERHAAVE, *Elem. Chem. Tom. II. p. 414.* SCHVLZ. *Praelect. p. 12.* CARTHEVS. *Pharmacol. p. 517.* BVCHNER. *Fund. Mat. Med. pag. 155.* *Dispens. Brand. p. 6.* in *Not. et Pragens. p. 21.* THIERY *Med. extemp.* et alios plures, laudatos iam a nobis, in *Thesaur. pharm. vniuers. part. II. vbi plura de hoc ipso Antihectico, siue rectius Hectico Poterii, p. 11. sqq.*

g) Vid. HOFFMANN. *Med. rat. System. Tom. II. p. 296. et Tom. IV. pag. 574.* item *Diff. de Laesion. extern. pag. 30.* CARTHEVSE. *Pharm. p. 314.* BVCHNER. *Mat. Med. p. 195.* SCHVLZ. *Praelect. p. 382.* STAHL. *Mat. Med. Part. I. p. 91.* GOETZ. in *Recens. Script. Stahl. pag. 162.* et nouissime Baron.

tandum, ab auctore dilaudata, et in vsum vocata, diu benedicta fuit, dum inuentori plurimum lucri et aureae quasi benedictionis attulit. Sed vbi eam ventriculo inprimis multum officere, variosque inde finistros effectus suscitare, tandem deprehensum fuit: ista quidem aqua benedicta maledictis potius aquis, vt ita dicam, sensim accenseri coepit. Vid. *Thesaur. pharmaceut. vnivers. Part. II. pag. 30.* et Libell. de pleuritide.

§. XVI. Par fere fatum habuit *Puluis CORNACHINI*, per totam Italiam, immo et Europam ipsam, quondam celeberrimus: nunc vero non nisi rarius timidiusque in vsum aduocatus. Quum enim ob *Antimonium* praesertim *diaphoreticum*, cum reliquis purgantibus adiectis arctius vnitum, iustoque diutius simul asseruatum, saeuissima tormina, acerrimas cardialgias, vehementiores vomitus et diarrhoeas paene lethales saepissime concitaret^{b)}: factum inde est, vt anceps praecepsque ipsius vsus vel sub gravissima damnationis ad triremes, poena, Romae, quondam interdicereturⁱ⁾. Quin etiam ex eadem ratione, quod scilicet

Z 3

multi

ron. in *Addit. ad LEMERII Curs. Chym.* qui omnes Tincturam hanc antiphthificam toties licet a multis magnis quoque Medicis, et recentissime a WRIGTHO Scoto, laudatam, prudentius tamen, inter lenta et tabifica Veniena, quam securam remedia, re-
rulerunt, quod et nos merito nuper fecimus, in citato iam saepius *Thesauroparm. vniuersali, part. II. p. 765. sqq.* vbi exactius egimus de hac i sa Tinctura antiphthifica, siue rectius, *antiphysica* et *antipsychica*, vt ita serio quasi ioco, loqui liceat. De qua merito ita grauissime exclamat laudatus supra HOFFMANNVS: *Vitanda cane peius et angue est Tinctura antiphthifica Gramanni, quae magis procurat phthisin et maturat.* Sic ille Vir maximus, per Deum! verissime, in *Consultat. et Respons. Med. Cent. I. Sect. II. Cas. 99. pag. 147. Tom. IV. Opp. Med.*

h) Vid. huc potissimum ZWELFERI *Pharmacop. Reg. pag. 96.* THOM. BARTHO-

LINI *Acta med. Hafn. Vol. v. p. 25.* DO-
LAEI *Encyclopaed. Med. Lib. IV. cap. 6. p.*
120. RIVINI *Diff. de dubio Medicament.*
effectu, pag. 61. SCHVLZII *Diff. de Antimon.*
diaph. et Diff. de inexpectato Medicament.
effectu, p. 23. sqq. item *Praelect. ad Dispens.*
Brand. pag. 15. BOERHAAVE, *Elem. Chem.*
Tom. II. p. 452. et praesertim VIT. RIED-
LINI *Lin. et Obss. med. locis diuersis, mox*
laudandis, quibus add. si placet, quae nos-
met ipsi de feroci huius pulueris indole et
funesto saepius effectu, nuperrime fat di-
ligenter copioseque diximus atque seuer-
monuimus, in citato iam aliquoties The-
sauro pharmaceutico, Part. II. p. 529. sqq.

i) Vid. WELSCHII *Obss. med. Episagn.*
98. p. 65. RIEDLINI *Obss. med. 61. p. 212.*
sqq. eiusdem Curat. med. 665. Cent. VII.
pag. 414. et Lin. med. de Ann. 1695. pag.
191. sqq. maxime autem ZWELFER. loco
iam supra e Pharmacop. Regia, allegato, et
nos in Thesaur. pharm. modo allegato.

multi ex nimio et intempestiuo ipsius vfu, male perirent, terribile illud nomen *tricipitis Cerberi*, vt et *pulueris trium diabolorum*, non sine omine, obtinuiffe meruisseque videtur: Quasi vero non vnus, vt ita dicam, diabolus sufficeret, ad integrum humanum genus perdendum.

§. XVII. Quantam famam consequutae sint *peregrinae* illae *radices Ginseng*, seu, *Ninjin*, atque *Parreira braua*, vna cum stipitibus foliisque *Apalachines*, seu *Paragoae*, adeo, vt propter mirandas prorsus medendi virtutes, vulgo quidem iactatas, in omnis generis morbis feliciter profligandis, par fere ipsi auro pretium illis statueretur, cuius medicorum doctiorum notissimum esse arbitror, quisquis immensas paene *Rad. Ginseng* laudes legerit in NEVHOFIO, HALDE, PISONE, DEKKERO, VALENTINI, et aliis, a ZORNIO in *Botanol.* diligenter adnotatis; splendida vero *Parreirae brauae* praeconia, a LOCHNERO, integro libello elegantissimo comprehensa, vt alios illo recentiores iam taceam eiusdem laudatores; et *Paragoae* denique elogia magnifica apud KAEMPFERVM, CHARLEVOIX et alios. Sed vbi ad ipsa experimenta ventum fuit; sensim luculenter patuit, faustum quidem euentum haud vbi-que respondere magnae illi et securae nimis expectationi: Hinc illis ipsis radicibus exoticis, stipitibusque, seu foliis istis, nec tantum praemium, nec tantum praeconium tribuendum esse, seuere vereque pronunciarunt ATHANAS. KIRCHERVS^k), THOM. BARTHOLINVS^l), BOERHAAVIUS^m) HOFFMANNVSⁿ), AMMANNVS^o), CARTHEVSE-
RVSP), LOESEKE^q), et alii plures, laudati iam a nobis, in citato saepius *Dispensatorio pharm. vniuersali*, part. I. de *Mat. med.*

§. XVIII. Illud denique famosum fumosumque *Picis liquidae Infusum* ab aliquo tempore, tantopere vbiuis expetitur, et omnibus fere remediis, etiam praestantissimis, longissime praelatum, cui, quaeso, vel ex infima plebe, ignotum amplius fuerit? Ex America enim primum in Hiberniam delatum, deinde vero episcopali auctoritate, sanctius scilicet ac religio-

k) *Chin. illustrat. Part. IV. cap. 6.*

l) *Aët. Med. Hafn. Vol. V. obs. 10.*

m) In *Consultat. Med. pag. 332.* et praefertim, pag. 360. sqq.

n) In *Dissert. de vera Medicamentorum,*

in Morbis, virtute et efficacia, rite digressenda.

o) In *Irenico* HIPPOCRATIS et IVM. POMPIL. p. 267 sqq.

p) *Fundament. Mat. Med. Part. II. p. 420.*

q) de *Mat. Med. p. 269.*

religiosius, commendatum, piceo quasi cataclysmo, totam inundauit Britanniam, qui deinceps in vniuersam paene Europam sese latius diffudit, adeo, vt omnis fere suae salutis aliquanto incuriosior negligentiorque esse crederetur, quisquis de saluberrima illa, si Dis placet, pice, nihil quidquam gustasset: ita, vt fere cum poeta hic exclamandum sit:

Fluit agmen aquarum

Turbine confusum piceo.

Postquam vero ista *Pissomania*, vt ita loquar, plusquam epidemica, sensim deferbuisset, et languidior indies affectus ad sanius iustiusque iudicium rediisset, crebrisque experimentis manifestius constituisset, isti picis liquidae infuso nullam paene medendi virtutem competere aliam, nisi forte exiguam antiscorbuticam, aut antinephriticam¹⁾; tum stygium illud, vt ita dicam, Nectar, tanto cum desiderio olim quaesitum, tantaque cum voluptate haustum, fastiditum ac reiectum, et orco veluti suo, (si iocari quidem liceat,) vnde seueri nonnullorum medicorum iudicio, forte venerat, remissum fuit, vbi, vt poeta ait:

Verbera, Carnifices, Robur, Pix, Lamina, Taedae.

§. XIX. Sed haec iam pauca, ex innumeris paene, sufficiant de diuersis Remediorum Fatis. Plura autem cognoscere si quis forsan aueat, is, quaeso, diligenter euoluat ZWELFERI *Animaduers. ad pharmacop. Augustan.* eiusdemque *pharmacopoeiam Regiam*, item ET TMÜLLERVM et HOFFMANNVM patrem, ad SCHROEDERVM, et HOFEMANNVM Fil. ad *Poterium*, CHARAS. *Pharmac. Regiam*, SCHVLZII *Praelect. ad Dispensat. Brand.* inprimis autem DAN. LVDOVICI *Pharmaciam*, rerum sane praestantia, quam stili elegantia, commendabiliorem, et RIVINI denique, quo adhuc in senectute, praeceptore olim, gloriamur, *Dissertat. de Medicamentorum officinalium Censura*: Praesertim vero multos

r) Conf. huc. CHARAS *Pharmacop. Reg. Tom. II. pag. 860. sqq.* CARTHEUSERI *Fundament. Mat. Med. Part. II. c. 36 p. 281. sq.* BVCHNERI *Fundament. Mat. Med. p. 615. sq.* et LOESEKE, *de Mat. Med. pag. 280.* qui praesertim parcus admodum est laudator nauseosae illius et ingratae picis aquae, vt alios plures, qui cum ipso faciunt, iam

praeterrittam, quos inter et nomen nostrum publice nuper professi sumus, in *Dispensatorio pharmaceut. vniuers. part. I. pag. 245. sq.* vbi fusius exactiusque de hac ipsa picea panacea, et fordido Rusticorum Nectare, egimus, ipsiusque longam historiam, et perquam exiguum vsum satis diligenter, ni fallor, enarrauimus.

multos variosque illos Materiae Med. scriptores, v. g. VALENTINI, in Museo Museor. HERMANNVM, eiusque commentatores et amplificatores, HENNINGERVVM atque BOECLERVVM, amicum quondam nostrum suauissimum, item GEOFFROY, CARTHEVSEVM, BÜCHNERVM, LOESEKE, aliosque plures, quorum hoc saeculum in primis nostrum feracissimum est: quo et ipsum inprimis pertinet opus nostrum maius pharmaceuticum, vi quasi a nobis demum extortum, in quo et passim, praesertim autem Parte II. de diuersis diuersorum Remediorum fatis, data occasione, tractauimus. Ceterum vero de his diuersis aduersisque variorum Remediorum fatis, commode fatis, opinor, dici potest istud quidem HORATIANVM:

*Multa renascentur, quae iam cecidere, cadentque,
Quae nunc sunt in honore.*

§. XX. Vt autem nunc ad nostrum argumentum, nobis hic maxime tractandum, propius accedamus, ex omnibus fere remediis, tam hactenus commemoratis, quam breuitatis studio, praeteritis, nullum certe noui, quod nunc clementiora, nunc vero rursus asperiora fata vicissim habuisset, quam *Corticem* quidem *Peruvianum*, *Chinae* *Chinae* vulgo dictum. Ex quo enim ille, diuino beneficio, feliciore fidere, ex orbe nouo, ob hunc solum fere *Corticem*, digno, qui detegeretur, veteri nostro orbi innotuit, (anni iam centum et ultra, dudum effluxere^s); dici credique vix potest, quam contraria dissonaque Medicorum iudicia expertus fuerit, nunc nonnullis ipsum ad summa quasi sidera euehenti-
bus;

s) Annus, quo *Cortex peru.* primum Europaeis innotuerit, vulgo quidem habetur circiter, 1649. tam tristis et paene infamis atrocissimo illo Regicidio Angl. quam laetus contra, et illustris inuentione felicissima praestantissimi huius Remedii, in communem generis humani salutem reperi: Inde longe profecto dignior, ob tot millia ciuium, per istud iam seruatorum, et in posterum, vsque ad finem Mundi, adhuc, vt spes est, seruandorum, qui fastis aeternum mansuris, minio quin etiam auro, inscribatur; quam omnes alii anni, cruen-

tis tantum victoriis nobilitati dicam, an notati? in quibus quippe in humanae gentis perniciem, tot hominum millia, ante diem, crudelissime caesi sunt. Ceterum de hac *Chinae* *Chinae* historia et inuentione prima, vid. VALENTINI *Polychrest. exot.* Diff. IV. item *Mus. Museor.* NIGRISOLI *Febris Chinae* *Chinae* expugnat. ibique BLEGNY *Monginot*, et alii BARTHOLIN. *Hist. anat. rar. Cent. v. hist. 50.* et Aët. *Hafn.* MORTON. in *Opp. Tom. II. pag. 68.* STVRM. in *Vindic. febrifugi peruiani*, HERMANN. *Cynos. Mat. Met. Tom. I. p. 205.* GEOFFROY, *Mat. Med.*

tibus; nunc vero rursus aliis eundem ad infima veluti tartara detrudentibus, atque dirissimis quoque venenis, pudet profecto pigetque commemorare, accensentibus, quos omnes diligentissime, pro more, enarrat ZORNIVS^{t)}, sed vicit tandem virtus veritasque, et longior dies, vberiorque ac constantior vbiuis experientia euidentissime docuit, contra omnes vanas illas atque inanes obtrectatorum minas, technas machinasque, Corticem illum remedium esse non solum plane innoxium; sed et insuper saluberrimum, tutissimum et certissimum, in omnibus praesertim febribus intermittentibus profligandis et radicitus extirpandis, praecipue, si opportuno tempore, iustaque et largiore dosi, exhibitum fuerit, ipseque potissimum cortex optimas recentioris aetatis notas, colore, odore atque sapore, prae se tulerit: quas post alios, diligenter enarrat Cel. WERLHOFIVS, p. 82. *sqq.* alias enim non mirum, si, deficientibus his quidem proprietatibus necessariis, et medici expectationem eludat, et aegroti ipsius spem fallat. Inter omnia enim sic dicta specifica, vulgo quidem iactata, nullum certe occurrit, quantum mihi vere constat, et laudato WERLHOFIO, pag. 263. *sqq.* et in *praefat.* quod tam speciosum et augustum nomen potiore iure, mereri ac tueri possit, nisi solus ille Cortex febrifugus.

Vnde nil maius generatur ipso,

Nec viget quidquam simile, aut secundum.

§. XXI. Sed nolo iam in diuini huius remedii laudes amplissimas latius excurrere, ne post tot clarissimorum auctorum infra allegandorum, praeclaras operas, certatim hac in re impensas, actum agere videar; praesertim, quum iam alibi, meritis ipsius laudes, tenui licet auena, decantauerim^{u)}. Neque sane hoc ipsum argumentum, quod multis for-

fan

Med. Tom. II. pag. 182. TORTI de Curat. Febr. per Chin. Chin CARTHEVSE. *Fund. Mat. Med. part. II. p. 488. sqq.* BARBEYRAC, de *Formul. Medicament.* pag. 232. *sqq.* aliique plures, laudati Cel. WERLHOFIO pag. 82. et aliis: nouissime vero CONDA-
MINVS, in *Memor. Acad. scientiar. paris.* exactissime. Conf. et, si placet, *Tom. III. Poem. nostr.* pag. 280. *sqq.* In *Not. prae-*

fertim vero Thesaur. pharm. vniuers. part. I. pag. 215. sqq. vbi plura hanc in rem, a nobis diligenter et exacte commemorata et obseruata fuerunt.

s) In *Botanologia Med.* pag. 201. *sqq.* et *Not. eiusdem ad PANCOVII Herbarium.*

u) *Tom. III. Poemat. nostrar. physico-eth.* iam citat. pag. 280. *sqq.* nisi forsan graue lectori fuerit.

san lectoribus, in tanta quidem Scriptorum turba, superuacaneum videbitur, tractandum suscepissem, nisi subinde occurrissent mihi olim medici, etiam non vulgares, qui nescio, quibus rationibus, aut praeiudiciis, inducti, subdubitarent, num *Cortex Peruvianus Senibus, praesertim autem foeminis grauidis, tenerisque infantibus, sine metu ac periculo, exhiberi posset* ^{w)}?

§. XXII, Hinc, vt graue illud praeiudicium, ob metuendum imprimis abortum auertendum et praecauendum, penitus tollerem, nihilque plane hic formidandum, aut cunctandum esse, liquidius ostenderem; *Quatuor praesertim Historias singulares, ex perquam multis aliis selectas, hic summa fide proponere, visum fuit, ex quibus vberius, spero, patebit, quam feliciter et opportune datus sit Cortex Senibus, Grauidis atque Infantibus: Quas nunc ipse beneuolus Lector patienter quaeso, et attente consideret, atque candide expendat.*

HISTORIA PRIMA.

DE

CORTICIS PERUVIANI UTILITATE IN TENERIS INFANTIBVS.

Anno MDCCCXXXIV. aduocabar ego a Viro per quam illustri, et arduis splendidisque muneribus in Republica praeclare gestis, maxime insigni, vt curarem, si pote, ipsius filiulam, natu minimam, VII. fere annorum, puellam lepidam sane, argutulam ac dicaculam; quae per nouam iam menses integros, a febre tertiana, ex aëre frigidior

^{w)} Quum tamen isti frustra dubitantes iam meliora ac rectiora doceri potuissent ac debuissent, ex praestantissimis Auctoribus. Exempli causa; quod ad Senes quidem spectat, ex VIT. RIEDLINI *Lin. Med. Ann.* 1695. p. 427. et inprimis Cel. WERLHOFII *Obsf. de Febr. Sect. III. pag.* 107. et passim in seqq. qui et pariter de ipsis *Infantibus*, per chinam chinae feliciter curatis, agit, *Sect. II. p.* 57. et *Sect. V. p.* 251. vt et WEDELIUS *de Morbis Infant. c.* 34.

LENTILIUS, *Eteodrom. p.* 292. 302. 1349. et apud laudat. WERLHOF. et, vt alios praeteream, IO. AEG. EVTH, in *Anatom. vmbilici, Obsf. II. pag.* 79. frustra obloquente GOELIKIO, paucisque aliis. De foeminis denique grauidis, Corticis ope, a febribus perfecte et feliciter liberatis, aliquot memorabilia exempla dudum produxit Artis obstetriciae facile princeps, FRANCISC. MAVRICEAV. *Observat. circa grauiditatem et partum Mulierum, Obseruat.*

dioire et diaetae inprimis errore, contracta, excrucitata, et e variis in-
super Medicis, in diuersas opiniones delapsis, et de iusta medendi ra-
tione dubiis, adhuc magis diuexata fuerat; qui tandem exhaustis longo
tempore, lecythis suis et nartheciis pharmaceuticis paene omnibus, per-
quam exigua vitae salutisque spe interim relicta, indignantes et pudore
fero paene confecti, discesserant.

Vidi ergo puellam illam misellam lecto affixam, noua cera palli-
diorem, et ligno ante longa iam tempora, caeso paene aridiorem, viri-
busque omnibus adeo vsque viduatam et desertam, vt laxa cutis exsuc-
cam ossium male cohaerentium cratem aegre contineret. Ad haec,
febris ipsa, tam tempore nimium extracto; quam peruersa inprimis et
praeter necessitatem, saepius immutata medendi methodo, ex ordinata
tertiana, in inordinatam adeo degenerauerat, vt nullo amplius stato
typo, decurreret; sed remitteret potius interdum, quam plane inter-
mitteret, et subdolam hinc lentae febris indolem induisse videretur.
Sub ipso autem introitu, statim ego grauiter admonebar, a matronis
praesertim praesentibus, et altum scilicet vel in ipsa medendi arte, sa-
pientibus, ne ad febrem hanc contumacem debellandam, in vsum teme-
re aduocarem detestabilem illum Corticem Peruuianum; cuius nempe
manifestas nocendi vires, vnanimi consensu, summo quidem iure, iam-
iam damnaissent priores Medici, tantum non omnes. Addebantur quo-
que, ne quid scenae, aut mimo deesset, peremptorum ex letiferi scili-
cet istius Corticis vsu, exempla haud pauca, sed prolata scilicet potius,
quam probata.

Ego tamen aliqua rerum cognitione et experientia, meliora longe
atque saniora edoctus, nec vana haec et veri prorsus inania dicteria mul-

Aa 2

tum

seruat. 272. et nostro aeuo, toties iam lau-
datus WERLHOFIVS, cuius recorda-
tio nobis semper iucundissima, Vid. et
inprimis RIEDLINI *Lin. Med. Ann.* 1695.
pag. 207. conf. eiusdem *Obs. med.* 7. et 27.
item DEODATI *Valerudinar. p.* 227. *sqq.*
nec non SYDENHAM, TORTVM et
LENTIL. *Miscell. Med. pract. Tom.* II.
pag. 246. praesertim vero huc conf. Cl.
FRANC. IOS. LAVTTER, in *Hist.*
Med. biennal. Morborum ruralium, Vindob.

1761. *Cap.* I. *pag.* 35. *sqq.* et *Cap.* II. *Cas.* 8.
pag. 74. *sqq.* vbi complura exempla graui-
darum, item puerperarum et infantum de-
nique, fidelissime et facundissime enarran-
tur; quibus opportunus ipsius Corticis
peruuiani vsus in febribus saeuissimis et
periculosissimis feliciter profligandis, prae-
sentissimum praestitit auxilium. Qui exi-
mius Liber proinde dignus omnino est, qui
sedulo legatur, et cum his ipsis nostris
exemplis diligenter comparetur.

tum curans, praemissis paucis remediis temperantibus et praeparantibus, intrepide puellae sanitatis cupidissimae praescripsi illum ipsum formidabilem, si Diis placet, Corticem, ad semunciam tantum, in commo-
Electuario, singulis ternis horis, sumendum; tam fausto quidem cum successu, ut febris mox confopita quiesceret, decolores hactenus genae sensim viuido colore laete reflorescerent, noctes hucusque exsomnes, placido somno traducerentur, ciborumque appetentia fera ventriculo rediret vacuo, et alimentorum solidiorum ad hoc usque tempus inconsueto; sicque demum plena perfectaue sanitas redderetur puellae tunc paene conclamatae; nunc vero proceritatis succulentae et floridae venustate insigni Virgini, in spem laetitiamque Matris, multis iam procis petitae, et tandem quoque digno marito, felici connubio, iunctae.

HISTORIA SECVNDA.

DE

SINGVLARI CORTICIS VSV IN FOEMINIS GRAVIDIS.

Serenissimi cuiusdam Principis Coniux, omnis mentis cultu et veneratione dignissima, teneri et macilenti corporis habitus, ingenii acris, subtilis, facileque irritabilis, formae venustae et maiestatis plurimum prae se ferentis, annorum XXVIII. sextum ultra mensem, iam dulce ventris foecundi onus portans, quum anno MDCCXXXVII. Mense Maio, a tepido lecto adhuc calens, ad salubrem primuli veris auram captandam, matutina erraret per rigui adhuc horti quadrua compita, in iucundissimo suo praedio, prope ambitiosum Rheni flumen sito; futuri-
que mali ignara, horridulo sese aëri parum cauta, exponeret, ut corpus tenerum, tenui saltim veste nocturna, seu vento quasi textili, circumamictum, matutina frigora morderent; protinus atrocissimo capitis dolore, totiusque corporis horrore tremulo corripiebatur. Lectum ergo vix relictum aegra repetit: applicantur mox exterius fomenta et frictiones; interius autem potiones calidae, exiguo tamen vtrinque cum fructu; quin potius nausea, singultu, tandem et vomitu, acerrimisque
dorsi,

dorsi, imique ventris doloribus subsequenter. Sed periculoso isto horrore vix sedato, tanto quidem aestu mox eo usque incaluit vniuersum corpus, ut vel leuissima stragula superiecta aegerrime sustineret: Hinc ergo perpetua inquires membrorum iactatio, suspiriosa praecordiorum anxietas, oculi ardentes et rubentes, temporum continuus pulsus, arteriarum ictus iusto citiores, frontis, manuumque cutis tenta aridaque, urinae flammeae, pellucidae, et spumosae, lingua sicca et siticulosa, ita tamen, ut omnia potu ingesta, mox nauseoso vomitu, cum summo capitis pectorisque dolore, affatim redderentur; donec grauissima haec symptomata omnia, largo quidem, sed tractuoso simul et olido sudore, utcunque soluerentur. Nox insequuta, praeter spem, nihil quidquam leuaminis attulit; insomnis enim prorsus traducebatur; quin potius mala plurimum auxit, et attritas iam vires molestissimo ex variis imaginosis terculamentis, peruigilio, vehementius adhuc infregit ac debilitauit.

Altero igitur die, eadem scena tragica agebatur, sed nouo lugubri veluti firmate auctior. Namque circa meridiem, flagrantius recanduit febris male soporata, exorto prius per integram fere horam, horrore rigidissimo, qui miseram aegrotantem tanta quidem vehementia, conquassabat, ut ipsa commota simul sponda contremisceret; vterus autem ipse vna in consensum abreptus, adeo conuelleretur et agigaretur, ut intensiores foetus ibidem conclusi, veluti saltus per superimposita stragula, non solum tactu; sed etiam visu paene ipso, facile percipi possent: idque tanta aegrotae cum molestia, et intolerabili fere dolore, ut propter hos ipsos violentiores foetus intus luctantis agitationes, et quasi calcitratus, acerbissimi et ferme insustentabilis sensus causa, in flebiles ac vocales questus erumperet. Accedebat his, ne quid nempe ad malorum complementum deesset, Tussis insuper pertinacissima, arida et inanis, nulloque fere momento, per omne horroris febrilis spatium, interquiescens; unde acres iam capitis, dorsi et infimi denique ventris dolores tanto acrius accendebantur.

Tam horrido autem frigore vix mitigato, mox vniuersum corpus eo aestuosius inaruit, suborta simul flagrantissima siti, potum quidem continuo reposcente, sed et potum eundem continuo reuomente; uti

antea iam factum. Finito tandem, post septem fere horas, paroxysmo, sudatio quidem, vt febrium fert natura, successit; sed suspectae prorsus indolis, licet satis larga esset. Neque enim sudor per omnia aequaliter membra diffundebatur; quin potius circa frontem, ac potissimum, pectus, atque dorsum, ingenti copia prorumpebat, relictis interim, pessimo quidem omine, brachiis, cruribus pedibusque siccis plane, nulloque salutari madore perfusis.

Adhibita igitur tum varia fuerunt Remedia salutifera, et ad aestum temperandum, et ad faeuam adultae iam febris impotentiam compescendam, alias vel maxime idonea; sed exiguo adhuc, fatendum enim ingenuae, cum successu. Alius quoque sub vesperam, leni lotione refrigeratoria, ducta fuit, vnde paullo post, multa faeculenta, spumosa, foetidaque, flatibus copiosis comitantibus, reiecta sunt, cum nonnullo aegrotae alleuamento. Nox enim successit aliquanto pacatior, nec somni omnis exfors, peruigilatis licet plerisque longioribus eiusdem horis.

Sequenti autem die maximo potissimum in luctu metuque versabamur: post atrocissimos nempe aliquot horarum, capitis, et inprimis frontis, dolores, paucis cruoris nigri guttis, e narē dextra, sensim, malo indicio, elapsis, et longe peiore adhuc signo, raris notis sanguineis, e naturā muliebri, occulto itinere, redditis, et in substratis linteis, praeter spem votumque nostrum, conspicuis. Inde enim inuesti coniciebamus, secundum iustas artis regulas, et consuetas naturae leges, vel ipsius aegrotantis salutem in summum discrimen nunc esse adductam, vel tene-rum vteri, iam non nihil hiantis, hospitem, violentiore nixu, cum sui, Matrisque infelicissimae ineluctabili perniciē, proxime elapsurum, et in ipso securo veluti portu, triste naufragium facturum.

Nobis ergo sic spem inter metuinque, mediis, nihil amplius cunctandum, quin generosum potius consilium in ipsa quasi arena, extemplo capiendum esse, merito videbatur, quo matri iuxta foetuique pro virili, succurrentes, vtriusque capiti iam imminens extremum periculum feliciter auerteremus. Natura igitur ipsa sic nobis duplicem monstrante viam, sanguineis notis signatam, faeuaque in primis necessitate urgente, ad iustam aestuantis sanguinis missionem nos intrepide accinximus,

mus, nullaue interposita diutius mora, e vena brachii dextri, cruoris atri, grumosi, lentaue per effugia elapsi, detractae sunt vnciae plus minus octo, aut nouem; tam secundo quidem cum successu, vt effrenata sanguinis excandescencia mox deferuesceret, sanguineaeque tumens vteri minae placidae subsiderent, ita vt nulla amplius nota suspecta, aut funesta, in linteis, conspiceretur.

Ipsa denique febris, ex vaga haecenus et inordinata, salutarî mutatione, paullo post, in ordinatam tertianam transiit, typumque suum intercalarem, consueto Naturae iustae ordine, constanter exinde seruauit; vnde protinus in vsum a nobis aduocatum fuit Herculeum illud diuini Corticis Peruuiani remedium febrifugum; cuius larga copia, et ad vncias paene quatuor, in Electuario, sensim, iusto tempore, stisque interuallis, assumpta, expugnata tandem penitus fuit, fauente Deo, febris huius perquam atrocis peruicacia haecenus fere intractabilis: seruatis sic, atque e mediis paene orci capacis faucibus auspicato ereptis matre celsissima, atque foetu ipso in summum vitae salutisque discrimen antea coniectis. Serenissima enim illa princeps haud longo post tempore, statis mensibus exactis, fausto faciliue partu, enixa est filiolum, vegetum, sanum, torosum ac venustum, qui in tenera iam aetate, in spem patris patriaeque laetissimam, multa praeclara minatus, nunc et aetate et viribus validior factus, gloriosis et memorabilibus factis hucusque per orbem splendide enituit: extincta interim, ante paucos iam annos, in ipso aetatis flore, ex letali vteri haemorrhagia, ipsa illa veneranda matre, ob egregias prorsus animi excelsi virtutes, eximiasque erecti ingenii dotes, mihi satis quidem cognitae, longiore vita omnino dignissima.

Diligenter haecenus fideliterque enarratae huic historiae singulari nunc quidem subiungi commodè possent sex septemue similia prorsus exempla eiusmodi foeminarum grauidarum, febre correptarum, interque illa ipsius nostrae vxoris quondam dilectissimae, nunc eheu! desideratissimae, quibus incomparabilis ille virtute, Cortex Peruuianus summo in angustiis extremis, praesidio fuit, ne instante iam fere fatali abortu, foetus immaturos, maleque adhuc formatos, intempestiue effunderent. Conf. huc *Theaur. nostr. pharmaceut. vniuersal. part. II. pag. 155.* Sed quoniam mihi nunc eadem paene repetenda forent, quae

quae haecenus a me relata fuerant; metuendo hinc utique lectorum fastidio consulturus, nolo crambem iam semel bene, opinor, positam bis male coquere; inprimis, quum in illis ipsis historiis, nihil singulare occurrat, quod peculiarem tractationem omnino mereatur.

Discant autem interea exinde medici, arte nondum satis exercitati, usuque confirmati, ne in posterum inani metu trepident, ubi curandas susceperint foeminas grauidas febricitantes, nec temere reformident, ipsos illos febrium acrius insurgentium vehementes insultus, in ipsis statim primordiis, potentissimo Corticis praesidio, animose ac fortiter reprimere: Quin potius sciant, generosissimum illud remedium non solum tum febres fugare, foetasque foeminas ab acerbo abortu ita defendere, ut lubricos quidem partus ad maturitatem continere possint: sed etiam nouis insuper viribus induere matres aeque ac teneros foetus, quo illae exacto demum tempore, arduos partus labores eo melius adire, ac fortius perferre, hi autem robore quasi aucti, tanto facilius feliciusque materna claustra perrumpere, et in dias luminis oras euadere valeant. Ceterum has ipsas cunctas maximi quidem momenti rationes, eodem tempore, quo amantissimam nostram vxorem febre atrocitum conflictantem, simulque grauidam, tractabamus, diligenter quoque obseruandas strenueque exequendas, serio ac fideliter commendabamus medico cuidam timido, fluctuanti, anxio, et expectanti potius, quam expedienti, qui pariter tum curabat nobilem in vicinia foeminam praegnantem, graui febre decumbentem, et de abortu metuentem. Sed omnia eheu! incassum. Ille enim mori sui moris nimium tenax, et nescio quae funesta pericula ex ipsius corticis usu, frustra timens, solisque suis pulueribus antifebrilibus salinis, essentiis amaris, aliisque id genus inaniis vulgo consuetis, praeter omnem rationem, nimis fidens, id tandem insanienti hac sua sapientia effecit, quod iam antea praeuideramus, immo praedixeramus, ut misella ista foemina, teneri admodum et delicati natura, corpusculi, cum summo quidem vitae periculo, tristein abortum faceret, mea interim vxore, vna cum foetu ipso, insigni diuini corticis beneficio, Deique auxilio, feliciter seruata. Maluit ergo male sanus ille et pertinax medicus cunctator, foetum potius innocentem per febrim expellere, quam febrim nocentem per corticem: turpi profecto

fecto et pudendo lucro, ac cum famae iactura, et, quod maximum, cum graui ipsius conscientiae vulnere. Lugubri ergo hoc exemplo admoniti, nunc intelligant medici ipsi, in curandis grauidarum febribus, haud diu esse cunctandum; sed potius ad illas tempestiue supprimendas, properandum. Celerrimae enim et acutissimae omnino hic sunt occasiones, et, nisi ipsae febres citius iugulentur, ipsi teneri foetus saepius iugulantur. Quae autem, obsecro, tum maior esse potest calamitas infelici matri, quae foetum sic misere perdidit, aut medico infeliciori, qui sola sua culpa effecit, vt eum sic misere perderet? Huc enim vel maxime spectat prudens illud CETHEGI apud SALLVSTIVM, monitum; *Dubitando, et in dies prolatando, magnas opportunitates corrumpi; factum, non consulto, in tali periculo, opus esse.* Conf. et HIPPOCRATIS *Epist. ad Crateuam, pag. 930. Tom. II. Opp.*

HISTORIA TERTIA.

DE

CORDICIS PRAESTANTIA IN FEBRIBVS,
DIVERSIS DIRIS SYMPTOMATIBVS
COMITATIS.

Virgo honesta, nec inuenusta, aetatis XIX annorum, eo ipso iam commemorato anno, febre correpta, grauiter decubuit; non tam ob febrem ipsam, quippe quae ordine consueto seruato, exacte satis decurrebat; sed propter dira inprimis, atque suspecta illa symptomata, quae ipsam semper comitabantur, aut potius praecedebant. Ingruente enim horrore febrili, post praeuias enormes totius corporis pandiculationes, deformesque oris hiantis oscitationes, in tantam animi defectionem incidebat miseranda illa virgo, vt iamiam exspiratura videretur. Iacebat quippe supina, per lectum extenta, frigentibus rigentibusque artubus, pulsu vix sensibili, facie decolore, et lurido pallore suffusa, ore exsanguis, oculis clausis, nare acuta, frigida et quasi pendula, genis collapsis et flaccidis, collo inflato, stertente, et sonoros veluti rhonchos ducente, ventre denique praetumido et commurmurante. Quae horrenda symptomata maximam quidem partem, ex consensu vteri commoti, haud dubie

ortum ducentia, eo usque immota prorsus perstabant; donec fatiscen-
te illo horrore, per statuta intervalla, incalesceret rursus corpus: tunc
enim sua sponte expergefata, ad sese sensim redibat, et in novam
quasi vitam reuocabatur, de capitis tantum, colli atque abdomi-
nis intenso dolore, totiusque corporis lassitudine, flebile conquesta:
quum antea, durante nempe adhuc horrore febrili, nulla prorsus arte,
nullis fomentis corpori largiter admotis, nullis spiritibus odoriferis vo-
latilibus naribus oblatis, ex graui illo atque veternoso lethargo excitari
potuisset: quin potius obseruatum a nobis fuit, quoties in subsidium
tunc aduocata fuissent generosiora illa remedia excitantia ac reficientia,
toties peius sese habuisse aegrotam, toto corpore horrendum in mo-
dum, intremuisse, et tolerato diutius paroxysmo febrili, iusto serius, in
vitam haecenus veluti desertam, rediisse.

Quum igitur atrociora haec symptomata, temporis processu, fini-
strum utique euentum portenderent, repurgato prius atque emollito
suffICIENTER ventre, nulla interiecta mora, statim ad sacram illam veluti
anchoram, Corticem nempe Peruvianum, confugimus, cuius duabus
tantum vnciis, in Electuario, cum nonnullis medicamentis antihysteri-
cis, iusta dosi, remixtis, per certa dimensaque intervalla, absuntis, et
ipsa pertinax febris feliciter per Dei gratiam, profligata, et ille inexcitabilis
paene sopor simul excussus fuit, elatusque ventris murmurantis
tumor sensim placide subsedit. Ex quo per complures adhuc annos,
perbelle valuit illa ipsa Virgo, a mortuis quasi resuscitata; donec nu-
per admodum, Sororem suam, rarissimi exempli foeminam, cuius iam
supra, cum luctuosa recordatione, facta fuit mentio, beata morte so-
luta, sequeretur.

HISTORIA QVARTA.

DE

CORTICIS EFFICACIA IN FEBRIBVS SENVVM SOPOROSIS.

Simili fere alto sopore, stertoreque rhonchifono, excepta tamen ani-
mae defectione sola, oppressus iacuit per omnem febris decursum,
venerandus quidam senex annorum LXVIII. anno MDCCXXXIX.

Quoties

Quoties enim ille algore febrili inhorresceret; toties ipsi inexpugnabilis paene dormiendi necessitas adeo usque imposita videbatur, ut nec illis remediis, naribus admotis, per quae sternutamenta alias euocantur, tametsi validissimis, languidus marcor, torporque somniculosus vlllo modo, excuti posset. Quum igitur triste hinc augurium merito caperemus, ne suspectus ille somnus, vbi iusto longius extenderetur, bonum istum senem, viribus iam defectum, aliquando confestim traditurus esset suo fratri, somno nempe inexcitabili et aeterno, ut acute ille aiebat philosophus, iamiam moriturus; varia inde a nobis tum tentata sunt remedia, ad indomitam istam dormiendi cupidinem oculis marcidis prorsus euellendam. Adhibita ergo sunt ampla furis vesicantia, capiti frontique impositum Sinapi, plurimis quoque corporis locis aliquando, sine ferro, cucurbitae admotae, quo sic nempe fatalem illum veterum per potentiores reuulsiones, expugnaremus: sed omnia, fateor, incassum, et sine sperato successu; donec imas ipsius mali fibras fortiter exscinderemus, insidiosamque istam febrim soporiferam in ipso quasi fomite, subito extingueremus, ingestis tantum per interualla, binis Corticis febrifugi vnciiis, sub liquidi Electuarii forma, more nostro, per plures iam annos, consueto, praeparati; cuius accuratam descriptionem fideliter exhibuimus in *Dispensat. pharm. vniuers. part. II. pag. 155.* idque tam fausto sane cum effectu euentuque, ut nobilis ille senex mox lecto letoque laetus assurgeret, atque sine vlla sanitatis offensa, aut querela, eo usque sospes prouideret, donec aliquot annis post, septuagenario maior, iam abire paratus, plenusque vita, onerosis corporis vinculis placide tandem exsolueretur.

Plura quidem nunc his subnectere possem huiusmodi febrium somniculosarum exempla; nisi actum agere, Iliademque quasi post HOMERVM, temere scribere, maximopere displiceret. Posteaquam enim Cel. per orbem WERLHOFFVS, Vir arte, facundia et doctrina, iuxta insignis, et, de quo iure gloriamur, amicus quoque atque fautor noster beneuolentissimus, tanto quidem eruditionis apparatu, tantaque selectissimorum exemplorum copia, nobile hoc arduumque argumentum persequutus est; nullus certe nunc facile reperiundus, credo, erit PARRHASIVS, qui perfectae huic omnibusque paene numeris absolutae

Tabulae Apelleae aliquid, quod ad complementum adhuc desit, adicere iure possit. Auctor igitur suaeque ingenue omnibus sum medicis solertioribus, veritatisque cupidis, ut legant saepe, saepiusque relegant aureas illas, ingentisque frugis plenissimas *Observationes WERLHOFIANAS, de Febris, praesertim soporosis*, quo sedulo liquidoque exinde, in publica humani generis commoda, addiscant tam subdolan et internecivam istarum febrium naturam et indolem; quam opportunum et securum Corticis triumphatoris quasi, usum, ad easdem potenter debellandas, atque penitus prosternendas, ut ipsi saepius laeto cum successu, per Dei gratiam, experti fuimus. Conf. interim huc *Dissertat. de Febre tertiana intermittente, epidemia soporosa, apoplexiam mentiente*, etc. sub cel. BÜCHNERI praesidio, Halae 1763. habita, ubi perquam similis huic nostro casus notatu dignissimus, enarratur.

EPILOGVS.

Sed haec nunc haecenus, de singularibus istis Februm intermittentium Historiis: Non, quod hae solae sint, quas in Aduersaria medica olim fideliter et diligenter relatas, huc candide transcriberemus; sed, quod hae solae e plurimis aliis, dignae imprimis visae fuerint, quae in publica emolumenta, opportuna hac occasione, expromerentur, et prae reliquis, adnotari mererentur. Sexcentos enim fere novi aegrotos, quibus febris pertinaci diu detentis, saluti et praesidio, post Deum, vnice fuit diuinus ille Cortex Peruvianus, et mihi met ipsi bis, per vitam, praesentissimum praestitit auxilium, ut grati laetique facti sumus in *poem. nostror. Tom. I. pag. 127. sqq. et Tom. III. pag. 272. sqq. praecipue pag. 280. sqq.*

Medici ergo rationales et in professione salutari longo rerum usu probe exercitati, his nostris selectis exemplis validius confirmati, intrepide in posterum pergant, Corticem illum salutiferum tempestive et circumspicte, in usum aduocare, ut hucusque praeclare ac feliciter, cum singulari multorum aegrotorum emolumento et solatio fecerunt.

Reliqui autem medici, ut ita per iocum dicere liceat, *Antichinchinarii*, si qui forsan etiamnum supersint, inani adhuc metu trepidantes, et praeter rationem dubitantes et titubantes, quique hinc ab usu Corticis incon-

inconsiderate negligenterque abstinentes, veluti *sine Cortice natare volunt*, in febribus cito, tuto et iucunde curandis; nunc demum cum rubore discant, quantum fallantur, quantumque, quod pace tamen ipforum dictum sit, non tam meis, quam potius grauissimis SYDENHAMI, TORTI et RAMAZZINI verbis, apud laudatum saepius WERLHOF. pag. 240. et pag. 326. in Naturam, Homines et Deum denique ipsum, peccare videantur, dum vel ex vago praeiudicio, vel vano timore, vel experientia obstinato animo inexplorata ac neglecta, vel solo tandem peruicaci obloquendi et contranitendi studio, hoc ipso Dei misericordis munere incomparabili clementissime concessio, in salutem quidem publicam, vti detrectant: Sed potius illud, omni licet longa fidaque experientia vbiuis locorum, magna et canora quasi voce reclamante, ceu atrocissimum venenum, omnibus Thessalis philtris, plantisque letiferis, *quas Iolcos atque Iberia mittit, venenorum ferax*, longe nocentius et detestabilius, post CHIFLETIVM, PLEMPIVM, GOELIKIVM, eiusque inprimis magnum duri nominis magistrum notissimum, improbissimis rumoribus, per vrbes ac circulos differunt, ac dira imprecatione deuouent. Quin potius legant, saepiusque relegant Corticarii isti, vt ita dicam, Corticis aduersarii maximorum medicinae luminum scripta hanc in rem, aeternum victura, nempe STVRMII, BRVNACII, BADI, BARTHOLINI, SYDENHAMI, LISTERI, MORTONI, MVRALTI, BLEGNY, WILLISII, BONETI, MONGINOTI, PECHLIMI, SCHELHAMMERI, RAMAZZINI, LANCISII, FREINDI, MEADI, HERMANNI, BOERHAAVII, HOFFMANNI, WEDELII, BOHNII, BERGERI, TORTI, NIGROSOLI, COCCHII, COHAUSENII, BOECLERI, GEVDERI, ALBINI, BRUNNERI, DAVINII, HELVETII, LENTILII, VALENTINI, SWIETENII, MEIBOMI, GEOFFROY, LEMERI, CHARASSII, et aliorum ingenti quidem copia, post ZORNIVM, iam laudatorum a cel. WERLHOFIO, pag. 182. *sqq.* qui ipse solus fere ad instar omnium, hac in re esse potest: Praeter istum enim ipsum, vix quemquam noui alium, qui iniustissime vndique impugnati Corticis iustissimam defensionem vel prudentiore consilio et erectiore animo, suscepit, vel meliore fortuna ac maiore gloria, peregerit. Interim tamen nec reliqui strenui eiusdem defensores merita sua laude defraudandi sunt, qui nempe

omnes, ceu totidem pugnaces et lacertosi Hectores, pro optima Chinae chinae pessime laceffitae, caussa, confertis veluti viribus, acerrime depugnarunt, vanasque hostiles minas, et inanes nocendi impetus inanum, veluti tot inexpugnabilibus experimentis argumentisque armata, fortissime ac felicissime represserunt. Conf. et huc, si placet, *Thesauri nostri pharmaceut. vniuersal. part. I. pag. 217. et poem. nostr. Tom. III. pag. 285. sqq.* praecipue vero clar. LAVTTERI *Hist. Med. Morborum ruralium, cap. V. pag. 195. sqq.* et per totum istum librum egregium, item cel. DE HAEN, in *Rat. medendi, part. II. cap. 6. pag. 91. sqq.* et *part. III. cap. I. pag. 36. sqq.* item *cap. 5. pag. 179. sqq.* denique et *part. IV. cap. I. pag. 5. sqq.* et passim alibi, in opere isto praestantissimo et lectu dignissimo.

Sed nolo iam tinnulum quasi ac clamorifum declamatorem superuacanea quidem et ingloria opera, agere: quin illud potius sub finem, candide, moneo, crebra nempe certaue experientia edoctus: *Illum praesertim Medicum in rationali Medicina plurimum iam profecisse, cui tempestiuus et circumspetus Corticis Peruuiani vsus, in febribus praecipue intermittentibus, multum placuerit.*

DISSERTATIO MEDICA SEPTIMA.
DE
TVMORIBVS SINGVLARIBVS
A MENSIVM SVPPRESSIONE OBORTIS.

§. I.

Quam multa grauiaque mala, quin et incredibilia paene symptomata oriri subinde soleant, nunc ex subita, nunc vero diuturna, Mensium suppressione; praeter quotidianam experientiam, omnes illi Auctores Medici abunde docuerunt, qui post HIPPOCRATEM ipsum, GALENUM, AETIVM, MOSCHIONEM, THEODORVM PRISCIANVM, paucosque ex Veteribus, alios, data opera, certatim quasi, commentati sunt de *Mulierum Morbis*. Quorum potiora scripta, sua quidem tempestate, obuia et publice exposita, profuturo posteritati consilio, vno Corpore, vel Volumine spatioso, complexus quondam fuit ISRAEL

SPACHIVS, Argentinensis ^a). Post cuius tamen vberriam veluti mensem, nec huic nostrae aetati laetum, aut foecundum defuit spicilegium, ceu liquidius patet ex amplissimo illo recentiorum Auctorum, qui post istum SPACHIVM, prodierunt, Catalago, quem singulari cura atque diligentia pertexuit clarissimus et arduae artis obstetriciae peritissimus Medicus, IOANNES GOTHOFREDVS SCHEID, pariter Argentinensis ^b).

§. II. Actum igitur omnino ageremus, opusque inanis plane laboris, molesti taedii, et intempestivae non minus, quam ingloriae simul industriae plenum fusciperemus; si nunc quidem de illo ipso argumento, toties iam cocto quasi, atque recocto, hincque penitus fere exhausto, operosam tractationem instituere conaremur; quippe quod ab indole atque consuetudine Dissertationis academicae quam maxime esset alienum.

§. III. De solis ergo *Tumoribus singularibus post Mensium suppressionem, in variis partibus corporis externis, passim obortis*, in praesenti quidem, paucis tractare nobis animus est: ideo imprimis, quod in omnibus illis scriptoribus medicis, qui vel generatim, de *Mulierum affectionibus*, vel speciatim, de *Emmenologia*, quidquam commentati fuerunt, quin et in multis istis Auctoribus, qui data quidem opera, de *omnis generis Tumoribus*, scripserunt ^c); aut nulla prorsus, aut perquam parca ac rara facta fuit mentio, de illis ipsis tumoribus peculiaribus, de quibus hic nobis sermo futurus, qualesque nosmet ipsi bis quondam conspeximus, uti vel

hae

a) Titulus Operis huius hodie rarioris est: *Gynaeciorum, sive de Mulierum, tum communibus, tum Gravidarum, Parientium, et Tuerperarum affectibus et Morbis, Libri. Argentin. 1597. fol. quod XXI. Auctores complectitur. De quo vid. FABRICII, heu! quondam nostri, Bibliothec. Graec. Vol. XII. pag. 700. sqq. et KESTNERI Bibliothec. Med. Cap. VII. pag. 360.*

b) In *Prolegomenis*, ad eximium Dn. DE LA MOTTE *Tractatum de gravidarum et parturientium foeminarum Morbis*, e sermone gallico, quo prius conscriptus fuit, in linguam germanicam ab illo ipso celeb.

SCHEIDIO fideliter conuersum et utilissimis Observationibus passim adiectis, locupletatum. Argentinæ, 1743. form. 4ta.

c) Quorum nempe praecipui et exactissimi sunt SAPORTA, RVDIVS, ERASTVS, LIMANVS, INGRASSIAS, BALDVIVS, PECCETTIVS, CRASSVS, FALLOPIVS, CORTESIVS, SCHELHAMMERVS, et alii, qui tamen, quantum recordamur, de istis quidem Tumoribus menstrualibus, ut sic loqui liceat, prorsus silent. Forsan et in reliquis, nobis nondum visis, idem defectus fuerit observandus.

hae ipsae Historiae singulares, ex Aduersariis nostris medicis, summa fide, statim hic infra, subiiciendae, luculentius, ut spes est, declarabunt.

HISTORIA PRIMA.

Anno cldio ccxxv. apud Matronam illustrem, vidimus Nutricem grandem, torosam, obesam, rusticam, solibusque adustam, quales nempe Sabinae olim erant, lactis, succi, sanguinisque plenissimam, et simul edacissimam: Quae quoties tempus instaret, ut consuetum Mensium tributum per naturalia penderet; praeuiis acerbis capitis doloribus, pectoris oppressiōibus, et faciei intenso rubore ac tumore, intra brachii dextri flexuram, aut commissuram, tumorem durum, rubrum et dolentem concipiebat, qui sensim in mucronem, aut Verticem elevatus, tandem sua sponte, tenui fissura dehiscebat, sanguinisque floridi ac rubicundi septem, aut aliquanto plures, praeter propter, vncias, per lenta, quasi effugia, spatio duorum triumue dierum, stillatim egerbat. Quo facto, et dira ista symptomata omnia leuabantur, et ipse tumor ille subitus et insolitus iterum euanescebat, nullo sui vestigio, aut cicatrice, quod utique mirum, relicta, et perfecte postea rursus valente Nutrice ipsa. Huic vero vicariae, ut ita dicam, matri, seu Nutrici, nec crebra sanguinis missio, in pede dextro administrata, nec alia remedia commoda opis quidquam adferebant, ut inuersus ille Naturae aberrantis impetus in iustum ordinem et consuetum iter placide reduceretur; donec tandem illa Infantem, statō nutritus tempore exacto, lacte depelleret, victuque tenuiore iterum ex more pristino rustico, frueretur. Quo vix peracto, Natura sese ad consuetas leges rursus, morigera, componebat, sanguineusque iste fluxus, relicto illo peregrino et insolito brachii dextri diuerticulo, per inferius illud ostium pudore conseptum, singulis statis mensibus, iterum recte iusteque emittebatur,

HISTORIA SECVNDA.

Anno cldio ccxxxvi. vocabamur ad puellam, non scelestā de plebe, sed nobili potius stirpe, editam, xv. quidem annorum; sed pro aetatis ratione, satis robustam ac proceram; quae a menstruīs
adhuc

adhuc defecta, singulis quoque mensibus, eadem suspecta Naturae reluctantis molimina experiebatur. Post faeuissimos enim capitis, colli, pectoris atque ventriculi dolores, cum nausea coniunctos, tumor semper durus, rubicundus, et quasi acuminatus, pariter in dextro brachio, haud procul a manus carpo, subito assurgebat, cui plerumque obscurus quidam pulsationis inerat sensus; qui tamen post aliquot dierum decursum, sine ruptura, aut sanguinis profusione, iterum sua sponte, sensim subsidebat, et euanescebat.

Parentibus igitur ea de re insolita admodum sollicitis, candide tum praediximus, priore nempe exemplo iam edocti, fore aliquando, vt ex eo ipso tumore menses turbati, et a iusta sua semita peruerse deflexi, tandem subito prorumperent; nisi generosioribus remediis naturae laboranti, consuetisque legibus prae fracte renitenti in tempore, subueniretur, ambiguumque iter temere sectanti certior securiorque via monstraretur.

Enixe ergo ea de causa ab ipsis rogati, nulla interposita mora, negotium illud arduum adgressi sumus, tandemque post aliquot tempestivas venae sectiones, in pedibus potissimum institutas, frictiones, cucurbitarum leuium et incruentorum raptus, genibus praesertim, atque suris admotos, tepida pedum balnea, et thermarum inprimis Wisbadensium vsum, vt alia remedia plura iam taceamus, id per Dei gratiam effectum fuit, vt Menses, hucusque quasi deuii, in rectiorem viam reuocarentur, iustoque tempore, ordine, et copia quoque iusta, reclusis nunc arcanis illis foribus, antea occlusis, magno cum puellae leuamento, commode elaberentur; relicto interea intacto prorsus brachio, in quo quippe, ex eo quidem tempore, nihil plane eiusmodi monstrosi tumoris amplius animaduertebatur.

ILLVSTRATIO

HISTORIARVM CVM EPICRISI.

§. I.

Ex his igitur binis Historiis singularibus nunc perspicue, opinor, patebit, quam subita, violenta, mirandaque prorsus sit metastasis, vt ita loquar, aut metaptosis Mensium, ex diuersis causis, interceptorum,

et naturali suo exitu prohibitorum. Quae tamen maiorem forsan admirationem adhuc excitatura esset; nisi intemerata fide complurium auctorum classicorum, abunde constaret, longe insolentiores et periculosiores adhuc vias per omnes fere corporis partes, ad horrorem formidinemque visentium, sibi, vi quasi rapida, quaesiuisse menstrua, subito cohibita ac repressa. Qua de re prorsus portentosa, quum huius ipsius dissertationis occasione, alibi iam nonnulla a me in medium allata fuerint^{d)}; nunc haud placet, ibi iam semel dicta, hic bis rursus dicere, multo vero minus prouinciam ab aliis iam cum laude, occupatam nimis fero, incassum inuadere.

§. II. Interea vero casum singularem his nostris historiis, in nonnullis fere similem, commemorat PETRVS FORESTVS^{e)}, his quidem verbis, a nobis tamen amicae breuitatis studio hic in compendium missis: *Puella quaedam rustica Desgaia, mense Maio, quum chirurgum accederet, anno MDLXII. ut vena in brachio dextro eidem tunderetur: nam singulis annis idem facere consueuerat. Quum autem eo tempore menses fluere, quod quidem subticuit, vena media in brachio dextro secta fuit: unde et menses statim retracti ad superiora, restricti fuere. Quum tamen fortis et robusta et valida esset; nihil mali tunc temporis, sensit. Postea vero, singulis mensibus, minus profluebant menstruae et consuetae purgationes; et, quod dictu mirum est, eodem tempore, quo soliti erant menses profluere, haec ipsa puella palpitationem experiebatur in brachio eodem, tum loco ipso, ubi vena prius secta fuerat, non sine molestia, et magno dolore. Atque haec ipsa singulis lunaribus periodis puella patiebatur. Haftenus quidem FORESTVS, qui ibidem pluribus tractat et de hoc ipso casu, et de eiusdem cura per opportunam solius venae cruralis notissimae, Saphenae vulgo dictae, sectionem feliciter peracta. Adhuc tamen propius ad hanc nostram primam Historiam accedit ista a THOMA BARTHOLINO, Hist. anat. rar. 19. Cent. v. pag. 34. sequentibus fideliter descripta: Nutrix Iacobi filioli viri clar. M.*

PAVLI

d) Nempe in Programmate huic ipsi Dissertationi inaugurali praemisso, de Menstruis per nares Leonidae Filiae erumpentibus; ab imprudenti vero Medico, cum ipsius interitus, infeliciter repressis.

e) Obseruat. med. 101. Lib. x. p. 725. sqq. Add. omnino Obseruat. 3. Lib. xxviii. pag. 20. sq. ubi simillima de puella quadam rustica, Historia recurrit, nisi potius, quod haud praeter veri speciem suspicamur, sit prorsus eadem.

PAVLI VINDINGII, Regii Prof. lactis ubertate per triennium mensibus destituta, cetera sana, quum mense Octobr. 1657. commissum sibi puellulum tradaret, animaduertit, sanguinem ex dextrae manus saluatella, sponte exilientem, quasi acu puncta. Testabatur vero, nullam vim venae quocunque modo, a se illatam, seu acu, seu alio instrumento; sed sponte apertam esse venam, ut vinculo necesse fuerit cohibere. Quo et apprime facit altera illa historia, ab eodem BARTHOLINO, ibidem enarrata, Cent. 1. Hist. 13. pag. 26. Honestissima et speciosae formae foemina, mihi nota, habitu plethorico, et a copia sanguinis, doloribus capitis saepius afflicta, quia ordinatus subinde mensium fluxus parcior iusto est, saepius facto experimento, obseruauit, se menstruorum tempore, leuiter cutem sinistrae manus, aut dextrae genae, fricet, guttulas sanguineas cum impetu saltuque prolici. Sic et FRID. HOFFMANNVS, parens, in *Analectis suis practicis*, in foemina grauida Hallensi, binis vicibus, in colli latere dextro, spontaneam Venae iugularis rupturam obseruauit, quae si fuit suppressa, incidit in tumorem oedematofum et erysipelaceum, referente ipsius filio, FRIDERICO, ipso longe maiore, in *Annotat. ad POTERII Obseruat. med. singulares*, Cap. 56. Centur. 11. pag. 157. vbi et plura, quae huc potissimum spectant. Quibus bina alia exempla hanc in rem singularia et obseruatu dignissima, addi omnino merentur, quae ipse diligentissimus SCHVRIGIVS quondam Dresdae vidit, et visa accurate descripsit in *Parthenologia*, Sect. 11. cap. 8. pag. 270. Conf huc et ill. van SWIETEN *Comment. in Aphorismos BOERHAAV. Tom. IV. pag. 421. sqq.* quem ipsius generosae munificentiae gratissimus debeo, quod publice hic praedicare fas est.

§. III. Sed in aliis etiam corporis partibus eiusmodi tumores insolitos, post suppressa subito menstrua, exsurrexisse, in medicorum observationibus passim adnotatum legitur. Ita AMATVSLVSITANVS^{f)}, et ex eo MARCELLVS DONATVS^{g)}, foeminae meminit, quae ob mensium retentionem, incidit in linguae crassitiem, ut vix loqui posset: quem molestum linguae tumorem et alia atrociora adhuc symptomata mox insequuta sunt, quae ibi potius legi possunt, quoniam ad nostrum institu-

Cc 2

tum

f) *Curat. medicinal.* 41. Centur. 1.g) *Histor. med. mirab. Lib. IV. Cap. 19. pag. 410.* vbi et alia, quae huc spectant.Conf. RVTSCHII *Aduersar. Anat.* 3. Decad. III. pag. 14. Tom. 1. Opp.

tum huc proprie haud pertinent. Magis vero huc spectat singularis illa RIVERII *Obseru. Lib. xv. prax. med. cap. 2. pag. 439. opp. vidi*, inquit, *puellam, pustulam habentem in capite, quae singulis mensibus aperiebatur, et satis copiosum sanguinem fundebat. Quam memorabilem obseruationem inseruit quoque merito BONETVS Thesauro suo Med. pract. Polyalth. dicto, Tom. III. Lib. v. cap. 14. pag. 88. Not. 14.*

§. IV. Sic et virgini gibbosae, nunquam menstruam purgationem expertae, singulis mensibus, superius labium immane quantum intumuisse, sequentibus refert VITVS RIEDLINVS ^{h)}, *Vixit hic virgo quaedam, nouendecim fere annorum, cetera sana: at per infortunium quoddam, gibbosa: Haec a decimo quarto aetatis anno, singulis mensibus, eo tempore, quo aliae tributum lunare solunt, tumore in labio, praesertim superiore, tantum deformatur, ut et propterea domi se continere, opus habeat, quum praesertim hic tumor nulli medicamento cedat; sed iisdem potius exasperetur etc. vbi vid. in sequentibus plura.*

§. V. Quorsum et potissimum spectat simile exemplum a CASP. THEOPHIL. BIERLINGIO ⁱ⁾, quondam obseruatum atque ita descriptum; *Mihi virgo quaedam nobilissima nota est, quindecim annorum, quae instante mensium fluxu, per tres dies quendam persensit horrorem; deinde ipsi superius labrum intumuit: hinc prima vice, praeterlapsis aliquot diebus, purulenta materia per gingiuas exiuit, tumorque labii remisit. Reliquis vero mensibus, superius labium in tumorem quendam elatum est; sed materia in uno latere collecta, puris instar, non amplius ex gingiuis: sed ex ipso labio effluxit. Haec BIERLINGIVS.*

§. VI. Digna quoque omnino ista est historia, quae huc transferatur ex THOMA BARTHOLINO ^{k)}: *Nobilis in Dania foemina miro quodam implicabatur affectu. Nam per inordinata dierum intervalla erumpebant in cute corporis nodi parui, iuglandium instar; facies intumuit, praesertim oculi et collum, fuereque nodi isti rubri. Causa videbatur suppressus mensium fluxus*

^{h)} In *Lin. Med. Ann. 1700. Mens. Dec. Obs. IV. pag. 1371. sqq.*

ⁱ⁾ *Aduersar. Curios. Obs. 50. Cent. I. p. 93. in Schol. Conf. SCHVRIGII Parthenolog. Sect. II. Cap. 9. p. 214.*

^{k)} *Histor. anatom. rar. 72. Centur. III.*

pag. 146. Conf. et Hist. 15. Cent. I. p. 30. et inprimis eiusdem Act. med. Hafn. Vol. II. Sect. 5. pag. 7. vbi post subitam quoque Lochiorum suppressionem, totum puerperae corpus similibus tuberculis hinc inde oblitum fuit et foedatum.

fluxus, quatuor subinde mensibus subsistens, nec satis bene lien et hepar calidum valebant. Sed post sectam in malleolo venam, propinatamque menstrua cientes potionem Quercetani, post paulo, subductae ex facie maculae, et cum menstruo sanguine sanitas postliminio rediit. Haecenus BARTHOLINVS.

§. VII. Quin et circa aures ipsas mammasque eiusmodi menstruales, vt ita dicam, tumores exortos, tandemque in materiam purulentam resolutos fuisse, iam olim adnotauit ipse noster HIPPOCRATES¹⁾. Sed singularis ipsius ea de re miranda, locus, haud dubie vitiosus, atque hinc obscure et imperite conuersus atque interpretatus, effecit, vt hucusque vel a nemine, vel certe a paucissimis, recte intelligeretur. Producam igitur hic, lectorum quidem pace, nouam meam versionem, ex facillima et verisimillima, vt mihi certe videtur, ipsius deprauati loci emendatione, hic infra subiuncta, concinnatam; *Ancillae asthmaticae malum inde enatum: Quum angusta nimis uteri vasa sanguinem parcius effunderent, mensibus prodituris; tum fiebant ipsi asthmata. Quibus cessantibus, febris superueniebat: tumque mamma sinistra superne, in tumorem eleuata, suppurata est, et ab initio, etiam auris^{m)}.*

Cc 3

§. VIII. Ad

1) Lib. iv. de Morb. Epidem. §. XXI. pag. 757. Opp. Tom. 1. per LINDANVM.

m) Ipse hic HIPPOCR. locus in omnibus Codd. MStis, quondam a nobis inspectis, vt et impressis, (excepta vna Edit. Linden. quae semper fere mala in peiora mutat, et dum vetera sanare vult vulnera, noua infert,) sic legitur: Ἀσθματώδει οἰκέτιδι, ἔνθα ὅταν ἐταγγεία ἡμορροάγησε. τοῖσιν ἐπιμηνίεσιν ἐγένετο δὲ ἄσθματα ἐκῆνα ἐπαύσατο· πυρετὸς ἐγένετο μαζὸς ἐνεπύησεν ἀριστερὸς ὑπερδεν· καὶ ἀπ' ἀρχῆς καὶ ἔς. Vbi, vt quiuis videt, illud ἐταγγεία, monstrum vocis est, quod proinde FOESIVS in ἔτ' ἀγγεία, mutabat, addita perquam dubia et obscura ipsius loci interpretatione: quae tamen ipsa in multis, adhuc melior est Vallesiana, p. 395. in Comment. Nouissime denique Celeb. ADRIAN. HERINGA, Cap. xiv. Obseruat. Crit. pag. 115. sic emendandum censebat, ingeniosa magis, quam felici, auda-

cia: Ἐπάνω τῶν ὠτῶν, κατὰ σλεγγίδα, ἡμορροάγησε, κ. τ. λ. vel et in hunc modum alium: ἔνθα τὴν σλεγγίδα ἔχεν, ἡμορροάγησε. Sed dudum, ante ipsum, vetus hoc foedumque quasi vlcus mitiore medela ita persanare tentauerat B. SAM. BATTIERVS, amicus heu! quondam noster, in Specim. philol. pag. 24. legendo et distinguendo: Τὰ ἀγγεία ἡμορροάγησε τοῖσιν ἐπιμηνί· ἐγένετο ἄσθματα· κ. τ. λ. Nos autem isthaec omnia Auctoribus suis sine censura, relinquentes, leuissima quidem mutatione, locum hunc difficillimum ita constituendum ac restituendum arbitramur. Ἀσθματώδει οἰκέτιδι ἔνθα· ὅταν σενὰ (vel σενγὰ, sed praestat alterum, ἀγγεία ἡμορροάγησε, τοῖσιν ἐπιμηνίεσιν, ἐγένετο δὲ ἄσθματα· ἐκῆνα (scil. ἄσθματα) ἐπαύσατο· κ. λ. Ex quibus nunc sensus ille commodus ac perspicuus illico emergit, quem supra, in versione nostra, expressimus. Sed loco τῶν σενὰ ἀγγεία, posset et elegantius

§. VIII. Ad hanc vero rarionem HIPPOCRATIS obseruationem de auris mammaeque tumore ac suppuratione facilius intelligendam, magisque confirmandam, apprime facere videtur illud, quod SIMON SCHVLTZIVS

elegantius, vnica voce, iunctim legi *σεναγγήη*, quemadmodum sic *κενεαγγήη*, faepius legitur apud ipsum HIPPOCRATEM; quomodo ad eandem formam normamque, apud optimos auctores, frequentius occurrunt: *σενοχωρία*, *σενοσημία*, *σενοδία*, *σενοπία*, *σενοπορία*, *σενοφωνία*, *σενοχετία*, *σενοθύρα*, et similia plura, quae graece doctis notissima. Fuit vero etiam, quum hic simplicissime legerem: *ὅταν εἰσάγῃ ἡμορροάγησε τοῖσιν ἐπιμην*. scil. *ἡ οἰκίτις*, quomodo post ipsum HIPPOC. loquuntur de re simili, ARETAEVS, *Lib. II. de Caus. et Sign. acut. morb. cap. 2. pag. 12.* et alibi. Nisi forte magis placuerit, eodem sensu, legere: *σεῖσιν ἡμορροάγησε*. h. e. *κατὰ σεῖσιν*: quemadmodum DIONYSIVS Hal. *Tract. de miranda DEMOSTHENIS eloquentia*, dixit, *pag. 180. κατὰ σεῖσιν ῥῆ*, guttatim fluit, vt et ATHENAEVS, et ARISTOTELES, alique. Huc DIDYMVS ad HOMER. *Od. M. 351. κατὰ σεῖσιν, ἢ ἐπὶ κατ' ὀλίγον ὑποῖ*. ῥῆν: Sic etiam EUSTATHIVS. Denique nec inepta, aut inscita, me quidem iudice, sequens foret lectio: *ἐπ' ἀναγωγῇ*, vel *ἐξ ἀναγωγῆς ἡμορροάγησε*, scil. *ἡ οἰκίτις*. Est vero *ἀναγωγή*, ceu notum, sanguinis ad superiora, veluti pulmones, fauces etc. adscensus subitus, eiusdemque per eadem, violenta eruptio. Inde bene, vt solet, ARETAEVS l. c. *ἡ δὲ ἀπὸ θώρηκος, καὶ τῶν νέφθων σπλάγχνων, αἵματος φορὴ ἀναγωγή καλεῖται*. Quibus statim ibidem, *pag. 13.* subiungit, quod potissimum huc facit, foeminas praesertim menstrua purgatione diutius carentes, obnoxias esse eiusmodi metuendae *αἵματος ἀναγωγῇ*: de qua praeter ea videantur, si opus, praeter GALENVM, PAVLLVS AEGINETA, *Lib. III. cap. 31. pag. 40. 6.* AETIVS, *Lib. VIII. cap. 65. pag.*

170. sqq. ALEXANDER TRALLIANVS *Lib. VII. cap. I. pag. 286. sqq.* et alii; item FOESIVS, in *Oecon. Hipp.* DIETERICVS, in *latr. Hipp.* PETITVS ad ARET. *p. 156.* et alii plures. Cunctis tamen hisce coniecturis, licet forsan haud plane spernendis, merito praetulerim priorem, quam nempe *σεναῖ ἀγγῆα*, vel *σεναγγῆη*, legendum esse, existimabam. Ceu potissimam enim suppressorum menstruorum causam, *σεναῖ ἀγγῆα*, et *σεναῖς διόδους* allegant ARETAEVS, AETIVS et HIPPOCRATES ipse, qui etiam de primis laboriosis plerumque virginum mensibus, *Lib. de Genitura, pag. 126.* dixit. *διὰ σεναῖν ὁδὸς καὶ διόδους γίνεται*, et *Lib. de Virgin. Morb. pag. 356. τὸ εἶμα τῆς ἐξόδου μὴ ἀνεσομωμένον*: item *Lib. I. de Morb. Mul. pag. 456.* et alibi in seqq. meminit *μητρῶων σενοσώμων*, quibus mox *pag. 457.* opponuntur ab ipso *μητραι εὐρύσομοι*: quomodo etiam *σενοτήτας* et *σεινώματα τῆς μήτρας*, pariter dixerunt GALENVS, AETIVS, MOSCHION et alii. Vbi vero talis est viarum occultarum angustia, et vasorum vterinorum arctior contractio; tum sane sanguis menstrualis perparce tantum et stillatim magno cum labore et dolore, e natura descendere potest, maiore et crassiore ipsius parte interim intus relictā, et ad caput, petus et alia loca, cum periculo, delata. Quem singularem affectum AETIVS, forsan primus, non sine elegantia, vocauit *τὴν τῶν καταμνήων σεαγγερίαν*, *Tetrabib. IV. Serm. 4. Cap. 63. pag. 797.* et MOSCHION quoque de. *Pass. Mul. cap. 126. pag. II. ἐνίοτε σὺν ὀδύνῃ σεαγγοειδῶς φέρονται τὰ ἐμμηνα*: de quo vid. TRINCAVELL. apud SCHENCKIVM, *Obs. 255. Lib. IV. p. 354. sqq.* et TIMAE. A GULDENKLEE, *Cas. med. x. Lib. IV. pag. 208.* item CAPIVACC. *Med. pract.*

SCHULTZIVS ⁿ⁾ retulit de foemina, quae mensibus aegre parceque admodum fluentibus, binas semper vesiculas, post singulas aures, praeuio capitis dolore, leuique vertigine, percipiebat, quae sponte aperiebantur, et effusa serosi humoris, coloris citrini, exigua copia, iterum euanescebant.

§. IX. Quale quid vel nosmet ipsi olim conspeximus in puella nobis agnata: cui pubertatis annos iam ingressurae auris dextra semper tumebat, rubebat, dolebat, atque acri mordacique humore madebat. Quo vel sua sponte, vel admotis etiam externis quibusdam remediis, (nam impatiens saepe erat puella molesti doloris) ficcato ac represso; vehemens protinus subsequebatur dextri oculi ophthalmia, ita, vt ad maius periculum auertendum, per applicata statim pone aurem, vesicatoria, humor iste auersus reuocandus esset. Simul ac vero ex consueta naturae lege, statò tempore, menstrua ipsi ferebantur, tum saeua ista symptomata omnia illico remittebant, ita vt et auris et oculus salui intactique in posterum manerent.

§. X. De simili autem mammae tumore, huc potissimum conferri meretur sequens singularis obseruatio magni quondam OLAI BORRICHI ^{o)}. *Ancilla Dn. IAC. VAN HAM, nescio, qua febricula languens, aduocato*

praef. Lib. IV. cap. 3. pag. 784. sqq. opp. praesertim vero ALBERTINI BOTTONI de Morb. Muliebr. Cap. LV. pag. 384. apud SPACH. Sensus igitur huius loci, hactenus diligenter illustrati, vt tandem finiam, hic esse videtur: Menstrua nempe perparce et stillatim tantum processisse; unde maior potiorque ipsius copia, ostio inferiore obstructo, versus pectus et caput subito adscenderit, ibique inertis suo pondere, molestam asthmata induxerit: donec febre, ceu medico, opportune accedente, collecta illa effoeti putridique sanguinis quantitas tandem in maturum pus excoqueretur, et aure, mammaeque vel sua sponte ruptis, vel arte apertis, summo cum aegrotae allevamento, et pertinaci illo asthmate penitus sublato, salutariter effunderetur. Sed satis iam, nisi forte nimium, quod equidem vereor, de huius obscuri et perplexi loci Hippocratici ex-

plicatione, quam interim aequo lectorum humaniorum arbitrio lubens submitto. Ceterum huc referenda omnino illa singularis est Historia, in *Commerc. litter. med. Norimb. de Ann. 1738. pag. 282.* de foemina quadam iuencula coelibe, quae per integrum annum, mensibus defecta, asthmate, rauedine et tumore pedum oedematoso inuadebatur, quibus malis subito obruta, paullo post misere periit; longe quidem infeliciores suo fato, Ancilla illa Hippocratica, melioris naturae beneficio seruata.

ⁿ⁾ *Miscell. Natur. Curios. Decad. I. Ann. 6. et 7. Obs. CCXXXIII. pag. 342. sqq. Conf. SCHVRIGII parthenolog. Sect. II. cap. 9. pag. 215.*

^{o)} *Apud THEOPHIL. BONETVM, in Medicin. Septentrional. Tom. II. Lib. IV. Sect. 2. Obs. 25. pag. 37. Conf. BALLONII Lib.*

cato chirurgus, venam brachii incidendam offert, durante menstruo fluxu; et ex febre quidem conualefcit; sed intercepto mox sanguinis per inferiora procursu sentit paullatim praecordia sibi aggrauari, et in mamilla sinistra pullulare nodosum quiddam, quod aliquot mensium spatium ita ad augeri, liuescere, et punctiunculis molestum esse perrexit; ut, nisi mature cum PHILIPPO HACQVARTO occurriffem malo; haud dubie in desperatum erupisset carcinoma p). Hactenus laudatissimus BORRICHIVS: qui statim ibidem binas pares fere historias, sed multo luctuosiores, subiungit, quae isto quidem loco legi commodius possunt a quouis harum rerum curioso. Ceterum autem hanc ipsam observationem Borrichianam in multis conuenire cum ista, ex FORESTO superius allata, (§. II.) lector facile deprehendet.

§. XI. Verum et sub Hypochondriis eiusmodi tumores insolitos subinde enatos fuisse, compertum est. Ita HIPPOCRATES ipse q) in serua, recens emta, quam ex more antiquo diligenter inspexit r), ut de ambi-

Lib. II. Epidem. et Ephemerid. pag. 261. et IDONIS WOLFII Obs. Chir. 20. Lib. I. pag. 66.

p) Iam dudum ipse HIPPOCRATES suspectos eiusmodi et in tetros cancos facile transituros tumores post suppressa menstrua, obseruauit in mammis, Lib. II. de Morb. Mul. pag. 553. et alibi (ἐν τοῖσι τιτθῶσι φυμάτια γίνονται σκληρά, τὰ μὲν μείζω, τὰ δὲ ἐλλάσσω. ἅτα ἐξ αὐτέων φύονται καρκῖνοι κρυπτοί.) Qualibus funestis exemplis quam plurimis omnes fere Chirurgorum Commentarii abundant: vid. VESAL PARAE HILDAN, FOREST. FALLOP. SCVL-TET. DIONIS. PLATER. et alios plures; item ill. VAN SWIETEN, Comment. Tom. I. pag. 854. et pag. 877. et BOERHAAVE prax. Med. Tom. II. p. 244. sqq. Multa quoque hanc in rem, ipsi quondam attulimus exempla, in diff. de nociua Cancri inueterati Extirpatione, quae, si tanti, ibi plegantur.

q) Lib. IV. de Morb. Epidem. §. XXII. pag. 759. Tom. I. opp.

r) Vsu nempe olim receptum erat apud Graecos, Romanos, aliasque cultiores gentes, ut in Mancipiorum Venditione et Em-tione, periti simul Medici interdum adhiberentur, qui ipsorum corpora nuda, aut deuestita, ut eleganter ait APVLEIVS, diligenter inspicerent, et simul vbique contrectarent; posteaque ex arte, atque fide, iudicaret, vtrum sana essent ac integra; an vero contra vitiosa, aut morbo-fa? ut inde Redhibitioni locus esse posset. De quo singulari ritu, vid. inprimis BARTH. ad CLAVDIAN. Lib. I. in Eutrop. v. 35. vbi insignis de hoc more, extat locus, in istis praecipue verbis: *Nudatus quoties, Medicum dum consulit Emptor*, item interpretes ad APVLEII Apolog. pag. 303. et BRITANNICVS, ad IUVENAL. Sat. XI. pag. 622. nec non DES. HERALDVVS, ad MARTIAL. Epigr. 82. Lib. VI. p. 131. PIGNORIVS, de Seruis, pag. 53. MERCVRIAL. Var. Lect. Lib. II. cap. I. p. 26. praesertim autem RADVLPH. FORNERIVS, Lib. II. Rer. quotid. c. 26. p. 74 sqq. item

ambigua eius sanitate iudicaret; nam per septem integros annos, quod sane mirandum, menstrua ipsam defecerant, *tumorem magnum durumque in dextra corporis parte observavit*^{s)}: qui tamen postea, singulari naturae beneficio, accedente dysenteria ac febre, quasi medico, et redeuntibus exinde auspiciato mensibus, tam diu interceptis, tandem perfecte resolutus ac dissipatus fuit.

§. XII.

item BRISSONIVS, *Lib. VI. de Formulis*, pag. 492. IO. LANGIVS, *Epist. med.* 75. *Lib. I. pag. 411.* et IO. RVDOLPH. CAMERARIUS, *Memorabil. med. cap. 15. Centur. XVI. pag. 1301. Tom. II.* denique etiam SCIPIO GENTILIS, *Origin. ad Pandectas*, pag. 282. Attigit quoque nouissime eundem hunc morem Cl. IVGLERVS, amicus quondam noster in aula Weissenfels. in eleganti Libello, *de Nundinatione Seniorum*, cap. v. pag. 52. *sqq.* Sed haec obiter: Sunt enim alterius loci. Plura vero de hac singulari consuetudine, in Venalitiis olim usitata, neque tamen in hunc usque diem, penitus abolita, ut praecclare docet RODER. A CASTRO, *Med. polit. Lib. IV. cap. 13. pag. 263.* aliquando, si Deo ita visum fuerit, dicturissimus, in *Comment. nostro ad Edictum aedilitium.* Conf. interim, si placet, *Obs. nostr. Crit. Lib. IV. cap. 13. pag. 373. sqq.*

s) Ipsa HIPPOCRATIS verba hic sic fluunt: τῇ δίκητιδι, ἣν νεώνητον εἶσαν κατὰδον, σκλήρωμα ἐν τοῖσι δεξιόσιν ἐνὶν μέγα, κ. τ. λ. ubi contra omnium Codd. fidem, quin et ipsius GALENI auctoritatem, *Lib. III. de Respirat. difficil. cap. 12. pag. 289. Tom. VII.* LINDANVS more solito, de suo, infelicitèr intrusit ἥπατος, scil. σκλήρωμα, ita, ut VALLESIVM, *Comment. in h. l. pag. 402.* male sequutus, intelligat Hepatis scirrhum. Quod si vero adeo inueteratus, per septem nempe annos, in ipso hepate, scirrhus fuisset; tam facile profecto, et sua quasi sponte,

nunquam dissolui potuisset, quin potius δύσλυτος et δυσίατος, ut GALENVS ait, h. e. indissolubilis et immedicabilis, mansisset, adeo, ut hinc, haec recens emta serua, ob hoc insanabile corporis vitium, redhiberi omnino debuisset. Sic enim manifesto ipse VLPIANVS, *l. 12. §. 4. ff. de aedilit. Edict. Si ex corporis vitio id accidit;* (scil. quod male oleat os, quod praecessit,) *veluti quod iecur, quod pulmo, aut aliud quid similiter, dolet, morbosus est.* Vbi τὸ dolet, contra ipsam Cod. Florent. fidem, male in olet, mutabat ampl. BYNKERSHOEK, *Observat. Iur. Rom. Lib. III. cap. 23. pag. 321.* veteres quasdam Editt. perperam sequutus. Ipsum enim vetustissimum illud pandectarum Florentin. exemplar graecum, literis capitalibus quadratis, et sine accentibus, scriptum, tum non viderat BYNKERSHOEK, nec quisquam alius Ictorum omnium, imo hominum omnium, vidit illud, quoniam nusquam gentium, aut locorum, extat. Vnus tamen homo, reliquis omnibus oculatior ac felicior, quod utique mirum, illud venerandae antiquitatis exemplum graecum, tanquam a se ipso visum, accuratissime descripsit. Risum teneatis amici. Sed haec obiter, honesti ioci gratia. Namque, *si iecur dolet*, pariter aperte dixit CORN. CELSVS, *Lib. V. cap. 18. pag. 251. conf. et Lib. IV. cap. 3. pag. 213.* quomodo nempe ipse HIPPOCRATES: τὸ ἥπαρ ἀλγέει, πονέει, καὶ νοσέει, ut praedict. *I. p. 475. de Intern. Aff. p. 228. 233.*

§. XII. Cui geminum plane sequens est exemplum, a summo quondam viro, THOMA BARTHOLINO^{t)} ita relatum: *Suppressis mulieri Malmogianae menstruis euacuationibus, ingens sub costis spuris, dextri lateris, oriebatur tumor, circa hepatis regionem, de cuius dolore saepius antea fuerat conquesta. Aperto abscessu maturo, pus effluxit cruentum, percuratoque ulcere, sana vixit, ex voto deinceps mensibus fluentibus.* Haec ille.

§. XIII. A quo haud longe abest istud a PHILIPPO HOECHSTETTERO^{u)} commemoratum, de foemina, cui ex menstruis nec iusto ordine, nec sufficienti copia, decurrentibus, sub hypochondrio sinistro, iuxta costam inferiorem spuriam, ingens ac renitens tumor, instar tomaculi, intolerabili fere cum dolore, enatus fuit: frustra licet tum dubitantibus et inter sese disceptantibus medicis concurrentibus, cuiam potissimum causae tumor iste insolitus originem suam veram deberet.

§. XIV. Nec silentio praeterire hic decet singularem illam Observationem, ab ill. GERARDO VAN SWIETEN, Commentariis suis, omne in aeuum victuris, sequenti quidem modo insertam^{x)}: *Rustica*

et 235. et alibi saepius. Illis autem, qui iecur diutius male affectum, scirrhosum, aut corruptum habent, anima semper fere foetet, seu olet, vt notum: vid. huc CAEL. AVREL. Lib. III. de Morb. Chron. cap. 4. pag. 449. ideo longe minore emphasi, olet, hic legebat BYNKERSKOEK, pro dolet, quod vnice verum. Quod ipsi tamen, ceu *ἀνίαττα*, ob reliqua ingentia merita, facile condonandum. Ceterum conf. huc. CLAVD. MVSAMBERT. in RAMIRES, hypomnem. in MARTIAL. pag. 150. Sed haec hic seniorum Lectorum pace, amoenae forsan varietatis et condimenti quasi gratia, oblata sponte occasione, interiecta sunt. Praestat igitur, vt ad ipsum HIPPOCR. locum regrediamur, potius statuere, forsan circa vteri regionem, isti Seruae Tumorem illum enatum fuisse; quam cum LINDANO, temere credere, ex vitio,

quinqua-
scirrhoque immedicabili indurato, hepate originem suam traxisse: praesertim quum ipse fileat HIPPOCRATES.

t) *Hist. Anat. rar.* 87. *Centur. II. p.* 327. Conf. AVGVSTIN. THONERI, *Obs. Med.* 5. *Lib. IV. pag.* 214. Quae Historia, ibi descripta, forsan huc etiam faciat. Ita et post suppressa subito lochia, similem sub hypochondrio sinistro, tumorem, multam demum saniem effundentem, in puerpera observauit, curauit ac descripsit HAGENDORNIUS, *Obs. med.* 18. *Cent. III. pag.* 303. *sqq.* vbi etiam simul ad SENNERTVM nostrum prouocat, in *Prax. med. Lib. IV. part. I. sect. 2. c. XI. p.* 73.

u) *Observat. Med. Cas. 2. Decad. IX. pag.* 310.

x) *Tom. I. Comment. in BOERHAAV. Aphorif. pag.* 849. Conf. huc etiam VALERIO LAE *Enarrat. med. 6. Lib. V. pag.* 694.

quinquaginta et unum annos nata, numerosae prolis mater, sana satis vixerat: Ante quinquennium aegrotare inceperat, menstruis subito suppressis, et crebro vomitu, simulque tumore abdominis sensim increcente, qui totum hypochondrium dextrum occupans, manibus palpari poterat, et versus sinistram corporis partem dimoueri: Tandem post insignes cruciatus perijt. Aperto cadauere, praeter alia mala, omnes glandulae mesenterii scirrhusae inuentae fuerunt; et simul apparuit, tumorem illum, qui exterius palpari potuit, fuisse pancreas tumidum et scirrhosum. Haftenus magnus ille Viennensium Aesculapius.

§. XV. Quorsum et apposite spectat miranda illa historia, quam fuse et exacte perscriptam, ad I. O. I. A. C. HARDERVM quondam misit cel. CAROLVS SPONIVS y); de quadam scilicet foemina, cui, mensibus propter effoetam iam aetatem non amplius respondentibus, in hypogastrio monstruosus et immensus paene tumor obortus erat, sero copioso cruento, quod post cadaueris sectionem, demum patuit, repletus.

§. XVI. Quo et altera omnino pertinet historia, apud eundem HARDERVM, in antecedentibus quam diligentissime consignata z), de alia quadam ornatissima matrona, quae corpus tenerum ac delicatum frigentibus vndis intempestiue immittendo, sua culpa menstrua repente perdiderat, cuique inde tumor ingens in sinistro hypogastrio sensim subnatus fuit, qui postea versus hypogastrium dextrum late extensus, totum fere illud spatium, quod ab vmbilici regione deorsum exporrigitur, foede occupauit, et, vt post mortem pariter manifesto apparuit, simili plane tabo, sanie et sanguine atro, ad stuporem fastidiumque visentium, turgidus fuit. Simile vero post frigidum balneum accidit puellae menstruatae, cui, mensibus inde frigore suppressis, glandulae colli ita subito intumescebant, vt paene suffocaretur, nisi opportuna venae sectio in pede prudenter instituta illam imminenti vitae periculo feliciter tandem eripuisset: de quo memorabili casu vid. *Commerc. litterar. medic. Norimb. de anno 1738. pag. 36.*

Dd 2

§. XVII.

y) In *Apiario* HARDERI *Observat. LXXXVIII. pag. 330. sqq.*

Conf. *POTERII Obs. Cen. III. cap. 47. pag. 240. et ibi HOFFMANN.*

z) *Ibidem, Observat. LXXV. p. 286. sqq.*

§. XVII. Neque vero crura ab eiusmodi insolitis tumoribus prorsus immunia esse, vel sequens GEORGII FRANCI obseruatio luculentius testabitur^{a)}; *Virgo rustica annorum viginti, temperamenti melancholico-sanguinei, iam a duobus annis menses rite fluentes non habuit; sed saltem paucos: Quare in cruribus, et prope malleolos, aliquoties tumores in venis, liuidos et subcoeruleos obseruauit ad mori vel vuae magnitudinem: quos nodos neglexit. Accidit autem quinquies, ut sponte sua rumperentur. Vbi reliqua, si lubet, videantur.* Cui commodè iungatur ista IO. PETRI LOTICHII obseruatio de puella quadam, quae a subita mensuum suppressione, tumorem, acuto dolore perquam molestum, in utroque pede conceperat^{b)}. Quo et inprimis pertinet illa historia, priori quidem simillima, a THOM. BARTHOLINO relata^{c)}, de ancilla quadam, cui mensibus instantibus, sed non satis iuste fluentibus, tumores in pedibus exorti sunt, qui sua sponte demum disrupti, sanguinem copiose profuderunt; quod saepius sic accidisse, ibidem liquido affirmat laudatissimus auctor.

§. XVIII. Aliquanto tamen frequentius ipsa molliora inguina ab huiusmodi tumoribus occupari, pridem obseruatum fuit. Ita ipse IAC. HOLLERIVS^{d)} candide testatur: *se uno tantum anno vidisse, plusquam ducentas puellas, quibus medio vere, non satis exeunte sanguine menstruo, tumores in inguinibus nascerentur.* Quod sane fidem paene omnem excedere videretur, nisi grauiissima tanti viri auctoritas et dudum alibi testata saepius fides omnem statim dubitationem penitus tolleret.

§. XIX. Sed nec id ipsum olim ipsi nostro HIPPOCRATI, pro mira sua solertia, inobseruatum fuit. Non enim solum post suppressa

a) In *Miscell. Nat. Cur.* Dec. I. Ann. 6.

et 7. obs. xxii. pag. 51. Conf. SCHVRI-
GII *Parthenolog.* Sect. II. cap. 6. p. 184.

b) *Obs. Med.* 23. Cap. I. Lib. V. p. 482.
Conf. BALLONII *Lib. II. Epid.* p. 261.
Item RIVERII *Obs. med.* 13. Cent. III.
pag. 615. et ibid. PASCHÉQVI *Obs.*
13. pag. 657.

c) *Hist. Anat. rar.* 16. Cent. I. p. 31 sqq.
Conf. VERZASCHAE *Obs. med.* XIII
pag. 35.

d) In *Lib. III. Coac. Hippocr.* No. 40.

pag. 346. Conf. huc ill. VAN SWIE-
TEN, *Comment. in Aphor. BOERHAAV.*
Tom. I. pag. 854. et SEVERINI *Lib. IV.*
de Abscessibus, cap. 26. pag. 297. Item BAL-
LONII *Lib. II. Epidem. et Ephemerid.* pag.
260. et SCHVRIGII *Mulier. Sect. III.*
cap. 2. p. 268. et 269.

e) *Lib. nempe, de Nat. Mul.* pag. 374.
et *Lib. II. de Morb. Mul.* pag. 580. et alibi
saepius,

diutius menstrua, duritiem inguinum saepius adnotavit e); sed et hos ipsos tumores circa eandem regionem frequentius exsurgentes ita accurate descripsit, immo, ut rectius dicam, vivis quasi coloribus depinxit f); adiecto simul grauissimo et omnibus chirurgis saluberrimo monito: *Quibusdam mulieribus ubi bimestres, aut trimestres, aut diuturniores fuerint menses, et ad lateris mollitudinem allapsi videantur; quum non suppurati sint menses; veluti tuberculum fit supra inguen, sine capite, magnum, rubrum: et vulgus medicorum ignarum, quid hoc esset, iam saepe secuerunt, et sic in periculum induxerunt.* Vbi videnda et diligenter ponderanda sunt reliqua, quae ibidem sequuntur.

§. XX. Ad quem notabilem HIPPOCRATIS locum GALENVS omnino respexisse videtur, sequentibus quidem verbis g): *Quod si longiori tempore supprimantur menstrua, nullamque medicus mulieri vacationem promoueat; tumor aliquis praeter naturam in ilibus interdum exoritur, ostendens, ex internis partibus quandam esse inflammata.* Nonnullis panus in extrema ilium parte, excitatur, qui nonnunquam suppuratus, secari debet. Haec quidem GALENVS, ad mentem scilicet ipsius HIPPOCRATIS.

§. XXI. Licet igitur omnes isti tumores haecenus diligenter enarrati, triplici plerumque modo soluantur: quum nempe vel naturae im-

saepius, vocantur βιβρώνες σκληροί, ubi et occurrit σκληρότης βιβρώνων. Conf. ill. VAN SWIETEN, *Comment. Tom. I. p. 850.* item FOREST. *Obs. 7. Lib. XXVIII. pag. 51.* et SCHENCK. *Obs. 242. Lib. IV. p. 250. Tom. II.*

f) *Lib. I. de Morb. Mul. pag. 421.* ubi HIPPOCRATES ipse sic elegantius loquitur: *ἔσιν ἡσιν, ἐπὶν δίμηνια, ἢ τρίμηνια, ἢ χρονιώτερα, ἢ τὰ ἐπιμήνια, καὶ προσπέσῃ πρὸς τὴν λαπαρὴν, μὴ διαπύων τῶν καταμηνίων ὄντων, ὥς φύμα γίνεται ὑπὲρ τῶ βιβρώνος, ἀκέφαλον, μέγα, ἐρυθρόν. Καὶ τῶν ἡγρῶν πολλοὶ ἤδη, καὶ ἔδοτες τῆτο, οἷον ἔσιν, ἔταμον, καὶ ἐς κίνδυνον ἡγχιον ἔτως.* Ad quem singularem et perquam notabilem HIPPOCR. locum, vid. quae docte commentatus est MAVRIT. CORDAEVS, apud SPACH. in *Sylloge Gynaec. p. 522.*

sq. nec non MARTIN. AKAKIA, *Lib. I. de Morb. Mul. cap. 22. pag. 771.* ibidem, in eodem opere: quibus add. MARC. AVREL. SEVERINI *Lib. IV. de Abscess. cap. 26. pag. 298.* et, qui ibi laudatur, IUL. CAES. ARANTIVS, *Lib. de Tumoribus, P. II. cap. 46.*

g) *Lib. VI. de Loc. affect. cap. 5. p. 524. Tom. VII. Opp. per CHARTER.* Vbi Auctor ipse sic sua lingua, scribit: *καὶ πολλῶ χρόνῳ τὰ καταμήνια κρυφθῇ, καὶ μηδεμίαν κένωσιν ὁ ἰατρός τῇ γυναικὶ προσαγάγῃ, φαίνεται τις ἐνίοτε κατὰ τὸν κενεῶνα, παρὰ φύσιν, ὄγκος, ἐνδεικνύμενος, δια βλάβης εἶναι τὸ φλεγμαίνον. Ἐνίοτε δὲ καὶ φυματώδης ὄγκος ἐγέρεται κατὰ τὸ πέρας τῶ κενεῶνος, καὶ τινὶ διεπύησε, καὶ τομῇς ἐδεῖθῃ.* Vbi vid. si placet, reliqua.

petu rumpantur, et sanguinem intus collectum effundant^{h)}: vel sua sponte rursus evanescantⁱ⁾: vel denique in suppurationem trans-
eant^{k)}; prout exempla varia superius allata affatim testantur: frequen-
tius tamen illi praesertim tumores, qui in inguine subinde attolluntur,
propter loci nempe istius opportunitatem et mollitudinem, in suppu-
rationem tendere consueverunt; quod nec ipsum HIPPOCRATEM
ignorasse, luculenter constat ex sequenti ipsius sententia^{l)}: *Sunt etiam
foeminae, quibus circa inguen, velut tuberculum, fit, illicque suppuratum exit.*
quam ipsam suppurationem alibi saepius idem vocavit *menses suppuratos*
ac *putridos*, seu *putrefactos*^{m)}.

§. XXII. Non tamen semper expectanda, multo minus violenter
ibi cogenda est suppuratio; quum redeuntibus in iustum ordinem
mensibus, isti elati inguinum tumores saepius sua sponte, rursus subsi-
dere, atque sine ullo collecto aut emisso pure, detumescere soleant.
Nisi ergo manifesta ibi adsint puris ad maturitatem iam percocti indi-
cia; qualia nempe chirurgis vulgo cognita sunt potissimum sequentia:
partis ipsius mollities, pressi tumoris fluctuatio, cutis albedo, doloris,
caloris, ruboris, tensionisque remissio, item vertex tumoris mucrona-
tus, et quaedam denique ipsi dolori succedens grauidas, vt post CEL-
SVMⁿ⁾, aliosque prudenter monuit BOERHAAVIUS^{o)}, tum istos
quidem tumores, propter ambiguum adhuc euentum, intactos plane
praeterire,

h) Vid. supra, *Historia prima*, item §. XVII.

i) Vid. *Historia secunda*, et §. §. IV. VI. X. XI. XIII. et XVIII.

k) Conf. §. §. V. VII. VIII. XII. XX. et hic ipse §. XXI. in fine.

l) *Lib. de Natura Pueri*, p. 138. *Tom. I. Opp.* vbi verba ipsa haec sunt: *ἐστὶ δὲ, ἡσὶ καὶ κατὰ βεβῶνα, ὡς φῦμα, γίνεται, κακὴ πύον γενομένην, ἐξήλθε.*

m) Scilicet *ἐπιμήνια διαπύα καὶ σεσηπότη*, *Lib. I. de Morb. Mul.* pag. 420. et p. 423. saepiusque alibi, in istis *de Morb. Mulier.* Libris. Vid. huc imprimis, MARTIN. ΑΚΑΚΙΑ, *Lib. I. de Morb. Mul.* cap. 22. pag. 771. apud SPACHIVM, vbi de his

Mensibus suppuratis, plenius ac diligen-
tius tractatur. Apud reliquos autem Au-
ctores, numero certe haud paucos, qui
in eo ipso argumento illustrando, versati
sunt, tetri huius ac periculosi simul affe-
ctus aut parca admodum facta est mentio,
aut prorsus nulla, ceu ex MERCVRIA-
LI, RODERICO A CASTRO, BOT-
TONO, PARAEO, MONTANO, VA-
RANDAEO, et aliis patet.

n) *Lib. V. cap. 28. Sect. II. pag. 326. sqq.*
et *Lib. VII. cap. 2. pag. 409. etc.*

o) *Aphorif. de Cognoscend. et Curand.*
§. 405. p. 58. vbi maxime vid. ill. VAN
SWIETEN, *Comment. Tom. I. p. 701. sqq.*
add. ΑΚΑΚΙΑ, loco modo allegato.

praeterire, ipsique naturae soli committere praestabit, quam medicina externa, plus nocitura, minus autem profutura, eosdem adoriri.

§. XXIII. Caueant igitur sibi in posterum medici ac chirurgi quam diligentissime, ne eiusmodi tumores in inguine exortos protinus pro furunculis, aliisue abscessibus, aut, quod longe adhuc deterius, pro venereis adeo bubonibus, imprudenter habeant, eosque inde variis remediis et epithematis discutientibus, emollientibus, digerentibus, resoluentibus, maturantibus et pus denique mouentibus, temerario prorsus ac funesto plerumque consilio, adgrediantur, aut, quod longe adhuc peius ac detestabilius est, saeuo scalpello aperire crudeliter audeant: Quin potius, vbi foeminas aut puellas ex tumoribus inguinum, aut aliarum etiam corporis partium laborantes, curandas susceperint, prius ante omnia quam sollicitissime inquirent, quomodo ipsum menstruorum negotium sit comparatum, vtrum nempe recto liberoque cursu, statis temporibus, ista ferantur, an vero contra solito parcius lentiusque elabantur, aut in angustis vteri claustris prorsus intercepta haereant, frustraue ibi luctando exitum moliantur?

§. XXIV. Quum igitur vel minima suborta fuerit suspicio, a mensuis, aut diutius retardatis, aut plane suppressis, repetendam esse horum quidem tumorum originem, tunc ab omni externa medicatione, praesertim chirurgica, penitus abstineant, ne grauissimam simulque iustissimam HIPPOCRATIS censuram, superius iam adnotatam p), suo merito incurrant: Sed securiorem potius tentantes viam, per opportunas sanguinis missiones, et blandiora remedia menses ducentia, vulgo emmenagoga dicta, supra iam strictim indicata q), turbatos, deuiosque a recta via, menses in iustum rursus ordinem redigere studeant: tum sane isti tumores, praesertim si nondum inueterauerint, et ex diuturniore

p) §. scilicet XIX. τῶν ὑπερῶν πολλοὶ ἤδη, *runt.* Conf. hnc B. HEYCHERI *Opp.*
ἐκ ἰδιότης τῆς, οἷον ἐστὶν, ἑταμον, καὶ ἐς *Med. p. 316. sqq.*
κίνδυνον ἡγαγον ἕως. *Multi medicorum,*
ignari, quid hoc Tuberculum esset, illud
audacter secuerunt, et sic miserandas foe-
minas in summum vitae discrimen adduxe-
Med. 9. Lib. IV. pag. 207.

q) Vid. *Historia Secunda.* Add. 10.

HELLWIGII *Obs. Med.* LVI, pag. 190.

et TIMAEI GÜLDENKLEE, *Cas.*

Med. 9. Lib. IV. pag. 207.

turniore temporis mōra, pertinacem duritiem contraxerint, beneficio ipsius naturae vel sua sponte discutientur.

§. XXV. Quam funestum enim plerumque euentum sortiantur eiusmodi intempestiue adhibita remedia chirurgica generosiora, aut rectius, crudeliora, in cogendis, vel natura ipsa inuita, ad suppurationem huius generis tumoribus; vel vnicum illud, sed perquam flebile, exemplum, ab EBERHARDO GOCKELIO^{r)}, diligenter enarratum, abunde, opinor, testabitur: quod, etsi aliquanto longius; tamen huc, propter utilitatem publicam exinde forsan sperandam, transcribere haud grauabimur.

§. XXVI. MARGARETHA GLASERIA, aetatis XXI. annorum, temperamenti pituitosi, habitus corporis gracilis, anno MDCLXXVIII. mense Augusto, in dextro pede, quum prius menses defecissent, imbecillitatem facultatis motricis cum dolore pedem percurrente, ex qua causa per XIV. dies claudicauit, nullo signo in exteriori parte se manifestante, sensit. Die solis dum scabellum suarum ascendere volebat, motu humoris, ad inferiora ruentis, veloci ac repentino, maximos et lancinantes dolores in inguine dextro sensit, quae de causa aliter non, nisi in brachiis, ab aliis ducta et suffulta, ambulare potuit. Urina tum temporis fuit sanorum similis. Progressu temporis doloribus quotidie crescentibus, tumor seu bubo insignis, cum alio minore, in dextro inguine apparuit, qui primo discutientibus, post modum emollientibus ac maturantibus tractati, cooperante natura tandem aperti sunt; per quorum multos ac varios cuniculos plurima ac copiosa sanies, per temporum vicissitudines, se exoneravit. A quo tempore patiens indefinenter lecto affixa mansit. Post exonerationem materiae purulentae, semper melius habuit; sed, dum nouum pus generaretur, de magnis cruciatibus conquesta est. Interim etiam semper defecerunt et emanferunt menses, ac pes dexter in tantum contractus fuit, ut eum minime extendere valeret. Cibi, quos assumpsit, per foramina ulceris in inguine, tali forma et figura, quali ingesti erant, per annum et semestre non alterati, crudi, et incocti, rursus egesti sunt: interdum etiam alui excrementa per dictas vias eructauit. Quibus interim accessit atrophia, seu tabes totius corporis, cum dolore ferme intolerabili, ac horrore febrili, alternatiue inuadenti-

r) Consil. Medicinal. XLIII. pag. 450. sqq.

bus, nec non vomitibus biliosis; donec die lunae, XIX Jun. ann. MDCLXXX. vesperi, hora nona, animam tandem exhalavit. Hucusque laudatus supra GÖCKELIVS. Haec ipsa vero memorabilis historia luculentus quidam, imo vius quasi commentarius esse potest locorum istorum HIPPOCRATIS, perquam obscurorum et a paucis intellectorum, de inguinum nempe tumoribus, pus tandem effudentibus, de quibus supra actum §. §. XVIII. et XXI. atque simul perspicue docet, quid proprie sint apud eundem HIPPOCRATEM ἐπιμήνια διάπυα καὶ σεσηπότα, seu menses suppurati, putridi ac putrefacti, de quibus pariter supra tractatum. Isti autem lugubri historiae Gockelianae perquam similis profecto est sequens historia notabilis, a cl. BURGHARTO accurate commemorata in *Satyr. Medicor. Siles. Specim. v. Obs. 3. pag. 19. sqq.* de puella nempe gibbosa, menstruis per omnem fere vitam, defecta, quae male a medentibus tractata, nec per opportunam venae sectionem in tempore adiuta, primum pedum erysipelate, deinde vero glandularum axillarum et mammarum tumoribus infestabatur, qui per ineptam et intempestivam medicinam subito repressi, in tetrum tandem carcinoma degenerabant: vnde sensim emaciata miserrime demum periit infelix ista, nisi felix potius, puella, cuius nempe immedicabilibus arte humana malis sola tandem mors opportuna perfecte mederi poterat, sed ibidem et alia narratur historia, quae etiam huc nonnihil spectat. Ceterum addam hic nunc denique simillimum casum tristissimum, nouissime ad me e Lusatia, d. 24 Oct. 1761. perscriptum a fratre quodam theologo, ob miserandam plane charissimae suae sororis sortem merito afflictissimo, qui perlecta hac ipsa nostra dissertatione, quidquam a nobis auxilii expectari ac sperari posse, heu! frustra credidit. En vero ipsa illius verba, a me hic Latine reddita: *Soror mea dilectissima, iam XVIII annorum, menstruis semper caruit; inde vero multis variisque symptomatibus gravissimis per omnem fere vitam correpta fuit. A septem enim iam annis oculos lippientes, rubentes et dolentes habuit, ita ut lucem aegerrime ferre possit: aliquoties etiam in ipsa pupilla magnae quaedam papulae subito exortae fuerunt, quae tandem sua sponte ruptae sunt summis cum doloribus, relictis quoque adhuc manifestis sui signis atque*

Ee
vestigiis.

vestigiiis. In collo vero perpetuo habet ingentem durumque tumorem, qui ipse ex multis paruis tuberculis compositus esse videtur; semper vero in eodem statu permanet. Ante mensem quidem iste apertus fuit; sed materia lenta nimis ac tenaci intus oppletus, nec resolui potuit, nec emolliri, ut pus nempe liquidum et attenuatum efflueret. Denique in dextro pede, a longo iam tempore, vetus ulcus sua sponte ipsi subnatum fuit, quod nunc siccum est, nunc humidum, nunc apertum, nunc vero rursus occlusum: quo facto, peius semper habent oculi; aperto vero et fluente, aliquanto melius, aut tolerabilius. Haec quidem ille. Ego autem ex cunctis his symptomatibus deterrimis, ceu totidem diris ominibus, augurium merito cepi tristissimum, candideque statim atque aperte rescripsi fratri illi moestissimo, me quidem istius ineluctabilis mali causam melius nosse, quam curam: omnia enim iam conclamata videri, et longiore temporis tractu malum ipsum omni arte humana potentius esse factum. Interim tamen ipsi quaedam indicaui blanda remedia paregorica et mitigatoria, quae si ipsum illum atrocissimum affectum haud plane tollerent, quod nempe vix vnquam sperandum esset; eundem tamen aliquantisper lenirent et tolerabiliorrem redderent. Quid vero interea factum aut effectum fuerit, de eo quidem nihil certi mihi amplius constitit. Sed reuertamur iam ad ipsam illam GÖCKELII Historiam superius propositam, nondum vero satis explicatam aut illustratam.

§. XXVII. Illis igitur supra commemoratis, statim, ibidem, Auctor ipsius cadaueris inspectionem ac sectionem, a se ipso diligenter administratam, subiungit: in quo omnia paene viscera et intestina tabe taboque corrupta ac consumpta inuenta fuerunt. His mox ipsam medendi methodum subnectit, in qua tamen ad solam Cacochymiam corrigendam, Tumoremque ipsum exinde, ut ipse quidem putat, enatum, vel discutiendum, vel maturandum, respicit; sed praeterita plane, quod mirum, ipsa venae sectione, hic tamen ante omnia, maxime necessaria: Ceterum parum, ut videtur, sollicitus de Menstruis suppressis, confestim, quantum pote, reducendis; quibus tamen ipsam istius Cacochymiae, diraeque calamitatis exinde obortae, originem recte adiudicat. Ex illis enim potissimum, ceu primo fonte ac fomite, exitiosam

exitiosam istam cladem, quae tandem per tumidum vlcerosumque inguen foede erupit, deriuandam esse; facile nunc spero, intelligent omnes, qui haecenus a nobis disputata cum cura, perlegere haud dedignati fuerint.

§. XXVIII. Quare exinde liquido iam patet, in hoc quidem lugubri casu, miserandae illi puellae ista quidem medicatione chirurgica externa pessime consultum fuisse. Quod si enim mox ab initio, vt nobis certe videtur, dolenti isti claudicantique pedi dextro, in quem nempe Mensis subito suppressi, primum impetum fecerant, larga inprimis Venae sectione, auxilium allatum, blandioribusque simul Remediis, iam supra laudatis, ad menstrua reuocanda commodis, Naturae laboranti et exitum acriter molienti succursum in tempore, fuisset: Tum, vt perquam probabile videtur, ille forsan in inguine Tumor vel plane non ortus fuisset, vel, si etiam exsurrexisset, tamen fortassis sua sponte, prouidae Naturae beneficio, rursus euanisset.

§. XXIX. Quae quum ita sint, nos hinc, nisi fallimur, aliquam forsan gratiam ab aequis placidisque rerum medicarum ac chirurgicarum aestimatoribus inituros, fere confidimus: quod hoc quidem Argumentum haud exigui profecto momenti, *de Tumoribus a Mensum suppressione obortis*, paullo diligentius haecenus pertractauimus: praesertim, quum id ipsum, vt supra iam monitum, nescio quare, neglectum nimis et intractatum huc vsque relictum fuerit cum ab iis scriptoribus, qui *de Virginum Mulierumque Morbis*, tum etiam ab illis, qui *de omnis generis Tumoribus*, vastos quoque commentarios condiderunt. Quum tamen salutis, quin et ipsius adeo Vitae venustioris sexus, quam maxime intersit, hos quidem Tumores frequenter obuios, ob summum periculum, exinde metuendum, non rudi quasi brachio, temere contrectasse, sed potius, prudentissima cum circumspectione, ac suspensa, et oculata veluti manu, blandissime attigisse.



DISSERTATIO MEDICA OCTAVA.

DE

TABACI PTARMICI ABVS
CEV ATROCIS AFFECTVS VENTRICVLI
ALIORVMQVE MORBORVM CAVSSA.

P R O O E M I V M.

Quum nuper e diariis publicis innotuisset, per omnem Hispaniam grauiissimo Edicto regio de d. 17 Dec. anni proxime elapsi 1760. interdictum fuisse omnem Tabaci illius ptarmici, vulgo *Rappé* dicti, vsum, sine vllius personae aut dignitatis respectu vel distinctione, et quidem sub certissima poena irreparabilis iacturae omnium munerum, dignitatum et honorum: Multi tum fuerunt nimii illius pulueris ptarmici amatores, qui perquam indigne ferrent, et vehementer dolerent, quod tam laetum iucundumque scilicet pabulum naribus auidis et hiantibus subtractum esset. Mihi vero contra mirum in modum placebat istud prudentissimum maximi regis consilium et iudicium: licet enim nec tam curiosus, nec tam temerarius sim, vt in ipsas huius mandati regii causas inquiram, siue eae sint politicae, siue oeconomicae, siue ethicae, siue denique aliae, nobis prorsus absconditae: quid enim hoc ad me, aut quemuis alium meae fortis ac conditionis? iustissimas tamen atque aequissimas illas omnino esse, vt certissime credamus, suadet profecto, immo imperat, potentissimi et sapientissimi illius Regis per vtrumque, qua patet, orbem habitabilem celebratissima prudentia, aequitas et iustitia. Mihi certe, ceu medico, nihil vnquam iustius et in vniuersam humanam gentem salutaris visum fuit eo ipso interdicto regio, prudentissime scilicet, simulque opportunissime promulgato, ad tollendum tandem Tabaci illius sternutatorii vulgo, sed non bene, sic dicti abusum, cum tot sanitatis, quin et saepius vitae ipsius, periculis coniunctum, adeo, vt publicae salutis causa, mecum tacite optarem, vt essent plures, e potentiorum numero, qui laudatissimum hoc regis incomparabilis exemplum sedulo imitarentur; quod et eodem anno, immo et eodem mense iamiam factum fuisse a Serenissimo Daniae Re-

ge,

ge, illo inquam Rege, cui pudor, et iustitiae soror, incorrupta fides, nudaque veritas, quando ullum inuenient parem? ex ephemeridibus publicis nuperrime nobis gaudentibus et gratulantibus innotescere coepit.

Quae quum mecum aliquanto diligentius considerarem; tum protinus recurrebant memoriae meae varia funesta exempla, quae ex abusu pulueris illius ptarmici ortum duxissent, interque ea, illud potissimum memorabile nobis videbatur, quod iamiam, ceu ipse testis oculatus, atque hinc omni fide haud dubie dignus, candide enarraturus, ac deinde vberius illustraturus sum; tanquam argumentum, nec a nostro instituto, nec ab ipso hoc tempore prorsus alienum, quo publicata scilicet fuerunt sapientissima illa mandata vtriusque maximorum istorum Regum, in rarissimum praesentis saeculi exemplum, et perpetuam admirationem, natorum.

HISTORIA MORBI.

Vir quidam splendidi muneris, splendidaeque vitae, *Comis blandusque et mensa commodus vincta*, ut Poëta ait, ingenii amoeni atque liberalis, temperamenti, ut videbatur, cholerico sanguinei, lati pectoris, et obesioris corporis, aetatis XLVI annorum, notissimi illius pulueris ptarmici Hispanici frequentissimo vsui, siue rectius abusui, eo vsque, insanum, adsuefactus erat, ut non solum per singulas fere diei horas, ingentem illius copiam naribus hiantibus auidissime ingereret, totusque quasi nasus hinc fieri optaret; sed et insuper thecam nitidam, foedo eiusmodi puluere foetam semper prope lectum collocatam haberet, ne scilicet per longa noctis concubiae spatia, quoties euigilaret, quod nempe saepius accidebat, gulosus quasi nasus vilissimo illo putidoque pabulo defraudaretur. Nimirum sic haud multum absimilis illi immodico Tabaci amatori, qui teste MAGNEO autopta *), tantam huius pulueris copiam absumebat, ut die vnico, uncias tres integras, heu! quanta dementia! naso suo luxurioso perderet. Quum igitur pravae huic consuetudini ita per complures annos, impune indulgisset, nihilque prorsus damni exinde reportasset; factum

E e 3

demum

*) Exercitat. VIII. de Tabaco, pag. 105.

demum est, sine vlla praeuia caussa, vt anno CIOIOCCXXVIII. pristinus ille robustae sanitatis status subito concuteretur, omniaque huc vsque placida et tranquilla, inuerso confestim rerum ordine, rui- rum in modum conturbarentur. Namque ille mox languorem info- litum contrahere, sensim macrescere, corpus amittere, longa ciborum fastidia perferre, omniaque ingesta, siue calida, siue frigida; mox cum fluenti nausea, reuomere, insignem ventriculi dolorem et ardorem perpetuo perferens, fauces arescere, et sitire, spiritum difficilem et suspiriosum per noctem praesertim, moleste ducere, nunc subito incalescere, nunc rursus refrigerescere, impeditius lotii retenti iter ha- bere, aluo adstrictiori laborare, noctes inquietas et insomnes ducere, et, quod maxime mirandum, ad illum ipsum puluerem ptarmicum, antea nimis adamatum, nunc vehementissime nauseare. Quae sane dira symptomata cuncta aperte denunciabant, omnia hic quidem intu- ta prorsus, atque in summo praecipitique discrimine esse constituta.

Varii ergo vndiquaque acciti Medici, super hoc ambiguo adino- dum et obscuro casu, pro virili, consultaturi, complicatoque huic ac numerofo quasi malo fortiter obuiam ituri, nihil quidquam quidem intermiserunt, quo morbum hunc incognitum, pertinacem, vincique et expugnari prorsus indocilem, valentissimis remediis strenue subige- rent atque fugarent: Verum omnia incassum, infructuosa plane ope- ra, et Victoria quasi nullos habitura triumphos: Nulla enim solatia roganti aegroto ferre poterant, quod nulla prompta contumacis mali medicina reperiretur.

Tandem illi nimiae lentitudinis merito pertaesi, omnique splendi- de mendaci apparatusi medicamentario iure diffusi, confociatis amice- sentiis, cuncti consilium inibant, de leni quodam remedio emetico, huic quidem aegro, in summas iam angustias redacto, quam celerrime propinando. Coniiciebant enim non sine speciosa ratione grauique caussa, quod ipse mali inexpugnabilis fomes in ipsis, quod dicitur, pri- mis viis, siue ventriculi regione haereret, atque hinc immisso oppor- tune vomitorio, omnium commodissime expurgari posset.

Igitur

Igitur sine vlla amplius mora aegroto dabatur modica Radicis Americanae Ipecacuanhae dictae, dosis, vna cum binis tantum granis Tartari emetici mitioris MYNSICHTI, remixta: vtque nifus euomentis eo facilius adiuuaretur, mox superbibenda porrigebatur aqua tepida, cui herba cardui benedicti intabuerat. Vnde mox sex septemue faciles commodaeque vomitiones sensim insequutae: quibus primo, plurimum inutilis humoris sordidaeque suburrae commoto ventriculo egestum fuit, donec tandem sub finem succederet materia quaedam peregrina, lenta, tenax, obscura et ex rubro fusca: quam pelui capaci exceptam trepidantes pallentesque insolito quasi miraculo, sedulo inspiciebant versabantque medici, credentes nempe, sanguinem id esse, vasis ruptis effusum, atque in grumos viscidos coactum; hincque mox forte ipsum aegrotum supremum vitae discrimen incursum: qualem nempe vomitum rubrum liuidumque letalem esse, pronunciat ipse HIPPOCRATES, in *Coac. praenot. pag. 578. Tom. 1. Opp. LINDEN.*

At ille contra, vomitione peracta, in desuetum diu somnum sensim delabi, tandem aliquot post, horis, refocillatis iam viribus, euigilare, cibi potusque quid auide exposcere, atque subpingue iusculum pulli gallinacei subacidulum, ac liberaliorem Vini generosioris rubelli haustum sine nausea, nunc primum assumere, et sine Vomitu ructuque Ventriculo iam pacato et ad ingenium pristinum placide reducto, tenaciter continere.

Ceterum ex Massa illa insclita fusca, vomitu postremum reiecta, postquam absumto sensim humore circumfluo, radiis solaribus exposita, inaruisset, liquido deinde stupentibus cunctis praesentibus et visentibus, apparuit, merum illam fuisse puluerem ptarmicum Hispanicum, per tot nempe annos, ingenti copia temere ingestum, qui, quum errore viarum, obstructis scilicet foeda Tabaci colluue, ipsis naribus, per gulam, in ipsum ventriculum sensim delatus fuisset, ibique eius rugosis plicis altius tenaciusque impactus inhaesisset, tot deinde lacrymosas tragoedias excitasset, tantamque diuersorum morborum atque symptomatum cateruam produxisset.

Quo

Quo intellecto, aegrotus ille, nunc sanitati pristinae subito redditus, et recollectis subinde viribus, quotidie valentior factus, tantum mox taedium odiumque, plus quam Vatinianum, merito concepit aduersus illum subdolum ac perniciosum puluerem sordidum, omnium hucusque dolorum suorum causam, vt ex eo quidem tempore, ipsius vsui plane renunciaret, nunquam per vitam suam, amplius passus, vt Natura iam fixa et mutari nescia, ad mores antea damnatos, recurre-
ret; atque deinde inoffensa in posterum sanitate, per xv. adhuc annos, prouideret, donec tandem, exacto illo inter permissa vitae intaminatae gaudia tempore, cunctis suis amicis moerentibus et altum ingemen-
tibus, repentina apoplexia inopinato e viuis raperetur.

Quae singularis tristisque Historia, quum iam dudum, ante hos xiv annos, inserta publice legeretur poemati nostro vernaculo, contra nociuum Nicotianae ptarmicae abusum directo, quod totum quidem huc spectat *), tanto subito terrore, ex iusto futuri periculi metu oborto, molliores lectorum attentiorum animos ita passim perculit, vt multi multaeque lutulento illi oblectamento nimium adhuc dediti, nunc demum sero quasi pudore suffusi, sensim resipiscerent, meliorem mentem induerent, nasosque suos innocuos, tot indignissimis modis, per omnes fere horas, praeter meritum, aut necessitatem, misere diuexatos, et puluere indecoro sordidos, ab acribus illis insidiosisque irritamentis puluerulentis sollicitè retraherent.

Quos

*) Vid. *Poemat. nostr. Tom. iv. Anno 1747. pag. 429. sqq.* et praecipue, p. 435. vbi haec ipsa nostra Historia, etsi ratione metri arctioris, paucis tantum, relata legitur. Quod tamen poema nostrum, multis licet magnis, illustribus ac prudentissimis Viris perquam gratum et laudatum, ceu planum nimis, humile ac languidum, displicuit nuper Medico illi, nimium nobis eheu! inclementi, qui *Medicum* sic dictum, vernacula lingua, per hebdomadas, scribit, ceu notum. Sed omnium quidem rectius sentientium iudicio, praestat, omnino, poemata plana, facilia et

perspicua componere, quae profunt simul ac delectant; quam, quod ipse ille superbus censor ibidem, facit, pulueres nescio quos novos, arcanos, polychrestos, imo, si dis placet, panchrestos, leui credulaeque plebeculae, lucri forsan gratia, nimis alte calideque, minus autem callide, aut decenter, commendare, qui tamen forte nec multum profunt, nec quemquam oblectant, nisi solum ipsum illorum beatum inuentorem ac compositorem, qui vberissimam nempe aureamque messem capit ex sterili illo puluere. Sed haec obiter, ne nimis nempe sapiat ille.

Quos inter Comitiss cuiusdam coniux, omnibus sui sexus virtutibus ornatissima, inprimis mihi ingenue sua sponte confessâ fuit, perlecta hac ipsa in isto carmine monitorio, historia, pleniusque exinde intellecto summo illo periculo, sanitati, vitaeque ipsi ex illius quidem pulueris errhini abusu, iure metuendo, sese extemplo tantum horrorem atque fastidium concepisse, ut abiecta mox fortiter pretiosa sua theca pulueraria, omnem simul voluptatem desideriumque pulueris istius nimium consueti, in posterum sumendi, pertinaciter abiecerit, atque ex eo certe temporis puncto, ne vnum quidem illius granum naribus tam subitae mutationis insolentioribus, amplius indiderit.

Quod perquam illustre exemplum protinus aliae splendidioris fortunae matronae laudatissimo incitamento, ita sequutae sunt, ut hoc epidemicum quasi nasorum prurientium cacoethes pariter generoso contemptu detestarentur.

ILLVSTRATIO HISTORIAE CVM EPICRISI.

§. I.

Errhina *), siue *ptarmica*, Latine vulgo, sed minus Latine, *sternutatoria* dicta, ea sunt Medicamenta externa, acria plerumque, penetrabilia et odore fragrantiori et subtiliori praedita, ceu notum vbiuis, quae naribus indita, irritando scilicet et nonnihil contrahendo tunicam illam, seu membranam pituitariam notissimam, a SCHNEIDERO quondam nostro accuratissime descriptam, per nares intus extensam, sternutamenta euocant, caput grauatum leuant, pituitam lentam incidunt, attenuant et educunt, mucumque tenaciter impactum fortiter excutiant,

*) Emendandus hic obiter MATTH. SILVATICVS, in *Pandect. Med.* Opere utili quidem; sed simul deprauatissimo, et hinc ad instar Augiae stabuli, labore plusquam Herculeo, expurgando. Ita igitur ille, fol. 146. b. *Rhin*, graece *naris*, *nasus*, inde *Erimon*, *caputpurgium*, quod

per nares iniicitur. Nempe ibi, pro-monstroso, *Erimon*, legendum haud dubie, *Errhinon*, graece *ἑρρινον*. Et sic quoque fol. 77. b. fol. 77. b. scribendum pro corrupto *Enerimon*. Vid. et fol. 110. b. et add. CANGII *Glossar. Graeco Barb.* pag. 436.

excutiunt, et alia multa praestant auxilia in morbis praesertim grauedinosis, vt Catarrho, Coryza, et eiusdem generis aliis. Inde ea adiutoria ptarmica perquam eleganter et significanter vocauit THEOPORVS PRISCIANVS, *Lib. II. c. 3.* et alibi. Conf. HIPPOCRAT. de *Affect. pag. 162. Tom. II.* et *Lib. II. praedict. pag. 515. Tom. I.*

§. II. Hinc in cephalalgia, sphacelismo cerebri, vertigine, stupore sensuum, affectibus soporosis, vt lethargo, caro, comate^{a)}, item apoplexia, suffocatione, lipothymia, singultu, tetano, et opisthotono, spasmo cynico, paralyfi, gutta ferena, certis tamen sub conditionibus, quibusdam aurium vitiis, passione hysterica, partu difficili, foetu intus emortuo exturbando, secundis tenaciter nimis vtero affixis, et aegre hinc sequacibus, expellendis^{b)}, aliisque grauioribus morbis, tempore nempe necessitatis, et vrgentis maxime periculi, commodissime adhibentur. Conf. huc inprimis HIPPOCRATIS *Lib. III. de Morb. pag. 98.* item *pag. 104.* et passim in *sqq.*

§. III.

a) Sic apud HIPPOCRATEM, *Lib. VII. Epidem. pag. 847.* Olympiade uxori, praematurae puerperae, aderat ὕπνος καματώδης, somnus soporosus, qui tamen πταρμικῷ ὑπῆκεσε, remedio ptarmico auscultabat, quamuis sine fausto speratae salutis euentu. Nempe καματώδης, ibi legendum; non καυματώδης, vt in vulgatis est Libris. Simile mendum occurrit quoque in Coac. praenot. pag. 537. καυματώδεα, μεμωρωμένα, vbi scilicet pariter legendum καματώδεα, vt ex antecedentibus patet. Sed vbique fere in Vett. MStis Codd. HIPPOCR. quos diligenter olim versauimus, confunduntur καματώδης, καυματώδης, et κατατώδης. Quod etiam sua aetate, ipse obseruauit GALENVS, vt ex ipso probat CLERICVS, *Arte Crit. Vol. II. part. III. sect. I. cap. 8. pag. 103.* Vid. et FOES. *Oeconomia Hippocr.* Inde iudicio medico opus est, ad haec probe, dignoscenda, et cuicunque loco dubio et deprauato conuenienter reddenda: sed haec obiter. Ce-

terum, sicut tempestiuus ptarmicorum vsus lethargum, inter alia remedia commoda, quandoque abigere valet; ita contra, in tempestiuus eorundem abusus eum ipsum saepius inferre potest, vt infra monebitur.

b) Memorabilis hanc in rem, Locus extat apud HIPPOCRATEM; *Aphor. 49. Sect. V.* ἐς ὑπερέων ἐκπλώσιας, πταρμικὸν προσιδῆς, ἐπιλαμβάνειν τὰς μυκλήδας καὶ τὸ στόμα: *Vt secundae excidant, remedio ptarmico adhibito, nares et os apprehendito.* (Vt scilicet, sic, compressis naribus et ore, sonus stentationis tanto difficilior foras prorumpere possit; quin potius, ita vi quasi repressus, et subito retro actus, ipsa interiora maiore impetu succutere valeat: quae vera huius breuioris loci sententia: recte sic in paraphrasi graeca, monente PHILOTHEO, Vid. MAURIC. CORDAEI *Comment. 4. in I. HIPPOCR. Lib. de Morb. Mul. pag. 633.* apud SPACH. *Gynaecior. add. inprimis PAVLLINI Obs. med. XII. Cent.*

§. III. Mirum ergo, immo, vt verum fatear, perquam ridiculum mihi semper visum fuit, illa ipsa remedia ptarmica, quae inter folia Nicotianae in subtilissimum puluerem redacta, familiam quasi et principatum ducunt, adhiberi quoque more, aut vitio rectius, saeculi, frequentissime, praeter vllum vsum, aut necessitatem, voluptatis tantum ac consuetudinis causa, ad tempus quasi fallendum, non singulis hebdomadibus, aut mensibus, vel diebus; sed singulis potius horis, quin immo, singulis adeo horarum momentis.

§. IV. Sicut autem inauditum hucusque fuit, adhibita esse hunc nimirum in modum, voluptatis tantum atque consuetudinis solius gratia per singulas horas, a quoquam mortalium, alia etiam remedia, v. g. purgantia, vomitoria, sudorifera, anthelmintica, hydragoga, cephalica, aut similia, vel pilulas aut clysinata singulis horarum interuallis, in vsum aduocata fuisse: Ita tanto magis profecto mirandum, qui factum tandem fuerit, vt foli pulueres ptarmici in tantum praecipue abusum cederent, vt non pro medicamento, quale tamen reuera sunt, et qui-

Ff 2

dem

Cent. II. pag. 16. sqq.) Conf. eiusdem HIPPOCR. Lib. I. de Morb. Mul. p. 481. et Lib. II. pag. 575. item II. Epidem. pag. 708. et CELS. Lib. III. cap. 8. pag. 69. Vt et ARETAEI Lib. II. de Morb. acut. Curat. cap. 10. pag. 112. Quem singularem HIPPOCR. locum eum potissimum in finem, hic producimus, vt inde lux ac medela affulgeat loco cuidam HESYCHII haecenus obscurissimo et deprauatissimo. Sic enim ille pag. 133. ἀποφράξασθαι, τὸ τοῖς μυκτῆρσιν εἰς τὸ ἔξω ἦχον προέσθαι Quae sane adeo vsque altissimis tenebris immersa sunt, vt nemo ea intelligere possit, etiam si centum forsan μυκτῆρας vel acutissimos, vt ita dicam, attulerit. Legendum autem, vt mihi paene certissime videtur, Ἀποφράξασθαι, τὸ τοῖς μυκτῆρσιν ἐπιλαμβάνειν, εἰς τὸ μὴ ἔξω ἦχον προέσθαι, h. e. Ἀποφράξασθαι dicitur, quando nares apprehenduntur, vt ita iis compressis, sonus ster- nutamenti prorumpere haud possit: sensu

nunc liquidissimo et manifestissimo: Mihi enim vix dubium, quin HESYCHIVS ad hunc ipsum HIPPOCR. locum potissimum respexerit: inde et ex eodem addidi τὸ ἐπιλαμβάνειν, quod alias tamen etiam omit- ti posset, si nempe repetatur τὸ ἀποφρά- ξασθαι post μυκτῆρσιν, vt scil. HESYCHIO solenne. Conf. autem huc CLEMENT. ALEXANDR. Paedagog. Lib. II. cap. 7. pag. 174: vnde ipse HESYCHIVS haud parum illustrari poterit, qui tamen etiam sese ipse infra quasi explicat in ἐπιπλάγνυ- μαι, μετακαλῶ, κατέχω, ἐπισχετικὸν γὰρ ὁ πλάγμὸς πολλάκις: sed haec obiter. Cete- rum nescio, quid ad hunc corruptissimum HESYCHII locum obseruauerit. Cel. ALBERTI in noua sua splendida eius- dem Editione, quae nostris quoque ob- seruationibus, si non melior; tamen au- ctior et spissior, facta fuit: Ea enim iam non erat ad manum.

dem fortissimum et valentissimum c); sed potius peruerso saeculi more pro mero voluptatis, otii et consuetudinis instrumento, praepostere haberentur: quasi vero minus nocerent, ac ista superius allegata; si nempe intempestiue, et praeter vllam necessitatem, adhiberentur, quum tamen ipsi sensuum officinae, cuius prominens nempe pars ipsae nares sunt, temere ingerantur, et inde tanto maiora et certiora damna sanitati, quin etiam vitae adeo inferre possint, et re ipsa frequentissime inferre soleant, vt ex mox dicendis luculentius aliquanto patebit.

§. V. Audiamus igitur hic potissimum HOFFMANNVM nostrum, HOFFMANNVM, inquam, qui in se vno, rarissima quidem felicitate, coniunxit Anglorum SYDENHAMVM, Belgarum BOERHAAVIUM et Gallorum BALLONIVM; Is ergo vir nunquam sine cura, nunquam sine laude, dicendus, ita non minus vere et seuerè, quam facete, pronunciat, grauitèrque monet in Dissertat. eximia plane, quae tota huc spectat, et legi omnino ac conferri meretur, *de usu et abusu puluerum sternutatoriorum*, his quidem verbis d): *Tanta iam increuit intemperies, non dicam vesania, nonnullorum, vt mira consuetudine, vel imitatione, et auctoritate aliorum inducti, tali puluere sternutatorio nares perpetuo vexare*

c) Inde ipse HIPPOCRATES semper fere τὰ πταρμικά quasi κατ' ἐξοχήν, vocat φάρμακα, vt *Lib. II. de Morb. p. 72. et pag. 89. et in seqq. saepissime, item de Intern. Affect. pag. 209. et sic fere vbique. Quo et in primis sequens locus spectat Lib. de Loc. in Hom. pag. 374. καὶ τὸ φλέγμα τὸ συμπεπηγὸς τῶν ῥινῶν λεπύνην φαρμάκῳ, oportet compactam Narium pituitam attenuare Remedio, scilicet ptarmico. τὰ πταρμικά igitur reuera sunt φάρμακα, non χάσματα, seu oblectamenta, aut voluptatum irritamenta: vnde eorum abusus voluptarius tanto perniciosior merito censendus.*

d) *Opp. Med. Geneu. 1749. Supplement. Part. II. p. 69. 72. et p. 75. sed vid. totam istam dissert. laudatissimam; quam omnem*

hic exscribere nec licet, nec etiam libet, si liceret. Similem quoque eiusdem argumenti Dissertationem, de *sternutatoriorum usu et abusu*, edidit IUSTVS VESTI, Erford. 1696. item aliam Cl. FAGON, de *noxis Tabaci ptarmici*, quae annexa est Tractatui Cl. ANDRY, de *Generat. Vermium*, vbi plura, quae huc maxime spectant. Quibus potissimum add. PECHLINI *Obs. med. 10. Lib. III. pag. 413. STALPART. van der WIEL, Obs. med. x. Cent. I. pag. 46. sqq. EVTH, Anat. Umbilici, pag. 68. NIC. CHESNEAU, Obs. med. XII. Lib. I. pag. 50. sq. RIEDLINI Cur. med. 473. Centur. V. pag. 284. et praesertim magni nostri BOHNII, de offic. Medici, part. I. cop. IX. pag. 200. item MAGNENI Exercitat. VIII. de Tabaco, pag. 104. sqq.*

vexare et irritare videantur, ut etiam inter mutua colloquia, conuentus, ac coenam, deesse aliquid humanitatis credatur; nisi quis pyxidem suam, qua seruari pulvis ille solet, singulari officio, et inseruiendi, eius sanitati, studio, alteri offerat, ad muci officinam purgandam: et ibidem, nonnullis interiectis: Factum est, ut Tabacomania iam multi laborent, et ipsa consuetudo talem pulverem fecerit paene cum aere necessarium, qui tamen plerisque inutilis et superfluus, imo noxius est: denique in sequentibus ibidem: Tantus hodierno tempore, pulveris sternutatorii est abusus, ut vix quemquam videas, qui etiam moratoribus et prudentioribus accenseri gestit, qui ne minimo quidem temporis interuallo, carere possit eiusmodi pulverum inspiratione, et non refertam hisce pyxidem semper pera sua circumferat, quo brevissimis interuallis, semper nares replet, et aliis etiam urbanitatis causa, offert. De tali autem perversa consuetudine nihil boni expectari posse, facile quivis agnoscet: vbi vid. sequentia plura. Tandem etiam alio loco ^{e)}: Nostris temporibus, uti fumi Tabaci; ita etiam pulveris pro sternutatione, luxurians abusus maxime invaluit, valetudini minus conducibilis. Etenim iugi hoc pulverum attractu, non modo odoratus, propter obstructas et quasi induratas inde papillas nerueas membranarum, quae ossa squamosa et nares inuestiunt, laeditur; sed et ob nimium infarctum, ab allecto humore, clara vox rauescit. Haecenus quidem HOFFMANNVS, cuius profecto auctoritas, ubique inter rationales medicos merito recepta, et debita veneratione, hoc est, summa, culta et veluti consecrata, inultum, immo plurimum, ut certo confidimus, omnino valebit ad firmandam roborandamque ipsam nostram sententiam, praesertim quum non ipse solum hic loquatur; sed ipsa potius natura per illum, adeo ut statim quivis erectioris indolis et sanioris iudicii manus victas dare cogatur.

Ff. 3

§. VI.

e) *Med. Rat. Systemat. Tom. III. Sect. II. cap. 5. in Opp. iunctim Geneuae editis, Tom. I. pag. 442. Quo et illud spectat GUIL. PISONIS, Hist. Nat. et Med. utriusque Indiae, Lib. IV. cap. 43. pag. 206. Folia Tabaci exsiccata in abusus et delicias applicarunt: Ita, ut nunc tanquam hibernus flatus, fumus et abusus Tabaci uniuersum Orbem infecerit. Sed omit-*

to nunc studio, alia plura, apud laudatos modo Auctores, non sine seuera iustaque indignatione et exprobatione, passim, cum fructu, legenda: praesertim autem apud citandum mox IACOBVM TAPPIVM, in *Oratione, de Tabaco, eiusque hodierno abusu. Conf. COHAUS. de Pica Nasi, pag. 104. sqq. et MAGNENI Exercitat. VII. de Tabaco, p. 104. sqq.*

§. VI. Sed iam dudum ante hunc ipsum virum summum non defuere alii, bene multi, qui huic nascenti tum sensimque inualescenti pravae saeculi peruersi consuetudini sese strenue opponerent; inter quos potissimum eminens novus ille Romanae fidicen Lyrae, IACOBVS BALDE,^{f)} et illo carminis elegantia haud minor, PETRVS SCRIVERIVS^{g)}, item ex medicis, MAGNENVS, IO. NEANDER, SIMON PAVLLI, TAPPIVS, CASP. HOFFMANNVS, PAVWIVS, FALCOBVRGIVS, KERCKRINGIVS, HARDERVS, SCHROVERVS, ALBINVS, alique plures, qui de vsu atque abusu Tabaci diligentissime commentati fuerunt, et partim iustos libros, partim et breuiores dissertationes de hoc nobili notabilique argumento, nouoque quasi Nasorum morbo, luci publicae exposuerunt, quorum amplissimum catalogum post MERCKLINVM^{h)}, exhibuit diligentissimus ZORNIVSⁱ⁾, vt iam taceam, quae ipsi quondam de iisdem auctoribus variis strictim obseruaueramus^{k)}.

§. VII. Nemo tamen, quod equidem sciam, hac nostra praesertim aetate acrius insurrexit contra hoc insanabile paene saeculi luxuriantis cacoethes, quam medicus ille eleganter doctus, ingeniosus, ioco non-nihil mordente facetus, et salibus vehemens, IO. HENR. COHAVSEN, practicus, dum viueret, felicissimus celeberrimusque, et simul, ceu ex lepido ipsius libello vernaculo, de vera et tuta dysenteriae curatione, patet, fautor et amicus noster singularis: qui nempe, vt emunctae
naris

f) In amoenissima nempe *Satyra contra Abusum Tabaci*, quae extat Tom. III. ipsius *Opp. poet.* pag. 177. sqq. vbi lepidi imprimis et acuti isti quidem versiculi:

Quid stupeas? nullo teneri discrimine

sexus

Sumitur haec crambe. Sumit Christilla
Trebat,

Sumit Barsennae Laurentia, sumit
Asella,

Sumunt Fabullae soror utraque, et utra-
que neptis.

Et quae ibi sequuntur in hunc sensum plura, lectu iucunda, quae inde oppor-

tune repetit COHAVSEN, de *Pica Nasi*, part. I. pag. 29. sqq.

g) Hic multa variaque *Epigrammata* acutissima in *Abusum Tabaci*, conscripsit, quae cum voluptate, leguntur, in ipsius *Anecaot. poet.* pag. 406. sqq.

h) In *Lindenio Renouato*, de *Scriptis Med.*

i) In *Botanologia*, Opere laboriosissimo.

k) In *Poemat. nostr.* Tom. III. p. 125. et 126. et Tom. IV. pag. 432. sqq. item in *Thesauro pharm. vniuersal.* Tom. I. p. 126. seqq. per quam copiose.

naris homo, contra Nasos illos, nimio Tabaci amore flagrant, atque inde fere contabescunt, stili quasi nasum liberrime condidit, editis eum in finem, binis facetissimis iuxta et vtilissimis Libellis satyricis¹⁾, quibus illas obesas nimis et indecoro puluere fordidas nares, sale acutissimo, immo, ut rectius dicam, Helleboro quasi acerrimo defricuit, docendo simul grauissime verissimeque, quantas noxas quantaque pericula damnosa illa ac iure hinc damnanda voluptas frequentissime induxerit.

§. VIII. Neque sane id mirum: fida enim certaue experientia abunde constat, puluerem illum ptarmicum, praesertim autem sic dictum Hispanicum, non externis solum corporis humani sensibus, velut visui, olfactui, gustui, atque etiam loquelae plurimum officere, indeque oculos flammeo rubore, faciem lurido pallore, et ipsas denique nares foedo paedore suffundere: sed et, quod longe adhuc deterius, obturatis immunda ipsius illuue, angustis nasi oppleti meatibus, deuio errore, propter volatilem suam leuitatem, vel ipsa interiora petere, atque inde per vtramque illam fistulam, per quam et spiritus et cibus potusque ferri solet, in ipsos adeo pulmones, atque sinuosos ventriculi recessus sensim delabi, ibique tenacius impactum, atrocissima symptomata, variosque morbos longos, lentos, tabificos et fere immedicabiles, prognerare: quod inter alia plura, mox distinctius enarranda, luculentius patet ex historia illa nostra singulari, superius proposita, quae nobis commodum praebuit scribendi argumentum.

§. IX. Quo et inprimis pertinet rarus ille memorabilisque casus, in *Actis Eruditorum*^{m)}, vberius enarratus, de immodico nimis immodestoque

1) Prioris nempe Titulus est ingeniosus: *de Pica Nasi*, alterius autem: *Raptus ecstasticus in montem Parnassum, in epoe visus Satyrorum Lusus cum Nasus Tabacoprophoris, siue Satyricon Nouum Physico-Medico Morale in hodiernum Tabaci sterutatorii abusum*. Amstelod. 1726. qui bini lepidissimi Libelli adeo secunda quidem fata habuerunt, ut non solum saepius re-

cuderentur; sed et, praesertim prior *de Pica Nasi*, in varias Linguas, ut Gallicam, Anglicam, Belgicam et Germanicam aliasque e latino idiomate suo transferrentur. Conf. *Poem. nostr. Tom. IV. pag. 436. in Not.*

m) *De Anno 1715. pag. 456. sqq. Conf. Clar. KUNDMANNI Rariora Naturae et Artis, Sect. I. Art. XXXII. pag. 258. in Notis.*

destoque quodam Tabaci ptarmici Hispanici amatore, qui ex ipsius diuturno abusu, tantum sensim crassumque sibi contraxerat Oesophagi polypum, vt a monstro hoc intus latente incognito, variis diris symptomatibus prius diu excruciat, atroci tandem fame enectus et suffocatus, miserrimo fato periret.

§. X. Verum adeo numerosam variorum aliorum grauissimorum morborum prolem produxit praeterea deterrimus iste pulueris illius ptarmici abusus, vt cum poetis iure exclamandum sit:

*Macies, et noua febrium
Terris incubuit cohors,
Semotique prius tarda necessitas
Leti corripuit gradum.*

Hinc subitae mortes, atque intestata senectus.

Obseruarunt enim medicorum praestantissimi fideque dignissimi, nominatim HILDANVS, HEVRNIVS, IOVBERTVS, BONETVS, DECKERVS, RHODIVS, HAGENDORNIVS, LANZONVS, WAGNERVS, SIMON PAVLLI, WEDELIVS, KERCKRINGIVS, THIERMAIRIVS, MERCVRIALIS, NUMMANNVS, SENNETVS, SCHNEIDERVS, atque ETTMÜLLERVS, nostrates, aliique, partim iam supra laudati, phthisin, maciem, tabem dorsalem, caecitatem, aliosque oculorum affectus, haemoptysin, apoplexiam, polypos, vomicas, asthinata, vomitus, longa ciborum fastidia, vertigines, raucedines, gulae ardores, haemorrhagias narium, lethargum, aliosque atroces admodum morbos, fatales suos natales saepius debuisse illi ipsi pulverum eiusmodi ptarmicorum, praesertim autem Tabaci, abusui, pravaeque et inueteratae nimis consuetudini, in ipsam veluti naturam sensim

Notis. Praesertim vero Cl. COHAUSEN, de *Pica Nasi*, part. II. pag. 108. sqq. vbi ipse mirandum hunc casum accurate recenset, cum acuta lepicrifi, additque demum binos similes fere casus, a se ipso quondam obseruatos: Tertium autem paene simillimum, a se quondam adnotatum, luculenter describit magnus BOHNIVS, praeceptor olim noster ac doctor, in prae-

stantissimo Libro, de *Officio Medici*, part. I. cap. 9. pag. 200. Quo et denique pertinet singularis ista Historia, commemorata a RIEDLINO, in *Cur. med. Obs.* 473. Cent. v. p. 284. Ex quibus saniora nunc melioraque sero tandem discat superbus ille et asper Medicus, qui nobis nuper grandem de lana caprina, dicam frustra scripsit, de quo supra.

sim conuersae: Ex quibus omnibus, inprimis autem DECKERO atque ETMÜLLERO, sat multa exempla memorabilia historiasque singulares hanc in rem diligentissime collegit iam supra suo merito laudatus COHAUSENIUSⁿ), nouus ille saeculi nostri Lucilius vel Horatius, quibus et ipse suam experientiam medicam annosam ac foecundam, sapienter fideliterque adiunxit: quale etiam iam ante ipsum ex parte praestiterat summus noster HOFFMANNVS^o), et illum postea sequutus, diligentissimus KYNDMANNVS^p).

§. XI. Quum igitur tot tantaque mala et pericula ex immodico puluerum ptarmicorum, praecipue autem Tabaci, vsu omnino metuenda sint: Omnis hinc suae salutis vitaeque cupidus ac studiosus, vel maxime sibi cauere debet, ne ob tantillam caducam, volaticam et puluerulentam quasi voluptatem, sanitatem suam, qua tamen in omni quidem vita nihil vnquam pretiosius est praestantiusque, temere in praeceps discrimen adducat, atque deinde, perdita semel sanitate, de illa vana et inani narium voluptate, tanta quidem poenitentia ac dolore emta, per omnem inposterum vitam frustra conqueratur.

§. XII. Tanto autem magis vitare debent nimium eiusmodi puluerum errhinorum, seu ptarmicorum vsum, qui iamiam nonnihil causarii sunt, atque hinc sanitate haud vsquequaque integra fruuntur. Inde potissimum noxius est asthmaticis, quibus inprimis meatus animae propter corporis amplitudinem grauior et sonantior est, item plethoricis, hypochondriacis, melancholicis, natura siccioribus, et aluo adstrictiore laborantibus; nec non obesioribus et ingenti carnis mole oneratis, iis etiam, quibus stomachus natura inualidus et angustus, et frequenter interaestuans est: porro, sanguinem vel ore exscreantibus,

vel

n) In vtroque nempe opusculo lepidissimo, supra iam dilaudato, *da Pica Nasti*, et *Raptu ecstático in montem Parnassum*: praesertim tamen in hoc posteriore, vbi vid. inprimis, pag. 54. sqq. Conf. *Poem. nostr.* Tom. IV. pag. 437. in *Not.*

o) In laudata superius dissertat. *de Vsu et Abusu puluerum sternutatoriorum* sic di-

ctorum, pag. 75. *Opp. Med. Supplement. Part. II.*

p) In Opere lectu digno et iucundo, *de Rarioribus Naturae et Artis*, modo allegato, pag. 255. sqq. in *Not.* vbi tamen pleraque ibi allata exempla HOFFMANNUS debet.

vel nare reddentibus; item malo epileptico obnoxiiis, lateris dolore affectis, cardialgia, vel ardore stomachi vexatis, herniosis, phthificis et macie confectis, vomicosis, tussiculosis, aut quocunque pulmonum vitio laborantibus: illis quoque, quorum oculis frequentius obuerfantur maculae, faculae, amphorellae, marmaroginata et indalmata, aut simulacra peregrina, araneorum cassibus, aut nubibus tenuissimis, aut paruulis denique volantium animalibus, ut sunt culices, similia. Istis etiam nimius ptarmicorum usus perniciosus est, quibus condylomata, rhagadia, exochadia, et id genus alia obscoenarum extremi ventris partium tubercula taedii plerumque plena, ita subinde in foedum tumorem intus attolluntur, ut saepius extra quoque promineant, ut et, quibus haemorrhoides vel caecae, vel fluentes extuberant, vel quibus ipsa etiam sedes prolapsa est ^{q)}. Denique foeminis quoque grauidis et praesertim ad abortum effundendum procliuioribus, aut de molesta ipsius vteri procidentia conquerentibus: ut alia plura iam, amico breuitatis studio, praetereamus. Vid. interim MAGNEN. *de Tabaco sect. VIII. pag. 108. sq.*

§. XIII. Nemini tamen Tabaco ptarmico diutius iam per vitam, adsueto duram illam imperii necessitatem hic imponimus, ut semel simulque, et vnico quasi momento inueteratam istam consuetudinem exuat; Recte enim MENANDER: Ἐγὼν ἐστὶ, μακρὰν συνήθειαν ἐν βρα-
χέϊ

q) Tristem eiusmodi casum retulit ipse HIPPOCRATES noster, *Lib. V. Epidem. pag. 775. Tom. I. Opp. de miserrimo Eudemo Larissaeo*, cui post vehementiorem sternutationem, ipsa sedes, vna cum haemorrhoidibus, foede procidebat. En ipsa quidem ipsius verba: αἱ δὲ αἰμορροΐδες ἔξω ἦσαν τῇ ἀρχῇ, τὸν ἄλλον χρόνον καὶ ἡ φύσα διὰ ταύτας ἐπεγίνετο, καὶ πρὸς πταρμὸν ἐπεγίνετο ἡ ἀρχή. Haemorrhoides vero extra anum erant; reliquo autem tempore, flatu per ipsas prodibat: et ad sternutationem principium fiebat. Quale vero principium? ego hic merito quaero, et quis in his quidem verbis, sensus commodus? Ipse FRANCISCUS VALLESIVS in

Comment. pag. 487. nihil hinc attulit, quod multum placeret, aut tenebras spissas hic dispelleret. Verbo: Locus hic dubius et obscurus, immo et de mendo suspectus, mihi omnino videtur. Fuit ergo, quum legere tentarem: ἐπηγέγετο ὁ ἀρχὸς, sedes ipsa ad sternutamentum procidebat; vel facilius et verisimilius: πρὸς πταρμὸν ἐπεγίνετο ἡ ταρραχή, ad sternutationem ista fiebat turbatio procidentiae nempe ani, haemorrhoidum et statuum: vel denique: πρὸς πταρμὸν ἐπεγίνετο ἡ ῥαγή, ad sternutamentum si b it ista ruptura ani nempe ac haemorrhoidum. Sensu nunc in omnibus, facili, commodo et perspicuo, nisi fallor.

χεῖ λῦσαι χερόνῳ, *difficile est, diuturnam consuetudinem breui tempore dissolvere*: Sed quemuis potius fideliter hortamur, ipsique amice suademus, ut sensim tantum paullatimque per iusta stataque interualla sese ad sobrias abstinentiae leges componat; donec tandem processu temporis natura sua sponte adsuescat, sine repugnantia carere illis narium deliciis, hucusque nimium adamatis. Tum enim isti quasi motus narium atque certamina tanta sensim sensimque *pulueris exigui iactu compressa quiescent*. Omnis namque mutatio repentina, et vno quasi temporis puncto ab vno, quod dicitur, extremo ad alterum subito praecipitata, in ipso corpore humano magnas saepe multasque turbas concitat, et ipsi inde sanitati plus officit, quam conducit. Vnde sapienter CORN. CELSVS ^{r)} monuit: *Quum quis mutare aliquid volet, paullatim debet adsuescere*: quod nempe more solito ex ipso HIPPOCRATES ^{s)} hausit: τὸ κατ' ὀλίγον, ἀσφαλές, καὶ ἄλλως, ἢν καὶ τὶς ἐξ ἑτέρου ἐφ' ἑτέρον μεταβαίνει, *quod paullatim mutatur, tutum est, tum alias; tum si quis ex altero ad alterum transeat*. Quo et illud imprimis spectat eiusdem ^{t)}, ἢν γὰρ μεταβαλὴν ταχέως τὴν διαίταν, κίνδυνος, καὶ ἀπὸ τῆς μεταβολῆς νεώτερόν τι γίνεσθαι ἐν τῷ σώματι, κατ' ὀλίγον ἔν δὲ ἀφαιρέεσθαι, *nam si quis cito dietam permutet, periculum est, etiam a permutatione aliquid in corpore innouatum et in deterius mutatum iri, paullatim igitur detrahere oportet*: Cuius denique est etiam istud ^{u)}: Πάντα ἐξαπίνης μείζω πολλῶ τῷ μετρίῳ μεταβαλλόμενα ἐπὶ τὰ, καὶ ἐπὶ τὰ, βλάπτει, *Omnia, quae derepente, multum, supra modum, nunc huc, nunc illuc mutantur, semper laedunt*. Quod et maximus ille Imperator Cyrus confirmat apud XENOPHONTEM ^{x)}: ἢ γὰρ κατὰ μικρόν μετέλλαξις πᾶσαν ποιεῖ φύσιν ὑποφύγειν τὰς μεταβολὰς, *Nam commutatio, quae fit paullatim, efficit, ut omnis*

Gg 2

natura

r) Lib. I. cap. 3. pag. 25.

s) Aph. 51. Sect. II.

t) Lib. de Natura Humana, pag. 274. Tom. I. Opp. Conf. eiusdem Lib. VI. Epidem. Sect. III. p. 805. vbi aurea haec Regula: αἱ μεταβολαὶ φυλακτέαι, *Subitae Mutationes sunt cauendae*.

u) Lib. de Victu Acutor. pag. 287. Conf. et ibidem, pag. 281. Tom. II. vbi eadem sententia prudentissima occurrit.

x) De Institut. Cyri, Lib. VI. pag. 128. Conf. STOBÆI Sermone XCIX. pag. 549. Edit. CONRAD. GESNERI, et PLATO, Lib. VII. de Legg. p. 631.

natura mutationes ferat. Sed eadem occurrunt passim apud ipsum GALENUM ^y), et alios plures ^z).

§. XIV. Ex haecenus ergo cum cura dictis liquidissime nunc patere arbitror, immo paene confido, Herbam quidem Nicotianam ptarmicam praeter necessitatem, consuetudinis tantum temere introductae aut affectatae cuiusdam vrbauitatis causa, ingenti copia quotidie naribus iam torpidis ingestam, semper obesse sanis corporibus, nunquam prodesse natura infirmis, aut aliqua iam internarum partium labe vitiatas: parce vero et tempestiue, medicamento errhini loco adhibitam, in variis morbis atrocioribus, superius iam late commemoratis, egregium prorsus praestare vsum.

§. XV. Scite proinde acuteque prouerbio dicunt Graeci ^a): τῷ ἡδύσματι ὃ δὲ χεῖνόςταί, ὥσπερ ἐδέσματι, siue: *Condimento haud uti decet, tanquam cibo*: Multo minus itaque medicamento vti licet, ceu cibo iucundo quotidiano, siue voluptatis imaginariae inuitamento aut irritamento. Quare et hic saluberrimum istud ΕΡΙCΤΕΤΙ sapientissimi monitum apprime applicandum ^b): τῶν ἡδέων τὰ σπανιώτατα γινώμενα.

y) In *Orat. Suasor. ad Artes, Cap. XI. pag. 12. Tom. II. et ibidem pag. 219. et Tom. VI. pag. 156. et alibi saepissime.*

z) Vid. IO. CHRYSOSTOMI *Tom. I. in Vet. Test. pag. III. BASILII MAGNI Conc. x. de leiun. pag. 516. Tom. III. Opp. Paris. ISIDORI PELUSIOTAE Epist. 45. Lib. II. pag. 191. Item IOANNIS PRICAEI Not. ad APVLEII Lib. V. Metamorph. pag. 261. Lib. VII. pag. 386. et Lib. denique VIII. pag. 400. ut et LINDEII *Select. Med. pag. 583. DIETERICI Iatreum Hippocr. pag. 398. seqq. et denique IO. BAPTIST. DONII Tract. de restituenda salubritate agri romani, apud SALENGRE, in Noua Antiquitatum Romanarum Thesauro, Tom. I. pag. 965. ne alios Auctores plures iam praeter necessitatem, citemus, res enim satis nota et quotidie obuia est. Conf. si placet, nuperam no-**

stram commentationem de Vino modico Hypochondriacis salutare ad I Timoth. V, 23. illustrandum, pag. 9. et SALVSTII SALVIANI Variar. Lectionum de Re medica, Lib. III. cap. XI. pag. 255. seqq.

a) Vid. ARISTOTELIS *Lib. III. Rhetor. cap. 3. pag. 198. item BASILII MAGNI Tract. de Virginitate, p. 618. Tom. I. Opp. et alios plures. Conf. Fabula nostra CXXIII. p. 275. et pag. 276. in Notis et poemat. nostr. Tom VI. pag. 625. in Not. item Dissert. nostr. de Morte subita ex nimio violarum odore oborta, pag. 28. nec non rursus. poemat. Tom. II. p. 204. Edit. II. et Fabul. XXIII. pag. 48.*

b) In *Apophthegmat. pag. 428. Edit. BLANCARD. nempe ex STOBAEI Serm. erb. VI. pag. 82. Conf. huc praesertim DIONIS CHRYSOSTOMI Orat. XXX. p. 307. seqq.*

μενα μάλιστα τέρεται εἴ τις ὑπερβάλλει τὸ μέτριον, τὰ ἐπιτεγπέστατα ἀτεγπέστατα ἂν γίγνοιτο. h. e. *Ex voluptariis ea, quae rarissime contingunt, inprimis delectant: Si quis autem excedat modum, etiam quae suauissima sunt, ingratiissima fient. Quod ipsum breuius et, vt ita dicam, rotundius sic expressit acutissimus IUVENALIS^c): voluptates commendat rarior usus. Quo et denique illud spectat PHAEDRI^d):*

*Sed temperatae suaves sunt argutiae,
Immodicae offendunt.*

Immo potius, si ista quidem paullo liberius ita inuertere liceat:

*Sed temperatae suaves sunt deliciae,
Immodicae offendunt.*

Verum finiamus iam, pace quidem Lectorum, lepidissima ista parodia Horatiana, ab elegantissimo COHAUSENIO^e), cuius iam aliquoties honorifica facta fuit superius mentio, composita:

Natos decori, desipientia est,

Foedare nasos: Tollite barbarum

Morem, verecundasque nares

Merdisfluo prohibete poeto.

DISSERTATIO MEDICA NONA.

DE

MORTE SVBITA

EX

NIMIO VIOLARVM ODORE OBORTA.

PROOEMIUM.

Nhil in rerum natura adeo quidem eximium, quod nobis exitio esse non possit, vbi abusus nempe accessit, vnde perbene QVINCTILIANVS^a): *Quis nescit ignes, aquas, sine quibus nulla sit Vita, et, ne*

Gg 3

c) *Satyra XI.* fine, vbi conf. GRANG. et ALMELOVEEN. in *Nozis Variorum.*

d) *Fabula 86. Lib. V.* vbi vid. BYRMANN. et alios Interpretes.

e) In *Raptu ecstático in Parnassum*, mox ab initio.

a) *Instit. Orat. Lib. II. cap. 16. p. 187.* Edit. BYRMANNI.

terrenis immorer, solem lunamque, praecipua siderum, aliquando etiam nocere? Nihil rursus tam exile ac humile; quod non aliquando ingens damnum inferre queat, vbi increuit praeter modum, aut vires eundo adquisiuit, adeo vt hinc verum omnino sit effatum illud OVIDIANVM^{b)}:

Nil prodest, quod non laedere possit idem.

Ipsi adeo tenerrimi halitus et vapores, immo odores quoque suauissimi, spiritum istum nostrum precarium tenuique quasi filo pendentem nobis repente excutere possunt, vbi nimium confertimque collecti, inuauerunt; adeo scilicet non tam magno apparatu, aut exquisita molitione; quam potius leui tantum aura odoratiore, opus est, vt corporis animique infirmo prorsus vinculo cohaerens societas dirimatur: *Heu! heu! nos miseros, quam totus homuncio nil est.*

Quid, quaeso, aspectu iucundius, quid, inquam, odore suauius, praecipuis illis hortorum bene cultorum ornamentis, omnium florum splendidissimis reginis, et diuum hominumque amoribus ac deliciis*), purpureis nempe Rosis? et tamen reperti sunt, teste experientia et fide multorum Auctorum medicorum, olim plures, qui nimio earundem odore

b) II. Trist. 266.

*) Sic nempe ANACREON in rosea illa et suauissima in Rosam, Oda LIII. eam venustissime vocat Θεῶν καὶ βροτῶν χάριμα καὶ μέλιμα: ubi τὸ μέλιμα idem est ac ἀγάπημα, teste HESYCHIO. Conf. ibi ad ANACREONTEM, BARNES. p. 182. Quae bella vox, vt id obiter hic adicere liceat, reddenda omnino SVETONIO, Lib. de illust. Grammat. cap. III. nempe legendum ibi haud dubie, παντὸς ἀγάπημα, pro vulgato ἄγγημα, quod nullo modo illic ferri potest. In Vett. enim Codd. manifesta satis sunt huius verae lectionis vestigia, scil. agasema; vnde vnica tantum litera mutata, protinus prodit scitum illud atque vnice verum agapema, hoc est ἀγάπημα; quod tamen nullo vsquam interpretum, immo, ne ab ipso quidem

SALMASIO, Exercit. Plin. pag. 30. fuit animaduersum. Ita Deam ἀνδρῶν ἀγαθῶν ἀγάπημα, in Epigrammate dixit CRATES, obseruante STEPHANO: sic alibi saepius, ἀγάπημα Θεῶν, Μουσῶν, Νυμφῶν, et simii. quo modo et VIRGIL. Eccl. 7. Nymphae noster Amor, vbi vid. LA CERDAM et alios Interpretes: Inprimis autem ARNOLD. ad CATON. diras, p. 146. sqq. et pag. 203. seqq. item STANLEI ad AESCHYL. Choëph. pag. 844. aliosque plures. Sicut etiam nec illud in eiusdem SVETONII Claudio, cap. 38. vbi obscure et vitiose hodie legitur, μωρῶν ἀνάστασις, pro longe meliore ac veriore nostra lectione, ἀνάπλασις, nempe Libelli istius argumentum erat: stultitiam neminem fingere, h. e. τὴν μωρίαν μηδένα ἀναπλάσσειν: vt mox ipse explicat SVETONIUS clarissime.

odore iucundissimo suffocati, subito perierunt, purpureamque veluti animam emiserunt. Ita nota mihi quondam fuit nobilissima sponsa, quae medias inter rosas congestas sedens, ipsa pulcherrima castissimaque Rosa, animique gratia, corollas ex iisdem nectens, repente concidit, et intra manus foeminarum frustra in auxilium accurrentium, exanimata est: sed plura hanc in rem inferius opportuniore loco, dicentur.

Quid visu modestius, tactu mollius, ingenio humilior, odore suavius, et colore amoenius, violis illis prati cultricibus, ut ita loqui liceat? de quarum meritis laudibus elegantissimam oliam Elegiam scripsit politus ille ANGELVS POLITIANVS, insertam *Epistolae* 14. *Lib. VII. pag. 258.* aliorum vero de iisdem encomia vid. in DORNA-

VIL

rissime. Sic de Vlyffe dixit PHILOSTRAT. *Heroic* x, 2. pag. 708. *μανίαν πλάττειτο*, et alius ignotus apud SVIDAM, in *ὑποπτος*, Auctor, *ἐπιπλάσσω μωρῶν*, quod idem est, ac *ἀναπλάσσω*, et huc inprimis facit: Apud PHOTIVM quoque legitur, pag. 157. *κενολογίαν καὶ ἀτοπίαν ἀναπλάττει*, et pag. 209. *λυσσώδης καὶ μανικὴ διάνοια ἀνεπλάσατο*. Ita δέματα ex ὄντα ἀναπλάττειν, occurrit apud LIBAN. *Ep.* 126. pag. 66. et alibi saepe, et *ἀναπλάσσειν λόγους καὶ μύθους*, saepius, apud PLATON. PLUTARCH. MAX. TYR. et alios plures: *ἐκ πιθανῆς ἀναπλάστους λόγους*, scite quoque dixit HIPPOCRATES, in *praeept.* pag. 61. Sed studio iam omitto longe plura, quae affatim in promptu sunt, alibi commodius expro-menda. Interim vid. de hoc ipso verbo *ἀναπλάττειν*, quae collecta exhibentur in *Miscell. obseruat. Crit. Vol. x. pag. 204.* et in *Notis* DORVILLE, ad CHARITON. pag. 188. et pag. 551. Ceterum vero vehementer hic miror, sagacissimum MARKLANDVN in *Epist. Crit.* ad FRANC. HARE, pag. 23. scribere potuisse: *Ista vox ἀνάστασις, in SVETONIO, non minus mihi negotium faceffit, quam olim Atheniensibus,*

Paullo praedicante: magno emerita BENTLEII SVETONIO hoc doceri Sed nunc gratis, et sine vllis impensis, a me, qui tamen nec BENTLEIVS sum, nec vnquam tantus Criticus ero, facillime doceri, si velit, potest, vnice scilicet veram et appositam esse nostram coniecturam superius propositam et valide probatam, nempe *μωρῶν ἀνάπλασις*, pro vulgato illo frigido et inepto Commento, *μωρῶν ἀνάστασις*. Sed ohe! iam satis est, imo plus satis. Denique nec illud ab vlllo hucusque monitum, in eiusdem *Vita August. cap. 72. τεχνόβιον*, legendum esse, pro vulgato *τεχνοφύον*, quod nempe ne graecum quidem est. Sic ad eandem normam formamque Graeci dicunt *ἀισχροβιον, ἡδύβιον, κοινόβιον, λαμπρόβιον, ὀρέσβιον, δικόβιον, λυχνόβιον*, apud SENECAM, *Epist.* 122. et similia plura in Lexicis passim obuia. Sed de his et aliis multis, exactius, in nouo nostro ad SVETONIVM Commentario, proxime forsan cum deo, prodituro. Interim haec obiter, pace Lectorum, a nobis hic, oblata sponte occasione, amoenae varietatis gratia, modesta monita sunt.

VII *Amphitheatro sapient. SOCRA T. Tom. I. pag. 194. sqq.* et tamen aliquoties etiam compertum est, eas plurimum nocuisse sanitati, quum nimium eidem prodesse viderentur. Sed alio quidem modo, ac illo quem enarrat de propudioso illo humani generis monstro, Antonio Heliogabalo, AELIVS LAMPRIDIVS^{c)}, his nempe verbis notatu dignis: *Oppressit in Tricliniis versatilibus, parasitos suos violis et floribus, sic, ut animam aliqui efflauerint, quam erepere ad summum non possent.*

Quis enim, obsecro, non obstupescat, aut certe viola pallidior fiat, ubi audit, Violas suaue olentibus suis halitibus suis nimis et arctiore loco conclusis, Virginem quidem sanam, vegetam et viridi aetate florentissimam, adeo usque violare potuisse, ut praecipiti prorsus et improuiso fato, illa e viuis raperetur, relicto sui acerbo et diutius manfuro desiderio? et tamen id ipsum aliquando certissime factum est; prout ex sequenti flebili Historia vberius patebit, quam iamiam enarraturus sum fidelissime et diligentissime,

Quanquam Animus meminisse horret, luctuque refugit.

VIRGINIS VENUSTAE HISTORIA FVNESTA.

Virgo nobilis nubilisque, florentis adhuc annorum XVII aetatis, emendatissimae formae iuxta, vitaeque, multis iam petita et negata procis, vnica Matris suae praestantissimae Filia et simul gloria, (pater enim iam opportune decesserat, felix morte sua, neque in hunc servatus dolorem,) flos ipsa Virginum lectissimus, vel roseo, vel purpureo, violaeque nitore exsplendescens, ut in veteri inscriptione legitur,

c) Cap. 21. in *Vita Heliogabali*, p. 842. Tom. I. *Scriptor. Hist. August.* Lugd. Bat. 1671. cum Not. *Casaub. Salmas.* et *Variorum.* Quo et maxime pertinent illa, ibidem, Cap. 19. pag. 832. *Strauit et Triclinia de Rosa, et lectos, et porticus, ac si per ea deambulauit, idque omni florum genere, Liliis, Violis, Hyacinthis et Narcissis.* Conf. ROSENBERGI *Rhodolog. part. II. Cap.*

15. pag. 223. sqq. et STVCK. *Lib. III. Antiq. Conuiu. cap. 16. pag. 370. sqq.* Non obstante vero tot pulcherrimorum Florum odore vario suauissimo, tamen vehementissime nihilominus foetebat viuum illud spiransque turpissimi Imperatoris cadauer, vitiis flagitiisque foedissimis dudum sepultum. Sed haec obiter.

tur, atque florum, inprimis Rosarum, et primarum tepidi veris nunciarum, Violarum nempe, amantissima, quum renato florido vere anni CIOIOCCXXIV. grandem aliquando patinam violis recens decerpis refertam, in domesticos et culinares vsus destinatam, angusto suo cubiculo intulisset, imminentis mali prorsus improuida, tandem ipsa postquam sana hilarisque coenasset, cubitum ex more discedit, clausisque infelicitur ostio atque fenestris ipsius cubiculi, lectulo castissimo sese, nimium futuri secura, placide reponit, atque altissimo somno veluti immersa, sonoros rhonchos ducit, nunquam eheu! euigilatura, sed somnos potius in mortem vltimam continuatura.

Mater ergo circa primam lucem, expergefacta, curatis interea e consuetudine solita laudabili, domesticis negotiis, miratur demum Filiae peruigilis alias, insolitas plane moras, quippe quae, adulta iam aliquantum die, altum adhuc praeter morem, sterteret. Visura igitur, numquid forsan ipsi accidisset; ipsum mox cubiculum adhuc clausum, festina intrat, videtque attonita, quod vidisse vnquam nollet, miserandam illam filiam, a filia sua venustissima mirum quantum horrendo prorsus spectaculo, immutatam; capite nimirum pronò extra lectum, pendulam, oculis torua sub fronte, extantibus rigentibusque vsque ad horrorem formidinemque visentium, trucem et minacem, tota facie tumidam et ex fusco rubicundam, hiantem spumaeque ore terribilem, fractos suspiriososque spiritus ex anhelò angustoque pectore ducentem, et ima longo ilia singultu tendentem, apertis naribus, exsertaque foede lingua, auram auide captantem, et, quod malorum maximum, omnibus denique sensibus orbam: neque enim quidquam audiebat, aut intelligebat, multo minus ipsa proloquebatur quidquam.

Subitus ergo lamentabilisque tollitur clamor a matre moestissima; accurrit confestim omnis familia terrore repentino perculsa; magnis resonant vlulatibus spatiosae aedes: lectum flentes circumstant amici et cognati: omnia luctu et eiulatu foemineo frustra complentur: conuocantur protinus medici ac chirurgi, pallentes, pauore nutantes, dubitantesque, qui

*Multa manu medica, phoebique potentibus herbis
Nequidquam trepidant.*

Frigentes iam artus fouentur, fricantur, balneo calido pedes immittuntur gelidi; venae stricto ferro in illis exsoluuntur; sed lenta tantum effugia sanguini iamiam piceo quasi, spisso atque tenaci, pessimo sane omine, praebentes: naribus valentissima admouentur remedia errhina, ipsis quoque foetidis in auxilium vocatis, vti plumis, cornibus, chartis emporeticis et id genus aliis, adustis, manibus fortissima epicarpia, ori generosissima analeptica et cardiaca, fronti ac temporibus praestantissima metopia et crotaphia applicantur: Suris itidem, aceto prius imbutis, amplissima imponuntur vesicantia ex cantharidibus parata: plantis pedum tenacissima affiguntur epispastica, et aluo denique acerrima iniiciuntur clysinata, ex ipsa Nicotiana, aliisque similis virtutis efficacioris herbis, praeparata. Omnes quoque protinus aperiuntur fenestrae, quo aura frigidior puriorque sensim ingrediatur.

Verum omnia quidem apposite et sapienter; sed omnia tamen simul, proh dolor! incassum, inani prorsus consilio et infructuosa penitus opera; Nec locus artis erat medicae, nec vota valebant. Nihil enim amplius in ope humana, aut arte salutifera reliquum erat, quo letalis ille veternus excuti, aut infelicissima Virgo ineluctabili fato iamiam irruenti eripi potuisset: licet interim mater adhuc multum sperare videretur, et quamcunque corporis amati partem osculis misere tepefecisset, illi quidem vitae calorem rediisse, frustra clamaret. Flexo enim sensim in vesperam die, illa pulchra matre pulchrior filia, ceu flos caducus, aut solstitialis herba, merita nec morte, subito occidit, omnibus quidem bonis flebilis; sed nulli tamen flebil or, quam sceleratissimae, aut quod stilo veteri Romano, idem, infelicissimae Matri, ad aeternum luctum gemitumque relictae: quae scilicet, turbato rerum ordine, contra votum, filiae tumulum dabat, a quo potius illum aliquando accipere sperauerat. Sic enim, quod fas parenti facere debuit filia, mors immatura contra fecit, vt faceret parens: praesertim, quum miseranda illa puella inter raucos horrifonosque clamores inconditos, dirasque totius corporis conuulsiones, stridulasque

lasque conquassati et coarctati pectoris suffocationes, sine omni sero reuerſi ſensus, aut intellectus indicio manifesto, spiritum adhuc indemnatum miserrime effunderet. Iacentem igitur sic atque pallentem viderunt atque luxerunt omnes:

*Qualem virgineo demessum pollice florem
Seu mollis Violae, seu languentis hyacinthi:
Qualia pallentes declinant lilia culmos,
Pubentesque rosae primos moriuntur ad Austros,
Aut ubi verna nouis expirat purpura pratis.*

Causſam autem tam properi ac praecipitis fati probabilem medicis indagantibus nulla quidem alia in praesens succurrebat; quam aut subita apoplexia, aut crudele venenum, incautius ingestum: posterius quidem, ceu nulli prorsus argumento innixum, mox ipsa mater, admodum indignabunda, valide refellebat cum omni sua familia, quae postremae nempe coenae laeti saluique omnes vna cum ipsa filia interfuerant. Vnus tandem ex illis medicus, ceteris cautior et prudentior, culpam tam repentinae mortis potius veriusque reiiciebat in sola illa odorifera violarum affatim congestarum effluuia, fortiora, quibus per integram quidem noctem angustum nimis cubiculum, clausis praesertim fenestris ostioque, vehementius oppletum fuisset; quo scilicet factum, vt aer inclusus eiusmodi miasmatis soporiferis ac narcoticis, seu stupefacientibus, refertus, et ad inspirandum prorsus incommodus ineptusque redditus, per ipsam respirationem, sanguini sensim ingestus, vniuersum neruorum systema, ipsamque animae ipsius sanctam officinam, seu Cerebrum, adortus fuisset, sicque letalem illum lethargum, ipsamque postea obliuiosam mortem progenerasset. Sapientissime per deum! atque verissime: neque enim veriolem melioremque tristissimi huius casus causſam vel ipse HIPPOCRATES noster, vel medicae Artis repertor, AESCULAPIVS, aut ipse APOLLO, in medium, credo, allaturus esset. Solae ergo fatales illae Violae vitalem auram fomitemque et summum formae decus violarunt infelicissimae puellae ipsique mortem perniciosissimam, Matri autem afflictissimae perniciosissimam iacturam attulerunt. Vti inferius in ipso opusculi huius progressu,

gressu, pluribus argumentis et exemplis, euidentissime, nisi fallor, demonstrabitur. Interea tamen ipsi laetis adhuc florentibusque annis, lacrymoso et acerbo funere raptae

Candida Nais

*Pallentes Violas, et summa papauera carpens,
Narcissum et florem iungit bene olentis anethi,
Spirantesque crocos, et in urna perpetuum Ver.
Sic nunc e tumulo, fortunataque fauilla
Nascentur Viola.*

Flebili vero huic Historiae simillimam prorsus recentiore commode hic adiungere, omnino licebit, quae, referentibus omnibus diariis et relationibus publicis, Anno 1764. Londini, nouissime contigit, licet laetio rem ac felicior em exitum habuerit. Quam ex gallica atque vernacula lingua, fideliter a me Latine redditam, perspicue enarrare iam adgredior :

Opulentus quidam dynasta, per vehementiores multorum florum odoriferorum, in cubiculo forte positorum, vapores et exhalationes filiam suam unicam subito, omnique opinione citius, misere perdidisset; et sine omni dubio, vis illa erepta fuisset, si sola in isto quidem conclavi dormiuisset. Paene enim iam suffocata, sero euigilabat tandem, atque per aliquod tempus, omni loquendi facultate penitus destituta, iacebat. Attamen obseruabat, suam seruam prope accubantem; etiam vigilare quidem; sed et simul in eodem secum discrimine versari. Nimii enim isti flores sua violenter intolerabili plane vapore et grauissima odorum vastitate oppleuerant non solum totum illud conclaue; sed et simul istarum miserarum puellarum capita et pectora. Post multos demum labores, seruam illa omnes quidem vires adhuc sibi residuas, quanto poterat nisu, aegre colligebat, ad vasa illa, quibus isti fatales flores continebantur, sensim prorepebat, eaque extra ipsum cubiculum, foras exportabat. Sic ergo ipsa ianua et fenestris simul late apertis, nouoque aere liberiori puriorique ita opportune intromisso, ipsa illa filia, quae iam iam extremum paene spiritum trahebat, sensim tandem ad se redibat, et in ipsam vitam tenui quasi filo adhuc pendentem, auspicato reuocabatur. Lugubris igitur hic casus prudenti cautioni seueraeque admonitioni in posterum cunctis debet utique esse flo-
rum

rum amatoribus, ne multa magnaue eiusmodi vasa florigera, seu variis floribus fragrantioribus affatim oppleta, istis praesertim conclauibus incautius inferantur, ubi diutius commorandum et per ipsam integram noctem dormiendum fuerit. Ceterum similes etiam tristes euentus ex nimis vulgarium et humi nascentium violarum exhalationibus fragrantibus, nuperrime obseruati ac descripti fuerunt. Haecenus ista quidem relatio publica.

Hanc igitur simillimam et maxime genuinam huic nostrae praecedenti historiam barbati nonnulli in vicinia viri et imberbes etiam iuvenes in posterum, cum sero pudore, probe sibi notent, qui nescio, quibus intemperis tum exagitati, contra tot exempla, a nobis producta, imo contra ipsam sanam rationem et fidam experientiam, inani tantum obloquendi studio, insolenter tradiderunt, si fabula quidem fuerit vera, hanc ipsam nostram Historiam, fidelissime a nobis superius relata, fidem superare, quoniam nempe per ipsam quidem rerum naturam, verisimile haud videatur, ut quis a sola Florum exhalatione Vitam subito amittere possit. Verum candido amore impulsus, nolim illis praecocibus quidem censoribus optare, ut ipsi tam periculofum in se ipsis aliquando faciant experimentum: nihil enim certius veriusque esse, his ipsis historiis, mille proh dolor! exemplis funestis, per omne quidem aetum, ubique obseruatis, satis superque constat. Namque amoeni eiusmodi Ἀδώνιδος κήποι, seu Testae variis floribus suaueolentibus oppletae et ornatae, animas heu! nimium sui securas, saepissime inter dormiendum, deduxerunt subito ad inamoenos Ἀδὲ κήπους, et de istiusmodi *Ollis Rhodiaceis* iusto fragrantioribus, notum illud e sacris, prouerbium, *Mors in Olla*, factum est frequentissime Veriuerbium. Sed haec obiter, data quidem hic commoda occasione, ut nimirum isti nimis elati et inflati δοκησιόσοφοι discant tandem, in sese descendere, et reputatis suis perquam exiguis iudicandi et decidendi viribus, ferio erubescere, erectasque nimium Cristas verecunde demittere.



SINGVLARIS HVIVS HISTORIAE

VBERIOR

ILLVSTRATIO CVM EPICRISI.

§. I.

Verissima est haud dubie aurea illa HIPPOCRATIS nostri ^{d)} sententia: Πᾶν τὸ πολὺ τῇ φύσει πολέμιον: quàm sic latine reddidit, et vberiore quasi paraphrasi amplificauit ISIDORVS HISPALENSIS ^{e)}: *In multis contristatur Natura, mediocri autem gaudet: Omnis enim immoderatio non salutem, sed periculum, affert.* Quo et respexit PLINIVS ^{f)} his scilicet verbis notatu dignis: *Perniciosissimum in omni quidem vita, quod nimium, praecipue tamen corpori: minuique, quod grauat, quolibet modo utilius.* Omitto plura in hunc sensum passim obuia, et a GRVTERO, MAGIRO, LANGIO, GRO TIO, aliisque Anthologis, item ERASMO ROT. in opere *Adagiorum*, congesta.

§. II. Omni autem sensu, nimirum literario, philosophico, physico, politico, oeconomico, ethico, medico et diaetetico denique, veram vtique certamque esse illam ipsam sententiam modo laudatam, neminem rerum humanarum vel mediocriter tantum gnarum, in dubium facile vocaturum, vtique spero, imo certius confido. Quis enim, obsecro, est, qui non quotidie fere in ore habeat notissimum illud TERENCEIANVM ^{g)}:

Nam id arbitror

Adprime in vita esse utile, ut ne quid nimis.

Siue, vt id in ANTHOLOGIA GRAECA, expressit elegantius poeta ^{h)}:

Τὸ μηδὲν γὰρ ἄγαν, ἄγαν με τέρεπει.

Nihil nimium, nimium me delectat.

§. III.

d) *Aph.* 51. *Sect.* II. vbi vid. in *Comment.* GALENVS, et alii: item DIETERICVS, in *Iatreo Hippocratico* et RITTERSHVS, ad PHAEDRI *Fab.* 86. *Lib.* V. p. 157. *sq.* Occurrit et alibi, in scriptis HIPPOCRATIS aurea haec Regula utilissima saepissime, v. LVCAS VERHOOFD, et nouissime ALMELOVEENIVS, in suis

Aphorismorum Editionibus nitidissimis, perquam diligenter obseruarunt.

e) *Lib.* IV. *Origin.* cap. I.

f) *Hist. Nat. Lib.* XI. c. 54. siue vltimo.

g) In *Andria*, *Act.* I. *Scen.* I.

h) *Lib.* I. cap. 12. add. EVRIPID. *Hippolyt.* 264. et ibi BARNES. p. 227. *Tom.* I.

§. III. Praesertim tamen in blandis sensuum oblectamentis, omne illud ingratum, anceps, periculofum et exitiosum esse solet, quidquid nimium ac diuturnum est: inde bene in hunc abusum acuteque post PLATONEM ipsum, MAXIMVS TYRIVS ⁱ⁾): Χρονίζουσα ἡδονὴ λύπην γεννᾷ, *Iusto diutius perseverans voluptas molestiam parit*; siue, vt auream hanc sententiam stilo PLINIANO, latine reddam ^{k)}): *Adeo nulla est voluptas, quae non assiduitate sui fastidium pariat.*

§. IV. Quod si enim illa ipsa sensuum oblectamenta, scilicet lucis ac colorum variorum splendores, sonitus, sapes et odores, splendiora fuerint, sonantiora, acerbiora, aut austeriora, et denique fragrantiora et odoratiora; quam vt commodè perferri, et citra molestiam tolerari possint ab ipsis sentiendi instrumentis, nempe oculis, auribus, lingua atque naribus: tum sane propter sublatum sic inter vtraque sensuum scilicet instrumenta et delectamenta, iustum aequilibrium et accuratam proportionem resolutam ac dissectam, non solum nulla ex illis nimis et vehementioribus oblectationibus, iucunda voluptas aut gratus sensus percipi potest: sed et ipsa adeo sensuum organa enormi illa obiectorum sensibilium magnitudine et immensa quasi exsuperantia, insuper molestissime afficiuntur, vitiantur, immo et saepius labefactantur ac destruuntur.

§. V. Hinc recte in hunc sensum iam olim ARISTOTELES ^{l)}): Τῶν αἰσθητῶν αἱ ὑπερβολαὶ φθείρουσι τὰ αἰσθητήρια: *quae sentiuntur, si modum excedunt, instrumenta sensuum corrumpunt.* Quod ipsum sic luculentius elegantiusque expressit magnus ille IO. CHRYSOSTOMVS ^{m)}): Ἐν τῷ σώματι ἐὰν πλεῖον βεληθῇ λαβεῖν ὁ ὀφθαλμὸς, ἢ πλεονιδεῖν τῷ ὠρισμένῳ δελήσειεν, ἢ μείζον ἀναλάβοι φῶς, ἔβλαψε μᾶλλον, ἢ ὠφέλησε τὸ ὑπὲρ τὸ μέτρον· εἰ δὲ ἔνθα ἀγαθόν τι τὸ φῶς ἐστίν, ὁ ὀφθαλμὸς εἰ πλεονιδεῖν δελήσειεν, ἀπόλλυται, ὅτ' ἂν λαμπρότερον ἴδῃ, ἐννόησον ἐπὶ τῷ κακῷ· ἢ ἀκοὴ ἐὰν μεγάλην δέξηται φωνήν, ἀπόπληκτος ἢ διάνοια γίνεται καὶ ὅπερ
ἀν

i) *Dissert.* xxxiv. p. 341. Edit. DAN. HEINSII Conf. et p. 338. *ibid.*

k) *Lib.* xii. *Hist. Nat.* cap. 17. fine.

l) *Lib.* ii. *de Anima* et imprimis *Lib. de Sensoriis et Rebus sensibilibus*, conf. Not.

nostr. ad *Somn. Scip.* Tom. i. poem. p. 420. Ed. i.

m) *Homil.* li. in *Act. Apost.* Cap. xxv. pag. 444. Opp. Tom. iii. in *Nouum Testamentum.*

ἂν πλεον τῆ δέοντος γένηται, παραπόλλυσι. In corpore si plus vellet accipere oculus, vel plus videre, quam ei praefinitum, vel maius lumen accipiat; hoc ipsum, quod supra iustam mensuram est, nocebit magis, quam proderit. Cogita vero, quoniam, si quum bonum quoddam lux sit, et perit oculus: si plus viderit, quando fulgidiora adspicit, quam mensura sua postulat: quid faceret lux, si mala esset? Et auris, si maiorem sonum accipiat, mentem facit attonitam. Quidquid igitur debitum et naturalem modum excedit, perniciem infert. Haecenus christianus ille Demosthenes. Quibus perquam similia sensu eodem sunt, quae ex Libro B. HILARII, Episcopi et Confessoris, de Trinitate, protulit ill. MVRATORIUS, in *Anecdottis Latinis*, Tom. III. pag. 253. quae vero ibi potius legantur; sunt enim aliquanto longiora ac copiosiora.

§. VI. Sic enim lucis subito irruentis fulgentesque radios vndique circumfundentis importunitas et austeritas, ut post PLINIVM, significanter ait CAELIVS AVRELIANVSⁿ⁾, oculorum aciem protinus

n) Libro nempe I. de Morb. chron. cap. 4. pag. 308. praecauens Lucis Austeritatem, ne repentino eius occursum percutiatur visus. Ita enim sine omni dubio legendum ibi est; non autem Auctoritatem, prout in omnibus quidem Editionibus haecenus vulgatis, sine sani sensus auctoritate, ut ita dicam, pessime legitur. Sic enim iam dudum PLINIVS, Lib. xxx. cap. 6. Sunt colores austeri, aut floridi, et ibidem, c. 10. floridis coloribus Austeritatem daret: item Lib. xxxvii. cap. 5. de Smaragdis Scythicis: nullis maior Austeritas, et mox ibidem, nonnullis interiectis: tenorem illum Scythicae Austeritatis non semper custodiunt. Vbi pari plane scribarum vitio, in Veteribus Libris MSt. Auctoritatis, scriptum olim fuisse, scite observauit CL. SALMASIVS, in Exercit. Plinian. pag. 140. ubi solide, docte et fuse, ut solet, tractat de hac ipsa Lucis et colorum Austeritate, quod et iam antea, pari diligentia, fecerat in doctissimo Commentario ad TERTULLIANI Lib. de Pallio, p. 135. sqq.

Conf. et huc rorissime STRUCHTMEYERI Animaduers. Crit. Lib. II. cap. 13. pag. 173. Est vero Austeritas, hoc quidem praesertim loco, ille eximius et exsplendescens inprimis fulgoris vigor, qui ex luce ac coloribus in oculos vehementer vibrat. Iterum huc PLINIVS, Lib. ix. cap. 38. pelagii nimiae nigritiae dat austeritatem nitoremque, et cap. 36. Color austerus in glauco: Sed clarius adhuc, Lib. xxxvii. cap. 7. de Sandastro, gemma lucidissima: Mares Austeritas distinguit, quodam vigore apposita tingens. Omitto iam alia passim apud PLINIVM in hunc sensum obuia. Sic et pariter Graecis est φωτός καὶ χρωμάτων αὐστηρότης, πικρότης, βαρύτης καὶ ὀξύτης, qui et inde dicunt φῶς αὐστηρόν, πικρόν, βαρὺ, καὶ ὀξύ, item χρῶμα αὐστηρόν, καὶ πικρόν; qua de re plura SALMASIVS, loc. cit. pag. 141. et ad Tertull. l. c. Lucis vero importunitas, CAEL. AVRELIANVS, felici audacia dixit loc. allegat, p. 316.

tinus praestringit, hebetatque, dolorem, aut lippitudinem ingerit, lacrymas euocat, caliginem offundit, aut ipsam demum moestam caecitatem inducit, prout exemplis constat DEMOCRITII, vti quidem traditur, et aliorum, tum philosophorum veterum, tum anachoretarum, mundi *optimi* scilicet; pertaesorum, et pretiosissimo oculorum munere vix dignorum. Vt taceam iam crudelissimum illum DIONYSII SICVLII morem, miseros suos captiuos loco obscurissimo prius diu detentos, immisso subito lumine splendidissimo, excaecandi, quem solus, nisi fallor, commemorat GALENVS, loco mox allegando. Hoc nempe est, quod scite dixit SENECA, in *Hercule Furente*, 652. sqq.

Torpet acies luminum,

Hebetesque visus vix diem insuetum ferunt.

Inde pulchre hanc in rem XENOPHON^{o)}: ὁ ἥλιος οὐκ ἐπιτρέπει τοῖς ἀνθρώποις εἰς αὐτὸν ἀκριβῶς ὁρᾶν, ἀλλ' ἐὰν τις αὐτὸν ἀναιδῶς ἐγχειρῇ θεᾶσθαι, τὴν ὄψιν ἀφαιεῖται: Sol non permittit hominibus, ut se accurate inspiciant; sed si quis impudenter eum spectare conetur, videndi facultatem amittat. Quod CICERO^{p)} ita eleganter expressit: Intueri solem aduersum nequitiam, eiusque radiis acies vestra sensusque vincitur. Quin et dudum ipse noster HIPPOCRATES^{q)}: Τὸν ὀφθαλμὸν ἀνιά πάντα, ὅσα λαμπρότερα ἢ κατ' αὐτὸν ἐστὶ: Oculum omnia moleste afficiunt, quaecunque splendidiora sunt, quam ipse est. Quo et respexit BASILIUS MAGNVS^{r)}, breuius quidem, ac CHRYSOSTOMVS, supra laudatus; sed tamen aequae vere ac concinne: Τὸ ἄγαν λαμπρὸν ἀμαυροῖ τὰς ὄψεις, Quod nimis splendidum est, oculos obscurat. Siue, vt PLINIVS^{s)} elegantius loquitur: Colorum claritas oculorum aciem offendit. Qua de re plura et argumenta, et exempla singularia, vid. si libet, apud GALENVM^{t)} et ipsius doctissimum enarratorem, CASP. HOFFMANNVM^{u)}. Sed audiamus denique

LVCRE-

o) *Memorabil. Lib. iv. pag. 634.*

p) *In Somn. Scip. §. 47. Edit. nostrae, vbi vid. si placet, Notas, pag. 421. Tom. I. poemat.*

q) *Lib. de Princip. aut Carnibus, p. 123. Tom. I. Opp. per LINDENIVM.*

r) *Homil. xiv. in Ebrietatem, p. 423, Tom. I. Opp. Edit. Paris.*

s) *Hist. Nat. Lib. xxxv. cap. 10. T. III. pag. 438. Edit. Elzeuir.*

t) *Lib. x. de Vsu partium, Cap. 3. et sqq.*

u) *In Comment. ad istum praestantissimum*

LVCRETIVM x), si lubet, meliorem versu, quam versus argumento:

*Splendida porro oculi fugitant, vitantque tueri:
Sol etiam caecat, contra si tendere pergas:
Propterea, quia vis magna est ipsius, et alte
Aëra per purum grauius simulacra feruntur,
Et feriunt oculos turbantia composituras.
Praeterea splendor, quicumque est acer, adurit
Saepe oculos, ideo, quod semina possidet ignis
Multa, dolorem oculis quae gignunt insinuando.*

§. VII. Sonus quoque iusto vehementior, grauior, acutior, aut asperior, auditum grauat, obtundit, turbatque; saepe etiam plane tollit, inprimis ubi sonitus auri ipsi nimis vicini vehementia teneram tympani membranam aut ultra modum relaxauit, aut plane rupit; qua de re plura apud auctores prostant exempla memorabilia: Conf. interim THOM. BARTHOLINI *Anat. reform. Lib. III. cap. 9. pag. 526.* Verum ergo utique illud ARISTOTELIS effatum y): γίνονται δὲ καὶ ἀπὸ τῶν μεγάλων ψόφων δύσκωφοι, a magnis nimium sonis fiunt surdastrī: nec non simile istud BASILII MAGNI z): Οἱ τοῖς μεγάλοις ψόφοις κατακρηόμενοι τῇ ἀμετρίᾳ τῆς πληγῆς, εἰς τὸ μηδὲ ἀκβεῖν παντελῶς περιάγονται: Magnis sonis strepentibus percussi, ex nimio ictus sonori excessu, eo tandem adiguntur, ut nihil prorsus audiant. Quorsum tandem et illud pertinet CICERONIS zz), ubique certe notissimum: ubi Nilus ad illa, quae Catadupa nominantur, praecipitat ex altissimis montibus; ea gens, quae illum locum accolit, propter magnitudinem sonitus, sensu audiendi caret. Qua de

mum GALENI Librum, pag. 225. seqq. vid. et FRACASTOR. de Sympath. et Antipath. cap. 14. item B. ADOLPHI Dissert. de Aegrotantium Conclavi, p. 676. Syllog. Dissert. Med. et pag. 678. ut et GERARD. DE ROO, *Annal. Austriac. Lib. V. pag. 164.* ubi alius subtilior excaecandi modus, nempe per laminam splendide candentem, oculis subito propius obiectam, enarratur.

x) Lib. IV. de Rerum Natura.

y) Lib. II. de Anima, et Lib. de Sensibus. Conf. Not. nostr. ad Somn. Scip. pag. 420. Tom. I. poem.

z) Homil. XIV. in Ebrietat. pag. 423. Tom. I. Opp.

zz) Somn. Scip. §. 46. ubi vid. si lubet, Notas nostras, pag. 419. sqq. T. I. poemat. Edit. I.

de re plura KIRCHERVS, in *Phonurgia*, et FRACASTORIVS, de *Sympathia et Antipathia*, cap. XIV. alique.

§. VIII. Sapores porro nimis pungentes, acres, acerbi, austeri, amari, falsi, feruentes ac frigentes, vt nonnullis quidem recentiorum physicorum, placere video ^{a)}, linguae torporem incutiunt, palatum exsurdant, et ingeniosam gulam, vt acute PETRONIVS ait, fatuam ac stupidam reddunt. Vnde scite rursus LVCRETIVS ^{b)}, suavidicis suis versibus, vt ipse eos vere vocat:

*Haec ubi laeui sunt manantis corpora succi;
Suauiter attingunt, et suauiter omnia tractant
Humida linguae circum sudantia templa.
At contra pungunt sensum, lacerantque coorta,
Quanto quaeque magis sunt asperitate repleta.*

Qui et alibi in eundem cecinit sensum ^{c)}:

*Huc accedit, uti mellis lactisque liquores
Iucundo sensu linguae tractentur in ore.
At contra tetra absinthii natura, ferique
Centauri foedo pertorquent ora sapore.*

Similia fere leguntur apud TIMAEVM LOCVRVM ^{d)}). Huc et HORATIVS ^{e)}:

Fervida quod subtile exsurdant vina palatum.

SENECA quoque grauitate et eleganter ^{f)}: *Ne quis intepefcat cibus, ne quid palato iam calloso parum ferueat; coenam culina sequitur.* Et alibi grauius adhuc elegantiusque ^{g)}: *Quid sentire possunt emortuae fauces, et occallatae cibus ardentibus.* Denique PLAVTVS ^{h)}:

Nam nimis calebat (potio) amburebat gutturem.

Li 2

§. IX.

a) Vid. VERDRIES, *Physic.* part. general. cap. 7. pag. 179. sqq. conf. et laudatos ibi Auctores varios, pag. 186.

b) *Lib. IV. de Rerum Natura.*

c) *Lib. II. de Rer. Natura.*

d) *Lib. de Anima Mundi*, pag. 558. in *Opusc. myth. phys. et eth.* per TOM. GALE. Conf. FRACASTOR. loc. cit. cap. 24.

e) *Sat. 8. Lib. II, v. 38.*

f) *Epist. LXXVIII. pag. 339.* Conf. huc inprimis ATHEN. *Lib. I. cap. 5.* pag. 5. sqq. de PHILOXENO.

g) *Lib. IV. Quaest. Natural. cap. 13.* pag. 533. Conf. si placet, *Dissert. nostr. de Fame lethali ex calloso Ventriculi ore*, pag. 37. sqq.

h) *Milire Glorioso, Act. III. Scen. 2.*

§. IX. Soli ergo nunc odores adhuc superfunt, et quidem suaues potissimum ac fragrantés, de quibus hic praesertim sermo est instituendus. Isti vero, prima quidem fronte ita comparati esse videntur, ut, quoniam scilicet blandi, iucundi, recreantes, mulcentes leues, fugaces ac facile dissipabiles, tametsi liberalius etiam admissi ac copiosius naribus ingesti, tantum tamen ipsi olfactui nocere posse haud videantur; ac quidem fulgentiores luminis circumfusi radii oculis, aut sonantiores fragores auribus, aut denique acerbiores et austeriores saporés linguae ac palato officere soleant.

§. X. Sed haec licet ita omnino esse credantur; tamen secus se habere, ex mox vberius dicendis, clarius luculentiusque, opinor, patefcet. Quo subtiliores enim, leuiiores, suauiiores et fragrantiores illi ipsi sunt odores; eo simul nocentiores, suspectiores et periculosiores, praesertim autem arctiori spatio inclusi, experientia teste, saepius merito censendi sunt. Quum enim splendorés, sonores ac saporés, ubi iustum suum modum scilicet excefferint, singulis tantum corporis partibus, nempe oculis, auribus, atque linguae ac faucibus, nocere aliquando soleant; illaesa tamen prorsus ipsius corporis totius integritate et sanitate: odores e contrario, solis licet naribus recepti, non solis tamen naribus inhaerent; sed mira sua subtilitate volatili, altius potius penetrant, et contactis subito nervis, mox mutuo ipsorum commercio, ipsum cerebrum petunt; quin et pulmonibus simul illati, sanguinem ipsum subeunt, sicque per totum simul corpus longe lateque diffunduntur: nunc in salutem, nunc in salutis periculum, nunc denique in mortem ipsam, ut moesta nostra historia inter alia plura exempla, testatur. Qua de re omnium profecto optime et acutissime ita scripsisse videtur magnus noster HOFFMANNVS, nunquam interiturus*):

Quando

*) *Medicinae Rat. Systemat. Tom. III. Sect. I. cap. 5. p. 310. Tom. I. Opp. Quem et inprimis vid. Tom. I. Med. Rat. System. Lib. I. Sect. III. cap. 4. pag. 93. Cui add. SCHNEIDERI nostratis, Tract. de Offecribriformi et organo odoratus, pag. 239. seqq. item THOM. WILLIS, de Anat. Cerebri, Cap. 21. pag. 109. seqq. Tom. I. Opp.*

praesertim vero CASP. BARTHOLINI Fil. *Disquisit. de vero Olfactus Organo, in Act. med. Hafn. THOMAE patris, Vol. V. Sect. XVI. pag. 61. seqq. ut nihil iam de CASSERIO, BELLINO. STENONE, MOLINETTO, EVSTACHIO RVDIO, VALLESIO, aliisque, dicam, qui de Odoratus Organo scripsere.*

Quando vapor suaueolens, odore per nares susceptus, neruorum ramulos, ex quinta coniugatione prodeuntes, praeter naturam, afficit; protinus huius insoliti motus communicatio, mediante pari intercostali et octauo, transit ad fauces atque ventriculum, cor et pulmones, unde horum symptomatum ratio petenda est. Haecenus oraculum illud Hoffmannianum.

§. XI. Isti ergo ambiguae sane naturae odores non in sola superficie haerent, nec singulares tantum ac separatas corporis partes adoriuntur; sed totum potius corpus occupant, vti iam monui, immo animam quoque ipsam, si ita quidem sano sensu, dicere liceat, tum nempe omnibus ipsam sensibus orbant, et letalem lethargum incutiunt. Hinc splendores, soni ac sapores singulis tantum corporis partibus nocent; at odores vniuerso corpori: illi nocent solum; non autem necant. Hi contra nocent et necant: ipsisque prae istis omnibus palma nocendi est relicta. Quod licet creditu admodum difficile videatur; tamen re ipsa verissimum esse, ex iis, quae dicenda adhuc restant, quibus, credo, protinus odorabitur, qui nasum habet emunctiorem.

§. XII. Nimirum ex omnibus corporibus odoriferis, v. g. plantis, floribus, aromatis, vnguentis, et id genus aliis, iugi veluti et perennifcaturigine, continuo vndatim quasi emanant quaedam corpuscula, seu effluuia minutissima, subtilissima et acutissima, quae LVCRETIVS *semina et simulacra*, vocat¹⁾, CELSVS^{k)} *corpuscula*, et CAELIVS AVRELIVS^{l)} *defluxiones*: Graeci vero, vt PLATO, ARISTOTELIS, PLVTARCHVS, ALCINOVS, CLEMENS ALEX. ATHENAEVS, DIODORVS SICVLVS, THEOPHRASTVS, ARETAEVS, alii-que plures, dicunt ἀπόρροις, ἀποφορὰς, ἐκπνοὰς, ἐκβολὰς, item ἀναθυμιάσεις, ἀποθυμιάσεις, ἀποπνοίς, ἀποπνεύσεις, ἐπαναφορὰς, ἀτμίσεις ἀτμισμὸς: de quibus miranda prorsus et inaudita antehac, tribus singularibus Exercitationibus, cedro dignissimis, quondam protulit ille

li 3

intinus

i) Lib. II. IV. et VI. de Rerum Natura.

k) In Praef. Operis, p. 5. et alibi in sequentibus.

l) Lib. I. cap. 15. de Morb. Acut. p. 47.

et Lib. III. cap. 9. pag. 219. vbi male *deflectio* legitur, pro *defluxio*; *Influxio* autem extat Lib. II. cap. 37. pag. 160, et alibi.

intimus Naturae sodalis, siue, vt ita dicere liceat, ipsa Natura loquens, ROBERTVS BOYLE^m): qui omnes reliquos, qui post ipsum idem argumentum arduum ac subtile tractarunt, longissime vicit ac superavit, velut aethereus Sol reliqua pallentia sidera.

§. XIII. Inde huc egregie et significanter, vt solet, laudatus iam saepe LVCRETIVSⁿ):

*Nunc age, quo pacto nares Adiectus odoris
Tangat, agam: Primum res multas esse necesse est,
Vnde fluens voluat varius se fluctus odorum.*

Nam fluere, et mitti vulgo, spargique putandum est.

Mox vero eadem venustate et emphasi vocat odorum plagam, et rursus infra, plagam manabilem, item alibi in eundem sensum^o)!

*Vsque adeo omnibus ab rebus res quaeque fluenter
Fertur, et in cunctas dimittitur undique partes:*

Nec mora, nec requies interdatur vlla fluendi.

Perpetuoque fluunt certis ab rebus odores.

Quemadmodum etiam pari elegantia dixit CLEMENS ALEXANDRIN. P): 'Εντεῦθεν καὶ τὸ ῥόδον ἐπωνομασθαί φασιν, ὅτι πάμπλου τῆς ὀσμῆς ἀφίησι ῥεύμα, quae scilicet commode et eleganter latine ita reddi possunt stilo quidem LVCRETIANO: Inde et Rosam graece ῥόδον, nominatam esse dicunt, quod ingentem odoris fluctum continuo emittit. Quae vero

m) Nempe I. de Effluuiorum mira subtilitate, II. de Natura eorum determinata, et III. de illorum insigni Efficacia, quibus add. Tract. de Atmosphaeris. Conf. BORRICHII Diff. Acad. 8. Tom. I. p. 421. seqq. et ill. VAN SWIETEN, Comment. Tom. I. pag. 773.

n) Lib. IV. de Rerum Nat.

o) Lib. VI. de Nat. Rerum.

p) Paedagog. Lib. II. cap. 8. pag. 181. Res autem ipsa hic verior est, quam Etymologia, quae valde dura videtur. Forte scriptum olim fuerit, ῥόδον, seu ῥόδιον eleganti scil. paronomasia, quod idem, ac

ῥεύμα, vel κύμα, ceu notum ex HESYCH. EVSTATH. et aliis, et in margine, explanationis gratia, positum ῥεύμα, quod deinde, vt saepe fit, in ipsum contextum irrepperit, ceu notius, et illud ignotius ῥόδον, seu ῥόδιον, expulerit. VOSSIO quoque in Etymol. pag. 437. ista vulgaris Etymologia displicet: Sed illi longe peiorem substituit: putat enim τὸ ῥόδον, esse ex ῥοῦ Varda, quod in Targum, aliquoties sumitur pro Rosa. Mirum vero est, summum istum Virum tum non animadvertisse, illud ipsum ῥοῦ seu ῥοῦ purum putum Graecum esse ῥόδον: per leuissimam

vero ipsa ex PLVTARCHO *) defuncta sunt, vbi scilicet iisdem plane verbis leguntur. Sed et *ρέυματα ὀδμῶν*, seu *fluctus odorum*, pari lepore dixerunt THEOPHRASTVS, GALENVS, DIOSCORIDES, ATHENAEVS, et alii plures, vt poetas iam taceam.

§. XIV. Hi vero ipsi silentes quasi odorum fluctus, ex corporibus nempe odoratis perpetim exundantes, haec, inquam, effluuia subtilissima continuo emanantia, totum aërem ipsis quidem circumfusus sensim replent, sicque aëri ipsi intertexta quasi et interiecta, ipsius veluti remigio, ad nares demum humanas etiam e longinquo, deferuntur. Hinc recte hanc certe in rem, MAXIMVS TYRIVS 9): *αἱ τῶν θυμιαμάτων ὀδμαὶ καὶ τοῖς πόρρω ἔσι προσέβαλον, ἀνακεράσασαι τὸν διὰ μέσθαι ἀέρα τῇ εὐωδίᾳ: In suffitibus fieri solet, vt eorum odor fragrantiae suae suauitate, medio interfusus aëri, ad eos, qui longissime absunt, diffundatur.* Sed luculentius adhuc DIODORVS SICVLVS 1), de Sabaeis, filuarum fertilitate odorifera ditissimis: *Κατὰ τὴν ἐαρινὴν ὥραν, ὅταν ἄνεμος ἀπὸ γείους γένηται, συμβαίνει τὰς ἀπὸ τῶν σμυρνοφόρων δένδρων, καὶ*

nam enim literarum transpositionem, fit *רודה* Roda, *רודה*. Sicut mox ibidem legitur *נרקים* Narkim, id est Narcissi. Permultas enim voces mere graecas et in illis *Targumim Chald.* et apud veteres Hebr. Magistros, seu Rabbinos, passim occurrere, nemo fere nescit. Sic v. g. *חיקה* *חיקה* *פיתרופוס*, *ἐπίτροπος*, *אנדרולומס*, *ἀνδρολομος*, seu *ἀνδρολομασία*, *פוליומרכוס*, *πολέμαρχος*, *פיקלי*, *παράκλητος*, *הירדופני*, *ῥοδεδάφνη*, et talia plura a BVXTORFIO SCHINDLERO, et aliis diligenter notata. Quin et, quod magis mirum, apud ipsum adeo DANIELEM, quaedam voces pure graecae leguntur, veluti *פסגות*, *ψαλτήριον*, *שפס*, *πέτασος*, *אמפניס*, *συμφωνία*, et alibi, *רפסדי*, *רפסדי*, vt plura iam taceam, a GRO- TIO, CAPPELLO, MERCERO, MORINO, DE DIEV, BVXTORFIO, TYRRETINO, BOVGET, DRVSI,

MICHAELI, item PETAVIO, ad THEMIST. *Orat.* XXI. pag. 510. et aliis multis studiose collecta et obseruata. Sunt enim haec ipsa altetius omnino loci: quae tamen inuitante sic sponte com- moda hac occasione, amoenae Varietatis gratia, plane praetereunda haud censui: Nec de Venia ab aequo lectore facile im- petranda, hinc prorsus despero.

*) *Lib. III. Sympos. Quaest. I. p. 648. T. II. Opp. Conf. ROSENBERG. Rhodolog. part. II. cap. 3. pag. 158. et de la CERDA, ad VIRGIL. GEORG. IV. pag. 492. item IO. BOD. A STAPEL, ad THEOPHRAST. Hist. Plant. Lib. VI. p. 646.*

q) *Dissert. Philosoph. XVIII. p. 178.*

r) *Bibliothec. Hist. Lib. III. cap. 46. pag. 214. Tom. I. Edit. Cel. WESSELIN- GII: Conf. THEOPHRASTI Hist. Plant. Lib. IX. cap. 7. et ibi BOD. A STAPEL.*

καὶ τῶν ἄλλων τῶν τοιούτων ἀποπνεομένας εὐωδίας διικνεῖσθαι πρὸς τὰ πλησίον μέρη τῆς θαλάττης· Κομιζέσης γὰρ τῆς αὐρας τὴν ἀπόρροϊαν τῶν εὐωδεσάτων, προσπίπτει τοῖς πλέεσι τὴν παράλιον προσηνές καὶ πολὺ, πρὸς δὲ τέτοις ὑγιεινὸν καὶ παρηλλαγμένον ἐκ τῶν ἀρίστων μίγμα, κ. τ. λ. *Veris tempore, excitatus e terra ventus, e Myrrrhiferis et id genus ceteris arbutis, exhalantes Odorum auras in vicinis maris partes transmittit. Dum enim euaporantes fragrantissimorum germinum spiritus aerae transportant; fit, ut iucunda et copiosa, nec non sanitati conducens, et inusitata ex optimis rebus, mistura ad oram illam legentes deferatur. Cui geminum plane alibi infra s), apud eundem legitur, de Enna Siciliae florigera odoriferaque, et violis praesertim laete lateque confita, violento Proserpinae raptu quondam nobilitata. Sed locus, etsi venustus oppido; tamen verbosior videtur, quam ut huc quidem cominonde transferri possit. Interim tamen ipse lectu dignus ac iucundus est; nec quenquam putem, poenitebit, illum propter spirantem quasi picturam, diligentius euoluissē. Ceterum vero de hac ipsa re vberius accuratiusque tractarunt THEOPHRASTVS t) atque GALENVS u) iam saepe laudati, ut plures alios nunc taceam, quos inter maxime eminet magnus BOYLIVS x), item BOHNIVS heu! olim noster y).*

§. XV. Quamdiu igitur corpora odorata subtilissima et acutissima sua effluuia in vasta patentis coeli spatia libere diffundunt, ita, ut ista perpetuo recentis, puri frigidique aeris interuentu, subinde ventilari, dissipari ac temperari possint: uti exempli causa, *Xystus ille violis odoratus, PLINII z), Rosaria et Violaria praestana bifera, ab omnibus*

s) Ibidem, *Lib. v. cap. 3. p. 331. Tom. I. Opp.*

t) *De Caussis plantar. Lib. vi. cap. 27. 28. et 29. et speciatim, Libro de Odoribus.*

u) *Lib. de Odoratus Instrumento, pag. 208. sqq. Opp. Graec. Basil. Tom. I. Add. ARISTOT. Lib. de Anima cap. 12.*

x) *Tract. de Atmosphaeris, et reliquis*

tribus Exercitationibus, de Natura et subtilitate Effluuiorum, supra laudatis.

y) *Circul. Anat. Physiol. Progymnas. xxv. pag. 332. sqq. et in Diff. Chem. x. et xiv. Add. SCHNEIDER. de Odoratus Organo, pag. 240. sqq. et IS. VOSSIVS; ad Catull. pag. 208. item OL. BORRICHII Obs. 48. Vol. v. Act. med. Hafn. p. 135. sq.*

z) *Epist. 17. Lib. II. vbi vid. interpretes varis, in Edit. Cortii.*

omnibus fere poetis certatim quasi decantata ^{a)}, *prata Ennensia* suauissima, a DIODORO SIC. supra iam allegato ^{b)}, CLAVDIANO ^{c)} et aliis, celebrata, *horti amoenissimi* CYRI Sardiani, a XENOPHONTE ^{d)} eiusque magno interprete CICERONE ^{e)} laudati, *Rosarium* illud odoratissimum *Ausonianum* ^{f)}, hortus iste TARQVINII *odoratis cultissimus herbis*, ab OVIDIO ^{g)}, LIVIO ^{h)}, aliisque mansurae famae traditus, aliaque id genus plura iucundissimi odoris Viridaria, Rosaria, Violaria, Lilieta, prata et nemora ⁱ⁾: Tandiu, inquam, ista hominum sanitati iuxta voluptatique oppido inseruiunt, reficiendisque languentibus animi corporisque viribus blande subueniunt.

§. XVI. Hinc recte in hunc sensum ex ARISTOTELE PLUTARCHVS ^{k)} Μύρων, ἀνθέων, καὶ λειμώνων εὐώδεις ἀποπνοίας, ἐκ ἑλαττον ἔχειν τῇ πρὸς ἡδονὴν, τὸ πρὸς ὑγείαν, ψυχρὸν ὄντα φύσει καὶ παγέτωδῃ τὸν ἐγκέφαλον ἡρέμα τῇ θερμότητι καὶ λειότητι διαχεύσας: *Unguentorum, Florum, pratorumque suaves fragrantias non minus ad sanitatem facere, quam ad voluptatem: quod eae cerebrum natura firigidum, et ad concretionem procliue, sensim suo calore et laeuitate relaxent.* Quorsum et acute respexit suauidicus ille ARETAEVS ^{l)}: Ἐγὼ δὲ καὶ εἰς λειμῶνας, καὶ πηγὰς καὶ γὰρ καὶ τὸ εὐπνοῖον τῶνδε, καὶ ἡ θυμηδία, καὶ τὴν ψυχὴν θάλλει, καὶ τὴν φύσιν ζωγρεῖ: *Moretur autem languens et prope virentia prata, fontesque: nam ab his emanans bonus halitus, et mentis delectatio animi*

a) Némpe VIRGILIO, OVIDIO, PROPERTIO, STATIO, CLAVDIANO, MARTIALI et aliis. Vid. de la CERDA ad VIRGIL. *Georg.* IV. pag. 495. PASSERAT. ad PROPERT. IV, 5. BARTH. ad STAT. VII. *Theb.* p. 686. Tom. III. et ad CLAVDIAN. et plures alios.

b) *Lib.* V. cap. 3. pag. 331.

c) *Lib.* II. de *Raptu Proserpinae*: add. inprimis OVID. *Lib.* IV. *Fastor.* 430. sqq.

d) *Lib.* *Oeconomico*, seu de *Administration domestica*, pag. 655.

e) *Lib.* de *Senectute*, cap. 17.

f) *Idyll.* XIV. quod a nobis olim versu patrio redditum, Tom. I. *Poemat.* pag. 227. *seqq.*

g) *Lib.* II. *Fastor.* 703.

h) *Lib.* I. cap. 54. DIONYS. HALICARN. *Lib.* IV. pag. 135.

i) Quae magno numero coniunctim recenset de la CERDA, ad VIRGIL. *Georg.* IV. pag. 494.

k) *Lib.* de *Iside et Osiride*, p. 383. T. II. Opp.

l) *Lib.* II. de *Morb. Acut. Curat.* cap. 3. p. 102. Edit. BOERHAAV. cum Emend. nostris.

mam fouet, et naturam suscitatur. Venuſte quoque huc CLEMENS ALEXAND. ^m) ἥρος μὲν γὰρ ὥρα, λειμῶσιν ἐνδρόσοις, καὶ μαλακοῖς ποικίλοις χλοάζουσιν ἄνθεσιν ἐνδαιτᾶσθαι καλόν, αὐτοφυεῖ καὶ εἰλικρινεῖ τιμὴ εὐωδία, καθάπερ τὰς μελίττας, τρεφομένους: Ver est in roscidis pratis, et mollibus variisque germinantibus floribus, degere pulchrum est, natiua et sincera odoris suauitate, apum more, fruente. Inde hoc ipso sensu, sano scilicet et iusto, sapienter quondam pronunciauit ALEXIS, vetus Comicus, apud ATHENAEVM ⁿ):

ὑγιείας μέγος

Μέγιστον, ὁδμᾶς ἐγκεφάλῳ χρητὰς ποιεῖν.

Maxima bonae valetudinis pars.

Odores Cerebro bonos et utiles subinde obicere,

ὅτι, quod explicationis gratia scite addit ATHENAEVS ipse, αἱ ἐν τῷ ἐγκεφάλῳ ἡμῶν αἰσθήσεις ὁδμᾶς ἡδέαις παρηγοεῖνται, προσέτι τε θεραπεύονται: quoniam scilicet sensus in nostro cerebro collocati suauibus odoribus demulcentur, atque inde etiam insuper medicinam ac solatium quasi accipiunt.

§. XVII. Simul ac vero e contrario suaues eiusmodi et fragrantiores odores potissimum exhalantur in spatio nimis angusto, vel clauso, et nulli liberioris puriorisque aëris accessui peruiro; ita ut tota illa plaga aërea exigua et arctius circumscripta, illis ipsis effluuiis vaporiferis penitus oppleatur, et inde tota quasi mutata, vitietur: tum sane et omnis sperata voluptas protinus perit, beneficium inauspicato peruertitur in veneficium, ut sic loquar, et ipsa sanitas, quin et ipsa adeo vita, maximo in discrimine versatur, dum primo partibus praecipue neruosis νάγκωσιs inducitur, deinde et νέκρωσιs, ut triste miserandae nostrae puellae exemplum, inter alia plura, liquido ostendit, cui nempe, duri inclementia fati, ἴον ἐτράπετο εἰς ἴον, καὶ εὐωδία ἐγένετο ὁσμὴ θανάτου εἰς θάνατον, ut sic cum Viro sanctissimo, sed sensu proprio et naturali,

^m) Paedagog. Lib. II. cap. 8. p. 179.

ⁿ) Deipnos. Lib. XV. cap. 10. pag. 687. et Lib. II. cap. 7. pag. 46, vbi Versus isti

pleniores, quos et laudat CLEMENS ALEXANDR. Lib. II. Paedagog. cap. 8. pag. 179.

naturali, loqui mihi liceat. Inde apposite forsan, ad hunc nostrum casum lugubrem, ARTEMIDORVS °): Ἰα πορφύρεα καὶ θάνατον σημαίνουσι: *Violae purpureae et ipsam mortem nonnunquam significant.*

§. XVIII. Neque enim latentes licet illos, vehementes tamen odorum fluctus circumiectum aera continuo inundantes, vt cum poeta loquar, impune perferre possunt nerui, et per illos cerebrum ipsum; neque pulmones aerem istum sic odoriferis particulis ac corpusculis peregrinis totum infectum, pinguem, spissum et quasi vnguentatum, vt sic cum PLAVTO loquar, commode libereque haurire, atque in sanguinem ipsum, ad ipsius circuitum facilius feliciusque continuandum, opportune transnittere. Vnde potius *capita pectoraque vastitate odoris replentur*, vt PLINIVS *) apposite ait, porro libera alias facilisque respiratio, molestis quasi vinculis iniectis, reprimitur ac retardatur, aequalis sanguinis circumlati motus extra naturale suum aequilibrium actus, nunc in citatiorem cursum, nunc in lentiolem progressum abripitur, et omnis denique oeconomia animalis vehementer turbatur, quin et saepius plane destruitur et aboletur. Hinc vero prudenterque monuit GALENVSP): Ταύτην ἀέρος ποιότητα ἔκ εἶναι οἰκείαν τε καὶ φίλην τῷ τῷ ζῷον πνεύματι, ἀλλ' ἀλλότριαν τε καὶ φθαρτικὴν, *Istam quidem aeris multis grauibque odorum valentiorum effluuiis foeti et infecti, qualitatem tum haud amplius esse familiarem et amicam ipsi animalis respirationi; sed peregrinam potius, alienam, perniciosam, et corruptionem inducentem:* Qui et alibi generatim scripsit q), *omnia odorata vehementiora caput lae-*

Kk 2

dere,

o) Lib. I. Oneirocrit. cap. 79. pag. 66.

*) Lib. XXXI. cap. 6. Hist. Natur.

p) Lib. VII. de Vsu Partium, cap. 10. vbi vid. HOFMANNVM in Comment. pag. 142. et praesertim PETRI PETITII Comment. in ARETAEVVM, p. 146. Conf. et MARCELL. DONATI Hist. Med. mirabil. Lib. II. cap. 6. p. 175. sqq. item nouissime Cl. CRANTZ, Tom. III, Mat. Med. p. 98. sqq.

q) Lib. nempe de Empirica Subfiguratione, et Lib. de Instrumento Odoratus, c. 6. Conf. IO. MARTINI Comment. in HIP-

POCRAT. Lib. de Morb. Intern. p. 448. praecipue vero ill. LINNAEI Tract. de Viribus Plantarum, vt et de Odoribus Medicamentorum: vbi praesertim luctuosa exempla prostant de odore florum Nerii, seu Rhododaphnes, in cubiculo clauso, nimis secure dormientibus saepius mortifero, quae omnino huc faciunt. Qualia et nobis cognita de Hyacinthis Indicis Tuberosis, sic dictis, qui si non ipsam semper mortem; tamen grauissimum sensuum stuporem et capitis dolorem saepissime intulerunt,

dere, grauare, implere, et ad delirium interdum cogere. Quod et dudum ante ipsum monuit THEOPHRASTVS^{r)}: ὁ ἀπὸ τῶν ἰσχυρῶν ὀσμῶν τρόπος, ὥσπερ μεθύσκων τὴν ἀσθῆσιν καὶ καρηβαρῶν ποιῶν, συμπληροῖ τὰς πόρῃς: *Modus a valentioribus odoribus, sensum quasi inebrians, et stuporem grauitatemque capitis inducens, ipsos meatus replet et obsidet.* Quo etiam PLVTARCHVS respexit^{s)}: αἱ ὀσμαι τοξεύουσιν ὑπὸ θερμότητος εἰς τὸν ἐγκέφαλον ἀρπαζόμεναι ταῖς ὀσφρήσεσι: *odores a calore eiaculantur in cerebrum, rapiuntibus eos naribus.* Nec non CAELIVS AVRELIA-
NVS^{t)}: *Odore carbonum vel unguentorum aliorumque, sensuumque oppres-
sione vel torpore afficiuntur.* Sed iam dudum ante hos omnes ipse noster HIPPOCRATES^{u)} breuiter quidem, vt solet, at grauitate tamen ac sapienter scripserat: Ὀσμαι τέρπασαι, λυπῆσαι, πιμπλῶσαι, πειθόμεναι: *Odores sunt vel delectantes, vel offendentes, vel implentes, vel placantes:* licet ibi postrema quidem vox vitium aliquod redolere videatur, de quo mox hic infra nonnulla monere, ius fasque nobis sit^{x)}.

§. XIX.

r) *Lib. de Odoribus, pag. 450. Opp. per DAN. HEINSIVM.*

s) *Lib. III. Sympos. Quaest. I. p. 647. Tom. II. Opp.*

t) *Lib. II. de Morb. Acut. C. 10. p. 105.*

u) *Lib. VI. de Morb. Epidem. Sect. 8. p. 819. Tom. I. Opp. per LINDENIVM.*

x) Hae ipsae nempe ὀσμαι πειθόμεναι, suspectum non nihil odorem mihi omnino habere videntur; licet prima quidem specie, aliquid blandum, placidum, obsequiosum ac facile cedens et obtemperans, spirent atque referant. Haud equidem ignoro, ipsum illud verbum πείθεσθαι, et ex ipso deriuata, εὐπειθής, δυσπειθής et ἀπειθής, κ. λ. per elegantem metaphoram, rebus etiam inanimatis, apud optimos Auctores quosuis, saepius attribui. Sic ipse noster HIPPOCRATES, *Lib. II. de Morb. Mul. pag. 557. Tom. II. et alibi,* scite dixit: ὑσέρας εὐπειθῆσαι, et HERODIANVS, *Lib. I. cap. II. πείσθῃναι τὸ κάθος*, quod perperam mutabat STE-

PHANVS in σείσθῃναι: item ARETAEVS, *pag. 28. de Epilepsia: "Εξοδὸν πείθεται,* et rursus *pag. 125. de Melancholia: σμικροῖσι ἄκρῃς ὁ πείθεται.* Quemadmodum inuicta podagra, apud IVCIANVM, in *Tragopodagra, pag. 820. Tom. II. superbe de se iacet: φαρμάκοις ὁ πείθεται, Remediis haud obtempero, aut flector.* Ita et εὐπειθής ὕλη, legitur apud PLAT. PLVTARCH. et GALEN. ὁσία, apud MARC. ANTON. κηρὸς, apud ARISTOT. et ATHEN. πηλὸς et ἄνεμος, apud eosdem: εὐπειθής et ἀπειθής τόπος, occurrit in AELIANO et SVIDA, εὐπειθής τροφή, in PLVTARCHO, et, vt alia plura iam praeteream, εὐπειθής καὶ δυσπειθής κοιλία, in ipso nostro HIPPOCRATE. Haud dubie ergo sic etiam venuste et eleganter ὀσμαι dici possunt πειθόμεναι, et εὐπειθεῖς. Sed quum omnes odores, siue boni, siue mali, sua quidem natura, sint πειθόμενοι, vel εὐπειθεῖς, hoc est, *sequaces, facile intrantes, cedentes et ductiles;* Hinc Vox ista generalis

§. XIX. Quod igitur facete olim iocoseque de foeminis dixerat lepidissimus PLAVTVS y):

Mulier recte olet, ubi nihil olet.

Quod acutissimum ὀξύμωρον pari quidem venustate, postea imitatus SENECA z): *Optimus odor in corpore est nullus, et MARTIALIS eodem acumine a):*

Non bene olet, qui bene semper olet.

Idipsum profecto vere serioque de ipso praesertim aere et aqua *) dici potest ac debet. Quo sincerior enim purior, leuior, et ab omni odore, siue illo suavi, siue graui, liberior ac solutior vterque fuerit; eo semper tutior, melior et sanitati vitaeque ipsi conuenientior erit. In-

Kk 3

de

ralis πειθόμεναι, minime profecto significare hic potest specialem quendam odorem, qui antecedenti πιμπλῶσαι, commode et iuste opponi possit; vt tamen fieri debebat. Scilicet supra, oppositae sibi erant ὀδμαὶ τέρπασθαι καὶ λυπᾶσαι; nunc vero rursus sibi opponuntur πιμπλῶσαι καὶ πειθόμεναι, in quibus tamen, vt dixi, nulla iusta est oppositio: Quare vix dubitem, quin hic, leuissima quidem mutatione, legendum sit, ἡθόμεναι, h. e. *odores percolati, seu facile transeuntes et celeriter pervadentes*, accuratissima scil. oppositione, inter ὀδμᾶς πιμπλῶσας καὶ ἡθόμενας, *odores nempe crassos, pingues, implentes et inhaerentes, et inter subtiles, fugaces, penetrabiles et facile transmissos*. Sic vero apposite prorsus, ad hanc ipsam nostram coniecturam validissime confirmandam, TIMAEVS LOC RVS, *Lib. de Anima Mundi*, apud PLATON. p. 556. et in Coll. Galean. p. 559. ὀσμᾶς ἅδεια διὰ στενῶν πόρων διηδεῖται, *Odoris species per angustos meatus percolantur*: et PLATO ipse in Timaeo, pag. 541. ὁσμή συνδιηδεῖται, *odor simul percolatur*: Ipse quoque HIPPOCRATES noster, *Lib. de Princip. aut. Carn.* pag. 122. de Visu loquutus: διηδεῖται τὸ λεπτότατον, *percolatur tenuissimum*: AGATHARCHI-

DES denique, nam studio plura alia iam omitto, apud PHOTIVM, in *Bibliotheca*, pag. 742. Θέρμα ἐκ πέτρας διηδεῖται, *Thermæ ex petra percolantur*. Sed haec iam sufficiant ad sententiam nostram stabiliendam. FOESIVS autem in *Oec.* pag. 296. et ad ipsum HIPPOCR. locum, illas quidem ὀδμᾶς πειθόμενας parum scite ac feliciter mihi explicasse videtur.

y) *Mostellar. Act. I. Scen. 3.* Conf. huc RIGALT. ad ARTEMIDORVM, p. 35.

z) *Epist. CVIII. pag. 443.*

a) *Epigramm. 12. Lib. II. et Epigr. 55. Lib. VI.* conf. CAEL. RHODIGIN: *Lect. Antiq. L. XIII. cap. 25. pag. 686.* praesertim vero copiosae *Variorum Notae*, ad PETRONII ARBITRI *Fragmenta*, pag. 671. *Edit. Burmannianae*, vbi plura similia loca ex ipso CICERONE, HIERONYMO et aliis, opportune allegantur.

*) Sed quid tum quaeso, faciemus HIPPOCRATI, *Lib. de Aër. Aq. et Loc.* pag. 336. et pag. 333. aperte scribenti: ἄριστα ὕδατα εἶναι εὐώδεα καὶ κῆφα, *optimas quidem Aquas esse odoratas ac lenes?* quas tamen et in hoc ipso Libro, et alibi, cum omnibus aliis Medicis et Physicis, rectius damnat. Scilicet haud dubie mendum redolet hic ipse locus, licet perquam vetustum,

de optime PLINIVS, *Lib. XXXI. cap. 3. Aquam salubrem aeri quam simillimam esse oportet: Nempe aquarum salubrium sapor odorue nullus esse debet.* Vnde perquam egregie huc PHYLLIDIUS, vetus Comicus, apud CLEMENTEM ALEXANDR. *Stromat. pag. 569.*

μέγιστον ἐστὶν ὑγιείας μέρος,
τὸ τὸν αἶρ' ἔλκειν καθαρόν, ὃ τεθολωμένον.

Hoc est, HVG. GROTIUS interprete, in *Excerpt. Veterum Tragic. et Comior. pag. 898.*

*Nam sanitatis pars haec est potissima,
Haurire purum spiritum, non turbidum.*

Quod si tamen aut voluptatis, aut necessitatis gratia, aura suauior et odora-

tustum, et iam ipsa ATHENAEI aetate, sic hunc ipsum locum vitiose citantis, *Lib. II. cap. 7. pag. 46.* HIPPOCRATIS Codicibus mile illatum: Quod odoratus quidem fuit MERCVRIALIS, nec tamen sustulit: SEPTALIUS autem in *Comment. pag. 206.* ne odoratus quidem, perquam dure frigideque explicuit, per aquas nihil mali redolentes, quem et securre nimis sequutus MARTINVS, in *Comment. ad istum Librum, pag. 41.* Tollamus ergo iam bonum illum in Aquis odorem, omnino hic male olentem, legendo scilicet perquam probabili coniectura, ὕδατα ἔνοδα, h. e. aquae cito currentes et labentes, et ad omnia corporis membra pervenientes, ut loquitur CAEL. AVREL. *Lib. II. de Morb. acut. cap. 39. pag. 175.* quas alibi noster vocat ἐνδιάπορα, πόριμα et ἐνδίοδα ὕδατα, vnde et τὸ ἔρον ἐνοδεῖν, scite dixit in *Coac. praenot. pag. 557.* Sicut THEOPHRASTVS *Lib. de odor. p. 453.* aromata et vnguenta odoratiora, ἐνδίοδα πρὸς πόρος, et ARETAEVS *pag. 107.* Ἐνδίοδος τροφὴς: Iterum THEOPHRASTVS, *Lib. VI. de causs. plant. cap. 6. pag. 331.* τροφή φέρεται πρὸς τὸ ἐνοδεῖν, et *Lib. I. cap. 9. Hist. plant. pag. 11.* de Radicibus pariter dixit ἐνοδεῖν: item DEMOSTHENES contra CALLICI. ἡ μὲν ἂν τὸ ὕδωρ

ἐνοδῇ, quod et apud ARISTOTELEM, *Lib. I. de Generat. Animal. legitur.* Quo et illud praesertim pertinet ATHENAEI *Lib. III. cap. 13. pag. 92.* τὰ ὅσπερ πρὸς τὰς ἐρήσεις ἐστὶν ἢ ἐνοδα. Verissimam vero esse hanc nostram HIPPOCR. emendationem, liquidissime confirmat DIOSCORIDES, *Lib. V. cap. 13. pag. 332.* vbi manifesto ait: ἀριστον ὕδωρ εἶναι τὸ ἀλύπως ἐνοδῆν, optimam esse aquam, quae expedite, et sine molestia, corpus permeat. Quo ipso ad hunc ipsum HIPPOCRATIS locum respexisse utique videtur. Frequens autem in Vett. Libb. lapsus deprehenditur, inter ἐνοδα et ἐνώδεα, et inter ἐνωδία, et ἐνοδία, propter vicinam scilicet convenientiam. Sic apud SIRACID. XXXVIII. 13. pro Ἐνωδία, legendum omnino esse Ἐνοδία, recte ibi monet GROTIUS, *pag. 686.* quem et vid. cum MILL. WOLF. et WETSTEN. ad *Philipp. IV, 2.* ut alia studio iam praeteream. Sic etiam denique apud HIPPOCRATEM, *Lib. de Decenti Ornatu,* vulgo legitur, et forsan recte, τέχνην ἐνοδέα, in nonnullis vero Codd. veteribus scriptum deprehenditur ἐνωδέα, ut alias varietates iam taceam. Vid. interea FOES. in *Oecon. Hipp. voce ἐνοδος, pag. 153.* et CHARTER. ad GALEN. *Tom. II. Opp. pag. 405.*

odoratior sit haurienda; semper id sobrie, parce et modice fiat, ne ipsi sensus stupore aut torpore obtundantur, ipsum respirationis negotium interturbetur, milleque alia damna ac pericula mox accuratius recensenda, exinde oriantur. Si quis enim exempli causa, lucernis humore paene defectis, et iam occidentibus, oleum infundit modicum, et iusta mensura dimensum; tum flamma extremum iam fere lumen spargens, sensim excitatur et reuiuiscit: si vero contra oleum nimium et immodicum affunditur; tum flamma ipsa protinus suffocatur atque extinguatur ^{b)}. Sic modica odorum suauitas animam labantem erigit et reficit; at immodica eorum grauitas ipsam opprimit et conficit. Quo omnino spectat illud CHERAEMONIS, veteris Tragici, apud THEOPHRASTVM, de amore et vino, referente ATHENAEO, *Lib. XII cap. 2. pag. 562. ὅς μετρίᾳζων μὲν ἐστὶν εὐχάρις, πικνωόμενος δὲ καὶ διαταράττων χαλεπότατος: Temperatus quidem suauis et amoenus est; praeter modum vero intentior ac vehementior, grauissime perturbat omnia. Hinc temperatae suauis sunt deliciae, immodicae offendunt, ut bene ait PHAEDRVS ^{c)} et voluptates commendat rarior usus, ut IUVENALIS sapienter dudum monuit ^{d)}.*

§. XX. Cuius rei singulare prorsus ac memorabile praebebant olim exemplum felices Arabiae, odorum fertilitate nobilissimae, infelices hac certe in parte, incolae, qui, referente DIODORO SICVULO ^{e)}, item STRABONE ^{f)}, AGATHARCHIDE ^{g)}, et IO. TZEZE ^{h)}, nec non PLINIO ⁱ⁾, ac SOLINO ^{k)} commemorantibus, ex

continua

b) Vid. MAX. TYR. *Diff. XII. pag. 122. ex XENOPHONTIS Sympos. p. 693. Conf. STOBÆI Serm. XIX. p. 170.*

c) *Fabul. 86. Lib. V. vbi vid. RITTERSHVS. pag. 156. et reliquos Interpretes, apud BURMANNV.*

d) *Satyr. XI. fine: vbi vid. Interpretes varios. Conf. Dissert. nostr. de Tabaci prarumici abusu, pag. 27. ut et poem. nostr. T. VI. pag. 625. not. et Tom. II. pag. 204. in Not. item Fabul. nostr. XXIII. pag. 48. et Fab. CXXIII. pag. 275. sq. in Notis.*

e) *Lib. III. cap. 47. pag. 214 et ibi Cel. WESSELING.*

f) *Lib. XVI. pag. 535. Edit. CASAB. I. Conf. REIES, Elys. Camp. Quaest. XCIII. pag. 702.*

g) *Apud PHOTIVM, Bibliothec. pag. 746. Edit. HOESCHEL. August. Vind. 1601.*

h) *Cbiliad. VIII. Hist. 252. pag. 407. in corpore poetarum Veterum Graecorum maiore, Part. II.*

i) *Lib. XII Hist. Nat. cap. 17. fine.*

k) *Polyhistor. cap. XXXIII. vbi vid. inprimis SALMASIVS, in Exercitaz. Plinian. pag. 382. sqq. perquam copiose et diserte.*

continua validissimorum et fragrantissimorum aromatum et odora-
 mentorum exhalatione per totam illam plagam ad nauseam usque dif-
 fusa, longo debilitatis ac languoris morbo affligebantur. Nam quia
 immoderata penetrandi vis corpora ipsorum perflabat, et solidam to-
 rosamque partium compagem ad mollem laxitatem redigebat: Vix
 curabilis tandem exsolutio consequebatur¹⁾. Idcirco bitumine, et hir-
 ci olentis barba foetida suffitum aegris faciebant, ut nimias fragrantiae
 vires contrarii odoris natura expugnarent. Quibus tandem saluber-
 rimum hoc epiphonema, quod huc ad nostrum institutum vel maxime
 facit, superaddit idem DIODORVS SICVLVS: τὸ γὰρ καλὸν ποσότη-
 τι μὲν καὶ τάξει μετρέμενον, ὠφελεῖ καὶ τέρπει τὰς ἀνθρώπους, ἀναλογίας
 δὲ καὶ καθήκοντος καιρῷ διαμαρτὸν, ἀνόνητον ἔχει τὴν δωρεάν. *Bonum*
enim, iusta mensura et conuenienti ordine adhibitum, iuuat et delectat homines:
a debito autem proportionis et temporis modo exorbitans, infructuosam sui
largitionem habet. Quod ipsum ipse AGATHARCHIDES, quem
 sequutus hic DIODORVS SICVLVS, sic quidem expressit adhuc ele-
 gantius^{m)}, ἕτως ἅπαν ἐπίτευγμα μεσότητι μὲν καὶ τάξει κυβερνώμενον,
 παραπέμπει τὸν βίον· συμμετρίας δὲ καὶ καιρῷ τερηθὲν, ἕκ' ἔχει τὴν κτή-
 σιν ὀνησιφόρον: *Sic omnis felicitas, quae quidem a mediocritate et ordine gu-*
bernatur, ad vitam placide iucundeque transigendam, plurimum confert: ubi
vero eadem iusta proportionem et conuenienti opportunitate orbata fuit; tum
nullam sui possessionem praebet fructuosam.

§. XXI. A qua perquam notabili historia haud longius, opinor,
 abit sequens ista, quae quondam similem fere in modum, contigit in
 hac ipsa nostra vrbe, ut certe videtur, fortasse, uti credere quidem par
 est, tum meliore ac splendidior, quam prout ea nunc proh dolor! vi-
 situr; factorum quippe iniquitate, ut mitius sic loquar, in sordidos ci-
 neres et miserandum bustum maximam sui partem conuersa. Ipsius
 vero auctoris, PHILIPPI nempe SALMVTHI, Anhaltini in vicinia
 Archiatri, verbis istam referre mihi hic liceat, sed impetrata prius, ut
 spes

1) STRABO l. c. addit κάρον, καρε-
 μένοι scribens, ὑπὸ τῶν εὐωδιῶν, αἰετοῖσι τὸν

κάρον, κ. τ. λ. de quo vid. SALMAS. l. c.
 pag. 383.

m) Apud PHOTIVM, l. c. p. 746.

spes est, venia a delicatioris et purioris naris Lectoribus. Sic igitur ille ⁿ⁾: *Carnifex Wittebergensis curat quaedam in pharmacopolio comparari; servus igitur ingrediens, et suaviter illam cum aromatum, tum unguentorum atque aliorum pretiosorum fragrantiam naribus percipiens, linquitur animo. Accurrunt protinus ministri pharmacopoei, eumque aquis praestantissimis itemque oleis et balsamis suavissimis inungunt, at istis nihil proficiunt; sed malum adhuc adaugent, ut etiam interitus illi imminere videatur. Fit igitur, prout moris est, aliorum concursus. Inter eos ipse quoque carnifex, (dum forte fortuna frumentum coemit,) adest. Ohe! quid agitis! inquit: ac statim illum ad cloacam defert, sicque eum per consueta sibi, ibi reficit.*

§. XXII. Cui simillimum est, quod de quodam rustico Antwerpiensi, Myropolium forte ingresso, mox vero ex nimia odorum suavissimorum fragrantia, grauissimam syncopen passo, et denique pariter, eadem medicina sordida foetidaque vitae reddito, refert LEVINVS LEMNIVS ^{o)}, et post eum GVIL. MAGISTRAT ^{p)}, IO. RVDOLPH. CAMERARIUS ^{q)}, BOHNIVS noster ^{r)}, VERDRIES ^{s)}, et, ut alios plures iam praeteream, ANTON. MIZALDVS ^{t)}, qui tamen non vnus rustici mentionem facit, sed plurium; ita nempe cum bona lectorum, nimis forte nauseantium, venia scribens: *Sic videmus quosdam rusticos in aromatariorum officinis et myropoliis ingressos deliquio animi periclitari; nisi confestim illorum naribus fimum equinum, cui nempe sunt adfueti, adhuc tepidum et recens ac fumans, admoueatur, ut similes habeant labra lactucas.* Conf. ROSENBERGIUS ^{u)}, BORELLVS ^{x)}, atque LEDELIVS ^{y)}.

§. XXIII.

n) *Observat. Medic.* 71. Cent. III. pag. 145. Conf. BOHN. *de Off. Med. Part. I. Cap. 4.* pag. 57. et VERDRIES, *Phys. Part. Gen. Cap. 8.* pag. 195. et praecipue REIES, *Elys. Camp. Quaest.* xciii. p. 702. vbi et plura similia, quae huc spectant, exempla collecta leguntur.

o) *Lib. II. de Occult. Naturae Miracul.* cap. 9. Conf. SCHNEIDER. *de Odoratus Organo*, pag. 370. et DIETERICI

Iatrum Hippocraticum, p. 1166. vbi aliud simile exemplum habetur.

p) *De Pestis Curatione.*

q) *Memorabil. Medicinae*, Cent. xx. Sect. 65. Tom. II. pag. 1638.

r) *De Offic. Med. Part. I. cap. 4.* p. 57.

s) *Phys. Part. General. cap. 8.* p. 195.

t) *Memorabil. Cent. I. Sect. 42.* p. 11.

u) *Part. II. Rhodologiae*, c. 14. p. 220.

x) *Obs. Med. Phys.* 60. Cent. III. p. 242.

y) *Apud BONET. Med. Septent. Tom.*

§. XXIII. Aliquanto autem elegantior, lectuque iucundior sequens est casus, a ZACVTO LVKITANO²⁾ hunc quidem in modum relatus: *Quum Lusitaniae Rex Sebastianus ex Conimbrica Olyssipponem proficisceretur; quoddam oppidum maritimum pertransiens, tanto gaudio ab oppidanis excipiebatur, ut passim in foribus suae quisque domus odores suffirent: viae autem, qua transiret, floribus sternerentur, ut totus denique aer suffitu, organis musicis, et populi exsultantis plausu arderet. Cui turbae quum se quoque piscator quidam, visendi cupidus, immiscuisset, subita vertigine correptus, ita concidit, ut pro apoplectico in proximum tectum deferretur: qui a medicis ibi, consuetis remediis multum vexatus, non tamen ad se redire poterat. Tum Rex, misericordia motus, eo Thomam a Veiga, Archiatrum suum misit: qui, intellecto, ut ille miser concidisset, suspicatur, id, quod erat, eum inusitata thymiamatum fragrantia, in id malum incidisse: illico illum in littus transferri iussit, atque ibi limo et alga totum integri: quod quum esset factum, breui, homo, consueti odore recreatus, conucluit.* Quam lepidam historiam, ob insignem medentis prudentiam, praesertim notabilem, merita laude, commemorarunt etiam CASPAR AREIES^{a)}, PETRVS PETITVS^{b)}, BERN. RAMAZZINI^{c)}, BORELLVS^{d)} et alii plures.

§. XXIV. Sed missis iam his remediis fordidis, ex foeda potius latrina, sit venia dicto, quam fida Meditrina, aut latrina, depromptis; regrediamur nunc, si lubet, ad suaue olentia illa; sed nimia sui copia in graueolentia, quin et interdum mortifera, saepius commutata: quoniam nempe illis omnibus, bene iudicante PLINIO, odor quidem iucundus inest, sed capita simul aggrauans: siue, ut DIOSCORIDES pariter ait, Τὸ ἐὐωδὲς μετὰ πικρῶς βάρους, Lib. III. cap. 29. et saepius alibi. Sic in naue recentium pomorum mole onusta, plures quidem vectores ex illorum fragrantiore odore male fuisse affectos, commemorat

Lib. VII. Paraleip. ad Sect. 17. pag. 451.
Add. JB. ADOLPHI Dissert. Med. de Aegrotantium Conclavi, pag. 668. Collect. Dissert. ubi plura etiam alia, quae huc spectant.

a) Camp. Elys. Quaest. iucund. 93. pag. 701. sqq.

b) Comment. in ARETAEVUM, pag. Edit. BOERHAAV. cum Emendat. nostris.

c) De Morbis Artificum, c. XIII. p. 75.

d) Obs. Med. 60. Cent. III. p. 143.

2) Prax. admirand. Lib. III. Obs. 99.

morat SIMON PAVLLI^e). In alia autem naui Caryophyllis aliisque id genus aromatis bene olentibus oppleta, ex grauiſſimo illorum odore, tres ſimul homines ſubito extinctos fuiſſe, quarto in ſimili quoque discrimine iam conſtituto, vix ex orci faucibus erepto, refert *αὐτόπῃς*, IO. IACOB. MERCKLEIN^f), et ex eo LEDELIVS^g). Id quod mihi met ipſi pariter paene accidiffet ante hos triginta annos Amſteldami, tum primum ingreſſo magnificum illud et ſpatioſum Societatis Indiae Orientalis Penuarium, ſive opulentiffimum mundi horreum, pretioſiffimis noui orbis gazis, aromatis atque odoribus refertum: tanta enim ex congeſtis ibi ingentibus Caryophyllorum ac cubebarum cumulis, continuo fumantibus, fragrantia naribus meis violentiffime ingerebatur, vt ſubito vertigine ſenſuumque ſtupore correptus, pectoreque oppreſſus, haud dubie concidiſſem; niſi protinus pedem iam titubantem retraxiſſem, meque ipſum, aegerrime respirantem, liberiori ac patentiori aeri expoſuiſſem. Hinc recte iam olim poſteritati tradidit hanc obſervationem vtilem et notatu dignam vir fuimus, BACONVS de VERVLAMIO^h), et ex illo, cel. RAMAZINIⁱ): *Cum aromatum cumuli, diu concluſi, aperiuntur, adſtantibus, qui primo maſſas illas extrahunt, et agitant, inſtare febrium et inflammationum periculum.*

§. XXV. De Camphora, itidem Croco, Moſcho, Ambra et Zibetho; aliisque id genus odore iucunde graui praeditis, notum eſt abunde ex auctoribus compluribus, qui de his pretioſis peregrini orbis mercibus commentati fuerunt, quanta mala ac pericula, in ſexu praefertim ſequiori ex illorum copioſis nimium et diuturnis exhalationibus, oborta ſaepiſſime fuerint. De croco autem potiffimum conſtat, eius vſum internum iuſto largiorem et liberaliorem non ſolum multis ſanam mentem, cum riſu pluſquam Sardonio, ſubito excuſſiſſe; ſed et ſanam ſimul vitam poſtea ademiffiſſe, et gelidam contra mortem intuliſſe: Quin et

Ll 2

ſolam

e) *Quadripartit. Botan. pag. 82. Conf. KAEMPFERI. Amoenit. Exot. Fascic. III. Obſ. 5. pag. 543. et ATHEN. Lib. xv. pag. 676.*

f) *Itinerar. Indiae Orient. pag. 471.*

g) Apud BONET. *Med. Septent. T. II. Lib. VII. pag. 452.*

h) In *Nouo Organo, Lib. II.*

i) *Lib. de Morbis Artif. cap. XIII.*

pag. 75.

solam ipsius externam anathymiasin graueolentem narcoticam, inexpugnabilem dormiendi necessitatem, somnumque ipsum aeternum simul saepius induxisse: qua de re plura perquam tristia exempla prostant apud HERTODTVM^k), PECHLINVM^l), RIVERIVM^m), BORELLVMⁿ), FREITAGIVM^o), ZWINGERVM^p), FRICCIVM^q), et alios plures a diligentissimo ZORNIO^r), magna copia, ut solet, laudatos. Immo, quod certe notatu et risu paene dignum, observatum saepius fuit, non equos tantum, sed ipsos quoque mulos, animalia alioqui tam valida, robusta et paene ferrea, croci congesti farcinis, vel leuiter tantum onustos, ita tandem, ex nimio eius odore grauiore relanguisse, ut penitus succumberent, quasi mortui, atque hinc ab aliis suis fratribus auritis, ut sic loquar, recentibus et adhuc vigentibus, essent subleuandi; ut ex AMATO potissimum LVSTITANO^s) pluribus commemorat CAMERARIUS^t).

§. XXVI. Dudum nempe satis superque compertum et exploratum est, certa quidem experimentorum fide, a maximis quondam Physicis Chemicisque quam solertissime institutorum, BOYLIO, inquam^u), BOHNIO nostro^x), GREWIO^y), ETTMÜLLERO^z),

GEOFFROY

k) In *Crocologia*, pag. 275. *sqq.*

l) *Obs. Med.* 41. *Lib.* I. pag. 95. *sqq.*

m) *Instit. Med.* *Lib.* IV. c. 22. p. 390.

n) *Obs. Med.* 35. *Cent.* IV. p. 390.

o) *Auror. Med.* *Lib.* II. cap. 29.

p) *Physic. Lib.* II. cap. 26.

q) *Tract. de Venenis*, cap. XXIII. de *Croco*, pag. 394. *sqq.* Add. *Thesaur. nostr. pharm.* *Tom.* I. p. 208.

r) In *Botanologia*, cap. de *Croco*, pag. 236. *sqq.* Cui add. inprimis GEOFFROY *Tom.* II. de *Mat. Med.* pag. 286. *sqq.* et CASP. HOFMANN. *Lib.* II. de *Medicament. Officinal.* cap. 74. pag. 201. *sqq.* item LINDER, de *Venenis*, cap. 6. p. 133. et Cl. CRANTZ, *Mat. Med.* *Tom.* I. pag. 92. ut et BAIER. *Adag. Med.* 40. pag. 89. *sqq.*

s) *Comment. in Lib.* I. *DIOSCORID.* de *Mat. Med.* p. 45. *sqq.*

t) *Memorabil. Cent.* III. *Sect.* 44. pag. 143. *sqq.* *Tom.* I. Conf. PAVLLINI *Obs. Med.* 47. *Cent.* III. p. 335. *sqq.* Ibi alia lepida Historia fuse narratur de asinis temulentis, quasi, et miras ridiculasque gesticulationes facientibus, ex solo Hyocyami et solani odore grauiore naribus patulis attracto; sed haec obiter.

u) *Exercitat. de Natura Effluuiorum determinata*, *Opp.* part. post. p. 21. *sqq.*

x) *Circ. Anat. Physiol. Progymn.* XXV. pag. 334. *sqq.* et maxime *Diff. Chym.* x. et XIV.

y) *De Product. Odorum.* Conf. SCHNEIDER. de *Sensu et Organo Odoratus.*

z) *Institut. Med. Physic.* Cap. XIX. *Membr.* III.

GEOFFROY^{a)}; nec non aliis^{b)}, et omnia illa corpora odorifera, modo nominata; et omnes praesertim plantas atque flores odoratiores, e. c. *Mentham*, *Melissam*, *Rutam*, *Saluiam*, *Maioranam*, *Basilicum*, *Marum* *verum*, *Serpyllum*, *Hyssopum*, *Myrtum*, *Nardum*, *Pulegium*, *Lauendulam*, *Horminum*, *Polium*, *Abrotonum*, *Origanum*, *Valerianam*, *Rosmarinum*, ut plures alias eiusmodi herbas odoriferas nunc taceam, de quibus scite OVIDIVS, *Lib. III. de Arte am.* 690. nempe post VIRGILIVM, in *Culice*, circa finem,

Ros maris et Lauri, nigraque Myrtus olent:

quarum scilicet ingens occurrit numerus apud Botanicos, has, inquam, plantas omnes fragrantiores, praeter salem quendam acrem, volatilem, oleoso-aromaticum, etiam sulphur quoddam sui generis narcoticum, vaporosum, subtilissimum et penetrantissimum, nunc plus, nunc minus, continere. Id ipsum igitur, quanto maiore copia, continuo ex illis, in patentes auras exhalat, ita, ut illae demum totae odore illo suauissimo, siue rectius, grauissimo, oppleantur; tanto maiorem noxam atque perniciem nervis atque cerebro pulmonibusque simul infert, corporaque ipsa, ab istis quidem effluviis sulphureis narcoticis, vaporiferis vehementius perflata, in apoplexiam, lipothymiam, syncopen, epilepsiam, vertiginem, stuporem sensuum, Cephalalgiam, Cordis palpitationes, tremores artuum, suffocationem, asthmata, haemorrhagias, haemoptyses, deliria, febres ardentes et acutas, catarrhos, peripneumoniam, carum, coma, lethargum, et mortem denique ipsam, saepius praecipitat.

§. XXVII. Praesertim vero de *Rosis*, *Liliis albis*, *Caryophyllis hortensibus*, *Hyacinthis Indicis*, vulgo *Tuberosis*, *Hyacinthis vulgaribus*, *Narcissis*

L 1 3

a) De *Materia Med.* Tom. III. add. potissimum *Continuat. Gallicam*, praestantissimi huius Operis, quae post praematura ipsius GEOFFROY fata, insigni praesertim Cel. BERNARD de IVS-SIEV, Fautoris olim nostri, opera, in publica commoda, accessit.

VERDRIES, in *Physica sua*, Part. Gen. Cap. VIII. p. 192. sqq. quibus add. D'YHAMEL, *Physic.* Part. III. cap. 3. pag. 691. sqq. ac nouissime NEVMANNVM, et HOFFMANNVM, *Med. Rat. System.* Tom. III. Sect. I. cap. 5. pag. 310. T. I. Opp. et ibid. pag. 231. Tom. II. *Med. Rat. System.*

b) Quos praeter alios, laudat Celeb.

cissis et *Violis*, tam *purpureis*, seu *ferrugineis Martiis*, de quibus hic nobis sermo; quam *luteis* maxime, vt et *Matronalibus*, seu *Damascenis*, vel *Iulianis*, aut *Moschatellis* dictis, item de aliis nonnullis floribus, praecipue *Citri*, *Aurantiorum*, *Sambuci*, *Tiliae*, *Iasmini*, *Lilii Conuallium*, *Aca-ciae nostratis*, *Calendulae*, potissimum vero famosi illius *Nerii*, siue *Rhododendri*, vel forte rectius, *Thanatodendri*, nec non floris istius fragrantissimum *Ambrae* aut *Moschi* odorem exacte spirantis, vulgo hinc *Cyani Moschati*, siue *odorati*, dicti, suffragante ipsa experientia, a multis auctoribus fide dignis, passim affirmatur, ista quidem praecipua hortorum cultiorum ornamenta, diuersis coloribus amoenissima, variisque odoribus gratissima, tali sulphure narcotico, subtili et penetrabili potissimum abundare, atque hinc sub blandissimo quasi odoris suauissimi et in speciem, plane innoxii, velamento, insidiosum quoddam et clandestinum venenum in sinu suo amabili occultare, quoniam nempe *ipsorum suauitatis grauitas inest*, vt PLINIVS scite et acute loquitur. Malignam certe ipsius *Narcissi* indolem absconditam manifestius interea prodit ipsum nomen: *A narce enim*, (nempe ἀπὸ τῆς νάρκης) siue torpore, dictum eum *neruisque inimicum et caput grauantem esse*, recte pronunciat idem PLINIVS ^{c)} vt et PLVTARCHVS ^{d)}, PHVRNVTVS ^{e)}, et CLEMENS ALEXANDRINVS ^{f)}.

§. XXVIII. De ipsis vero *Rosis* ac *Violis*, HELMONTIVS ^{g)}, qui multa alias, ceu Medicis probe notum, inepte moliri solet, hic tamen vere, sapienter, et ad ipsum nostrum institutum perquam apposite, ita scripsisse videtur: *sane, si bene inuestigetur, vix aliquid immune habet natura, quod suum toxicum sibi clanculum admistum non habeat. Non enim Rosas, aut Violas habemus, quae nobis non imponant, quin sub tanta odoris fragrantia, non occultent Veneni contagia: putrefactionis nimirum in-*
signia,

c) Lib. XXI. Hist. Nat. cap. 19.

d) Lib. III. Sympof. Quaest. I. p. 647. Tom. II. Opp.

e) De Natura Deorum, Cap. 35. p. 235. Collect. Opuscul. Myth. Phys. et Eth. per THOM. GALE. Add. et Schol. SOPHOCL. Oed. Col. 675. pag. 294. Ed. Steph.

f) Lib. II. Paedagog. Cap. 8. pag. 181. Conf. RIGALT. ad ARTEMIDOR. pag. 38. item VOSSII Etymol. pag. 338. et BOD. a STAPEL, ad THEOPHRAST. Hist. plant. Lib. VI. cap. 6. pag. 657.

g) Pharmacopol. et Dispensator. hodierni. Sect. 45. pag. 443. sqq. Opp. 1682.

signia, corporis nostri colliquationem, ac virium suffurationem. Sed ipse iam dudum PLINIVS, aut VARRO potius ante ipsum eandem forte ob causam humile et vulgare pulegium ipsis splendidis ac purpureis rosis praetulisse videtur, quod scilicet parum fideret mendaci ipsarum verecundiae et blandis quidem, at suspectis odoris suauissimi illecebris; Sic enim haud sine graui ratione scribit ^{h)}): *Qua de causa dignior e pulegio corona VARRONI, quam e rosis, cubiculis nostris, pronunciata est.* Causa vero huius dignitatis praecipua visa fuit VARRONI, quod ad recreandos defectos animo pulegium ipsum singularem haberet virtutem, ut mox in antecedentibus clare legitur: quod et pariter recte affirmant DIOSCORIDES, *Lib. III. cap. 36.* ARETAEVS, *Lib. I. de Morb. acut. cap. 2. pag. 80.* et alibi passim, item GALENVS et AETIVS, LVCILIVS quoque apud STOBAEVM GROTII, *Tit. X. pag. 75.* ut et CELSVS, *Lib. II. cap. 32.* et *Lib. IV. cap. II.* nec non PHILOIVD. *de Somn. pag. 446.* Conf. inprimis SALMASIVS, *Epist. de Cruce pag. 323. sqq.* BOD. a STAPEL ad THEOPHRASTI *Hist. plant. Lib. VI. pag. 567.* et DIETERICI *Intr. Hipp. pag. 691.* Cur igitur dignius iudicatum fuit ab eodem pulegium, quod cubiculum prae ipsa rosa intraret? forte, nisi me fallant omnia, quod rosa plus faceret ad animi defectionem; pulegium autem plus, ad eiusdem refectionem. Quod si igitur nostra infelix puella ferrugineas quoque violas cubiculo suo exclusisset; tum ferrea diri lethi ianua ipsi fortasse tam subito haud fuisset reclusa. Licet enim PLVTARCHO ⁱ⁾), CLEMENTE ALEX. ^{k)}), PLINIO ^{l)}), aliisque testibus ^{m)} modico temperatoque violarum odore capitis grauitas stuporque saepius tollatur; nimiam tamen et immodicam earundem fragrantiam haec ipsa mala, cum aliis adhuc longe grauioribus, contra inducere, et hoc ipsum triste quidem exemplum liquido demonstrat, et aliunde etiam, ut et ATHENAEO ⁿ⁾), satis manifesto patet.

§. XXIX.

h) *Lib. XX. Hist. Nat. cap. 14.*i) *Lib. III. Sympos. Quaest. I. p. 647.*k) *Lib. II. Paedagog. Cap. 8. p. 181.*l) *Lib. XXI. Hist. Nat. cap. 19. add.*ATHEN. *Lib. XV. cap. 8. p. 681.*m) Vid. PASCHAL. *Lib. III. de Coronis, cap. 3. et 5.*n) *Deipnosoph. Lib. XV. cap. 5. p. 675.*Conf. huc inprimis STVCKII *Antiquit. Conuiu. Lib. III. cap. 16. pag. 352. et maxime*

§. XXIX. Multis autem nimium Rosarum odorem exitiosum ac funestum saepius fuisse, luculenter admodum constat ex variis singularibus historiis, apud plures auctores fide dignos, praesertim autem IO. DOMIN. SALAM. ^{o)} passim consignatis. Ita ex nimia Rosarum fragrantia subito extinctum quondam fuisse LAVRENTIVM, *Vratislaviensem Episcopum*, testatur MARTINVS CROMERVSP), et ex eo MARCELLVS DONATIVS ^{q)}, aliique ^{r)} item NICOLAI II. *Comitis salmensis* filiam, simili tristi, aut iucundo, Rosarum fato, in Hungaria periisse, adnotavit maioris diligentiae, quam iudicii, Historicus, HIERON. HENNINGES ^{s)}, et post eum ROSENBERG ^{t)} sicut et medias inter Rosas, animam confestim efflauit sponsa illa, melioribus fane hymenaeis destinata, cuius supra in prooemio, iam mentio fuit iniecta. Cui funesto casui, excepta tamen sola morte, perquam simile est illud memorabile exemplum, ab ipso TIMAEO a GULDENKLEE quondam visum, atque ita descriptum ^{u)}: *Anna Schragen, Senatoris Colberg. coniux, tempore verno, in collectione florum Rosarum, occupatu, subito concidit, sine sensu et motu, voceque et respiratione intercepta, ut quasi suffocari videretur; succedebat partium externarum frigus, faciei labiorumque pallor, et cordis palpitatio.* Quo et maxime pertinet, quod olim ceu praesens et oculatus testis, cum admiratione, observavit magnus noster BOHNIVS ^{x)} in celeberrimo illo CAROLI II. Reg. Angliae Chemico, LE FEBVRE, qui nempe, quum inter operationes chemicas, Rosas quondam uberius tractaret, hoc infirmitatis inde contraxerat, ut postmodum,

maxime CASP. HOFFMANN. *Lib. I. de Medicam. Officinal. Cap. 41. pag. 78.* ex MESVE, et aliis, de *Vi Violarum narcotica*: quod et nostro quidem aevo, magnus BAGLIVIVS notavit.

^{o)} *De Arte Med. cap. 40.* cui add. inprimis IO. RHODII *Obs. med. 99. Cent. III. p. 177.* vbi plura.

^{p)} *Lib. VIII. de Rebus Polonorum.*

^{q)} *de Med. Hist. mirabil. Lib. VI. cap. 3. pag. 624.*

^{r)} vt PAVL. ZACCHIAS, *Quaest.*

Med. Legal. Tom. I. Lib. II. Tit. II. cap. 2. pag. 163. vbi et varia alia, item ZEILLERS, in *Manual. Hist. part. I. p. 288.*

^{s)} In *Genealogia Comitum Salmensium.*

^{t)} *Rhodolog. part. II. cap. 13. p. 217.* vbi plura huc spectantia.

^{u)} *Cas. Medicinal. 17. Lib. IV. pag. 216. Opp. Conf. SCHNEIDER. de organo odoratus, p. 366. sqq. et ADOLPHI Diss. de Aegrotantium Conclavi, pag. 660. seqq. Syllog. Dissert. Medicarum.*

^{x)} *De Offic. Med. Part. I. cap. 4. p. 56.*

postmodum, a florum horum odore mox animo linqueretur. Quale quid etiam de alio pharmacopoeo regio, (nisi forte rectius, de eodem, ut mihi quidem videtur, nam et ipsum tempus, et ipsius Viri officium inter se satis bene congruunt) in hunc modum retulit aeterna laude florentissimus, ROBERTVS BOYLEY): *Celebris pharmacopoeus crassus et procerus homo, saepe mihi dixit, etsi aliquando peramans Rosarum extitisset, attamen, quum eiusmodi incidisset occasio, ut magna simul illarum utendum esset quantitate, sic ab ipsarum fumis affectum se fuisse, ut nunc, si inter Roseta ambulet, ab odore magnopere conturbetur. Is autem Rosarum odor eam in illius capite, humorum colliquationem parit, ut tussim prouocet, et rheuma, raucedinemque, et oculorum dolorem, cogaturque ipse abesse, quo tempore vernant Rosae, si magna, in eius domum, quantitate, deferantur.*

§. XXXI. Inde etiam profecto haud mirum, per singularem quandam absconditam antipathiam, aut idiosyncrasiam vulgo sic dictam, vel ipsam veritatem apertius fatendo, per occultam qualitatem, BORRICHIO quidem, magno alias Viro, frustra negatam^{z)}; a FRACASTORIO^{a)} tamen, DIGBAEO^{b)}, BOYLIO^{c)}, PECHLINIO^{d)}, BARTHOLINO^{e)}, MIZALDO^{f)}, KORNMANNO^{g)}, GOCLENIO^{h)}, RATTRAYⁱ⁾, RAMAZZINI^{k)}, ZACCHIA^{l)}, COHAVSEN^{m)}, praesertim autem BONETOⁿ⁾, multisque aliis, qui de hoc arduo argumento operose et copiose scripserunt, euidentissime probatam et confirmatam; per illam inquam antipathiam incomprehensibilem, tam multis

y) Exercitat. de insigni Efficacia Effluuio-
rum, cap. 6. pag. 54.

z) Dissertat. Acad. 8. Tom. I. p. 410. sqq.
ut et pag. 421. sqq. quam tamen contra ad-
mittere videtur, in Act. med. Hafn. Vol. IV.
Part. I. Obs. 44. p. 147.

a) Tract. de Sympathia et Antipathia.

b) Tract. I. Nat. Corp. c. 38. p. 436.

c) de insigni Effluu. efficacia, cap. 6.
pag. 53. sqq.

d) Obs. med. 14. Lib. III. p. 423. sqq.

e) Hist. anat. rar. 28. Cent. III pag.
64. sqq.

f) de Rerum Variar. Sympath. et An-
tipath.

g) Lib. de Miraculis Viuorum.

h) Tract. de Mirabil. Naturae.

i) Lib. de occultis Sympath. et Antipath.
Causis.

k) de Morb. Artif. c. 13. p. 75.

l) Quaest. Med. Leg. Tom. I. L. II. Tit. 2.
cap. 2. pag. 164.

m) Tract. de Pica Nasi, Part. II. pag.
74. sqq. Conf. EVTH de Anat. Umbilici
curios pag. 49. et pag. 53.

n) Med. Sept. T. II. L. 6. Sect. 7. p. 381. sq.

multis vtriusque sexus hominibus adeo quidem infestum atque inuisum esse ipsum Rosarum odorem, ob nimis nempe mollem et quasi effoeminatam ipsarum suauitatem, vt saepius vel vna tantum rosa, veluti in transitu conspecta, aut eminus olfactu percepta, protinus infequantur lipothymia, nausea, vomitus, catarrhus, coryza, sternutamenta, haemorrhagia narium, asthmata, anxietates praecordiorum, ophthalmia, cephalalgia, vertigo, suffocatio vterina, gelidus totius corporis sudor, et sexcenta alia mala, prout innumera paene exempla miranda prorsus, immo fere portentosa, vbique prostant apud innumeros ferme auctores, maximam quidem partem iam allegatos a diligentissimo ZORNIO^o), et elegantissimo COHAYSENIO^p), aliisque. Quibus tamen nunc opportune addere liceat sequentes, ceu praetermissos, scil. SENNERTVM nostratem^q), primo vtique loco laudandum, AMATVM et ZACVTVM, LVSITANOS^r), BOTALLVM^s), REIESIVM^t), ZACCHIAM^u), BOYLIVM^x), BOHNIVM^y), LEMERYVM^z), LEDELIVM^a), BINNINGERVVM^b), BARTHOLINVM^c), RAMAZZINVM^d), SCHVRIGIVM^e), ROSENBERGIVM^f), ZELLERVM^g), et IVL. CAES. SCALIGERVVM^h), ne plures alios iam comme-

o) In *Botanologia*, opere laboriosissimo, sub Tit. *Rosa*, p. 578.

p) In lepidissimo Libello, de *Pica Nasi*, Part. II. pag. 74.

q) *Opp. Tom. I. Lib. v. Sect. 6. cap. 3.* Conf. RAMAZZIN. loc. cit. pag. 75. et ADOLPHI Dissert. de *Aegrotantium Conclavi*, pag. 659. sqq. Syllog. Dissert. med. vbi et plura, quae huc spectant.

r) *Curat.* 36. Cent. II. et alter ZACVTVS, *Introduct. ad prax. Med. praecept.* II. sqq.

s) De *Medici et Aegri munere*, §. 25. conf. BOHN. de *Off. Med.* pag. 56.

t) *Elys. iucund. Quaest. Camp. Quaest.* 84. pag. 643. et maxime p. 701. sqq. *Quaest.* 93.

u) *Citat. Quaest. med. legal.* p. 163.

x) de insigni efficacia *Effluuior.* Cap. 6. pag. 53.

y) de *Offic. Med.* laudat. pag. 56.

z) *Curs. Chymic.* pag. 631. Edit. x. conf. *Continuat. Mat. Med.* GEOFFROY, T. II. Sect. 2. p. 230. sqq.

a) In *Ephemerid. Nat. Curios.* Decur. II. Ann. 2. Vid. eandem *Continuat.* GEOFFROY, *Gallicant*, p. 231.

b) *Obs. Med.* 86. Cent. II. p. 227.

c) *Hist. anat. rar.* 28. Cent. III. p. 65.

d) *Cit. Tract. de Morb. Artif.* p. 75.

e) *Gynaecolog.* p. 34. et alibi.

f) *Rhodolog. Part. II. cap. 13.* p. 216. seqq. add. EVTH de *Anatome Umbilici curiosa*, p. 53. et 49.

g) In *Epist. x c.* Cent. III. et p. 855. citat. *Manual. Hist. part. I.* p. 288. add. RIEDLINI *Iter med.* p. 25.

h) *Exercitat. CLIII. contra CARDAN.* Sect. 10. p. 489.

commemorem, passim hinc inde obuios. Sed, quod tanto magis profecto mirum, similem vehementissimam antipathiam, seu *innatam repugnantiam*, ut scite PLINIVS latine reddit, vel ipsis fordidis scarabaeis intercedere cum suauissimo rosarum odore, ita, ut ipsis propius admoti protinus intereant, obseruauit post THEOPHRASTVM^{l)}, et ARISTOTELEM^{k)}, PLINIVS^{l)}, et post hunc AELIANVS^{m)}, CLEMENS ALEXANDRINVSⁿ⁾, et alii.

§. XXXII. Vnde sane liquido mihi quidem patere videtur, licet in Rosa ipsa omnia visu iucunda appareant, omniaque odore suauia; tamen non omnia in eadem esse etiam tuta, secura, salutaria atque innoxia. Sicut praesertim de odora issima illa Rosa Alexandrina, *Moschata* vulgo dicta, notauit ZACVT. LVSITANVS *Comment. ad Lib. I. DIOSCORID. pag. 120.* quae non solum odore iucunde graui caput vehementer tentat et turbat; sed et intus sumta, aluum ad instar scammonii, potentissime subducit, quin et fauces adeo stomachumque adurit et

M m 2

erodit

i) *Lib. VI. de' causis plant. Cap. 4. fin. pag. 357.*

k) *de Mirab. Auscult. pag. 1166. Tom. I. Opp.*

l) *Lib. XI. cap. 53.* cuius haec sunt verba: *Vultures unguento qui fungantur, alios appetunt odores, Scarabaei Rosam.* Sed cum vulturibus et scarabaeis; ipse sanus sensus, ut sic loquar, ex hoc loco, fugatur. Hinc PINTIANVS et praesertim HARDVINVS, *pag. 645.* plurimum hic aestuarunt; nec tamen extricarunt quidquam. Mihi autem, ut alibi iam monui, nempe ad *Tom. V. Poemat, pag. 549.* simplicissime ac mitissime legendum videtur: *Vultures unguento fugantur, qui alios appetunt odores, Scarabaei Rosa,* scil. fugantur. Nisi quis forte legere malit, paullo maiore quidem licentia; sed et maiore perspicuitate: *Vultures, qui alios appetunt odores, unguento fugantur, Scarabaei Rosa.* Sic enim PLINIVS, ut solet, κατὰ λέξιν, transtulit ipsissima illa THEOPHRASTI

verba: οἱ γύπες ὑπὸ τῶν μύρων, καὶ οἱ σκάρδαροι ὑπὸ τῶν ῥόδων, scil. ἀναίρενται, quod nempe praecessit. Ita vero abrupte et concise, saepissime in isto suo vasto opere, loqui amat ipse PLINIVS, ceu dudum obseruatum TURNÉBO, SCALIGERIS, REINESIO, et praesertim SALMASIO et HARDVINO. Sic, ut vnum tantum exemplum forte iam obuium, in medium adferam, huic quidem nostro praesenti, quod ad βραχυλογίαν, et singularem construendi modum attinet, prorsus geminum, *Lib. VIII. cap. 50.* pariter dixit: *Oculos suffusos capra iunci puncto, sanguine exonerat, caper, rubi,* scilicet *puncto*, quod nempe ex superioribus repetendum, sicut hic *fugantur Rosa.* Sed haec obiter.

m) *Lib. IV. de Nat. Animal. c. 18.*

n) *Lib. II. Paedagog. Cap. 8. pag. 178.* Conf. CYPRIANI *Continuat. FRANZII Hist. Animal. Part. V. c. 3. p. 3497.* praesertim ROSENBERG. *Rhodol. Part. II. c. 14 p. 219. sqq. et Poem. nostr. T. V. p. 550.*

erodit. Quale et de Violis nostris obseruauit THOM. BARTHOLINVS^o), ita scribens: *Generosa quaedam matrona, omnia suaue odorem spirantia, perfert, exceptis solis Violis recentibus; de Liliis vero albis magnus IUL. CAES. SCALIGER* P): *Affinis nostra, virgo quaedam pulcherrima atque nobilissima, solo conspectu Lilii, paene vecors fit: peritura, si naribus hauserit, ubi et praeterea singulare exemplum refertur de iucundissimi odoris Cydoniis, quibusdam per singularem idiosyncrasiam, vertiginem cientibus.* Quemadmodum et nobismet ipsis olim in magni cuiusdam principis aula, cognita fuit generosissima quaedam virago, quae visis vix, et eminus odore perceptis, istis Cydoniis malis, faciem natura antea roseam, quasi dira incantatione facta, ita protinus mutabat, ut ea his ipsis cydoniis pallidior videretur: et ipsa praeterea de acerbissimo capitis dolore sensuumque stupore grauissime conquesta, celerrima quidem fuga se alio proripere confestim cogeretur. Omitto iam lubens prudensque, ad optatum tandem finem properaturus, diversos alios odores, uti Florum Aurantium, Sambuci, Primularum Veris, Iasmini, Nerii, Hyacinthi Indici tuberosi, et aliorum; item fructuum quorundam, veluti fragorum, mororum, pomorum, pyrorum, persicorum, Rubi Idaei, Melonum denique, nec non Aromatum, ut Cinnamomi, Caryophyllorum, Macis, et aliorum, quos nonnulli, ex innato quasi odio, adeo usque auersantur, ut varia mala grauissima subito incurrant, nisi ista odorifera ex ipsorum conspectu citissime remoueantur. Qua de re multa miranda prorsus exempla, partim etiam mihi cognita, narrare iam possem, si id quidem locus hic pateretur.

§. XXXIII. Plus ergo propemodum damni ac periculi sanitati ipsique vitae metuendum videtur ex suaueolentibus; quam quidem ex graueo-

o) *Hist. anat* 28. *Cent.* III. p. 65.

p) *Exercitat. Anti Cardan.* CXLII. 2. pag. 463. Vid. et *PLIN. Lib.* XXI. c. 7. Conf. *SCHNEIDER. de Organo Odoratus*, pag. 367. *sqq.* et ill. *HOFFMANNI Consultat. et Respons. Med. Cent.* II. et III. *Cas.* pag. 166. *Tom.* IV. *Opp.* ubi perquam singulare de Viro quodam illustrissimo habetur exemplum, qui ex naturali veluti

odio, omnibus aromatis, et plerisque floribus suaueolentibus, spretis ac repudiatis, solo fere grauiore et molesto alias odore Corii illius rustici, succo betulae inuncti, vulgo *Iuchten-Leder*, dicti, mirum in modum delectabatur, atque vires suas languentes exinde insigniter refici atque augeri, vel vane credebat, vel vere sentiebat.

graeuolentibus: quoniam nempe languores et aegritudines, quae ex bene odoratis originem traxerunt, contrariis male odoratis discutuntur, vt illa exempla paullo superius modo commemorata, de Sabaeis, ex nimia sua felicitate infelicibus, item de rusticis, per sordidas de hesterna coena, delicias, facillime curatis, luculenter docent. Hinc et verum quidem est istud HIPPOCRATIS in *prognost.* dictum, τὰ δυσώδη ὀλέθρεια, graueolentia esse perniciofa; sed et non minus verum alterum illud contrarium: τὰ εὐώδη ὀλέθρεια, seu suaueolentia esse perniciofa, Conf. GALEN. *Comm.* II. in *Lib.* III. *Epidem.* p. 253. T. IX. *Opp.* per CHARTER. et LANGII *Epist. med.* 54. *Lib.* I. pag. 249. Porro foeminae ab hysterica passione, aut matricis suffocatione, tanquam comitiali morbo, subito prostratae, admotis intempestiue iucundioribus odoramentis, magis adhuc adfliguntur, vt peius sese habeant; solis vero insigniter foetentibus, vti castoreo, asa foetida, extincto de lucerna linamento, accenso Galbano, vel chartis, crinibus, aut plumis combustis, illico reficiuntur, et denuo quasi in vitam reuocantur, ceu vbiuis notissimum. Denique in ipsa dira pestilentia omnes odores suaues et fragrantés vanae nihilque profuturæ prophylaxeos, seu praeuentionis gratia, ex peruerso quidem vulgi more frustra adhibitos, plus semper nocuisse quam profuisse, diligenter obseruarunt, candideque monuerunt celeberrimi illi triumviri, qui de re ista pessima omnium optime scripserunt, DIEMERBROECK^{q)}, inquam, BARBETTE^{r)}, atque RIVINVS^{s)}, cui denique maximo suo merito vtique iungendus grauiissimus quondam ipsius collega, BOHNIVS^{t)} scilicet, aeterna illa Lipsiensis academiae gloria. Sic iam olim in dirissima illa pestilentia, quae, imperante Commodò, totam paene Italiam saeuissime vastabat, ne suauiissima quidem vnguenta, suffitus et odoramenta, a medicis nimium credulis, tum frustra commendata, quidquam profuisse, probe adnotauit HERODIANVS *Lib.* I. *cap.* 12. addit enim mox, his ipsis antidotis prophylactis

Mm 3

q) *Lib.* II. de *Peste*, *cap.* 5. *pag.* 89. et *pag.* 92. Conf. RHODII *Analecta*, ad SEPTAL. *Lib.* V. p. 161.

r) *Tract. de Peste*, p. 440.

s) *Diff. de Peste Lipsiensi*, *cap.* 4. *pag.* 866. *Sylloges Dissert. Med. Riuinianarum.*

t) In *Dissert. de Prophylaxi Pestis dubia*, §. 41. *pag.* 37. *sqq.*

DE MORTE SVBITA

lacticis suaueolentibus prius laudatis: πλὴν εἰδὲν ἥττον ἢ νόσος ἐπὶ τὸ πλεῖστον ἤκμασε, πολλῆς ἀνθρώπων φθογᾶς γενομένης, πάντων τέξων τοῖς ἀνθρώποις συνοίκων: *Verum nihilo secius ipsa illa pestifera luēs vehementius increfcebat, hominesque ubique, una cum animalibus brutis, ipsis hominibus alias domesticis, cateruatum peribant.*

§. XXXIV. Quare nunc quiuis paullo emunctioris naris, facile, opinor, ex his intelliget, quam inimicum sanitati, quam infestum ipsi vitæ insidiosumque illud quidem MARTIALIS sit votum, pro intimi sui amici *Liberi*, felicitate perpetua, meliore potius versu, quam sententia, in hunc nempe modum, conceptum ^{u)});

Liber, amicorum dulcissima cura tuorum,

Liber, in aeterna, viuere digne, Rosa:

Si sapis, Assyrio semper tibi crinis Amomo

Splendeat, et cingant florea ferta caput:

Candida nigrescant vetulo crystalla Falerno,

Et caleat blando mollis amore torus.

Qui sic, vel medio finitus, vixit in aeuo,

Longior huic facta est, quam data Vita fuit.

Haec enim frigida friuolaque bracteatae huius felicitatis et splendidae miseriae argumenta, scilicet *in aeterna Rosa viuere, assyrio amomo semper unctum, et floreis fertis odoratis cinctum esse*, vt reliqua iam taceam, his quidem ipsis adhuc longe turpiora ac perniciosiora; haec inquam cuncta, etiam secundum nudum propriumque verborum sensum, sumpta, ita profecto sunt comparata, vt sanitatem homini non adferant; sed certius auferant, ipsiusque Vitæ spatium non tam longius extendant; quam potius arctius contrahant. Quod si igitur ipse MARTIALIS tam bonus Medicus fuisset, quam bonus fuit poeta; aut eiusmodi funestorum exemplorum, a nobis hactenus productorum, commode meminisset; tum forsan, vt credere quidem par est, postremum sui Epigrammatis luxuriosi versum ita potius reformasset:

Arctior huic facta est, quam data Vita fuit.

§. XXXV.

^{u)} Epigramm. 77. Lib. VIII. Conf. CIC. ad SENECA. de Vit. Beat. cap. XI. p. 124. V. in Verr. et CASAVBON. ad ATHEN. et BARTH. Aduers. Lib. LVIII. cap. 16. Lib. IV. Cap. XI. pag. 274. item GRONOV. pag. 3757.

§. XXXV. Verum ipsa Rosa, *tantus veris honos, et odora gratia Florae*, ut cum eodem poetae loquar, hominum potius luxuria, negligentia, aut imprudentia, quam suapte culpa, noxia interdum facta, et hinc a nobismet ipsis alibi plus quam vno carmine encomiastico, meritis laudibus celebrata ^{x)}, haec inquam Rosa, nos quidem forte iusto diutius sermone longiore hucusque diuagatos, opportune tandem verecundi admonet silentii, quoniamque ipsa silentii deo, Harpocrati, ceu notum, est consecrata ^{y)}. Hinc licet multa adhuc supersint monita saluberrima, circa rectum odorum usum, et peruersum eorum abusum, humano generi admodum damnosum, Sedulo observanda; ^{z)} tamen

*Haec ipse equidem spatiis exclusus iniquis,
Praetereo, atque aliis, post me, memoranda relinquo.*

Praefertim quum probe sciam, me, etsi multa de rosis violisque hucusque loquutus sum, rosas tamen violasque nequaquam loquutum fuisse. Id enim iam vetuit durans adhuc eheu! dura illa funesti belli tempestas. Vnde iam dudum praeteritam pacis ac tranquillitatis rosam heu!

x) Vid. si placet, *Poemat. Tom. I. pag. 245. et pag. 251. Tom. II. p. 90. et p. 168. Tom. III. p. 31. p. 38. et p. 61. Tom. IV. pag. 271. et pag. 371. et denique Tom. VI. p. 509. sqq. in Not.*

y) Res quidem haec alias satis nota est, atque hinc vix moneri digna: Interim tamen, si quis plura de hoc antiquo ritu scire aueat; is si lubet, adeat STVCKIVM, *Lib. III. Antiquitat. Conuiu. cap. 16. pag. 371. sqq. ROSENBERGII Rhodolog. Part. I. cap. I, pag. 14. sqq. LOMEIERI Dier. Genial. Decad. I. Dissert. 3. p. 126. IOS. BARNES. ad EVRIPIDIS Cyclop. pag. 224. Tom. I. PAVLLINI Tract. de Nuce Moschata, Sect. IV. cap. 2. et alios plures.*

z) Quo imprimis pertinent peruersi Nonnullorum ac Nonnullarum mores, commam tam naturalem ac propriam, quam

emtam ac vicariam, odoratis non solum vnguentis perlinendi sed et fragrantibus pulueribus candidis inspergendi: item indusia, muccinia, lintea, vestes, chirothecas, tapetas, lectos, mensasque balsamis, aquis, oleisque suaueolentibus, et id genus aliis odoriferis, imbuendi: paene et hic, lectorum pace, addidissim Matulas; Sed addam tamen audacter, quia ita dudum scripsit magnus CLEMENS ALEX. *Lib. II. Paedagog. cap. 8. p. 177. αἱ δὲ γυναῖκες, καὶ τὰς ἐκδήτας, καὶ τὰς σρωμνάς, καὶ τὰς οἰκίας ὑποδυμῶσι τε, καὶ καταβρῆλαινας μονονυχὶ δι καὶ τὰς ἀμίδας ὄζειν ἀναγκάζει τῇ μύρῃ ἢ τρυφῇ. Mulieres sua vestimenta, stragulas domosque suffumigant et aspergunt: adeo vel ipsas propemodum Matulas olere cogunt vnguenti delitiae. Conf. huc ATHEN. Lib. XII. cap. 11. pag. 542. sqq. et pag. 553. sqq. ac Lib.*


heu! frustra adhuc quaerimus. Nulla vero satis fida concordia et conspiratio, nec mutuum est commercium Arti et Marti, literis et lituis, legibus ac legionibus. Quare haec omnia sub gladio quasi raptim conscripta sunt, velut illa PROTOGENIS tabula picta fuit sub gladio, apud PLINIVM ^{a)}. Hinc vix rosas violasque somniare potest, qui asperis sentibus et acutis paliuris moleste indormit; et mollis tantum atque omnibus mordacibus curis solutus EPICVRVS, *mistas violis rosas, et totas apportabat illecebras voluptatum*, vt scite loquitur MARTIANVS CAPELLA, *Lib. II.* Conf. CASSENDI opus splendidum de *Philos. EPICVRI*, *Tom. II. pag. 78.* et D'ORVILLE ad CHARITONIS APHRODIS. *Erotica, Lib. III. cap. 2. pag. 249.* Liceat ergo mihi illo memorabili CICERONIS ^{b)} loco, huc quodammodo applicato, hic tandem finire: A. *Etiamne in cruciatu atque tormentis beatos esse quis existimet?* M. *An tu me in Viola putas, aut in Rosa, dicere?*

Lib. xv. cap. 12. pag. 689. sqq. et NICOLAI, de *Chirothecis, cap. 18. pag. III. sqq.* et *pag. 114.* item PECHLINI *Obs. med. 10. Lib. III. pag. 412.* et KAEMPFERI *Amoen. exot. pag. 374.* Vt taceam iam, pluribus urbanioris notae hominibus, in more, moro scil. esse positum, ut pulueribus ptarmicis, rubris, viridibus, aut coeruleis, moscho, ambra, aut oleis destillatis fragrantioribus, infectis ac medicatis subinde vtantur, aut rectius, in ipsius sanitatis detrimenta abutantur, de quibus exactius nuper egimus in *Thesouro pharm. vniuersal. Part. II. p. 564. sqq.* Quae omnia sane accuratiorem disquisitionem hic merebantur, modo per spatium, licuisset sicut et hic de consueto illo veterum Medicorum more, fragrantēs et refrigerantes flores

herbasque per aegrotorum conclauia, refectionis virium aestusque temperandi gratia, spargendi, tractandum vtique diligentius fuisset, de quo multa singularia et notatu digna loca passim occurrunt apud ARETAEVM, GALENVVM, SYNESIVM, CAELIVM AVRELIAN. ALEX. TRALL. THEODORVM PRISCIVM, GARIOPONTVM, aliosque plures. Sed quoniam hoc ipsum Argumentum propter maxima momenta, haud perfunctorie erat pertractandum: ideo volente Deo, proxime, commodiore occasione, data quidem opera, de eo disertius agere constituimus.

a) *Lib. xxxv. Hist. Nat. cap. 10.*

b) *Lib. v. Tusculan. Quaest. cap. 73. p. 261.*





DISSERTATIO MEDICA DECIMA.
DE
MORBO COELIACO SINGVLARI
A CORNELIO CELSO DESCRIPTO.

§. I.

Morbum illum inferioris ventris, sordidum, molestum, taedii, atque etiam saepius periculi, plenum, vulgo *Coeliacum*, ἀπὸ τῆς κοιλίας scilicet, dictum, omnibus medicis iam dudum satis cognitum atque perspectum esse arbitramur, adeo vt proinde operam omnino ludemus, lectorumque praesertim patientia intempestiue abuteremur, si iusto operosiorum ac copiosiorum ipsius enarrationem et descriptionem nunc quidem susciperemus: inprimis quum omnes veteres vtriusque linguae medici, vt recentiores nunc studio fileam, quam diligentissime et accuratissime iam de eodem tractarint.

§. II. Vnam tamen ipsius descriptionem, aut rectius picturam, eamque omnium exactissimam ac luculentissimam, hic producere liceat, ex CAELIO AVRELIANO depromptam, idque potissimum propter CORNELIVM CELSVM, in contraria omnia hic discedentem, vti mox liquidius patebit, aduersus quem nonnulla candide monere et accuratius disputare, forsan haud prorsus inutile aut iniucundum fuerit.

§. III. Ita igitur CAELIVS ille AVRELIANVS, Methodicorum princeps, ipsum Coeliacum Morbum describit, aut potius viuis, et ex ipso intimo Naturae sinu desumptis coloribus, depingit ^{a)}: „Ventriculosa passio, quam Graeci κοιλιακὴν vocant, a parte corporis, quae patitur, nomen accepit. Generatur ex antecedenti indigestione continua, vel tumore vehementi ^{b)}, aut dysenteria. Sequitur in „hac

a) Lib. IV. de Morbis Chronicis, cap. 3.

b) Forte rectius hic legendum *Turbore*, quam *Tumore*, quoniam *indigestio continua* praecedat, cuius quasi synony-

mon, aut scholion esse videtur *Turbor*, in Ventriculo et intestinis obortus. Licet enim et *Tumor*, saepius legatur apud CAEL. AVREL. praesertim, vbi de Morbis

„hac passione constitutos varia stercoreum egestio, qualitate, atque
 „colore, nunc tenuis ac soluta, nunc similis vrinae Camelorum, nunc
 „flaua, et spumosa, nunc prasina, vel liuida, aut nigra, aut purulen-
 „ta, aut sanguinea, cum graui foetore, et rugitu intestinorum, quem
 „Graeci *βορβορυμὸν* appellant, atque in exitu sonitum: et post effu-
 „sionem, factae velut scatentis stercoreis vesiculae: et nunc iugiter no-
 „cte atque die, nunc coaceruatim, sed interiecto spatio, vt per diem
 „bis, vel semel, aut interpositis vno, vel duobus diebus, aut eo am-
 „plius: et nunc cum tensione, atque ventositate, et tormento, vel
 „dolore, aut singultu, confidente atque conducta cute, quae ventrem
 „circumtegit, attestante siti, et ipsius ventris feruore, et leui in inte-
 „rioribus torpore frigido. Sequuntur etiam vigilae, fastidium cibi,
 „et aliquibus plurimus appetitus, virium debilitas, pallor subalbidus,
 „et nunc febres, dehinc corporis odor teter, plurimus c) vt etiam,
 „quae suis manibus tetigerunt, computrescant, et difficile careant
 „odore concepto: tum vultus inflatio atque pedum. Quibusdam
 „etiam dysenteria congeneratur, quum facile fuerint intestina vlcera-
 „ta, ob defluentium acrimoniam. Haecenus quidem CAELIVS AV-
 „RELIVS. „ Quem locum etsi aliquanto diffusiore, ob in-
 „signem tamen praestantiam et perfectam vndique morbi ipsius de-
 „scriptionem et dilucidam explicationem, integrum huc transferre, nos
 „haud piguit.

§. IV.

bis acutis et inflammationibus, tractat: hic tamen *Turbor* magis conuenire vide-
 tur, ob rationem iam allatam; quae ipsa
 vox et saepius alibi, hoc quidem sensu
 occurrit apud Nostrum, vt ex ipso *Lexico*
Caeliano ALMELOVEENII yberius pa-
 tet. Sic et PLINIVS VAL. *Lib. II.*
cap. 26. *Coeliacum* vocat *ex officio Ventris*
per omnia turbatum. Quibus demum ac-
 cedit, frequentissimam esse *Tumoris* et
Turboris Confusionem, apud PLINIVM,
 THEODORVM PRISCIVM, GA-
 RIO PONTVM, et ipsum praesertim

nostrum CAELIVM AVRELIVM.

c) Languere hic mihi omnino videtur
 illud *plurimus*: Forsan ergo scripserit ipse
 CAELIVS AVRELIVS: *putridus*,
 aut *putruosus*, quomodo nempe supra
Lib. II. cap. 14. de Morb. Chron. pag. 423.
 dixerat *ulcus putruosum*; et passim alibi:
 sequitur enim hic mox: *vt computrescant*,
quae suis manibus tetigerunt, quod ipsum
 effectus veluti est istius corporis odoris
putridi, seu *putruosi*, tanquam caussae
 primariae. Sed de his ipse iudicet Le-
 ctor.

§. IV. Eundem igitur prorsus in modum, nunc latius, nunc vero arctius breuiusque Affectum hunc Coeliacum descripserunt Veteres Graeci Romanique Medici, tantum non omnes, veluti e prioribus, GALENVS, ARETAEVS, AEGINETA, ORIBASIVS, ALEXANDER TRALLIANVS, ARCHIGENES apud AETIVM, THEOPHILVS PROTOSPATHARIVS, ACTVARIVS, alique: E posterioribus autem, siue latinis, SCRIBONIVS LARGVS, THEODORVS PRISCIANVS, MARCELLVS EMPIRICVS, PLINIVS VALERIANVS, GARIOPONTVS, item PLINIVS ille maior, Historiae naturalis conditor, alique nonnulli. Hi ergo omnes Morbum hunc coeliacum inter lenteriam atque dysenteriam, veluti medium, collocant, atque hinc PLVTARCHVS ^{d)} ceu commoda synonymina, apte coniungit τῆς κοιλιακῆς καὶ δυσεντερικῆς. Inde igitur laudatus modo GARIOPONTVS ^{e)} fat breuiter quidem; sed simul tamen fat bene: *Coeliaca passio est assidua ventris solutio, cum siti infinita, et fastidio ciborum, et defectione.* Quae vero ita monstrose leguntur in vetusto illo Dictionario Sangermanniano, apud CANGIVM ^{f)}; *Cyliacisis, Solutio assidua ventris*: sub qua tamen portentosa voce *Cyliacisis*, mihi certe hic latere videtur κοιλιακὴ χύσις, seu, quod idem, κοιλίας χύσις, hoc est, *Ventris effusio*, vel *solutio*, sensu, ni fallor, claro nunc et perspicuo. Sed haec obiter.

§. V. Huic autem vnanimi cunctorum veterum medicorum suffragio, quin etiam imperioso ipsius naturae effato solus, quantum sciam, obnuitur contra CORNELIVS ille CELSVS, insigni stili romani puritate et elegantia forte, nisi fallor, commendabilior; quam exacta solidioris medicinae peritia. Ita enim eundem Morbum Coeliacum nobis describit ^{g)}: *In ipsius vero ventriculi porta consistit is morbus, qui et longus esse consuevit, et κοιλιακὸς a Graecis nominatur. Sub hoc venter in-*

Nn 2

durefcit,

d) Libello *de Virtutibus et Vitiis*, extremo, pag. 101. Tom. II. Opp.

f) Glossar. *Med. et Infimae Latinitatis*, Tom. II. pag. 1289.

e) *Lib. III. de Remed. ad omnis Corporis aegritudines*, cap. 5. pag. 50.

g) *Lib. IV. de Medicina*, Cap. 12. Conf. huc HENR. STEPHANI *Dictionarium Medicum*, pag. 375.

durescit, dolorque eius est: Aluus nihil reddit, ac ne spiritum quidem transmittit: extremae partes frigesunt: difficulter spiritus redditur. — Haec quidem ipse CELSVS.

§. VI. Ecquis vero nunc, obsecro, crediderit, vnum hic eundemque morbum descriptum esse a CORNELIO CELSO atque CAELIO AVRELIANO, vt reliquos auctores iam taceam, cum ipso consentientes? et quis quaeso, ex hac discordi veluti vtriusque concordia potius non concluderit, diuersos plane morbos ab vtroque hic delienatos fuisse? In Caeliana enim descriptione venter omnia ingesta protinus reddit, in Celsiana contra nihil plane, imo ne flatum quidem: In illa porro aluus liquefit, in hac vero indurescit; in ista rursus omnia relaxata sunt; in hac autem omnia adstricta et coarctata; in illa denique ipsa ventriculi porta aperta nimis est, in hac vero nimis operta. Verbo: ex omnibus istis morbi signis a CAELIO luculenter traditis, apud ipsum CELSVM nihil amplius restabit, nisi solum inane ipsius morbi nomen.

§. VII. Inde igitur singularem hanc et notabilem CELSI, a communi recepta sententia, discessionem iure semper mirati sunt medici praestantissimi, veluti IO. RHODIVS^h), PETRVS PETITVSⁱ), ZACCVTVS LVSITANVS^k), item HILDANVS, FERNELIVS, FORESTVS, CONSTANTINVS, in Notis ad CELSVM, aliique plures. Quoniam illis paene incredibile videbatur, ipsum CORNELIVM CELSVM id hic solum ignorasse, quod nulli tamen medicorum ante ipsum, cum ipso, et post ipsum, vinqum ignotum fuisset.

§. VIII. Nemo enim ex scriptoribus medicis, quantum equidem sciam, affectum illum, a CELSO hic descriptum, *Morbum Coeliacum* vocauit, praeter vnum forte BENIVENIVM, qui, quam bene, nescio, aut quam male CELSVM hoc quidem loco sequutus, haec refert de ipso suo patre^l): *In ipsius ventriculi porta Morbus innascitur, qui Graecis* κοιλιακός

h) In Notis ad SCRIBONIVM LARGVM, pag. 159.

i) Commentar. in ARETAEVM, pag. 206.

k) Lib. II. de Medicor. Principum Historia, et alibi.

l) De abditis Morborum Causis, cap. CVI, pag. 304.

κοιλιακὸς appellatur. Durescere sub hoc venter solet, et torminibus premi, aliusque ipsa adeo nihil reddere, ut ne spiritus quidem infra, sed nec supra erumpere possit. Paulus, pater meus, haud mediocris ingenii et doctrinae vir, hoc morbo male vexatus, quum diu multa ac varia auxilia, sed frustra, expertus fuisset, clystere ex solo lacte condito, in ventrem iniecto, ac multis subinde strigmentis depositis, ad pristinam reuersus est sanitatem. Haec ille.

§. IX. Ipse quidem CELSVS ad Graecos hic vage prouocat, qui singularem istum morbum, a se hoc loco propositum, sic nominauerint κοιλιακόν. Verum quum nec nomina istorum auctorum addiderit, nec in vlllo Graecorum medicorum hodie quidem superstitum, talis occurrat Morbi Coeliaci descriptio, quae cum ipsa CELSIANA, vlllo tantum modo conueniat; minus vero credibile videatur, omnes illos auctores veteres Graecos, ab ipso nempe CELSO lectos olim ac tractatos, hodie prorsus periisse, et frustra desiderari, qua de re infra sub finem plura. Inde forsitan concludere licebit, vel ipsum CELSUM Graeca quasi fide hic nobiscum egisse, vel, ut mitius iudicemus, in viciosos codices Graecos incidisse, vel denique, quod verius putamus, probos quoque ac correctos libros non satis diligenter et attente verfasse, sed nimis potius festinanter ac negligenter inspexisse: Quae quippe nimia properandi et omnia conscribendi cupido ipsum et alibi saepissime in graues errores abripuit, ita vt in conuertendis Graecis locis, praesertim ex ipso HIPPOCRATE desumptis, nec verum propositarum rerum sensum vbique satis accurate perciperet, nec semper verborum vim et efficaciam satis feliciter assequeretur. Id quod haud ita pridem multis luculentis exemplis ex ipso HIPPOCRATE depromptis, et cum ipsis versionibus CELSIANIS sedulo collatis, adeo perspicue solideque, nisi fallor, ostendimus, vt de istius quidem rei veritate tot manifestis testimoniis comprobata et corroborata, dubium vix vllum amplius superesse possit. Respicimus nempe hic ad qualescunque observationes criticas nostras, in III. priores CELSI libros, intra tres etiam dies, vrgentibus scilicet nundinis Lipsiensibus subito potius effusas, quam cum cura elaboratas, et ipsi nouissimae CELSI Editioni a cel. et doctiss. KRAVSIO singulari studio curatae adiectas.

Inde nonnullos a nobis forte inter festinandum commissos errores tanto facilius nobis, vt speramus, condonabunt placidi lectores; longe plures vero supino nimis negligentique typographo iustius imputabunt. Sed haec obiter.

§. X. Ex his itaque rationibus nobis certe haud improbabile videtur, ipsum hic CELSUM duos diuersissimos et inter se distinctissimos ventris affectus, *Coeliacum* nempe atque *colicum*, aliud quasi agendo, confuisse, atque proinde in suis illis, quos iactat, Graecis pro πάθος, aut νόσημα κολικόν, facili potius lapsu et proclui errore, properanter nimis legisse πάθος ἢ πάθημα κοιλιακόν: sicut pariter mox capite sequenti XIII. χόρδαψον, εἰλεόν, atque ipsum κολικόν morbum inter se miscuisse, et pro synonymis fere habuisse videtur; quos tamen affectus priores deterrimos, periculosissimos et saepissime quoque letiferos ab ipso colico simplici et facilius inde sanabili, quam maxime distinguendos esse, solide prudenterque docuerunt ARETAEVS ^{m)}, ALEXANDER TRALLIANVS ⁿ⁾, ARCHIGENES apud AETIVM, THEODORVS PRISCIANVS ^{o)}, aliique plures, praesertim vero CAELIVS AVRELIANVS ^{p)}, qui rursus hic, veluti data opera, contrarius est ipsi CELSO. Cuius proinde inconstantiam, negligentiam et festinationem merito hic notarunt FORESTVS ^{q)}, WELSCHIVS ^{r)}, PETITVS ^{s)}, et B. noster VATERVS ^{t)}, nobis adhuc desideratissimus.

§. XI. De Coeliaco igitur morbo istud quidem caput suum inscripsit CELSVS, in ipso vero capite descripsit potius morbum colicum; aliud ergo est in rubro, quod dicitur, et aliud contra in nigro. Omnia enim ista morbi signa et omnia quoque potissimum remedia et

m) Lib. II. de Morb. Acut. c. 6. p. 18. sq.

n) Lib. x. cap. 1. p. 561. sqq.

o) Lib. II. seu Logic. cap. 9. p. 79. sqq.

p) Lib. III. de Morb. Acut. cap. 17. pag. 237. sqq.

q) Lib. XXI. Obs. Med. 16. p. 84. sq.

r) Curat. Med. v. Decad. VII. p. 416. sqq.

s) Comment. ad ARETAEVM, p. 161. sq.

t) Diff. de Chordapso CELSI, Witteb. 1738.

u) In variorum Notis, nouissimae CELSI Editioni, Lugd. Bat. 1746. adiectis, pag. 623. sq. Sed contra hoc iustum, vt mihi certe videtur, SCALIGERI iudicium ante aliquot annos insurrexit illustris et venerandus senex, MORGAGNVS, Epist. VIII. in CELSUM, pag. 224. quae de re infra, sub finem huius Dissertationis, plura.

et medendi rationes, quae ibi longe lateque recensentur, colicae potius passioni, et quidem flatulentae, cum spasminis praecipue coniunctae, conueniunt, quam quidem passioni coeliacae, colicae illi, tam secundum signa pathognomonica, quam secundum ipsam praesertim medendi methodum, in omnibus paene contrariae, prout mox in sequentibus distinctius et accuratius docebitur.

§. XII. Id quod etiam iam olim pro vasti sui diuinique ingenii amplitudine acute perspexit maximus IOSEPHVS SCALIGER^{u)}. Cuius nempe haec sunt verba notatu fane dignissima: *Commiscuit hic CELSVS Colicum cum κοιλιακῶ: Facilis enim est lapsus. Hallucinans haec scripsit, quia, quum alium nihil reddere dicat in hoc morbo, quod falsum est, et videtur de Colico intelligendum; tamen paullo post adstringentia praescribit. Ex quo apparet, medicum non fuisse CELSVM.* Haecenus SCALIGER. A cuius sententia verissima et e sacro quasi tripode dicta, haud longe abit hac ipsa nostra tempestate celeberrimus Gallorum medicus, FRANCISCVS BOISSIER DESAVVAGES^{w)}, cuius prudentissimum de hoc CELSIANO loco iudicium sequens est: *Coeliacus affectus CELSI videtur colica periodynia ventriculi, ideoque a Coeliaca recentiorum (imo et veterum omnium, quod hic ex superioribus addo), diuersissimus.* Qualem quoque de hoc ipso CELSI loco, sententiam tulerunt Medici perenni nominis fama florentissimi, BALLONIVS, PECHLINVS, BONETVS, FREINDVS, HOFFMANNVS, SEPTALIVS, alique plures. Adeo, vt hanc nostram quidem opinionem satis superque munitam esse arbitremur a summa tantorum virorum auctoritate; magis tamen adhuc ab ipsa ratione, veritate, natura et experientia.

Cuncta enim ista Signa, Coeliacae passioni perperam hic a CELSO adscripta, longe rectius Colicae flatulentae spasmodicae tribuuntur ab ARETAEO, AEGINETA, ceterisque supra laudatis auctoribus, praesertim

w) In *Nosologia Methodica*, Tom. III. Part. II. p. 143. Conf. et Part. I. p. 138. ubi tamen ita scribit Vir clarissimus: *Gastrodynia a peregrinis; Coeliacus affectus*

CELSI. Vbi vero nonihil peregrina mihi videtur explicatio ab ipso CELSI vero sensu; quod tamen pace celeb. illius Auctoris, a me dictum hic ac monitum sit.

praesertim autem ALEXANDRO TRALLIANO^{x)} atque CAELIO AVRELIANO^{y)}. Qualia nimirum sunt ventris dūrities, aluus pertinax, obstructa prorsus, et ne spiritum quidem seu flatum transmittens, spiritus difficultas, extremarum partium frigus et reliqua. Imo omnia ista verba CELSIANA: *Aluus nihil reddit, et ne spiritum quidem transmittit*, ita, ne vnico quidem omisso, Graece transtulit idem ALEXANDER TRALLIANVS: ἡτε γὰρ τῆς ἐπέχεται ἕως, ὥτε μήτε φύσαν ὅλως διεξίεναι δύνασθαι, *Aluus adeo vsque adstringitur, ut neque flatus omnino transire possit*. Denique CELSVS propriam pertinacis huius mali coeliaci sedem in ventriculi potissimum porta, siue pyloro, vt coniiicere par est, consistere pronunciat: quam tamen portam, ceu malorum portam, longe accuratius assignant supra laudati medici ipsi passioni colicae flatulentae, spasinodicae; quod ipsum grauissima sua autoritate vterius vberiusque confirmat magnus noster HOFFMANNVS^{z)}, vbi ita describit tristem miseri Iudaei casum, malo hoc flatulento spasmodico extincti: *Tali ratione obortus in duodeno spasmus, adnexum pylorum vehementer constrinxit, et ita angustauit, ut nullus prope flatibus e ventriculo patuerit exitus, unde hic supra modum distentus, ingenti praecordiorum anxietati, inquietudini, pectoris oppressioni, dolori circa cordis scrobiculum tensuo, nausea, vomitionibus, et reliquis symptomatibus ansam praebuit largissimam*. Haec HOFFMANNVS.

§. XIV. Verum nunc ex ipsis illis remediis, hic longa quidem serie ab ipso CELSO propositis, adhuc luculentius certiusque, spero, patebit, eum sub alieno coeliaci morbi nomine reuera, inscium licet, descripsisse ipsum potius morbum colicum flatulentum et spasticum. Cui nempe mitigando ista omnia conuenientiora sunt, quam quidem Coeliaco sedando; vti mox clarius videbimus.

§. XV. Nimirum omnia calida hic potissimum commendat CELSVS, veluti cataplasmata, balnea, olea, cibos et potus, item vomitum, ficus virides pingues, sinapismos, cucurbitas, sine ferro, perfricationes, gestationes,

x) Lib. x. cap. i. pag. 561. sqq.

y) L. iv. de Morb. Chron. c. 7. p. 528. sqq.

z) Med. Rat. Systemat. Tom. iv. cap. xv.

pag. 347. Tom. III. opp. et praecipue T. II, pag. 284. sqq. vbi plura de hac ipsa Colica passione flatulenta et spasmodica, exactissime.

gestationes, peregrinationes, nauigationes, et id genus alia, maximam quidem partem relaxantia et resoluentia, atque emollientia.

§. XVI. Haec vero cuncta, ne vnico quidem excepto, contra ipsam passionem colicam, praesertim flatulentam, rectius ordinat CAELIVS AVRELIANVS ^{a)}, item PLINIVS VALERIANVS ^{b)}, NONNVS ^{c)}, AEGINETA ^{d)}, ALEXANDER TRALLIANVS ^{e)}, cum ceteris superius laudatis: vnde ipse dissensus tanto manifestius patet. Verum quid plura? ipse noster CELSVS iam supra, *Lib. i. cap. 7.* haec ipsa, contra Coeliacum morbum sic dictum, hic commendata Remedia ordinauerat rectius aduersus Morbum Colicum. Sic enim ibi ille: *id agendum est, vt lectione et aliis generibus exerceatur; utatur balneo calido, cibis quoque et potionibus calidis, denique omnimodo frigus euitet etc.* Quo modo ergo in Morbis natura sua prorsus sibi contrariis, vna eademque medendi methodo, iisdemque Remediis commode sciteque vti hic potuit CELSVS? certe, quae profunt ad aluum durum et constrictam emolliendam et referendam; aegre profecto quidquam conducere videntur ad aluum fluxam nimis ac laxam sistendam, adstringendam ac roborandam. Inde ergo contradictio manifesta liquido apparet, nisi vehementer forsan fallar. Sed haec haecenus.

§. XVII. Sed ad ipsius morbi coeliaci curationem, idem CAELIVS AVRELIANVS ^{f)}, cum reliquis omnibus, iam saepius citatis, Remedia longe alia, illisque plane contraria, prudentius praescribit, nimirum mere styptica, staltica, seu adstringentia, frigida, acria, tonica, aromatica, et id genus plura: veluti mala punica, herbas stypticas varias,

a) *Lib. iv. de Morb. Chron. cap. 7. pag. 529. sqq.*

b) *Lib. de Re Med. cap. 30. pag. 49. sqq. exactissime.*

c) *De omnium particular. Morb. Curat. Cap. CLXX. pag. 193. sq.*

d) *Lib. III. cap. 43. pag. 45. sqq. Edit. Ald. Graec.*

e) *Lib. x. cap. i. pag. 563. sqq. et praecipue, pag. 580. sqq. vbi eadem omnia*

commendantur quoque, ab ipso CAELIO AVRELIANO, proposita.

f) *Lib. iv. de Morb. Chron. cap. 3. pag. 502. sqq.* quae diligentissime omnino cum ipsis Celsianis Remediis, Coeliaco affectui oppositis, conferenda et inter se comparanda sunt, vt contraria inde et diversa plane medendi Ratio vtriusque istorum magnae auctoritatis Medicorum, eo clarius manifestiusque pateat.

varias, acetaria, aquam frigidam, vinum generosum, austerum, et in mali punici cortice praecoctum, Cataplasinata stomachica constrictiua, Oxyporia, ex variis aromatis et seminibus acrioribus et feruidioribus parata, odoramenta resumtiua, poma austera, immatura, adstringentia, Ceratoria styptica, panem bene elaboratum vinoque adstringenti intinctum, vt reliqua nunc studio taceam, ibidem apud ipsum CAELIVM, per otium, commodius legenda.

§. XVIII. Quantum igitur distet haec ipsa Coeliacam passionem curandi Methodus Caeliana, ab ista quidem Celsiana, superius proposita, nemini non rerum medicarum vel leuiter tantum perito protinus in oculos manifestissime, spero, incurret. Nimirum, quum contrariae prorsus sibiue ratione originis et caussarum, oppositae penitus sint passiones Coelicae atque colicae: inde contraria quoque atque opposita omnino debet esse ipsa vtriusque medendi Methodus.

§. XIX. Colica nempe est proprie *passio stricturae*, vt CAELIVS AVRELIANVS cum reliquis, recte sentit; at Coeliaca e contrario, *passio* potius est *laxitatis ac resolutionis*, eodem probe obseruante, cum aliis. Inde igitur contraria contrariis rectius curantur, secundum notissimum illud praeceptum prudentissimum ipsius nostri HIPPOCRATIS, GALENI, CELSI et aliorum.

§. XX. Ecquis itaque ex his, quaeso, manifestissime haud perspiciat, in Coeliaca passione, seu sordido illo et assiduo ventris soluti profluuiio, vnice conuenire Remedia adstringentia, reprimentia, refrigerantia, exsiccantia, roborantia, tonica, acriora, feruidiora, et generosiora? at in Colica contra, praesertim flatuosa illa et spasmodica, vulgo sic dicta, de qua hic nobis potissimum sermo huc vsque fuit, rectius in usum aduocanda esse Remedia relaxantia, emollientia, discutientia, resoluentia et antispasmodica, vt vulgo dicuntur?

§. XXI. Quare ex haecenus accuratius, ni fallor, disputatis, luculentius nunc certiusque patere arbitramur, ipsum nempe CORNELIVM CELSVM, quum obiter forte et negligenter legendo veteres Auctores Graecos primum ipse falleretur; deinde falsa ista persuasione inductum fefellisse quoque in hunc vsque diem innumeros paene lectores.

ctores, vt Morbum Colicum hic sub Coeliaco celatum esse, vix animaduuerterent, quod tamen pace ipsius CELSI nobis etiam venerabilis, manium, ipforumque Celsicolarum magnae famae atque auctoritatis, a nobis hic libere pronunciatum sit, non tam foedo temere obloquendi pruritu, sancte testor; quam potius fido veritatis indagandae studio. Si quis enim meliora et certiora hic attulerit; ego certe veritati lubentissime cedam. Sed de his haecenus.

Haec omnia iam a me ita perscripta et impressa erant, quum ecce, ab Amico Lipsiensi supra laudato, mihi opportune adferuntur ill. et venerandi senis, IO. BAPT. MORGAGNI *Epistolae in CORNEL. CELSV M doctissimae*, in quarum VIII. pag. 224. sq. de hoc ipso controuerso *Morbo Coeliaco* CELSI exactius tractatur, ipsiusque defensio contra SCALIGERI potissimum sententiam, a me superius laudatam suscipitur. Sed audiamus iam ipsum praestantissimum auctorem ita ibi docte loquentem: *Aequius erat, primum inquirere, an forte, qui ante CELSV M, de Medicina scripserant, Graeci, non eundem, quem posteriores, Morbum eodem nomine designassent; aut, si eundem, an interdum tamen alium quoque: deinde, si nunquam alium, quam posteri, significassent; tum vero cogitare, an Librarii, vt tot alia nomina, graeca praesertim, in describendo, vitiarunt; ita aliud a CELSO fortasse scriptum, in κοιλιακός mutassent.* Speciosa haec, non diffiteor, imo et non infirma, primam quidem frontem videntur: sed si ab illo venerando sene de vniuersa Medicina, et speciatim Anatomia, immortaliter merito, quem ipse senex, summo obseruantiae cultu ingenue prosequor, dissentire hic modeste liceat, licebit autem, vt confido; non desunt mihi omnio, quae regeram, argumenta. Quod igitur primo ad auctores illos Graecos attinet, iam supra §. IX. paucis respondi, in nullo medicorum Graecorum, hodie quidem superstitum, quantum mihi certe constat, in his ipsis haud plane hospiti, morbum Coeliacum ita descriptum deprehendi, quomodo nempe a CELSO hic factum; qui quippe asserere videtur, generatim quasi a Graecis medicis morbum istum a se descriptum, nominatum fuisse Coeliacum. Qui ergo, obsecro, isti fuerint Medici? forsan hodie plane interciderint? vt re vera multi interciderunt,

ab ipso laudati passim, et olim lecti. Mirum tamen omnino, quin et incredibile paene videtur, a nullo medicorum Graecorum, nobis adhuc relictorum, quibus tamen eos ipsos auctores, ad quos passim provocat ipse CELSVS, consulere licuit, ex iisdem, duplicem istum morbum coeliacum diuersae plane naturae, dum nempe vnus aluum nimis constringit, alter contra nimis relaxat, vsquam fuisse obseruatum. GALENVS enim, AETIVS, AEGINETA, ARETAEVS, ORIBASIVS, ALEXANDER TRALL. et praesertim CAELIVS AVREL. qui omnium exactissime de Morbo Coeliaco tractat, et ad ipsos quoque Medicos veteres graecos prouocat, ne verbo quidem ingentis istius discriminis, inter vtrumque istum Morbum Coeliacum, notatu tamen alioqui dignissimi, meminerunt. Vnde sane nescio, quomodo commode satis hic defendi possit CELSVS. Ad alterum vero defensionis momentum, de incuria scribarum, tanto facilius nunc responderi potest. Peccare potuisse, et saepius quoque re ipsa peccasse, praesertim in Inscriptionibus capitum, ignaros rerum iuxta et verborum Librarios, ipse plus semel expertus, lubens largior: Ast hoc certe in loco, id ipsum mihi vix verisimile videtur: aut enim scripserint κοιλιακός, aut κολικός, quum tertium hic vix detur: nulum enim alium noui morbum, qui aut ipsa voce graeca, aut ipsa re, aptius huc conueniat, quam quidem κολικόν, aut κοιλιακόν: quoniam scilicet hic describitur Morbus infimi ventris et intestinorum, qui inde aut κολικός esse debet, aut κοιλιακός: Non potest autem esse κοιλιακός, ob descriptionem prorsus contrariam, vt supra multis probaui; ergo potius esse debet κολικός, cui nempe ista definitio Celsiana longe melius aptiusque conuenit. Sed haec haecenus! quae tamen cuncta ill. MORGAGNI splendido arbitrio, summa cum veneratione, subiicimus.





DISSERTATIO MEDICA VNDECIMA.
DE
PINGVEDINE CEV SVCCO
NVTRITIO SVPERFLVO.

HIPPOCRATES
LIB. DE
CARNIBVS.

ΕΓΩ ΚΟΙΝΗΣΙ
ΓΝΩΜΗΣΙ ΧΡΕΟΜΑΙ
ΕΤΕΡΩΝΤΕ ΤΩΝ
ΕΜΠΡΟΣΘΕΝ ΑΤΑΡ
ΚΑΙ ΕΜΕΩΤΤΟΤ.

LECTORI
SI QVIS FVTVRVS
S
DAN. WILHELM. TRILLERVS.

De pinguedinis ortu et vsu, agit haec mea Dissertatio, quae tuo iam iudicio submittitur. Ortum e primis oeconomiae animalis ita deduxi principiis, ut, nisi mihi valde, quod absit! blandiar, nec omnem diligentiam desiderare possis, nec iudicium aliquod. De vsu autem, aut certe vsibus, quos tradunt, aut fingunt varii Auctores, nimis, nonnihil dubitavi, et etiamnum dubito, non nouitatis quodam, sancte testor, pruritu; sed unico potius veritatis studio:

Si illud, quod volumus, eueniet, gaudebimus,

Sin secus; patiemur animis aequis.

Ferebat quidem animus, huius speciminis loco, exhibere tibi, quod de Heroum Homericorum Vulneribus dudum conscripsi, Schediasma chirurgico-criticum, de quibus nemo, quod equidem sciam, hucusque seorsum egit. Sed quum illud et criticum nimis, et quod praecipuum, paullo videretur spissius; consilium interea mutavi; nondum tamen prorsus abieci, si

*modo blandior fauoris tui adspirauerit aura *). Stili phaleras, aut cothurnum nec quaeres in his leuibus pagellis, nec inuenies: Scripsi enim, quae intelligerentur, non quae legerentur tantum: Veritatis res agebatur, non venustatis. Haec te nolui latere. Sed*

Non hic te carmine ficto

Atque per ambages et longa exorsa tenebo.

Hinc legas, velim, et iudices, immo etiam, per me quidem licet, ubi opus forte fuerit, seuerius notes. Scripsi Halae, A. O. R. CIO IDCCXVIII. D. August. II.

DE
PINGVEDINE CEV SVCCO NVTRITIO
SVPERFLVO.

§. I.

Ex pingui quadam substantia generamur et formamur; est enim semen secundum diuinum HIPPOCRATEM, *Lib. de Genitura*, τῆ ὑγρῆ τοῖς ισχυρότατον καὶ τὸ πῖότατον ^{a)}; Pingui quodam liquore nutrimur in tenera adhuc aetate, nam lac, quod tum ex mammarum haurimus fontibus, est ex eiusdem fenis mente, τὸ πῖότατον ἀπὸ τε βρωτῶν καὶ τῶν ποτῶν ^{b)}: Post, ubi per aetatem solidiores adpetere licet cibos, succo nonnisi pingui, ex ipsis chylicationis ope, expresso sustentamur, augemur, crescimus ac valemus, prout in sermonis demonstrabitur progressu: sic nempe idem HIPPOCRATES alio loco ^{c)}, sicut ille olim a me per coniecturam forsan haud plane improbabilem, quod et ZWINGERVM ex parte subodoratum fuisse postea didici; Πῖον τὸ ἐκ σαρκὸς, πῖῶδες τὸ ἐξ αἵματος κατ' ἐξ ἄλλης ὑγρασίης. Πῖον

^{*)} Sed eheu! omnis fere periit labor. In variis enim itineribus, et crebra per vitam, locorum et habitationum mutatione, plurima istius opusculi pars aut per incuriam deperdita fuit, aut per malitiam surrepta. Sed facilis iactura.

^{a)} *Lib. de Genitura.* In gratiam τῶν ἀνελλήνων hic et in seqq. ubi graeca occurrunt, addam versiones. *Humidi robustissimum et pinguiissimum.*

^{b)} *de Pueri Nat.* *Pinguissimum de cibis et potibus.* ^{c)} *de Aliment. extrem.*

Πίον τροφή ἄλκιμος. Πίον τροφή φλεβός, ἀρτηρίας^{d)}. Dum autem pingui illo et oleoso nutrimur succo, ac per eundem crescimus, naturae eo non tendit labor, ut pinguescamus; sed ut potius sufficienti carne induti, commode et libere viuamus. Videtur ergo pinguedo ista vberior et exsuperantior, quae in animato conspicitur corpore, naturalis non esse, sed ceu superfluum nutrimentum, quodque a natura partibus nutriendis commode adglutinari haud poterat et hinc, quantum nempe commode fieri potuit, foras expulsus, omnino consideranda. Hoc quod nec temere nec audacter statuatur, *Specimine* hocce *Inaugurali* ut vocant, breuiter, at sufficienter, nisi fallor, a me demonstrabitur: Cui conamini ut eruditi faueant, enixe rogo atque obtestor.

§. II. Ut vero hoc negotium ordine tractetur, atque ex ipso ut aiunt, fundamento eruatur, differendum nunc esse video cum de Nutritione corporis animati, tum de Nutrimeto ipso. His enim rite explicatis, sua sponte elucebit, quousque mea tendat meditatio, quantumque ponderis habeat aut roboris. Postquam ANDRY, LEEVWENHOECKIUS, MALPIGHIVS, DV HAMEL, BORELLVS aliique sagaciores solertioresque naturae mystae argumentis sat grauib, ipsaque cum ex ratione, tum autopfia petititis, euicerunt, animalium nutritionem et augmentationem secus fere non fieri ac vegetabilium, quae in seminibus suis etiamsi minutissimis v. g. papauere, sinapi, cerasi nucleo etc. stupendo quodam et humanas cogitationes excedente propemodum modo, effigiata et in compendio quasi delitescencia, per humorem ex terra

d) Quumolim πύον et πυῶδες nullo paene legeretur sensu, πύον et πυῶδες, substitui, item ἄλκιμος loco τῷ ἔλκεος itidem forsitan vitiose scripti. Versio haec est: *Pingue ex carne, pingue ex sanguine et ex alia humiditate, pingue nutrimentum generosum, pingue nutrimentum venae et arteriae.* Sed vid. tamen huc HESYCHIUM, voce πύον, et inprimis FOESIVM, in *Oecon.* sub eadem voce, item SCHENK. de *Natura Lactis*, Art. III, 2. pag. 85. Ceterum verò circa ipsam mutationem vocis

ἔλκεος, in ἄλκιμος, adhuc nonnihil dubius haereo: Forte non inepte hic legendum σκέλεος, praefertim, quum saepius in Vett. Codd. confundantur σκέλεος, et ἔλκεος. Sed praestat hic ἐπέχειν, quoniam forsitan absconditus quidem ipse HIPPOCRATIS sensus hoc quidem loco, latere potest; quod sane non mirum, quia hic ipse de *Alimento*, Liber propter miram et singularem βραχυλογίαν, mera paene et δυσνόητα aenigmata in se continet, ut Lectori manifestum.

terra ipsis adpropriatum ^{e)} blandumque solis calorem, rupto repagulo s. cortice, extenduntur, sicque in altum latumque, porriguntur: Dubium paene nobis superest nullum, quod illud dogma admittere vetat, quod et illustrissima aevi nostri ingenia defendere non erubuerunt; statuimus nimirum inde cum illis, foetum delineatum iam suisque partibus artibusque instructum latere in femellae ovario, immo distinctius, ouulo, ita tamen, ut motu ille careat ^{f)}; tamque tener sit ac parvus, ut omnem omnium oculorum eludat aciem: simul ac autem ab aura maris plastica spirituosissima fuerit adflatus, hincque in peculiarem quendam motum adactus et actuatus, post per tubas sic dictas Fallopianas in vteri cavitatem abactus; tunc accedente chyloso nutrimento, primo pauciore, ratione tenelli ouuli, post paulatim auctiore, ut recte adnotat HIPPOCRATES ^{g)}, illum incipere augeri h. e. extendi, adeo ut facilius conspici queat et contrectari ^{h)}. Sic supra laudatus LEEVWENHOECKIUS ⁱ⁾ ex ouilla matrice foetum quondam exemit dierum septendecim, omnibus suis membris et visceribus perfecte instructum, licet octauam pisi partem proportionem ille haud excederet: sic et ipse HIPPOCRATES, siue auctor libelli *de Aetate*, inter Hippocratea vulgo relati, foetum humanum septem tantum dierum se vidisse testatur, qui in aquam coniectus sicque explicatus omnia membra habere repertus est, quam sententiam M. quoque VARRO adprobavit, ut ex A. GELLIO docemur: taceo in praesenti,

e) De quo eleganter differuit HIPPOCRATES *Libb. de Nat. Pueri*, item *iv. de Morbis etc.* qui et ipse ait, ubi homines vegetabilibus simillimos esse, abunde demonstravit, τὴν φύσιν πᾶσιν παραπλήσιον ἔχσαν, τῶν τε ἐκ γῆς φεομένων, καὶ τῶν ἐξ ἀνθρώπων, *Naturam omnem consimilem esse et Vegetabilium et hominum*; qualia etiam apud ARISTOTELEM et GALENUM MYSONIVMQVE etc. leguntur.

f) Vnde non inepte dixit ARISTOTELES de *Gen. An. L. v, I.* eum pri-

mum dormire, somnoque immersum sensu motuque carere.

g) *de Nat. Pueri.*

h) Hinc et ARISTOTELES egregie marem dixit foetum viuificare ipsique animam quasi et motus principium inde re, femina subministrante tantum materiam, de *Gen. An. L. II. IV.* quod et SCALIGER propugnat contra CARDANVM *Exercit. CCLXVIII.* Vid. maxime ALMELOVEEN *Amoen. Theol. Philol. pag. 143.*

i) *Arcan. Nat. Part. I. pag. 164.*

fenti, quae CL. BRENDÉLIVS^{k)}, et, quem ille allegat, Ill. BERGERVS obseruarunt in hanc rem, stupenda plane fidem paene omnem superantia: sufficiat iam prioris viri doctissimi allegasse dissertationem^{l)} *de Embryone, in ouulo ante conceptionem praeeistente.*

§. III. Haec igitur auctio, haec inquam extensio in vtero materno inchoata, et ad exactum partus usque tempus sensim continuata, continuatur post maiori nisu, quum foetus exclusus liberiori exponitur aeri, hincque citatiorem sanguinis inchoat circuitum; et perficitur demum, vbi natura metam attigit sibi a summo Creatore praefixam, id est, vbi ad adultam aetatem homo peruenit, quod post aliquot viginti annorum decursum fieri solere asserunt. Est scilicet unicuique sua mensura suumque pondus^{m)}, ad quae vbi peruentum est, sine detrimento altius assurgere nequit naturae operantis conatus. Hinc perfectam illam, quam dixi, aetatem THUCYDIDES vt et PLATO vocarunt *κατ'ετησίαν constantem*, vt vertit TULLIVS, teste GALENO, et qui ad illum prouocat, FOESIO: et HIPPOCRATES illosⁿ⁾, qui in ea sunt constituti, *κατ'ετηκότας, consistentes, haud amplius crescentes*, quos et ex eodem capite rectissime dixit *ἐν πορώτατα νητέιν φέγειν*^{o)}, de quo infra pluribus. Huic autem mensurae, h. e. corporum extensioni absolum est limites ponere, imo in ipsum Creatorem naturamque iniurium. Quidam in longum porriguntur adeo, vt portentosum quid habere videantur: alii e contrario adeo depressi sunt atque exiles, vt pygmaeorum esse possent nepotuli: multi etiam, iique fere plurimi, medium magnos inter paruosque obtinent locum. Sed hos omnes
perfecta

k) N. A. P. III. c. x.

l) §. xxv. pag. 38.

m) Nisi forsitan Nili incolam crocodilum velis excipere, quem quamdiu viuit, in longum crescere ferunt quidam apud PLINIVM L. VIII, 25. add. AELIAN. *Hist. Animal. Lib. xvii. cap. 6.* item PLVTARCH. et alios veterum: quod

et illustris confirmat THEVENOTVS *Itiner. Orient. P. I. L. II. c. 72.* alique plures scriptores, hodoeporici praesertim, vno ore animoque affirmant.

n) *Aph. I, 12.*

o) *Facillime ieiunium sustinere*: ceterum miror, hunc locum ab interpretibus, paucos si exceperim, secus fuisse explicatum, quod obiter noto.

perfecta autumo habere corpora, modo iusta gaudeant membrorum symmetria ac proportione; haec enim si adfuerit, nemo mihi vel ἀγρία φύλα γιγάντων, vt HOMERVS canit^{p)}, i. e. ingentis staturae homines, nec pumiliones h. e. homunciones et hominum quasi compendia monstra esse persuadebit: sicuti nec arbusculas humilesque myricas, nec sidera ferientes abietes protinus pro naturae errantis aut languentis operibus habere conuenit: Videatur praeter HIPPOCRATIS de A. A. et L. librum^o), ELSHOLT. in Anthropometria, et beatus meus parens, IO. MAVRIT. TRILLERVS, de Vsu proportionis in mundo, item de Statura longa personarum illustrium. Quomodo vero haec fiat extensio, paullo infra dicam.

§. IV. Postquam igitur homo iustam suam mensuram, ad quam acquirendam plurimum sane requirebatur nutrimenti, perfecte explevit, amplius augeri siue expandi nequit; ἀλλ' ἔστηκεν ἀτρεμίζον τὸ σῶμα τῆς αὐξήσεως πυκνὸν τε ἐὼν καὶ ἀτρεκέες^{r)}, vt perbelle noster inquit dictator. Hinc nec tanto opus est alimento, quanto scilicet antea, quum adhuc cresceret; sed tantum ipsi saltim est necessarium, quantum ad refarciendum illud, quod vel per insensibilem transpirationem, vel saliuam etc. quotidie perditur. Id vero priorum impensarum respectu longe minoris videtur momenti, et nutritionis vix est perdignum nomine, vnde etiam notha quibusdam audit nutritio. Eleganter hinc THEODORETUS de nutritione verba faciens, inter alia ita ait: Οὗτο τὸ σῶμα τρεφόμενον ἐν μὲν τοῖς βρέφεσιν αὖξεται καὶ μηκύνεται

p) Odyss. VII. 202. Rusticae Gigantem nationes.

q) C. C. IX. c. X.

r) Lib. I. Diet. et de Glandul. pag. 421.

s) Sed stat corpus de augmento quiescens dum compactum est et consummatum. Vulgo legebatur ἀτρεγές, quae vox hic nihil significat. Ego legendum censeo ἀτρεκέες, quem in sensum saepius hac voce vsus est HIPPOCRATES. Nisi forte rectius et concinnius scribendum hic fuerit, vnica tantum demta litera ἀτρεγές, quod idem hic est ac πολυτρεγές: Sic enim acute scho-

liastes APOLLONII RHODII, Lib. III. pag. 190. b. Edit. Ald. ἀτρεγές, ἀντὶ τὸ πολυτρεγές, τὸ γὰρ α. νῦν ἐπιτατικόν, ὡς ἄξυλος ὕλη, Sed de hoc ipso controuerso et περιμαχίτῳ HIPPOCRATIS loco, nos proxime, cum Deo, plurima ad ipsum HIPPOCRATEM. Haec interim hic sufficiant. FOESI emendationes interea videri possunt in eius oeconomia sub ἀτρεγές, et ab aliis laudati: mihi certe illae nimis visae sunt durae et allegoricae.

t) Serm. III. de Providentia.

νεται καὶ εὐρένεται, καὶ πρόσφορον κατὰ βραχὺ προσλαμβάνει ὄγκον, ὅταν δὲ εἰς τὸ ὠρίσμενον ἀφίκηται μέτρον (de quo ante diximus) τηνικαῦτα τῆς μὲν αὐξῆς παύεται, τρέφεται δὲ μόνον^{u)}. Imo ipse HIPPOCRATES *Libb. de Diet. Nat. Pueri*, et alibi saepius distinguit inter αὐξῆσιν et τροφήν: adde inprimis auctorem definitionum medicarum GALENUM vulgo creditum, item PLUTARCHVM. Sed de hac re inferius agam pluribus: Iam ad ipsum progredior Nutrimentum.

§. V. De Nutrimento eiusque essentia, dictu est difficile, quantae Physiologos inter et Anatomicos lites fuerint motae: sanguis scilicet non omnibus pro commodo et adpropriato partium omnium nutriendarum sufficebat nutrimento, licet praeter HIPPOCRATIS, DEMOCRITI, PLATONIS, ARISTOTELIS, aliorumque veterum consensum fere vnanimem, ipsa illud suaderet, imo postularet ratio. Sanguis enim ex chylo paratus omnes habet qualitates et proprietates, quae variae variarum partium nutritioni commodè inferuire possint, quod omni alii succo, qualiscunque ille tandem sit, a natura denegatur, quum et ille ceu ad veram catholicamque nutritionem ineptus, a sanguine sit sepositus, in vnum alterumue tantum vsum. Adeo remotiora atque abstrusiora mortales quaerunt, propiora eaque certiora negligentes. Audiendi igitur non sunt GLISSONIVS, nec strenuus eius defensor CHARLÉTONVS, nec his consentiens CONSENTINVS, nec alii et Angli et Itali, pauci admodum, ET TMÜLLERO teste, eos sequuti, qui praeter sanguinem, quendam neruorum succum pro vero et efficacissimo corporis animati venditarunt nutrimento. Eorum enim argumentis, vtut prima fronte speciosis, sed non firmis, quoniam ipse ille succus nerueus, si quis nempe adsit, ipsi sanguini suam originem necessario debet, satis valide obuiam itum fuit a viris per vniuersum orbem clarissimis, BARTHOLINO, BAYLIO, BETTO, BOHNIO, BRVNONE, COLE, DEVSINGIO, ET TMÜLLERO, REGIO, RIVINO, STENONE, VERHEYENIO, WEDELIO, WILLISIO, aliis-

Pp 2

que

^{u)} Corpus sic nutritum in infantibus quidem augetur, et in longum latumque extenditur, et adaequatum paulatim assumit

pondus. Quando vero ad definitam peruenit mensuram, tunc cessat augeri et nutritur solum.

que pluribus, quos hic allegare tantum, non exscribere, mens est, quum eorum scripta nemini non sint, certe esse debeant, notissima. Potius cum iisdem, inprimis BOHNIO, ET TMÜLLERO, HARVEO et VERHEYENIO etc. adserimus, sanguinem arteriosum puta, corpusque vniuersum perenni alueo percurrentem, eiusque cumprimis partem serosam, seu gelatinosam et pinguem, HIPPOCRATI πείρησιν δύναμιν^{u)} vocatam, partibus nutriendis ceu aptam et adaequatam massam a natura impendi, quod et ipsa docet autopfia in iis praesertim subiectis, quae dum πολύσαρκα sunt atque subpinguia, ideoque succo nutritio adeo non indigent, in sanguine monstrant serum quoddam pingue supernatans, lacti fere simile, vt in anseribus, frumentaceis turundis diu pastis, obseruauit OLAVS BORRICHIVS^{x)}, cui aliud addi potest experimentum, quod apud WILLISIVM^{y)} legere licet. Videmus praeterea in corporibus fame emaciatis sanguinem et perpaucum esse tenuemque^{z)} et, quod inprimis huc facit, succo illo gelatinoso seu pingui destitutum, vt celeberrimus obseruauit BOHNIVS^{*)}, item BARTHOLINVS. Taceo alia. Verissimum ergo esse videtur, pingue sanguinis serum, h. e. quintam quasi chyli essentiam, Cambium veteribus Arabibus dictam, corpus animatum et nutrire, et apte nutrire posse.

§. VI. Dixi superius paullo, veram nostram nutritionem seu augmentationem fieri per extensionem: hic ergo demonstrandum restat, qua ea fiat ratione. Extendi iam incipimus in materno vtero, de quo supra actum: Haec autem extensio cum ea comparari haud potest, quae tunc demum incipit, quando foetus in liberiolem protrusus aerem, organisque chylicationi inseruientibus ita fuit instructus, vt iis vti possit commodè^{a)}, et maiore demum naturae peragitur conamine, in tenello, vt dixi, luci publicae exposito, et per os alimenta sua auide

hau-

v) *Pinguem potentiam.*

x) *Hermet. Anti-Conring. L. I. c. I.*

y) *Anat. Cerebr. c. xx.*

z) Quod quidem CHARLETONVS, BORELLVS alique in dubium vocant;

sed a DIEMERBROECKIO variis exemplis fuere refutati.

*) *Progymn. VII. sub fin.*

a) Quod non ab initio, vt DEMOCRITVS et EPICVRVS apud PLUTARCHVM *Pl. Ph. v, 16.* putarunt; sed vltimis

hauriente; post in ventriculo et intestinulis digerente, digestaque in sui augmentationem impendente. Videtur autem hic mihi succus ille nutricius, quem et in vtero, et postea ex nutricis mammis imbibit tenellus, sufficiens non esse ad corpus eius, quod quidem per illius adfluxum sensim sensimque extenditur, consolidandum, illaque, quae per illam extensionem patefcunt, interstitia et variae figurae angulos porosque ad suam forte, vt ita loquar, *aquositatem* apte complendum^b). Nam dum et mater et nutrix de eodem succo participant nutritio, priusque fere nutriuntur ac ipse quidem foetus et infans: vna cum succo alibili multas particulas aqueas minusque tenaces ad ipsos remeare credo. Huic meae subitae meditationi ansam dederunt caro infantum succulenta et quasi spongiosa, ossiumque substantia vt plurimum cartilaginea. Fieri ergo tum demum perfectam nutritionem, hoc est, extensionem cum consolidatione simul, coniicio, quando pueri solidiores cibos, per dentes comminutos, aut his deficientibus, per gingiuas attritos, adsumere possunt, sui que iuris sunt ita, vt de ipsorum alimen-

P p 3.

to

vtimis potius gestationis mensibus, contingit, vt post HIPPOCRATEM de Carn. §. VIII. certatim probarunt Viri maximi BACKIUS, BARTHOLINVS, BOHNIVS, CARTESIUS, COITERVS, HARVEVS, EVERARDI, SPÖNIVS, DIEMERBRÖECK, HARDER, GASSENDVS, HEISTERVS, HOFFMANNVS, SCHOOCKIUS, SEGERVS, VELTHUSIUS, VERVLAMIUS, VESLINGIUS alique, praesertim autem et data opera, STALPART. VAN DER WIEL, *Observat. extrem. pag. 327. sqq.* et maxime in Exercitat. de *Nutritione foetus*, ibid. add. et nouissime *Tentamina Med. Edinburg. Vol. I. Sect. 13. p. 221. sqq.* item Dissertationem de hoc ipso difficili et ambiguo argumento, Wittebergae, ante aliquot annos, publicatam. Nuperime accidit, vt mercenarii cuiusdam in vicinia, vxor infantem partu satis enite-

retur difficili, cuius funiculus vmbilicalis a putredine totus fere erat exesus: Hic impossibile fuisset, vt vixisset, nisi aliunde, quam per funiculum illum, ipsi suggestum fuisset nutrimentum. Similem fere Historiam mirandam enarrat ROMELIUS, in *Misc. Natur. Curios. Dec. II. Ann. VII. Obs. 209.*

b) Simile notat HIPPOCRATES de Plantis, quarum et generationem et nutritionem cum natura humana exacte conuenire, fusius edisseruit, vt supra iam me obseruare memini. Putat nimirum *Lib. de Nat. Pueri §. xxii.* eas, priusquam adolescant & firmas agant radices, tenui tantum et aquoso nutriri nutrimento: tunc vero, vbi solidiores fieri inceperint, ἐκ τῆς γῆς ἔλκειν ἐκέτι ὕδαρες, ἀλλὰ παχύτερον καὶ πιώτερον καὶ πλεόν, *ex terra non amplius aquosum attrahere nutrimentum, sed crassius, pinguius et copiosius.*

to nemo participet amplius, tunc enim τιοαῦτα ἀμφιέννυται τὰ παῖδια, οἷά περ οἱ ἄνδρες ^{c)}), vt magnus ait HIPPOCRATES alia licet de re: nec nostrae inepte prorsus dicunt mulierculae: *das Milch-Fleisch muss ihnen erst wegfallen.*

§. VII. Haec autem, de qua dixi, consolidatio concipi fere nequit, quam per durabilem aptamque interstitiorum et angulorum modo dictorum repletionem, inde et eleganter ALCMAEON apud PLUTARCHVM ^{e)}), dixit embryonem seu corpus ἀναλαμβάνειν ὥσπερ σπογγιὰν τὰ ἀπὸ τῆς τροφῆς θρεπτικά ^{f)}). Necessaria ergo erat massa, quae nec rigida nimis esset, nec fluida nimis ac aquea, sed media potius inter vtramque, i. e. succus, vt VERVLAMIVS loquitur, *subdurus, subpinguis* aut *subroscidus*. Quum enim rigida esset et minus flexilis, haud commode insinuare sese poterat in interstitia illa, quae ratione varii fibrillarum flaminumque plexus flexusque, suppono nunc coniformia, quadrangularia, triangularia, rotunda etc. nec iis apte inhaerere: si fluida nimiumque flexilis, metus suberat, ne eadem illa interstitia per lubricitatem suam relinqueret vacua et incassum pertransiret, quod tabidorum inprimis testatur sanguis serosior iusto et aquosior, vnde et vera deficit nutritio. Nulla igitur ad condensationem seu completionem massa erat aptior, quam subpinguis et gelatinosa. Haec enim per flexilitatem, cuiuscunque figurae replere poterat spatium, et per tenacitatem eidem apte satis et firmiter adhaerere atque adglutinari, demumque accedente inprimis calore, et ex hoc enata coctione et agitatione, in corpus conuerti solidum, ita vt illi tandem, cui adhaesit, parti omnino euaderet similis, quod vno verbo alimenti physiologi vocant ὁμοίωσιν siue *assimilationem*, magno ipsis facem praeferente HIPPOCRATE, qui et alibi vocem ἀλλοίωσιν vsurpat, i. e. *permutationem* succi nutritii in ipsam, cui inhaesit, partem, sensu nihil plane differente. Quod autem pingui et chyloso succo animata nutriantur corpora, eleganter quoque illustris VERVLAMIUS ^{g)}) demonstrat experimentum,

quo

c) His inuestiuntur pueri, quibus viri.

d) de Octimestr.

e) Pl. Pb. v, 26.

f) Veluti spongiam imbibere ex alimento particulas nutritias.

g) Silu. Silu. Cent. VII. 678.

quo omnem paene carnem minutim dissectam vitro membrana clauso inditam et aquae ebullienti per sex septemue horas impositam, in pinguem quandam gelatinam h. e. in sua primordia, resolui posse docet: cui simile est, quod de struthione refert THEVENOTS^h), qui captus et per tempus agitatus volutatusque penitus tandem in butyrosam quandam liquefit materiam (solis remanentibus capite ossibusque), quam Arabes *Mantegue* vocant: quo de mirando experimento tamen me non alibi quidquam legere memini: interim tamen sancte illud affirmat auctor, ceu a se quidem ipso non visum; ast pro certo tamen acceptum ex relatione fidei innumerorum paene hominum auctoritate grauissimorum, et hinc fide dignissimorum. Ego vero hic prudenter ἐπέχω. Vt illud iam omittam, quod WILLISIVS in eandem rem habet *Cap. xx. de Cerebri Anatome*, superius allegato.

§. VIII. Haec alimenti ὁμοίωσις et interstitiorum repletio durat, quousque corpus crescit, i. e. quousque extendi potest, vt saepius dictum: quod ad pubertatis vsque annos contingere magnus adserit BOHNIVS: certe ad aliquot viginti praeter propter annos. Quibus acquisitis, desinit omnino corpus in longum latumque extendi atque amplius augeri, quum nulla supersint interstitia, nullusque sit ὁμοίωσις locus. Interim vero nihil detrahitur nutritioni: eadem immo et maiori alimentorum fruimur copia, licet haud amplius crescamus. Et quamvis nutritione carere non possimus, ad statum illum extensarum partium integrum conseruandum, partesque ipsas, quibus per insensibilem transpirationem, vehementiores motus etc. etc. multum quotidie decedit roboris, quod *Sanctorii Medicina statica* accuratissima lance trutinat, dum eae quasi arescunt, liquore illo generoso et efficaci perfundendas et irrorandas: Videtur tamen plus quotidie post expletum scil. accretionis terminum, elaborari succi nutritii, quam corpori nostro reficiendo opus est.

§. IX. Atque sic sua sponte, vt supra dixi, ipsam, ad pinguedinem deducimur. Ea nimirum est superflua illa succi nutritii portio, et hinc vix vllam ad corporis perfectionem et integritatem requiri credo

h) *Itiner. orient. P. I. L. II. c. xxv. pag. 224.*

do pinguedinem, siue ea sit *radicalis*, siue *secundaria*, vt MOLINETVS et ex eo MAIOR ⁱ⁾ distinxerunt apud BARTHOLINVM ^{k)}. Dum enim succus nutritius largo quasi flumine ad corporis propellitur partes, ibi autem ipsi, vt dixi, locus non conceditur ob corpus iam auctum et completum; transfudat ille per carnis poros, et vbi locum nactus est commodum, praesertim in membranis, ibi adhaeret, et dum augetur indies et sensim quasi solidescit, i. e. dum faculi illi et vtriculi oleosa substantia turgidi arctius sibi inuicem imponuntur, sub massa quadam albicante siue flauesciente oleosa comparet, quam *pinguedinem* adpellare collibitum fuit ^{l)}. Hoc vt probeamus, ad ipsos statim prouocamus pingues et obesos, qui inediam facillime ferre solent et possunt, ex nulla alia, opinor, ratione, quam quod natura ex superfluo hoc succo nutritio siue pinguedine, illud retrahere quasi vel resorbere potest, quod ad amissum nutrimentum, et augmentum restaurandum sufficebat. Tale exemplum recenset TH. BARTHOLINVS ^{m)} de puella quadam. Prouocamus porro ad ipsa quae saginantur, animalia bruta, ea enim quo pinguiora, eo pauciora adsumunt alimenta: Immo haec ipsa hunc in finem iusto copiosiore et lautiore infarciuntur nutrimento, vt pinguescant, i. e. vt superfluous succus nutritius pro palati delicati desiderio, carnem sub pinguedinis forma obducatur atque inuestiat. Videmus praeter haec in morbis pinguedinem in nostro saepissime deficere corpore: Nam quia per materiam, vt loquuntur, peccantem, seu motus in nostra machina contrarios, quos morbum vocamus, chylicationis aequae ac nutritionis

i) *Anat. Ref. L. I. c. 3. p. 24.*

k) Nullam enim radicalem dari ipse fatetur BARTHOLINVS I. supr. c. qui eam ad membranas potius referendam censet, quales in embryonibus pinguedine destitutis: secundaria multo minus est naturalis, vbi scil. successu temporis, superflua succi nutritii copia membranarum illarum foveolas et cellulas occupat easque implet atque extendit etc.

l) Atque sic iterum vel in hocce pas-

su, analogum quid nobiscum habent vegetabilia, quae supra iam allegavi. Lacrimae enim et gummi, quae saepius plorant et exsulant, non tam excretiones, vt multi putant, quam succi nutritii nimii per radices adscendentis exuberantiae sunt, quod et recte adseruit summus VERVLAMIUS *Hist. V. et M. ad Art. IV. §. 7.*

m) *Hist. Anat. c. III. LXXXVIII.*

tritionis plerumque impeditur negotium ; illud, quod in oeconomia animali superfluum erat, reuocatur quasi et retrahitur, quo ipsum aliquo saltim modo sustentetur et refocilletur corpus, de quo paullo infra distinctius n).

§. X. Haec argumenta, vt maiorem apud eos inueniant fidem, quibus forte hoc meum paradoxum videbitur assertum, firmabo iam aliquot et veterum et recentiorum Auctorum testimoniis. ARISTOTELIS o): Πιμελήν ἐστι αἷμα πεπεμμένον δι' εὐτροφίαν, καὶ τὸ μὴ καταναλισκόμενον εἰς τὸ σαρκῶδες μόριον τῶν ζώων p) quod et idem bis repetit Lib. I. de Animalium Generatione: Auctor medicarum definitionum apud GALENUM: Πιπελήν ἐστὶ παρῆγχυμα τροφῆς περὶ τὰς ὑμένας μάλιστα πηγνυμένη, ἀναίσθητος q). Potissimum vero huc spectat eximius ille locus ex *Introductione anatomica Anonymi graeca*, maximam quidem partem, ex ipso ARISTOTELE desumpta, et a nobis quoque Notis illustrata, cap. v. pag. 10. ἡ δὲ πιμελή, ὅλως ἐκ ἐστὶ φύσει, ἀλλ' ἐπίκτητον, καὶ ἔκ τῶν ἀναγκαίων μερῶν: *Pinguedo autem, absolute loquendo, non est res propria Naturae, sed aduentitium quiddam, et inde minime ex partibus corporis necessariis: vbi vid. Obs. nost. pag. 12.* PHILIPPVS MELANCHTHON r) ex veterum sententia: *Pinguedo quaedam est humiditas superflua ex bono sanguine redundans.* VERVLA-MIVS s): *Pinguedo nihil est aliud, quam exuberantia alimenti, ultra id, quod excernitur, aut perfecte adsimilatur.* His addo ETTMÜLLERVM t), Medicum, dum fata sinerent, vndiquaque celeberrimum: *Pinguedo, inquit ille, non est proprie e partium solidarum numero, quin potius per acci-*
dens,

n) Non nescio, aliam plerumque huius rei dari rationem, nempe intensum in morbis calorem citissime absumere pinguedinem, vtpote dissipatu facilem: HIGHMORI inprimis aliorumque, qui eum sequuti, hoc est commentum, a VERHEYEN tamen recte in dubium vocatum *Anat. Tract II. c. IV. conf. BERGERI Physiol. cap. xv. pag. 229.*

o) de Part. Animal. L. II. c. 5.

p) *Pinguedo est sanguis coctus et inspissatus propter nimiam nutritionem, quique in carneam animalium partem impendi nequit: siue illud, quod in partium nutritionem consumi non potest.*

q) *Pinguedo est affusio nutrimenti circa membranas maxime fixa, sensus expers.*

r) Lib. de Anima. f. 94. b.

s) H. V. et M. ad Art. XVI. §. 2. p. 253.

t) Physiol. c. II. §. 9.

*dens, ex abundantia succi nutritii, post auctioris annos, membranis adhaerere et sensim adfixa coagulari (pro earum vel humectatione, vel blando subiacentium partium-fotu) videatur, unde nec propriam circumscriptam a se continet figuram, et nunc augetur, nunc diminuitur, vbi et SEBIZIVM Lib. de aliment. facultat. v. allegat. Inprimis eiusdem doctissimi viri legi mere-
tur dissertatio de Corpulentia nimia, quae Octava est, vbi multa quae huc faciunt, lectu dignissima, maxime autem quum ita concludit: Adeo, ut dicendum videatur, pinguedinem per accidens ex abundantia succi nutritii et chylosi, sub et post augmentationis annos generari, membranosis locis adhaerere, et intra sua membranosa receptacula pedetentim dilatata in-
clusam successiue coagulari. Vno nomine, esse quasi oleum uberius, aut po-
tius butyrum densius, firmitus paullo inspissatum et coagulatum etc. etc. ut
taceam hic elegantem eius demonstrationem, qua nimirum ratione chylosus ille succus nutritius superfluous, ob spatium ipsi interne dene-
gatum, et a fibris carneis sanguine inuestitis occupatum, per mem-
branas elastica virtute praeditas, exsudet, iisdem adhaereat et coagu-
letur. Conferri quoque possunt SENNERTVS, item CAECILIUS
FOLIVS, qui de generatione et vsu pinguedinis elimatum compo-
fuisse dicitur Tractatum, a laudato ET TMVLLERO eodem loco, ut
et BARTHOLINO allegatus, alique plurimi. Et sic facile dirimi
poterit lis illa notissima, num pinguedo pars sit corporis solida, an
vero fluida; nam dum ea et adesse potest et abesse, ad neutram cen-
seo referendam; nisi eam vocare malimus *accessoriam*; hoc enim no-
men ipsi, si quid iudicem, reuera competit. Interim tamen pingue-
do, in se spectata, fluida potius est, quam solida: licet enim compa-
cta et solida videatur; suae tamen originis ratione, et dum ipsi san-
guini prius innatat, et ex eodem separatur, liquida omnino est. Sicut
ipsum Butyrum solidum durumque corpus, ad tempus, esse videtur,
gelida praesertim hyeme; soli tamen aut igni propius admotum, pro-
tinus liquefit et in sua primordia fluida, lactea et oleosa resoluitur.
Oleum quoque ipsum ideo non desinet esse fluidum, licet rigido ge-
lu*

lu condensetur et in solidum quasi corpus ad tempus, mutetur. Quin et liquidæ undæ et currentia flumina, atque ipse humida vina manebunt semper fluida, quamvis ista asperriimo frigore, in rigidissimas et durissimas crustas testasque, ad instar saxi, obrigescant; hæc vero, hyperboreo præsertim sub axe, securibus quoque sæpius caedantur, de quo vid. VIRGIL. *Georg. Lib. III.* et OVID. in *Libb. Trist.* et *ex ponto.*

§. XI. In eo igitur omnes fere conspirant vnanimiter, pinguedinem superfluam succi nutritii esse copiam: et nihilo tamen minus iidem adferunt, eam esse naturalem et ad varios in corpore animato vsus a natura destinatam. Quod sane postulatum, non dicam paradoxum, videtur haud adeo paruum. Quidquid enim superfluum, illud non est necessarium; quod vero necessarium non est, impedimento potius esse videtur, quam emolumento: et ipsa natura, quæ secundum magnum HIPPOCRATEM *) *δικαιότατη*, h. e. accuratissima, et *iustæ* symmetriæ ac proportionis est obseruantissima y), omne nimium respuit ac superfluum. Quum vero post cuticulæ cutisque remotionem in omnibus fere subiectis pinguedinem Anatomicorum inueniret solertia; eam naturalem et ex propriis corporis partibus esse putarunt, licet alibi, vt iam monui, superabundare adfererent. Sed ipsos illos, quos pinguedini adscribunt, vsus breuiter lustrare et examinare animus fert. Horum enim plurimi ita sunt comparati, vt rite non videantur auctores distinxisse inter succum illum chylosum, vel, vt aliis loqui placuit, butyrosu, quatenus illæ massæ sanguineæ innatans, partium *πῆξις*, vt loquitur HIPPOCRATES, h. e. nutritioni pri-

Qq 2

mariae,

x) de *Fractur.*

y) Sic recte hanc vocem explicant PALLADIUS, EROTIANVS, GALENVS, HESYCHIUS, SVIDAS, THYCYDIDES, veterumque alii, quod contra Cl. CLERICVM noto, qui eam *moraliter* interpretatur; quod aduersus mentem est HIPPOCRATIS, vt alibi demonstrabo distinctius: vbi et illum qui

CLERICVM temere sequutus, et hinc in HIPPOCRATEM summe iniurius, in viam reducam. Quod et statim, anno post, nempe 1719. abunde nisi fallor, luculenterque præstitimus, in Libello apologetico, satis, opinor, noto, de HIPPOCRATE *Atheismi falso accusato*, contra Nicol. Hieron. Gundlingium.

mariae, item et secundariae seu earundem irrorationi, impenditur, et quatenus peculiare extra corporis limites occupat spatium. Quantum enim ad prius, largior, pinguedinem improprie sic dictam suos praestare usus eximios, dum ea scilicet nutrit et auget: proprie autem sic dictae pinguedini illos adscribere admodum dubitamus, prout mox patebit ex vñsibus illis iam cum nostra ἐπιρρίσει recensendis.

§. XII. Primo *pinguedinem illam*, quam inter integumenta corporis naturalia et propria haud opportune referunt, *impedire nimiam dicunt transpirationem*. Sed qui pinguedinis texturam eiusque particularum globosarum contiguitatem non continuitatem considerauerit, quam iidem ipsi omnes fere admittunt; statim videt, eam transpirationem non impedire, quam potius eidem liberum relinquere exitum. *Secundo* aiunt *pinguedinem partes subiectas calefacere atque fouere*: sed nec hoc stringit, nam nostri corporis partes externo illo fotu indigere non videntur, quum celerrimus iste et perennis sanguinis calidissimi per easdem circuitus ipsas interne satis foueat blandoque calore adficiat; praeterea et ipsi cuti et membranae carnea siue panniculo, vt in brutis audit, carnosio, illud, si necessum, committi poterat officium. *Tertio*, *pinguedo frigus impedire dicitur, quo minus interiora versus penetret*: ad hoc responderi potest, quod ad prius iam dictum; nam per porosam satis pinguedinis substantiam libere penetrare possunt rigida frigoris spicula: saepius quoque, non obstante egregio pinguedinis vmbone, obriguissē, notum est, obesiora corpora; quin et pingua animalia v. g. vñsi, porci, glires etc. hiemis tempore sua latibula frigoris metu, aequē quaerunt, ac ea pinguedine quae destituuntur: Nec frigus profecto pinguedinem vt perforet, opus habet, quum facilius longe ipsi concedatur aditus per fauces et primas sic dictas vias. Idem statuendum, quum *Quarto* adserunt, *calorem impedire pinguedinem, ne ille penetret*: radii enim solares facillime sese insinuant, imo ipsam illam quodammodo resoluunt pinguedinem, quod sudor abunde emanans manifesto testatur. Nec *Quinto*, necesse est, vt *pinguedo partes vnctuositate*, vt ferunt, *lubricet, easque ad motum hinc aptiores reddat*, nisi eatenus hoc intelligatur,

tur, quatenus particulae illae oleosae et pingues cum sanguinis Euri-
po, per totum corpus disperguntur, vt supra monui: alias enim mo-
tus fiunt ab intra; quid ergo pinguedo ab extra poterit conferre?
praeterea ossa habent suam medullam suaeque vasa ad eam tendentia,
succumque nutritium deferentia, et articuli succum suum siue mucum
motibus optime inferuientem, teste HIPPOCRATE nostro^z); vt adeo
commode carere possimus externa illa pinguedine. *Sexto* perhibent,
pinguedinem interstitia implere adeoque habitum reddere leuem ac venustiore:
vid. huc b. BERGERI nostri *Physiol. Cap. xv. pag. 230.* vbi plura. Et
hic solus mihi videtur vsus, quem habere potest, si quem habeat, pin-
guedo; hoc ipsum tamen caro etiam praestare potest succulenta et
plena; nec est, quod vetulas hic allegent et silicernia, in quibus omnes
subsidunt partes exsuccae tonoque suo naturali priuatae, et tota in vni-
uersum, ob virium defectum, cessat viuacitas. *Septimo, nec puluinaris*
ad instar et propugnaculi contra ictus et compressiones pinguedo, vt com-
mentantur *esse potest*; quum potius eo facilius penetrent ictus ob de-
negatam natura pinguedini elasticitatem, quam nemo ipsi poterit ad-
struere. *Octauo, pinguedo sales aliasque acriores particulas tanquam vincu-
lum coercere* creditur; neque id iniuria, quatenus ea sanguini innatat;
simulac autem ceu superfluum quid fuerit eiecta, cessat omnino et hic
vsus, quem et MALPIGHIO, eius auctori, dubium iam fecit BARTHOLINVS;
cuius etiam, vt id obiter hic inferam, vasa, quae fingit,
adiposa, non sine ratione destruxere VERHEYEN et RIVINVS alique.
*Nono, de omento vt plurimum pinguedine inuestito, statuunt, illud ven-
triculi iuuare coctionem ipsumque fouere, et hinc eo exciso, flatus oboriri et*
ructus etc. Sed hoc omentum praestare potest, si praestet^a), non
qua pingue, sed qua omentum est glandulis suis vasisque donatum,
quod DEMOCRITVS τὸν κύριον ἀπάσης κοιλίης, totius ventris vocauit
dominum: et ipse de hoc vsu dubitare videtur VERHEYEN, inprimis

Qq 3

autem

z) Lib. de Lec. in Hom.

a) Scrupulum enim iniiciunt exempla

a FORESTO atque RIOLANO allega-

ta, quae citat BARTHOLINVS *Anat.*
Ref. L. I. c. VIII. p. 66.

autem excell. RIVINVS in nupera, *de Omento* exercitatione, vbi novam plane de illius vsu fouet opinionem. *Decimum* argumentum levissimum sane est, quum putant, *pinguedinem natiui caloris esse pabulum, flammamque vitalem. ceu oleum ellychnii, conservare.* Diu enim iam est, ex quo flamina illa vitalis Willisiana, Helmontiana, Holstianaue, per ignea nostri saeculi ingenia extincta fuit, hincque et illius pabuli vsus vel sponte in fumum abit et auras: Nec raro ii citius extinguuntur, quibus multum suppeteret istius pabuli ad illam sustentandam. Nisi ita illud velimus interpretari, quod substantia illa pinguior et oleosa, quae corpus auget et nutrit, de qua haecenus dictum, dum vitalitatem praestat, vitae sit nuncupanda pabulum. Sed maioris videtur momenti *Undecimum*, quando hariolantur, *naturam providam succum illum nutritium superfluum sub pinguedinis forma ideo foras protrudere, quo deficiente forsan alio ordinario alimento, habeat, unde corpus suum quodammodo possit sustentare et recreare,* quod et supra adseruimus: sed nobis natura mechanice agit ad summi HIPPOCRATIS mentem, nec a LIPSIO, GASSENDO, BOYLEO, CLERICO, DOLAEQ, GVNDLINGIO etc. hac quidem in parte intellectam, vt alibi ostendam, libello nempe *de Atheismo* HIPPOCRATIS, ipsi falso imputato, de quo iam supra, non quasi prudentia quadam sit instructa, multo minus quasi ipsa sit anima rationalis, vt recentiorum quidam haud circumspecte postulant; ideo fieri secus non potest, quam vt, deficiente alimento ordinario, ab aluente sanguine particulis illis nutritiis i. e. pinguibus orbato, hincque acriori et ad rapiendum quid de pinguedine, aptiore, illud abradatur in nutritionem, quod erat superfluum. Hi sunt, quantum scio, illi vsus omnes, saltim plurimi, quos pro defendenda pinguedine ceu naturali et necessaria, allegant Anatomicorum principes; quibus tamen haec quae haecenus dicta sunt, breuiter et decenter regerere visum fuit. Iam ea quae forte restant, ad finem properantes, consideremus.

§. XIII. Vfus igitur perexiguos corpori nostro praestat, vt vidimus, subcutanea illa pinguedo, de qua potissimum hic fuit sermo: nec eos curaremus adeo, modo eadem non ferale saepius foret

ret puluinar, corpusque nostrum fouendo, vt aiunt, plane suffocaret. Scilicet ea est pinguedinis conditio, immo malignitas, vt accedente quotidie succi nutritii superflua copia noua, indies augeatur illa et attollatur: cutis enim, cui substrata est, ratione suae sese expandendi virtutis, facillime eidem cedit, hinc et obseruante apud BARTHOLINVM, VESLINGIO, plerumque laxius ipsi inhaeret; vnde in immensum prope accrescere commodè admodum potest, vt exempla legere est apud BARTHOLINVM, PÉCHLINVM, TIMAEVM AGULDENKLEE, TVLPIVM, SCHENCKIVM, MARCELLVM DONATVM, PLATERVM aliosque. Immo non extra carnis musculosae peripheriam sese tantum prodit illa tot malorum genitrix; sed et internas corporis partes et viscera saepissime occupat. Sic in thorace pulmonibus imposita, abundare visa fuit BARTHOLINO^{b)} toties allegato: renes saepius ita eidem fuere immerfi, vt illos vix inuenire licuerit, vti apud eundem legitur: adglutinat se cordis basi, immo, quod etiam vidimus, cono seu cuspidi, quin et in ipsis cordis thalamis adiposa frustula oblonga lumbricorum instar, vidit BARTHOLINVS^{c)}, qui et alibi ex SPIGELIO, RIO LANO IESSENIoque adnotauit, totum cor nonnunquam adipe plane fuisse occultatum, ita vt illud adstantibus deficere visum fuerit. De Polypo infra dicam: de Omento supra iam dictum fuit: Ipse praeterea muliebri vidi ouarium, pingui substantia seuque aemula turgidum, quod accuratius dudum delineauit b. NABOTH, in Diss. nota de *Sterilitate Mulierum* §. XI. nobis vero olim monstrauit b. SCHACHERVS, praeceptor venerandus: Alia iam non attingo, quae medicorum obseruationes larga quasi manu suppeditant. Nisi igitur aut per dietam tenuem et parcam, aut motus et exercitationes crebriores, vigilias, aut opportuna Venere, (de quibus praeter HIPPOCRATEM^{d)}, PLV-

TARCHVM

b) H. A. C. II, 15.

c) H. A. C. v, 7.

d) Hic in Libro de *Dietâ salubri*, concise pro more, at neruose, regulas praescribit, quibus rite obseruatis, pingue

corpus iterum redigi potest in gracile. Verba latine hic adscribam, ne nimia graeca nauseam pariant lectoribus: *Pingues inquit et qui graciles fieri volunt, omnes labores ieiuni facere debent, et cibos assu-*
mere

TARCHVM aliosque, eleganter egit CAELIVS AVRELIANVS^{e)}, vt recentiores, ex quibus supra aliquos allegavi, taceam, huic hosti sensim vires adquirenti obuiam eatur, eique illis, quos dixi, modis remora iniiciatur, quo minus maiorem excrescat in molem, quam machina ferre potest corporea; i. e. *ultra naturae modum*, vt CAELIVS loquitur modo allegatus; vita sane mortalium in nouaculae, vt aiunt, posita est acie. Dum enim graue pinguedinis pondus venas, arterias, nervosque vna cum musculis, insigniter comprimit, et spirituum in nervos influxus sufflaminatur, et circulus purpurei liquoris retardatur, et muscoli tono suo priuantur, vid. memorabile huius rei exemplum in Ceto, apud AELIAN. *Lib. II. de Nat. Animal. cap. 13.* inde repentini et atrocissimi morbi et inexorabiles mortes, scil. paralyfis, apoplexia, dyspnoea, asthma, carus, coma etc. Cuius Calamitatis insigne exemplum in Dionysio Heracleota, pinguedine, plane monstruosa et enormi onerato, exacte descripsit ATHENAEVS, *Lib. XII. Dipnosoph. cap. 12. pag. 549.* item laudatus AELIANVS, *Lib. IX. Var. Hist. cap. 13.* vbi vid. *Not. Varior.* in Edit. Gronouiana. Add. PLIN. *Lib. XI. Hist. Nat. cap. 38. pag. 632.* et ibi HARDVIN. item VARRO, *Lib. II. cap. 4. de Re Rust.* Sed plura de obesis, eorumque periculis et calamitatibus, vid. apud DIETERIC. *Iatr. Hipp. pag. 944. seqq.* In sequiori sexu potissimum in pinguedinem prono δυστομία, immo et saepe ἀτεχνία teste HIPPOCRATE *Lib. de Sterilibus; de A. A. et L. et alibi:* simili quoque modo in ipso nobiliori sexu τεχνοπείαν nimia impedit pinguedo, vt adserunt AVICENNA, LAVRENTIVS, ET TMVLLERVS contradicente licet TIMAEO a GULDENKLEE. Huc etiam refero protuberantias illas monstruosas, quae externe propendentes mortales adeo deformant, v. g. Melicerides, atheromata

mere anhelantes adhuc ex fatigatione, et vinum bibere dilutum nec valde frigidum, et obsonia ex sesamis, aut condimentis hortensibus huiusque generis aliis sibi praeparare: sint autem pingua quae offeruntur obsonia: sic enim impleri poterint a quam

paucissimis. Sed et semel in die cibum sumere et illotos manere, et strata dura habere et nudos deambulare ipsos oportet, quantum huius fieri potest. maxime.

e) Morb. Chron. L. V. c. XI.

atheromata, steatomata, fungos et id genus alias, vbi sebacea quaedam inest substantia: insigne steatoma a se feliciter abscissum insignis exhibet PECHLINVS^{f)} in obseruationibus. Nec reticendus hic est Polypus sic dictus cordis, qui in venas atque arterias suos letiferos ramos spargit, vt iconem repraesentat saepius laudatus BARTHOLINVS^{g)}: is enim ad plurimorum mentem, ex gelatinosa quadam et pingui sanguinis substantia ortum ducit, quibus maximam quidem partem merito accedimus, licet celeberrimo aliud sciamus visum MALPIGHIO^{h)}, illud coagulum substantiae, si qua natura estⁱ⁾, sanguinis filamentosae ac fibrosae adscribenti: Nec illos moramur, qui nunc ex pituita, nunc ex crudo quodam humore a iecore cordi suppeditato, polypos oriri crediderunt, ab aliis quippe et ipso etiam MALPIGHIO refutatos.

§. XIV. Sed haec fere sunt, quae de pinguedine, tanquam parte corporis superflua et non naturali, in medium adferre libuit, immo per angustos Dissertationis, quibus includimur, cancellos licuit. Longe plura, non nego, poterant dici, quaedam etiam quae dicta sunt, vberius illustrari et explicari, nam pinguis aderat, vt ita loquar, materia cum de Nutritione, tum de Nutrimeto ipso, de quo tot olim et nunc quoque lites. Ideo haud metus omnis abest, vel de hisce pagellis subito natis, et subito quoque forsan perituris, iure mihi a quopiam occini posse illud Virgilianum:

Eheu! quam pingui macer est (tibi) taurus in aruo.

Lectorem autem, quem supra iam alloquutus sum, item et Auditorem meum, quem iam alloquor, Valere iubeo, mihi que, vbi pinguius aliquanto meum fuerit ingenium, vt ignoscant, rogo.

En instabiles ac mutabiles rerum humanarum vices! Haec ipsa macra mea de Pinguedine Dissertatio, prima omnino esse debebat in hac

f) L. III, 46. adde BARTHOL. H. A. C. I, 23.

g) H. A. C. III, 17.

h) Diff. de Cord. Polypo.

i) Legi potest celeb. BOHNII Pro- gymn. XIII. pag. 169. item BERGERI nostri physiol. et HOFFMANNI Opp. Med. Tom. III. pag. 278. sqq. Ceterum

de diuersae Naturae polypis, vid. GOHLII Tractat. Berol. 1710. et IOACH. GOETZE, Spirae 1764. inprimis autem ill. MORGAGNI incomparabile opus nouissimum de Sedibus et causis Morborum Tom. II. add. et, si placet, poem. nostr. Tom. II. pag. 218. et Tom. IV. pag. 595.

hac quidem *Sylloge* nostra; et tamen nunc est vltima. Primus enim locus ipsam decebat, non ratione quidem ipsius praestantiae et doctrinae, quae ipsi nempe deest; sed ratione potius temporis atque aetatis. Post illam enim priorem meam Dissertationem, *de Moly Homero*, Lipsiae 1716. publicatam, omnium est prima, quae ad summum in Medicina dignitatis gradum rite consequendum, Halae 1718. publice a me habita ac defensa fuit, sub praesidio quidem splendidissimo immortalis nunc HOFFMANNI: quo singulari honore etiamnum, in ipsa fera canaque senectute, vehementer utique laetor glriorque. Si igitur res mei solius arbitrii fuisset; hanc ipsam iuuenilem opellam ex censu reliquarum Dissertationum paullo curatius ac solidius, nisi fallor, elaboratarum, libentius expunxissem. Imperiosae vero nonnullorum amicorum preces me, inuitum licet ac reluctantem, eo tandem adegerunt, ut locum ipsi in hac *Sylloge* concederem quidem; sed vltimum ex merito nempe suo. Ita igitur istam hic denuo sisto, prout ea ante hos 50 fere annos a me conscripta, aut rectius, subito effusa fuit, paucis tantum hinc inde additis, et paucioribus inutatis; ut scilicet eo certius exinde cognoscerent aequi probique Lectores, quantum aut quantillum interea temporis in Medicina excolenda aut profecissem, aut forte defecissem. Nec indignabuntur spero, si me semel forsan hic cum dissensu audiant balbutientem, quum saepius alibi cum assensu audiuerint loquentem. *Sed serus venit usus ab annis.*



OPVSCVLORVM
MEDICORVM

PARS ALTERA

COMPREHENDENS

EXERCITATIONES MEDICO-
PHILOLOGICAS

ET

ALIA SCHEDIASMATA.

OPUSCULUM
MEDICORVM

DE
VIRIBUS
EXERCITATIONES MEDICAE
PHILOSOPHICAS

AD ACADEMIAM



EXERCITATIO MEDICO-PHILOLOGICA PRIMA.
DE
VETERVM CHIRVRGORVM
ARVNDINIBVS ATQVE HABENIS
AD ARTVS MALE FIRMOS CONFIRMANDOS
ADHIBITIS OCCASIONE LOCI CVIVSDAM
SVETONIANI OBSCVRRISSIMI IN VITA AVGVSTI
OCCVRRENTIS.



Apud Veteres Auctores Graecos et Latinos, vnicos illos solidioris et elegantioris doctrinae limpidissimos fontes, complura sane passim occurrunt Loca, quae Medicis lectu scituque vtilia et iucunda sunt, et ab iis fere solis explicari possunt, et vbi deprauata forsan fuerint, emendari commode debent: Id quod plurimis luculentis exemplis ac testimoniis dudum ostensum ac probatum fuit a Medicorum Eruditissimis, HIERON. MERCVRIALI, MARSIL. CAGNATO, IAC. DALECAMPIO, IO. LANGIO, ADR. IVNIO, LINDANO, IAC. TOLLIO, PETR. PETITO, CASP. HOFMANNO, ANT. VAN DALEN, CAROL. DRELINCVRTIO, VELSCHIO, FOESIO, ALMELOVEENIO, QL. BORRICHIO, GESNERO, WEDELIO, THOM. BARTHOLINO, ipsiusque filiis doctissimis, item ZWINGERIS, SPONIIS, PATINIS, MEIBOMIIS, CHIFFLETIIS, et qui hos omnes immensa

fere variae eruditionis copia, ingenio vasto et iudicio acerrimo longissime superat, THOM. REINESIO, Germanorum Gloria et saeculi miraculo; et nostra demum aetate, a MEADO, FREINDO, WIGANO, HERINGA, SAMVELE IEBB, BERNARDO, ut plures alios iam taceam longa serie dudum, merita cum laude, commemoratos a GEORG. FRANCO, in *Epist. de Medicis philologis*, item IAC. BURCKHARDO, in *Tract. de Medico grauissimo Humanitatis studiorum Vindice*, IO. HENR. A SEELEN, V.C. in *Meditat. Exeget.* CHRIST. FRID. WILISCHIO, *Comment. de Medicis, literarum humaniorum doctrina praestantibus*, et nouissime a Cel. LOESCHERO, aliisque. Verissime enim et sapientissime quondam scripsit eruditorum princeps, IOS. SCALIGER, *Epist. XIX. Lib. I. Homines, qui sine bonis Literis Medicinam tractant, esse similes iis, qui in alieno foro litigant.* Nos quoque ipsi, si tamen parua hic magnis componere, Lectorum pace, liceat, haud ita pridem passim id ostendimus in nostris *Observationum Criticarum Libris*, aliisque scriptis hucusque diuulgatis. Quibus iam vnum adhuc locum singularem e SVETONIO petatum adiicere fas sit, qui post tot praeclarissimorum interpretum et editorum egregias curas, Medici tamen adhuc cura et emendatione, me quidem iudice, vel maxime indigere videtur.

Iste autem legitur in *Vita* maximi Imperatorum, OCTAV. AVGVSTI, *Cap. LXXX.* his nempe verbis: *Coxendice, et femore, et crure sinistro non perinde valebat, ut saepe etiam inde claudicaret: sed remedio harenarum et arundinum confirmabatur.* Quem quidem memorabilem SVETONII locum ad Medicos in primis atque Chirurgos pertinere; nemo, opinor, Eruditorum erit, qui facile ea de re dubitauerit. Inde sane non mirum, omnes fere Interpretes, quotquot equidem vidi, hunc perobscurum et ambiguum locum commode explicare haud potuisse, vtpote rerum medicarum prorsus ignaros et ab Apollineis sacris alienos. Primarii enim SVETONII Explanatores, LAEVI-
NVS inquam TORRENTIVS atque ISAACVS CASAVBONVS, Viri cum singulari cura et veneratione dicendi, quibus et accedit ipse MERCVRIALIS, *Lib. V. de Arte Gymnast. Cap. XII.* ut et AVSON.

POPMA, ad *Caton. de R. R.* CLX. in folis illis Arundinibus scite exponendis, mirum quantum aestuant, vel ad ipsam incantationem magicam prouocantes, Arundinum ope, quondam administratam, atque a CATONE et PLINIO, *L. XVII.* commemoratam; merito tamen reiectam ac explosam a THOM. REINESIO, Viro maximo, *Lib. II. Var. Lect. Cap. XVIII.* Nimum autem interea sunt securi de Harenis, in quibus tamen loci huius obscuritas, immo vitium, latet potius, quam in Arundinibus, vti mox paullo luculentius, spero, patebit. Quomodo enim quis membra male firmus atque luxatus, *Harenarum Remedio*, confirmari possit; equidem ignoro, et ignorant forsitan mecum omnes Medici Veteris Chirurgiae haud imperiti: qui insuper haud facile comprehendunt, quo nempe pacto hic Arenae calidae cum Arundinibus apte et concinne coniungi potuerint. Plurimus quidem Arenae calidae aut feruidae olim erat vsus apud priscos Medicos, vt ex CORN. CELSO, CAELIO AVRELIANO, PLINIO, THEODORO PRISCIANO aliisque affatim constat: Nouimus quoque exinde sat bene, quid sint ψ αμμισμός, ἀμμοχωσία, item ὑπεκκαύματα, seu ὑποκαύματα, vt et πυγίαι, πυγίηταις, παροπλήσεις, et ἀφιδρώσεις διὰ ψάμμου, apud GALENUM, AETIVM, DIOSCORIDEM, AEGINETAM, et alios, item τῇσι ψάμμοισι ἐγκαλινδέσθαι, apud ARETAEVM, (vnde *Celadium* obscure formauit CAELIVS AVRELIANVS, *Lib. V. de Morb. Chron. Cap. XI.*) qua de re notissima inter Medicos eruditos egregie hic egit IS. CASAVBONVS, vt et HIERON. MERCVRIALIS, THOM. REINESIVS, LAVRENT. IOVBERTVS, inprimis autem ANDR. BACCIVS, *Lib. II. de Thermis, Capp. XVII. et XVIII.* atque GEORG. GREENIVS, *de Rusticat. Romanor. Cap. VIII. pag. 713. Tom. I. Thesaur. Nou. Antiquit. Roman.* per SALLENGRE, vt alios iam taceam. Verum et hoc simul probe scimus, Arenarum istarum calentium non alium fere olim fuisse vsum, nisi ad extrahendos noxios et tenacius haerentes in corpore morbofo humores, v. gr. in Hydrope, Leucophlegmatia, Anasarca, Elephantiasi, Scabie humida, Lepra, aliisque morbis pituitosis et ex inutili humore abortis, qui nempe sic per ingestas affatim membris torpentibus turgentibusque Harenas

nas illas calidas, excoquendus et euocandus esset: quale olim in fluxis nimiumque humidis Scytharum Nomadum, seu multiuagorum corporibus, sola vstione factum fuisse, scite obseruauit HIPPOCRATES noster, *Lib. de Aere, Aqua et Loc. p. 355.* qui et *Lib. de Vitu Acut. pag. 277.* sal, milium et furfures torrefactos in eundem vsum sapienter commendat. Inde nunc bene CELSVS *Lib. III. Cap. XXI.* de Hydropticis: *Euocandus est sudor in arena calida, vel Laconico, vel Clibano, conf. Lib. II. Cap. XVII.* vbi bis occurrit, item et AVL. GELLIVS, *Lib. XIX. Noct. Att. Cap. VIII.* Liberatum esse se aquae intercutis morbo diceret, quod Harenis calentibus esset vsus: SYMMACHVS quoque *Epist. 45. Lib. VIII.* ita de se ipso; *Humor noxius, articulis illapsus, etiam nunc me tenet lectulo, et vix littorali siccitate tenuatur.* Vbi illa littoralis siccitas, paullo obscurius dicta, idem omnino est, ac Harena littoris sole ignita, in isto loco CAEL. AVRELIANI, hic mox sequenti. CAEL. pariter AVRELIANVS, *Lib. III. de Morb. Chron. Cap. VIII. pag. 473.* *Ex Harena Littoris sole ignita torrenda Hydropicorum corpora,* apud quem et in sequentibus, istarum feruentium Harenarum mentio frequentissime recurrit; SERENVS quoque SAMONICVS, *Cap. XXVII.* de iisdem: *Nec non et tepidis conuolues corpus Arenis.* PLINIVS denique, *Lib. XXI. Cap. VI.* omnium optime: *Nec non Arena Litorum Maris, praecipue tenuis et sole candens, in Medicina est siccandis corporibus coopertis Hydropicorum, aut Rheumatismos sentientium.* Ad quem singularem PLINII locum plura eiusmodi loca e DIOSCORIDE, CELSO, CAEL. AVREL. THEODORO PRISCIANO aliisque peropportune in eruditis Notis, allegauit HARDVINVS, quibus commode addere liceat, quae eandem in rem, docte et copiose ad supra laudatum SERENI SAMONICI locum, adnotarunt GABRIEL HVMELEBERGIVS, ROB. KEVCHENIVS et PETRVS denique BYRMANNVS: Nec praetermittenda hic omnino doctissima B. SCHVLZII, amici quondam nostri, nunc desideratissimi, *Dissertatio, de antiquis Hydropis curationibus,* cum ceteris, qui idem argumentum dudum tractarunt. Praecipue vero huc tota spectat et hinc conferri omnino meretur *Epistola illa gratulatoria Auctoris sub Literis A. D. latentis, ad DRESIGIVM,*
Lips.

Lips. 1735. de usu Arenae externo, in curandis quibusdam morbis, praecipue ad illustrandum illum Symmachi locum, Lib. VIII. Epist. XLV. in qua nempe istud ipsum de Arenis calentibus, aut candentibus argumentum diligenter, docte ac copiose pertractatur, vt ex amplissimis Excerptis vberius intelligere licet, quae in Commercio med. et litterario Norimberg. de ann. 1735. pag. 185. sqq. cum voluptate leguntur. Sed quid haec omnia, obsecro, ad claudicantem hic AVGVSTVM, qui arida potius, exsucca atque enervata habebat femora ac crura; quam noxio humore turgentia, aut mucida pituita resoluta: vnde rectius saepe ungebatur, deinde perfundebatur egelida aqua, vel sole multo calefacta: quia nempe calida fomenta non proderant, vti infra mox narratur, apud nostrum SVETONIVM Capp. LXXXI. et LXXXII. Cur igitur

Auxilium Membris calidas infudit Arenas?

vt de Antaeo, alio quidem sensu, ait LVCANVS, Lib. IV. Pharsal. Nihil ergo ipsi prodesse hic poterant arenae calidae; quin potius nimium exsiccando, condensando, constringendo, et, vt cum SENECA loquar, rigidando, plurimum ipsi adhuc nocuissent, si nempe praepostero mali Medici consilio forsan vsus, eas intempestiue adhibuisset: quod tamen illum nunquam fecisse, mox liquidius, opinor, apparebit. Mihi enim vix dubium, quin insignem illam crurum femorumque debilitatem et claudicationem contraxerit olim AVGVSTVS ex acceptis potissimum vulneribus atque luxationibus, quas supra Cap. xx. ipse sic descripsit SVETONIVS noster: Vna acie, dextrum genu lapide ictus: Altera autem. et crus et utrumque brachium, ruina pontis, confauciatus. En veram nunc originem, nisi fallor, vnde ingrauescente inprimis senectute, crus femurque debilis adeo esset AVGVSTVS, vt saepe inde etiam claudicaret. Sustentaculo ergo atque fulcimine ideo opus vel maxime habebat, ne inter progrediendum, indecore labaret, nimiumque claudicaret. Illud vero in Arundinibus, aut arundineis virgis, tabulisque luxatis membris arcte adstrictis ac alligatis, ex solito nempe Veterum Chirurgorum more, apte inueniebat et commode; ἔδει γὰρ χεῖνσθαι τῇ διὰ τῆς σάνιδος πίλῃσει, vt scite loquitur in hunc sensum PAVLLVS AEGINETA, Lib. VI. Cap.

CXVIII. vbi de Coxendicis Luxatione tractat. Neutiquam autem in Arenis fragilibus et male cohaerentibus, vt supra iam ostendimus. Istaе igitur Arundines arctius pressiusque alligabantur femori crurique luxatis, aut fractis, per lora quaedam longa, lata atque tenacia, quae priscis Medicis Latinis vocabantur vulgo *Habenaе*, vti mox pluribus docebitur; item et *fasciae*, *lintea*, *lora*, *vincula*, et *ligamenta*, vt saepius apud CELSVM aliosque legitur. Quis ergo ex his statim non videat, legendum in posterum hic, in SVETONIO, sat probabili, credo, coniectura, esse: *Remedio Habenaarum atque Arundinum confirmabatur?* eiectis nempe plane arenis illis calentibus, aut potius, nimium hic frigentibus, ac siue iniuria temporum, siue incuria scribarum, perperam huic SVETONII loco illatis, vti haecenus liquido, vt spes est, ostendimus. Haec licet iam notissima sint; tamen aliquot locis praecipuis probare placet, quia de Habenis istis nemini Interpretum hic quidquam in mentem venit, excepto vnico forsan sagacissimo REINESIUS, qui tamen et ipse viam, qua ad veritatem iretur, vidit potius eminus, quam cominus calcavit. Ita igitur CELSVS noster *Lib. VIII. Cap. x. Membrum deligandum ferulaeque superaccommodandae sunt, quae quum spatio laxentur, paulum Habenis suis coartari eas oportet; item, Cap. xv. Supinus homo collocandus, Fasciaeque, aut Habena, media ala circumdanda est; et Cap. xvi. Extendi per duas manus, interdum etiam Habenis adiectis, satis est; nec non Cap. xx. Si tenerius membrum est, satis est, Habenam alteram ab inguine, alteram a genu intendi, et paucis ibidem interiectis: Qui easdem Habenas ad valida bacula deligarint, et mox: Ab utraque parte axes sunt, ad quos Habenaе illae deligantur. Sed plura iam studio omitto in sequentibus passim occurrentia. Ex quibus nunc satis liquido, opinor, patebit, legendum hic, vt modo dixi, omnino esse: *Remedio Habenaarum, atque Arundinum*, leuissima nempe mutatione, et grauissima contra ratione, vt nemini non iam plenius, vti arbitror, constabit.*

Istaе autem Habenaе, quarum ope, arundines, seu ferulae, membris flaccidis, mutilis et luxatis, item et fractis, ad corporis firnamentum, secundum rectitudinem, seu κατ' ἰσυχίην, vel εὐδυσχίην, vt saepius

pius loquitur HIPPOCRATES, adstrictius alligabantur, Veteribus Medicis Graecis, HIPPOCRATI nempe, GALENO, AEGINETAE, PALLADIO aliisque, vocatae sunt olim, ἱμαντες, item ἱμάντια, et ἱμαντάρια, passim et ταινίαι, ὀθόνια, λαμπάδια, κειρίαι, φασκίαι, χειρόμακτρα, ρακία, et σφενδόναί, vt et ἐπιδέσματα et πέδαι, nec non apud AEGINETAM inprimis, *Lib. vi. Cap. cxxviii.* βρόχοι ὑφαντοὶ ἢ πλεκτοί, quanquam et haec ipsa quandoque diuersum quid significant: Recentioribus autem λῶρα, λῶροι et λῶρια, vt ex HESYCHIO, PHAVORINO, SVIDA, CONSTANTINO HARMENOPVLO aliisque clarius patet; de quo vid. MEVRSII atque CANGII *Glossaria Graeco-Barbara.* GALENVS autem saepius habet, τελαμῶνας, vnde bene HESYCHIVS: τελαμῶν, λῶρος, ἢ δεσμὸς, ἢ φασκία, quomodo et SVIDAS, et IVLIVS POLLVX, in *Onomast. Lib. iv. Cap. xxv.* et HIPPOCRATES in *Hippiatricis*, de quo plura SALMASIVS, ad *Flau. Vopisci Aurelian. Cap. iv. pag. 422.* et STEPH. LE MOYNE, in *Obsf. ad Varia sacra, pag. 301. sqq.* add. si placet, *Observat. nostr. ad Hug. Grotii Christ. pat. Tragoed. pag. 683. sq.* Ista vero ἱμάντια crebro occurrunt apud HIPPOCRATEM nostrum, in *Libris Chirurgicis*, de *Medici officina*, *Fracturis*, *Articulis*, et *Vectiario*, seu *Mochlico*, ex quo potissimum sequentia huc spectant, *pag. 874.* Ράβδοι τὲ σύμμετροι κρανίης καὶ μῆκος, καὶ πάχος, ὥστε διατείνειν, ἱμάντια δὲ ἐξ ἄκρων ἀμφοτέρωθεν ἔχοντα εἰς τὰ κρίκας ἐνδεδέσθαι. ὥς τὰ ἄκρα εἰς τὰς σφαίρας ἐντῆσιζόμενα διαναγκάζη. h. e. *Virgae autem corneae eam conuenientem tum magnitudinem, tum crassitudinem habeant, vt extensionem facere possint. Habenas vero utrinque in extremis finibus habeant, quibus ad annulos alligentur, ita, vt extremi fines orbibus innixi, vi cogere possint, (membra scilicet luxata,) quem locum, vt mille alia, CORN. CELSVS Latine verterat, vt ex superioribus constat.* Sed rursus HIPPOCRATES, *Libro de Fracturis, pag. 715.* Ἐπὴν δὲ ἐπιδέσης τοῖσι ὀθονίοισι, τὰς νάρθηκας περιδεῖναι χρὴ καὶ περιλαβεῖν ἐν τοῖσι δεσμοῖσι: *Postquam autem Habenis linteis deligaueris, ferulas, seu arundines, circumponere oportet, et vinculis circumdare.* Idem *pag. sq. 716.* Χρὴ δὲ ἐρεῖδεν τοῖσι γάρθηξιν πᾶν ἡσυχῇ, ἕτω τῇ γνώμῃ ἔχοντας, ὥς οἱ νάρθηκες φυλακῆς ἐνεκα, τῆς

ἐπιδέσιος προσκείμενται: Oportet autem ferulis, seu arundinibus, valde leniter firmare, hoc cogitantes, quod ferulae deligationis conseruandae gratia, apponuntur; non autem compressionis causa, alligantur. Qui sane locus inprimis huc spectare videtur, quoniam idem propemodum Graece dicit, quod supra Latine dixerat SVETONIVS. Quo et potissimum pertinet illud DEMETRII, seu quisquis fuerit Auctor, Lib. I. de Re Accipitraria, Cap. CXXXVII. pag. 145. Κάλαμον ξύσας ἐμμελῶς, καὶ τὸν ἐν αὐτῷ κόνδυλον ἐξισώσας, κύκλῳ περίθες τῆ ὀνίθος τῷ ποδί, καὶ περίδησον, ὥσπερ ἔθος ἐστὶ ποιεῖν ἐπ' αὐτῶν τῷ τοιῶτῳ πάθει περιπεσόντων. Arundo poliatur, et eius nodus explanetur, eaque circumligetur pes (luxatus aut fractus,) Accipitris, ut fieri solet apud homines ipsos, qui tale quidpiam patiuntur. Item Cap. CXLIII. pag. 145. Τὰ δυνάμενα δεξαπευθῆναι κλάσματα ἐπιδήσας νάρθηκι ἢ καλάμῳ ἐξίσωσον, ἢ τὸν πόδα, ἢ ἕτερον μέρος. Quae sanari adhuc possunt fracturae, ad ferulam, siue Arundinem alligandae sunt, ita nempe, ut pes, siue alia pars aequaliter extendatur et ad iustam Regulam exigatur. vbi et plura in sequentibus: Conf. VEGET. Lib. II. Artis Veterinar. Cap. XLVII. inprimis vero GALEN et PHOTIVM, in Lexico inedito, apud KÜSTERVM, in Not. ad Suidae Lexicon, Tom. II. pag. 413. et primo omnino loco, PAELLADIVM, in scholis ad HIPPOCRATIS Librum, de Fracturis, de quibus luculentissimis et praestantissimis locis omnibus, mox infra plura et accuratiora dicentur, in Exercitatione nostra altera. Sed iniiciendae nunc demum quasi sunt habenae his ipsis nostris Habenis effusis, de quibus nimirum satis, immo plus satis, haecenus differuimus: forsan haud imitati illum, apud Poëtam,

Qui foedere certo

Et premere, et laxas sciret dare iussus habenas.

Ideo etiam plura vbiuis locorum, inprimis autem apud GALENVM, in Comment. ad Libb. chirurg, HIPPOCRATIS, AEGINETAM, ORIBASIVM aliosque veteres medicos frequentissime obuia, de iisdem hic aduicere iam merito veremur. Pauca tamen, lectorum pace, de Arundinibus, SVETONIO quoque nostro commemoratis, hic subiungere adhuc liceat.

Ista nempe fulcimenta ac sustentacula lignea, seu arundinea, artubus luxatis, debilitatis et male locatis, habenarum ministerio applicata, quae Arundines hic vocat SVETONIVS, idem HIPPOCRATES, laudatis iam libris chirurgicis, ῥάβδς, saepissime nominat, item νάβ-
 θηκας, σανίδας, σανίδια, et φίλυρας, DIOSCORIDES autem σχίδακας, σχίζας et σχιδία, GALENVS denique, AIGENETA, et ORIBASIVS, item Scriptores Rei Accipitrariae, cum aliis, βακτήρια, ξύλα, κάνονας, καλάμους, κοντὰς, item σχινδαλμὲς, seu σκινδαλμὲς, vnde et Latini, vt VITRVVIVS, COLVMELLA, PLINIVS aliique fecerunt *scandulas*, seu rectius *scindulas*, de quarum recta scribendi ratione post TVRNE-
 BVN, PHILANDRVN, atque BALDVN ad VITRVVIVM, multa haud indocte disputant VOSSIVS et BECMANNVS in *Etymolog. et Origin. Latin. Ling.* WOWERIVS ad *Apulei*. MELCH. GVILANDINVS, *Lib. de papyro*, aliique: quo et denique ipsum nostrum vernaculum *die Schindeln*, de tenerrimis assulis ligneis, commode referendum videtur. CELSVS autem, CAEL. AVREL. VEGETIVS, aliique Latine eadem fulmenta vocant *paxillos*, *ferulas*, *baculos*, *baculaque*, *axes*, et *assulas*, item *tabellas feruleas*, *ferulas scissas*, et *sectiles laminas*, interdum et *regulas*: Scriptores tandem mediae et infimae Latinitatis, *Astulas*, *Asellas*, *Ascellas*, *Hastulas*, *Essoullas*, *Axegias*, *Baucas* et *Ferlas*, pro *Ferulas*, nempe, vt videre est suis locis, apud doctissimum et laboriosissimum CANGIVM, in *Glossario Med. et Inf. Latinitatis*. De Νάβθηξι autem, siue *Ferulis*, apud BODAEVM a STAPEL, ad THEOPHRASTI *Lib. VI. Hist. Plant. Cap. II. pag. 582.* et praesertim apud GALEN. *Comment. III. in HIPPOCRAT. Lib. de Officina Med. Text. XII. pag. 79. Tom. XII. Opp. per CHARTER.* item in sequentibus *Comment. in Libb. de Fracturis et de Articulis*, passim et apud AEGINET. *Lib. VI. Cap. XCIX.* et in *sqq.* Sed de his obiter tantum, et veluti in transcurso.

Illas autem Tabellas et Assulas firmandis male firmis membris quondam adaptatas, ex diuersa olim materie paratas et fabrefactas fuisse, ex frequenti veterum medicorum et chirurgorum lectione, cuius vis manifesto constat. Inde bene in hanc rem VIDVS VIDIVS, qui omnium optime de veteri chirurgia scripsisse videtur, *Lib. III. Chirurg.*

Cap. viii. vbi de ferulis, tabellis, furculis, et aliis eiusmodi fulcimentis, ex instituto tractat: *vocantur ferulae, quod ab antiquis ex ferulis conficerentur: commode etiam fiunt ex ligno leui, quod facile flectatur, ut ex salice, palma, harundine, pinu: commodissime nunc praesto sunt e fago etc.* vbi vid. plura in sequentibus: quibus inprimis addantur, quae doctissime hac de re differuit Medicus quondam praestantissimus IO. LANGIVS, *Epist. Med. LXXXII. Lib. i. p. 455.* Ita igitur *σανὸς φιλύγειν μὴ λεπτῇ*, hoc sensu occurrit apud HIPPOCRATEM, *Lib. de Articul. pag. 803.* et apud ATHEN. *Lib. xii. Cap. xiii.* ARISTOPHANES in *Auib.* pag. 605. Cinesiam *φιλύγειον* appellauit, *διὰ τὸ φιλύγας τῆ ξύλης λαμβάνοντα σανίδα συμπεριζώνυσθαι, ἵνα μὴ κάμπηται, διὰ τε τὸ μῆκος, καὶ τὴν ἰχνοῦτητα, quod tabella e tiliae ligno sumpta se circumcingeret, ne ob proceritatem et gracilitatem, corpus flecteretur.* De quo vid. ADR. IVNII *Adag. 76. Cent. viii.* KÜHN. ad POLLVC. *Onom. Lib. x. Cap. lii. Segm. 189.* item PERIZON. ad AELIAN. *Lib. x. Var. Hist. Cap. vi. pag. 652.* DILHERRI *Disput. academ. philolog. Tom. i. pag. 279.* KÜSTER. ad SVIDAM *Tom. iii. pag. 614.* et REINES. *Var. Lect. Lib. ii. Cap. v. et Cap. xviii.* Ita et GALENVS *Comment. ii. in HIPPOCR. Lib. de Fract. Text. 65. pag. 219. Tom. xii. Opp. Medici cuiusdam Pergameni meminit, ὅς ἐκ φιλύγῃ γεγονότας εἶχε πλείους τοιούτους σωλῆνας, qui eiusmodi canales complures habebat ex tilia confectos, ad crura nempe luxata aut fracta reponenda repertos.* Quemadmodum *tabula tiliaris*, apud CAELIVM AVREL. et *tabula tiliacea*, apud IVL. CAPITOLINVM legitur, de quo loco mox plura. *Virgarum salignarum* in eundem vsum adhibitarum meminit ALEXIS COMICVS, apud ATHEN. *Lib. xiii. Cap. iii. pag. 568.* et CLEMENT. ALEX. *Lib. iii. Paedagog. Cap. ii. pag. 218.* ex acutissima nempe SAMVELIS PETITII Emendatione, *Lib. vii. Miscell. Cap. ix. pag. 174. sq.* vbi et de hac re plura. Conf. NICOL. HEINS. ad OVID. *Lib. iii. de Arte Am. 273. pag. 675. Tom. i. Opp. per BURMANN. et HVG. GROTHII Excerpta e Tragoed. et Comoed. Vett. pag. 570. et ibidem in Not. pag. 972.* item IOS. SCALIGERI *Coniectan. ad VARRON. de Ling. Lat. pag. 56.* Sicut *Arundinum*, seu assularum arundinearum mentionem hic fecit

SVETONIUS: et supra DEMETRIVS τῶν καλάμων, quod idem. Narrat denique facetissimus LVCIANVS, in perquam lepidò Libello, Aduersus Indoctum, multos Libros coëmentem, prope finem, *p. 394. Tom. 11. opp.* imperitissimos Medicorum vanissimae ostentationis causa, in apparatu suo medico et chirurgico, inter alia plura splendida et pretiosa instrumenta, habuisse quòque ἐλεφαντίνες νάρθηκας, seu *eburneas ferulas*, aut *Tabellas*: quanquam id etiam de eburneis medicamentorum thecis, siue capsulis, explicari posse, me non fugiat. Quorsum et notissimae *Analectrides*, seu *Anabactrides*, *Anaplectrides*, aut *Anaclintrides*, aut *Anapectides* OVIDIANAE, *Lib. de A. A. 111.* forsan pertinere videntur; de quo tamen perquam dubio plurimumque Eruditos inter controuerso loco, alibi, spero, proxime, commodior dicendi erit occasio. Ceterum ad hunc nostrum Locum Suetonianum apprimè facere videtur illud, quod de ANTONINO PIO narrat IVLIVS CAPITOLINVS, *Cap. XIII.* *Quum esset longus et senex, incuruareturque, tiliaceis Tabulis in pectore positis fasciabatur, ut rectus incederet.* Vbi in Notis legi omnino meretur IS. CASABONVS, item REINES, *Lib. 11. Var. Lect. cap. 18. pag. 293. sq.* vt et CLAVD. SALMASIVS, in *Commentario*, ad TERTVLLIANI *Lib. de Pallio*, *pag. 336.* item DIETERICVS, in *Iatreo Hippocrat. pag. 395.* et PLATNERVS, *Dissert. de Thoracibus*, *pag. 7.* vbi tamen potiora et meliora ex ipsa antiquitate facile petenda, festinanter nimis omisit. Nempe ANTONINVS PIVS tiliaceis Tabulis utebatur, veluti AVGVSTVS hic arundinibus: et fasciabatur, scilicet per adstrictas Habenas, quas expressit hic liquidius SVETONIUS noster; reticuit autem IVLIVS CAPITOLINVS. Sed de his haëtenus. Verbo vero adhuc monere hic liceat, facillimum esse inter *haben*as, atque *haren*as, in scribendo, lapsum: id quod vel ille MANILII versus, *Lib. V, 191.* inter alia plura, confirmauerit, vbi vulgo legitur:

Sternere litoreis monstrorum corpora habenis.

Pro quo tamen omnino legendum esse, *harenis*, rectè ostenderunt Viri maximi, IOS. SCALIGER et THOM. REINESIVS, ipsa nempe
fana

fana ratione praemonente. Quam perquam frequentem inter *Harenas* et *Habenas*, confusionem et permutationem passim etiam obseruarunt, VOSSIUS, SALMASIUS, BARTHIVS, PASSERATIVS, RIGALTIVS, alique plures.

EXERCITATIO ALTERA EADEMQVE PLENIOR
AD QVENDAM SVETONII LOCVM IN VITA AVGVSTI

DE

REMEDIO HABENARVM
ATQVE ARVNDINVM,

IN QVA PROBABILIS ISTA EMENDATIO NOVIS
ARGVMENTIS VALIDE CONFIRMATVR, ET A
FRIVOLIS NVPERI CVIVSDAM ADVERSARII
OBJECTIONIBVS SOLIDE VINDICATVR.

Veteris illius dicti PETRONIANI veritatem, *quod non expectes, e transuerso fit*, vel hodie in memet ipso experior: quum mihi iam praeter omnem opinionem necessitatem impositam esse video, Coniecturam meam haud plane degenerem de loco quodam SVETONIANO ante annum, non sine eruditissimorum virorum applausu, publice propositam, defendendi, eiusque probabilitatem solidioribus argumentis circummuniendi. Omnia enim potius alia eredidissem, quam mihi litigiosa iurgia exoritura esse, ab isto praesertim auctore, cuius nomen mentitur potius ista contra me scripta Epistola, quam praefert, de quo mihi per longiorem consuetudinem omnium optime constaret, quantum in re inprimis critica et elegantioribus literis valeret, vel non valeret. Sed hoc nostro miraculorum aut portentorum feraci admodum saeculo, omnia nunc fieri posse condisco, fieri quae posse negabam. Nempe fiunt subito e Rhetoribus Consules, e Consulibus rursus Rhetores, e modicis Medicis magni Critici, ex ignavis ignarisque Graecae et Latinae linguae tironibus acutissimi Philologi, et vtriusque Linguae callentissimi Iudices et Interpretes, denique e quibusvis
nodosis

nodosis lignis teretes Mercurii. Sic orbis vertitur, tanquam mola, et semper aliquid portentosi facit, ut homines in alias prorsus formas mutantur, quam quas ipsis natura aut ingenium induerat. Sed nunc sine longiore ambage ad ipsam nostram, si placet, coniecturam, de qua iam nouae turbæ, ut dixi, nobis a male sedulis hominibus concitantur. Nimirum ista, simul ac nata atque edita fuit, perquam natiua sua facilitate et liquidissima luce, adeo usque confestim blande percusserat perstrinxeratque maximorum Virorum et acutissimorum Criticorum mentes oculosque, ut illa nihil verius, nihil certius excogitari potuisse, certatim et quasi e composito vbique profiterentur: ex quibus nominasse iam sufficiat bina illa praelustria artis nostrae lumina sideraque fulgentissima, RICHARDVM MEADVM ac GERARDVM VAN SWIETEN, ut taceam celeberrimos viros, MASCOVIOS, BERGEROS, HEISTEOS, HAHNIOS, BIANCONIOS, BERNARDOS, ALBERTIOS, HUNDERTMARKIOS, RICHTEROS, MENCKENIOS, HEBENSTREITIOS, REISKIOS, MENZIOS, FABRICIOS, LEISNEROS aliosque plures, quorum modum paene excedentia elogia ex ipsorum Epistolis hic referre, nec nostri est pudoris, nec tui forsan, mi Lector, iam otii, ista legere. His igitur praestantioribus

Malim conuiuis, quam placuisse Cocis.

Vnum tamen hic pace quidem, ut spero, tua, testimonium grauissimum producere liceat e literis Viri apud externos celeberrimi, Graece praesertim doctissimi, et scriptis variis eruditissimis inter felicissimos aevi nostri criticos iamdudum merito suo positi et notissimi; non quidem eum in finem, ut me friuola quadam in paruis ostentatione, temere efferam; sed potius, ut malignos et inuidos censores, nuper demum ad instar infelicis lolii subito exortos, eo validius reprimam, eorumque temerarios usus fortius retundam. En igitur ipsa Viri illius praestantissimi et ab omni foeda adulatione alienissimi verba: *Placuit mirum in modum certissima in SVETONIVM Emendatio, quam plurimis meis redemptam vellem; quaeque nemini, nisi qui omnem pudorem decoxerit, unquam displicere potest; neque dubito, quin Cl. ALBERTI merito sit demiraturus insignem tuam sagacitatem etc.* Idem ille rursus in alia Episto-

T t

la,

la, posteaquam iam foedus ille et deformis Aduersarii nostri foetus, infausto omine, in lucem prodierat: *Ex literis communis nostri Amici, didici temeritatem S. qui certissimae tuae emendationi oggannire non erubuit. Non putaram, quemquam tam vecordem fore, ut tibi hac in re contradiceret. Verum erit nemo, cui de meliore luto finxit Titan praecordia, qui insolentem istum prouocatorem non vituperabit. Placet tua Emendatio, ac placebit semper, quamdiu literis suis stabit honos, licet contrarium clamet ad rauim usque aduersarius tuus. Ego sane eam plurimis meis redemtam vellem. Ha-*ctenus ille vir longe celeberrimus. Quibus nunc, sed sine omni vana iactantia, adicere hic liceat, hanc ipsam nostram Exercitationem criticam eruditissimis beati Belgii viris adeousque placuisse, ut anno vix elapso, noua eiusdem editio, Amstelodami 1751. forma octaua, splendidissime prodiret. Ibidem, paullo post, hanc nostram emendationem cum insigni elogio, addidit nouae suae SVETONII editioni nitidissimae celeb. OVDENDORPIVS. Eandem quoque extra omnem dubitationem positam esse, benigne et generose iudicauit cel. REITZIVS, haud postremum sane literati Belgii decus, in Apologia, aduersus criminationes ANONYMI in *Miscell. Lips. pag. 41.* de quo rursus infra. Sed verecunde iam taceo plura eiusmodi inuidenda paene elogia, in variis eruditissimis scriptis passim hinc inde obuia, ceu doctis opinor, notum. Decoxerunt tamen, quis credere aufit, adeousque, omnem suum pudorem nonnulli maligni alienae laudis obtrectatores, suaeque solius clamosi praecones, ut ferio cogitarent de refellenda ista nostra feliciore coniectura, atque hinc nunc ringentes in circulis mussitarent, nunc ad amicos scriberent, sibi vel maxime istam nostram displicere Emendationem a pluribus licet probatam ac defensam, additis etiam minis, piis scilicet et quasi religiosis, si diis placet, sese cum Deo, separatim ostensuros, plures grauesque dubitandi rationes adhuc superesse, ob quas isthaec coniectura nullo plane pacto admitti posset: quasi vero leuicula haec res tanti esset momenti, quod Deus ipse in auxilium aduocaretur. Tristis autem paullo post euentus affatim docuit, inanes illas fuisse minas et iactanter tantum sonantes, fulgura ex pelui, cunctaque haec sine numine di-

vum,

vum, infeliciter prorsus coepta fuisse et agitata: ad instar enim Montis illius parturientis, et immanes quidem, inanes tamen gemitus cientis, exilem ac depilem tandem musculum pepererunt, magnaue et mira minati, extricarunt nihil quidquam, vt manifesto, spero, apparebit. Quum enim ipsi trepidantes non auderent famae periculum suo nomine adire, alium potius ad ministerium sui erga nos liuoris, subdole delegerunt, suasque iras atque tela aduersus me eiaculanda nuper commiserunt Medico cuidam practico et Thermographo, qui dira lucis cupidine, alienis sumtibus, opibus ac laboribus, sine opera et sudore, inclarescendi accensus, publicata longa ac verbosa Epistola, gladiatorio animo ad nos affectauit viam, atque in campum arenosum, indecoro puluere sordidus, profiluit, vt vicariam illam pugnam nullos habituram triumphos, ceu quidem Parabolanus, procacissime subiret:

*Impiger hinc mediae infert se, sublimis arenae,
Tempora cui lentis velauit Naenia Cannis,
Tela ferens humero, spargensque volatile ferrum,
Vana ferit.*

Ipsum enim lepidi istius opusculi auctorem non esse, nec per rerum naturam, esse posse, nisi stupendo prorsus et inaudito quodam miraculo, (quando nempe et mentis erroribus in morbis agitados, aut numine aliquo peregrino afflatos incognitis antea linguis loquutos fuisse, passim constat, vti videre est apud FERNELIVM, *Lib. II. de abditis rerum causis*, BORELLVM, *Obseruat. 54. Cent. II.* CARDANVM, SENNERTVM, BONETVM, SCHENKIVM, aliosque plures, sed sit hic, quaeso, venia subito ioco,) tam certo scimus, profecto, quam nos viuere, atque haec ipsa scribere.

Nunquam enim, crede mihi, ipsi magnum aut diuturnum cum elegantioribus literis, Graecis et Latinis, intercessit commercium; de re ipsa autem critica, ardua illa et plebeiis ingeniis prorsus inaccessible, tantum ipsi profecto notum est, quantum mihi de remotissimis gentibus Hyperboreis, et quid iam hoc ipso temporis puncto, in vltima Thule peragatur.

Namque semper cum CATONE censuit, *melius esse, Graecas literas obiter tantum inspicere; quam penitus perdiscere*: iure enim verebatur cum MARIO, apud SALLVSTIVM, ne virtuti scilicet officerent, cuius semper fuit studiosissimus et obseruantissimus cultor: *hinc parum placebat, Graecas literas discere, quippe quae ad virtutem doctoribus nihil profuerant*. Inde igitur olim saepe coram me aliisque amicis ingenue fassus est, sese in Graecis quidem literis nullum processum habere, in Latinis autem vix nonnullum.

Quam ob rem non satis demirari mecum poteris, Lector, duram valde Medici illius conductitii frontem, aliena pro suis nimis confidenter, parumque prudenter vendentis, seseque hinc omnium prudentiorum cachinnis et ludibriis incautius exponentis, qui nempe cuncti nobiscum vna cum amicis clarissimis et in proxima vicinia, et hic inprimis degentibus, illis scilicet strenuis portentorum Grammaticorum debellatoribus, et deterrimi Augiae stabuli in isto scilicet itinere latino late patentis, expurgatoribus patientissimis, ipsi satis notis, optime norunt, illum ipsum Virum doctissimum ab his cultioribus sacris valde alienum esse, atque proinde omnia reliqua in illa Epistola ad ipsum pertinere, exceptis tantum rebus ac verbis, quae aliorum nempe instinctui atque efflatui prorsus debet. Verum ille ad eos praesertim referri quodammodo videtur, de quibus QVINCTILIANVS ita quondam verissime et acutissime: *Nihil peius est iis, qui paululum aliquid ultra primas literas progressi, falsam sibi scientiae persuasionem induerunt*.

Forſan tamen et ipsum modestum satis scribendi genus ad ipsum pertineat, licet intermissis passim aculeatis dicteriis et Catonianis superciliosae frontis reprehensionibus: quod equidem merito laudamus, vellemusque hinc, ut par pari referre hic liceret. Verum illud nos male omnino habet, quod iste nouellus Criticus personatus nos subito adortus fuit, nulla antea iniuria a nobis laceffit, et nulla alia contra nos scribendi ratione permotus, nisi acri quidem, sed inconsulta perpetuae famae cupidine exstimulatus, potissimum vero, ut aliorum ulcerosae mentis aegritudini foeto obsequio velificaretur, et vicariam operam

operam praestaret alienae petulantiae, et importuno nobis vane oblo-
quendi studio, dum nempe, posito pudore,

aliis seruit miser, atque

Ducitur, ut nervis alienis mobile lignum.

Illud enim Plinianum certo sensu ad ipsum vel maxime spectat: *Alienis pedibus ambulamus, alienis oculis agnoscimus, aliena memoria salutamus, item, quod addo, aliena vivimus et scribimus opera.*

Inde fane propter effrenam illam proteruitatem traducis iste sapientiae tinnulus buccinator et de alienis opibus prodigus largitor, aequo iure haud incastigatus nobis dimittendus videbatur, atque ille inani tumens Graculus superbia, alienis pennis exornatus, rostris fugandus ac male mulcandus erat, si ita cum lepidissimo PHAEDRO loqui liceat, quam fane contumeliam haud expertus fuisset, si intra suos fines exiguos sese modeste continuisset, Thermographus, immo potius Ppsychographus, mansisset, aliena arua et iura haud inuolasset, peregrina sacra intacta et intractata fuisset, triumphum ante victoriam non cecinisset, ac per tabernas, popinas et tonstrinas, de hoc suo foetu supposititio, et obstetricantibus aliis, diro fidere enato, iactantius gloriatus fuisset, neque demum eos temere et petulanter adortus fuisset, cum quibus tamen perpetuam pacem et concordiam alere, ob causas fonticas, ipsi plane cognitae, vel maxime ipsi conduxisset.

Aliquanto igitur animosius, praeter consuetum nostrum morem, contra ipsum calamum hic stringentes, animum eius potius spectamus, haud satis candidum aut amicum, quam byssina verba; deprehendimus enim gladium melle circumlitum, scimusque probe, *pestimum inimicorum genus esse laudantes.*

Sed satis iam de his! Audiamus potius nunc, si placet quidem pauculas bonas horas male collocare, hominem ipsum loquentem, vel potius homines alios, per ipsum loquentes, eorundemque rationes et dubitationes, grauíssimas scilicet illas de lana caprina tribusque capellis, aut arundinibus, data opera, expendamus ac diluamus.

Acris igitur, siue ridicula potius lis, nobis potissimum intenditur, propter sequentem notissimum SVETONII locum, in *Vita Au-*

gusti, Cap. LXXX. Coxendice, et femore, et crure sinistro, non perinde valebat, ut saepe etiam inde claudicaret; sed Remedio Harenarum atque Arundinum, confirmabatur.

Quem ambiguum ac perobscurum TRANQVILLI locum, ut scite explicarent et liquida luce perfunderent, diu multumque aestuarunt quidem doctissimi Interpretes Suetoniani; sed frustra omnino atque incassum, in hunc usque diem. Haud enim commode docere poterant, quomodo nempe Harenis et Arundinibus Claudicatio tolli posset, neque de ridiculo illo et prorsus haecenus inaudito Arenarum et Arundinum simul compositarum remedio, ex omni antiquitate, vllum locum afferre poterant, unde lux aliqua affulgeret SVETONIO, et de Remedio isto insolito ac peregrino satis constaret: et licet de Arenis illis rem omnem sese tenere, certo crederent, etsi perperam, uti infra luculentius docebitur; tamen, quid istis facerent Arundinibus, comminisci haud valebant. Hinc summus CASAVBONVS, ita ingenue, pro more, fassus, scribit in doctissimis ad istum locum notis: *Remedium Arundinum quid appellet hoc loco, SVETONIUS, ne Medicos quidem, Viros eruditione praestantissimos, satis exploratum habere scimus.* THOMAS igitur REINESIUS, eruditorum sui aevi per omnem Germaniam, facile princeps, ne ipsi hoc minus exploratum esse videretur, ita rem dubiam explicat, Lib. II. Variarum Lect. cap. 18. *Satius fuerit de Radice Arundinis, quam luxatis, et spinæ doloribus, ob vim extractoriam, mederi, si trita cum aceto, illinatur, tradidere DIOSCORIDES, Lib. II. cap. 115. et PLINIUS, Lib. XXIV. Cap. 11. intelligere.* Cum enim destillationes anniuersarias et certo tempore recurrentes valetudines expertus sit AVGVSTVS, PLINIO, SVETONIO, DIONE, SOLINO testibus; ob crebriores autem Catarrhi ad coxam decubitus, et dolorum ὑπο-
τογονιασμός, articulos adeo debilitari, ut luxetur et excidat os femoris, mucoribus superuenientibus, HIPPOCR. VI. Aph. 59. constet, Medicinam ex Arundine trita, adplicare locis oblaesis & imitantibus ἐξαιτῶσιν, non inconueniebat.

Quae quin docte et ingeniose, pro solito scilicet summi Viri more, excogitata fuerint, nemo non, opinor, confestim fatebitur: simul
tamen

tamen ita etiam comparata esse, vt multae dubitandi et haesitandi rationes adhuc supersint; id vero nemo rerum probe intelligens, facile negabit. Vnde enim hic, quaeso, satis certo constet, Radices Arundinum cum aceto tritas hic intellexisse SVETONIVM, cum Arundinum tantum mentionem faceret? Qua porro ratione illae cum aceto tritae radices, vna cum calentibus Arenis, commode artubus luxatis ac claudicantibus applicari potuerint? Quis pariter vnquam dixerit, istas Arundinum radices, Arenasque feruentes claudicationem emendare posse? et vbi demum mentio istius miri remedii ex Arundinum radicibus cum aceto tritis et Arenis calentibus, coniunctim sumtis, apud veteres medicos Graecos ac Latinos inueniatur? Vah! quanta vbi-que hic difficultatum, dubitationum et obscuritatum copia! quam nemo forte, nisi aliquo propitiore Numine afflatus, ac felicioris ingenii abundantia instructus, soluere ac discutere poterit. Hinc et ipse REINESIVS, pro mira sua in his interiorioribus literis, sagacitate ac iudicio acerrimo, quasi iusta prioris sententiae poenitentia actus, sibi metipso diffidit, atque mutata feliciter coniectura ista, sequentem mox explicationem subiungit longe veriore profecto, certiore et concinniore: *Potuit etiam sub claudo ex imbecillo et luxo crure, Arundo ea ratione, in Remedium expeti, quod σκινδαλμοι, seu assulae eius fissae manu repositum in sedem suam caput femoris continere aptae natae essent, si commode per habenas additas, alligarentur, quod corticibus arborum, vel lignis excauatis, alii praestiterunt. Sane Materies Harundinum gratissima fabricis, et sectiles earum laminae ad quaecunque liberet opera, aptissimae fuerunt, PLIN. Lib. XVI. cap. 36.* Verissime haud dubie et appositissime, quando nempe, bene monente EVRIPIDE, posteriores cogitationes sapientiores solent esse prioribus.

Quae quum legerem, inuenta iam feliciter, opinor, coniectura nostra, vt amici Cizenses adhuc probe norunt, ibi enim primum nata fuit, quum nouum SVETONIVM obiter per otium, perlegerem, nec libros haberem alios, nec aliud, quod potius agerem; mirum sane in modum laetatus fui, quod meam suspicionem tanti Viri grauissima auctoritate assensuque venerabili plane confirmatam animaduertem,

terem, qua legendum mihi videbatur: *Remedio Habenarum atque Arundinum confirmabatur*: Sensu sane aptissimo, facillimo ac liquidissimo. Inde enim nunc optime cohaerent Arundines et Habenae; quiuis nunc sua sponte facile intelligit scitam medendi methodum chirurgicam; nemo nunc necesse habet, Radices Arundinum cum Aceto tritas operose comminisci, nemo modum illum difficillimum anxie excogitare debet, quo illae tritae cum aceto, Arundinum radices vna cum Arenis arenibus calentibusque apte et concinne componi et commisceri possint. Quin potius nihil adhuc amplius in hoc loco dubium et incertum, nihil confragosum et arenosum, nihil lutulentum fuit: e contrario autem, vnus tantum literae felici mutatione, omnia nunc plana, clara, perspicua et intellectu facillima, a quouis, vel mediocriter tantum docto, statim deprehenduntur. Haec tamen blanda et concinna verique simillima coniectura, cuius me nondum poenituit, nec poenitebit vnquam, licet fulgentissima sua luce ita radiaret, vt cunctis doctis, elegantibus ac generosis ingeniis, assensum non lente proliceret, sed confestim potius validissime extorqueret adeo, vt quamplurimis SVETONII exemplaribus eam adscriptam immo etiam nonnullis impressam, laeti hucusque conspexerimus, haec, inquam, coniectura tamen, quis credere auit? soli displicere potuit commentitio illi nostro Censori, nisi potius illius mobilis tantum ligni clandestinis motoribus ac rectoribus, vt pro exfurdato suo palato, vel inuentis sic sapidissimis frugibus, glande adhuc insipida decidua vesci turpiter mallet. Hinc priorem sententiam Reinesianam, de Arundinum radicibus cum aceto tritis et Arenis calidis, ab ipso licet, maximo illo Viro, iam desertam ac retractatam, prae illa posteriore verissima ac commodissima, de assulis nempe arundineis, auidissime arripuit atque in suos vsus perquam exiguos leuiter conuertit Censor ille noster sine suffragio creatus, quo tantum haberet, quod incassum obloqueretur. Omnia autem Auctorum loca in suam sententiam ibi producta aut REINESIO debet, aut aliis, qui ipsum ad scribendum impulerunt, et sub eius vicario quasi nomine latere maluerunt, quam ipsi in arenam ac pulverem

verem fidenter prodire. Igitur bonus iste homo atque umbraticus pugil nostras non audit habenas, sed potius peruerse ac praepostere

steriles elegit Arenas,

Vt caneret paucis, mersitque hoc puluere verum.

Paucissimi enim, et praeter ipsius impulsores ac machinatores, fortasse nulli, ut certa nos spes alit, et iamiam nobis abunde innotuit, futuri sunt, qui crambem ab ipso frigide recoctam, dudum autem fastiditam, et ob emendationem nostram reiectam, gustaturi ac laudaturi sint in posterum.

Optimum nempe AVGVSTVM acerbissimis morbis articularibus, scilicet Chiragra, Podagra, coxarum dolore acutissimo, seu malo Ischiadico, aliisque hoc genus Rheumatismis, frequentissime per vitam tentatum vexatumque fuisse, atque inde perquam molestantem claudicationem contraxisse, non dubitanter, ambigue et verecunde, ut decebat nempe in re obscura, incerta et meris coniecturis leuibus innixa, proponit; sed certissimum esse, censoria potius fronte, et imperio quasi plusquam MANLIANO, asseuerat: sicut et infra certo certius scit, AVGVSTVM ex illo articulari morbo, Coxendicumque praesertim dolore claudicasse et arenae calidae appositu, itemque illitu medicamenti, ex Arundinum radice, cum aceto parati, confirmatum fuisse, de quo tamen infra plura. Scilicet haec omnia certo certius scit iste Consiliator, deorum, et ultra humanam sortem longissime sapiens augur,

qui numina Phoebi,

Qui tripodas, Clarii lauros, qui sidera sentit,

Et volucrum linguas, et praepetis omina pennae.

Ab acia et acu omnia exponit, intestina ipsa AVGVSTI nouerat omnia, tantumque non diceret, si quis scire vellet, quid pridie imperator coenasset: putasses illum semper cum AVGVSTO habitasse, et cum HORATIO atque VIRGILIO ad eius latus confedissee, atque honestiorem ipsius CAMELII vel ANTONII MVSAE locum dignissime occupasse, si ita quidem cum PETRONIO iocari hic libere liceat. Frustra ergo, et saeuo potius cum ioco, a me erudiri et doceri cupit

tot saeculis ab A V G V S T I aeuo remoto, quum ipse omnia melius certiusque sciat et me potius inde docere possit, quoniam ipsis Imperatoris illius rebus praefens interfuisse videtur.

His praemissis et extra ullam controuersiam positis, pergit praeclare docere, saeuum istum articulare morbum, imprimis, vbi per longiores moras inualuit diuque inueterauit, insignem artuum debilitatem, crurumque adeo claudicationem frequentissime excitare, idque ipsum, quod nemo scilicet sanus nesciebat, aut negabat, multis HIPPOCRATIS, ARETAEI, GALENI, CELSI, et aliorum Auctorum locis notissimis, ex alieno Narthecio, pro more, depromptis, praeter ullam necessitatem, probat et confirmat, vt scilicet vane ostentaret, lectos ipsi illos Veteres Auctores esse, per omnem licet suam vitam forsan illectos, nec intellectos, quod haud obiter scimus, et vna cum multis amicis superius iam laudatis, qui hominem istum omnis venustae et eruditae Vetustatis valde ignarum, mecum propius norunt, sacramento Socratico paene contendere audemus. Negare interim non conatur, claudicasse pedibus A V G V S T V M, sicut nec ipse nego, Censorem ipsum ingenio interdum claudicare labique, nam vbi ille est, ibi consilium claudet: hac saltim intercedente differentia, quod ipse claudicationis vitium ex Arthritide obortum putet, ego contra ex grauissimo lapidis ictu, et violentissima praesertim pontis ruina accidisse censeam, inductus imprimis loco illo clarissimo, *cap. xx. Vna acie, dextrum genu lapide ictus: altera autem, et crus et utrumque brachium, ruina pontis consauciatus.* Hoc autem validissimum, mea quidem opinione, argumentum vanissima argutatione eludere et infringere conatur, malletque bonum A V G V S T V M duo dextra fregisse crura, quam vnum sinistrum, vt tantum suae leuissimae coniecturae color et fides aliqua constaret: Sic enim declamatorio prorsus strepitu ampullatur: *De crure tacet S V E T O N I V S, utrum dextrum, an sinistrum, laesum fuerit? Verisimilius mihi tamen videtur, illud etiam de dextro crure accipiendum esse, quod de dextro genu ante dixerat, licet breuitatis gratia vocem dextrum repetere noluerit. Tandem non video, cur S V E T O N I V S coxendice, et femore, et crure, A V G V S T V M non perinde valuisse dixisset, et tria ossa nominasset, si luxationem horum sub-*
audiuisset

audiuisset ossium. Siue enim solum femur osse coxarum excidit, cur crus adiecerit? siue crus tantum sede sua motum est, cur coxendicem simul appellauerit? En vero perbellam et peracutam, si diis placet, nouorum Criticorum veteres auctores explicandi rationem! Sed hic quaestionibus plusquam Domitianis immorari piget ac pudet; ipse bellus iste interpretes eat et quaerat ex SVETONIO, cur sic, vt scripsit, nec aliter, vt Censor nempe mallet, scripserit: haec nihil prorsus ad me, nec ad rem ipsam quidquam faciunt, et a prudentioribus lectoribus resonabili cachinno, pro merito scilicet, excipientur. Censoria igitur grauitate Litigator licet pronunciet, dextrum crus fauciatum fuisse AVGVSTO; ego tamen eodem iure, si liceat, affirmare possum, sinistrum fuisse; hic enim Accio idem, quod Titio, ius esto! Nam quis quaeso, silente ipso SVETONIO, certi quid hic temere affirmauerit? neque enim nos in SVETONII silentio nostrae sententiae argumentum, aut tutamentum, frustra quaerimus, quod ficulneum prorsus auxilium soli nostro praecoci Censori lubenter relinquimus, nihil ipsi plane profuturum, vti infra manifestius patebit. Nimirum, si quis ea in re scientiam sibi vindicet, quae non potest sciri; nonne insanire videatur, si id affirmare audeat, in quo facile reuinci possit? Inde igitur, vel et vtrumque crus diffractum forsan fuerit AVGVSTO; In oppressis enim subita integri pontis disiecti ruina, vulnera inprimis non dari ad mensuram, vt loquuntur; sed omnia potius membra grauissime conquassari ac consauciari, quis est, obsecro, qui nesciat, aut negare audeat? Vnde et vtrumque brachium simul fauciatum fuisse, prudenter hic addit SVETONIVS: inde quoque, vt coniecere fere licet, enatus ille singularis dextrae manus eneruis torpor, cuius mox meminit SVETONIVS: *Dextrae quoque manus digitum salutarem tam imbecillum interdum sentiebat, vt torpentem, contractumque frigore, vix cornei circuli supplemento, scripturae admoueret:* licet, vt suae scenae inferuaret, de chiragra potius interpretari ista mallet fictitius noster aduersarius.

Qui et insuper arthriticae suae, vt sic loquar, de Arthritide AVGVSTI opinionis maximum pondus in aurea illa et quantiuis pretii particula *Saepe*, sese reperisse, tripudians exultat, putatque in illis po-

tissimum verbis: *Vt saepe etiam* claudicaret, plus inuenisse, quam pueri in faba, quod dicitur, reperiant, quod etiam quibusdam eruditis rei criticae et elegantioris literaturae haud satis gnaris, ita perperam visum, ut vulgares iam Ephemeridum doctarum conscriptores taceam, nobis quidem, quod dolemus, sed modice, hic non satis propitii, qui de re non intellecta iudicium ferre haud valent. Sed

*O imitatores! seruum genus! ut mihi saepe
Bilem, saepe iocum vestri mouere tumultus.*

Nihil enim profecto, vel certe parum, refert, siue saepe, siue semper, claudicauerit A V G V S T V S, quum interim certissimum sit, illum claudicasse. Res sane, me quidem iudice, intellectu facillima: Optimus Imperator violentissima illa pontis ruina, supra e SVETONIO nostro commemorata, paene oppressus et consauciatus, sinistras potissimum corporis partes adeo debilitatus, concussus et vitatus erat, ut nunquam exinde, per omnem vitam coxendice, et femore et crure sinistro rectius valeret, aegriusque hinc semper incederet: ingrauescente autem postea senectute, et superuenientibus variis grauioribus morbis, destillationibus ac Catarrhis et Rheumatismis ab ipso SVETONIO commemoratis, atque in illas debiles et offensas iam partes potissimum promore consueto, acriter incumbentibus, quoniam *magis offensis obnoxia est infirmitas*, iudice CELSO, et *in affecto iam corpore levis causa magis, quam valido, grauior, sentitur*, bene monentibus LIVIO atque SENECA: tum vero malum illud dudum inueteratum, adeousque sensim intendebatur et exasperabatur, ut exinde saepe quoque claudicaret, variis inprimis tempestatum mutationibus subinde ingruentibus, ficque *anniuersarias ac tempore certo recurrentes valetudines* ipsi subinde inducentibus, ut ipse ait SVETONIUS, atque hinc fulcimentis, Habenis nempe atque Arundinibus, saepius indigeret: quam nostram sententiam validissime ipse noster confirmat SVETONIUS, ita perspicue scribens cap. LXXXII. *Quassato corpore, neque frigora, neque aestus, facile tolerabat* A V G V S T V S; quoniam eiusmodi delicata et eneruata corpora valetudinaria vel ad leuissimarum ex tempestatibus iniuriarum motus, saepissime collabuntur, pulchre alicubi monente SENECA modo laudato.

Quae

Quae fane explicatio nostra ex ipsis S V E T O N I I nostri verbis sua sponte emergit, neque ullis fidiculis extorquenda est: *Coxendice, et femore, et crure sinistro, non perinde valebat, ut saepe etiam inde claudicaret.* Nempe ex tristi illo ac funesto casu superius commemorato, coxendice, femore et crure sinistro nunquam bene valuerat A V G V S T V S, tandem vero, senio confectus, morbis variis sensim labefactatus, viribusque fractus, adeousque illis vitiatis iam partibus, languescebat, ut etiam saepius exinde claudicaret. Quod ipsum luculentissime quoque confirmat vir quidam Graece doctissimus et Orientalium Linguarum et inter ipsas, praesertim Arabicae, longe peritissimus, in Epistola nuper ad me data, his quidem verbis, Lectoris, ut spes est, pace, huc infra adscribendis: *Perlegi chartulam Aduersarii tui. Non animaduertit ille, A V G V S T O tendines et ligamenta laxa, χαλαρά, fuisse, ut Habenis et Schidiis opus habuerit, suppleturis id, quod tono fibrarum deerat. Vel natura, vel casu, ex ictu vehementiore, id potuit habuisse, ut non semper claudicaret; Periodicum malum id potuit fuisse; ut videmus milites, quacunque demum corporis parte vulneratos in bellis, ad mutationes tempestatum, de doloribus illarum partium recidiuis conqueri. Sunt et alia multa, quae ipsi possunt obmoveri. Videtur generatim morbum A V G V S T I non perspexisse etc.* haecenus vir ille praestantissimus, sapientissime profecto, atque acutissime.

Quibus denique omnibus vel maxime adhuc accedit illud, os femoris iam atroci illo casu nimis laxum luxumque, mucoribus crebro superuenientibus, magisque partes illas iam offensas relaxantibus, saepius ipsi excidere pouisse A V G V S T O, quod ex HIPPOCRATIS *Aph. 59. et 60. Sect. VI.* acute iam obseruauerat supra REINESIVS, cuius tamen fidem fallere nesciam in dubium hic vocare mallet aduersarius, solius quidem CELSI, et quidem male intellecti, auctoritate fretus, qui nempe *Lib. VIII. cap. 20.* obscure nonnihil atque dubitanter de hoc casu loquutus fuerat: quem tamen non rarissimum, ut falso! putat Censor noster, sed frequentissimum potius esse, in corporibus praesertim humidioribus, fluxioribus et laxioribus, rursus gravissima sua auctoritate validissime confirmat ipse HIPPOCRATES *Lib. de Artic. pag. 762.* Edit. Lind. ita manifeste scribens: συχνὸς γὰρ

ἂν τις ἴδοι, οἱ ἕτως ὑγροὶ εἰσιν, ὥστε, ὅποτεν ἐθέλωσιν, τότε αὐτοῖσι τὰ
 ἄρθρα ἐξίστανται ἀνωδύως, καὶ καθίστανται ἀνωδύως, *Multos enim videas,*
qui adeo humidi sunt, ut, quando velint, articuli ipsis citra dolorem excidant,
et absque dolore restituantur, quod et in sequentibus ibidem pluribus
 probat, praesertim vero in *Mochlico, pag. 859.* perspicue docet, femo-
 ris os in humidioribus et laxioribus naturis sua sponte, saepissime sede
 sua excidere, atque nunc facilius, nunc difficilius, in eandem reponi
 posse, ad quae HIPPOCRATIS loca notatu certe dignissima, quae
 iam cuncta exscribere haud vacat, legi omnino meretur, in *Commenta-*
riis, GALENVS, inprimis autem pag. 453. sqq. et pag. 305. Tom. XII.
Opp. Comment. IV. Text. XL. in HIPPOCRATIS Librum de Articulis,
 et aliis locis ibidem pluribus: nempe ad supra laudatos Aphorismos,
Tom. IX. part. II. pag. 289. Quibus nunc denique nouissime acce-
 dat grauiissima ASCLEPIADIS auctoritas apud ORIBAS. *de Luxat. in*
Collectione veterum Chirurgorum NICETAE, per Cl. COCCHIVM, Flo-
rent. 1754. primum edita, pag. 155. vbi ipse Cel. Editor in Notis do-
 ctissimis prouocat simul ad PETITI *Lib. de Morbis Ossium, Cap. XI.*
pag. 309. item SCHWENCKII *Historiam Sanguinis, pag. 210. in Ap-*
pend. variaque istius spontaneae luxationis producit exinde exempla;
 qualia et plura collegit FALLOPIVS, *de Luxat. Cap. XIII. pag. 85.*
Tom. II. Opp. et apud alios legere licet auctores laudatos a PLATNE-
RO, Institut. chirurg. pag. 808, vbi et ipse de hac singulari luxationis
specie tractat, ut et HEISTERVS, Chirurg. pag. 193. HILDANVS, et
 alii. Conf. et SCVLTETI *Armament. Chirurg. Declarat. Tab. XXVIII.*
pag. 80. et inprimis RIEDLINI Lin. med. 16. ann. 1696. mens. April.
pag. 178. sq. item FABRIC. ab AQUAPENDENT. Lib. I. Cap. 5.
 BELLOSTIVS de la MOTTE, CLERICVS, aliosque opportune
 hanc in rem allegatos a Cel. REITZIO in doctissima *Apologia contra*
Criminationes Miscell. Lips. pag. 41. sqq. vbi et ipse perquam benignum
 de hac nostra emendatione SVETONII iudicium tulit, eamque, ceu
 extra omne dubium positam, splendide laudauit; de quo magni pon-
 deris assensu tam praeclari viri merito vehementer gaudemus.

Quid igitur mirum, si similibus ex caussis os femoris laxum luxumque AVGVSTO saepe excideret, quod et saepe idem apte reponeretur, et modo repositum, Habenarum atque Arundinum remedio, confirmaretur? quod nempe, docente vberius ipsa chirurgia, in eiusmodi casibus, et summae necessitatis et maximae utilitatis solet esse ministerium, qua de re infra suo loco pluribus tractabitur. Nihil ergo, nihil prorsus praesidii aut effugii repositum hic amplius habet adversarius in aurea illa et geminea particula *saepe*, uti quidem vane ac ridicule gloriatur: Si enim ex quacunque demum causa *saepe* claudicavit AVGVSTVS, necessario quoque *saepe* Habenarum atque Arundinum remedio indiguit, ad confirmandos nempe a que continendos elapsos artus, modo ope chirurgica in sedem suam pristinam consuetam scite et perite repositos. Sed fatis iam de morbo AVGVSTI ipso.

Accedamus nunc, hem! tempus est, si lubet quidem, ad bina illa contra eum Remedia, Harenas nempe calidas atque Arundines frigidas: utrasque fatis frigide languideque defendit iste pugnax, ut sic loquar, Arenarius. Videamus iam paucis, de singulis. Primum opere nimis atque superuacua prorsus opera, docet, Arenas calentes hydropi, Cachexiae, Neruorum resolutioni atque articulari demum morbo conduxisse, quae scilicet ad nauseam usque, cuius notissima sunt. Quum vero ego obiter ostendissem ex ipso nostro SVETONIO, nec feruidas Harenas, nec calida fomenta quidquam profuisse; quin potius plurimum obsuisse AVGVSTO, si ea quidem incautius adhibuisset, hocce validum omnino argumentum ut subdole eluderet, maluit duos AVGVSTI morbos diuersos, duasque diuersas plane medendi Methodos, unam nempe excalfactoriam, et alteram refrigeratorem comminisci, viditque per nubes atque inania, alter veluti PENTHEVS,

Et Solem geminum, et duplices se ostendere Thebas.

Neque fane in summas angustias adductus, commodius effugium, quo elaberetur, reperire poterat, nisi hoc unicum, quod nempe misero AVGVSTO duplicem affingeret Arthritidem, unam scilicet mitiorem, alteram

alteram autem atrociolem. Quum enim e variis HIPPOCRATIS, ARETAEI, GALENI, CELSI et aliorum locis, ex aliena liberalitate ipsi pro more, suggestis, sero serioque didicisset, saeuam, diuturnam ac nodosam Arthritidem frigida potius exposcere Remedia, quam calida, id quod pluribus probant MERCVRIALIS, *Lib. IV. Var. Lect. cap. 2.* ANTON. SNEEBERGERVS, de Medicamentis contra Articulorum dolores, HOLLERIUS, LIEBAVTIVS et alii, praesertim autem HERMANNVS VAN DER HEYDEN, in *Discur. med. III.* et THOM. BARTHOLINVS, *Lib. de Vsu Niuis med. Cap. XXVIII.* add. PETRI PETITI *Comment. ad ARETAEVM, pag. 215.* commodissimum sane erat, fingere, leuiore illa arthritide, AVGVSTVM calidis Harenis vsum salutariter fuisse; altera autem saeuiole, lauacris frigidis, potionibusque gelidis; sed quid quaeso, tum fiet potentissimis illis, si Diis placet, Arundinum Radicibus, quae in loco nostro SVETONIANO, proxime coniunguntur cum Arenis illis calidis mitigatoriis, et tamen in saeuissimo et pertinacissimo Articulorum morbo, testibus DIOSCORIDE et PLINIO, aliisque, adhiberi demum, ceu vltimum praesidium, consueuerunt?

Duplicem igitur, ex nostri quidem Cenforis sententia, simul Arthritidem passus fuisse videtur AVGVSTVS, vnam benignam, morigeram et arenis calidis facile cedentem; alteram autem malignam, morosam ac peruicacem, tritis cum aceto Arundinum Radicibus, extractoriam vim habentibus, demum expugnandam et abigendam: Mitiora igitur et valentiora remedia simul, et, quod maxime mirum, vno eodemque tempore, adhibita sunt, vetantibus licet recte HIPPOCRATE, CELSO, GALENO aliisque, et ipsa praesertim sana ratione: Sic enim corpore in vno, vnoque tempore *Frigida pugnabant calidis, humentia siccis, Mollia cum duris*; quod tamen in ipso articulari morbo rectius curando, merito damnat GALENVS, *Lib. I. de Remed. parabil. cap. 16. pag. 599. Tom. X. opp.* et praesertim, *Lib. X. de Compos. Medic. secundum Locos, cap. 2. pag. 630. sqq. Tom. XIII.* saepiusque alibi passim. Insolitum ergo hocce Naturae portentum quomodo commode ita fieri possit, ipse nunc viderit dixeritque pro mascula sua eloquentia, noster
Aduersa-

Aduersarius. Sed haec iam in transitu; plenius enim de iis infra rursus fumus acturi.

Verum, vt me ad propositum reducam, ponamus iam et largiamur tantisper, AVGVSTVM a duplici illa Arthritide, leuiore nempe, ac grauiore, vexatum fuisse, atque nunc per vices, fomentis calidis, vel frigidis, adiutum ac leuatum fuisse: Quis quaeso, vnquam, vel fando, vel auditu, vel denique lectu, perceperit, fomenta calida, aut frigida claudicationem sustulisse, atque artus labentes ita confirmasse, vt erectius incederent? id quod tamen clarissime dixit SVETONIVS: *Vt saepe claudicaret; sed Remedio Harenarum atque Arundinum confirmabatur.*

Possunt quidem, non negamus, Arenaë calidæ in leuiore Arthritide, dolores primulos et incipientes Verminationes aliquantulum mitigare, atque materiam arthriticam adhuc dissipabilem, nec corporis partibus altius infixam sensim resolueri ac discutere: possunt quoque ex altera parte, in inueterata iam ac pertinaci Arthritide, frigidissima fomenta acerbiores articulorum dolores potentius obtundere, atque dolentibus partibus inde blandum torporem inducere: Sed nec calida, nec frigida fomenta vnquam possunt claudicationem ex saeuissimo articulari Morbo semel obortam penitus tollere, aut artus rigidos, distortos, ac vigore suo naturali semel orbos, rursus confirmare, ac ipsis pristinum vigorem, nouasque eundi et sese mouendi vires infundere, id quod nemo sanus affirmauerit: Quando complures nos vidimus ipsi manibus pedibusque articulari morbo distortissimis, atque inde foede claudicantes, quibus nec calida, nec frigida Remedia auxilium vllum afferre poterant, quod scilicet a sola Chirurgorum opera, per Habenas nempe et Ferulas, baculos ac scipiones, aliaque eiusmodi solita et consueta sustentacula ac fulcimenta, petendum potius erat.

Inde et SVETONIVS imbecillum ac torpentem frigoreque contractum dextrae manus digitum AVGVSTI, non Arenarum calentium ope; sed *cornei portius circuli supplemento*, confirmatum, munitum et erectum fuisse scribit: et tamen, quod mirum, calentes Arenaë arentesque Arundines ipsam totius sinistrae Corporis partis Claudicationem sustulisse creduntur, atque arenosa ista commenta verbosè potius,

quam solide, defenduntur. Quanto igitur fatius erat, mecum ex Harena, Habenam facere, quam, quod infeliciter agit Aduersarius, ex Habena, Harenam, aut, quod vulgo dicitur, funem ex Arenanectere, aut arenam sine calce, ac commiffiones meras componere?

Par autem fragile levis suae opinionis praesidium inuenit in tremulis Arundinibus, quippe quod arundineis plane crusculis innititur, ut mox manifestius patebit; licet, quod sane risum, aut potius miserationem, meretur, ita exclamare haud erubescat: *Certissime sum persuasus, me non facile a recto aberraturum esse tramite*: Sed bonus iste Vir, crede mihi, magnorum suorum Heroum et acerrimorum Instigatorum vestigia fallentia et labentia dum incautus persequitur, non solum a recto rationis et veritatis tramite aberrat; sed adeo ipso toto coelo errat. Putat nimirum, *rem extra dubitatinem positam esse, si ex Veterum monumentis probari posset, priscis Medicis tale Remedium omnino in usu fuisse, quod ex Arundinum partibus compositum, in coxendicum et artuum doloribus, membris vexatis admouerunt*. En igitur! tale faustis auibus inuenit tandem beatulus ille, post REINESIVM scilicet indicem, apud PLINIVM, *Lib. XIV. Cap. XI.* et DIOSCORIDEM, *Lib. I. Cap. CXIV.* En vero illa PLINII verba linenda cedro et leui seruanda cupresso! en! inquam, illa ipsa: *Medetur et luxatis, et Spinae doloribus, Radix Arundinis in aceto illita*: sed en et alterum luculentum DIOSCORIDIS testimonium, ipso auro obryzo contra charum etrarum: ἡ ρίζα τῆς καλὰ μὲν καταπλασθεῖσα λεῖα, καὶ κατ' ἐαυτὴν, καὶ σὺν βολβοῖς, σὺν ὄξει, τρέμματα καὶ ὀσφύος ἀλγύματα παρηγορεῖ, h. e. *Arundinis Radix trita per se, aut cum Bulbis suis, atque illita cum Aceto, luxata et Coxendicum dolores mitigat*. Nempe ita verterat haec DIOSCORIDEA Vir et graecae Linguae, et rei imprimis herbariae iuxta peritissimus, et nostri aevi Crateuas, aut THEOPHRASTVS, atque simul, quod nemo Botanicorum adhuc vidit, nec videbit, credo, vnquam, princeps ac primipilaris, nos rem miram et stupendam docet, Arundinum scilicet Radices veros et proprie sic dictos Bulbos habere, quas tamen haecenus longas, nodosas, geniculatas ac serpentes tantum esse, seu γονατόδεις, ὥσπερ αἱ τῆς ἀγγύτιδος ρίζαι, ad instar nempe radic-

cum

cum Graminis, vt Botanici graeci recte obseruant, crediderunt post ipsum THEOPHRASTVM, PLINIVM et alios Veteres, BOERHAAVII, TOVRNEFORTII, RIVINI, STAPELII, LINNAEI, et alii mediocres scilicet Botanici, ipsa nempe inspectione id quemuis liquido docente. Tam facile enim fuerit, opinor, in Arundine iam adulta, verum et proprie sic dictum Bulbum inuenire; quam in scirpo nodum, in punice aquam, in quercu ficum, aut in scilla Rosam: Interim illi, cui facile erat, in AVGVSTO duplicem Arthritidem, atque in Harenis et Arundinibus certissimum contra claudicationem Remedium inuenire; non sane difficile quoque erat, Bulbos etiam veros in Arundinis Radice longa et nodosa reperire, vt pilos in caluo, aut vestimenta in nudo. Addendo igitur, siue ex sua, siue aliena potius penu, nimis liberaliter, *suis Bulbis*, infeliciter profecto lapsus est vir iste bulborum hic nimium amans; Licet enim, quod nemo nescit, primae illae gemmae, seu oculi ac nodi, in Arundinis Radice conspici, ex quibus in terram defossis, Arundines ipsae prognaſci solent, per abusionem, Bulbi quoque vocari consueuerint, vti scilicet abunde constat e CATONE, COLVMELLA, PLINIO, THEOPHRASTO, Scriptoribus Geoponicis, aliisque, qua de re vberius tractat IO. BOD. a STAPEL, in *Comment. ad THEOPHRASTI Hist. Plant. Lib. I. cap. X. pag. 36.* et alibi: conf. BEROALD. apud GESNER. in *Lexico Rust. pag. 18.* voce *Bulbi*, hoc tamen loco, illos Bulbos minus proprie sic dictos, neutiquam intelligendos esse, et ipsa graecorum verborum structura et positura, ac res et experientia inprimis ipsa euidentissime docet. Quamobrem ipsum DIOSCORIDEM alios longe Bulbos, veros ac proprie sic dictos, ipsis quoque Herbariorum pueris et aniculis herbilegis notissimos hic indicasse, locus infra, *Lib. II. cap. 200.* manifestissime euincit: Βολβοὶ ποιεῖσι κατὰ πλάσσομενοι πρὸς τρέμματα, θλάσματα, σκόλοπας, καὶ πρὸς τὰς τῶν ἀρθερων ὀδύνας, nempe eadem, vt vides, hic sunt verba, idemque sensus, ac in superioribus, vbi et pariter legitur: ἐπισπᾶται σκόλοπας. Dicit igitur DIOSCORIDES in isto superius laudato loco, qui nobis iam in manibus est, *Arundinis radicem, vel per se, vel cum illis acrioribus et ex-*

calfactoriis Bulbis permixtam et viribus fociis auctam, luxata et coxendicum dolores mitigare, sensu nempe planissimo, clarissimo verissimoque: vt manifestius adhuc patet ex ipsius *Lib. i. parabil. cap. 167.* vbi ad extrahenda corporis infixata spicula et aculeos, separatim nunc commendatur *Arundinis radix*, nunc *Bulbus*, id quod de iisdem Bulbis obseruavit quoque *PLINIVS, Lib. xx. c. 9.* *PAVLLVS AEGINETA Lib. iv. cap. 29. pag. 64. b.* item et *GALENVS, Lib. vii. de Simpl. Med. Facult. Cap. x, 3. pag. 183. Tom. xiii. opp.* qui tamen ibidem, acrem illam extrahendi virtutem *Arundinis Radicibus* simul denegat, vel saltem dubiam adhuc reddit, vnde sane maximum praesidium et eximium fulcrum infirmo Aduersario nostro subito corruit. Verum haec obiter de loco illo *Dioscorideo*, indicanda tamen vel paucis, per occasionem, ideo potissimum erant, vt exinde plenius aliquanto constaret eruditae aequae Lectoribus, quam egregie, perite ac feliciter sic Censor noster ipse versatus esset in interpretandis et latine vertendis Veterum Graecorum locis, cuius rei infra imprimis, in ipsius opusculi nostri progressu, luculentiora adhuc exempla passim occurrent. Sed nunc bene valeat cum bulbis suis, eosque gramiosis suis oculis tempestiue applicet, quo in posterum, si pote, acutius cernere valeat: nam et hunc usum praestare laudatos istos Bulbos, ibidem docet *DIOSCORIDES*, cum aliis.

En igitur, vt reuertamur iam ad propositum, en, inquam, bina illa eximia ac ponderosissima, si Dîs placet, *DIOSCORIDIS PLINII*que loca, quos, sicut omnes alios primipilares auctores, diligentissime et rarissime noster perlegit Auctor! Sed quid ista nunc demum probant? ex ipsius quidem praesumptae vana opinione plurimum, immo omne; ex mea contra rectiore sententia, nihil prorsus. Quid enim, obsecro, illa ad locum nostrum *SVETONIANVM: Arundinum et Harenarum remedio confirmabatur* claudicans scilicet *AVGVSTVS*? vbi enim, quaeso, accuratiore, vt decet, istorum locorum comparatione instituta, vel vestigium in locis illis *PLINII* ac *DIOSCORIDIS* inveniatur, radices arundinum claudicationem vnquam recorrexisset, atque loripedem rectum fecisset, ac denuo eius gressus confirmasset? Quid

Quid haec ad affectum et aegritudinem AVGVSTI? PLINIVS et DIOSCORIDES hic sane nihil aliud dicunt, quam arundinum radices in aceto illitas luxatis, et spinae coxendicumque doloribus mederi; minime autem claudicationem inueteratam, pertinacem et inextinguibilem tollere. Sed sese abunde probasse opinatur quidem fortissimus noster imbelli dextra pancratiastes, AVGVSTVM ex coxendicum dolore saeuissimo, seu acerba lumbagine istam claudicationem contraxisse: Verum id ipsum profecto adhuc in quaestione est, et petitio, ut in scholis quidem loquuntur, principii, uti supra sat liquido, sicut spes est, ostendimus: Quare ruinoso isti et arenoso arundineoue fundamento nihil prorsus superstruendum, quoniam scilicet omnia tam facile corruunt, ac viles casulae, in arena gracili ac malefida aedificatae. Quamobrem omnino non erat, quod rapido quasi mentem correptus ab oestro, dulciue fortuna ebrius, ita clamose peroraret noster tinnulus Declamator: *Quid igitur, obsecro, opus Habenis? quid Ferulis? quid incantationibus? quid aliis coniecturis? quum certo certius sit, AVGVSTVM ex articulari morbo, coxendicumque praesertim dolore, claudicasse, et appositu arenae calidae, et illitu medicamenti, ex Arundinum Radice, cum aceto parati, confirmatum fuisse?* etc. Scilicet haec omnia certo certius scit Vir iste multifcius et paene omniscius, si ita per iocum dicere liceat; ego autem contra, et quiuis rectius sapiens et sobrius, isthaec omnia pro incertissimis potius commentis, et audacissimis quin et intolerabilibus prorsus postulatis iure summo habemus.

Adhuc enim vel maxime sub iudice lis est, ut iam supra monui, utrum ex articulari morbo coxendicumque dolore; an potius ex violentissima illa pontis ruina, istam sinistri lateris debilitatem atque claudicationem contraxerit AVGVSTVS? praesertim, quum potius pro mea, quam altera, sententia pugnet ipse SVETONIVS, quando generatim tantum, nec addita vlla articularis morbi mentione, scribit: *coxendice, et femore, et crure sinistro, non perinde valebat, ut saepe etiam inde claudicaret.* Illud igitur ceu certum et exploratum, temere praesupponit, quod tamen vel maxime adhuc ceu incertum, in controuersia voluitur, ut iam supra monui.

Deinde, vbi quaeso, in loco SVETONIANO, de *calidae arenae* appositu, quidquam commemoratur? Generaliter tantum vocatur, *harenarum remedium*, vt vulgo quidem legitur: PLINIVS autem, CELSVS, COELIVS AVRELIANVS, THEODOR. PRISCIANVS, GELLIVS, SERENVSSAMONICVS, ceterique auctores omnes, quos in mea exercitatione priori laudaui, illas arenas medicatrices vbiuis fere, additis epithetis, appellant *calentes, calidas, candentes, sole candentes, sole ignitas, sole feruefactas, tepidas, feruidas, feruentes, torridasque*, vt alia taceam: sicut et Graeci, vt GALENVS, AEGINETA, AETIVS, alique pariter dicunt, τὰς ἀμυγας, ὑπὸ τῆς ἡλίου, ἢ ἀνθηράκων, ἢ πυρὸς πυρωθεῖσας, conf. DIOSC. *Lib. v. cap. 267.* Auget igitur hic vel maxime iustam mendi SVETONIANI suspensionem, quod non Arenarum calidarum, vt consueti alias moris erat, et sensus ipse exigebat; sed Arenarum tantum, iusto obscurius, mentionem fecerit. Sed hoc leuius est, atque hinc eo facilius condonandum.

Illud autem, quod sequitur, longe intolerabilius indeque seria ac feuera castigatione tanto dignius est, quod iste haud secundis auspiciis creatus Censor eruditos atque prudentes lectores pro meris fungis, aut arundinibus habere videtur, dum ipsis insolentissima audacia persuadere conatur, per arundinum remedium SVETONIVM intellexisse radices arundinum cum aceto tritas, atque dolentibus ac claudicantibus IAVGVSTI partibus, in praesentissimum scilicet immedicabilis claudicationis remedium impositas. Quod inauditum fane figmentum ne per somnum quidem in hoc SVETONIANO loco quisquam, credo, vidisset, multo minus vigilans et acerrimae meditationi intentus, in ipso quaesivisset, aut inuenisset: hinc et ipse REINESIVS levem hanc et subito natam coniecturam mox repudiavit, et longe meliorem et certiore sapientissime substituit, vt supra manifestissime ex ipso ostendimus. Vbi enim, quaeso, vel minimum radices arundinis tritae vestigium? vbi, obsecro, vel leuissima aceti suspicio? Nihil profecto, nihil prorsus aceti inuenio in hoc SVETONII loco; an vero multum illius in pectore suo habeat subtilissimus hic SVETONII interpret, ipse nunc sero pudore suffusus, viderit: ego fane vix crediderim;

rim; nec quisquam alius me prudentior ac sagacior, facile, opinor, existimauerit: Nam potius ille, pro aegro suo palato,

Pannosam faecem morientis sorbet aceti.

Hoc enim profecto est, bonos auctores corrumpere, rectos deprauare, et prudentibus incongruum plane et ineptum sensum temere asingere.

At dicat forsan in aliquam, etsi leuem, sui defensionem, SVETONIVM, vtpote breuitatis studiosum, atque Historicum potius, quam Medicum, et radices arundinis et acetum, ceu res ad se nihil proprie pertinentes, studio hic omisisse. Verum, permittat mihi, quaeso, homo noster acutissimus, ipsissima sua verba ipsi hic commodum regere: *Si dicendum, quod res est: certe non omisset hoc loco SVETONIVS, si arundinis radices in aceto tritas ac illitas contra claudicationem adhibuisset AVGVSTVS, id addere, quum alias leuioris momenti res adiecerit: Ita enim prorsus supra clamose argutabatur: Si dicendum, quod res est; certe non omisset hoc loco, SVETONIVS, si ita fuisset laesus AVGVSTVS, ut femur, vel crus sedibus suis excidissent, id addere, quum alias leuioris momenti res adiecerit, et alibi rursus: Quod certe SVETONIVS haec momenta, de femoris nempe osse sede sua crebrius elapso, non silentio praeteriisset.* Sit itaque praelarus ille sagittarius, aliena pharetra decorus, ipse se, quod vehementer equidem doleo, telo suo misere percussit et letalem fere plagam accepit: Quid igitur pugnem amplius aduersus eum, qui suo sibi gladio perire cupit? quid incassum laborem, ut eum destruiam, quem sua ipsum destruit atque adfligit oratio? Videat inde ipse, quam vana verique inania argumenta ad suam tuendam fragilem debilemque sententiam, ubique produxerit, et quam lacera atque pannosa velamenta, ad suam Helenam, aut Hecubam potius ornandam, infeliciter attulerit.

Denique et illud adhuc potissimum hic vrgendum; apud nullum scilicet, quantum ego quidem sciam, probatum medicum veterem, siue Graecum, siue Latinum, ullum locum inueniri posse, ex quo liquido probari queat, arundinis radices cum aceto tritas, vna cum

are-

arenis calidis, quod inprimis probe notandum, in claudicationis remedium, immo, ut liberaliores simus, in Coxendicum dolorum, vnquam adhibitas, aut praescriptas fuisse. Euoluat igitur, euoluat nouus noster et singularis plane SVETONII Interpres omnes illos suos, quos iactat, Auctores primipilares, immo diligentissime illos a capite, ad calcem usque, peruoluat; certus tamen, immo paene certissimus sum, illum, per omnem vitam, frustra quaerendo, oleum et operam prorsus perditurum, neque vllum omnino locum inuenturum, ex quo liquido ostendi et confirmari possit, arundinis radices cum aceto tritas, et simul cum arenis calentibus, impositas, aut ab Auctoribus Medicis, in certum commodumque Claudicationis Remedium, commendatas fuisse, aut re ipsa, Claudicationem emendasse, vel inueteratam, ac nodosam et lapidosam Arthritidem ex voto, plene persanasse. Sed quid quaeso, iuuat his leuissimis argutiolis ac friuolis inani- busque sententiolis refellendis diutius immorari? quum quiuis iudicio, ingenio, doctrina et aequitate iuxta pollens, ex haecenus dictis, facillime, spero, perspiciat, rem plane deploratam infelicissime defendisse nostrum audaculum oblocutorem, nihilque prorsus in medium attulisse, quo villo illam praesidio circummuniret, praeter inania tantum verba, argumentaque leuibus ventis paria volucrique somno simillima, ut, vel me tacente, liquidissime vbiuis apparet. Quod si enim in arenis illis aliquod, arenosum licet, suae sententiae inuenisset fundamentum; arundines tamen, illae inquam, infelicissimae cum vappido aceto, arundines illius alas potissimum verberant, ita, ut nulum amplius supersit commodum elabendi effugium, ut inexpugnabilibus, sicuti speramus, rationibus modo affatim ostendimus, quippe quas, supra ingenue fatente ipso summo CASAVBONO, in hoc nostro obscuro SVETONII loco, nemo vel praestantissimorum eruditione medicorum adhuc satis commode explicare valuit. Facile tamen, si ita quidem lubet, quid enim nostra refert? Auctorem, vel quemuis alium, suo sensu, suisque calidis aut frigidis arenis et arundinibus cum aceto tritis, frui permittimus, eumque libenter spectamus *equitare in arundine longa*, quod et ipsum SOCRATEM et AGESILAVM, at quantos

tos viros, fecisse aliquando constat, nec aegre ferimus, si quis manibus amens nostras effundit habenas, et potius tanquam

in vacua regnat Basiliscus Arena.

Primus autem sapientiae gradus, iudice recte LACTANTIO, est, falsa intelligere; secundus deinde, vera cognoscere. Igitur, apud quem hoc primum nostrum examen profecerit, quo falsa deteximus, excitabitur haud dubie ad Veri cognitionem, aut probabilis nostrae sententiae de hoc loco SVETONIANO demonstrationem ac confirmationem, ad quam nunc ut progrediamur, tempus demum monet.

Nimirum, quum aliquando obiter tantum controuersum istum locum SVETONIANVM inspicerem; protinus animaduerti, Arenas atque Arundines perquam inale ibi esse coniunctas, nec vllum commodum satis sensum efficere: Quare mox in eam delapsus sum sententiam, leuissima vnus tantum literae mutatione, cum ingenti quidem longe melioris sensus commodo, legendum esse, non *Harenarum*, sed *Habenarum* potius, atque *Arundinum Remedio confirmabatur*. Quo facto, illico nempe omnes euanescebant difficultates, alias fere insuperabiles, neque necesse amplius erat, aut arenas calentes frigide praesupponere, multo minus Arundinum Radices cum Aceto tritas e longinquo, frustra arcessere; aut SVETONIO ipsi inuitissimo violenter obtrudere, ut antehac nonnulli eruditi Critici fecerant, quos vano consilio, et improspere plane successu, ut hactenus vidimus, temere sequutus nuperus noster Censor, qui negotiosum nostrum Otium importuna sua loquacitate, sine vlla tamen ratione, turbauit, nosque eo adegit, ut inuiti licet atque coacti, Deum et conscientiam meam hic sancte testor, responderemus, ne sibi, quod iamiam, posito omni paene pudore, fecerat, soli sapere, aut de nobis triumphasse videretur, quamuis nullam haec victoria habeat laudem, dum bella geri placuit, nullos habitura Triumphos. Utinam enim, qui haec nostra legent, scire possent, quam inuitus plane susceperim scribenda, quo facilius caream rixarum, contentionis atque arrogantiae crimine. Cuius tamen praeter omnem rationem, et contra omnem morum humaniorum elegantiam, sine vlla fronte, me publice reum fecerunt nonnulli mercenarii Rela-

tionum publicarum et diariorum vulgarium fabricatores, qui, ceu saevi et intonsi Catones, aut rigidi asperique Rhadamanthi, de hoc ipso scripto nostro durissimam et iniquissimam sententiam tulerunt: quod tamen nec ipsi satis intelligebant, nec de ipso argumentorum pondere aut stili robore solide vereque iudicare poterant. Produnt enim vbique fere in peruersis suis iudiciis, improbos potius liuidi animi affectus; quam probos cultioris ac solidioris doctrinae profectus: et plerumque Graecam fidem magis amant coluntque, quam Graecam quidem eruditionem. Sed haec obiter, solo veritatis studio. Plura autem de hoc teterrimo cacoëthe, infra sub finem.

Quum enim ille, siue illi potius, qui per illum, ceu per vocalem quendam Tubum stentoreum, loquuntur, inuidi et maligni stimulatōres et concitatores, aegre admodum ferrent, quod haec nostra coniectura, quam tamen nosmet ipsi, ex more scilicet nostro consueto, pro re minoris potius, quam maioris momenti, semper merito habuimus, tam communi eruditissimorum Virorum et acutissimorum Criticorum applausu ac laudatione vbiuis locorum, excepta esset; exiguam istam ac facile perituram gloriolam, si qua sit, nobis, si non plane eripere, quod scilicet non poterant, viribus destituti; at infringere tamen ac diluere, subdole conati sunt: dum nempe per istum suum Emissarium conductitium publice tradiderunt, istam nostram coniecturam satis quidem ingeniosam videri, magnis tamen multisque difficultatibus adhuc premi, vt ideo nullo pacto recipi posset, nec proinde tanta vbiuis elogia promereri. Istas igitur graues, seu leues potius, difficultates, quae multum habent inanitatis et vani, ac plus sonant, quam valent, illas inquam, difficultates, iam, si lubet quidem, audiamus, atque, quantum fieri potest, potest autem facillime, tollamus ac dissipemus.

Sed audiamus, si lubet quidem, illum ipsum faciliū illarum difficultatum machinatorem iam suis verbis altifono quasi ore, vociferantem: *Nullus, inquit ergo primo, tam veterum, quam recentiorum Medicorum, atque Chirurgorum, quos ego quidem euolui, euolui autem primipilares, ferulis atque habenis sanare conatur artus, quos Morbus articula-*
ris,

ris, seu Arthritis, infirmos fecit: Sic quidem ille superbe: Sed Citharoedus

Ridetur, chorda qui semper oberrat eadem.

Vbique enim, et ad fluentem vsque nauseam, imaginariam suam AUGUSTI Arthritidem frustra crepat Censor noster, nondum quippe satis probatam, nec vnquam, spero, ex verbis quidem SUTTONII dubiis et ambiguis, liquido probandam, vt supra late demonstrauimus.

Deinde nihil profecto pertinet ad Chirurgos, solícite et scrupulose nimis inquirere, vnde quis artuum luxationem, aut claudicationem contraxerit; siue enim lapidosa Chiragra articulos fregerit, siue nodosa podagra pedes distorserit, siue denique acerrimus Coxarum dolor claudicationem immedicabilem induxerit; ipsi sane perinde erit, vnde malum illud prius ortum fuerit. Quodsi enim Medicorum *Remediis externis internisque, et Victus ratione, quae pituitam fluidorum et bilem innocentiores reddere valeat*, vt egregie scilicet hic Censor pronunciat, sedulo quidem; at incassum tamen, contra pertinacem mali inexpugnabilis saeuitiam pugnatum fuerit; tum sane eiusmodi deplorati fere aegri, valgi, vari, claudi et loripedes, sola potentiorum Chirurgorum manu, solo, inquam, arundinum et habenarum remedio, similibusque valentioribus praesidiis, adiuuantur ac confirmantur, vt pedibus rectius incedere valeant.

Vitia enim, iudice optimo CELSO, ubi Medicamentis non vincuntur, manus auxilium desiderant, quippe quae in his plus omnino praestat, quam victus ratio, aut medicamenta omnia. Igitur inanis prorsus, vt cuius nunc statim videt, haec est obiectione, et nodus in scirpo quaesitus. Interim tamen acutissimo nostro Critico pituitam fluidiorem, et bilem quoque innocentiores ex animo apprecamur. Haecenus enim pituita lenta ipsius stomacho tumultum tulit, ac splendida bilis ipsius praecordiis inaestuauit.

Inde nunc et perquam expedita Responsio ad alteram illam leuem obiectionem mox illi subiunctam: *Quotquot ex probatissimis Auctoribus, miranda sane diligentia, collegisti loca atque exempla, ubi habentae et ferulae*

commendatae atque admotae fuere, ea omnia, si conferre inter se velis, de ossibus luxatis, aut fractis loquuntur, minime vero de Membris ex Arthritide rigidis atque morbofis. Nimirum omnia illa loca, admiranda, si diis placet, diligentia a me collecta, non eum admirandum in finem produxi, ut operose probarem istud, contra fracta et luxata scilicet membra commendatas et adhibitas fuisse ferulas atque habenas, id quod nempe erat notissimum, nec inde prius anxie confirmandum; sed ut potius liquido ostenderem, semper ferulas et habenas una coniunctas reperiri; sicuti hic nostro SVETONII loco, arundines atque habenas, pari modo simul positas esse deprehendimus. Inde merito nunc ridendus praesapiens quidam sapientiae magister, qui nostras *Habenas* et *Arundines*, pro superuacuo tantum pleonasmō habuit; eodem scilicet modo, ac si diceret quis: *aegrotus pulverem, vel tincturam, sumsit in cochleari.* Euge! belle! optime! hui! quanti est sapere. Ah! vereor, ut amabilis ille pusio sit vitalis, nam sapientia heu! nimium praecoci laborare videtur.

Arundines autem et ferulas omnino Synonyma esse, inferius paullo, inexpugnabilibus prorsus argumentis, contra quosuis inanissime dissentientes, liquidissime et validissime probabo.

Deinde autem in ipsa mea Diatribe simul observavi, ferulas illas, seu arundines, una cum habenis, non solum speciatim, in membris luxatis ac fractis reponendis et resanandis, olim adhibitas fuisse; sed et in confirmandis generatim artubus, ex quacunque demum causa, flaccidis, debilitatis, infirmis, incurvis ac claudicantibus, etiam sine praevia luxatione, aut fractura, egregium usum praestitisse, atque hinc frequentissime eum in finem, fuisse corporibus collabentibus et male firmis, in firmamentum, admotas. Id quod liquidissime, opinor, ostendi iam alibi, ex ALEXIDIS Comici loco, apud ATHENAEVM, *Lib. XIII. cap. 3.* et CLEMENTEM ALEX. *Lib. III. Paedagog. cap. II.* item ex ARISTOPHANIS *Auibus*, de Cinesia τῷ φιλυρίῳ, ita dicto, quod Tabella tiliacea sese infirmum titubantemque circumcingeret, ne ob nimiam proceritatem et gracilitatem, corpus flecteretur: quem tamen locum perperam ac ridicule explicat, post ARISTOPH.

Schol.

*Schol. pag. 605. SVIDAS, Tom. pag. 614. bene notante ibi KÜSTERO, ex ipso REINESIO, Var. Lect. II. cap. 18. pag. 294. et ibid. cap. 5. p. 147. Inprimis autem ex singulari prorsus et nostro SVETONIANO simillimo plane loco IVLII CAPITOLINI, Cap. XIII. de ANTONINO PIO: Quum esset longus et senex, incuruareturque, tiliaceis tabulis, in pectore positis fasciabatur, ut rectus incederet. Ad quem egregium locum ita doctissime commentatur CASAUBONVS, ut iam verbo indicaue-
ram in mea priore Exercitatione: Petitum ab arte medica exemplum: Nam in Medicorum libris, tabularum huiusmodi multiplex docetur usus. Parens artis, HIPPOCRATES vocare solet *πάρεθνας, παρεγμάσματα, et υποσηγύματα*: utebantur et feminae, ad celanda corporis vitia: meminit vetus Comicus ALEXIS, et *κοτῆς* appellat comice, etc. scil. apud laudatum modo ATHENAEVM, Lib. XIII. cap. 3. pag. 568. et CLEMENT. ALEXANDR. Paedagog. cap. 2. pag. 218. Conf. GROTII Excerpt. vett. Trag. et Com. pag. 570. SAM. PETITI Lib. VII. Miscell. cap. 9. pag. 174. IOS. SCALIGERI Coniect. ad VARRON. de Lingua Lat. pag. 56. NIC. HEINS. ad OVID. Lib. III. de Arte Am. v. 273. pag. 675. Tom. I. Opp. per BURMANN. aliosque plures, in superiore exercitatione a me iam laudatos.*

Senex igitur ANTONINVS PIVS, incuruus, infirmus, et aegre et indecore incedens, ferulis ac fasciis, seu habenis, in corporis nutantis et labantis fulcrum ac firmamentum, commode utebatur, ut rectior nempe incederet: Et senex pariter AVGVSTVS coxendice, et femore, et crure sinistro non perinde valens, ut saepe etiam inde claudicaret, arundinibus, seu ferulis atque habenis, in rectiorem corporis habitudinem, itidem salutariter adiuuabatur, seu *arundinum et habenarum remedio* ita confirmabatur, ut ipsius SVETONII verbis loquar, ut indecoram illam claudicationem isto externo Chirurgorum Remedio et Praesidio, plurimum emendaret, et erectiore corpore ingrederetur. Quid quaeso, nunc clarius, quid probabilius his ipsis esse possit? et tamen, quod utique mirandum, imo dolendum, hic multorum ventosorum verborum inanis ubique strepitus, et fluctus in Simpulo.

Sed veniamus iam, si lubet, ad capitalem illam Quaestionem de ipsa SVETONII latinitate in controuersiam, quod maxime mirum, hic vocata, de qua nempe ita tinnulum Cymbalum quatit homo latinissimus scilicet: *Minus Latine dictum esse opinor, Remedio Habenarum atque Arundinum, confirmabatur. Latinos auctores potius scripsisse arbitrer: vel Habenarum atque Arundinum ope, seu ministerio, vel Habenis atque Arundinibus confirmabatur. Dubito, an usus Instrumentorum externorum, quibus ad operandum utuntur chirurgi, remedium proprie vocari queat? Nemo fortasse dicet: Remedio Machinamentorum sanatus fuit AVGVSTVS.* Scilicet haec omnia intra breuissimum fugacis anni decursum, nunc admiranda sane sua diligentia, plenissime perdidicit felicissimus ingenio foecundo auctor, quae ante illud tempus adhuc ignorasse, cum amicis quibusdam fide dignissimis, superius iam laudatis, tam certo propemodum scio, quam me viuere, atque haec ipsa hic mea manu, Vitembergae, non aliena, Lipsiae, aut Londini, scribere.

Quid autem in hac SVETONII loquendi ratione potissimum cum ratione suspectum habeat nouus hic noster ARISTARCHVS, id equidem, pro mea perquam mediocri quidem, fateor, in his rebus scientia, perspicere haud satis valeo. Siue enim Arundines illae mecum fumantur pro Tabellis, seu Ferulis arundineis, siue, vt Latinitatis peritissimo auctori, et alias forsan nemini, placet, pro Radicibus Arundinum cum mordaci aceto tritis, semper tamen vtrunque manebunt arundines in remedium admotae: par fere est ratio cum *Harenis*, siue *Habenis*; semper enim vtrasque remedii et adiuuenti loco-adhibitas fuisse, satis constat. Cur igitur remedio machinamentorum, seu ferularum et habenarum, vel fasciarum, aliquem claudum confirmatum atque a claudicatione nonnihil liberatum fuisse, Latine dici non possit, nemo Orbiliorum, aut Priscianorum omnium facile diuinare; aut expiscari, credo, vnquam poterit. Praesertim quum cuius, spero, ex ima doctorum cauea notissimum iam sit, *Remedii* vocem non solum speciatim de internis vel externis morborum medicamentis; sed etiam generatim de rebus aliis omnibus, quibus cura operaque nostra quidquam adiuuamus, emendamus, aut melius reddimus, siue sensu phy-

fico

fico, siue politico, oeconomico, aut morali, siue denique mechanico, aut chirurgico, alioque fumantur, frequentissime accipi solere.

Id quod innumeris paene exemplis ac testimoniis facillime ostendi et probari iam posset, si per omnes auctores veteres libere vagari per angustum temporis spacium liceret, aut per taedium longioris scriptio-
nis, iam dudum nobis iuste obortum, liberet. Interim tamen ex quamplurimis haec pauca iam sufficiant: Ita ipse noster SVETONIUS infra in *Vita Neronis Cap. LVI. icunculam puellarem* commemorat, quae quasi remedium insidiarum illi monstro fuerit: quem singularem locum valde miror illis veteranis in mentem non venisse, qui totum SVETONIUM cum cortice et medulla sese deuorasse credunt, licet male saepius eundem digesserint, vt liquidius proxime demonstrabimus in nostro in illum praestantissimum auctorem commentario, iam ad prelum parato*): Sed propius huc PLINIVS, *Lib. x. cap. 54. Remedium contra tonitrus, clauus ferreus, sub stramine ouorum positus*, quod supersticiosum remedium etiam apud COLVMELLAM extat, *Lib. VIII. cap. 5.* Nimirum *clauus ferreus* hic dicitur remedium, et tamen, quod mirum remedium arundinum et habenarum, Latine dici posse ridicule negatur. Idem autem PLINIVS, *Lib. II. cap. 9. Lunam* elegantissime dixit remedium tenebrarum, et *Lib. XXVIII. cap. 4. Aliquid e ligno fulgure icto, remedio esse produnt*; apud quem solum innumera paene in hunc sensum loca commodè quaeri et facile inueniri possunt, conf. interea *Lib. XXXVI. cap. 4. et 15. et alibi saepissime*; vt et apud CICERONEM, TERENCEM, TACITVM, QVINCTILIANVM *Lib. II. Instit. Orat.*

*) Ex quo nos iam alibi, speciminis loco, et gustus veluti gratia, tres singulares locos, et quidem graecos, feliciter satis, opinor, emendatos, produximus, ab omnibus tamen interpretibus, ne novissimis quidem exceptis, per tot saecula, hucusque secure nimis praeteruissos, et in mendo relictos: Legentes nempe, in *Vita August. cap. 72. τεχνόβιον*, pro vulgato τεχνόφουν, porro in *Claudio, cap. 38. μωρῶν ἀνάπλασις*, pro corrupto μωρῶν ἀνά-

σεις, et denique *Lib. de Illustr. Grammat. cap. III. πανὸς ἀγάπημα*, pro mendofo ἀγνημα, aut ἀγάσημα; quas omnes probabiles admodum, immo verissimas, emendationes ibidem multis adductis exemplis et testimoniis appositis, satis opportune valideque confirmauimus. Vid. interim *Diff. nostr. de morte subita ex nimio Violarum odore oborta in prooemio.* Verum haec obiter

*Orat. cap. 4. pag. 72. et alibi saepe, et alios, praesertim autem SENE-
CAM, veluti de Consolat. ad MARC. Cap. x. et Lib. de Ira, i. cap. 16.
aliisque locis plurimis: PETRONIVS quoque Cap. cii. eundem in-
sensum, Atramentum lepidissime, pro more, dixit fraudis remedium. Ita
saepissime elegantissime dicitur passim ignis frigoris remedium, pax belli
remedium; sic remedia censuum, vectigalium, collationum et stipendiorum,
pari lepore scripsit TERTULLIANVS Lib. de Fuga in persecut. cap.
xii. et alibi. Inprimis autem in Pandectis sic dictis atque Codice re-
medium eiusmodi tropico sensu saepissime occurrit: Ita L. i. ff. de iure-
iur. Maximum remedium expediendarum litium in usum venit iurisiurandi re-
ligio, item L. 66. ff. de iure dot. Quidam remedii loco putauerunt introdu-
cendum, ut vel locet usumfructum maritus etc. et L. 3. §. 2. ff. de stat. Lib.
denique etiam remedii loco, hoc monstratur domino statu liberi, etc. ita etiam
alibi simili sensu nuptiale remedium vocatur donatio ante nuptias, ut alia id
genus plura iam mittam Iuris consultis utique notiora, quam mihi:
quibus profecto diutius immorari, merito taedet ac piget. Conf. in-
terim, si placet, CANGII Glossar. med. et infim. Latinit. Tom. v. pag.
1313. sq. Quoniam autem haec similiaque plura exempla in Glossa-
riis vulgaribus et aliis huiusmodi primipilaribus suis auctoribus lexico-
graphis, sinistro suo fato haud inuenerat Latinitatis peritissimus noster
Censor; idcirco, grauissimis his nempe rationibus inductus, seuerè
pronunciabat, Latine nequaquam dici potuisse a SVETONIO: *remedio
habenarum atque arundinum confirmabatur*: id vero infelicissime et falsissi-
me. Quis enim, quaeso, iure neget, bene Latine dici, *hamas ac siphones
in remedium incendii allatos esse*, aut, *distorta membra scamni Hippocra-
tici remedio, recorrecta atque in naturalem suam sedem reposita fuisse*, vel, *ve-
teres ferulas et habenas in remedium luxationum et fracturarum adhibuisse?*
Inde recte CASTELLVS, BRVNO et alii vocum medicarum inter-
pretes: *Remedium comprehendit sub se non solum medicamenta, sed et chi-
rurgicas operationes*, etc.*

Sed ut nunc demum omnem illam vanissimam dubitationem ple-
nissime tollam, istamque friuolam obiectionem penitus euertam, en
locum ipsi Aduersario oppono potissimum huc facientem e SENE-

CAE Lib. III. de Ira cap. 39. Medicum aiunt, cum regis filiam curare deberet, nec sine ferro posset, dum tumentem mammam leuiter fouet, scalpellum spongia tectum induxisse: Repugnasset puella Remedio palam admoto. Ex quo fane egregio loco nunc apertissime liquet, scalpellum, id est, instrumentum externum, quo ad operandum vtuntur Chirurghi, elegantissime vocari Remedium: quo et illud pariter pertinet eiusdem SENECAE Lib. de Proident. cap. III. Remedii causa quibusdam et radi Ossa, et legi, et extrahi Venas, et quaedam amputari Membra; nempe haec omnia sunt Remedia, etsi dura, quae per instrumenta chirurgica externa corporibus male affectis in salutem adhibentur. Immo ipse CORNELIVS CELSVS, purissimae certe Latinitatis auctor, eundem prorsus in modum loquutus est Lib. VIII. cap. 3. extremo: Os capitis collisum exasperatumque radi et laeuari satis est: sed, ubicunque idem incidet in ceteris ossibus, eodem REMEDIO vtendum, nempe radendi laeuandique ossa per ferrum, seu scalpellum: vbi CELSVS imitatus videtur SENECA, vt saepe scilicet solet, de quo alibi. Rursus vero CELSVS Lib. VII. cap. 29. de foetu emortuo: REMEDIO est, *cervix praecisa*. Praesertim autem huc eximie facit SCRIBONIVS LARG. Cap. X. Compos. LIII. Ad dentium dolorem quamuis plurimi dicant, forcipes REMEDIVM esse: eodem scilicet sensu, ac hic Habenarum atque Arundinum REMEDIVM. Paullo post vero Cap. XLIII. Compos. CLXXI. corii Hyaenae particulam brachio alligatam, Hydrophobiae Remedium vocat idem SCRIBONIVS LARGVS. Inde et scite aliquoties dixit CELSVS, Curationem scalpelli, et TERTVLLIANVS pari elegantia, Medicinam de scalpello et cauterio: conf. RITTERSHVS. ad SALVIAN. de Gubernat. Dei pag 248. sqq. vbi plura: sed et Graecis pariter medicis frequentissimo in vsu et Θεραπεία διὰ σιδήρεος, πυρρός, ὀδονίων, νασθήκων, σικυνίων, κ. λ. qui et ὄργανα χειρουργικὰ simili elegantia saepissime vocant ἰάματα καὶ βοηθήματα, remedia et auxilia; ita aliquoties apud HIPPOCRATEM, in Libris chirurgicis, item GALENVM, AEGINETAM et alios, occurrit ἵημα τρυπάνος, σιδήρεος, πρίονος, μήλης, σμιλῆς, μαχαιρῆς, et similia, sicuti et apud PLVTARCHVM in Symposio septem sapient. pag. 93. τὸ βοηθήμα ταῖς σικυνίαις: apposite quoque rursus ad hunc nostrum lo-

cum dixit idem HIPPOCRATES *Lib. de Medici officina pag. 617. αὐτὴ ἡ ἐπίδεξις τῶν ὀδονίων ἵπται*, linteorum, fasciarum, seu habenarum deligatio sanat, siue, quod idem, remedio est. Immo *Lib. de Artic. pag. 791.* ipsas deligationes, siue fascias, ipsis auribus fractis applicatas, manifesto appellasse videtur *φάρμακον πρὸς ἑς*, remedium ad aures, quod ipsum locum nostrum SVETONIANVM egregie prorsus illustrat. Sed mitto alia plura passim obuia. Eat ergo nunc, immo currat, pudore suo suffusus, et ocyus farcinulas et machinamenta sua colligat nouus ille nouae Latinitatis fabricator, nec amplius vlllo modo dubitet de elegantiore phrasi illa SVETONIANA: *remedio habenarum atque arundinum confirmabatur.* Si enim ego, vt tandem aliquando finiam, scriberem, exempli tantum causa: *Doctissimus noster Aduersarius et Graeca et Latina lingua, atque arte inprimis critica ac grammatica non perinde quondam valebat, vt saepe etiam inde claudicaret et turpiter laboretur: Sed remedio alienae paullo doctioris et malignioris simul pennae, haud ita pridem adeo confirmabatur, vt gloriabundus, in publicum campum audacter profiliret, et in alieno prorsus foro infeliciter litigaret.* Quis quaeso sanus, haec Latiniissima, vt ita dicam, plane SVETONIANA et verissima simul esse negaret?

Igitur si ipsi illi fastidiosi et fastuosi censores et noui Latinitatis sublimioris reductores et reformatores aliquando alium SVETONIVM ex suo genio et ingenio capitali, edituri sint, scribant, si lubet, non repugno, *Habenarum atque Arundinum ope, seu Ministerio confirmabatur:* Intereae autem, donec illud horribile secretum pateat, permittant quaeso, placide, vulgarem quidem nostrum SVETONIVM scripsisse: *Habenarum atque arundinum remedio confirmabatur,* quippe quod longe elegantius et significantius, altero illo magis vulgari ac protrito, dictum esse constat.

Vltimum denique argumentum, quod omnium validissimum ac fortissimum esse censet imbellis noster Ballistarius, si sic loqui liceat, cui prompta ad omnem coniecturam mens est; nos autem contra, pro omnium aridissimo et imbecillissimo maximo iure habemus, vti mox euidentissime sumus demonstraturi, directum potissimum est contra
Ferulas,

Ferulas, siue *Arundines*, quas nempe pro synonymis habuimus et adhuc iure summo habemus. Istam enim sententiam nostram verissimam satis superque probaueramus, firmaueramusque gravissimo praestantissimi Viri VIDI VIDI II testimonio, cui nunc accedat alterum non minoris certi momenti, Viri maximi, THOMAE REINESII, supra iam productum; praesertim autem, binis illis eximiis prorsus locis, ex *Hieracosophico*, seu opere *de Re Accipitraria*, commode et opportune depromptis, rem adeo liquide demonstraueramus, ut nemo sanus, uti spes quidem erat, de veritate ipsius nostrae sententiae amplius ambigere iure villo posset: proterue tamen atque petulanter contra tot valentiora argumenta, vanissimo impetu et inanissimo strepitu insurgit noster clamorosus oppugnator, audacterque pro more pronunciat, nos nec probasse, multo minus probare posse, *Chirurgorum ferulas olim ex arundinibus fuisse paratas, hincque illas nequaquam pro synonymis esse habendas*: inde quoque nos seuero quasi tetricoque plagosi paedagogi vultu grauiter increpat, quod nimis scilicet in nostras partes proni, *ferulas semper atque arundines* in nostra Latina Graecorum locorum versione coniunximus; ipse sane in deuios semper errores et turpes lapsus nimis pronus, immo praeceps. Prouocat ergo primo, ridicule prorsus, ad CELSI et PLINII praesertim silentium, qui multa nempe de vario usu tot generum arundinum memorans, ne verbulo quidem tradiderit, *veteres arundinibus pro eiusmodi fulcimentis, usos fuisse*.

Deinde eadem animi leuitate, venerabilem VIDI VIDI II fidem et auctoritatem ideo eleuare conatur, quod fontem ad marginem libri non addiderit, ex quo sententiam suam hausert argumentumque petierit. Bina denique illa primaria et euidentissima ex Hieracosophicis petita, nulla fere fronte, maluit pessima et coactissima versione corrumpere et incrustare, ac limpidae lymphae furuam sepiam dolose affundere, quam verum lubenter perspicere, et, ut decebat, perspectum candide fateri. Nonnullis tamen, etsi hebetioribus, conscientiae nondum penitus occallatae, aut veterinosae stimulis agitarus, his ipsis potentissimis scilicet suis argumentis, hanc mox confessionem subiungit: *Quamuis prorsus negare nondum audeam, priscos Chirurgos ex Arundine confecisse ferulas.*

In quo quidem loco, semel, quod mirandum, per omnem hanc suam compilationem, sapuit, ut demum ad sese aliquantulum rediisse videatur. Alias enim, ut supra stupentes vidimus, *omnia certo certius sciuit, scilicet, quod dextrum, non sinistrum, crus AVGVSTO sauciatum fuerit, quod dira duraque arthritidis ipsum frequentius inuaserit, quod exinde claudicauerit, et quod denique arenarum calidarum et radicum arundinis cum aceto tritarum et impostarum remedio confirmatus rursus ac sanatus fuerit*: neque porro hoc etiam ignorat, *quod nempe SVETONIVS cogitauerit, aut non cogitauerit, quod scribere voluerit, aut noluerit, quid Latinum, aut minus Latinum esse censuerit*; haec nempe, et plura alia haecenus expensa ac confutata, *certo certius* sciebat acutissimus iste abditarum rerum indagator, feliciore quodam fidere afflatus: Id autem vnicum, (sed cum mille aliis scilicet,) ignorasse videtur, utrum nempe ferulae ex arundinibus olim fuerint confectae, nec ne? *Hoc uno responso animum delusit Apollo*. Ut igitur et hoc ipsum *certo certius* in posterum sciat, nihilque saeculo profuturum tanto Viro latuisse videatur; eum securum plane, immo certissimum esse iubemus, verissimum scilicet, nullique amplius contradictioni opportunum esse, quod ferulae olim potissimum ex arundinibus fuerint paratae, ut nos mox paullo inferius certo certius sumus demonstraturi. Interim tamen mirum, immo ridiculum prorsus est, Auctorem hoc ipsum quidem non negare, et tamen simul etiam negare, quoniam euidentissima nostra argumenta refellere conatur, quod profecto simul flare et forbere est, et protestatio ipsi facto contraria, ut Iurisconsulti loquuntur.

Quod autem iam ad illa ipsa argumenta, aut argumentorum potius umbras, attinet, ea profecto refellere, pudet paene, piget atque taedet: adeo usque ieiuna, leuia ac friuola sunt. Interim tamen paucis ad ea respondere, necessitate, vel inuiti, cogimur.

Quod igitur ad primum spectat, a silentio PLINII atque CELSI PETITUM, illud sane adeo iamiam explosum ubiuis atque exhibitum quasi est, ut nemo rectioris ingenii aut honestioris pudoris hodie illo adhuc facile vtatur. Quis enim quaeso, ab Auctore quodam iure exigat, ut aut omnia scribat, quae sciat, sicque omnia promiscue promat,

mat, quae tamen ipse pro notissimis, aut minus scitu neecessariis reputet, aut ea proferat, quae ipse nesciat? aut scire, vel memoriae prode, singularibus rationibus Lectori ignotis, inductus, studio superse-
deat? Quid igitur mirum, si CELSVS ferularum tantum nomen generatim adhibuerit, quum sciret, ferulas ex diuersa materie, nempe Tilia, Fago, Salice, Arundine, et aliis lentis fruticibus parari solere? Quis rursus, obsecro, miretur, PLINIVM nihil de ferulis ex arundine confectis commemorasse, quum perquam probabile sit, ipsum vel hunc vsum arundinum chirurgicum, vtpote leuem, ignorasse, vel, quod adhuc aliquanto probabilius, istum, tanquam notissimum vbiuis et vulgatissimum, studio silentio praeterisse? alia vt iam taceam: Sed ficulneo huic, immo plusquam arundineo argumento, quod glacies ceu futilis, ictu mox dissilit, diutius immorari merito piget.

Neque sane alterum de fide VIDI VIDII suspecta, maiore attentione dignum est; quin potius seria castigatione afficiendum videtur: Indecens enim et importunum prorsus est, de alterius fide et ingenuo candore vel minimum dubitare, donec certissimis documentis et argumentis validissimis liquido constiterit, illum ipsum aut fallere ququam voluisse, aut re ipsa fefellisse; quod de isto tamen VIDIO, tantae auctoritatis, candoris et honestae doctrinae Viro, nunquam probari, spero, poterit. Illum ipsum autem suos grauissimos Auctores omnino habuisse, quos in eo secure sequeretur, quod ferulae olim ex Arundine paratae fuerint, licet illos, ex more veteri, non anxie, aut solícite, adnotauerit, paullo inferius liquidissime sum ostensurus.

Sic nemo probus, quantum equidem sciam, fidem IOS. SCALIGERI, HVGONIS GROTHII, CLAVD. SALMASII, IS. CASSAVBONI, IVSTI LIPSII, IANI GRVTERI, THOM. REINESII, et aliorum summorum Virorum, temere adhuc in dubium vocauit, quod in scriptis suis optimaе frugis plenissimis, saepe generatim varias res ritusque, ex diligentissima veterum lectione sibi probe cognitos, nec ipsis doctis Lectoribus, vt sperabant quidem, prorsus ignotos, verbo tantum, et exserto quasi digito, obiter indicauerint, non adiectis

tamen illis ipsis Veterum Auctorum locis, aut nominibus, vnde ista nempe, veluti in transitu, leuiter indicata, hauserant, nec in margine Librorum suorum, vt Cenfor quidem noster nimis imperiose voluit, scrupulofius adnotatis. Sed fane miserrimum hoc est asylum, vt quiuis videt, et certissimum de perquam curta pauperulae eruditionis supellectile indicium et documentum.

Haec tamen omnia Aduersario nostro in summas iam angustias redacto condonari facile possent; in eo vero ingenuum candorem et honestum pudorem propemodum iure desidero, quod loca illa ex Hieracosophico petita et sententiae nostrae de Arundinibus, vel maxime fauentia, maligno in nos studio, foedissime corrumpit, turpissime maculauit, et lucidissimum ipsorum verborum sensum contortissima versione et violentissima interpunctione obnubilauit ac caliginosa nocte circumiecit. Maluit enim, en animum degenerem, pertinacem et contentiosum! maluit, inquam, Graecae Linguae; sed, quod longae maius, ipsi sanae rationi, primisque Artis Chirurgicae Regulis, vim atrocissimam inferre; quam veritatem a nobis liquidissime defensam, vltro fateri, aut certe tacite illam praeterire. Sed haec inprimis bina loca contra illum vehementissime pugnabant, et pro me contra, quam maxime militabant: ideo omnia potius inuertenda, turbanda et contorquenda erant, quo perspicacioribus lectorum oculis sordida fraudis hubes obiceretur, vt a recto veritatis tramite, in deuia abducerentur.

Sed nunc sine longiore ambage, ad rem ipsam! Prior igitur Locus his quidem verbis conceptus est: Κάλαμον ξύσας ἐμμελῶς, καὶ τὸν ἐν αὐτῷ κόνδυλον ἐξισώσας, κύκλῳ περιδὲς τῷ ὀρνίθου ποδὶ, καὶ περιδύσον, ὥσπερ, ἔθος ἐστὶ ποιεῖν, ἐπ' αὐτῶν τῷ τοῖστῳ πᾶθει περιπέσοντων: Quae fane nemo, nisi Graecae Linguae plane rudis, et fani sensus artisque praesertim Chirurgicae prorsus experts, aliter, Latine, credo, redderet, nisi in hunc, vt fecimus quondam, modum: *Arundo poliatur, et eius nodus explanetur, eaque circumligetur pes Accipitris, ut fieri solet apud Homines ipsos, qui tale quidpiam patiuntur: Vel paullo accuratius et liquidius adhuc: Arundinem accurate politam, et explanato*

eius

eius prius Nodo, pedi Accipitris circumponito, et fasciato, seu per fascias et Habenas, circumligato, quemadmodum scilicet mos est facere in ipsis hominibus, qui in eiusmodi calamitatem inciderunt. Qui sane certissimus et euidentissimus huius planissimi loci sensus, quem et acutissime, pro mira sua sagacitate, dudum perspexit lactifluus ille Gallorum LIVIVS, THVANVS, in Libris eximiis de *Re accipitraria*, metricis, ad Virgilianam maiestatem proxime accedentibus, quum hos ambos de *Re Accipitraria*, locos Graecos scitissime verteret, atque simul quasi interpretaretur, sequentem in modum, *Lib. III. pag. 80.*

tum crura include cauatis

Rupta prius Ferulis, aut. lentae caudice Cannae,

Et nonnullis interiectis, paullo post, sequentia leguntur, *pag. 85.*

luxati medium calami indue truncum

Diffisso caule inioluens, vinclisque coërce.

Hunc tamen liquidissimum Scriptoris nostri Hieracosophici sensum ita maligne et imperite prorsus peruertit nouus noster Graeculus, siue esurientes potius Graeculi per ipsum, obscure loquentes: *Id quod circumligari et vinculi officio fungi debet, potius fasciae, vel ligamenti nomen meretur, quam ferulae. Dicit enim Auctor: Κύκλω περιδὲς τῷ ποδί τῆ ὀγιδοῦ, καὶ περιδῆσον, i. e. in orbem circumdes pedi arundinem, et circumliges. Vinciri igitur pedem arundine iubet, cui rei etiam aptior est arundo, quam ferularum vicibus fungi. Immo non iubet, inquam ego, Auctor, nec vllus vnquam vel mediocrium Chirurgorum tam inepte iussit fracta grauius membra fasciis tantum circumuoluere, omissis plane ferulis, aut arundinibus, in eum potissimum finem salutarem, sollicite adhibendis circumponendis, vt ossa fracta, aut fissa in suam sedem naturalem modo apte per Chirurgum reposita, per illa ferularum fulcimenta ac firmamenta, immota maneant, nec rursus foede dehiscant, aut disiecta, sedibus suis emoueantur: donec nempe, temporis processu, internato salutariter Callo consueto, sensim conferueant, et pristinum robur, pristinamque posituram naturalem adquirant; vulnera igitur tantum fasciis circumligantur; at ossa fracta aut vehementius luxata circumpositis simul ferulis et arundinibus, fasciantur, optime*
id

id monentibus ipso HIPPOCRATE, GALENO, AEGINETA, DIOSCORIDE et aliis. Id ergo omnes profecto sciunt Chirurgorum pueri, neque aliter, sat scio, tractabunt vnquam Accipitris pedes fractos, multo minus hominum membra luxata aut crura fracta. Dicit enim apertissime noster Auctor, fractos accipitrum pedes eodem plane modo, nempe per ferulas, seu arundines, atque habenas, tractandos et sanandos esse, ac quidem tractandi sint vulgariter fracti ipsorum hominum pedes: Illos autem semper fere, paucissimis tantum casibus exceptis, (vbi nempe circa ipsas ossium fracturas, aliquanto profundiora, feruidiora, magisque sinuosa ac serpentina fuerint vlcera, aut immaniora et asperiora vulnera, de quibus, post HIPPOCRATEM, GALENUM, CELSUM et alios, omnes hodie Chirurghi vberius tractant,) illos, inquam, per circumpositas ex omni parte ferulas et adstrictius circumligatas habenas, seu fascias, fulciendos, confirmandos, et ad pristinam posituram reducendos esse, in Libris Chirurgicis, iam a me indicatis, distincte, solide et copiose docent HIPPOCRATES, GALENVS, AEGINETA, PALLADIVS, AETIVS, CELSVS, et alii primipilares nempe Auctores veteres; vt recentiores, scilicet VESALIVM, VIDIVM, FALLOPIVM, PARAEVM, HILDANVM, FABRICIVM, SCVLTETVM, HEISTERVM, PLATNERVM, et innumeros alios iam taceam, quoniam res nempe notissima, vulgarissima, et a quotidiana experientia vbiuis exploratissima, adeo, vt hinc profecto plurimum taedeat, talia vulgaria ac protrita hic quidem docere: Vnde et maximopere miror, illos ipsos medicos, quos et in praeclari illius facinoris societatem accitos fuisse, fama circumfertur, quum nimirum vitrea ista faba in me cuderetur, haec quidem vulgaria nesciuisse, aut, quod verius puto, studio dissimulasse, vt saltim sic haberent, quod incassum obloquerentur. Sed vt rudes sunt hominum mores, ita, quod dolendum, nostri etiam mores sunt accommodandi, atque hinc multis ad nauseam vsque docenda, quae nemo ignorat, et de quo nemo sanus dubitat.

Vae inteaim miserrimo illi Accipitri, qui in illotas eiusmodi imperiti chirurgi manus infeliciter incidit, qui fractum eius pedem arundineis

dineis tantum foliis seu vinculis circumligat, neglectis interea prorsus ad stabilimentum necessarium ferulis; tum enim ex tali egregio tractandi modo semper pedes claudos, praeue distortos, contractos ac male natos habebit certissime, nec per totam in posterum vitam unquam ad venationem rursus educi poterit, neque molles columbas, ut antea solebat, amplius adurgebit. Sed vae adhuc magis illis ipsis hominibus infortunatissimis, quorum penitus fracti, aut luxati grauius artus eadem peruersa, rudi et inconcinna methodo tractantur, ita, ut laxis tantum et cedentibus facile fasciis circumligentur, nullae autem simul ferulae, seu arundines apte circumponantur, quorum nempe solo remedio, seu ministerio repositi, in sua naturali sede immoti permanere, et ad solitam posituram ac situm pristinae naturae accommodatum sensim redire queant. Verum lepidum, immo lepidissimum prorsus est, quod in suam senticosam lententiam confirmandam mox subiungit idem ille lepidissimus Cenfor: *Veteres, sicut et nostri hodie faciunt, arundine, ligandi causa, utebantur*: Rara nempe res, quae PLINII et COLVMELLAE locis inprimis operose doceri merebatur! sed quid tandem, quaeso, docent PLINIVS atque COLVMELLA? Scilicet Arundine fissâ, vel Arundinum foliis, vulgo ad palum alligari solere teneras vites, aliasque fragiles et male firmas arbusculas et frutices: Sed quid, malum, hoc ipsum ad artus fractos, aut luxatos, eorumque fascias, vincula atque habenas? Nempe bellissimum et acutissimum est ratiocinium, a baculo scilicet ad angulum, ut vulgo loquuntur: quoniam vites per arundines palis adiunguntur, ergo et pedes fracti solis fasciis ex arundine confectis circumligantur.

Verum ex mea, et cuiusvis sani hominis sententia, ita potius concludere fas erat: Sicut tenerae vites et flexiles frutices per arundinea vincula ad palos in firmamentum alligari solent; ita et chirurgi fractos et collapsos artus remedio habenarum et fasciarum, ad rigidiores et solidiores ferulas atque arundines in fulcimentum alligare et firmare solent. Quomodo enim fracta, aut sedibus suis dimota, membra sola fasciatione, sine vlla tamen ferularum aut arundinum adpositione adstrictiore, dirigi, extendi, in sua sede contineri, compingi, solidari ac

confirmari possint; id profecto, quantum equidem sciam, nemo adhuc docuit, nemo in posterum, credo, docebit.

Illud autem CELSVS et omnes chirurgi contra vbique clare docent, fissas circumpositasque ferulas, per habenas adstrictius alligatas, ossa modo reposita in sua sede vnice continere, atque ad pristinam figuram posituram ac solidamentum sensim reducere, de quo nemo plane dubitat.

Neque vllum porro praesidium peruersae suae versionis et falsae sententiae, vt putat quidem, inuenit nouus noster Chirurgiae Magister in illis potissimum verbis: Κύκλω περιθῆς τῷ ποδι τῆς ὀρνιθός, καὶ περιδῆσον, h. e. *in orbem circumdes pedi arundinem, et eircumliges*: Quum certo certius sit, τὸ περιθῆς, vnice respicere ad κάλαμον, seu arundinem aut ferulam arundineam; alterum autem περιδῆσον, ad fascias, seu habenas, illis circumpositis ferulis ex more, superaccommodandas et circumligandas. Sic enim semper et vbique fere veteres Medici et Chirurgi Graeci loqui consueuerunt, vt scilicet dicant, περιθεῖναι, προστιθεῖναι, προσπεριθεῖναι, et ἐπιθεῖναι, item Κύκλω περιθέναι, νάρθηκας, ἢ καλάμους, ἢ φίλυρας, vt et κυκλοτερώς περιλαμβάνειν νάρθηξιν καὶ ταινίαις τὸ θραπυόμενον μέρος, nec non νάρθηξιν κατωρθῆν, item et ἐν νάρθηξιν περιδῆσαι, et ἐπιδῆσαι: Ex altera autem parte, περιβάλλειν, περιδῆσαι, ἐπιδῆσαι, περιελεῖν, ἀμφιελίσσειν, ἐπιδέσμευς, ταινίας, φασκίας, λῶρα, ἱμάντας, λαμπάδια, apud ARISTOPHAN. SVID. HESYCHIVM, PHOT. et alios, item κειρίας, τελαμῶνας, et similia plura, alibi iam a me copiose producta, quibus nunc adde varios de fasciis auctores apud GALEN. Tom. XII. Opp. in fine: vnde et frequentissima mentio apud eodem, τῶν ἐπιδέσμων, τῶν ὀθονίων, τῶν ἱμάντων et τῶν ταινίων περιβολῆς, περιελήματος, et περιελίξεως, vbiuis occurrit. Quod sane sexcentis hic locis veterum, nihil enim frequentius obuium est, facillimo negotio probari et confirmari posset, nisi nos inutilis et ingloriae scriptionis taedium iamdudum cepisset, nobisque hinc et temporis et spatii iam pridem occupati ratio omnino habenda esset. Pauca tamen ex quamplurimis selecta loca ac testimonia rudiorum et ipsius potissimum Censoris etiam aliquanto rudioris in gratiam, huc congerere, necesse

neceſſe videtur, vt ille nempe elatas criſtas ſubmittat, et ſero pudore ſuffuſus, obmutefcat.

Miror autem vel maxime, illum coeco vane contradicendi impetu abreptum, clariffimum iſtum locum HIPPOCRATICVM, e libro de *Fracturis* pag. 751. a me in ipſa mea priore Diatribe, dudum productum non animaduertiſſe, ſed intactum potius ſubdole praeteriſſe, quoniam nempe pro me valide pugnaret, ipſum autem validiſſime impugnaret. Sic autem ille: Ἐπὴν δὲ ἐπιδήσῃς τοῖσι ὀδονίοις, τὰς νάγθῃκας περιδεῖναι χεῖρ, καὶ περιλαβεῖν ἐν τοῖσι δεσμοῖσι: qui ſane locus, ſi vel vnicus eſſet, ſatis tamen inuertere prorſus et eneruare poterat frigidam et ieiunam Cenſoris ſententiam, dum nempe aperte et lucide docet, ferulas, ſeu Arundines circumponi, faſcias autem, ſeu Habenas, circumligari, adeo vt illum DEMETRII locum haecenus explicatum egregie prorſus illuſtret ac clariffima luce perfundat, noſtramque inprimis ſententiam validiſſime circummuniat, adeo vt nullus plane contradictioni locus iure amplius eſſe poſſit. Omnia enim exactiſſime in vtroque loco ſibi reſpondent, mutuamque lucem atque auxilium foenerantur. Dixerat nempe Rei Accipitrar. Auſtor: Κάλαμον κύκλω περιδεῖς τῷ ποδὶ, HIPPOCRATES autem pariter iſdem paene verbis: τὰς νάγθῃκας περιδεῖναι χεῖρ: alter porro ſcripſerat paullo breuius: Καὶ περιδέσῃς; HIPPOCRATES autem multo luculentius ac plenius: ἐπιδήσῃς τοῖσι ὀδονίοις, et mox: περιλαβεῖν ἐν τοῖσι δεσμοῖς. Nullum igitur, nullum inquam, prorſus reſtat dubium, quin vtriuſque loci idem ſit ſenſus, et alter obſcurior paullo DEMETRII locus ex clariore hoc HIPPOCRATIS omnino explicari et confirmari debeat. Inde ergo nunc liquidiſſime patet, τὸ κύκλω περιδεῖς, vnice reſpicere ad τὰς νάγθῃκας, ſeu καλάμους; alterum autem περιδέσῃς, ad faſcias, ſeu habenas illis circumpoſitis ferulis circumligatas, vt ſupra iam monuimus. Verum plura huiuſmodi loca huic plane gemina, in HIPPOCRATIS libris chirurgicis, de *Medici officina*, *Articulis*, *Fracturis* et *Mochlico*, quae- rant, et inuenient vbique ii, quibus plus otii voluptatiſque ad haec talia ſupereſt; nos enim, candide fatemur, iam dudum merito taedet pigetque inglorii et ingrati huius laboris, inprimis quum haecenus, et

praesertim hoc ipso de ferulis seu arundinibus argumento dolentes indignantesque deprehendimus, nobis cum homine, aut hominibus potius, rem esse, qui ex insanabili obloquendi cacoëthe ventosoque fastu paedagogico, et aliis foedis animi ulcerosi morbis, euidentissimas quoque veritates proterue in dubium vocant, de lana caprina aut tremulis arundinibus, acerbè litigant, ac cassos arenarum casses, tricasque meras, praeter ullam rationem, nectunt, et ubi nullus pulvis adest, tamen illum ipsum nullum ridicule prorsus excutiunt.

Sed et GALENUM, ut e diuerticulo iam in viam redeam, eodem plane modo, de circumponendis ferulis, saepissime loquutum fuisse, ex vastis eius operibus, passim abunde constat. Ita in *Comment. I. in HIPPOCR. Lib. de Fractur. Text. xli. pag. 179. Tom. xii. Opp. τὰς νάρθηκας ἀναγκαῖον περιβάλλομεν*, et mox: αὐτῷ περιτίθῃσι τὰς νάρθηκας, ibidem quoque *Comment. iii. Text. xi. et xii. pag. 237. occurrunt νάρθηκας προστίθεναι, νάρθηκας ἐπιβάλλειν*, item in sequentibus, *νάρθηκας περιτίθεναι καὶ περιβάλλειν*, ut et οἱ νάρθηκες προστίθενται, et περιτίθενται, veluti *Lib. vi. de Methodo Med. cap. 5. pag. 147. Tom. x. ἐγχορῇ νάρθηκας τε περιτίθεναι*: Sic et in *Comment. iii. in Lib. HIPPOCR. de Officina Med. p. 111. et sqq.* mentio fit aliquoties τῶν νάρθηκων κυκλοτερῶς περιτιθεμένων, et περικυκλωμένων, item ἐκατέρωθεν, et κυκλόθεν περιτιθεμένων, ut et τῶν ἱμάντων καὶ νάρθηκων κυκλοτερῶς περιτιθεμένων et περιβεβλημένων, ut supra iam obiter monui. Sed haec ex innumeris fere per omnes istorum in libros HIPPOCR. chirurgicos, commentariorum paginas, locis late dispersis raptim collecta, iam sufficiant, quae mihi obiter tantum et cursim spatiosa ista GALENI Volumina peruoluenti subito mentem oculosque perstrinxerunt: quum longe sane plura id genus coaceruari huc potuissent, si nempe necesse fuisset visum, aut vilis sanus de hac liquida veritate vnquam dubitasset.

Sic enim et praeter quosvis veterum medicorum alios PAVLLVS etiam AEGINETA saepius loquitur, uti *Lib. vi. cap. 99. τὰς νάρθηκας ἐπιβάλλειν*, et περιβάλλειν, ubi et τῶν νάρθηκων ἐπιβολῆς mentio fit. Praesertim autem huc sequens facit locus, ibidem: Ἐρίω, ἢ τυπείω, τὰς

τὰς νάρθηκας περιειλίσαντες, ἐπιβάλομεν πέριξ τῆ κατάγματος, *Lana*, aut *stupa circumuoluentes ferulas*, illas ipsi *fracturae circulo circumponimus*: Ex quibus nempe nunc clarissime simul patet, τὸ πέριξ ἐπιβάλλειν, idem esse, ac supra in nostro de Re Accipit. loco, κύκλῳ περιτιθέναι, et apud GALENVM, κυκλοτερῶς ὀθονίοις καὶ νάρθηξι περιλαμβάνειν τὰ πεπονθότα μέρη, vel ὀθόνια, ἢ ταινίας, καὶ νάρθηκας περιβάλλειν, ἢ περιτιθέναι. Ita et ABSYRTVS in *Hippiatricis*, vbi de *Fracturis* agit, dixit πλάστιγγας προστιθέναι, πλάστιγγας ἐπιτιθέναι, et alibi, in sequentibus, πλάστιγγια περιτιθέναι, vbi πλάστιγγες, seu πλήστιγγες, quod idem, nihil aliud sunt, quam ipsi νάρθηκες: Ita enim in Glossario HIPPOCRATICO GALENVS: πλήστιγγας, νάρθηκας, παρὰ τὸ πλήσσειν. Alias enim plura alia istam quoque vocem significare, vberius docent HESYCHIUS, SVIDAS, POLLUX, ATHENAEVS et alii.

Quemadmodum autem, vt pergam, per ipsam rerum naturam, et ex ipso consueto vbique artis chirurgicae vsu, Graeci Medici hac de re, non aliter loqui poterant, quam νάρθηκας, ἢ καλάμης περιτιθέναι, et περιβάλλειν, vt haecenus liquidissime, opinor, demonstrauiamus; sic et probos Latinos Scriptores et Medicos, et non Medicos, iisdem paene loquendi modis saepius vsos fuisse, certo constat, vt nempe dicerent, *Ferulas circumponere*, *Ferulas circumdare*, *Ferulas circumiicere*, et *Ferulas denique circumducere*: Sic igitur CORNELIVS CELSVS, loco illo luculento, a me iam in priore mea Exercitatione producto, *Lib. VIII. cap. X.* *Ferulae superaccommodandae sunt, quae fissae circumpositaeque, ossa in sua sede contineant*; item ibidem, paullo post: *Quinto die Ferulae circumdandae*: Pariter COLUMELLA, *Lib. VII. cap. V.* *Fracta pecudum, non aliter, quam hominum, crura, sanantur, inuoluta lanis oleo atque vino insuccatis, et mox circumdati Ferulis conligata*: qui locus imprimis exacte respondet nostro ex opere de Re Accipitraria, haecenus explicato et vindicato, in quo nempe pari sensu, legebatur: ὥσπερ ἔδος ἐστὶ ποιεῖν ἐπ' αὐτῶν τῷ τοιούτῳ πάθει περιπεσόντων Denique huc et illud VEGETII *Lib. II. Artis Veterin. Cap. XLVII.* *Circumductis Ferulis alligabis*, scilicet fracturam, siue fracta crura. Neque sane aliter

de Ferulis circumponendis, post hos veteres, recentiores loquuntur Chirurghi praestantissimi, vti VESALIUS, HILDANUS, PARAEUS, SCULTETUS, MAGATUS, CHALMETEUS, et alii, immo HEISTERUS, SCHVLZIUS, PLATNERUS, et alii paene innumeri. Sed de his haftenus, quibus id vnum adhuc adiicere liceat; praeceperat nempe supra Hieracosophici auctor: κάλαμον ζύσας ἐμμελῶς, κ. τ. λ. id quod ipse quoque iubet pari sententia, GALENUS, *Comment. III. in Hippocr. Lib. de Med. Officina, Text. XII. pag. 79. Tom. XII. Opp.* dum commendat praecipue in usum Chirurgicum, τὰς νάρθηκας ἀποξησμένους ἀτρέμα κατὰ τὴν κάτω χώραν, quos scilicet HIPPOCRATES in ipso suo libro, vocauerat λείβς, ὀμαλὲς καὶ σιμὲς. Alias enim Arundines nodis instructae sunt, vnde *nodosa Arundo*, apud PERSIUM, PLINIVM, AVSONIVM, et alios: Inde igitur noster Hieracosoph. Auctor: τὸν ἐν καλάμῳ κόνδυλον ἐξισώσας: hoc est, *arundinem* seu *calamum fac enodem*, vt eleganter ait CELSUS, et saepius PLINIVS. Quid autem, quaeso, opus erat, Nodum prius in Arundine explanare, si de foliis arundineis sermo ibi esset, in quibus nempe nulli plane sunt nodi, qui potius in ipso arundinis scapo inveniuntur, vt vulgo quidem notissimum? Hoc ergo utique erat nodum in scirpo, aut in folio, frustra quaerere.

Verum haec de isto quidem loco iam demum monita funto: ex quibus aequus et eruditus Lector, sat scio, non sine graui indignatione, protinus intelliget, quam inique et subdole, et cum ipso illo loco, et nobiscum praesertim, egerit: cum isto quidem, quod prava et implicita versione clarissima verba foede corrumpere; nobiscum autem, quod nobis praeter necessitatem ac rationem vllam, duram illam necessitatem imponeret, ad eiusmodi abiectas minutias, praeter consuetudinem nostram, diffuse respondendi, nemini non notissima vberius explicandi, atque adscitis vndique testimoniis et exemplis fortius confirmandi.

Iam vero ad alterum eiusdem de Re Accipit. Scriptoris locum illico transeamus, quem pari quidem temerario ausu, sed et pari infelicitate et sinistro prorsus euentu, adortus est idem ille vel innocentissimorum

tissimorum verborum pensitator, si Diis placet, subtilissimus: Scilicet, *ubi*, vt VELLEIVS acute ait, *semel recto deerratum est, in praeceps pervenitur*. Licet enim locus iste, vti mox videbimus distinctius, ipsa fere luce meridiana clarius sit, licet nulla plane in verbis obscuritas, nullum prorsus in sensu ipso dubium appareat; tamen et hic, quis credere aufit? turgidi fluctus quasi in simpulo, ridicule mouentur, clarissimae luci fordidae nebulae inducuntur, et liquidissima verba horrida plane ac prodigiosa versione ita inuoluuntur, et infelicissima interpunctione, adeo vsque distorquentur, vt vix vllum sani sensus vestigium, vel simulacrum perquam exiguum inde relictum maneat. Sed en nunc illa ipsa verba, suo clarissimo quidem lumine radiantia: τὰ δυνάμενα θεραπευθῆναι κλάσματα ἐπιθήσας ῥάβδῳ ἢ καλάμῳ, ἐξίσωσον ἢ τὸν πόδα, ἢ ἕτερον μέλος: Quae sane per ipsam rerum naturam, et natiuam ipsius graecae Linguae indolem, nunquam, nunquam inquam, aliter latine verti possunt, ac debent, quam illo, quo nos iam fecimus, modo: *Quae sanari adhuc possunt, Fracturae, ad Ferulam, siue Arundinem alligandae sunt, ita nempe, vt pes, siue alia pars, aequaliter extendatur, ad iustam Regulam exigatur.*

Sed planissima hac et verissima nostra versione non contentus nouus noster Logodaedalus, quia scilicet in rem suam haud videretur; hanc potius nouam et inauditam hactenus interpretationem audacter procudit, vt scilicet noctem peccatis et fraudibus suis nubem obiiceret: *Quae sanari adhuc possunt fracturae, alligēs ferulae, aut arundine adaeques, siue sit pes, siue aliud membrum*: Deinde post hanc semi-barbaram atque soloecissimam versionem, egregie pergit latinitatis scientissimus noster auctor; *Opponitur igitur arundo ferulis, quae vinculi, aut fasciae vicem pensare dicitur, eadem ratione, ac ante dictum est. Si ῥάβδῳ, et καλάμῳ, non essent res diuersae; certe Auctor unicuique voci non adiunxisset proprium verbum*: Haec quidem ille; lepidissime, vt nempe putat, et acutissime: ast, vt ego verius censeo, et protinus re ipsa liquidius demonstrabo, omnium falsissime et inconsideratissime. Quot enim fere in hac proposita sententia et peruersa versione extant verba; tot profecto grauissimi lapsus et foedissimae hallucinationes in eadem

eadem vbiuis deprehenduntur. Namque, vt ex superius dictis affirmam iam, opinor, constabit, *νάεθνηξ* atque *κάλαμος*, ceu res diuersae, hic nequaquam sibi inuicem opponuntur, multo minus vnicuique voci proprium adiungitur verbum, vt temere quidem traditur; sed potius apte sciteque inter se inuicem componuntur, et pro aequipollentibus plane synonymis sumuntur, adeo, vt proinde falsissimum sit, vnicuique voci proprium hic adiunctum fuisse verbum; quum omnia potius e contrario, verba et voces arctissime inter se coniungantur, ita, vt diuelli a se inuicem, sine sensus detrimento, prorsus nequeant, vti scilicet ex ipsa naturali verborum istorum serie manifestissime, opinor, patet.

Quid enim illa quaeso, verba: *κλάσματα ἐπιθήσας νάεθνηξ ἢ καλάμῳ ἐξίσωσον*, κ. λ. aliud queant significare, quam hoc ipsum: *Fracturae alligandae sunt*, (scilicet per fascias, seu Habenae,) *ad ferulam, siue, quod idem, ad Arundinem, vt pes fractus, siue aliud membrum fractum, fissum, aut collisum, earum ope ac Remedio, aequaliter extendatur, atque in sedem suam naturalem modo repositum, immotum aequali positura contineatur?* *ἐξισώσασθαι* enim *καλάμῳ ἢ νάεθνηξ*, hic idem prorsus est, ac quod HIPPOCRATES, GALENVS, AEGINETA, PALLADIVS et alii dicunt, *νάεθνηξ κατορθῶν*, vt supra iam monitum. Quid igitur, malum, in illa obscurissima Censoris versione, illud est: *aut arundine adaeques?* quis sanus, obsecro, haec intelligat? quomodo enim foliis arundineis, quae hic iterum incassum crepat nouellus interpres, fracta membra, sine circumpositarum commode ferularum et arundinum ministerio et adiumento, adaequari possint, nemo artis chirurgicae vel mediocriter peritus facile dixerit, vt supra iam liquidissime ostendimus. Quare profecto non erat, quod superbe adiceret subtilissimus noster Criticus: *eadem ratione, ac ante dictum est*: Quum scilicet ex superius dictis iamiam abunde constet, eum nihil prorsus dixisse, nec vlla ratione istam vanissimam suam de vinculis arundineis opinionem probasse, aut confirmasse. Nec hic quidquam, crede mihi, cum ratione vlla dixit; quin potius adhuc grauius lapsus est, et nihil prorsus

prorsus aliud, nisi petulantissimam temere obloquendi et omnia conturbandi libidinem manifestissime prodidit.

Quibus vel maxime adhuc accedit, ipsum HIPPOCRATEM, *Libro de Fracturis*, pag. 743. eodem plane, ac apud nostrum Auctorem, hic legitur, modo, dixisse, *νάεθῆξι τελέως ἐπιθεῖν*, *Ferulis perfecte deligare*, nempe per circumiectas Habenas, quod nemo prudens de vinculis ferulaceis temere intellexerit: Nam in antecedentibus, distincte docuit HIPPOCRATES de Fracturis prius lanis tantum et lintheis, sine adiectis ferulis, deligandis; nunc autem diserte praecipit, quo demum tempore, ferulae sint etiam circumponendae, et fasciis alligandae, vbi vid. GALEN. in *Comment. Tom. XII. pag. 251. ἐπιθήσας* igitur *νάεθῆξι ἢ καλάμῳ*, nullum alium, nullum prorsus alium habere hic sensum potest, quam illud Hippocraticum, *νάεθῆξιν ἐπιθεῖν*, quae ipso sole meridiano fere sunt clariora. Quodsi ergo noster Rei Accipit. Auctor scripsisset; *ἐπιθήσας καλάμῳ, ἢ νάεθῆξι ἐξίσωσον, κ. τ. λ.* tum sane ipse Censor aliquem forsan, etsi leuissimum, colorem suae contortae futilique sententiae inducere potuisset: Dum autem contra ille potius scripsit: *ἐπιθήσας νάεθῆξι ἢ καλάμῳ ἐξίσωσον*, nemo non, vel ipso Tiresia caecior, protinus manifestissime, opinor, perspicit *κάλαμον* atque *νάεθῆκα* synonyma prorsus esse, neque vlllo modo, et per rerum naturam, et per ipsas Grammaticae regulas, vti supra ostendi, a se inuicem diuelli posse. Si enim ferulis artus fracti alligantur; sequitur exinde liquidissime, et arundinibus illos alligari posse et solere, cum, quia ferulae et arundines hic indissolubili copula coniunguntur; tum, quoniam arundines olim frequentissime ipsarum ferularum usum praestiterunt, vti mox euidentissime demonstrabitur. Quid enim diutius iuuat vano indulgere labori, et cum laruis et lemuri- bus amplius incassum luctari, aut febriculosa ista insomnia in vagos ventos, volucresque fumos confestim sua sponte euolutura operose nimis refellere?

Scilicet nunc, hem tempus enim est! temerarius noster aduersarius vno eoque grauiissimo ac valentissimo ictu, semel simulque prosternendus ac contundendus est, ipsique omnis elabendi occasio pe-

nitus circumcidenda, ut pudibundus moestusque, fateri tandem cogatur, sese hucusque frustra tantum imbelli et obtuso ferro, vel tremula potius arundine, vanas umbras diuerberasse, oleum et operam prorsus perdidisse, atque a recto veritatis tramite toto quidem coelo aberrasse, licet supra, ut scilicet more suo iactanter solet, *certissime persuasus esset, sese non facile ab illo aberraturum.*

Nimirum iam paucis, verissime tamen ac certissime, docendus est homo indocilis, ut nempe et hoc, sicut omnia alia, *certo certius* in posterum sciat, *Ferulas olim ex arundinibus frequentissime fuisse confectas, hincque ferulas atque arundines omnino esse synonyma et promiscua vocabula:* inprimis, quum utraeque congeneris fere essent naturae, adeo, ut inde THEOPHRASTVS, *Lib. I. cap. 9. et Lib. IX. cap. 16 Hist. Plant.* et alibi, *κάλαμον καὶ νάρθηκα*, scite coniunxerit, et *Lib. VI. cap. 2.* manifestius addiderit: *τὰ γόνυατα περιειληφότα τὸν καυλὸν τῆ νάρθηκος ἐπὶ πολὺ, κατὰπερ τὰ τῆ καλάμου*, item et HESYCHIUS bene inde scripserit: *Νάρθηξ, εἶδος καλαμοειδὲς ἐλαφρῶς*, qua de re vid. GORRAEVM, in *Definit. Med.* suo loco, ut et RITTERSHVSIVM, ad *Oppiani Lib. IV. Cyneget. pag. 146.* praesertim autem CLAVD. SALMASIVM, de *Homonym. Hyles Istr. cap. III.* vbi plura, quae et huc spectant, et ad ea, quae in sequentibus mox dicenda restant, inprimis pertinent.

Istae igitur Assulae, siue Tabellae Chirurgorum veterum, primo tempore, ex ferulis potissimum parabantur; deinde autem, quum illae ferulae non ubiuis locorum, commode essent habendae, inprimis, quum nondum satis certum et exploratum sit vel inter ipsos veteres, qualis planta, vel frutex proprie fuerit ferula ista in Chirurgorum quidem usum potissimum expetita, quod ex THEOPHRASTO, DIOSCORIDE, PLINIO et aliis, liquido ostenderunt IO. BOD. a STAPPEL, CLAVD. SALMASIVS, laudato modo loco, SIMON. PAVLI, in *Quadripart. Botan.* GORRAEVS, DALECAMPIVS, et nostri aevi Theophrasti, ac Crateuae, MORISON, RAIUS, BOERHAAVIUS alique plures; quanquam ipse TOVRNEFORTIVS se veram veterum ferulamprehendisse, commemorat, in eruditissimo suo itinera-

rio, *Tom. I. Epist. VI. pag. 290. sqq.* et in *Corollar. Institut. Rei Herbar. XXI.* quum, inquam, rarius istae verae ferulae inuenirentur; inde ergo factum est, vt postea istae Assulae, siue Tabellae ex alia magis obuia et parabili diuersarum arborum materie pararentur; pristinum tamen ferularum nomen generale omnibus illis ferulis vicariis impositum nihilominus ex consuetudine, remaneret: Quemadmodum sic pyxidem auream et argenteam ex more, vocare solemus, quae tamen prius ex sua origine, a sola buxo nomen suum sortita erat, bene monente SENECA, *Lib. V. de Benef. cap. 13.* vbi vid. LIPSIVM, GRONOVIVM et alios, nec non, si placet, *Observat. nostrar. Crit. Lib. IV. cap. 8. pag. 343. sqq.* item pari modo, chartam plumbeam, et pocula Thericlea, argentea, aurea, eburnea, et terebinthina, quae tamen prius tantum erant fictilia, vt notum ex variis Auctoribus ibidem a nobis allegatis: *Quaedam enim, eodem SENECA acute observante, etiamsi vera non sint, propter similitudinem tamen, eodem vocabulo comprehendī saepius solent.*

Hinc ergo nomen *νάεθνος* omnibus illis arboribus ac fruticibus postea adhaesit, quorum teneriores ramuli ac virgae ferularum, seu baculorum vsum praestabant: Inde passim apud Graecos legitur: *νάεθνος ἰτέας, φηγῶ, φιλύρας, φοίνικος, καλάμω, πεύκης, ἐλάτης, λεύκης, κρανίας, πτελέας, κόμυθος, δρυὸς, πρίνου, ἀμπέλω, καρύας ἡρακλέωτικῆς*, et similia plura passim hinc inde obuia.

Rectissime proinde, et ex veterum quidem mente verissime scripsit quondam VIDVS VIDIVS, Vir magni nominis, in isto loco, perperam et procaciter in dubium ab Aduersario vocato: *Vocantur ferulae, quod ab antiquis ex ferulis conficerentur: commode etiam fiunt ex ligno leui, quod facile flectatur, vt ex salice, palma, arundine, pinu: commodissime nunc praesto sunt e fago, vbi vide sequentia.* Conf. et inprimis IO. SCVL-TETI *Armament. chirurg. Tab. XXVIII. Declarat. pag. 84.*

Tilia autem potissimum materiam primitus subministrabat ferulis illis chirurgicis fabricandis: id quod luculentissime testatur GALENVS, *Comment. III. in HIPPOCRAT. Lib. de Med. Officina, Text. XXXII. pag. 101. Tom. XII. Opp. ἐκ φιλύρας, ἢ τινος ἑτῶς εὐτόνως τε καὶ μαλα-*

καὶ ξύλα ποιεῖμενοι δὲ λεπτὰ σανίδια, *ex tilia, vel ex tali aliquo ligno ita firmo mollique tenuēs asserculos paramus*; conf. ibidem *Comment. II. in HIPPOCRAT. Lib. de Fracturis, Text. LXV. pag. 219.* inprimis autem eximium illum ac primarium PALLADII locum mox producendum: Inde igitur σάνις φιλυρίνη, apud HIPPOCRATEM, *Lib. de Articulis. pag. 803. Tom. II. Opp.* et σάνις φιλύρας τῇ ξύλῳ, apud ATHENAEVM, ARISTOPHAN. POLLUCEM et alios; indeque Imperator ANTONINVS PIVS, teste IVLIO CAPITOLINO, *tiliaceis tabulis fasciabitur*, ex quibus quippe locis iam supra, et in ipsa nostra priore Exercitatione, opportune adductis, luculenter nunc certe patet, frequentissimum olim fuisse vsum tiliacearum ferularum, seu assularum, ex tenero tiliarum ligno confectarum. Longe tamen frequentiori et vulgatiore in vfu ipsas fuisse *arundines*, vbi nempe nulla praesto esset tiliacearum tabellarum copia, sequens inprimis praestantissimus PALLADII Iatrosophistae Alexandrini quondam celeberrimi locus notatu sane dignissimus, manifestissime euincit, et liquidissime testatur. Legitur autem iste primipilaris quidem locus, vt cum nostro primipilari in postremo Eruditorum agmine critico magnifice loquar, in PALLADII scholiis, in HIPPOCRATIS *de Fracturis Librum, Tom. XII. Opp. GALENI, pag. 277.* et in *Opp. HIPPOCRATIS, per FOES. pag. 923.* vbi ex instituto de Ferularum materia longitudine et latitudine tractat, ex quo haec inprimis verba huc vel maxime pertinent: δὲ τῶν τῶν νάρθηκας παραλαμβάνειν, ἢ ξύλα φιλύρινα, ἢ εἰ μηδὲν τῶν εὑρεθῇ, δὲ Καλάμους λαμβάνειν, *Ferulas has assumere oportet aut ligna tiliacea, aut, si horum nihil reperiat, arundines adhibendae*: quibus paullo post haec subiungit: εἰ δὲ εἰς τὰ ὑπόζηρα φορεῖν τῶν Καλάμους, ἢ ἐγγὺς τῇ μικρῇ δακτύλῳ, *Non oportet arundines illas, seu ferulas arundineas, in partes extenuatas ferri, aut prope parvulum digitum*: item *pag. 282.* εἰ δὲ καλάμους βάλλειν, *non sunt autem arundines apponendae*, et *pag. 284.* μὴ δὲ ὅλως δὲ καλάμοις χρῆσασθαι, *in totum, (in inflammatione scilicet) arundinibus uti haud licet*: semper autem νάρθηκας καὶ καλάμους, ibidem pro synonymis habet Auctor. Sed ne vel minimum prorsus dubii, aut effugii relinquatur, addamus his, vt liberales simus, alium non minus

nus insignem et egregium locum e *Libro III. de Remediis parabilibus*, GALENO vulgo adscripto, *Tom. x. Opp. pag. 661.* πρὸς Κλάσμα ὀστέων, λαβὼν πίσσαν, καὶ κόνιν τῆς λιβάνου, καὶ φοινίκια, καὶ ἀνθος μάλαχης, καὶ τῆς ὠστὸς τὸ λευκόν, ἐπιθεῖς δὲ ἐπάνω τυμπέια, καὶ Καλάμωσον, καὶ Φασκίωσον, καὶ ἰάται, h. e. *ad ossa fracta: Recipe picem, thuris pulverem, palmulas, malvae florem, et oui album: mixta imponito, et stupa superaddita, Arundines circumponito, et Habenis, seu fasciis, deligato, sanabitur.* Vbi sane vel maxime notanda bina illa et distincta verba: Καλάμωσον καὶ Φασκίωσον, quae nemo prudens, spero, interpretabitur: *arundineis vinculis circumligato*: Verbum enim Καλαμώσασθαι, seu καλαμαῶσθαι, hic idem est, ac νάρθηκίσαι, apud GALENUM, ut creditur quidem, in *Introd. seu Medico, cap. xx. pag. 398. Tom. II.* et PAVLVM AEGINETAM *Lib. VI. cap. 106. pag. 100.* κατεαγότα κῶλα νάρθηκίζειν, ut plura alia passim obuia iam taceam. Vnum tamen his omnibus adhuc omnino adiiciendum hic hanc in rem est testimonium et argumentum, et quidem longe grauissimum et luculentissimum, quod ex inedito adhuc ΡΗΟΤΙΙ *Lexico*, peropportune produxit Cel. KÜSTERVS, ad *SVIDAE Lexicon, Tom. II. pag. 413. voc. λαμπάδια.* En vero nunc ipsa ΡΗΟΤΙΙ verba, notatu certe dignissima: οἱ δὲ νάρθηκα (immo forte rectius, νάρθηκας,) καὶ καλάμους, οἷς δεσμεῖσι τὰς τὴν κνήμην κατὰξαντας, quidam vero *Ferulas, et Arundines per λαμπάδια, intelligunt, quibus deligant scil. chirurgi, illos, qui crus, seu tibiam fregerunt.* Qui locus sane eximius, vnus omnium manifestissime et solidissime probat, id quod iam toties dicendo monendoque iteravi, νάρθηκας nempe atque καλάμους, seu *Ferulas et Arundines*, vbique fere συνωνύμως sumi solere in Veterum Medicorum et Chirurgorum Libris. Sed hac commoda occasione, luxato aut fracto cuidam HESYCHII loco quandam criticam veluti arundinem et habenam simul applicare liceat, quo rectior ille scilicet in posterum incedat. Sic autem vulgo legitur: λαμπάδιον, τὴν λεπτὴν κνήμην, ἐν ᾗ ἐπιδιδῶσιν: quae quum perquam obscura sint, et sensu perspicuo careant; ita mihi commode emendanda videntur: τὴν λεπτὴν κνήμην, ἐν ᾗ ἐπιδέσσω, vel ἐπιδεσμεῖσι, scil. τὰς νάρθηκας, ἢ καλάμους, vel et κατεαγότα κῶλα,

κῶλα, ἢ ὀτᾶ, h. e. λαμπάδιον tenuem fasciam, seu habenam vocant, qua alligant ferulas vel arundines, aut fracta membra seu ossa deligant, sensu nunc plano prorsus atque manifesto, qui ipse valide confirmatur ex egregio illo PHOTII loco, modo allegato. Ceterum autem κειρίαν, pro vitioso illo κηρία, legendum esse, recte iam vidit SONINGIVS, in *Notis*. Sed haec haec tenus.

Quid igitur his ipsis exquisitissimis plane locis, vna cum illis ex opere de Re Accipitraria, supra iam productis et grauiter vindicatis, luculentius, manifestius, aut validius reperiri possit, ad tutandam et circummuniendam nostram de ferulis et arundinibus, ceu synonymis, sententiam, et simul ad euertenda penitus ac contundenda infelicissimi oppugnatoris ficulnea plane argumenta, atque arundinea tela confringenda; id lequidem exputare non facile possum. Certe enim omnia in illis tam liquida, manifesta, perspicua, plana et incontrouersa deprehenduntur, ut ne ipse quidem Carneades, si ad superos forsan rediret, sat scio, de istorum confessa et explorata veritate vnquam esset dubitaturus. Nihil igitur, nihil prorsus nouae, durae ac tenebricosae versiones hic proderunt cum *Bulbis suis*, nec vllum profecto praesidium inueniendum amplius erit in infirmis fluxisque illis vinculis ex arundinum foliis male nexis, maleque tenacibus.

Quid vero nunc ad haec noster conductitius Altercator? Quale nunc consilium in arena capiet gladiator hic circumuentus? forsan ad hoc lucidissimum veritatis inconcussae iubar, exsanguis, attonitoque similis, stabit, per metum iuste promeritae poenae, voce etiam suppressa: forte et curret, sataget, trepidabit, tanquam mus in matella, ut ille ait: scilicet

*Has importunas volucres in vertice arundo
Terret fixa.*

Haud tamen, si quid adhuc ingenui pudoris superfit, spero, resistere ac repugnare contra veritatem audebit. Sed cur bonus iste homo non tacuit? cur alienum plane negotium curauit? cur rei ad se nihil pertinenti sese temere immiscuit? ut POMPONIUS Ictus sapienter monet: cur sua exigua sorte non contentus, alieno consilio et auxilio maior doctior-

doctiorque videri voluit, quam re ipsa erat? immemor prorsus sapientissimi illius consilii a G A I O nobis relictī: l. 8. ff. ad Leg. Aquil. Quū affectare quisque non debeat, in quo vel intelligit, vel intelligere debet, infirmitatem suam alii (imo hic sibi) periculosam futuram. Cur alium ipso forsā paullo fortiorem, imbellior ipse, in arenam procaciter prouocauit? cur inanissimis suis iurgiis meliorem molestauit, qui ipsum prius nunquam inquietauerat? Sed ipse nunc sibi soli imputet, si digne plectatur, nec leuibus arundineis foliis vinctus detineatur, sed validioribus potius Arundinum ferulis vehementius percutiatur. Ipse enim sibi mali sui fontem suo genio repperit, ipse hanc technam in se struxit, et Camarinam temere commouit; ideoque etiam nunc exedat, quod sibimet ipsi intriuit:

Tibi, quod intristi, exedendum est; sic vetus verbum iubet;

Compedes, quas ipse fecit, ipse ut gestet Faber.

Sed nunc ipse illos suos aridos fontes adeat, ex quibus aquas suas furtiuas hausit; ipse nunc accedat illos suos Auctores, Augures et Petauristarios, qui sibi et scribendi contra nos, calidum nimis consilium, at frigidum nimis auxilium subministrarunt, vt sibi nunc demum, tot malis atrocissimis circumuento suppetias ferant, seque penitus prostratum, humique fusum et extentum potenti dextra erigant, mortique propinqua eripiant: Verum ter frustra fidos suos, aut perfidos potius fodales ingenti clamore vocabat. Ipsi enim illi calidi incitatores, male sibi conscii, turpi iam fuga dilapsi, terga fugacia verterunt, relictā non bene parmula, ipsumque in luto misere haerentem, diuosque incassum inclamantem, et conantem plurima frustra, praecipitem, ac socios nequicquam saepe vocantem dolose deseruerunt:

Ipse rotis saliens frater tendebat inermes

Infelix palmas, curru delapsus eodem,

Da dextram misero, atque instantibus eripe fatis.

Verum, ne ancipiti mentem formidine pressus, in extremum plane discrimen adducatur, dimittamus, si lubet quidem, nunc demum hominem, haud prorsus, credo, malum, et aliena potius, quam sua, culpa peccantem, et in has ineluctabiles aerumnas coniectum, imprimis,
quum

quum vt ipse de se modeste, pro more suo praedicat, *mox ad thermas Carolinas sit profecturus, et quidem ocyus, hoc praesertim anno, quam alias consueuerit, quoniam nempe nonnulli aegroti iam laetum ipsius aduentum anxie ibi expectent.* Quod vero cur huic epistolae nunc publicatae, et ad plures lectores, quam me solum, directae, inseruerit, ego quidem divinare haud possum, nec volo. Forsan tamen ipsa vera huius indicii, magni scilicet momenti, caussa et arcana ratio facile indagari poterit. Ne igitur in publica commoda proterue peccemus, illosque nonnullos, aut nullos aegrotos ad extremam vsque ambiguae salutis desperationem nostra quidem culpa, adigamus; sed potius ad laetiores spem reuocemus, qui tanti benignioris AEscVLAPII praesentissimum scilicet auxilium impatientissime operiuntur; ipsum nunc demum arundineis suis vinculis cum bulbis quoque suis, arctius constrictum, data prius venia, exsoluamus, et hoc tam necessarium ac multis scilicet salutare iter libere prosequi sinamus, additis tamen; pace quidem ipsius, sequentibus Viatici loco, monitis saluberrimis, vt nempe habeat, quo in molesto illo et confragoso in ipsas Thermas Carolinas, itinere tempus utiliter fallat, animum vacuum salutaribus praeceptis instruat, et in posterum rem suam cautius agere discat.

Primo igitur per omnem suam vitam aeternum fileat de abiectissimo illo atque inanissimo argumento ex PLINII, CELSI, SVETONII, et aliorum veterum auctorum silentio petito; illudque, ceu venustiore ingenio plane indignum, in posterum abominetur. Manifestissime enim ex his ipsis haecenus late disputatis, nunc, spero, fero licet nimis, intelliget, PLINIVM ac CELSVM nihil quidem de vsu ferularum ex Arundinibus confectarum commemorasse; et tamen illo ipso altissimo silentio non obstante, verissimum simul ac certissimum esse, quod Arundines in chirurgicarum Ferularum frequentissimum vsu perpetuo fuerint adhibitae, quod scilicet tot argumentis plane inexpugnabilibus superius probauimus, vt nulli prorsus, etiam ne minimae quidem contradictioni vllus pateat locus, aut vllum effugium.

Secundo, supplex, et fero frontem pudore perfusus, ad optimi VIDI VIDII clementiam confugiat, grauiorisque delicti veniam petat,

tat, quod ipsius fidem et auctoritatem temere ac proterue subleſtam reddere conatus fuerit: hincque venerabilem illum Senem enixe oret atque obteſtetur, ne ſemet ipſum ex merito quidem, ſecundum *leg. 33. ff. de S. C. Siliano*, minaci ferula aut habena, excipiat, iubeatque

Vt ſubeant tenerae verbera ſaeua manus.

Tandem ſeria poenitentia actus, exinde diſcat, idoneos vtique, ac gra- viſſimae auctoritatis Auctores habuiſſe eundem VIDVM VIDIVM, li- cet breuitatis ſtudio, non indicatos, quum aſſereret, Veterum ferulas ex Arundine fuiſſe paratas, ſcilicet GALENVM, PALLADIVM, PHO- TIVM, *Scriptores Hieracoſophicos* aliosque ſupra late commemoratos ac productos.

Tertio, deterrimas illas ac falſiſſimas Verſiones Latinas binorum iſtorum Locorum, ex iis ipſis de Re Accipit. Scriptoribus deſumtorum ac ſuperius grauiter vindicatorum, indignabundus, plane deleat, et aeternis tenebris damnet, vltroque fateatur, grauiſſimis nempe illis Scriptorum modo laudatorum testimoniis plane plenèque conuiſtus, nihil illis quidem infelicius et ab ipſa Graecae Linguae indole ac veri- tate ipſa, alienius vnquam excogitari, aut in dias luminis auras protru- di potuiſſe.

Quarto, et ipſum ſerio pudeat, quod ipſe nimis in errores, prae- iudicia, et caecae improuidaeque feſtinationis vitia pronus, ſcribere ta- men non erubuerit, *nos nimis pronos in noſtras partes, Ferulas atque Arun- dines falſo, pro Synonymis habuiſſe, quod nullus Interpretum Hippocratico- rum fecerit.* Hinc potius candide, moneo, fateatur, nos rectè quidem feciſſe, quum iſta HIPPOCRATIS Graeca ita Latine verteremus, ex rationibus nempe ſupra abunde datis; ſe ipſum autem contra male omnino iudicaſſe, et de re non intellecta nimis audacter et caſtigatoria quaſi ſeueritate, pronunciaſſe. Ad haec doleat quoque, ſi pudorem adhuc habeat, quod hac ſua deſidioſa occupatione, negotioſum no- ſtrum otium temere interturbauerit, nobisque aliquot meliores horas non redituras eripuerit, vt illas labori potius perituro, quam multum profuturo, impendere cogere- mur.

Quinto denique, et illa dictatoria contra nos verba pudibundus, retrahat et aboleat penitus: Cur potius faveamus mutationi atque correctioni, quam nec unius Codicis MSti auctoritas, aut fides probavit? Sed quae tantum coniectura nititur: quum bono Interpreti omnino religio sit, mutare Lectiones, dum Codices silent, bene memori dicti illius Martialis: Improbe facit, qui in alieno Libro ingeniosus est.

Nimirum hic demum, suo ipsius indicio, se vel maxime prodit Sorex, suoque ipse laqueo capitur, alienamque prorsus, etsi sterilem, messem metit novus noster Criticus, dum ad Veteres Codices MStos prouocat, quos tamen nunquam vidit, multo minus versauit, aut versare vnquam didicit: Quam ridicule nos de probi boni Interpretis officio admonet, sicque lepide prorsus plus docet, quam didicit ipse, nimius sane in praedicandis doctrinis suis Venditator: Quasi nempe bene calleret, quale demum boni Interpretis esset officium, quo nunquam ipse, omnium autem minime, in hoc ipso Suetoniano loco explicando, functus fuit. Sed quam multa hic ad has minutulas ac vulgares obiectiones facillimo negotio responderi, obsecro, possent, si nos quidem aut otio, aut scribendi voluptate ac voluntate iam abundaremus, aut nobis denique cum homine harum rerum elegantiorum paullo peritiore, hoc loco, res esset? Nempe omnibus doctioribus Viris dudum constat, maioris omnino esse laboris, quam ingenii aut doctrinae, Veteres Codices MStos ab edacibus tineis paene exesos sollicita cura versare, et variantes hinc inde Lectiones scrupulose, sine discrimine, colligere: Sed quid tum proderit quaeso, inglorius et inutilis iste Labor, vbi ex vno mendoso Codice antiquo, antiqui illi Errores in reliquos omnes transcribendo, sensim propagati fuerint, qualis tum, obsecro, fides habenda erit venerandis illis et adorandi quasi fitus plenis, si Diis placeat, Codicibus? Quale de TACITI, PETRONII, PLINII, APVLEII, VELLEII, OVIDII, immo ipsius nostri SVETONII, item THEOPHRASTI, ARISTOTELIS, ATHE-NAEI, ARETAEI, APPIANI, AELIANI et aliorum Auctorum Veterum Codicibus MStis, dudum recte obseruarunt LIPSIUS, GRVTERVS, TORRENTIVS, CASAVBONVS, HEINSII, SALMA-SIVS,

SIVS, BURMANNS, ELMENHORSTIVS, PRICAEVS, et praefertim in *Arte Critica*, 10. CLERICVS, conf. FREIND, in *Histor. Med. pag. 381.* et nostras *Observat. Crit.* passim: ut taceam iam notissimam ubiuis Veterum Librariorum et Scribarum inscitiam et supinam negligentiam: *) Tum sane magni Laboris, maioris tamen ingenii, et maximi denique iudicii res est, tectas illas et aliis indeprehenfas mendas sagaciter indagare, indagatas indicare, indicatas acute, blande et ingeniose emendare, emendatas autem validis argumentis et idoneis exemplis locisque congruis vndique confirmare, sicque ad summum probabilitatis gradum sensim euehere, ut nemo non, velit nolit quasi, eiusmodi ingeniosis et verisimilibus Emendationibus assensum suum statim sua sponte praebere cogatur. Qua insigni sublimioris Artis Criticae felicitate, aeternam nominis sui famam sibi quondam peperisse, arcesque quasi igneas attigisse constat Viros omni aevo maximos, SCALIGEROS, LIPSIOS, GRUTEROS, LEOPARDOS, MURETOS, CANTEROS, HEINSIOS, RUTGERSIOS, MEYRSIOS, VOSSIOS, GROTIOS, SALMASIOS, CASAVBONOS, REINESIOS,

C c c 2

PALME-

*) Hac opportuna occasione, non possum hic reticere lepidissimam illam Historiam de celeb. FULVIO VRSINO, et quidem purissimae Latinitatis stilo, nitidissime relatam a IANO NIC. ERYTHRAEO, in *pinacothec. I. pag. 10. per vetustis Codicibus, quorum multos in sua Bibliotheca habebat, immania pretia faciebat: atque illud accidit perridicule, quod, cum die quodam, FRANCISCO CARDINALI TOLETO, TERENCEII comoedias ostendisset, easque affirmasset, ante annos mille, fuisse conscriptas, ac re vera essent antiquae; sed mire deprauatae atque corruptae, et addidisset, nullam esse pecuniam, quae antiquissimi illius Codicis aestimationi par esset; prob Deus! Cardinalis inquit, quid audio? equidem mallem Codicem unum, quantumvis recens impressum; sed castigatum emendatumque; quam decem alios mendosos et corru-*

ptos, quamvis Sibyllae manu exaratos: Ritus omnium, qui aderant, est factus, quum viderent, rerum earum pretia, quae ille in Coelum efferebat, Cardinalis aestimatione, sic concidisse. Haecenus elegantissimus ERYTHRAEVS, siue vero nomine ROSCIVS. Ex quo memorabili exemplo discant nunc cum rubore, isti Veterum Codicum admiratores nimis religiosi, aut rectius, superstitiosi; quam parum illis saepius sit fidentum, utpote a scribis mercenariis, rerum et linguarum plerumque admodum imperitis, exaratis! atque hinc ingenium noui Critici felix, foecundum, perspicax et praefertim modestum, plus omnino valere et conferre ad emendandos Veteres Auctores; quam MStor. Codd. obscura, ambigua et fallacia Oracula, aut Sibyllina folia. Conf. CLERICI *Art. Crit. Part. III. l. 3.* SALMES. CASAVB. et alios.

PALMERIOS, GRONOVIVS, RVBENIOS, aliosque plures, quos nostra aetate paribus fere passibus gloriose sequuti sunt BOSII, KVSTERI, BENTLEII, WESSELINGII, HEMSTERHVSII, ARNALDI, ALBERTII, BERNARDI, MARKLANDI, TAYLORII, DAVISII, HORREI, HERINGAE, ABRESCHII, REITZII, YONCKII, ROEHRII, GOENSII, LENNERII, SCHRADERI, VALKENARI, alique plures, qui ingenti elegantiorum Literarum Commodo, maximam partem, adhuc viuunt, quibusque eximiis plane Rei publicae literariae ornamentis longissimam vitam apprecamur. Illos autem temerarios, praecoces, importunos et violentos Criticos e contrario, merito damno, qui sanos Auctores vulnerant prius ipsi, vt farent, et nodos neunt, vt solvant, *quid enim boni est, nodos operose solvere, quos ipse, vt solveres, feceris?* vt grauer quaerit, ni fallor, SENECA, *quique demum in veteribus Libris reperta imperite mutare solent, et dum Librariorum insectari volunt inscitiam, suam confitentur*, vt acute ait QVINCTILIANVS.

Ex his igitur nunc tandem malus noster boni SVETONII Interpreter bonas, ingeniosas et verisimiles probi Interpretis ac Critici coniecturas melius aestimare, et maiore in pretio, ex dignitate sua, habere ferio discat, relinquatque Veteres Codices, et eorundem emendationes, arduasque Artis Criticae leges ac rationes sibi plane incompertas, iis felicioribus aliquanto ingeniis, quae pares tanto negotio vires, paucissimis mortalium prosperius tractando, benigniore Coeli fauentis munere, quondam acceperunt, atque

*laetas Artes, Vitaeque colendae
Invenere viam, nec dedignanda Parenti
Carmina fuderunt Phoebos.*

Amice ergo candideque rogo sic illum harum arduarum rerum plane expertem tironem, vt sic monitus caueat, ne forte negotii quid incutiat sibi sanctarum inscitia Legum, isti quidem Arti ingeniosae non minus, quam periculosa, impositarum, vti iamiam luctuoso exemplo ostendit in explicando SVETONIO.

Ceterum

Ceterum nescio sane, quid sibi velit idem nouus noster MARTIALIS forte nunc primum ipsi visi Lector improbulus, dum illa ipsius verba plane quidem inconuenienti modo, maligne tamen in nos detorquet: *Improbe facit, qui in alieno Libro ingeniosus est*: Poëta enim ibi, vt vel pueri vident, loquitur aperte de malignis, lasciuis ac satyricis suorum Epigrammatum interpretamentis, a male solertibus et in ipsius solum damna ingeniosis tantum Lectoribus inique excogitatis, quod vel euidentissime liquet ex proxime antecedentibus ibidem: *Ab-sit a iocorum nostrorum simplicitate malignus Interpres, nec Epigrammata mea scribat*, vbi omnino videndi Enarratores lasciui illius Poëtae.

Sed quid hoc quaeso, ad Suetonium, nostramque in eum coniecturam, qua potius plurimum adiutus, quam deprauatus fuit, vt liquidissime ostendimus? Ego autem hinc potiore iure, iisdem quidem Martialis verbis, verissime contra pronuncio: improbe facit, qui ex alieno labore ingeniosus, et de raptis opibus liberalis est; improbe facit, qui ea se scire profitetur, quae nunquam didicit: improbe facit, qui secum non habitat, nec scire vult, quam curta ipsi sit eruditionis suppellex; improbe facit, qui ea confutat, quae non intelligit; improbe facit, qui alienae famae incumbit, quique in alieno foro litigat; improbe facit, qui in tenui re, maiores nido pennas extendit: improbe facit, qui vecordem parat excitare rixam, vt sic perueniat in ora vulgi; improbe facit, qui munus appetit, cui ferendo non est, quum aptari onus viribus debeat; nec plus occupari, quam cui sufficere quis possit: improbe facit, qui alienae obtrectandi libidini sua vernili vili-que opera turpe inseruit; improbe denique facit, qui

*fragili quaerens illidere dentem,
Offendet solido.*

Immo ita hunc improbum Censorem cum CICERONE ipso, postremum alloqui hic liceat: *Quid tu, Vir optime? ecquid habes, quod dices? mihi ausculta: Multa proterve*, (longe durius atque atrocius hic ipse loquitur CICERO, vt ibi videri potest,) *multa audaciter, multa improbe fecisti: unum inconsideratissime, profecto tua sponte etc.* Eat ergo nunc

improbis Censor, Virosque probos, nec male de ipso meritis, improbitatis insimulare in posterum, si sapiat, serio erubescat.

His itaque saluberrimis monitis iam opipare potius, quam aestive, viaticatus, in Thermas demum Carolinas ocyus, bonis avibus, abeat, et aliquando aere vel auro grauis, propitiis fati, ad suos redeat: Haec pia nostra atque ingenua sunt vota, quibus ipsum prosequimur.

Finire iam volebam, et manus spectabat ad clausulam; quaedam tamen adhuc, Lectorum quidem, ut spes est, pace, his ipsis adiicienda videbantur: Ex his nempe in istum locum Suetonianum longe lateque hactenus disputatis, ad quem nobis aliquantisper adhuc, quaeso, regredi liceat, nunc liquidissime, nisi fallor, patere arbitror, nostram in eundem coniecturam criticam, qua legendum nobis videbatur, et adhuc vel maxime videtur: *Remedio Habenarum atque Arundinum confirmabatur*, non solum ingeniosam videri, id quod nec ipsi aduersarii, quamvis ringentes et inviti, negare prorsus audent; sed et adeo verisimillimam esse, immo vero proximam. Manifestissime enim hactenus demonstrauius, Habenas atque Arundines, siue, quod idem, Ferulas, semper una coniunctas deprehendi: porro, easdem Habenas et Arundines membris fractis, luxatis, claudicantibus ac malefirmis, in firmamentum atque fulcimentum vacillantis corporis, adhibitas fuisse: et denique istas Ferulas olim frequentissime ex Arundinibus fuisse confectas. Quibus omnibus nunc demum ipsum accedit verbum SVETONIANVM, *confirmabatur*: quo scilicet nostra sententia tanto magis confirmatur. Significantissime enim, et ex ipsius Artis Chirurgicae usu regulisque, peritissime, isto quidem verbo usus hic fuisse SVETONIVS iure videtur: quoniam e sedula veterum Medicorum Lectione affatim constat, illas circumpositas Membris luxatis fractisque, ope Habenarum, Ferulas, seu Arundines, vocatas olim fuisse *fulcimenta*, *stabilimenta* et *sustentacula*, quia nempe luxa laxaque Membra confirmarent, item reposita in suam sedem naturalem ossa fracta continerent, ac ne rursus suo loco elaberentur, firmando, constringendo ac fulciendo, prohiberent: quemadmodum sic Graecis pariter Medicis, *νάβηκες* seu *κάλαμοι*, etiam vocantur *σηρίγματα* et *ὑποσηρίγματα*, *ἀποσηρίγματα*, item

item ἐρείσματα, ἐρμασμοί, ἐρύματα, ἔρματα, ἐρμάσματα, παρέρματα, et παρερμάσματα; et ipsa earundem actio, seu usus, dicitur ἐρείζειν, ἐρεΐδεν, ἐρμάζειν, ἐρματίζειν, ἐδράζειν, φερεΐν, φυλάττειν, ἐρηρεΐσθαι, ἡρμάσθαι, et κρατύνεσθαι: quae verba omnia vnum idemque paene significantia, nempe *firmare*, ac *confirmare*, vt notum, frequentissime reperiuntur in Libris HIPPOCRATIS Chirurgicis, de *Officina Med. de Articulis, Fracturis, etc.* et praesertim in GALENI in eosdem Commentariis luculentissimis: Quae omnia loca huc congerere, operosae potius, anxiae et scrupulosae, quam vtilis, amoenae ac necessariae foret profecto operae: Interea euoluat, si cui forsā volupe, *Opp. GALENI, Tom. X. pag. 147. sqq. et Tom. XII. pag. 79. 80. 95. III. 191. 438. et pag. 377.* vt alia fere innumera iam studio praeteream: addatque his, si quidem lubet, quae ea de re, vberius quondam notauit in *Oeconomia Hippocrat. FOESIVS*, vocibus: Ἐρείσμα, Ἐρμάζειν, Ἐρματίζειν, et Ἐρμῆσαι, item GORRAEVS, in *Definitionibus Med.* ne alios iam commemorem.

Licet autem haec ipsa nostra Coniectura SVETONIANA adeo-
usque probata, confirmata et vndique circummunita sit, vt omnibus venustioribus erectioribusque ingeniis haecenus mirum in modum placuerit, absit hic vana iactantia! atque in posterum quoque semper, vt fiducia est, sit placitura; illos enim umbraticos Scholasticos, et acutulos minutosque doctores parum curo, qui tetra inuidia agitati, frustra contra nituntur: at illam ipsam tamen nunquam ipsi tanti fecimus, nec vnquam faciemus, vt eam mordicus defendamus, aut ea propter vadium quoniam quasi deseramus; quum multae sane eiusmodi coniecturae et emendationes hac ipsa saepe meliores, nobis quotidie fere nascantur et rursus pereant. Neque enim in hac ambigua coniecturali Arte Critica, de rebus maximi momenti, v. g. de opima Attali hereditate cernenda, de Carthagine delenda, Numantia excindenda, de Lege Agraria abroganda, similibusque arduis negotiis tractatur: Sed de meris tantum Syllabis, voculis, aut literulis, suspicionibus, hariolationibus, immo et infomniis, acres quidem, at inanes et ridiculae saepis velitationes agitantur; propter quas sane meliores fugacis nostrae Vitae horas
inca-

incassum perdere haud decet. Conf. huc DAN. HEINSII *Orat. funeb. in IOS. SCALIGERVM*, item huncipsum, LIPSIVM, BARLAEVM et alios, laudatos iam nobis hanc in rem, in praefat. ad *Observationes nostras Criticas*. Quare et ipse adhuc semel ingenue doleo, me certis rationibus vrgentibus; etsi inuitissimum, hic eo demum adactum fuisse, vt tempus haud rediturum, cuius alias sum, vt decet, studiosissimus Obseruator, et parcissimus custos ac dispensator, grauioribus magisque profuturis negotiis destinatum, tenui huic, inglorio, nullosque habituro triumphos labori impenderem: Saepe enim, conscientiam hic meam testor, inter scribendum, mecum illud poëtae exclamavi, si parua quidem magnis componere hic liceat:

*Testor ad has acies inuitum arcessere Martem,
Inuitas me ferre manus; sed vulnere cogor.*

Mihi enim perinde profecto est, semperque perinde erit, siue quis in nostro SVETONII Loco, in posterum legat *Habenas*, metuens scilicet pendentis habenae; siue *Arenas*, in quibus luctetur, aut ruiturum aedificium collocet; siue *Aranëas*, quo streperas muscas culicesque rotundos captet; siue denique *Auenas*, quo habeat, vnde se pascat, si hic quidem ita iocari obiter liceat: Immo etiam ipsas *Arundines* infelicitèr mutet in foedas *Hirudines*, vt non neminem fecisse, obseruauit celeb. REITZIVS, in *Apologia, contra Miscell. Lips. pag. 40.* Haec omnia, inquam, nobis semper perinde, et vno eodemque loco erunt:

*Per me equidem sint omnia protinus alba,
Nil moror, euge! omnes, omnes bene mirae eritis res.*

Neque proinde noster hic Aduersarius, neque vllus alius, etiamsi rigidus ac ferox Hypercriticus Alpinus fuerit, nouam ad suas novas forsàn Obiectiones, a nobis responsionem in posterum expectet: siue enim quis maiores contra nos Libros, quam duo Caesaris Anticatones fuerint, aut Annales adeo Volusianos, conscripserit, nullum tamen, nullum inquam, a nobis iustum responsum, nisi forsàn in transitu, et aliud quasi agendo, laturus est. Insurgat ergo, per nos quidem licet, insurgat ergo, noster ostentationis studio loquacior Aduersarius, quoties ipsi libuerit; neque enim dubitamus, immo ipsa iam fama praecipimus, ipsum

ipsum remoto semel pudore et metu, in nos tela sua plumbea stricturum, quod ipsi sane non difficile: et iam factum est, ut audio, edita longa, verbosa et aculeata apologia, etiam criticis nonnullis spiculis contra nostras emendationes, leuiter armata; quae vero arma aliena vnde ipsi denuo suppeditata fuerint; iam cuius notum est. Ego vero alterum istum lepidum nouum libellum, arida modo pumice expolitum, aut forsan impolitum, nondum vidi, nec videre vnquam aueo. Isti tamen, qui obiter tenellum istum foetum inspexerunt, affirmarunt mihi serio, nihil fere ibi deprehendi aliud, quam veteres illas naenias iterum verbose repetitas, et crambem non bis, sed decies, ad nauseam, coctam, et in taedium legentium, fidenter nimis, propositam. Semper enim dapibus abundant, qui aliena quadra viuunt, neque inermes plane esse possunt, quibus ex alieno Armamentario tela subministrantur.

Nos tamen bonas Vitae nostrae ruentis horas longe, melius profecto collocare scimus; quam eiusmodi disputatiunculis inanibus, nullos, aut perquam exiguos habituris fructus, male perdere. *Nati enim, bene monente SENECA, sumus, non, ut verba prisca, aut ficta captemus, et translationes improbas figurasque dicendi; sed ut profutura praecepta, et magnificas voces, et animosas, quae mox in rem transferantur: Sic ergo ista discamus, ut, quae fuerunt verba, sint ipsa opera. Operose enim nihil agunt, qui in Literarum inutilium studiis detinentur, aut in huiusmodi scrupulis diutius morantur, quibus nullum prorsus emolumentum solidum inest, quod ad ipsam Vitae prudentioris rationem pertinere possit.*

A D D I T A M E N T V M.

Quoniam vacui quid spatii hic adhuc restat; illud Lectorum in gratiam atque commoda, ita, si lubet, impendamus, ut Censoris nostri praecipua, si qua sint, argumenta in arctius compendium missa, hic vna exhibeantur, additis tamen simul vbiuis, Responsionibus nostris, breuissimis quidem, at, ut spes est, solidissimis ac grauissimis.

I.) Nimis confidenter traditur, Augustum duplici Arthritide, calida nempe, ac frigida, vexatum, atque hinc duplici quoque me-

dendi Methodo, vna scilicet calida, altera autem frigida, curatum fuisse: Sed hoc ipsum frigide potius, quam calide, aut callide, asseritur; neque vilo modo, ex ipsis quidem SVETONII verbis probari, immo ne acerrimis quidem fidiculis inde extorqueri potest; vt latius solidiusque supra ostendimus.

II.) Magnum falsae illius sententiae de Arthritide, seu Ischiadico dolore AVGVSTI, quaeritur quidem praesidium in illa aurea particula *Saepe, vt saepe etiam inde claudicaret*: Sed fragile illud est et ficulneum plane: Quoniam nempe saepe claudicaret Augustus, si saepe tempestates mutarentur, atque hinc vitiosi humores, Catarrhi ac Rheumatismi in illas corporis partes sinistras, debiles iam, luxas ac laxas, saeuius et copiosius incumberent, ita, vt hinc etiam anniuersarias ac recurrentes statis temporibus valetudines saepius ipse experiretur, ipso monente SVETONIO; vel etiam, si os femoris relaxatum, remissum ac mobile nimis, sede sua saepe excideret, inde igitur et necesse erat, vt *saepe Habenarum atque Arundinum Remedio confirmaretur*.

III.) Temere hinc negatur, Os femoris saepius sua sponte, sede sua excidere posse; quod tamen multis Locis grauissime asserunt ipse HIPPOCRATES, GALENVS, ASCLEPIADES, ORIBASIVS, alii que, plures, tam veteres, quam recentiores Chirurghi praestantissimi; vt latius supra demonstrauius. *Impar ergo Congressus Achilli etc.*

IV.) Per Arundinum Remedium, statuitur, intelligendas esse ipsas Arundinum Radices cum Aceto tritas: inaudita sane et incredibili prorsus audacia: Sic etenim quoduis ex quouis facere licebit, ipsum aurum ex plumbo fiet, et ipsa quadrata hinc inde, sua sponte, discurrant. Vnde enim, quaeso, nouit illud iste nouus SVETONII Interpres nisi aliquo diuino Numine afflatus, aut arcano quodam ipsius SVETONII Commentario, edoctus.

V.) Arenas calidas et Arundines cum Aceto tritas saeuos Arthritidis dolores mitigare et obtundere posse, asseritur quidem vtcunque; sed non satis probatur: Illud vero, quod potissimum hic probandum erat, plane omittitur; nempe per Arenas illas feruidas, et Arundines cum

cum Aceto tritas, ipsam claudicationem inueteratam tolli et emendari posse, quod et nunquam probari potest.

VI.) Seuere nunc ipsi praecipitur S V E T O N I O, vt magis Latine in posterum scribere discat, quoniam nempe Latinum minime sit: *Remedio Habenarum atque Arundinum, confirmabatur*: Indeque vel maxime dubitandum, an vsus instrumentorum externorum, quibus ad operandum, vtuntur Chirurghi, *Remedium* proprie vocari queat? S E N E C A tamen *Lib. III. de Ira, cap. 39.* *Scalpellum* tumentis mammae clanculum admotum, h. e. Instrumentum externum, quo ad operandum vtuntur Chirurghi, manifestissime vocauit *Remedium*, item et C E L S V S, et S C R I B O N I V S L A R G V S, qui ipsos *Forcipes* dentium dolentium *Remedium* pariter dixit, vt alia plura iam taceam, superius producta. Eat nunc hic seuerissimus melioris Latinitatis iudex, et etiam S E N E C A M aliosque probos Auctores adductiore supercilio doceat, vt in posterum ita Latine scribere discant, nempe vt ipse scribit Censor noster Veteris Romani sermonis peritissimus scilicet, et ipso beatiore A V G V S T I aeuo dignissimus.

VII.) Negatur, *Ferulas* atque *Arundines* apud veteres Chirurgos Synonyma fuisse; sed frustra plane et imperite; sicut euidentissimis exemplis supra ostensum.

VIII.) Audacter asseritur, fracta grauius ossa arundineis tantum foliis circumliganda esse, omissis plane ferulis, aut Arundinibus, in necessarium plane fulcimentum adhibendis; quod tamen et sanae rationi, et ipsi inprimis experientiae chirurgicae manifestissime aduersatur, vt vel primuli Chirurgorum Tirones satis superque norunt.

IX.) Non conceditur, de Ferulis, seu Arundinibus dici posse, quod *circumponantur, circumdentur, circumiiciantur, et circumducantur* Membris nempe fractis, atque hinc earum Remedio ac Ministerio, fulciendis: Ita tamen plane loquuntur ipse C E L S V S, C O L V M E L L A, V E G E T I V S et alii: quemadmodum et Graeci, περιθεῖναι, et κύκλω περιθεῖναι νάρθηκας, ἢ καλάμους, frequentissime dicere solent, vt supra vberius ostendebamus.

X.) Dubitatur denique de *usu Arundinum chirurgico*, loco *consuetarum Ferularum*: sed liquidissime tamen scripsit PALLADIUS in *Schol. ad HIPPOCRATIS Libr. de Fracturis*: δὲ τέτης νάρθηκας παραλαμβάνειν, ἢ ξύλα φιλόρινα, ἢ εἰμηδὲν τέτων ἐυρεθῇ, δὲ Καλάμους λαμβάνειν: et Auctor de *Remed. Parabil. Lib. III.* apud GALENUM: πρὸς κλάσμα ὀστέων. Καλάμωσον, καὶ φασκίωσον, καὶ Ἰᾶται: denique PHOTIUS in *Lex. MSt.* νάρθηκας καὶ καλάμους, οἷς δεσμοῖσι τὰς τὴν κνήμην κατὰξαντας, hem! quid clarius obsecro, quid manifestius? quid ad ipsam nostram sententiam tuendam ac confirmandam, validius? Quibus accedunt bina illa primaria hanc in rem loca, e Scriptoribus Rei Accipit. allegata, quae tamen Aduersarius pessimis suis, horridis ac squalidis plane versionibus, adeo usque corrumpit, peruertit ac dilacerauit, ut nullus inde sanus sensus erui possit, uti liquidissime, sed non sine acerba indignatione, demonstraui.

Haec ergo sunt illa grauissima ac luculentissima Argumenta, quibus inductus potissimum atque permotus, Epistolam suam illam Medico-Criticam sic dictam, ab aliis prius scriptam, contra nos scripsit celeberrimus ille aliena laude Censor: ex quibus nunc eruditus et aequus Lector facillime, opinor, perspiciet, qualibus armis, nempe ex ipsa illa Βατραχομουμαχία HomERICA depromptis, nos adgressus fuerit iste strenuus, ut ita dicam, Ajax Sophocleus: Sed fatis iam de his.

Bina adhuc paucissimis monenda, quae forte mihi in oculos incurrunt, dum relego adhuc semel bellissimam illam Epistolam omni scilicet aevo victuram.

I.) Gloriatur nempe Vir in saeculi nondum nati gloriam natus, fol. IV. sese meam istam Emendationem Suetonianam contra nonnullos strenue defendisse, aliisque magnis Viris commendasse: μεγάλη χάρις αὐτῷ: Sed non tali auxilio, nec defensoribus istis tempus, aut SUTTONIVS eget.

II.) Deinde fol. XII. Locum ARETAEI corruptissimum et oinnis sani sensus expertem, ceu sanum tamen, atque integrum, adducit, nempe hoc modo: Καὶ γὰρ οἷσι τῶν εὖ βδελυκτέων ἡδονή; quum tamen forsan legendum sit: Καὶ γὰρ οἷσι τέτων ἐν βδελυκτὸν, ἢ ἡδονή, vel ἢ ἡδονικόν,

ἡδονικόν, sensu sane liquidissimo, siue et aliis modis, vt ostendimus iam olim, in nostris in ARETAEVM; *observationibus criticis*, pag. 518. Edit. BOERHAAV. vbi et vid. PETITVS, in *Comment.* pag. 215. qui tamen Medicinam paullo violentiorem isti deprauatissimo loco ibidem adhibet. Hic ergo fatidica Phoebi Cortina acutissimum nostrum Censorem fefellit, et Oracula ipsius Tripodesque plane obmutuerunt: Interim vel exinde liquido satis patebit, quantus in Graecis sit Heros atque Hector. Sed nunc eum quidem in pace dimittamus, hem! tempus est.

Diu sane mecum deliberaui, vtrum hanc ipsam *alteram Exercitationem SVE TONIANAM* huic nostrae *Opusculorum Syllogae* infererem; an vero de censu reliquorum consultius excluderem? Quod scilicet ante hos quindecim annos, vigente adhuc aetate, ex iusta indignatione, concitatiores aliquanto animo stiloque acriori, subito esset effusa. Et, vt ingenue fatear, iam canus et languidus senex factus, tranquillitatis pacisque amantior, propendebam magis in hanc posteriorem sententiam. Taedebat quippe, litem hanc ingloriam, dudum sepultam, denuo quasi ex abditis cryptis suscitare, et nouum veluti classicum in tempestiue canere. Quum vero interea de hoc meo consilio quidquam auditu percepissent literatissimi nonnulli, praesertim apud exteros, amici, item quidam apud nos, illustrissimi patroni, quibus obsequium debeo; serio me admonuerunt ac rogarunt, ne opusculum illud, quod semel placuisset, honestae Lectorum elegantiorum voluptati rigide nimis subtraherem, quod rebus ipsis sat bonum, stilo autem simul non malum esset. Quod siue blandum praeiudicium, siue iustum iudicium, quod tamen rarum alioquin esse solet in amantibus, teste SYMMACHO, me tandem diu dubitantem et cunctantem, eo impulit, vt imperiosis illorum precibus parerem; sub ea tamen lege, mihi met ipsi seuerè imposita, vt omnem hanc Exercitationem denuo quam diligentissime perlegerem, stili inprimis acrimoniam lenirem ac diluerem, et adnota veluti subtiliore lima, asperiora vbique emollirem et complanarem. Vtinam vero semper ex voto quidem meo, illud exequi licuisset! Sed totum tunc opusculum noua quasi incude recuden-

dum, et in recentem veluti formam transmutandum fuisset; a quo tamen molestissimo labore me omnino deterrebat ipsa aetas prouectior, et alius praesertim iam dudum susceptus labor, longior quidem; simul tamen utilior.

Ceterum, vnum adhuc paucis monendum, de peruersissimis nimirum et iniquissimis quorundam diariorum scriptorum iudiciis, aut foedissimorum potius conuitorum plaustis, quae in hoc ipsum scriptum, velut ex compacto, durissima rudissimaque rusticitate, effuderunt: quasi vero summum et atrocissimum commissem flagitium, quod in audacem istum ac confidentem nimis aduersarium, ab aliis malignis et inuidis, nostri nominis obtrektoribus, clam subornatum, tam animose atque acriter scripsissem. Sed, si boni isti, aut mali potius, Viri ipsos veros fundos fontesque, et intimos praesertim occultissimarum machinationum recessus accuratius cognouissent, ex quibus nempe Scriptum illud blando subtilique Veneno imbutum, aduersus me, emanauit; tum fane haud dubie mitius, aequius et modestius iudicaturi fuissent; praecipue, si prudentius meminissent moniti illius iustissimi CELSIANI, *e Lege 24. ff. de Legg. notissimi: Inciuile est, nisi tota Lege perspecta, una aliqua particula eius proposita, iudicare, vel respondere.* Quare serio nunc pudeat mercenarios illos Relationum publicarum et diariorum de rebus doctis, fabricatores, aut rectius, mendaciorum publicorum clamorosos institores, virulentae suae et atrae bilis, plenis veluti habenis, in nos prorsus immerentes, ferocissime effusae, poeniteatque ipsos, si modo possint, iudicii sui, ab omni aequitate, ciuilitate et ipsa honestate alienissimi.

Sunt enim isti, sunt profecto, Censores vitio creati, qui nullo prorsus discrimine habito, quemuis obuium, etiam optimum et innocentissimum, impudentissime allatrant, eiusque famam in suis inficetis et male perituris chartis, acerbissimis contumeliis, et continua quasi rabie, lacerant. Quibus proinde merito conuenit istud QVINCTILIANI: *Hi eos, qui plus honoris literis tribuerunt, et ineptos, et ieiuunos, et trepidos, et infirmos, et quodcunque verbum contumeliosissimum occurrit aliud,*

aliud, appellant. His autem saevis horridisque Catonibus et asperri-
mis Rhadamanthis omnes vrbaniore notae et cultioris mentis homi-
nes, ex iusto contemptu, mecum, illud acclamant PETRONII:
Aut tacete! aut meliorem nolite molestare, qui vos ne natos quidem putat.

EXERCITATIO TERTIA.

D E

CLYSTERVM NVTRIENTIVM
ANTIQVITATE ET VSV.

Enematum, siue clysterum varia esse genera, variasque, pro diuerso-
rum morborum ac caussarum ratione, compositiones, et varios
denique scopos atque vsus, vt Medicos iam praeteream, ne ipsum qui-
dem vulgus hodie ignorat.

Propter diuersam enim, quam obtinent, facultatem, alii clysteres
dicuntur purgantes, alii emollientes, alii adstringentes, alii anodyn-
i, alii detergentes, alii discutientes, alii consolidantes, alii refrigerantes,
alii farcotici et epulotici, alii denique, vt finem faciam, anthelmintici,
siue vermes necantes et expellentes, de quibus diuersis clysterum ge-
neribus, vt iam GALENVM, ORIBASIVM, AETIVM AMIDENVM,
PAVLLVM AEGINETAM aliosque veterum praetermittam, data
opera egerunt PHILIPPVS GRVLINGIVS, SYMPHORIANVS
CAMPEGIVS, AMBROSIVS PARAEVS, VICTOR TRINCAVEL-
LIVS, ZACVTVS LVSITANVS, GOTHOFR. MOEBIVS, IO. LAN-
GIVS, RONDELETIVS, WECKERVS, IO. THEOD. SCHEN-
CKIVS, et vt plures alios iam studio fileam, nouissime REGNERVS
DE GRAAF, celeberrimus ille Anatomicus. Dari vero etiam *clyste-
res nutrientes*, seu alimentarios, de eo acris adhuc lis praestantissimos
inter Medicos agitur, aliis nimirum affirmantibus, aliis contra, vt fie-
ri solet, negantibus ac renitentibus.

De istorum igitur *clysterum nutrientium antiquitate et vsu*, oblata hic
mihi commode occasione, quaedam iam differere animus est, quantum
nempe

nempe temporis, et praesertim chartae, spatium circumscriptum nobis permittet.

Sunt autem eiusmodi clysmata nutrientia diuersae confectiones ac compositiones liquidorum generosiorum, praecipue iurulentorum blandorum, subpinguium, glutinosorum, vinque nutriendi sua natura habentium, quae summa necessitate urgente, impedita nempe ac denegata libera cibos capiendi facultate, per atrociores gulae, linguae, faucium ac ventriculi morbos, casus, tumores, paralyfes, inflammationes, vulnera, ulcera et similes plures calamitates, expurgatis prius crassioribus sordibus, ipsisque intestinis emundatis ac deterfis, in aluum ex inferioribus partibus, repetitis vicibus, sensim iniiciuntur, ut corpus nimirum, iustis suis alimentis tunc defraudatum ac longis ieiuniis exhaustum, paulisper reficiatur, et nutrimento quasi vicario, ad aliquod tempus, erigatur et irrigetur, ne plane emarcescat ac subito concidat.

Ista vero ut plurimum parantur ex iure pingui carnis vitulinae, bubulae tenerae, agninae et hoedinae, item caponis, gallinae altilis, pulli gallinacei, nec non vngulis ac trunculis vitulorum et porcellorum, vel ex cremore ptisanae hordeaceae, alicae, oryzae, amyli, lenticulae, et panis, ut et ouis hapalis, item forbilibus, lacte quoque, et medullis diuersorum animalium, nonnunquam etiam, etsi parce, vino, cum tantillo salis, aut sacchari: quae nempe omnia blandis viribus alimentariis abundare, nemo non statim intelligit, ipso scilicet usu edoctus.

Quales nutrientium clysterum compositiones, ne veteres ipsos commemorem, mox seorsum cum cura laudandos, describunt passim IO. LANGIVS, *Epist. Med.* LXXX. Lib. I. pag. 440. *seqq.* LAZAR RIVERIVS, *Prax. Med.* Lib. XVII. Cap. I. pag. 506. ZACVT. LVSI TANVS, *de Medicor. princip. Hist.* Lib. I. Dub. V. pag. 79. REGNERVS DE GRAAF, *de Clysteribus*, pag. 510. *Opp.* HERM. BOERHAAVE, *Lib. de Mat. Med.* pag. 113. et ex eo GAVBIVS *de Methodo concinnandi Formulas Medicamentor.* pag. 378. STALPART. VANDER WIEL, *Obseru. Med. rar.* XXV. Cent. I. pag. 106. Part. I. cum iis, quos ibi larga copia laudat, auctoribus, item IO. THEOD. SCHENCKIVS, in *Syntag. componendi et praescribendi medicamenta*, Cap. V. pag.

pag. 128. et 10. RENODAEVS, in *Dispenſat. Med. Lib. v. Cap. v. pag. 224.* alique plures, quos ſtudio iam, ad vitanda ſaſtidia, taciti praeterimus. Inprimis tamen omnium accuratiſſime hac de re egit praetantiſſimus AMBROSIVS PARAEVS, *Lib. de Medicamentorum Facultatibus, Cap. xxii. pag. 789. Opp.* Cuius ipſa proinde verba digna nobis omnino videntur, quae huc translata, hic infra ponantur: *Alimentarii clyſteres ſiunt ex decocto pullorum, caponum, gallorum ad putrilaginem uſque coctorum, et fortiter expreſſorum. Parantur etiam ex medulla, gelatina, et ſimilibus, quae coctu faciliora ſunt, quam quae vulgo per os ſumuntur: quod inteſtinis, quam ventriculo, longe debitor ſit coquendi facultas. Paratur etiam ſaepe eiſmodi clyſterum materia in vino, ubi febris abeſt et cephalalgia: ſaepius in hordei decocto et in lacte, additis quorum vitellis, affunditur ſaccharum album, ſed parca manu, ne deterſoria ut inteſtina ad excretionem irriter.* Hactenus quidem PARAEVS, ubi et in ſequentibus mox aliquot concinnaſ eiſmodi clyſmatum nutrientium formulaſ ſubiungit, quae a quouis, per otium, ibidem legi et notari poſſunt.

Vnde autem iſta clyſmata nutricantia primam ſuam originem duxerint, quive illorum, in generis humani commoda, princeps fuerit auctor, repertor, aut certe monſtrator, de eo quidem nondum ſatis liquido conſtat eruditos inter auctores medicos. ZACVTVS IENIM LVGITANVS, *Lib. i. de Medicor. princip. Hiſt. pag. 78.* alique cum eo, ut et celeb. MORGAGNVS, *Epist. I. in CELSUM, pag. 13.* pluresque, qui tantum ducem ſequuntur, unanimi fere conſenſu tradere non dubitant, ipſum CORNELIVM CELSUM, virum arte et facundia iuxta inſignem, egregii huius contra morbos quosdam deſperatiſſimos praefidii omnium primum mentionem feciſſe, atque clyſterum nutrientium uſum et opportunitatem primo loco literis mandaſſe.

Et fatendum eſt proſecto ingenue, inter priſcos latinos Medicos neminem facile reperiri, qui ea de re palmam noſtro Celſo praeripiat: qui enim eiſdem generoſi et ſalutaris remedii deinde paſſim meminerunt, magni quoque nominis Medici, ut CAELIVS AVRELIANVS et THEODORVS PRISCIANVS, tempore tamen ipſo CELSO ſunt ſeriores, et ſcribendi quoque genere aliquanto incomtiores.

Interea autem, quum et CELSVS, et reliqui ipsum sequuti, modo laudati, omnia, quae habent bona ac profutura, veteribus graecis Medicis solis fere debeant, vt ipsi candide fatentur, hinc dubitationi nullus paene amplius relinquitur locus, altius omnino repetendam esse illam enematum nutritiorum originem, et ad ipsos potius Graecos, ceu omnis in Medicina praeclari fontes, referendam.

Neque id ipsum profecto penitus ignorasse videtur primus rationalis medicinae conditor ac parens, HIPPOCRATES, cuius scilicet haec sunt verba notatu certe digna, in Libro, *de Diaeta salubri*, pag. 629. Ἐγὼ δὲ τὰ κατακλύσματα τοῖσι ξηροτέροισι καὶ προσεταλμένοι-
σι καὶ ἀσθενέτεροισι λιπαρότερα καὶ παχύτερα. ἔστι δὲ τῶν κατακλυσ-
μάτων τὰ λιπαρὰ καὶ παχέα, ὅσα ἀπὸ τῶν γαλάκτων, καὶ ἀπὸ ἔρε-
βίνθων ὕδωρ ἐφθόν, καὶ τῶν ἄλλων τοιούτων. Sint autem clysmata pro sic-
cioribus, et gracilibus ac debilioribus, pinguiora et crassiora: Crassa au-
tem et pinguia clysmata sunt, quae ex diuerso lacte fiunt, et eicerum decoctum,
et alia huiusmodi. Conf. quoque HIERONYMI RVBEI commentarius
in Celsi librum mox laudandum; sed eo tamen in loco, HIPPOCRA-
TEM de alia potius re loquutum fuisse, arbitratur celeberrimus MOR-
GAGNVS, epistola in Celsum prima, paullo superius iam commendata.
In Libro tamen de Internis Affectionibus, extremo, pag. 268. Tom. II.
Opp. illum, cui in pectoribus haeret quasi cibus et suffocationem indu-
cit, praecipit κλύζειν ἐν πτισάνῃ ἐφθῇ τῇ λεπτῇ, καὶ μέλιτι, Clystere
saepius reficere, ex ptisanâ coctâ tenui, et melle paratâ; ptisanam vero Mel-
que ipsum nutrire, neminem Medicorum, opinor, fugit. Denique
etiam in fynanche, tertio quoque die, clyisma iniiciendum iubet, ἕως
ἂν ἐν ἀσφαλείῃ γένοιτο ὁ νοσέων, καὶ λιμὲν χρήζαι, donec in tuto fuerit aeger,
aut etiam fame opus habeat, Lib. de Vict. Acut. pag. 298. Tom. II. quae
etsi aliquanto obscuriora sunt; tamen etiam forte ad ipsa clysinata nu-
trientia referri posse videntur, licet nihil hic obseruauerit GALENVS,
Comment. IV. in istum, HIPPOCR. Librum, pag. 129. Tom. XI. Opp.
per CHARTER. 2. Tanto autem certiora ac clariora profecto ista de re haec sunt ver-
ba ipsius CORNEL. CELSI, ab alijs quoque iam obseruata et lauda-
ta,

ta, e *Libro III. cap. 19.* vbi de cardiacorum curatione agitur: *Ultimum auxilium est, in alium ptisanæ vel alicæ cremorem, ex inferioribus partibus, indere, siquidem id quoque vires tuetur.* Sed et alius eandem in sententiam locus, haud minus memorabilis, occurrit inferius, apud ipsum, *Lib. IV. cap. 15.* vbi de dysenteria, siue torminibus, tractatur, (vt perperam nempe latine reddidit vocem istam graecam, quo pro solito scilicet more, sed nimis profecto religiose, aut superstitiose, graeca vitaret homo latinissimus. Tormina enim proprie sunt $\tau\rho\mu\iota\sigma\iota$, non autem dysenteria, rectissime quoque obseruante viro maximo, IOSEPHO SCALIGERO; quoniam nulla quidem dysenteria sine torminibus est; multa autem tormina in variis intestinorum morbis, vt notum, sine vlla tamen dysenteria, inueniuntur. Conf. THEODORI PRISCIANI *Lib. II. cap. 9. p. 79.* Sed haec obiter.) En igitur verba ipsa: *Si vetustior morbus est, ex inferioribus partibus tepidum infundere vel ptisanæ cremorem, vel lac, vel adipem liquatam, vel medullam ceruinam, vel oleum, vel cum rosa butyrum, vel cum eadem, album crudum ex ouis, vel aquam, in qua lini semen decoctum sit; vel, si somnus non accedit, vitellos cum aqua, in qua rosae floris folia cocta sint. Leuant enim dolorem haec, et mitiora ulcera efficiunt; maximeque utilia sunt, si cibi quoque secutum fastidium est.* Ex quibus postremis quidem verbis satis perspicue, ni fallor, colligitur et intelligitur, praescripta illa in antecedentibus diuersi generis clysmata, tum potissimum egregium nutriendi, viresque longa inedia collapsas fulciendi, vsum praestare, vbi nimirum cibi quoque fastidium insequutum fuerit. Sed haec quidem e CORNELIO CELSO.

Transeamus iam, si lubet, ad CAELIVM AVRELIANVM, apud quem iste perquam luculentus, de clysteribus alentibus, locus legitur, *Lib. II. de Morb. Acut. cap. 37. pag. 170.* vbi pariter de cardiacorum iusta medela sermo habetur: *At si omnis spes fuerit absumta, erit per clysterem cibus iniiciendus, sed neque ptisanæ, aut cuiusquam labilis qualitatis, quod facile lubrica faciat intestina. Est enim perniciosissimum in cardiacis, fastidio attestante, ventris fluorem commouere. Quapropter erunt haec ex lenticula adhibenda, et primo parvissima. Tunc in vino cum aqua panis attritus, et expressus. Sic enim corpori fit additio: atque vires resurgunt, et*

stomachus iam dudum supinus fortificatur, altiora constringentur. Ibidem vero *Lib. III. de Morb. Acut. cap. XVI. pag. 232.* miserrimis Hydrophobis, dirissima siti excruciatiss, prudentissime ab ipso commendantur clysmata refrigerantia et humectantia ex aqua et oleo parata; quoniam tum illius iniectionis humoris continentia utilis erit ad minuendam sitim, ut ipse rationem ibi mox addit, *calidam enim et oleum ad superiora peruenire posse, concipimus, quo partibus iisdem irrigationis praebeat laxamentum,* Haec ille. Quem insignem Aureliani locum merito laudauit ipse laudatissimus VAN SWIETEN, *Tom. III. Comment. in Aphorif. Boerhaau. pag. 575.*

Sed non minus notabilis locus est sequens, apud eundem *Lib. IV. de Morb. Chron. Cap. LIII. pag. 508.* ubi de coeliacorum curatione agitur: *Decoctiōnem lenticulae secundo, vel tertio, per singulos iniiciemus dies. Ex ipsa enim sufficienter intestina coërcentur, et latenter corpus nutritur, quum quaedam particula digestionē usurpata viribus profecerit aegrotantis.*

His denique nunc accedat THEODORVS PRISCIANVS, qui *Libri secundi, siue Logici, cap. XII. pag. 87.* similem in modum, iisdem cardiacis, eiusmodi clysmos nutriendi facultate praeditos, his quidem verbis, frequentius ingerendos sapienter praecepit: *Quo calorem ingentum emorientem reparare quadantenus valeamus; nutrio similiter per clysterem vel alicae, vel ptisanæ succis: quibus ungulas porcorum usque in plenam earum decoctionem concoqui suadeo.* Conf. et GARIOPONT. *Lib. VII. cap. 6. pag. 154. b.* Hactenus de Medicis latinis.

Haud infrequentior autem eiusmodi clysmatum alimentariorum mentio occurrit passim apud ipsos graecos ferioris aevi Medicos, ut ex ORIBASII, AETII AMIDENI, ALEXANDRI TRALLIANI aliorumque scriptis adhuc obuiis liquidius patescit. Praesertim autem ista maximopere commendat et vberius describit ORIBASIVS, *Lib. VIII. cap. 24. pag. 345. Collect. Tom. II. et 34.* quae ibi legi per otium possunt, postremum tamen locum insignem ex dicto *Cap. XXXIV. Collect. Oribas. pag. 364. Vers. Lat.* hic produxisse iuuabit: *Nonnulli tam vehementer ab Alimentis abhorrent, ut periculum consequatur, ne ob alimoniae defectionem tandem pereant: quibus clysteres ii sunt idonei, qui alere corpus possunt,*

possunt, quales sunt hi: Ptisanæ, aut tritici cremor, aut farinæ ablutio, aut alicæ Cremor, aut res, quæ sunt generis eiusdem. Debet autem Cornu clysteris si usquam alibi, tum hoc loco, esse quam longissimum: et manibus compellendus maxima Vi clyster est, ut ad remotas supernasque partes quam maxime conscendat. Quo eximio prorsus loco nihil profecto potest esse luculentius, nihilque accuratius, aut ad hoc ipsum nostrum argumentum denique accommodatius. AETIVS autem AMIDENVS haud minus diserte eorum mentionem iniicit, *Lib. III. cap. 159. pag. 61.* his quidem verbis: Πτισσάνης δὲ χυλὸς δύναται σκύβαλα διαλύσαι σκληρὰ, καὶ σμῆξαι τὰ ἔντερα, καὶ δηγμὸς παρηγορῆσαι. λύκος δὲ χυλὸς, καὶ δήξεων μὲν ἐστὶ παρηγορητικὸς. μάλιστα δὲ ἀρμόζει καρδιακοῖς, καὶ διαφορεμένοις συγκοπτικῶς. πρὸς γὰρ τῷ τρέφειν καὶ τὴν δύναμιν ἀνακτᾶσθαι τὸ ἐνιέμενον. h. e. ptisanæ vero succus stercora dura dissolvere potest, et intestina extergere, et morsus mitigare. Alicæ succus morsus quidem mitigat; maxime autem conuenit Cardiacis, et qui ex animi defectione resolvuntur: Nam ad hoc, quod nutrit, etiam vires reficit infusus. In quibus nempe postremis verbis clarissime docetur, iniectum illud præparatum enema ad nutriendum et sustentandum, viresque recreandas plurimum conferre. ALEXANDER denique TRALLIANVS, *Lib. VIII. cap. IX. pag. 468.* de dysentericorum curatione, item PAVLLVS AEGIN. *Lib. III. cap. 42.* τῶν ἐνεμάτων quoque meminit, contra τὴν πυκνότητα τῶν ἐξανατάσεων, καὶ τὴν ἐκ τέτων ἐπομένην τῆς δυνάμεως ἀσθενείαν τε καὶ ἀνορεξίαν; hoc est, clysterum contra desidendi frequentiam, et istam, quæ exinde consequi solet, virium imbecillitatem ciborumque omnium nauseam. Et hæc quidem, ne plura commemorem, de Medicis graecis.

Neque tamen ipsos Arabes, gentem, ut notum, solertissimam, ista quoque latuerunt præstantissima in morbis fere deploratis præsidia, uti ex illorum scriptis nobis adhuc relictis passim colligere est. Praesertim autem maximi inter illos nominis Medicus, Avenzoar eximium plane eiusmodi clysterum nutritiorum usum tanti fecit, ut eum summis laudibus efferret, atque hinc Medicis in extremae necessitatis casu diligentissime commendaret, ceu pluribus praeclare ostendit

dit Medicorum apud Anglos nobilissimus, IOANNES FREIND, in *Medicinae Historia, Part. II. pag. 498. seqq. Opp.* vbi simul plura, quae huc potissimum spectant, lectu sane dignissima.

Inde igitur non mirum, tot tantisque venerandae antiquitatis dubibus lucidam quasi facem praeferentibus, solidam hanc, de clysteriorum alibitum scita compositione atque opportuno usu, sententiam certatim veluti amplexos fuisse plerosque rectoris iudicii ac longioris per vitam experientiae Medicos, et superiore et nostro denique aevo, summa laude et auctoritate florentissimos, ex quibus iam nominasse ac laudasse sufficiat HIERON. MERCVRIALEM, *Quaest. Pisan. Hist. XXI. ANTON. MVS. BRASSAVOLVM, Commentar. ad Sect. 35. Lib. IV. Hippocrat. de Morb. acut. pag. 114. et Comment. ad Aphorism. 15. Lib. II. eiusdem Hipp. ANDR. LAVRENTIVM, Histor. Anatom. Lib. VI. Quaest. 14. pag. 442. seqq. FORESTVM, Obs. 30. Lib. XV. pag. 621. seqq. IO. LANGIVM, Epist. med. 80. Lib. I. pag. 440. seqq. M. SEBITIVM, Exercitat. med. pag. 245. GVIL. FABRIC. HILDANVM, Cent. IV. Obs. 30. p. 311. THEOPHIL. BONETVM, in Polyath. Tom. I. Lib. I. cap. 3. pag. 42. VOPISC. FORTVNAT. PLEMPIVM, Lib. II. Fundament. med. cap. 8. HIERON. CARDANVM, Lib. II. Contradic. Tract. 6. Contrad. 6. LVD. MERCATVM, I. Indicat. 3. FRANC. VALLESIVM, Lib. VIII. Controvers. cap. 3. ZACVT. LVSITANVM, in prax. histor. Lib. IV. cap. 14. et de Medicor. princip. Hist. Lib. I. dub. 5. pag. 78. seqq. AMBROS. PARAEVM, Lib. de Medicamentorum Facultat. cap. 22. pag. 789. THOM. BARTHOLINVM, Controu. anat. Quaest. XII. pag. 401. et Hist. anat. 68. Cent. IV. pag. 369. AET. CLETVM, de Morb. strangulat. Cap. 13. IO. RHODIVM, in Analect. in Lud. Septal. Caut. med. Lib. III. pag. 29. GVERN. ROLFINCIVM, in Ord. et Method. Medicinae spec. commentatoriae, Lib. V. sect. 9. cap. 5. p. 562. item et Ord. et Method. Med. spec. consultatoriae, Lib. III. Consult. 6. pag. 392. FRIDER. HOFFMANNVNVM patrem, Op. de Methodo medendi, Lib. I. cap. 10. pag. 125. et quos ibi laudat auctores alios, ipsiusque Filium, patre illo maiorem, Med. Rat. systemat. Tom. I. pag. 64. Tom. I. Opp. CHRIST. LANGIVM, Lipsien-*

Lipfienfem, Tract. de Acidulis Egran. pag. 177. IO. SCVLTTETVM, in *Armament. chirurg. Part. I. Tab. 32. p. 103. et Part. II. obseru. 58. pag. 141.* IO. RENODAEVM, *Institut. pharmaceut. Lib. V. pag. 224.* IO. CONR. PEYERVM, *Exercitat. I. de Glandulis intestinorum, Cap. XI. p. 52.* STALPART. VAN DER WIEL, *Obferuat. rarior. med. XXV. Cent. I. Tom. I. pag. 105. feqq.* et quos ibi fimul allegat auctores plures, IO. BAPT. MORGAGNVN, in III. *Aduerfar. Anat. Animaduersh. 17. p. 31.* et praefertim, in *Epift. anat. med. 28. Lib. III. Tom. II. Op. de Sedibus et Cauffis Morborum, pag. 10.* vbique potiffimum RAMAZZINVM, in *Constitut. Epidem Ann. 1691. No. 22. pag. 173.* SCHWENCKE, in *Haematologia, Cap. I. IO. FREINDVM, in Hift. med. pag. 499.* et vt tandem, omiffis aliis, ne fastidiofa auctorum copia lectores obruat nimis atque obtundat, binis magnis inter medicos nominibus hic finiam, HERM. BOERHAAVIUM, *Prax. med. Tom. IV. pag. 79.* et in ipsis quoque *Aphorifmis, de cognofcendis et curandis morbis, pag. 176.* ibique potiffimum illustr. VAN SWIETEN, in aureo *commentario, pag. 691. Tom. II.* vbi plura, quae huc fpectant, plane egregia, quibus praefertim add. IO. IAC. FICKII *Differtat. de Clyfteribus nutritiis et frigidis, Ienae, 1718.* et nouiffime WILLIAM SMELLIE, M. D. a *Collection of Cafes and Observations in midwifry, London, 1756.* vbi fingulare et mirandum prorfus clyfteris diutius nutrientis exemplum adnotatum legitur.

Tanta igitur tot grauiffimorum testium nube quum fefe vndique fortiter tueatur haec ipfa folida doctrina, de falutari clyfmatum nutritibilium vfu et efficacia, nemini non, credo, mirum omnino videbitur, repertos nihilominus nonnullos non minoris famae et auctoritatis medicos haftenus fuiſſe, qui gladiatorio animo iſthaec omnia acriter impugnarent, atque contra tot ftrenuos et armipotentes aduerfarios bella gerere auderent, nullos, aut certe perquam exiguos, triumphos merito habitura. Sed, vt mores plerumque ſunt hominum, in rebus praefertim phyſicis medicisque, nihil facile tam certum, verum ac ſolidum deprehenditur, quod non ſtatim clamorae contradictioni pateat, atque in contentioſam controuerſiam vocetur ab iſtis inprimis perpugnacibus

in

in disputando palaeſtritis, qui ſemper acerrime digladiantur, atque diſſentiunt, et perpetuam per ſaecula fere litem trahere conſueuerunt.

Ipfius quidem HELMONTII de clyſterum nutrientium damno potius, quam fructu, diſſenſus eo facilius ferendus nobis videtur, quem ita libere, pro more, prodidit, *Tract. de Sextupl. Digest. Aliment. human. pag. 207. et pag. inprimis 214. Clyſteres ad nutriendum immiſſos ſpe frustrari, citiusque clyſter lumbricos et aſcarides, quam hominem, nutriet, add. et ipſius Lib. de Potestate Medicam. pag. 457.* quod nimirum difficili iſti ac refractario homini, ceu ex omnibus fere ipſius ſcriptorum paginis vbiuis affatim conſtat, acris quidem, ſed inconſulta plane cupiditas inerat, non niſi deplorata defendendi, flagrantiffimaque ſimul libido, inſolita, peregrina atque portentofa conſingendi, et ingenti, licet inani, niſu et auſu, pro veris et exploratis, obtrudendi. Quare et hanc eius ſiniſtram ac perverſam, de clyſterum alentium abuſu, opinionationem, vt plures alios taceam, perquam ſtrenue impugnauit ROLFINCIVS, ſupra modo laudatus, praefertim autem noſtra hac aetate, magnus BOERHAAVIUS, cuius proinde verba omnino digna ſunt, quae hic integra legantur, e *Tom. IV. Prax. med. pag. 78. Clyſmata nutrientia ab Helmontio exploſa, qui dicit, nihil admitti, ſpecie nutrimenti, niſi quod per vires ventriculi, inteſtinorum, bilis et ſucci pancreatici, mutatum ſit: ſed certiffimum eſt per experimenta, quod clyſmata ex ſolo iure carniū, cum ſale, in corpus iniecta, ad uncias duodecim, ſi viginti quatuor horis retineantur, quod unciae tres tantum redierint: Ergo non ridenda clyſmata nutrientia, et cur explodamus id, quod nocere non poteſt, ſi non iuuat? Haec quidem ille ſapientiffime et veriffime.*

Sed plures adhuc ſuperſunt maioris omnino momenti nominis-que medici, qui verum clyſmatum alimentariorum uſum, modeſtius quidem Helmontio, in dubium vocarunt, quales ſunt OTTO CASMANNVS, *Lib. II. Psycholog. Cap. XII. Quaest. ult.* item ALOYSIVS MVNDELLA, *Epist. med. x.* quorum tamen dubitandi rationes expendit et eleuat ZACVT. LVSTITANVS, *Lib. I. de Med. princip. Hiſt. pag. 79. ſeqq.* In quorum diſſentientium claſſem referendi quoque ſunt VIDVS VIDIVS, de *Curat. generatim, Lib. XVI. Cap. I. pag. 167.* item

tem ISBRAND. DIEMERBROECK, *Anat. Lib. I. Cap. 8. pag. 35.*
 GEORG. WOLFG. WEDELIVS, *Lib. de Medicament. compos. extemp.*
Sect. II. cap. 5. pag. 95. et, vt plures alios passim obuios iam studio
 praeteream, REGNERVS inprimis DE GRAAF, in *Tract. de Clysteri-*
bus, pag. 510. seqq. vbi praesertim acriter insurgit contra istum imagi-
 narium, vt ipsi quidem videtur, clysterum alentium vsum, omniaque
 argumenta, quotquot reperiri et excogitari potuerunt, in vnum ope-
 rose congesta, confidenter proponit, quibus infringi potissimum atque
 labefactari istam quidem posse sententiam, hactenus assertam ac firma-
 tam, sibi potius persuadet, quam aliis ex rapido praeiudicatarum opi-
 nionum aestu nondum a recto veritatis tramite, in deuia et breuia
 praepropere abreptis.

Ista autem argumenta, quae ad tutandam contrariam opinionem
 vulgo in medium adferuntur, praecipue sunt sequentia, nunc strictim
 recensenda et expendenda.

Primum igitur hoc est: Nullum laudabilem, purum, defaecatum
 atque alibilem chylum confici posse in intestinis crassioribus sordidis,
 neque hinc ex cloaca quasi faciendam esse culinam, vti ludit quidem in
 re seria, quod mirum, spectabilis WEDELII grauitas.

Sed ad hoc scite ac sapienter ita respondet PEYERVS, *Exercitat. I.*
de Glandulis intestin. Cap. XI. pag. 52. Si quis vero excrementis conspurcari
 alimentum, ac per anum corpus nutriendi conatum sic plane irritum fieri, cau-
 setur, illi respondemus, nihil ex commixtione impendere discriminis, cum ubi-
 que sint bona mixta malis, et chylo faeces: deinde sordes alui non magno ne-
 gotio prius elui posse. Quod si cui forte nimis sordidum videtur, hunc secum
 reputare volumus, in hac re nihil tam sordidum esse, dummodo ad hominis sa-
 nitatem tuendam, aut restaurandam vitam conferat.

Secundum sic conceptum est: Nihil alimenti ex intestinis crassis ad-
 scendere commodè posse ad intestina tenuia, multo minus ad ventri-
 culum ipsum, propter notissimam illam oppositam coli valuulam Bau-
 hinianam, immo rectius Albertinam: istam enim inuentionis primae
 gloriam pertinere potius forsan ad celeberrimum quondam huius no-
 strae Academiae Anatomicum et Professore, SALOM. ALBERTVM,

quàm quidem ad BAVHINVM, aut VAROLIVM, viri magni, THOM. BARTHOLINVS, ISBRAND. DIEMERBROECK, IO. ANT. LINDENIVS, BERGERVS noster, alique ingenue fatentur. Sed haec obiter tantum.

Verum opportune hic regerit modo laudatus THOM. BARTHOLINVS, *Hist. Anat.* 68. Cent. IV. pag. 370. *Nec obstat valvula coli, quae vel motu totius abdominis conuiet, vel laxatur, laediturque humorum acrimonia, vel rariore textura facile adscendentes vapores iniectorum admittit.* Quibus non male addit CHRIST. LANGIVS, de *Acidul. Egran.* pag. 177. *Homine grauitate decumbente, flaccescit et illa coli valvula, ita, ut relaxata parum ea, immixtus clyster nutriendus ad tenuia exta peruenire, (si non alio, tamen exhalandi modo,) quodammodo possit.*

Tertium sic formatur: Nulla alia vasa, ductus, aut canales in intestinis crassioribus facile ostendi posse, per quos nutrientium clysterum virtus alimentaria fulciendis venis labentibus ingeri commode queat.

Sed hoc quidem argumentum, hac nostra imprimis solertiore aetate, omnium facillime solidissimeque infringi et eneruari potest. Dantur enim omnino vasa lactea, per ipsa quoque intestina crassa benigna satis copia discurrentia, egregie id demonstrantibus summis medicis et oculatissimis anatomicis, GLISSONIO, VALLISNERIO, BARTHOLINO, MORGAGNO, WHARTONO, HEISTERO, CRAANIO, WIELIO, NEEDHAMO, WALAEIO, WINSLOWIO, SCHWENCKIO, FREINDO, DVVERNOY, BOHNIO, nostro BERGERO, aliisque pluribus, quos magno numero laudat celeb. HALLERVS, in *praelect. academ. Boerhaau. Vol. 1. pag. 398.* qui ipse illa vasa lactea in crassis quoque intestinis a se obseruata merito admittit. Adsunt porro ibidem copiosae illae glandulae PECHLINIANAE, seu PEYERIANAE, quae eidem scopo commode inferuire possunt. Ne quid iam de venarum mesaraicarum osculis hiantibus dicam, quorum blando ministerio liquida ista nutrientia, intestinis crassis indita, sensim placide resorberi et in ipsam corporis languentis nutritionem opportune impendi queunt, quod, negantibus licet hic REGNERO DE GRAAE, aliisque pluribus, ut notum, rectius tamen cum HARVEIO, SWAL-

VIO, HORNIO, BACKIO, DEVSINGIO, aliisque quam plurimis, contra adfirmant summae illi auctoritatis viri, modo laudati, BOERHAAVIUS, VAN SWIETEN, SCHWENCKIUS, RVYSCHIVS, et alii.

Nec dubium denique plane est, quin blandi vapores et anathy-
miasas alibiles clysterum nutrientium per ipsos intestinorum poros,
aliasque caecas adhuc et abstrusas vias, et vasa quaedam resorbentia,
imbibentia et attrahentia, ob immensam sui subtilitatem, nobis, ut
mille alia, hucusque forsan incomperta, ad sanguinem ipsum deferri
possint, sicque vis illa alimentaria venis arentibus et marcentibus, in
irrigationem ac refectionem, tempore summae necessitatis, benigne in-
fundi queat, id quod et egregie animaduertit STALPART. VAN
DER WIEL, *Cent. I. Obs. 25. Tom. I. pag. 107.* ubi plura lectu digna
et iucunda occurrunt, quae huc vel maxime faciunt. Inprimis autem
celeb. IO. FREIND, qui omnia, quae huc potissimum spectant, sic
breuiter ac simul eleganter et ornate complexus est, in *Historia medi-
cinae*, p. 499. *Illud argumentum, mea sententia, in dubium vocari potest;
immo optimi quidam anatomici demonstrarunt, aliqua, etsi pauca, in his etiam
intestinis vasa disseminari lactea. Nam Peyerianae hic glandulae, quamquam
simplices sint, et maiore a se inuicem interuallo, quam in tenuibus intestinis,
distens; tamen peramplae sunt, ideoque, ut coniicio, ad recipiendas crassiores
alimenti particulas idoneae. Quamquam autem nulla hic essent vasa lactea,
rem nullo modo naturae, legibusque ab ea in animali oeconomia seruatis, con-
trariam poneret, quisquis nutrimenti particulas, praesertim in eo inanitionis
statu, etiam intra vasorum sanguiferorum poros absorberi posse contenderet.
Idque ita esse, multis rationibus probari posset. Verum minutulis istiusmodi
non est animus insistere argumentis: neque aliud animaduertam, quam clyste-
rum, qui nutrant, usum indubitata niti experientia: et plurima in Historia
medica exempla reperiri, ubi haec ratio successerit, quum cetera omnia nihil
proficere potuissent auxilia.* Haecenus ille egregie prorsus atque acu-
tissime.

Quartum denique, siue vltimum, argumentum petitum est potissi-
mum ex ambigua historiarum fide, et exigua eorum copia, qui, de-

negatis plane, per morborum atrocitatem, ori ventriculoque alimentis, per solos illos clysteres nutrientes, ad aliquod temporis spatium, vitam extraxisse, viresque corporis labantes erexisse ac sustentasse, narrentur: id quod praesertim vrget et in dubium vocat celeberrimus quondam WEDELIVS. Verum et hoc argumentum nullo paene negotio subuerti potest. Non enim eiusmodi exemplorum summa fide dignorum inopia medicae laborant historiae, sed eorundem potius largae copia abundant, vti vel ex sola illa STALPARTII VAN DER WIEL obseruatione, superius aliquoties iam laudata, luculentissime patet, vbi varias notatu dignissimas historias per alentia clysmata seruatorum, ex FABRIC. HILDANO, FORESTO, AMATO LVSITANO aliisque sedulo collectas exhibet, simulque addit, hunc per clysteres nutrientes agendi modum apud Italos Hispanosque medicos, tam viris, qui non aliter possint ali, quam foeminis, quae yteri suffocatione laborant, maxime in vfu esse. Sed et ad similia exempla prouocant ZACCVTVS LVSITANVS, PARAEVS, BONETVS et alii. Inprimis autem binas eiusmodi notabiles historias a se ipso visas refert supra laudatus IO. SCVLTETVS, et EX TIENGIO, BRASAVOLO, FORESTO, aliisque pariter αὐτόπταις, IO. SCHENCKIVS, *Obs. med.* 15. *Lib. III.* p. 553. *Tom. I.* Et quis, quaeso, plenam intemeratamque fidem haud habiturus sit binis illis magnis venerandae auctoritatis medicis, GERARDO inquam VAN SWIETEN et IO. FREINDO, testibus non auritis, sed oculatis potius, et hinc aut falli, aut fallere prorsus nesciis? quorum ille Viennensium HIPPOCRATES ita scribit, in *Comment. in Aphorism. Boerhaav. Tom. II. pag. 691.* Probe memini, quod in iuvene angina laborante, qui ne guttulam liquidi deglutire poterat, saepius de die clyisma iniiciendum curauerim ex lacte aqua diluto paratum, tali cum effectu, ut per plures dies vires sustinere potuerim, et nimiam corporis siccationem cauere; dum fere totum, quod sic iniiceretur, venis intestinorum resorbebatur.

Alterius autem, Britannorum illius CELSI, verba haec sunt, ad ill. RICHARD. MEAD, in *Historia Med. pag. 499.* Insigne eiusdem rei exemplum, quod nostro tempore obuenerit, ut tibi in memoriam reuocem, non necesse est, quo in casu, vi deglutitionis, per vehementem gulae tunica-

rum relaxationem, adeo imminuta, ut ex iis in utroque faucium latere, efformaretur quidam quasi sacculus, nullam aliam, idque per septimanas frequenter integras, alimenti recipiendi viam habuerit vir illustris, quam hoc modo, ab Avenzoare tantopere commendato.

Quibus omnibus nunc denique adiungenda etiam sunt singularia ista exempla e VALLISNERIO, in *Act. phys. med. Academ. Nat. Cur. Vol. III. Obs. 6.* RAMAZZINO, in *Constitut. Epidem. pag. 173.* MORGAGNO, aliisque magnis viris, opportune producta in hac ipsa doctissima et elegantissima Dissertatione inaugurali, *de Deglutionis difficilis et impeditae causis abditis.*

Cuius quippe benigna occasione inuitati fuimus, ut haec qualiacunque, *de Clysterum nutrientium antiquitate et usu,* subito commentaremur.

EXERCITATIO QVARTA.

DE

PITYRIASI VESICAE

AD CORRVP T V M Q V E N D A M

CAELII AVRELIANI

LOCVM ILLVSTRANDVM ET EMENDANDVM.

Quemadmodum multae magnaeque infirmitates ac valetudines singulas humani corporis partes acerbissime infestant; ita et varii gravesque morbi praesertim ipsum illud spatiosum fordidioris liquoris eiectionis receptaculum, vesicam nempe urinae commode egerendae dicatam, frequentius quoque saeuissime adoriuntur.

Illos igitur maximam partem, his quidem verbis, quondam complexus est iste Methodicorum Medicorum facile princeps, CAELIVS AVRELIANVS, *Lib. v. de Morbis Chronicis, Cap. 4.* In Vesica speciales plurimae passiones eueniunt, Tumor, Collectio, Ulcus, Durities, φθέρσις, item ψωρίασις, quam scabiem, vel scabrum, appellamus, Capillatio, Debilitas, Paralysis, Calculatio, quam λιδίασις vocant, sanguinis fluor, siue

effusio, quam αἰμορρᾶγίαν appellant, Mictus tarditas, aut difficultas, aut in toto Guttae aquatiles, quas ὕδατιδες vocant. Haec ille.

In quibus nempe verbis nulla, me quidem iudice, Caligo Lectorum oculis mentibusque offunditur; omnia enim clara, perspicua, et intellectu facilia cuius, credo, apparent. Illud tamen vnicum, nisi fallor, scilicet vocabulum φθελιάσις, morabitur nonnihil Lectorem paullo attentiores, inprimis rerum medicarum haud prorsus imperitum, qui utique, opinor, valde mirabitur, qua nempe ratione, aut occasione, foedissimus ille et rarissimus simul Morbus, φθελιάσις vulgo dictus, hic a CAELIO nostro AVRELIANO inter consuetos et ordinarios fere Vesicae morbos ac passiones ipsi fere soli proprias, connumerari potuerit: quum tamen abominabilis illa φθελιάσις lues nihil quidquam plane commune habere videatur cum omnibus illis reliquis Morbis Vesicae hactenus inprimis adscriptis ac Medicis vulgo cognitis.

Est namque φθελιάσις, scilicet ἀπὸ τῶν φθελῶν, siue Morbus pedicularis, sit honos auribus! teterrima ista omnium atque dirissima pestis, cuius atrocissima saevitia, non sine Numine Dium iratorum, in ipsis corporibus adhuc vivis, nisi potius male vivis, ac putridis et cadaverosis iam humoribus oppletis, pediculi, vel vermes pediculis nonnihil similes, heu foedum dictu et auditu! inaeestimabili examine, progenerantur, qui exesis sensim intus Vitalibus, pertusis tandem atque perfossis ipsis externis corporis integumentis, abominando prorsus aspectu, aceruatim cateruatimque vndique erumpunt, ac cuncta circum se avidissime depascuntur atque depopulantur, donec miserrimi eiusmodi aegroti, seu cadauera viva in edacem putredinem soluta, cum acerbissimis cruciamentis et intolerabili prorsus foetore, horrenda illa tabe consumantur, atque inuisum indignantemque spiritum perquam flebiliter effundant.

Quali crudeli clade atque animata quasi peste absumptos olim fuisse constat, ceu ex HERODOTI, ARISTOTELIS, LUCIANI, PAVSANIAE, SVIDAE, IOSEPHI, DIODORI SICVLI, PLVTARCHI, HELLADII, AELIANI, DIOGENIS LAERTII, PLINII, LACTAN-

CTANTII, TERTVLLIANI, AVRELIi VICTORIS, APVLEII, SERENI SAMONICI aliorumque Veterum monumentis fidē dignissimis abunde liquet; truculentos praesertim ac sanguinolentos Tyrannos, faeuosque libertatis oppressores, atque impios ac proteruos diuini Numinis Contemptores; vnde et nefando illi morbo peculiare istud nomen inditum quondam fuisse commemoratur, vt scilicet nunc *πάθος ἡγεμικόν*, siue *τυραννικόν*, nunc autem *τῶν ἀσεβῶν πάθος*, item et *Morbus Syllanus* a SIDONIO APOLLINARI *Epist.* 13. *Lib.* III. vocaretur.

Tales igitur *σκοληκόβρωτοι*, siue *φθειρόβρωτοι*, (Litem enim istam iam nostram studio non facimus, vtrum haec diuersa atque distincta sint, vt visum Viris summis, SAM. BOCHARTO, THOM. BARTHO-LINO, WOLFIO, VOGLERO, GEORG. HIERONYM. VELSHIO, DAN. HEINSIO, VRSINO, RICHARD. MEADO, aliisque; an vero inter se paria, consona atque synonyma potius esse possint, vt censuit potissimum IOACH. KÜHNIVS, ad AELIANVM, et post eum, IAC. ELSNERVS, cum aliis nonnullis,) Tales igitur, inquam, *σκοληκόβρωτοι*, seu *φθειρόβρωτοι*, aut foecunda viscerum perniciē consumti, ab istis Auctoribus modo laudatis enumerantur ANTIOCHVS ille EPIPHANES, siue, vt rectius et elegantius, istud hominis monstrum vocatur a POLYBIO atque ATHENAEO, EPIMANES, porro HERODES ille ASCALONITA, MAGNVS vulgo dictus, HERODES alter AGRIPPA, ille felix scilicet, L. SYLLA, Dictator, CALLISTHENES OLYNTHIVS, ACASTVS, PELIAE filius, ALEXANDER PSEVDOMANTIS, PHERECYDES SYRIVS, ALCMAN, Poeta, EVNVS, seditiosus ille Rex feruilis, MVTIVS, ICTUS, CASSANDER ANTIPATRI filius, DIOCLETIANVS, GALERIVS MAXIMIANVS, CLAVDIVS HERMINIANVS, in Cappadocia, apud TERTVLLIAN. ad SCAPVLAM, *pag.* 70. *Opp.* IVLIANVS, il-
lius Apostatae Patruus, NESTORIVS, et illa denique crudelissima in vtrumque sexum, Cyrenarum Regina, PHERETIMA; quibus addunt adhuc nonnulli, quanquam perquam exigua cum probabilitate, e Veteribus philosophis, DEMOCRITVM, SPEVSIPPVM, quin et ipsum adeo diuinum PLATONEM: vt iam ex recentiore Historia quos-

quosdam Reges praesertim Hispaniae, simili crudeli fato oppressos, a VOSSIO, BAUDIO, GROTIUS, BUCHANANO, THVANO, BARONIO, BOCHARTO, BARTHOLINO, FAMIANO STRADA, METERANO, VOGLERO, PAVLLINO, et aliis hic commemoratos consulto taceam, nec istam nunc miserrimam et infelicissimam Acridophagorum, seu, si ita dicere quidem liceat, Locustiuorum gentem in medium producam, quam senio iam paene confectam, ne quid malis summis deesset, eiusmodi pestis pedicularis, et quidem alata, intus in corpore prius exorta, deinde, vi via facta, ipsa nempe carne, pinguedine cuteque saeuissime peresis, extrorsum protrusa, cum intolerandis doloribus, quondam absumsit, referentibus sic atque satis viuide depingentibus, DIODORO SICULO, *Lib. III. pag. 195. Tom I. Edit. Wesseling.* STRABONE, *Lib. XVI.* AGATHARCHIDE apud PHOTIVM, *pag. 736.* et PLVTARCH. *Lib. VIII. SYMPOS. quæst. 9. p. 733.* aliisque; quibus adde PHILIPP. CAMERARII *Horar. Subcis. Cent. I. cap. 13. pag. 83.* et HIERON. MERCVRIALEM, *Lib. II. Var. Lect. cap. 20. pag. 46. sqq.* Inde ergo iure nunc, opinor, exclamare hic liceat cum SERENO illo SAMONICO:

*Sed quis non paueat Pherecydis fata Tragœdi, *)*

Qui nimio sudore fluens, Animalia tetra

Eduxit, turpi miserum quæ morte tulerunt?

Sylla quoque infelix tali languore peresus,

Corruit, et foedo se vidit ab agmine vinci.

Verum

*) Mirum vero utique, a solo SERENO, PHERECYDEM hic vocari *Tragœdum*: quem tamen reliqui auctores omnes philosophum potius dicunt, ut et Theologum, quamuis sine religione. Credibile ergo videtur, dictum forte ideo *Tragœdum*, quod flebilem quasi Tragœdiam in suo prope corpore, egerit, a tetrīs nempe pediculis misere consumptus: vel scripsisse forsitan ipsum poëtam, *fata tragœda*, scilicet, pro *tragica*, quod tamen ipsa rigida metri lex respuebat, atque id

de hoc nostro quidem poëta facile credi potest, licet frustra repugnet BURMANVS. Ceterum vero pherecydem, foedissima ista pediculorum lue exesum contabuisse, inter omnes, modo laudatos, constat. Occurrit tamen apud MAXIMUM TYRIVM, *Dissert. XLI. pag. 412.* singularis de eodem terribili mortis genere, locus; sed nondum satis ab eruditis quidem interpretibus correctus et illustratus. Sic enim ipse DAN. HEINSIVS legit in sua Editione, alios sequutus: *Φερεκύδης ὑπερφερό-*

Verum de his horrendis diuinae irae vlticis exemplis haftenus Historiarum fide relatis, ipsaque illa detestabili φθουλᾶς peste vberime egerunt Viri per omne aeuum Clarissimi Nobilissimique, SAM. BOCHARTVS, qui primo omnino loco nominandus, in *Hierozoici Part. II. Lib. IV, cap. 18. pag. 583. et cap. 26. pag. 620. sqq.* GERARD. IO. VOSSIUS, de *Idololat. Lib. IV. cap. 67. pag. 125.* HIERON. MERCVRIALIS, *Var. Lect. v. cap. 6.* ELMENHORST. ad *Apuleii Florida, pag. 376.* GEORG. HIERON. WELSCHIVS, de *Vena Medinens. cap. II. pag. 41. sqq.* IO. MEVRSIVS, ad *Helladii Besantin. Chrestomathiam, pag. 58. et ad Hesychium Miles. illustr. pag. 213. sq.* HVG. GROTIUS, *Histor. Belg. Lib. VII. pag. 472.* IO. LANGIVS, *Epist. Med. 42. Lib. II. pag. 684. sqq.* CASP. A REIES, *Quaest. Med. XXXVI. pag. 425. sqq.* VALENT. HENR. VOGLERVS, de *Rebus Med. Script. Sacr. pag. 246.* SIM. MAIOLVS, *Dier. canic. Tom. II. Collog. 5. p. 69.*

ὑπερεφρόνει, ἐν τῇ σούρῃ κείμενος, h. e. pherecydes, quum in capulo decumberet, malum tamen suum contemnebat. Quae tamen lectio frigida et inepta omnino videtur: non dum enim ἐν τῇ σούρῃ, seu capulo, iacebat PHERECYDES, viuus quippe adhuc, nec inter mortuos iam relatus, et capulo ferali inditus. DAVISIVS ergo ex quodam MS. legebat, ἐν Σύρῳ, quae insula Syrus, vna ex Cycladibus, patria nempe erat ipsius PHERECYDIS, ceu notissimum. Sed et ex hac lectione languidus et ieiunus sensus emergit; inprimis, quum alii Samo, alii rursus in Delo, PHERECYDEM obiisse referant, de qua lite vid. MENAG. ad *Diog. Laert. Lib. I. p. 66. sqq.* MEVRS. ad *Hesych. p. 214.* BRVCKER. *Hist. phil. T. I. p. 986. et al.* Vt igitur paucis dicam, mihi omnino legendum videtur: ἐν τῇ ψώρα κείμενος, in foedissima scabie pediculari cubans. Quam coniecturam eximie confirmat DIODORVS SIC. citat. *Lib. III. p. 195.* de eodem pediculorum morbo apud Acridophagos familiari: ὁ δὲ

πάσχων, τὸ μὲν πρῶτον, ὡς ὑπὸ ψώρας τινός ἐρεθιζόμενος, μετρίως ὀδᾶξᾶσθαι φιλοτιμεῖται: Morbo hoc adflactus, primum quidem veluti scabiei prurigine irritatus, leui mordicatione titillatur: vbi vid. reliq. Scilicet ipse morbus pedicularis incipit per scabiem admodum prurientem; vnde mox ex ruptis foedis istis pustulis, ceu nidis apertis, erumpunt teterrima illa pediculorum agmina. Hinc igitur appositissime in hunc sensum, APVLEIVS, *Florid. II.* ipsum PHERECYDEM vocauit *infandi morbi putredine, in serpentium scabiem solutum.* Qui locus certe eximius mirum in modum vnice fauet ipsi nostrae coniecturae, qua legendum esse docuimus, ἐν τῇ ψώρα κείμενος, phrasi nempe elegantissima. Ita enim ipse HOMERVS, *Odyss. V, 395.* ἐν νέσῳ κεῖται, et HIPPOCRATES, de *Intern. affect. p. 211.* ἐν πόννοις κεῖται, et mox p. 215. ἐν ἄλγεσι κεῖται, quod et ibidem occurrit, p. 268. item de *dieb. iud. p. 434.* et alibi saepissime. In morbo cubat, et PLAVTVS dixit.

5. p. 69. et Tom. v. Colloq. 1. pag. 705. IO. HARDVINVS, ad *Plin. Lib. vii. cap. 51. pag. 407.* CLAVD. SALMASIVS, in *Exercitat. Plin. pag. 593.* AEGID. MENAGIVS, ad *Diogen. Laert. pag. 67. 153. 167. et 409.* THOM. GATAKERVVS, ad MARC. ANTONIN. *Philosoph. Lib. iii. pag. 67.* IO. SCHEFFERVVS, atque inprimis IOACH. KVHNIVS, ad *Aeliani Var. Hist. Lib. iv. cap. 33. p. 393, et ad Lib. v. cap. 2. pag. 399.* VALCKENAR. ad *Herodoti Lib. iv. pag. 370.* ROB. KEVCHENIVS, ad *Seren. Samonic. pag. 105. sqq.* et praefertim, GABRIEL. HVMEBERGIVS, ibidem, pag. 27. IO. COLVMBVS, ad *Lactantium de Mortib. persecut. pag. 305.* ibidumque BÜNEMANNVS, et alii interpretes, ad *Cap. xxxiii.* IO. CYPRIANVS, in *Continuat. Hist. Animal. Franz. Part. v. cap. 6. pag. 3571. seqq.* CHR. FRANCO. PAVLLINI, in *Cynograph. S. iv. cap. 7. et de Morte Verminos. pag. 125. sqq.* IO. PRICAEVS, in *Comment. ad Act. Apost. xii, 23. pag. 610.* et ibidem IAC. ELSNERVS, in *Obferuat. sacr. Tom. i. pag. 417. sqq.* nec non B. WOLFIVS, in *Curis Crit. et philol. ad eundem locum, pag. 1178. Tom. i.* THOM. BARTHOLINVS, *de Morbis Biblicis, xxiii. pag. 80. sqq.* et nuperrime denique de simili argumento, Vir illustris et experientissimus, cum cura et religione hic mihi dicendus, RICHARD. MEAD, cuius singulari prorsus in me fauore et amicitia plurimum profecto laetor, glorior, mihiq. impense exinde merito gratulor, in *Medicis nempe sacris, seu de insignioribus Morbis Biblicis, Cap. xv. pag. 101. sqq.* vt alios plures iam taceam, quoniam hi hactenus laudati Auctores Lectoribus nimis fastidiosis aut festinantibus forsan iam nimii, quod vtique vereor, videbuntur.

Ex his igitur singularibus exemplis modo propositis, liquidius nunc, spero, patebit, foedissimum illum φθειράσεως Morbum non inter frequentes, solitos atque consuetos; sed potius inter rariores, insolitos ac portentosiores morbos, atque etiam nonnunquam inter ipsa diuinae vltionis manifesta documenta, iure esse referendum. Inde etiam recte in *Chrestomathia*, scripsit HELLADIVS, pag. 15. *Edit. Meurs.* φθειράσις ἐστὶ νόσημα μὲν τῶν σπανίων, *Morbus pedicularis per paucorum tantum est hominum, quod mox tribus solum exemplis, nempe*

pe ACASTI, PHERECYDIS SYRI, atque demum L. SYLLAE, confirmat: PLVTARCHVS autem in *Vita huius Syllae*, p. 474. his tribus vera illa feraque phthiriasi, erodente nempe se ipso corpore, et supplicia sibi gignente, trucidatis quatuor saltem addit alios eiusmodi miserrimos φθιγοβόωτες, scilicet ALCMANEM Poëtam, CALLISTHE-
NEM Olynthium, MVTIVM Iuriconsultum, atque demum turbulentum illum Regulum scenicum, Eunum, de quibus omnibus iam in antecedentibus, fatis dictum.

Et licet vel a nostrae aetatis Scriptoribus Medicis aliquot eorum simili foeditate Syllana horribili absumtorum exempla passim commemorantur, qui scilicet, vt eleganter, de re quidem squalida, canit LVCRETIVS, *Lib. v.*

*Corpore adesto,
Posterius tremulas super ulcera tetra tenentes
Palmas, horriferis accibant vocibus orcum,
Donicum eos vita priuarunt vermina saeva,
Expertes opis, ignaros, quid vulnera vellent.*

ea ipsa tamen exempla et perpauca sane sunt, et rariora, atque ideo potissimum in literas relata videntur, quod horridi quid monstri alerent, a consueto Naturae tramite immane quantum deflecterent, atque hinc insolentius rariusque occurrerent.

Qualia nonnulla stupenda id genus portenta de ista obscoena tabe viua, memoriae prodiderunt HIERONYM. MERCVRIALIS, *Lib. i. de Morb. Cutan. cap. 7.* MINADOVS, *Lib. ii. de ext. affect. cap. 9.* MARCELL. DONATVS, *Lib. i. de Medic. Hist. Mirab. cap. 5.* SCHENCKIVS, *Lib. v. Obsf.* MARC. AVREL. SEVERINVS, *de Abscess. anomal. Cap. 16. pag. 141.* HENR. AB HEER, *Obsf. XXIII.* VELSCHIVS, *de Vena Medinens. Cap. iv. pag. 132.* PETR. BORELLVS, *Obsf. Med. xx. Cent. i. p. 29.* AMATVS LVSTITAN. *Cent. iii. Curat. 58.* CASP. A REIES, *Elys. iucund. Quaest. Camp. Quaest. XXXVI. pag. 426. sqq.* ZACVTVS LVSTIT. *Prax. Med. admirand. Lib. iii. Obsf. 46.* IO. RHODIVS, *Cent. iii. obsf. 64. p. 154. sqq.* FRANCKENAV, in *Diff. de phthiriasi*, vt et in *Ephemerid. Natur. Cur. Dec. iiii.*

Ann. v. et vi. obs. 173. in quo egregio opere et passim de hac re plura, vt Dec. II. Ann. v. Append. Artic. XXXVIII. LII. CIX. etc. item POTERIVS, Obseru. Med. Cent. I, cap. 47. ibique HOFFMANNVS, p. 61. sq. III. MEADVS, Comment. de Morbis Bibl. cap. xv. pag. 104. sqq. CYPRIAN. ad Franz. de Animal. S. pag. 3572. praesertim autem CHRIST. FRANCISC. PAVLLINI, Tract. de Morte Verminosa, pag. 94. sqq. vbi varia eiusmodi pediculosorum aut verminosorum aegrotorum exempla miranda studiose, pro more, collecta coniunctim exhibet ex HEVRNIO, HANNAEO, VOGTIO, COBERO, HANEMANNO, BARTHOLINO, CRÜGERO, WEDELIO, BORELLO, BONETO, ZEISSIO, aliisque pluribus Auctoribus fide sane dignis, et candoris atque experientiae laude conspicuis.

Sed ponamus nunc etiam, atque tantisper concedamus, tetram istam phthiriasin morbum esse frequentem, obuium atque consuetum; nemo tamen Medicorum tam Veterum, quam recentiorum, quod equidem sciam, phthiriasin adhuc posuit inter proprios Vesicae Morbos, praeter vnum forte nostrum CAELIVM AVRELIANVM, hoc quidem loco ambiguo superius proposito, cuius occasione, nobis hic differendi quaedam materia subministrata fuit. Quotquot enim istorum φθιρίάσων vel generalis, vt totius corporis, vel specialis, vt cordis, quod maxime mirum, et pericardii, item capitis, palpebrarum, et superciliarum, axillarum et istarum denique reconditarum partium, quas pudor velat, mentionem fecerunt, omnes tamen, quantum equidem memini, vno veluti ore, silent de ista noua quasi et indicta haecenus atque illecta Vesicae φθιρίάσει. Sic enim ipse noster CAELIVS AVRELIANVS, *Lib. IV. de Morb. Chron. Cap. 2. pag. 497. vbi alioqui, suo scilicet more, satis exacte, perspicue et concinne de foedo hoc Morbo tractat: Sumfit Phthiriasis nomen non a genere, sed a multitudine pediculorum. Plurimi enim creantur nunc per totum corpus, nunc per eas partes, quae capillatura conseptae vel contectae sunt: (ita enim omnino legendum videtur, pro vulgato conceptae sunt, mox enim pag. 498. sequitur: ea loca, quae Capillatura vestita sunt.) Et nunc consueti atque simplicis formae, nunc ignoti, hoc est latiores, et duri magis, ac saeuientes morfibz*

morsibus vehementer, quos quidam ferales appellant. Nam saepe etiam sub Capillis inveniuntur corpora penetrasse. Ita et PAPIAS, apud Nobilissimum CANGIVM, in immensae frugis et stupendae diligentiae opere, *Glossario Med. et Inf. Latinit. Tom. III. p. 732.* *Fruriasis*, *Pediculorum multitudo*, aliquando in Capillis, aliquando in toto corpore. Vbi haec quidem addunt nouissimi tanti operis Editores celeberrimi: *Forte legendum pruriasis, a prurigine, quae pediculorum morsibus excitatur.* Quod mihi tamén, pace quidem tantorum Virorum, secus omnino videtur: quoniam scilicet *pruriasis* compositio hybrida et semigraeca, semique Latina, tota vero barbara est; adeo, ut hinc vix dubitem, quin potius legendum sit *phthiriasis*, pro *Fruriasis*, nisi hoc forsan, ut verisimile quidem videtur, a Barbaris, ex illo praue detortum ac vitiose deductum fuerit. Sed haec obiter. Verum φθειράσις et generalis, et particularis praesertim, frequentius meminerunt ipse GALENVS, in *Definit. Med. 353. Tom. II. Opp. pag. 270.* DE ALIMENTOR. *Facultat. Lib. II, cap. 8. pag. 340. Tom. VI. De Compos. Medicam. secund. Loc. Lib. I, cap. 7. p. 346. Tom. XIII. De Theriaca, ad Pison. et alibi:* item ACTVARIVS, *Lib. II. περί διαγνώσ. παθῶν, cap. 7.* NONVS, *de Curat. Morbor. Cap. VI. pag. 8.* et, ut alios taceam, ipse CORNELIVS noster CELSVS, *Lib. VI, cap. 6. §. 15. p. 358.* Nemo tamen horum omnium, quantum mihi quidem constat, ut iam supra monui, huius insolitae et portentosae quasi Vesicae φθειράσις alicubi mentionem iniecit: Neque sane Recentiores, qui de illa molesta iuxta ac funesta corporis humani peste quasi spirante, quidquam commentati fuerunt, istius teterrimae pullitiei pedicularis vel in ipsius Vesicae spatio-fo ambitu nidificantis, usquam meminerunt, uti FRANCKENAV atque ZEISIVS *de Phthiriasi*, SAM. HAFENREFFERVS, *de Cutis Affect. Lib. I. cap. 10. pag. 76. sqq.* HIERON. MERCVRIALIS, *de Morb. Cutan. MINADOVS, de extern. Affect. Lib. II, cap. 9. 10.* LANGIVS, *Epist. Med. 42. Lib. II.* PAVLLINI, *de Morte Verminosa*, CHRIST. LANGIVS, *de Pathologia animata*, VELSCHIVS, *de Vena Medinensi*, CASP. AREIES, *Quaest. Med. iucund. XXXVI. 10.* DOLAEVS, *in Encyclopaed. Med. dogmat. Lib. VI, cap. XI. pag. 426. sqq.* praesertim MICH.

FRID. LOCHNERVS, in doctissimo et elegantissimo Schediasmate, *de Phthiriasi Cordis*, de qua tamen nonnihil dubitat ill. MORGAGNVS, *de Sedib. et Causs. Morb. T. I. Ep. XXIV. p. 255. sqq.* alique plures, maximam partem iam supra allegati. Istud equidem, vt verum fatear, me minime fugit, in omnibus nempe in vniuersum corporis humani partibus ac visceribus, vermes diuersos generari posse et solere, vt variis argumentis et experimentis iam pridem ostenderunt ac confirmarunt ATHANAS. KIRCHERVS, *Tract. de Peste, Sect. I. cap. 8. pag. 33. sqq.* et in *Mund. subterr. Lib. XII. Sect. I. cap. 10. et Lib. IX. part. II. pag. 160.* CHRIST. LANGIVS et PAVLLINI modo laudati, in *Pathologia animata*, et *de Morte Verminosa*, item, in *Cynographia, Sect. IV, cap. 6.* vbi plures Auctores allegantur, VELSCHIVS, *de Vena Medinens. Cap. IV. pag. 128. sqq.* PECHLIN. *Obs. 35. Lib. II. pag. 299. sqq.* STALPART. VAN DER WIEL, *Obs. Med. 29. Cent. post. part. I. pag. 312. sqq.* REVSNERVS, *de Scorbut. Exercit. I. p. 65. sqq.* DIETERICH. *Iat. Hippocrat. p. 419. sqq.* AVGVST. HAVPTMANNVS, *Epist. de viva Mortis imagine*, PETR. TRAPOLINVS, *de Morbo Gall. p. 1005. sqq.* et BENEDICT. RINII *Consil. de Morb. Gall. p. 975.* in *Operae Aphrodisiac. per HERM. BOERHAAVE, IO. SCHENCKIVS, Lib. III. Obseru.* BORELLVS, RHODIVS, BARTHOLINVS, KERKRINGIVS, BONETVS, alique plures, quos laudat magna copia, Praeceptor quondam noster, vel post fata, nobis semper venerandus, AVG. QVIRIN. RIVINVS, in doctissima *Dissert. de Morbis animatis*, quae et inprimis tota huc spectat.

Ideoque nec illud mihi incompertum est, vel in ipsa quoque Vesica, diuersae formae ac figurae, diuersique coloris et habitus vermiculos et bestiolas saepius pronasci solere, quae cum ipsa vrina, ceu vndis suis genitalibus innatantes, subinde effundantur, praesertim, quum id ipsum multis mirandis prorsus exemplis atque Historiis fide dignissimis, liquidissime dudum demonstrarint AMBROS. PARAEVS, *Opp. Chirurg. Lib. XIX. cap. 3. pag. 563. sqq.* HILDANVS, *Obs. Chirurg. 56. Cent. I. pag. 162.* THOM. BARTHOLINVS, *Hist. Anat. 89. Cent. I. pag. 144.* et in *Act. Med. Hafn. Vol. V. Obs. 21. pag. 83. et Obs.*

Obs. 70. pag. 186. NICOL. TVLPIVS, *Lib.* II. *Obsf. Med.* capp. 49.
 50. 51. pag. 172. *sqq.* HENR. AB HEER. in *Spadacrene*, cap. 8. pag.
 67. FERNELIVS, *Patholog. Lib.* VI, cap. 10. ALOIS. MVNDELLA,
Dialog. VI. RONDELETIVS de *Piscibus*, *Lib.* XII, cap. 25. HOLLE-
 RIVS, in *schol. ad Lib.* I. cap. 50 et 54. de *Morb. intern.* HIERON.
 MERCVRIAL. *Lib.* III. de *Morb. pueror.* cap. 3. BALD. RONSSEVS,
Epist. Med. X, pag. 32. HERCVLES SAXONIA, *pract. part.* II. cap.
 35. CLAVDIVS, *Consil.* XL. SENNERTVS noster, *Pract.*
Lib. III. *part.* VIII. *Sect.* I. cap. 3. IO. MATTHAEVS, *Obs. med. Casu*
 III. NICOL. PECHLINVS, *Obs. med.* 18. *Lib.* I. pag. 44. IO. RHO-
 DIVS, *Obsf. med.* 35 et 36. pag. 131. *sqq.* vbi complures hac de mi-
 rabili re, Auctores alii simul laudati inueniuntur, item FRID. RVY-
 SCHIVS, *Theaur. Anat.* I, *Arcul.* 4. p. 32. 33. MENZELIVS, *Ephem.*
Nat. Cur. Dec. III. *Obs.* 118. FRANCKENAV, ibidem, Dec. III. *Ann.*
 IV. *Obs.* II. ROSIN. LENTILIVS, in *parallelism.* ad *Ann.* V. et VI.
 Dec. III. ad *Obs.* 160. LANZONVS, *Ephem. Cent.* III. et IV. *Obs.* 59.
 p. 142. HAGENDORN, *Obs. med.* 68. *Cent.* I. pag. 243. *sq.* et quos
 ibi citat Auctores plures, item SALMVTH. *Obs. med.* 49. *Cent.* I. p.
 32. praefertim SCHENCK. *Lib.* III. *Obs. med.* 293. et *sqq.* vsque ad
obs. 296. pag. 959. *sqq.* Tom. I. et denique PAVLLINI, de *Morte*
Vermिनosa. pag. 88. *sqq.* et quos ibi allegat Auctores plures alios. Prae-
 fertim vero et ob insignem exemplorum notatu dignissimorum appara-
 tum, et propter ingentem Auctorum in hanc rem allegatorum copiam,
 huc diligenter conferri et studiose legi hic omnino meretur Celeberri-
 mi quondam et elegantissime docti MICH. FRID. LOCHNERI *Dis-*
quutio ad Locum Plutarchi περὶ Ονηδίου δασέος, cuius occasione de Ver-
 mibus cum Vrina excretis late agitur: cui sub calcem adiecta est de
 eodem argumento nitidissime conscripta Obseruatio Viri illustris quon-
 dam suis praeclaris in rem pariter medicam ac literariam meritis, G O-
 DEFRIID. THOMASII, τῆς Διαμασίης καὶ χαλεπότης, vbi eruditissi-
 me de concretis Vermiformibus copiose per Vesicam egestis, tracta-
 tur. Ceterum per quam memorabilis iste PLVTARCHI locus, de
 bestiola quadam hirsuta vna cum genitali liquore virili, eiecta, cuius
 oppor-

opportuna occasione, LOCHNERVS pulcherrimum illum suum foetum edidit, extat *Lib. VIII. Sympos. quaest. 9. pag. 733.* atque huc vel maxime spectat. Cuncta tamen haec exempla de portentosis huiusmodi atque peregrinis incolis verminosis in ipso Vesicae spatiofo ambitu stabulantibus, atque de vrina, viua quasi et animata putredine foeta, quotquot etiam fuerint, inter rariores omnino atque infrequentiores casus et insolentiora Naturae saeuo quasi cum ioco ludentis, portenta, relata potius fuerunt a suis Auctoribus superius laudatis, quam inter vulgares et semper obuios Vesicae morbos: praesertim, quum contra ipsam Verminum in Vesica, aut vrina, generationem, cum VALSALVA, atque VALLISNERIO, magna satis grauique dubia moveat ill. MORGAGNVS, *Op. de sedibus et causis Morborum, Tom. II. Lib. III. Epist. anat. med. 42. pag. 157. sqq.* digna omnino, quae sedulo expendantur: neque etiam ista ad Phthiriasin proprie sic dictam iure pertinent, neque ad *speciales Vesicae passiones*, accuratius distinguendo, referri cum ratione possunt, vti scilicet loquitur CAELIUS noster AVRELIANVS, ad cuius locum in limine huius Commentationis propositum, vt, relictis plane bestiolis illis morsicantibus teterimis, nunc demum protinus appropereamus, hem! tempus nos fero quidem, at serio tamen, monere videtur.

Nimirum ex haecenus longe lateque disputatis, liquidissime nunc patere confido plane atque persuasus sum, illam φθειρίασιν inter *speciales* quidem *Vesicae passiones* a CAELIO nostro AVRELIANO commemoratam, locum ibi suum aegerrime tueri posse. Quare grauissimis illis rationibus superius diligentissime in medium allatis praesertim inducto, mihi vix vllum amplius haeret dubium, quin in posterum, levissima quidem immutatione, at summa tamen, nisi fallor, cum probabilitate, in isto CAELII AVRELIANI loco, legendum sit πτυγίασιν, potius, quam quod haecenus sine sensu et elegantia, lectum et scriptum fuit, φθειρίασιν. Liberemus ergo, iam demum tempus est, cultissimum illum CAELII AVRELIANI locum a foeda ista φθειρίασει, qua per tot saecula, turpe dictu et auditu, contaminatus iacuit.

Est autem haec *πιτυγιάσις*, seu *πιτύρισμα*, scilicet ἀπὸ τῶν *πιτύρων*, h. e. furfuribus, quidam Vesicae morbus pruriginosus, siue potius alterius morbi effectus atque comes, saepius insanabilis, immo et interdum letalis, imprimis, vbi cum febribus coniunctus fuerit, ortus praesertim ab acri quadam scabie, aut mordaci impetigine, intus in ipso Vesicae spatio enata, quae pro more, sensim, ex parte, desiccata, atque inde in squamulas quasi furfurosas resoluta, per consuetas vrinae profluentis vias, cum exquisito pruritu, saepe etiam cum quibusdam obtusis doloris obscuri puncturis, emittitur. Quo quidem molesti morbi genere ii praesertim frequentius affliguntur, qui vel acutis, asperisque ac vellicantibus calculis Vesicae altius impactis, infestantur, vel etiam cum immundis incustoditi pudoris feminis, aut puellis, vt ille ait, emi facilibus foedum infandumque aluerunt commercium, vel qui denique generatim, corpora habent vitiosis putridisque humoribus vndique collectis turgida atque oppleta.

Haec vero singularis nostra Vesicae *πιτυγιάσις* nomen suum haud dubie traxisse videtur ab illa altera vulgari et frequentiore *πιτυγιάσει*, quae partes humani corporis externas pilis praecipue conuestitas, exempli causa, ipsum caput, mentum, siue barbam, supercilia, axillas, atque illa ipsa demum loca a naturali pudore visibus humanis subtracta, foeda labe contaminat, ac squamis furfurosas exasperat: vbi nempe, vt CELSVS eleganter de re minus eleganti, loquitur, *Lib. vi, cap. 2. inter pilos quaedam quasi squamulae surgunt, eaeque a cute resoluuntur; et interdum madent, multo saepius siccae sunt*: Vel, vt adhuc elegantius SERENVS SAMONICVS canit:

Quum caput immensa pexum porrigine ningit:

Copia farris uti freudentibus edita saxis:

item paucis interiectis, de ipsa huius pruriginosi mali curatione:

Desinit interea glomerari farrea nubes,

Cessabitque grauis crebrae porriginis imber.

Vbi videantur, si placet, ROB. KEVCHENIVS alique in *Not. apud BVRMANN. pag. 200. seqq.* et ibidem HVMELBERG. *pag. 18. sqq.* item REINESIVS, *Epist. CXVII. ad Daum. pag. 292.* CLAVD. SAL-

MASIVS, *ad Tertulliani Lib. de Pallio*, pag. 402. *sqq.* nec non FOES. in *Oecon. Hipp.* GORRAEVS, in *Definit. Med.* pag. 376. aliique plures. Praesertim autem de hoc foedo capitis et corporis furfure, ut PLINIVS ait, ex instituto, abunde egerunt ipse GALENVS, *Lib. I. de Compos. Medicam. secund. Loc. cap. 6.* pag. 345. *sqq.* Tom. XIII. et alibi, PAVLLVS AEGINETA, *Lib. III, cap. 3.* pag. 26. ALEXANDER TRALLIANVS, *Lib. I, cap. 4.* p. 10. AETIVS AMIDENVS, *Lib. VI, cap. 66.* pag. 116. ACTVARIVS, *Lib. II. de Cognit. Morb. c. 5.* et denique NONVS, *de Curat. Morb. Cap. IV.* pag. 6. *sqq.* ut ipsum CELSVM, iam supra laudatum, SCRIBONIVM LARGVM aliosque plures in praesenti taceam.

Verum relictâ hac generali quidem et vbiuis notissima externa corporis *πιτυρίασει*, reuertamur nunc potius, en tempus est! ad specialem illam minus vulgo cognitam, atque internam Vesicae *πιτυρίασιν*, seu furfurosam porriginem. De ista igitur sic pronunciauit ipse summus noster HIPPOCRATES, *Aph. 77. Sect. IV.* 'Οκόσοισιν ἐν τῷ ἔργῳ παχέϊ εἶντι, πιτυρώδεα ζυνεξέρχεται, τῷ τέτοιον ἢ κύστις ψωριᾶ. Quibus in urina crassa existente, furfurosa simul minguntur, iis Vesica scabie laborat. Quem quidem egregium Hipp. Aphorismum aliquam sui partem truncatum, ita in suum Libellum *de Urinis*, intulit THEOPHILVS, seu PHILOTHEVS, memoriae suae male fidae ac minus tenaci nimium tum confusus, *Cap. nempe XXI*, quod ipsum *περὶ τῶν πιτυρωδῶν ὑποστάσεων*, seu *de sedimentis Urinarum fursuraceis*, tractat, pag. 130. 'Οκόσοις ἐν τῷ ἔργῳ πιτυρώδῃ ἐξέρχονται, τῷ τέτοις ἢ κύστις ψωριᾶ. Hunc vero ipsum Hipp. locum eximium sic doctissime et sapientissime interpretatur GALENVS, in *Comment. pag. 188. Tom. IX. Opp.* ὥσπερ γὰρ ἡ τῆ δέρματος ἐπιφάνεια, καλεῖται δ' αὐτὴν ἐπίδερμίδα, κατὰ τὰς ψώρας, καὶ τὰς λέπρας, καὶ τὰς λειχήνας ἀποβάλλει τι λεπτόν, οἷον περὶ τὸ γῆρας ἐστὶ τῶν ὄψεων, ἔτω, καὶ πειδάν τι τῶν ἐνδον μορίων ὁμοίον τι πάθημα πάθη, τὸ οἷον δέρμα, καὶ τὸ σύμπτωμα τῆ παθήματος ὁμοιον γενήσεται. Κατὰ τῆτο ἔν καὶ ἡ κύστις ψωριῶσα πιτυρώδεα δέρματα σὺν σοῖς ἔργοις ἐξεί κενέμενα: Quemadmodum enim cutis superficies (eam vero extimam cuticulam vocant,) per scabiem, lepram, atque lichenas, tenue quoddam corpu-

scutum

sculum abiicit, qualis fere est serpentum senectus: sic etiam, quum partium interiorum quaedam eundem subeat affectum, quo cutis laborauerit, etiam symptoma affectui simile oborietur: proindeque etiam ipsa Vesica scabie infecta furfurosas cuticulas, una cum Urinis, emittet. Haecenus quidem GALENVS, qui et eandem in rem conferendus est *Lib. de Urinis*, qui sub eius nomine vulgo circumfertur. *Cap. xxvii. p. 344. Tom. viii. et locis aliis passim obuiis*, ut in *Compend. de Urinis*, pag. 351.

Sed redeamus potius ad ipsum nostrum HIPPOCRATEM, quem et alibi, in eandem sententiam sic loquutum fuisse, constat potissimum e *Lib. de Natura Human. pag. 279. Edit. Lind.* ὁκοῖον δὲ, en verba ipsa! Πίτυρα ἐπιφαίνεται ἐπὶ τῷ ἔρῃματι, τῶν ἢ κύστις ψωρίᾳ: Vbi autem veluti furfures, in urina supernatant, horum quidem Vesica scabie laborat. Quibus binis locis Hippocraticis egregiis prorsus ac praeclaris, plurimum sane auctoritatis, decoris ac ponderis conciliari posse huic nostrae coniecturae et emendationi in loco nostro CAELII AVRELIANI, non infeliciter, ut spes est, tentatae, haud exigua sane aut vana me alit fiducia. In iisdem enim diuinus ille Cous senex τὰ πίτυρα, seu πιτυρώδεα, atque τὸ ψωρίᾳν, aequae ceu synonyma quaedam, aut tanquam causas et effectus, inter sese apte coniungit, ac CAELIVS noster AVRELIANVS pari modo, scite consociauit πιτυρίᾳσιν atque ψωρίᾳσιν, ut quidem nobis legendum videbatur quondam, et adhuc iure videtur. Libro autem de praenot. pag. 457. apud eundem Medicorum principem occurrunt quoque αἱ ὑποστάσεις τῶν ἔρων πιτυρώδες πονηαί, unde CELSVS, *Lib. ii, cap. 4.* pessima ex his urina, si tanquam ex furfuribus factas nubeculas repraesentat, et PLINIVS, *Lib. xxviii. cap. 6.* Mala est urina, in quo veluti furfures atque nubeculae apparent, ubi videndus HARDVINVS, in *Not. pag. 456. Tom. ii. Opp.* Luctuosam denique historiam de huiusmodi atroci Vesicae scabie furfurosa, tandem mortifera, retulit idem HIPPOCRATES, *Lib. de Morb. Epidem. v. pag. 773.* his quidem verbis: Ἐν Λαγίσσῃ Θεοφώρῳ παῖς ἐλέπερα τὴν κύστιν, καὶ διέρπει γλίχρον, κ. τ. λ. In Larissa, Theophorbi filius Vesicam scabiosam habebat, et viscosam urinam mingeat: ubi inspiciendus

in Notis FOESIVS, pag. 1147. et in Comment. FRANC. VALLESIVS, pag. 480.

Verum nec post HIPPOCRATEM nostrum, defuerunt profecto Medici Veteres Graeci, qui de furfurosa eiusmodi Vesicae porrigine, seu impetigine, eadem cum ipso, obseruarent atque in literas referrent. De GALENO ac THEOPHILO iam supra, data occasione, actum fuit: Nunc producamus, si placet, alios eandem in rem testes grauissimos et nostrae coniecturae defensores quasi acerrimos. Audiamus ergo ALEXANDRUM TRALLIAN. Lib. IX, cap. 7. p. 551. ita scribentem: Διαγίνωσκε τὴν ψωρίασιν τῆς κύστεως, ἐν τῇ πιτυρώδει τινὰ μόρια κατὰ τὸ χῦμα τῶν ὕρων φαίνεσθαι, Vesicae scabiem inde notato, quum furfuraceae quaedam particulae in urinarum liquore appareant, vbi vid. reliqua bene multa. Audiamus porro AETIVM AMIDENVM ipsi plane consonum, Lib. V, cap. 40. pag. 81. αἱ πιτυρώδεις ὑποστάσεις ἐκ τῆς κύστεως ἐκκρίνονται, sedimenta urinae furfurosa e Vesica excernuntur, vbi vid. sequentia. PAVLLVS denique AEGINETA his quoque suffragatur, Lib. III, cap. 44. pag. 46. b. αἱ δὲ πιτυρώδεις ὑποστάσεις ψωρίαν δηλοῦσι τὴν κύστιν, subsidentiae furfurosae Vesicam ipsam foeda intus scabie turpatam esse, significant: nec non ACTVARIVS, Lib. I. de Vrin. cap. 15. quibus omnibus haecenus productis ea velim, addantur, si placet, quae hac de ipsa re docte adnotauit THOM. GUIDOTIVS, in Notis ad THEOPHILI Libellum de Vrinis, superius aliquoties laudatum, pag. 227. item quae collegit FOESIVS in Oeconomia Hipp. pag. 309. et DIETERICHIVS, in latreo Hippocrat. pag. 979. ne alios plures iam aduocem, quia properandum.

Vnum tamen adhuc locum eximium huc vel maxime facientem, intermittere plane non possum, quin his addam e Glossario Sangermaniano, apud magnum CANGIVM, in Glossar. med. et inf. Lat. Tom. II. pag. 445. sed, quod merito dolendum, foedissimis mendis, et teterima quasi porrigine furfurosa, inquinatum: Ita enim vulgo ibi legitur: Cauculosi, Hii sunt, quibus Tumor in Vesica et Arostroma ptiriaris, id est, illi, qui, cum Vrinam faciunt, velut Furfures, supernatat. Stranguiria, id est, Constructio Vrine, et Discuria, id est, Difficultas Vrinam faciendi, et

et Emorrogia, id est, qui sanguinem per Vrinam faciunt. Cui tamen deplorato paene et portentosis verborum monstris conspurcato loco, Medicinam forsan haud plane improsporam, si dicere quidem liceat, sequentem in modum, faciendam esse censemus: *Calculosi, ii sunt, quibus Tumor in Vesica, et Apostoma* (nempe pro *Apostema*, vid. CANG. supra in *Apostoma*, T. 1. pag. 572.) *Pityriasis, id est illi, qui, cum Vrinam faciunt, velut furfures, supernatat*: *Stranguria, id est, constrictio Vrinae, et Dysuria, id est, difficultas Vrinam faciendi, et Haemorrhagia, id est, qui Sanguinem per Vrinam faciunt.*

Sed quid tandem, quaeso, opus est, tot aliena et peregrina, praesidia atque testimonia vndiquaque conquisita, anxie quasi in auxilium conuocare? quum vnicum sane, idque ipsum grauissimum, ipsius nostri CAELII AVRELIANI testimonium nobis abunde sufficere possit, ad emendationem nostram validissime confirmandam atque extra omne paene dubium certissime collocandam. Ita enim ille, in hoc ipso, quod sub manibus iam nostris est, *Cap. iv. Lib. v. de Morb. Chron. pag. 572.* paucis interiectis, mentem suam nobis apertius declarat, quid scilicet in antecedentibus, per voces *πιτυρίασι* atque *ψωρίασι*, proprie intellexerit, quando sequentia illustrationis et explicationis gratia, manifesto subiungit: *Aliquando alienitatis obtrusione, Vesicae impedito meatu, ut Lapidis, aut Arenae, aut Capillorum, aut Squamularum Cantabri similium, vel quocunque sedimine crassiore.* Vbi nimirum *Cantabrum*, stilo nostri CAELII AVRELIANI consueto, item APICII, VEGETII, et THEODORI PRISCIANI, aliorumque similium mediæ ævi Scriptorum, idem est ac *furfur*. Audiamus rursus, si quidem placeat, doctissimum CANGIVM, in *Glossario Med. et Inf. Lat. Tom. II. p. 187.* *Cantabrum, furfur.* Papias: *Cantabrum, furfur caninum, quo canes pascuntur, purgamenta tritici.* Scholiastes Iuuenal. ad illud *Sat. V. Faris mordere canini*: *Cantabri, panis sordidus canum est.* CAELIVS AVREL. Siccens. *Lib. III. Tard. Pass. cap. 2.* *Siue Lacte, aut decoctione Cantabri, item Lib. IV. cap. 3.* *Apponenda vaporatio Cantabri conligati.* Acta Sanct. Eutychetis: *Iussitque eos terram fodere, ad vesperum vero,*
Hhh 3 Canta-

Cantabrum manducare. Acta SS. Nerei et Achillei, n. 19. eodem modo:
Ad Vesperum vero Cantabrum manducare.

MATTHAEVS quoque SILVATICVS, in *Pandect. Med. fol. 45.* in eandem sententiam: *Cantabrum, Latine furfur tritici*: Item *Cantabrics, id est Ptiriasis, furfurisca, et Cantabries, id est fursures capitis, quae graece ptiriasis dicitur, ubi tamen utroque loco, pityriasis, scribendum esse, ex haecenus dictis, per se, putem, liquet.* Quale mendum et infra occurrit *fol. 144. Ptiriasis, scabrum, vel Cantabricum, idem et sunt fursures capitis, nempe et ibi legendum, pityriasis*: ut et in *Furfurisca, ibidem.* Sed plura de Cantabro hoc, vid. apud TURNEB. *Lib. XV. Aduersar. cap. 16.* LAUR. PIGNORIVM, de *Seruis, pag. 521. sqq.* ALMELOVEEN, ad *Caelium nostrum Aurel. p. 616.* THOM. REINNESIVM, *Lib. II. Var. Lect. cap. 14. p. 242. et Epist. CXVII. ad Daum. pag. 292.* aliosque, quibus ea, nisi graue, addantur; quae nosmet ipsi quondam de eadem voce obseruauimus ad THEODORVM PRISCIANVM, in *Append. ad Libellum nostrum de Pleuritide, pag. 201. cum sequentibus.*

Nihil ergo, ut finem tandem copiosis nostris dictis faciamus, nihil prorsus, inquam, dubitamus, quin haec ipsa nostra Emendatio in CAELIO AVRELIANO tentata, qua legendum esse liquidissime, opinor, demonstrauius, non φθαρσίας, sed potius πικρίας, tot quippe solidissimis, nisi fallor, argumentis circummunita, plenum utique assensum in posterum impetratura sit ab omnibus illis elegantioris, erectioris et doctioris ingenii Viris, malignum enim in nos vulgus merito spernimus, et ab his interioribus sacris arcemus, quibus altera nostra circa locum quendam Suetonianum coniectura de *Habenis atque Arundinibus*, olim tantopere placuit, ut eam pro certissima haberent. Contra quam tamen nuper admodum leuis quidam armaturae miles alienis armis indutus, alienisque infirmis auxiliis et infaustis consiliis adiutus, in campum quidem publicum, sed arenosum, temere profiliuit, qui vero una cum imbelli sua turba auxiliari, proxime promeritas suae petulantiae poenas nobis publice daturus est: Sed haec obiter tantum.

EXERCITATIO QUINTA.

DE

GIBBO EX NEPHRITIDE POTIVS
QVAM EX PHRENITIDE ORTO

AD HIPPOCRATEM ATQVE CAEL. AVRELIANVM

ILLVSTRANDVM ET EMENDANDVM.

QVAM plurima, non negamus, in HIPPOCRATE nostro perspicue illustrando et feliciter emendando, praestiterunt olim Viri perenni laude dignissimi, MERCVRIALIS, FOESIVS, ZWINGERVS, MARTINVS, DVRETVS, MARTIANVS, LINDENIVS, HEVRNIVS, SEPTALIVS, DACERIVS et alii, item ex parte, vtrique SCALIGERI, SALMASIVS, MARSIL. CAGNATVS, MEIBOMIVS, OPSOPOEVVS, THOM. REINESIVS, alique nonnulli: ^{a)} per quos omnes HIPPOCRATES senili quasi squalore repurgatus, nunc nitidius viget ac floret; istique vicissim, per ipsum, mansura nominis fama circumfunduntur, et inde nouo lumine exsplendescunt. Interea tamen simul ingenue fatendum est, in tam vasto, arduo et inexplicabili fere opere, non omnia ita ab illis ipsis fuisse explanata, emendata ac correctata, quin longe plura adhuc supersint peractis iam, in posterum peragenda. Inde post largam ac foecundam ipsorum messem, non sterile tenueque nobis relictum fuit spicilegium, sed altera potius nouaque messis adhuc in herba est, et quotidie laetius efflorescit. Adeo, vt hinc verissimum istud sapientissimi SENECAE effatum et hic vel maxime locum habeat commodum: *Multum adhuc restat operis, multumque restabit: nec ulli nato, post mille saecula, praeccludetur occasio, aliquid adhuc adiiciendi. Multum egerunt, qui ante nos fuerunt, sed non peregerunt: suspiciendi tamen sunt, et ritu deorum, colendi.*

Id certe nemini non plenius constabit, quisquis venerandum illud paucisque eruditorum reclusum et intellectum opus Hippocraticum
noctur-

a) De quibus olim distinctius disertius FOCRATIS Editione adornanda, Sect. II. que egimus, in Commentat. de noua HIP- edita Lugduni Batauorum clolcccxxvii.

nocturna diurnaue manu aliquanto attentius ac religiosius versauerit. Me ipsum profecto, absit hic vana iactantia, et adsit aequus interpret! longior dies id satis superque edocuit, dum per ambitiosum quadraginta annorum spatium, HIPPOCRATI illustrando et emendando, magno molimine, meas curas ac vigilias impendi, quantum adhuc operis residui restet, quantaue materiae nondum rite pertractatae copia abundet, adeo, vt hinc labori potius faber desit, quam fabro labor. Id quidem nullo paene negotio, quam plurimis exemplis, in ipso HIPPOCRATE, vbique obuiis, liquidissime nunc a me ostendi hic posset, sicut iam alibi, copiose demonstraui; ^{b)} nisi mihi libenter liberius exspatiaturo, arctius curriculum circumscriberent imperiosa receptae consuetudinis vis, temporis penuria, et chartae inprimis angustia, meque hinc, etsi inuitum, in vnus tantum, sed plane singularis et luculenti, loci explicatione et emendatione occupatum, nunc continerent.

Legitur vero difficilis iste atque ambiguus locus, de quo nobis hic sermo futurus, *Lib. v. de Morbis vulgiuagis, seu Epidemicis, p. 785. Edit. Linden.* ^{c)} Sed audiamus iam ipsa Auctoris verba, hic infra adscribenda:

Τῷ μαγείῳ ἐν ἀκάνθῳ τὸ κύφωμα ἐκ Φρενίτιδος ἐγένετο. Τῆτα φαρμακοποσίη ἐδεμίη ξυνήνεγκεν, οἶνος δὲ μέλας καὶ ἀρτοσιτή, λῆτρεων τε ἀπέχεσθαι καὶ ἀνατρίβεσθαι λείως, δάλπεσθαι τε μήτε πολλῷ πυρήματι, ἀλλὰ πρηέως.

Quae ita vulgo Latine vertuntur:

Coco in spina gibbositas facta est ex Phrenitide. Huic nulla medicamenti potio conferebat. Verum vinum nigrum, et panis esus, et balneorum abstinentia, et frictio, et lenis fctus, non cum multo fomento, sed placide.

Quae

^{b)} Nimirum in *Comment. de HIPPOCR. Edit.* et adiuncto *Commentario in HIPPOCR. Lib. de Anarome, in Epist. Med. Crit.* ad IO. FREIND. item in *Lib. de HIPPOCRATE Atheismi falso accusato*, denique in *Obseruat. Crit. Lib. III. Cap. XXV.* per totum, et passim in aliis quoque scriptis, Diariis Eruditorum infertis.

^{c)} Quem ipsi HIPPOCRATI, post GALENUM, male abiudicarunt MERCVRIALIS et LEMOSIUS, quum tamen eum sub HIPPOCRATIS nomine, aperte citauerint ipse CELSVS, CAELIVS AVRELIANVS, QVINCTILIANVS, PLVTARCHVS et alii veterum, vt et probe obseruauit FOESIUS. Conf. *Epist. nostr. Med. Crit. pag. 29.*

Quae ipsa aegri historia infra rursus, iisdem paene verbis repetita, legitur, *Lib. VII. de Morb. Epidem. pag. 860.* hac tantum intercedente differentia, quod ibi pro ἀποσιτίη, contrario plane sensu, scriptum sit ἀποσιτίη, et in sequentibus, melius additum: χεῖροισι δὲ, καὶ ἀνατρίβουσιν χεῖρῶν: de quibus paullo post, nonnulla.

Nemini igitur aut praestantissimorum interpretum, aut aliorum doctissimorum Medicorum, qui huius loci meminerunt, vlla mendii latentis suspicio hic subnata fuit: quin potius omnes, quantum equidem sciam, veluti VALLESIVS, MARTIANVS, FOESIVS, DVRETIVS, VIDIVS, MARC. AVREL. SEVERINVS, MERCVRIALIS, aliique plures, hunc quidem locum, ceu sanum atque integrum, secure et confidenter transmiserunt: donec tandem aliquando, solus primusque obsisteret contra, Vir acerrimi iudicii iuxta et sagacissimi ingenii, doctrinaeque nullis paene limitibus circumscriptae, THOMAS REINERSIVS, praecipua et aeterna Germanorum gloria, atque cum in immensae frugis et inexhaustae eruditionis opere *Variarum Lectionum, Lib. II. Cap. III. pag. 137. seqq.* tum *Epistola xxxviii. ad Nesteros, pag. 68.* ingenti doctrinae variae apparatu, pro solito scilicet suo more, ostendere conaretur, et in ipsis HIPPOCRATIS verbis, frustra pro rectis et sanis, hactenus habitis, foedum κύρωμα, seu turpe mendum, residere, et insuper interpretes tantum non omnes, caecos quasi surdosque fuisse in explanandis his oraculis Hippocraticis, nec verum sensum vlllo modo, perspexisse, aut indagasse.

Nunc ipsas Viri summi rationes in compendium hic missuri, paucis videamus, quomodo istam suam contrariam sententiam tueatur, quantisque praesidiis ac firmamentis ipsam circummuniat. Nimirum, primo, pronunciat, ἀκάνθον, hic potius esse nomen urbis, aut regionis, quam inhabitauerit miser iste coquus, ex phrenitico, gibbosus demum factus, neque hinc spinam significare posse, quippe quae Graecis potius dicatur, ἀκάνθα, vel ἀκάνθη, quod nec pueris ignotum; d) deinde

d) De hac voce rariore, in HIPPOCRATE tamen ipso, item EVRIPIDE, NVM, observauimus, in Comm. nostr. HERODOTO et aliis obuia, vid. si libet, quae contra CASP. HOFMAN- in HIPPOC. de Anat. p. 26.

de meram hic περισσολογίαν, seu ταυτολογίαν videri, si scripsisse quis crediderit HIPPOCRATEM alias βραχυλόγον, τὸ κύφωμα ἐν ἀκάνθῳ, seu ἀκάνθῃ, gibbum nempe in spina dorsi, quasi vero gibbositas etiam aliarum partium esset, fortasse femoris, in genu, aut alibi: secundo, pergit, inauditum plane atque incompertum hucusque esse, immo rectius prodigium quasi videri, quod hic quidem gibbus in spina dorsi subnatus narretur ex phrenitide, siue, vt notum, vehementissima corticis cerebri eiusque praesertim membranarum, inflammatione, cum febris acutissima perpetua, et delirio continuo ferocissimo, coniuncta: quum e contrario, rationi magis et experientiae frequentius longe respondeat, ex phrenitide oriri potius posse surditatem; quam quidem gibberosam spinae dorsi extantiam: Et haec ita haec tenus.

Quibus ergo rationibus validissimis, vt ipsi quidem tum videbantur, vix hodie nobis videbuntur, inductus et impulsus, locum illum hucusque enarratum, ita demum constituendum ac restituendum praecipit summus ille et acutissimus saeculi sui ARISTARCHVS: *Vetus, ita enim inquit, et genuina HIPPOCRATIS scriptura est: τῷ μαγείῳ ἐν Ἀκάνθῳ, τὸ κύφωμα ἐκ φρενίτιδος ἐγένετο, h. e. Coco in Acantho, e phrenitide surditas obtigit: Nempe, vti iam monui, pro ἀκάνθῳ, seu ἀκάνθα, legit Ἀκάνθῳ, et deinde, pro κύφωμα, quod est, gibbus, κύφωμα, hoc est surditas, vt quidem tum credebat REINESIVS.*

Quae cum ingeniosissima et dextro plane Apolline, ac fauentibus Musis, sic excogitata viderentur, ab vniuerso fere senatus eruditi confessu, protinus in resonabiles plausus et votiuas gratulationes confurrectum fuit, adeo, vt nemo paene repertus fuerit, quin Venerem hanc Reinesianam recens quasi Anadyomenen, ex gibbosa quamuis, surdam factam, efflictim deperiret, et ardentissime amplexaretur. Inde profecto nec mirum est, postremum operum Hippocraticorum editorem Viennensem ingeniosam hanc REINESII coniecturam, ceu veram et omni exceptione maiorem, confidenter recepisse, et celeberrimum quondam PLATNERVM, longiore profecto vita dignissimum, ipsum sequu-

sequutum, ita olim scripsisse: e) *Haec emendatio, non tam ingeniosa et probabilis, quam vera est, quum ex phrenitide longe facilius μετάτασις fieri possit ad aures, et praecipue ad fauces, ad quas Eustachii tuba pertinet. Haec quidem ille vir laudatissimus. Utinam vero et ego in horum gratulantium et applaudentium sententiam et consensum descendere, et hanc ipsam quoque coniecturam Reinesianam, quam acutissimam esse non nego, pro vera pariter atque indubitata habere possem! quum reuerentia tam illustris per orbem nominis, merito ductus, non nisi aegerrime a tanti viri iudicio et effato discedam, mihi que alioqui semper gloriosum in hunc usque diem, duxerim, splendida ipsius vestigia, quamuis, pro exiguo ingenii modulo, e longinquo tantum, et passibus haud aequis, non tamen plane segniter, persequi.*

Sed quum merito potior esse debeat ratio veritatis, quam auctoritatis, mentique meae atque oculis illud potissimum graue ac saluberrimum SENECAE monitum obuerfetur: *Qui ante nos ista mouerunt, non domini nostri, sed duces, sunt: patet omnibus veritas, nondum est occupata: multum ex illa etiam futuris relictum est: ideo non possum non a venerandi illius viri summa alias auctoritate hic quidem maximam partem, dissensione mea discrepare atque in alia omnia potius discedere: Maximam inquam partem, non autem omnem. Namque, ut mihi certe perquam probabile videtur, in eo verum et rectum perspexit REINESIVS, quando vocem istam Ἀκαιοῦν, pro loco, vrbe, aut regione, fumeret,*

I i 2

fumeret,

e) In exercitatione academica, de iis, qui ex Tuberculis, gibberosi fiunt, annexa dissertationi ipsius, de negotiosa actione, propter valetudinem, circumcidenda, Lipsiae 1744. Quare profecto non erat necesse, quod in *Act. Erudit.* de Ann. 1745. *Mens. Ian. pag. 7.* vbi noua haec HIPPOC. Editio, exterius quidem satis splendida, utinam vero etiam interius satis docta et elaborata, nimis benigne recensetur, haec ipsa Coniectura Reinesiana, ab Editore nimium festinanter recepta et approbata, ita imperiose commendaretur: *Qua interpretatione, dicite omnes, quid rectius esse*

possit? Immo, dicite omnes, inquam ego, quid falsius et infelicius esse possit? uti scilicet hic mox in sequentibus, manifestissime et solidissime, spero, probabitur. Igitur vel hoc nouo exemplo insigni admoniti, sedulo sibi caueant in posterum Veterum Auctorum editores, ne nimis calide et properanter statim approbent, aut in contextum adeo ipsum inconsiderate recipiant magnorum Criticorum ingeniosas coniecturas, fallaces saepius, quam veraces, et, ut poeta ait, introrsum turpes, speciosas pelle decora.

sumeret, et non per *spinam*, interpretaretur, vt omnes ante ipsum, fecerant interpretes, inter horridas quasi spinas, incedentes et hinc inde lapsantes. Per omnes enim hos, de morbis vulgiuagis, libros, semper et vbique fere, HIPPOCRATI nostro in more positum est, vt aegrotorum a se tractatorum nominibus patriam quoque, aut oppidum, ac regionem plerumque adiungat, memoriae scilicet iuuandae causa, vbi tum commorabantur, quum morbis corriperebantur. Sic, vt aliquot tantum exempla istud comprobatura, ex innumeris, in medium hic adferamus, mox in hoc ipso libro v. legitur: ὁ Αἰνιάτης ἐν Δήλῳ, et in antecedentibus, Ἐκάσων ἐν Ὀμίλῳ, Κυρήνιος ἐν Ὀμίλῳ, item Ἀμφίπολος ἐν Λαρίσση, et Σκάμανδρος ἐν Λαρίσση. Sic et *Lib. i.* Κρίτων ἐν Θάσῳ, vbi et plura; item *Lib. iii.* Φιλίτης ἐν Θάσῳ, Πυθίων ἐν Θάσῳ, porro Περικλῆς ἐν Ἀβδήροις, Ἀνάξιων ἐν Ἀβδήροις, ita et *Lib. iv.* ἡ Νικοστράτης ἐν Κράνῳ, et *Libro denique vii.* ὁ Μητρίδωρος παῖς ἐν Καρδίῃ, τὸ Πυθῶνος παιδίον ἐν Πέλλῃ: sed satis! Talia enim vbique per omnes istos, de morbis regionatim grassantibus, Libros, tanta quidem copia, occurrunt, ὅσα ψάματος τε κόνης τε, vt nemini non vel obiter eos percurrenti protinus e singulis fere paginis, vberime constabit. Sed vid. huc maxime GALEN. *Comment. i. in Lib. iii. Epidem.* HIPPOCR. pag. 200. seqq. et *Comment. iii. in Lib. vi. Epidem.* pag. 439. *Tom. ix. Opp. per CHARTER.* vbi plura, quae huc pertinent. Sic ergo et in hoc nostro praesenti loco, τῷ μαγείρῳ ἐν Ἀκάνθῳ, *Coco in Acantho*, seu *Coco Acanthio*, legendum cum REINESIO esse, nulum ferme relinquitur dubium; inprimis, quum variae Cariae, Macedoniae, Epiri, Aegypti, Thraciae et aliarum regionum, vrbes, oppida, immo et insulae et montes adeo ipsi *Acanthi* nomine insignirentur, ceu liquidissime patet e STRABONE, HERODOTO, THUCYDIDE, MARCIANO HERACLEOTA, STÉPHANO BYZANTINO, LIVIO, PLINIO, MELA, et aliis veterum monumentis, vt iam recentiorum Geographorum, veluti ORTELII, CLYVERII et praesertim magni CELLARII, aliorumque labores egregios hanc in rem, taceam, quum ista iamiam laudata affatim sufficiant. Conf. tamen, si placet, SALMASIVS in *Exercitat.* PLIN. p. 376. item IAC. GRO-

NOV. ad MELAE *Lib. II. Cap. II. pag. 147. seq.* ibique inprimis IS. VOSSIVS, p. 445. et in *Append. ad MELAM*, contra GRONOV. *pag. 40.* et iterum ad MELAE *Lib. I. Cap. XVI. pag. 393.* aurei istius commentarii; denique BERKEL. ad STEPHAN. BYZ. *pag. 72.* Ne plures iam aduocemus.

Quando vero istis statim subiungit REINESIVS, non posse ἄκαν-
θον spinam significare, nec ἄκανθάν, seu ἀκάνθην ideo in hoc loco
legi; f) quoniam tum, vt porro ratiocinatur vir magnus, mera foret
ταυτολογία, seu περισσολογία, si diceretur, τὸ κύφωμα ἐν ἀκάνθῃ
Gibber in spina: quum in nulla alia corporis parte, eiusmodi deformes
gibberosii tumores exfurgere solerent, quam quidem in dorsi spina:
in eo profecto rem ioco magis. Quam serio, mihi tractasse videtur, vt
tantum, eo ipso obstatu, vulgarem ac receptam HIPPOCRATIS
lectionem iudicium magis atque absouam redderet; suam contra no-
vam coniecturam tanto magis probabilem ac verisimilem: ipsamque
sic opere quasi albario, nitidius incrustaret, quum ipsi viro non criti-
carum solum; sed et medicarum inprimis, et chirurgicarum rerum
longe peritissimo, abunde constaret, non in spina solum; licet ibi cre-
berrime, sed et in aliis corporis partibus, v. g. ceruice, scapulis, pe-
ctore, siue thorace, lumbis s. coxis, aliisque nonnullis, eiusmodi gib-
berosas prominentias enasci frequentius solere: id quod post ipsum
nostrum HIPPOCRATEM, *Lib. de Articul. pag. 796. seqq.* et doctis-
simum ipsius interpretem, IAC. HOLLERIVM, *Comment. in Aph. XKVI.*
Sect. VI. pag. 377. seqq. pluribus doctissime solidissimeque ostendit vir
in ea salutari arte, quae manu medetur, primam palmam suo merito,
dudum adeptus, MARCVS AVRELIVS SEVERINVS, *Libro VI. de*
recondita abscessuum natura, Cap. II. pag. 382. seqq. et alibi per to-

lii 3

tum

f) Vt quibusdam quidem haud inepte
visum, praesertim, quum eae ipsae vrbes
Ἀκανθοὶ dictae, nomen suum sortitae sint,
ἀπὸ τῆς ἀκάνθης, monente STEPHANO
BYZ. et praeterea arbor quaedam spino-
sa vocetur Ἀκανθος, ἀπὸ τῶν ἀκανθῶν; de

qua vid. THEOPHRAST. *Histor. Plant.*
Lib. IV. Cap. III. et ibi IO. BOD. A
STAPEL, *pag. 307. seqq.* et SALMAS.
Exercit. PLIN. p. 375. seqq. et rursus,
de Homonym. Hyl. Iatr. Cap. II.

tum istum tractatum, ob summam sui praestantiam, auro contra charum et hinc merito inaeestimabilem: ne illa iam, praeter necessitatem, hic addam, quae magna illa in chirurgicis nomina, PARAEVS, FABRICIVS HILDANVS, HIERONYMVVS AB AQVAPENDENTE, SCVLTVS, PLATNERVS, HEISTERVS ipse, alique, de eadem re pridem tradiderunt. g)

Sed accedo nunc deinum, ad alteram illam capitalem emendationem Reinesianam, in qua sibi praesertim adeo vsque placuit Vir maximus, vt illam bis repeteret, et ipse, ceu verissimam et nulli plane contradictioni opportunam, magna sui fiducia, aliis commendaret, qua scilicet inductus, legendum olim suspicabatur, κώφωμα, loco vulgati κέφωμα, *surditatem* sic nobis pro *gibbo*, perquam exiguo sane lucro, imo si iocari quidem liceat, maiore damno, oblaturus.

Hic vero, quod ad me quidem attinet, furdo plane narratur fabula, neque hinc promte audio dictatoria Viri summi imperia, quibus alias ob singularem aequitatem, prudentiam, veritatem et ingenii divini praestantiam, parere omnino fas est, si non in omnibus, tamen in plerisque, felicissime nempe et sapientissime excogitatis.

Tantum enim abest, vt hanc eius nouam Emendationem aut ipsi huic praesenti HIPPOCRATIS loco conuenire censeam, aut magno suo auctori ac repertori decus et gloriam conciliare posse concedam; vt eam adeo ne graecam quidem esse, potius pronunciem. Neque enim apud ipsum nostrum HIPPOCRATEM, neque apud vllum alium melioris aeui ac notae auctorem graecum, quantum equidem sciam, vox ista κώφωμα vsquam occurrit; sed eius potius loco, κώφωσις, siue κωφότης, vbique legitur, vt graece doctis quidem notissimum. Ita binae hae voces supra, apud auctorem nostrum, *Lib. III. de Morb. Epidem. pag. 734. et 735.* alternatim ponuntur, item et alibi saepissime, vt v. g. *Libb. praenot. praedictor. et coacarum praenotionum*, vt taceam omnes hos septem, de morbis vulgiuagis, Libros, in quibus nempe vbique

g) Conf. si placet, variorum de *diuersa gibbositate*, obseruationes diligenter collectas, a THEOPHILO BONETO,

Sepulchret. Tom. I. Lib. I. Sect. XII. pag. 902. seqq.

vbique extat κώφωσις, vel κωφότης; nunquam autem κώφωμα. Semel quidem istud legitur infra, in loco huic nostro parallelo, *Lib. VII. de Morb. Epid. p. 860. Edit. Lind.* sed lectores hic admonendi sunt, non tam ibi HIPPOCRATIS scripturam conspici, quam potius LINDANI, siue rectius REINESII, a LINDANO repraesentatam, et audacter nimis ipsi contextui Hippocratio intrusam, non indicata tamen, malo sane exemplo, lectoribus ipsius huius nouae lectionis diuersitate, ut nimirum recepto magis, quam laudabili, more, saepissime solet diuersas variorum doctorum virorum emendationes et coniecturas in ipsum HIPPOCRATIS opus passim temere recipere, non praemonitis tamen, ut decebat quidem, ea de re, lectoribus, nec immutata, uti par erat, ipsa versione latina; quod multis hic exemplis ostendi posset, si nunc id quidem, et non aliud, ageretur. In omnibus enim codicibus HIPPOCRATIS MSCtis Parisinis, diligentissime olim a nobis inspectis ac cum impressis iam Libris, collatis, et in omnibus pariter editionibus hucusque quidem vulgatis, eo in loco, non κώφωμα legitur; sed potius κύφωμα: adeo, ut hinc, quod dixi, indubitatum prorsus sit, nusquam in HIPPOCRATE, aut alibi, τὸ κώφωμα, occurrere; sed semper potius κωφότητα, aut κώφωσις: Quam ipsam quoque vocem, ut id obiter hic interferam, quondam, in *Epist. Med. Crit. ad celeb. IO. FREIND, pag. 44.* reddendam censui ipsi nostro HIPPOCRATI, *Lib. III. de Morb. Epid. pag. 724.* vbi vulgo legitur: λήθη, καὶ ἀφροίσις, καὶ ἀφωίνη pro quibus nempe scribere mallet, sensu ipso exigente, λήθη, κώφωσις, καὶ ἀφωίνη, quoniam haec mox in hoc ipso libro, et aliis passim locis, ita melius et concinnius coniunguntur. Sed de his haecenus.

Primus ergo, ut pergam, THOMAS noster REINESIUS controuersam hanc vocem κώφωμα, maiore potius ausu, quam feliciore, non solum ipsi HIPPOCRATI obtrusit; sed etiam, quod tanto magis mirandum, vniuersae Graeciae, sine gentium tamen consentientium suffragio, intulit.

Neque tamen id ipsum ignorauit, aut ignorare potuit, pro vasta nempe sua graecarum literarum peritia, in qua, sua quidem tempe-
state,

state, paucissimos sibi habuit pares, neminem vero quantum equidem sciam, superiorem: quin potius ingenue ipse fassus est, sibi quidem nec apud HIPPOCRATEM, nec alibi, lectam aut repertam hucusque fuisse vocem istam κώφωμα, interea tamen secundum sic dictam analogiam graecam, illam sic formari posse, et HIPPOCRATI ipsi, sine vlllo dubio, aut vlla cunctatione, inferri ac restitui debere.

Sic itaque mira ingeniosae suae coniecturae dulcedine illectus, suaeque auctoritatis, eximiis in rem literariam vniuersam meritis, dudum adeptae, nimium certus ac securus, maluit noua, quamuis peiora, introducere, quam vetera, etsi meliora, sua sede suoque loco intacta, relinquere, nobisque licet inuitis, seuerè iniunxit, vt sic quasi pro bonis nummis priscis, nouos adulterinos, magna pretii iactura, acciperemus.

Putat nimirum Vir maximus, sicut vulgo, a σκολιός, formari soleat σκολιότης, σκολίωσις et σκολίωμα, ab ὑβός, ὑβωσις et ὑβωμα, ⁿ⁾ itidem a κυφός, κυφότης, κύφωσις et κύφωμα, atque ita porro, in aliis multis: Sic pariter, secundum illas analogiae regulas notissimas, a κωφός, etiam praeter vsitata ista, κωφότης et κώφωσις, deduci aequè commode posse ipsum κώφωμα. At enim vero Viro illi graece longe doctissimo ignotum esse nequaquam poterat, id quod nulli eorum incognitum est, qui graece bene possunt, in formandis ac flectendis vocibus, earumque deriuationibus, ac quasi generationibus, per seriem et stirpes, ordine longo, propagandis et continuandis, ad analogiam grammaticam respiciendum esse haud solam, saepius vtpote fallacissimam;

h) A quo, vt id obiter hic inferam, tanquam ab hoc loco non plane alienum, ibidem, Latinorum quoque *Tuber*, dedit, quod tamen forsitan rectius deriuari possit ab Hebr. טבור, *Tabbur*, locus editus: Sicut et ipsa vox *Gibbus*, descendit etiam haud dubie, ab Hebr. גבה, *Gabha*, elatum esse, vnde גבן, *Gibben*, gibbosus, item גבעה, *Gibbea*, collis, et inde Syrorum גבעתא, *Gibbartha*, colliculus, de quo vid. BOCHART, in *Chan.* II. 13. p. 747. et

nos ad HVG. GROTII *Christ. Pat. Trag.* pag. 420. ipsum denique Graecorum κύπτειν, κυφός et κύφωμα, vt et nostrum forsitan vernaculum, *Bücken*, et *Buckel*, natum fuisse videtur, ab Hebr. כפף, *Caphaph*, seu כפף, *Acapb*, incuruauit, vnde et fortasse ipsum Latinorum *cauus*, deriuandum. Sed haec ornatus potius, quam necessitatis, gratia, lectorum aequiorum pace, dicta et interiecta hic sunt!

nam; nisi optimae notae probaeque monetae auctorum veterum vsus ipse iisdem praecipuam auctoritatem et stabile fulcrum conciliauerit, ex quorum liquidis exemplis opportune in probationem allatis, vnice merito cenferi et diiudicari debet ingenua vocum deriuatarum ac deductarum nobilitas et intemerata profapia; non vero ex sola tantum vili ac mendaci analogia Grammaticorum: vt iam alibi monui, et pluribus exemplis probaui, *Libro IV. Obseruat. Criticar. Cap. xviii. p. 418. seqq.* id quod dudum ante nos, data opera, luculentius demonstrarunt viri insignes, VOSSIVS, MARTINIVS, COLDINGVS, PASSE RATIVS, vtrique SCALIGERI, BECMANNVS et alii plures etymologici Scriptores.

Licet igitur, vt ex innumeris fere exemplis, vbique in Lexicis obviis, aliquot saltim insigniora hic producam, Graeci Veteres sic recte et vsitate formare et flectere consueuerint, a κενός, κενότης, κένωσις et κένωμα, a τερεός, τερεότης, τερεώσις, τερεώμα, ab ὁμοίος, ὁμοιότης, ὁμοίωσις, ὁμοίωμα, ab ὀρθός, ὀρθότης, ὀρθωσις, ὀρθωμα, a τρογγύλος, τρογγυλότης, τρογγυλώσις, τρογγυλώμα, a ταπεινός, ταπεινότης, ταπεινώσις, ταπεινώμα, a χωλός, χωλότης, χώλωσις, χωλίωμα, ab ὠχρός, ὠχεότης, ὠχεΐασις, ὠχεωμα, a δεξιός, δεξιότης, δεξιώσις, δεξιώμα, a φιλος, φιλότης, φίλωσις, φίλωμα, a λευκός, λευκότης, λευκώσις, λευκωμα, a σιμός, σιμότης, σίμωμα, a πυκνός, πυκνότης, πύκνωσις, πύκνωμα, a σεμνός, σεμνότης, σέμνωμα, et, vt tandem desinam, a κυρτός, κυρτότης, κύρτωσις et κύρτωμα.

Attamen, ipsa quamuis analogia vel maxime suadente et inuitante, non ad eandem pariter normam, exemplum aut ductum, formant ac deducunt a μαδαρός, μαδάρωμα, a μακρός, μάκρωμα, ab ὀλίγος, ὀλίγωμα, a φαῦλος, φάυλωμα, a σκαίος, σκαίωμα, a νεκρός, νέκρωμα, ab ἄκρος, ἄκρωμα, a γρυπός, γρύπωμα, a ψυχρός, ψύχωμα, a χλωρός, χλώρωμα, a ξηρός, ξήρωμα, a παλαιός, παλαίωμα, ab ἀπαλός, ἀπάλωμα, a τρεβλός, τρεβλωμα, a κακός, κάκωμα, a κέφος, κέφωμα, a σομφός, σόμφωμα, a φαιδρός, φαίδρωμα, a μωρός, μώρωμα, a πικρός, πίκρωμα, a μικρός, μίκρωμα, a θερμός, θερμωμα, et, denique, vt finem tandem faciam his minutiis grammaticis, a τυφλός, τύφλωμα:

Sed potius hae omnes et sexcentae aliae huiusmodi voces formant tantum ac terminant sua deriuata in *ότης*, et *ωσις*, nunquam vero in *ωμα*: atque sic simillimum plane in modum, a *κωφός*, semper descendit tantum *κωφότης*, et *κώφωσις*, nunquam autem, quantum equidem memini, *κώφωμα*, vt maximus tamen contra omnium veterum auctorum fidem et vsum, voluit et imperauit REINESIVS.

Minime quidem me fugit, haec ipsa etymologica, aut si quis malit, analogica haecenus aliquanto diligentius pertractata, ad infima potius pertinere Grammaticorum subsellia; quam quidem ad altiores Medicorum cathedras: interea tamen, licet primam frontem, satis vilia et abiecta visa, huc necessario erant in subsidium aduocanda et adhibenda, ad subuertendum scilicet atque penitus disiiciendum ipsius emendationis Reinesianae fundamentum, cui potissimum confidenter innitebatur Vir ille incomparabilis, vt supra vidimus. Quodsi enim vox ista *κώφωμα* nulla fuerit, nec Graeciae veteri cognita; sed recens potius reperta, et ad analogiae tantum ambiguae normam, sine solida auctoritate, efficta ac formata, vti haecenus latius ostendimus, ac validius, opinor, probauimus: sua profecto sponte, tunc necessario consequitur, istam nec in HIPPOCRATE, auctore vetustissimo et gravissimo, emendando, locum vllum habere posse; nec ipsum HIPPOCRATEM hoc quidem in loco, quem hic examini subiecimus accuratiori, vlllo foedo mendo, vt quidem frustra videbatur olim REINESIO, esse inquinatum. Quod adhuc luculentius apparebit, vbi paulo inferius ventum fuerit ad ipsam medendi rationem singularem, hic ab HIPPOCRATE nostro traditam. Vix enim mente solerti et ab experientia medica satis instructa, concipi potest, quomodo surditas illa coci phrenitici, (ponamus enim tantisper, verum ac probum esse istud *κώφωμα* Reinesianum,) per esum panis, vsum vini nigri, item per lenes frictiones ac blanda denique fomenta, commode persanari ac penitus expugnari potuerit.

Etsi autem pristinam suam lectionem HIPPOCRATI sic pro virili, nisi fallor, vindicauimus, eamque ab illustri quidem REINESIO immerito eiectam, postliminio quasi, in priorem suam sedem reduximus:

ideo

ideo tamen minime arbitramur, ipsum hunc HIPPOCRATIS locum generatim, ex omni parte, sanum atque integrum esse: quin potius e contrario, admodum persuasi sumus, graue adhuc mendum in ipso alicubi delitescere, cuius abscondita hucusque cubilia nunc indagare conabimur. Summa scilicet illa semper adhuc restat difficultas, superius iam commemorata, quonam nimirum modo, miranda plane atque inaudita hactenus, morbi μετασάσει, seu transitione, ex phrenitico fieri potuerit gibbosus? quod praesertim vehementer hic vrsit ipse REINESIUS, vti supra monitum: Cui proinde haec ipsa morbi historia diro portento propior, non immerito videtur, quam verae narrationi: licet nihil ibi obscuritatis aut difficultatis inuenerit MARC. AVR. SEVERINVS, *Lib. de gibbis, valgis et varis, Cap. II. pag. 383.* et praecipue VALLESIVS, qui nempe in *Comment. in hunc HIPPOCR. locum, pag. 519.* ita aperte scribere nullus dubitauit: *Ex phrenitide gibbositatem superfuisse, non habet magnam admirationem.* Immo profecto habet, inquam ego, pace ipsius, cum REINESIO, praesertim, quum nullum hucusque in medicorum solertiorum commentariis inuenerim exemplum, licet indefessus quaerendo, omnem adhibuerim diligentiam, quod cum hoc quidem Hippocratico, perfecte et omni ex parte, comparari potuerit: quaerant ergo feliciores. Probe equidem ex ipso HIPPOCRATE noui, febres acutissimas cum ferocissimo quoque dilirio coniunctas, salutari natura valentioris beneficio, solutas interdum fuisse subito inguinum ac crurum dolore, item diuturna pedum dolentium molestia, materia nempe ista febrili maligna ad illas extremas corporis partes, saluberrima nimirum crisi, deposita: vti apparet ex binis illis singularibus historiis HEROPHONTIS, *Lib. I. de Morb. Epid. Sect. III. Aeg. III. pag. 675.* et VIRGINIS ABDERITANAE, *Lib. III. de Morb. Epid. Sect. III. Aeg. VII. pag. 735.* conf. Ill. VAN SCHWITEN, *Comment. BOERHAAV. Tom. II. pag. 609.* Verum foedum dorsi gibber ex phrenitide quoque obortum fuisse, nullo plane alio, quam hoc quidem loco vnico, commemoratur. Illud vero, quod modo indicaui, mendum, non tam cum REINESIO, in voce κίφωμα, perquirendum; quam potius mecum, si lubet, in illis praecedentibus

proxime, verbis: ἐκ νεφρίτιδος: Quod si enim hac ipsa, ne vlla quidem litera demta, aut addita, sed leuiter saltim aliqua transposita, mutaueris in ἐκ νεφρίτιδος, tum veram, vt mihi certe videtur, illico habebis HIPPOCRATIS ipsius scripturam, et huic loco accommodatissimam, et ipsi praesertim naturae rei atque frequentiori experientiae conuenientissimam: Longe enim facilius intelligi ac mente solerti concipi potest, quo nempe modo, a malo nephritico, praesertim vero diuturno, et ex fordida humoris vitiosi, lenti ac viscidi colluue, item et materia acri fabulosa, in ipsis renibus sensim collecta, suborto, proxime vicinis musculis psoadicis, i) cum decurrentibus ibidem nervis, ac propinquis spinae ipsius dorsi vertebrae, in mutuum doloris propagati consensum, et communis periculi societatem abreptis et pertractis, gibbosum eiusmodi tuber exfurgere demum possit: quam, qua commoda et expedita ratione, dirae phrenitidi, in loco altiore ac remotiore fae-vienti, vt notum, in subiectam quidem, at longius protentam, dorsi spinam, eiusque inferiores praesertim vertebrae, liberior transitus concedatur, vt scilicet ibi, relicto subito ipso capite, tetrum tumorem gibberosum suscitet: quum omnes potius Medicorum praestantissimi sedulo passim obseruauerint, ex eiusmodi inueterata magis, quam acuta, Nephritide, k) ipsius dorsi arcuatam quasi curuationem, rigidum crurum stuporem, item et contractionem, testiculorum reuulsionem, aliaque innumera fere infimi ventris mala subinde coorta fuisse: vti ingenuae testantur, ipse noster HIPPOCRATES, *Lib. VI. de Morbis Epidem.* mox ab initio, pag. 796. ibidemque GALENVS, in *Comment.* pag. 369. *Tom. IX. Opp.* et ex eo VALLESIVS, p. 576. item AEGINETA, *Lib. III. Cap. XLIV.* p. 45. ARETAEVS, TRALLIANVS et alii. E recentioribus autem doctissimus LANGIVS, *Epist. Med. XLV. Lib.*

i) Item et ἑσχιαίσις, siue ἑσχιταίς, hoc est spinatis, seu spinalibus, sicuti vulgo dicuntur, vt eos generatim ita vocat GALENVS *Comment. in Aphorif. XXXVI. Sect. VII. pag. 311. Tom. IX. Opp.* et alibi.

k) Vtraque enim dicitur, vt notum ex GALENO et aliis, immo ipso HIPPOCRATE, conf. HOLLER. in *Aphor. VI. Sect. VI. pag. 331.* SEPTAL. in *Lib. de Aër. Aq. et Loc. p. 281.* VIDIVM, FOREST. *Obseru. Med. I. Lib. XXIV. p. 5. in schol.* et alios.

Lib. I. pag. 203. LAZAR. RIVERIUS, *Prax. Med. Lib. XIV. Cap. I. p. 414. et Cap. III. p. 424. Opp.* PETR. FORESTVS, *Obs. Med. I. Lib. XXIV.* ROLFING. *Med. Consult. Lib. IX. Consult. I. p. 804. et Conf. II. p. 820.* LOMMIUS, *Medicinal. Observat. Lib. II. pag. 206.* SCHENCKIUS, *Observat. Med. CCX. Lib. III. Tom. I. p. 889.* WELSHIUS, *Curat. et Consil. Med. Decad. VII. Curat. VI. p. 424.* IO. WALLAEVS, in *Medicina pract. opere eximio, sed rarissimo; Cap. XIX. p. 197. Opp.* CAROLVS PISO, in opere incomparabili, *de Morbis ex serosa colluvie ortis, Sect. IV. Cap. II. p. 366. seqq.* PETR. PETITVS, in *Comment. in Aret. p. 196. seq.* FRIDER. HOFMANNVS noster, in *Med. systemat. Tom. IV. Part. I. Sect. II. Cap. VIII. p. 471. et 476.* WEDELIVS, *de singulari Nephritici cuiusdam Historia*, ipse denique BOERHAAVIUS, qui instar omnium, in *Aphorif. 993. et ibidem* Vir maximus et perillustis, VAN SWIETEN, in *Commentar. Tom. III. p. 223.* nouissime ingenti Medicorum iuxta et aegrotorum, commo-
do, edito, quem benignissimae ipsius munificentiae gratissimus debeo, ne alios plures, iam praeter necessitatem, in testimonium huc aduo-
cemus, vt FERNELIVM; SENNERTVM nostratem, ET TMÜLLERVM, WILLISIVM, BONETVM, SYLVIVM, HELMONTIVM, TACHENIVM, reliquosque fere innumeros, qui idem de crurum potissimum stupore et contractione, item et ex parte, de ipsius dorsi incuruatione, constanti experientia, obseruarunt, quoniam haec ne-
mini non, ex Medicis quidem doctioribus, mea certe opinione, aut sunt, aut esse debent, notissima. Inprimis, quum paullo inferius, suo loco, ceu testes grauissimos et maxima auctoritate fideque conspicuos, rursus producturi simus ipsum nostrum HIPPOCRATEM, vt et CAELIVM AVRELIANVM, qui apertissime et planissime pronuntiabunt, diuturniorem ac pertinaciorem Nephritin saepius desuisse in eiusmodi deformia *κυφώματα τῆς ἀκάνθης*, siue gibberosa dorsi distorti cur-
vamina.

Ceterum, vt ad locum nostrum Hippocraticum, haecenus pauli-
per derelictum, iam regrediamur, nemo non confestim videbit, faci-
lem admodum pronumque esse omnino lapsum, propter arctiorem

scilicet soni, literarum et scripturae affinitatem ac viciniam, inter νεφρι-
τιν, et φρενιτιν, et inter νεφριτικὸν, et φρενιτικὸν, item φρενῶν et νεφρῶν.
Quare et factum, vt in veterum Medicorum graecorum libris manu
exaratis, et imperitis praesertim rerum medicarum scribis, hae ipsae
binae voces sibi adeo vicinae ac congeneres, vbique fere inter sese fa-
cile permutarentur, ac perperam confunderentur. Sicuti nosmet ipsi
saepissime olim liquidoprehendimus, quum ante hos viginti quasi
annos, quod adhuc profecto meminisse suauissimum est, in splendi-
dissima et locupletissima bibliotheca vere regia parisiensi, HIPPOCRATIS,
GALENI, AEGINETAE aliaque priscorum Medicorum graecorum
monumenta veneranda, vna cum Glossariis nonnullis Medicis,
nondum in lucem editis, haud indiligenter versaremus. Sic, vt pau-
ca tantum, in huius rei probationem, producam iam ex ipso HIPPOCRATE
nostro, exempla, *Lib. de iudicat. p. 442.* in quibusdam Codicibus
legitur: τὰ κάτω τῶν φρενῶν χάγια, in aliis vero, τῶν νεφρῶν,
quod equidem melius putem. Porro ibidem, *p. 445.* mox occurrit:
τοῖς μελαγχολικοῖς μετὰ νεφριτικῶν ἐχομένοις, κ. λ. ¹⁾ quod ipsum pari
errore, recurrit *Aph. xi. Sect. vi.* τοῖσι μελαγχολικοῖσι καὶ τοῖσι νεφρι-
τικοῖσι ἀμορροῖδες ἐπιγενόμεναι, quum tamen vtroque, sensu ipso sic
valide imperante, ex melioribus membranis, a nobis sedulo collatis,
legendum sit potius, τῶν φρενιτικῶν, seu φρενιτίδων, et τοῖσι φρενιτικοῖ-
σι, in altero aphorismi loco, quod et dudum ex aliis Codicibus, pa-
riter acute obseruauit Vir vastae prorsus et inexhaustae eruditionis,
GEORG. HIERONYMVS WELSCHIVS, *Curat. et Consil. Med. x. Decad. x. p. 672.* item magnus BALLONIVS, *Lib. de Virgin. et Mu-
lier. Morb. pag. 91. Tom. iv. Opp. Edit. Venet.* In Cod. quoque MEAD-
ceu varia Lectio, in margine, adscriptum est φρενιτικοῖσι: Conf. et
FOES. in Not. ad eundem *Aphorism. pag. 1267.* vt alios iam taceam
interpretes, licet, quod valde mirum, ipse GALENVS vulgatam il-
lam

1) In LINDANI nempe Editione: Sed
apud MERCVRIALEM, FOESIVM,
item ALDVM, et FROBENIVM, le-
gitur longe rectius, φρενιτίδων: quod cur
sic in peius mutauerit LINDENIVS,

prorsus sane me fugit ratio, et forte ipse
nullam habuerit. Ceterum ista diuersi-
tas nostram coniecturam tanto magis con-
firmat.

lam lectionem vitiosam retinuerit. Nullus enim plane in binis istis locis, modo laudatis, potest esse locus τῷ νεφριτικῷ, quoniam nempe proxime praecessit; ceu synonymum, τὸ μελαγχολικόν; sed necessario potius, dictis ex rationibus, substituendum est, vt monui, τὸ φρενιτικόν: inde et CELSVS ipse optime vertit *insaniam*; quia et ille recte in suis Codicibus legerat φρενιτικόν, non νεφριτικόν. Sed rem ipsam extra omnem controuersiam ipse ponit HIPPOCRATES, praeter istum manifestum locum, e *Lib. de iudicat.* iam laudatum, rursus infra, *Aph. XXI. Sect. VI.* his quidem verbis: τοῖς μαινομένοισιν κισσῶν, ἢ αἰμορροῖδων ἐπιγενομένων, τῆς μανίης λύσις: vbi nempe consueto breuitatis amicae studio, sub generali voce μανίης, et μαινομένοις, complexus est τὸ μελαγχολικόν καὶ φρενιτικόν. Denique, vt vnicum adhuc, sed insignem plane locum, huc adferam, *Lib. de Coac. praenot. p. 574.* in impressis vulgo Codd. legitur: Ποδαγρικὰ, νεφρίτις, κισσὸς περὶ κνήμην. In aliquot contra scriptis, et quidem paullo recentioris aevi, φρενίτις, quod tamen peius est vulgato illo νεφρίτις, quod necessario, sensu sic exigente, huc reducendum: e contrario *Aph. xxx. Sect. III.* λήθαργοι, φρενίτιδες, καύσοι, in vulgatis quidem haecenus editionibus, scriptum deprehenditur, et quidem recte; in nonnullis contra libris scriptis, νεφρίτιδες, sed male; praecedens enim λήθαργοι, et subsequens καύσοι, ipsa necessitate cogente, et rei natura postulante, omnino requirunt illud φρενίτιδες, et respuunt iure, alterum νεφρίτιδες. Sic et, quod maxime huc facit, et nostrae coniecturae grauissimum sane pondus addit, *Lib. II. Epidem. pag. 705.* multi Codd. Veteres habent: ἀπὸ τῆς ἥπατίτιδος διὰ τῶν νεφρῶν, αἱ μέγιστα δύο ἀρτηρίαι, plures vero et meliores, φρενῶν, bene adnotante FOESIO, in *Not. p. 1036.* et *Cod.* quoque MEAD. quod et ipsi in Codd. MSt. parisiis olim obseruauimus. Rectius vero hic φρενῶν, quam νεφρῶν; quare et illud prudenter in contextum receperunt MERCVRIALIS, FOESIUS et LINDANVS; male contra hoc νεφρῶν, retinuerunt ALDVS atque FROBENIVS, item et CHARTERIVS. Exinde igitur nunc luculentissime, opinor, patebit, perpetuam fere in antiquis Libris, esse confusionem, inter φρενῶν, et νεφρῶν et inter νεφριτικὰ, et φρενιτικὰ, vt iam supra

supra opportune a me monitum fuit. Sed sciens prudensque omitto iam plura id genus alia, ne haec critica suo quidem usu et iucunditate apud humaniores lectores haud caritura, fastidio forsan sint imperitis harum incognitarum deliciarum censoribus. ^{m)}

Verifi-

^{m)} Nihil autem frequentius fere in Vett. Libb. MSCtis occurrere huiusmodi quidem litterarum cognatarum permutatione ac transpositione, seu metathesi, omnes ii optime norunt, qui antiquas membranas diligenter tractarunt, et inter hos praecipue, IOS. SCALIGER. ad VARRON. FEST. et MANIL. CASAVBONVS, ad ATHEN. STRAB. et POLYBIUM, SALMASIVS ad SOLIN. et alibi, BOCHARDVS in *Chan. et Hierozoic.* item GRVTERVS, LEOPARDVS, VOSSIVS, PALMERIVS, RVTGERSIS, MVRETIVS, MEVRIVS, LIPSIVS, COTELERIVS, ad *Monument. Vett. Eccles. Graec. Tom. II. et III.* imprimis REINESIVS in *Var. Lect. Epist. ad RUPERT.* et ad Inscriptiones Comment. nec non nostrae quidem aetatis clarissimi Viri, MONTFAUCONIVS, BENTLEIVS, MARKLANDVS, TAYLOR, BOS, WESSELING, ALBERTI, BERNARD, ABRESCH, GRONOVIVS ad HERODOT. et ARRIAN. REISKE, BYNKERSHOEK. in *Observatt. Iuris Rom.* SCHRADER. ad MVSÆVM, VALKENAER. ad AMMON. alique plures in elegantissimo praesertim Miscellan. Observat. Criticar. opere. Data vero opera id argumentum strenue persequuti sunt ROBERTELLVS et SCIOPPIVS, in *Libb. de Arte crit.* GVIL. CANTERVVS, in *Syntagmate de ratione emendandi vet. auct. Graec. Cap. V.* item BONGARSIVS, in Not. ad IVSTIN. *Lib. XXI. Cap. I.* et IO. FRID. GRONOVIVS, *Obs. var. Lib. I. Cap. II.*

et alibi, vel maxime vero IO. CLERICVS, in praestantissimo opere, de *Art. Crit. Part. III. Sect. I. Cap. IV.* per totum. Sic saepius olim nosmetipsi in Codd. MSCtis Graecis, per consuetam istam et ubiuis fere obuiam litterarum affinium metathesin, confusa, et inter sese permutata,prehendimus: νομή et μονή, νόμος et μόνος, κῶμος et μῶμος, θέλω et ἔλω, τόνος et γότος, χυτὸν et τυχόν, Θεός et ἔθος, μοτός et τόμος, Θέω et ἔθω, ὑφή et φυή, φλύαξ et φύλαξ, φερνάς et φρένας, θυμός et μυθος, φίλη et φλή, νήφω et φωνή, νεφρόν et φέρον, πυρός et ῥύπος, ῥύμα et μύρα, κότος et τόκος, ἐυνή et νένη, κάρος et ῥάκος, φορητὰ et ῥοφητὰ, ἀνορεξίαν et ὀρεῖν ἀξίαν, in loco illo SIMPLICII illustri, a SALMASIO sic felicissime emendato, item ἀγρῶ et γάρω, apud THEOPHRAST. *Charact. eth. Cap. XIV.* ut nos ibi legimus, pro ἀγρῶ, item μένον, pro νέμον, apud MAX. TYR. *Diff. xxxvii.* ex nostra emendatione, sic et πορτο συρμός, et ῥυσμός, φαρκίς, et κάρφος, πόκος et κόπος, γόμος et μόνος, χέω et ἔχω, ἡσυχος et συχνός, apud HIPPOCR. κάρσις et κράσις, κάρμα et κράμα, λάπτω et πλάττω, συλᾶν et λυσσᾶν, γάμος et μάγος, apud MENANDR. γαληνός et λάγηνος, λωφᾶν et φωλεῖν, κύσος et σύκος, σιμός et μῖσος, δορόν et ῥόδον, δόρπη et πορδή, τέρπω et τρέπω, ῥαθυμῆσαι et ἀριθυμῆσαι, item ἡρεμῆσαι, apud Suid. vid. Reines. *Var. Lect. III. p. 470.* ubi errat. ita et φώκη et κωφή, τροχός et χόρτος, βαλεῖν et λαβεῖν, λύπη et πύλη, χλόη et χολή, χολᾶμαι et ὀχλᾶμαι, λόχος, χόλος et ὄχλος, βρέφη et φέρβη, φόρημα, φρόνημα et ῥόφημα, φάρη et ῥαφή, φόρτος et τροφός, νόθος et ὄθος,

Verisimillimum igitur, vt pergam, mihi hinc videtur, pari quoque ratione, ex consueto illo scribarum supinorum errore, et in praesenti HIPPOCRATIS loco, peccatum fuisse, atque sic ex vsitatissima ista, tametsi praua, permutatione ac confusione inter νεφρίτιν, et φρενίτιν, et inter φρενιτικὸν, et νεφριτικὸν, clanculum male irrepsisse in illum, ἐκ φρενίτιδος, quum ipse ante scripsisset sua manu HIPPOCRTES: Ἐκ νεφρίτιδος. Immo, vt plus dicam, contra receptum alias mihi morem, in huiusmodi incertis criticis, certi quid statuendi ac libere pronunciandi, non verisimillimum amplius mihi videtur, sed potius propemodum re ipsa verissimum apparet, ita, et vix aliter, scripsisse quondam HIPPOCRATEM, nempe ἐκ νεφρίτιδος, non autem, ἐκ φρενίτιδος. Sed dabo nunc, hem tempus demum est! et producam hic testem grauiissimum et veracissimum, ipsiusque nostri HIPPOCRATIS optimum, sagacissimum et fidelissimum interpretem, nimirum HIPPOCRATEM ipsum, quo certe melior verborum suorum interpres, fallere quippe nescius, vt MACROBIUS de ipso ait, reperiri haud potest.

Ita autem ille ipse, nunc attendite, quaeso, et arrigite aures, Lectores! in libro suo, haud dubie ab ipso, et non alio, scripto, de articulis, p. 794. T. II. Opp. per LINDEN. verbis quidem clarissimis et ad rem ipsam declarandam, vel maxime aptis, pronunciat: "Οσοισι κατωτέρω τῶν φρενῶν τὸ κύφωμά ἐστι, τέτοιαι νοσήματα μὲν ἐνίοισι προσγίνεται νεφριτικά, καὶ κατὰ τὴν κύψιν; hoc est: *Quibus infra septum transuersum, gibbositas est, ex his, quibusdam morbi renum, ac vesicae accedunt, vel potius, in his praecedunt*: ita malim enim hic vertere verbum προσγίνεται, quare et leuissima quidem mutatione, commode legi hic posset, πρόσθεν γίνεται, vel adhuc facilius, προγίνεται, nisi scirem, τὸ προσγίνεσθαι saepius sensu ac significatu, tantundem valere, ac quidem προγίνεσθαι: id quod plurimis exemplis similibus, copiose et eruditissime,

δος, κρέας et κέρας, ῥόδος et ῥεθός, ῥόδιον et ῥεθιον, πότος et τόπος, φῆκος et κυφός, φυτός et τύφος, μυχός et χυμός, et innumera fere alia, ex quibus iam olim nonnulla

notaui in Observationum Criticarum Libris, et in Specimine Emendationum Hefychianarum, item alibi. Sed haec sufficiant.

fime, pro more suo solito, ostendit Vir celeberrimus, graece doctissimus, nobisque amicissimus, FRID. LVD. ABRESCHIVS, *Lib. I. Animaduers. in AESCHYLI Tragoedias, Cap. x. pag. 62. seqq.* et alibi, in sequentibus, operis istius praestantissimi et optimae frugis plenissimi. Conf. et clar. VALKENAER. *Observ. ad AMMON. Lib. II. Cap. XII. pag. 126.* item PAUL. LEOPARD. *in Emendat. Libb.* et maxime CASAVBON. *ad STRABONIS Lib. XV. p. 1050.* item celeb. WESSELING. *ad DIODOR. SIC. Lib. II. p. 126. Tom. I.* Istum autem potissimum sensum hic reddendum esse huic verbo *προσγίνεσθαι*, ut nempe significet, *praecedere, prius nasci, antea fieri, oriri*, et similia, clarissime quidem ex antecedentibus ipsius HIPPOCRATIS verbis, videtur colligendum: *Σπόνδυλοι δὲ, ita enim inquit, οἱ κατὰ ῥάχιν, ὅσοις μὲν ὑπὸ νοσημάτων ἔλκονται εἰς τὸ κῦρον, τὰ μὲν πλεῖστα ἀδύνατα λύεσθαι.* h. e. *Verticula vero spinae quibuscunque in gibbum trahuntur a morbis, plerique, (illorum scilicet gibborum) ut solvantur, fieri non potest.* Praecedunt ergo, quod liquido ex his patet, saevi ac diuturni morbi, uti verbi causa, Arthritis, Nephritis, dolor ischiadicus, ut et psoadicus, rhachitis, quam ipse mox hic HIPPOCRATES manifeste describit, immo rectius exacte depingit, item febres intermittentes pertinaciores, epilepsia, rheumatismus, scorbutus, spasmus, variae intestinalium viarum querelae, quomodo CAEL. AVRELIANVS loquitur, ut alias id genus diras miserae humanae gentis pestes iam taceam; succedunt autem demum his, tractu temporis, foeda spinae extortae gibbera. Qua de re exempla prostant apud ipsum HIPPOCRATEM, *Lib. de intern. affect. p. 257. et de morbo sacro, p. 332.* item alibi. Vid. et *Aphor. XIV. Sect. VI.* ibique GALEN. *pag. 279. Tom. IX. Opp.* Conf. BONETI *Sepulchret. Tom. I. Lib. II. Sect. XII. p. 912.* Morbi igitur, quod iam dixi, frequentius sunt gibborum causae, quam gibbi, morborum, licet et hoc nonnunquam fieri posse, certiora edocti, haud prae fracte inficiemur: Tum vero, quod et hic docet ipse noster HIPPOCRATES, et rursus infra, in MOCHLICO, *pag. 868.* et alibi, praeeunte ipsa fida experientia, morbi isti gibbis superuenientes plerumque

rumque potius sunt critici ac salutare; ⁿ⁾ quam quidem symptomatici, aut nociui: quum e contrario, gibbi morbis succedentes, sint maximam partem symptomatici, aduentitii, et, vt verbo dicam, malarum caussarum peiores effectus, dum veluti aduena tempestate, in vertebrata spinae ipsius ossa subito irruunt. Inde igitur ipse HIPPOCRATES noster, in hoc, quem pertractamus, loco, rectius scripsit ex nostra quidem emendatione, τὸ κύφωμα ἐκ νεφρίτιδος ἐγένετο, quam si scripsisset, ἡ νεφρίτις ἐκ τοῦ κύφωματος ἐγένετο, quoniam nempe illud ipsi rei naturae et crebrae experientiae conuenientius, quam quidem hoc posterius. Sicque ipse hic locus exactissime respondet alteri illi modo laudato: Ὅσοισι τὸ κύφωμα ἐστὶ, τέτοιαις ἰσθήματα προσγίνεται νεφριτικά; respondet inquam exactissime, non solum secundum nuda verba, habes enim in vtroque τὸ κύφωμα, non vero surdum illud κώφωμα, merito supra eiectionem, habes etiam porro, in vtroque, τὰ νεφριτικά, seu ἐκ νεφρίτιδος, quod idem: sed et, quod tanto magis notandum, secundum ipsam rem, quod nempe diuturnam Nephritidem demum subsequutus sit indecorus spinae gibbus, feliciter tamen paullo post sanatus: Adeo, vt hinc fere inducar, vt credam, HIPPOCRATEM nostrum ad hanc ipsam de coco gibboso, historiam singularem, respexisse, eamque potissimum in animo habuisse, quum alteram istam observationem practicam, vel chirurgicam, de gibbis e renum ac vesicae morbo enatis, in libro de articulis supra laudato, primus concederet, et in serae posteritatis usus profuturos, consignaret. Verum quocunque demum modo, quisquam in vtramque partem, hunc ipsum HIPPOCRATIS de *Artic.* locum explicuerit, acceperitque siue de subnato ex nephritide gibbo, siue contra, de nephritide ex gibbo oborta; adeo, vt dubium inde supersit, fueritne sic nephritis gibberis

LII 2

caussa,

n) Singulare eiusmodi exemplum puel-
lae gibbosae per succedentem febrem acu-
tam, cum diarrhoea sociatam, feliciter sa-
natae et erectae, retulit Cel. CHICOY-
NÆVS in *Memor. Acad. Reg. Scient. Paris.* 1731. p. 724. Sic ipsa igitur fe-
bris, quod maxime mirum videri potest,

saepe praesidio est, vt CELSVS vere et
scite loquitur, *Lib. II. Cap. VIII.* Conf.
SENEC. *Lib. I. de Ira, Cap. XII.* Vid.
PETIT. ad ARETAEVUM, pag. 147.
et Cel. BERNARD. ad PALLAD. de
Febr. pag. 80.

caussa, an vero effectus? illud tamen interea semper certum et indubitatum manet, atque ex hoc quidem loco, manifestissime probatur, congeneres sibi que proxime affines esse morbos, nephritidem atque gibbositatem, ac sese inuicem tristi et molesta successione, saepius excipere: Vnde nunc haec ipsa nostra alterius loci Hippocratici emendatio superius proposita, eo validius robur accipit, ut tanto tibicine fulta, vix concuti, multo minus subuerti, opinor, possit.

Sed iam de his satis, immo plus, credo, satis. Iam vero et alterum hanc in rem, testem, haud minoris fane auctoritatis, producamus, CAELIVM nempe AVRELIANVM, HIPPOCRATI quidem ipsi ex ingenerato rigidae suae sectae odio ac caeco praeiudicio, saepius, praeter rationem, infensum; in hoc tamen capite et argumento, cum ipso placide conspirantem ac consentientem. Ita autem ille, *Lib. de morbis chronicis, V. Cap. III. pag. 568.* de Nephritide: *Tardante passione, sequitur nephriticos corporis tenuitas nimia, adeo, ut quidam uncati permaneant, et semper proni ambulare cogantur, nec unquam se erigere possint.* Vbi, ut id obiter hic moneam, *uncati*, voce perquam eleganti ac signata, qualibus multis in media sua horrida barbarie, iucundissime tamen abundat scriptor hic Africanus, iidem sunt, qui graecis alias vocantur *γρυπόμενοι, κυρτάμενοι, κυφόμενοι, κεκυρτωμένοι*, item et *συγκύπτοντες*, seu *συγκεκυφότες*, sicuti de foedo illo TherSITE, HOMERVS, *Il. II, 217.* *Τὸ δὲ οἱ ὦμω κυρτῶ, ἐπὶ τῇ θοῇ συνοχωκότῃ*, et ut miseranda illa femina, insanabilis et a Medicis deserta, *ἦν συγκύπτουσα, καὶ μὴ δυναμένη ἀνακύψαι εἰς παντελές*, apud *Luc. XIII, 11.* vbi vid. si lubet, quae quondam obseruauimus in curis philologicis sacris Wolfianis, *Tom. I. pag. 677.* o) proni autem iisdem graecis vulgo dicuntur *πρηνείς*, item *καταπρηνείς*, et *ἐπιπρηνείς*, vnde et ipsum latinum *pronus*, descendit, ut vulgo notum. Sed haec obiter, et veluti in transcurso.

Idem

o) Conf. WEDEL. *Exercitat. Med. Philol. II. Decad. VI.* et *Illust. RICH. MEAD*, hoc ipso eheu! tempore, nostrae amicitiae et reuerentiae, maturo licet facto, tamen acerbe ereptus, de *Morb. Bibl. Cap. XII. pag. 93.* et maxime *GVIL.*

ADER, de Morb. Euangel. Part. I. Enarrat. III. p. 18. seqq. et Part. III. Enarrat. V. pag. 330. seqq. item *VOGLER. de Rebus Nat. ac Med. Scripturae S. p. 319. seqq.* et *IOHREN. de Morbis Bibl. N. Test. pag. 9.*

Idem vero de gibberosa dorſi incuruatione iam ſupra obſeruaue-
rat *Cap. i. eiufdem Libri v. de Morb. Chron. pag. 549.* vbi de Iſchiadicis
ac Pſoadicis tractat, quorum pleraque dira ſymptomata, comparatione
inſtituta, talia eſſe ibi oſtendit, qualia ipſorum Nephriticorum, de qui-
bus nobis iam fermo. Sed audiamus nunc ipſum noſtrum auctorem
loquentem, ſiue potius, per rerum medicarum imperitos et elegantio-
rum literarum rudes librarios, raucum quid et inconditum balbutien-
tem. *Aliquibus, ita ille inquit, dolor pſoadicus et iſchiadicus perſeuerat:*
Partes dureſcunt atque conducuntur: His (ita ſcil. ſcribit, pro *Hos*) *deni-*
que uſque ad pene cutem vnicus ſequetur greſſus. Sed quae obſecro,
hic monſtra vocum ac portenta? quis ſanus, quaefo, in illis poſtremis,
ſenſus: *uſque ad pene cutem vnicus ſequetur greſſus?* ego quidem, pro
mea ingenii tenuitate, ne vnicum quidem communis ſenſus ſequi vi-
deo greſſum; ſed potius vbique foediſſimam ſanae rationis claudica-
tionem; nec lucem in his denſiſſimis tenebris liquidam mihi aſſulgere
video ex adiecta a doctis Editoribus, in margine, ſiue varia lectione,
ſiue, vt potius videtur, emendatione, ita quidem concepta: *pene uſ-*
que ad cutem dolorificus ſequitur greſſus: quid enim, iterum anxius quae-
ro, illud *pene uſque ad cutem*, hic ſignificet, et qualis demum conueni-
entia et literarum affinitas, inter vulgatum iſtud *vnicus*, et alterum huic
ſubſtitutum, *dolorificus*? Verbo, ipſiſſae hic ac fordidae ſunt tenebrae
vbique obductae, et omnia merum quaſi rus olent, adeo, vt nihil terſi
ac defaecati ſenſus, omnibus licet neruis fruſtra intentis, inde vlllo mo-
do, prolici et extorqueri poſſit.

Quare, neceſſitate quaſi coactus, nunc ad ipſum ſupremum peri-
tiſſimorum et exercitatiſſimorum criticorum ſenatum libere prouoco,
eosque omnes enixe et instantius rogo atque obteſtor, vt caliginoſam
hanc noctem ſplendido ſui ſagaciſſimi ingenii lumine et acumine, vno
veluti ictu, protinus diſpellant, mihique, ſi placeat, liquide explicare
haud dedignentur, quid demum ſit iſtud latinis et humanis auribus ha-
ctenus quidem inauditum: *uſque ad pene cutem?* et quis ille denique
ſit *vnicus greſſus*, qui ſequatur miſeros pſoadicos ac nephriticōs? In-
terea vero, dum illi praetantiſſimi Viri ea de re comitia agitant, ſtre-

nue inter sese digladiantur, trepidant, aestuant, fatagunt, in diuerfas sententias discedunt, ac rursus amice coeunt, vota et suffragia colligunt, et nihil non moliuntur, vt sanum aliquem sensum ex his absconis plane et horridis verbis exsculpant: ego morae diuturnioris impatiens, haud expectata decretoria ipsorum sententia, ex infimo meo subsellio, siue extrema cauea, illorum quidem pace, legi forsan hic posse, verecunde coniicio, non arroganter praecipio: *His denique usque ad senectutem, vncus sequetur gressus*: Nulla paene literarum priorum immutatione, aut certe perquam exigua, atque propemodum vix obseruabili. Fecimus enim ex monstroso illo *penecutem*, prono literarum ductu, *senectutem*, et ex *unicus*, vnica saltem extrita litera, *vncus*: Sic obsequuti sapientissimo GALENI consilio, *Lib. III. de Respirat. Difficult. Cap. II. pag. 269. Tom. VII. Opp.* Ita vero, vt rem omnem paucis absoluiam, commodissimus et euidentissimus illico emergit sensus, et idem hic rursus dixit CAELIVS noster AVRELIANVS, quod in praecedenti et modo allato loco, iisdem paene verbis, dixerat: adeo, vt *vncus gressus*, hic idem sit, ac ibi istud: *vt vncati permaneant*: *Vncus* enim et *vncatus*, vnum idemque esse, vel ipsis pueris inuestibus ex lexicis, putem, notissimum. Quam ob rem inde vix dubitem, quin benigno suo fauore ac blando assensu dignaturi sint aequi bonique lectores hanc ipsam nostram nouam coniecturam, leuem quidem istam, non tamen omni veri specie, opiner, prorsus destitutam, aut in crasso Boeotorum aëre infeliciter natam.

Nihil autem aliud his ipsis emendatis sic a nobis verbis, significare voluit CAELIVS noster AVRELIANVS, quam vbi inueteratus diutius, ac longius extractus fuerit dirus ille durusque psoadicorum et nephriticorum morbus; tum miserandos illos aegrotos per omnem suam vitam, *usque ad seram senectutem, incuruatum et in terram prouum sequi gressum*, seu ipsos ex faeua morbi pertinacis violentia, coactos tum esse, semper cernuos, incuruatos ac nonnihil gibbosos, incedere: id quod vel ipse noster pariter obseruauit HIPPOCRATES, sed malo mitiore, atque hinc euentu laetiore, ab ipso adnotato. Sic enim ille, *Lib. de Artic. p. 795. Πολλοὶ μέντοι ἤδη καὶ εὐφρόως ἤνεγκαν καὶ ὑγιεινῶς*

ἵως τὴν κύρωσιν, μέχρι γήως : *Multi sane iam facile, ac sano modo, gibbositatem sustinuerunt, usque ad senectutem.* Qualia exempla compura enarrauit quoque M. AVREL. SEVERINVS, *Lib. VI. de Abscess.* cap. 5. pag. 396. seqq. P)

Quum vero ex nostra, immo forsan ex sua quoque ipsa mente, ita, vt diximus, scriberet CAELIVS noster AVRRLIANVS: *His denique, usque ad senectutem, uncus sequetur gressus;* consuetum Graecorum loquendi morem eo ipso, sectatus esse videtur, qui ipsi quoque eundem

p) Inderecte a GAI O, l. 3. ff. de Aedil. Edict. gibberosī et curui haud inter morbosos seruos referuntur, qui iure redhiberi possint, his quidem verbis: *Vel proterui, vel gibberosī, vel curui, vel pruriginosi, vel scabiosi, item muti et surdi.* Sed quid ibi quaeso, *proterui*, inter corporis nempe vitia; quod tamen animi potius leue vitium, vt notum? Ideo GOTHOFRED. legere malebat, *pectorosi*: sed latum et amplum pectus virtutis potius et fortitudinis est signum, quam corporis vitium: Accedit maxime, et ipsa pristinae scripturae vestigia plane neglecta fuisse, in hac ipsa emendatione haud satis felici. Forfan ergo legendum hic potius, si liceat per venerab. ICTOS, *procurui*. h. e. προκύπτοντες, vel προκυφότες, siue obstipo capite proni incedentes; sequitur enim mox *curui*, quod est genus, cuius species est *procurui*, vt notum: posset et *praetortui*, hic legi, pari sensu; sed illud praestat. Forte vero nihil hic mutandum; sed illud *proterui*, retrahendum potius ad proxime antecedentem 2. leg. PAVLLI, *vel melancholici*, addendo nempe post. *vel proterui*, ita, vt hi opponantur quasi illis melancholicis: quos tamen vtrosque ob haec leuia animi vitia redhiberi non posse, ibi clarissime docetur; vt et l. 18. ibidem, vbi iterum *serui proterui*, hoc sensu, mentionem facit ipse GAIVS, supra laudatus. Denique in fine, inserta negatione, le-

gere mallet: *non item muti et surdi.* Propter illa enim immedicabilia corporis vitia, redhibitioni omnino esse locum, quoniam ista vehementer impediunt vsum ministeriumque hominis, in sequentibus passim docetur, et ICTIS est notum. Sic enim mox ibidem l. 9. *Mutum morbosum esse*, SABINVS ait: *Morbum enim esse, sine voce esse, apparet: l. c. item vero de Surdo*, praesertim, a natiuitate, sentiendum. Vnde iam nostrae emendationis ratio tanto certius constat. Sed haec obiter. Nihil vero hic monuit Clar. HEINECCIUS Fil. in *Flor. spars. ad Edict. aedil.* Vtinam autem solus ille felix repletor pandectarum Florentinar. Graece, Literis vncialibus, et sine vllis accentibus, scriptarum, nobis hic placide indicaret, quomodo locus iste controuersus ibi graece legeretur, vt inde lux forte nobis affulgeret. Sed hoc sanctum arcanum nobis eheu! aeternum absconditum manebit. Nemo enim mortalium, praeter ipsum illum fortunatissimum inuentorem, de illis quidem Pandectis graecis, quidquam vnquam sciuit, vel audiuit, nec sciet in posterum. Quoniam istae nunquam fuerunt in rerum natura; nec erunt vnquam; nisi forsan mutato prorsus ac renouato terrarum orbe. Sed haec obiter, amoenae varietatis gratia, de qua plura Cl. KLOTZIVS, in *Act. Litt. Vol. I. part. IV. pag. 409.* lectu iucunda.

dem in modum, dicerent: τέτοις μέχρι γήρας, κυφὸν ἀκολαθήσει βάδιμα, q) item κυρτὸν, ἢ γρυπὸν ἔσται βῆμα, quod vulgo ac simpler, sic essent enunciaturi, vt notum: ἔτοι ἄχρι γήρατος, συγκεκυφότες πορεύονται, vel βαδίσουσι. Graecorum autem vbique, singulari animi morbo, ille est adfectator et interpret, interdum *infelicitate sua etiam festinus*, vt scite quidem loquitur maximus THOMAS REINSSIVS, qui id quoque multis exemplis, opportune allatis, probat, *Lib. III. Var. Lect. Cap. XVII. pag. 652. seqq.* Quem, vt obiter id hic adiiciam, venustum ex parte, naeuum noster Siccensis Afer communem habet cum suis popularibus, pariter Africanis, magni plerumque nominis; veluti ARNOBIO, TERTVLLIANO, APVLEIO, FVLGENTIO, MARTIANO CAPELLA, et aliis nonnullis: Vnde, quod doctis quidem satis notum, haud parum obscuritatis ipforum scripta alias vtilissima, contraxerunt, vt inde saepissime intellectu sint difficillima.

Vsq̃ue ad senectutem, vero, vt pergam, hic noster dixit, quod alibi adhuc elegantius et significantius, expressit per *consenescere*. Ita supra, *Lib. Morb. Chron. I. Cap. IV. pag. 295.* *Epilepsia plerumque patienti consenescit*: et rursus infra, *Lib. IV. de Morb. Chron. Cap. IX. pag. 546.* *Cum plurimae genuinae, seu aduentitiae passiones corporibus infractae*, (forſan et legi posset, *infractae, impactae, vel intractae*, quanquam et vulgatum *infractae*, tolerari et commode per pertinaces et insuperabiles, explicari potest,) *consenescant*: sicque passim et alibi, in his libris: atque hoc iterum, ex consueto Graecos imitandi, studio, qui quippe, praecipue autem inter eos, medici veteres, de morbis diu inueteratis, pertinaciter inhaerentibus, atque hinc vinci et expugnari nesciis, simili feliciter audaci translatione, elegantissime ac significantissime dicere consueue-

q) Similem plane in modum elegantissime dixit BASILIUS magnus, *Sermon. Ethic. II. pag. 47.* ἡ τῷ σώματος ἀδυναμία πάρεσι μοι ἐκ τῆς πρώτης ἡλικίας, μέχρι τῷ γήρας τέττα συντραφεῖσά μοι. Haec corporis infirmitas adest mihi a prima aetate, in hanc vsque senectutem, mecum connutrita.

Et sic alibi quoque saepius. Pari quoque venustate, occurrit apud DINARCHVM, *Orat. contra ARISTOGIT. p. 66.* Πονηρίαν ἐγκαταγεγενηκυῖαν κωλίσαι ἀδύνατοι; *Malignitiam, quae iam iam vna insenuit, nihil amplius extirpare potest.*

sueuerunt συγγηράσκειν, et συγκαταγηράσκειν, vti ex innumeris fere ipsius HIPPOCRATIS locis, luculentissime constat, ex quibus tantum aliquot exempla in fidem ac probationem, hic producere liceat: inprimis, quum vix vnum saltem locum, et quidem non sua, sed aliena, sede, prolatum, quod iure quis miretur, diligentissimus alias in oeconomia Hippocratica, adnotauerit FOESIVS. Sic igitur ipse artis nostrae conditor, *Lib. iv. de Morb. p. 153.* de lumbricis latis, seu taeniis, de quibus nos alibi plura: Θάνατον μέντοι ἔκ ἐπάγει, ἀλλὰ συγκαταγηράσκει, Mortem quidem non inducit, sed consenescit, item *Lib. de Affect. pag. 173.* desplenicis: ἐνίοισι δὲ συγκαταγηράσκει, vt et proximo *Lib. de intern. affect. p. 232.* de Hydrope: πολλοῖσι συγγηράσκει ἡ νόσος, nec non *Lib. ii. de Morb. mul. p. 348.* κάματοι συγκαταγηράσκουσιν, atque sic in antecedentibus, et sequentibus, saepissime: Nonnunquam autem maioris elegantiae et efficaciae causa, τῷ συγκαταγηράσκειν, addit quoque, τὸ συναποθνήσκειν, v. gr. *Lib. de intern. affect. morbis, et aphorif. vid. DIETERICH. IATREVM HIPPOCR. p. 881.* vt et ex parte, obseruauit FOESIVS: quod CELSVS more suo, eleganter Latine vertit: *longus morbus, usque ad mortis diem, Lib. iii. Cap. xxiii.* et alia loco: *Vitium usque mortis diem, mansurum, Lib. vii. Cap. vii, 15.* et alibi passim. Quomodo etiam perpetuus et felicissimus iste HIPPOCRATIS imitator, immo HIPPOCRATES potius alter, ARETAEVS, *Lib. i. de Curat. acut. morb. Cap. v. pag. 84. Edit. BOERHAAV.* et ex parte, nostrae, de dira epilepsia: συγγηρά τὲ καὶ συναποθνήσκει; Conf. huc PAVLLI AEGINET. *Lib. iii. Cap. xiii. p. 29. b.* quemadmodum idem illud verbum elegantissimo tropo, translulit ad ipsos inmedicabiles animi deprauati morbos, maximus philosophorum doctorum, PLVTARCHVS, libro, animine, an corporis morbi sint peiores, *pag. 500.* ἀνήκεστος ἢ κακία τοῖς πολλοῖς συνοικεῖ, καὶ συγκαταβιοῖ, καὶ συναποθνήσκει: ^{r)} Sicuti pari rursus venustate, ipse noster HIPPOCRATES, *Lib. Praedictor. ii. p. 499. T. i. de Morbo*

r) Pari quoque lepore, dixit DIONO- II. τὰ τῶν Θεβαίων πράγματα συναπέθανεν.
RVS SICVLVS, *Lib. XV. p. 64. Tom.* vbi vid. in notis cel. WESSELING.

bo sacro : Ὀκόσοισιν ἂν ἀπὸ παιδός, ξυνηβήσει τε καὶ ξυνανδρωθῇ τὸ νόσημα; quali elegantia pariter dixerunt Tragicorum isti principes, SOPHOCLES et EVRIPIDES: ἡβᾷ τὸ κακὸν, et ἡβᾷ ἀπιτρία. Qua ratione nempe non nihil, opinor, melius et significantius legendum ibi nobis videtur, pro vulgato verbo admodum, nisi fallor, hic languido, ξυμβήσεται, κ. λ. licet etiam, eodem acumine legi posset, ξυμβιώσει τε, κ. λ. sed συνέβη, legit CASAVBONVS, ad THEOPHRASII *Charact.* pag. 373. sed haec obiter. Denique et ipse ARISTOTELES, HIPPOCRATEM et hic, sequutus et imitatus, vt saepius quidem solet, sed et semper fere, indecoro more, tacet, vtrumque hoc verbum scite copulauit, *Lib. x. de Hist. Animal. Cap. vii.* seu vltimo, pag. 964. *Tom. 1. Opp.* vbi de Feminarum Mola agit: Ἐνίαις δὲ καὶ συγκαταγνήσκει τὸ πάθος, καὶ συναποθνήσκει, quomodo et ipse alibi saepe, vt et PLATO, LIBANIVS, PHILO IVDAEVS, BASILIUS M. et alii plures, eleganter et ornate loquuti sunt, quos tamen operosius excubere, iam nec vacat, nec licet, ne nimium extra oleas, quod dicitur, euagati, non nemini videamur: s) praesertim, quum haec ipsa, haecenus in medium allata, affatim sufficere quidem posse merito arbitremur, ad illustranda et explicanda ea CAELII AVRELIANI: *His usque ad senectutem, uncus sequetur gressus*, et ista altera: *Morbus patienti consenescit.* Quare verbum amplius non addimus, quia prope- randum.

Atque haec quidem haecenus, et de ipso COCI ACANTHII morbo singulari, seu nephritide pertinaci, et de tristi denique morbi illius

s) Vnum tamen adhuc paucis hic addere liceat ex PLIN. *Lib. VIII. Cap. II.* extremo, vbi de acerrima atque internecina draconum et elephantorum pugna, sermo habetur: *Commoritur*, inquit, *ea dimicatio*, hoc est, usque ad mortem durat, et cum ipsa tandem finitur, Graece dixeris: συναποθνήσκει ἢ μετ' ἀλλήλων μάχη. Quod quum durum insolitumque videretur magno alioqui SALMASIO, in *Exercitat. Plinian.* p. 217. locum istum omni

licet mendo vacuum, sic emendare frustra quidem, tentavit: *commorituris dimicatio*. Quo ipso, infeliciter plane, piget fateri, illud effecit, vt cum his commorituris belluis inter se bellantibus, omnis quoque loci huius Pliniani elegantia quasi simul commoreretur. Inprimis quum et ipse PLINIVS alibi sic loquatur, *Lib. X. Cap. XXI.* item CICERO, SENECA, TERTVLLIANVS, cum aliis.

illius euentu, siue gibbere: Quibus ex promisso quidem nostro, nunc merito quaedam essent adhuc adiicienda, de ipsa simplici, nec operosa medendi ratione, ab ipso nostro HIPPOCRATE hic subiuncta, quam inprimis adeo demiratur ipse VALLESIVS, vt hinc difficiliorem nondum et duriores quasi gibbum, vt sic dicam, in ipsa curatione inuenit, quam quidem in illo ipso gibbo, ex phrenitide suborto. Sed spatiis iniquis iam exclusi, vt cum poëta loquar, et per materiae ipsius benignam vbertatem, longius prouecti, ac primum animo destinaueramus; compendiarie nunc potius via nobis incedendum, quum contra istam, quae prius quidem menti nostrae sedebat, sententiam, latius excurrere prohibeamur.

De externis igitur remediis hic commemoratis, topicis vulgo dictis, nullum certe est dubium, lenes quidem fots, mites inunctiones ex oleo praesertim tepido odornatas, et blandas denique frictions, de quarum vario eximio usu, nouissime egregie tractauit celeberrimus HUNDERTMARK, plurimum omnino conferre ad roborandas, demulcendas et emolliendas partes corporis externas rigidas, nimis adstrictas, item exsuccas et enerues; pariter quoque ad vertebrae leuiter tantum extortas, ac sedis suae incertas, sensim apte reponendas ac re corrigendas; de his enim speciatim vertebrae, *quae paullulum saltim excesserunt, non autem de his, quae toto loco motae sunt*, vt ait CORNELIVS CELSVS, *Lib. VIII. Cap. XIV.* vel, *quae ipsorum nodorum spinarum euulsione*, (vel si mauis, *expulsione*) *arcuata videntur*, vti eleganter loquitur CAELIVS AVRELIANVS, *Lib. III. de Morb. acut. Cap. VIII. p. 212.* intelligendum hic potissimum esse HIPPOCRATEM, cum ex aliis ipsius HIPPOCRATIS locis, in *Libb. de artic. p. 800. seqq. Mochlic.* et alibi passim obuiss, tum praesertim ex ipsa rei ratione, et frequenti ac peruulgata experientia, luculentissime cognoscitur.

Ceterum hanc ipsam HIPPOCRATIS medendi methodum, per roborantes fots et inunctiones, institutam, egregie prorsus confirmat binis simillimis plane exemplis, diligentissimus THEOPHILVS BONETVS, in *Sepulchret. Tom. I. Lib. II. Sect. XII. Append. II. pag. 912.* quum puerum atque puellam, ex diuturna febre tertiana, vtrosque

gibbosos factos, solo fotu, ex roborantibus et neuroticis parato, ac litu ex oleis atque quorundam animalium axungia, composito, paucorum dierum spatio, quod tanto magis miratu dignum, pristinae sanitati felicissime redderet, et ex curvis, rectos rursus faceret. Qui locus eximius huic nostro Hippocratico illustrando ac confirmando, ad instar luculenti commentarii, accommodatissime inferuire potest. Vid. et ibidem, in proxime antecedentibus, similem fere KERKRINGII observationem.

Balnei contra, praesertim vero feruentioris, usus, recte hic interdicitur, quod illud corpora, maxime longo morbo debilitata ac fracta, magis effoeminat et eneruat: quantum enim lassitudinis eximit, vigorisque noui ingerit sanis hominibus, via, aut labore fessis; tantum e contrario, languoris infert, viriumque aufert aegrotis, vel ex grauissimi morbi longinquitate vix recreatis: vnde et sapienter praecepit ipse HIPPOCRATES noster, *Lib. de Victu acutor. pag. 296.* ὁδὲ τὰς γε-
γυωμένους χεῖν λένειν, debilitatos in balneum mittere haud oportet, vbi et plura de hac ipsa re, legenda, vt et *Lib. de Affect. p. 192. de Humidorum usu*, et *Lib. II. de Diaeta*, conf. et CELS. *Lib. II. Cap. XVII.* item CAEL. AVREL. *Lib. II. de Morb. chron. Cap. XIII. p. 406.* et ipsum GALE-
NUM passim: E recentioribus autem idem de balneorum usu et abusu, argumentum latius ac disertius persequuti sunt HIERON. MERCV-
RIALIS, *de Arte Gymnast.* ANDR. BACCIVS, *de Thermis*, GVIL. CAVLIUS, *de Balneis*, LAVR. IOVBERTVS, *de Gymnas. et Balneis*, aliique: nuperrime autem celeb. PASCHALIS CARYOPHILVS, in elegantissima ac doctissima dissertat. epistolari, *de Thermis Herculanis, in Dacia nuper detectis*, pag. 33. seqq. ne plures commemoremus.

Purgatio porro, vt HIPPOCRATES hic narrare pergit, siue φαρμακοποίησις, ex Helleboro praecipue scilicet, infusa, quae hac visita-
ta voce, inprimis stilo HIPPOCRATIS, ARETAEI, GALENI et reliquorum Medicorum veterum, significari solet, vt notum, nihil quidquam, hoc quidem in morbo, proficiebat, quin potius plus offi-
ciebat: quoniam corpus iamiam saeua morbi diuturni violentia debili-
tatum, et succis laudabilibus orbum, tanto magis exhauriebat, et vigore
flexili-

flexilique agilitate priuabat. Ex eiusmodi enim *purgatiuis medicamini-*
bus, seu καθαρτικαῖς, probe obseruante CAELIO AVRELIANO, *Lib.*
i. de Morb. Chron. Cap. i. p. 285. stomachus inficitur, et omnis neruositās
vitatur: siue, vt elegantius pro more, atque magis latine, id expri-
 mit CORNELIVS CELSVS, *Lib. i. Cap. iii. et Lib. ii. Cap. xii. per-*
niciosae sunt purgationes, si nimis valentibus medicamentis, ex Helleboro sci-
licet, praesertim paratis, fiunt, quoniam stomachum fere laedunt; inde ris-
dem aliud non ducenda est, praecipue in corpore infirmo, diuque in aduersa
valetudine exhausto. Quod ipsum nempe salutare praeceptum hauserat
 ex ipso HIPPOCRATE, omnis boni in medicina, fonte, cuius vid.
 libellum *de Hellebori usu, de victu in morb. acut. in Epist. ad CRATEV.*
p. 930. et alios. Conf. GABELCHOVERI *Obs. med. XLVIII. Cent.*
iii. pag. 83.

Efficacius igitur securiusque e contrario, praesidium in hac gibbe-
 rosa, vt ita dicam, nephritide mitiganda, potius subministrabat modi-
 cus panis esus, et vini nigri parcior vsus: quoniam scilicet vtrumque
 pro innata sua salubri facultate, corpus ex atroci morbi diuturnioris
 saeuitia, infractum et incuruatum, nouo robore induebat, vt spina non-
 nihil arcuata, in pristinum erectiorem statum rursus demum exurgeret,
 ac renes insuper atque vesicam ab impuris sordibus arenisque ibi col-
 lectis, repurgabat, atque sic illas vna cum vrina, iisdem remediis dome-
 sticis et diaeteticis mota et impulsu, sensim emoliebatur. Inde infra,
Lib. vii. de Morb. epidem. p. 874. rursus ipse HIPPOCRATES noster
Clonigo cuidam Abderitano, qui pariter, ac hic noster COCVS ACAN-
THIVS, saeua nephritide, vna cum dysenteria insuper sociata, labora-
bat, ἄρτον ἑξοπτον, panem valde assatum, siue bis coctum, commenda-
vit, et simul quoque οἶνον μέλανα λεπτόν, vinum nigrum tenue: de quo
vid. maxime LINDENII Select. Med. Exercitat. xvi. p. 739. seqq. et
p. 758. seqq. vbi singularem hanc morbi CLONIGI nephritici histo-
riam egregio, docto et copioso Commentario illustrauit. Similem in
 modum, GALENVS quoque, siue auctor lib. *de affect. renibus insident.*
dignot. et curat. Cap. vi. p. 540. Tom. x. Opp. et alibi, nephriticis sua-
det panem furfuraceum, et vinum, quod et fecit RVFVS EPHES.

Lib. de Vesicae renunque affect. Cap. xii. seqq. Conf. PETRI FORESTI *Obs. med. xv. Lib. xxiv. p. 66. et Obs. xvi. p. 70. item Obs. xviii. p. 81. seqq.* ne alios plures hanc in rem testes iam citemus, quoniam haec sunt notissima. Ceterum exinde admodum perspicue, opinor, patet, ἀγροσιτίν rectius in hoc nostro loco haecenus explicato, legi; quam ἀποσιτίν, infra, in altero, huic plane gemino, *Lib. vii. de Morb. epidem. p. 860.* vt iam supra, etsi paucis, me monere memini.

Sicuti autem, vt finem tandem aliquando faciam, haec ipsa emendendi ratio, ab HIPPOCRATE hic proposita, facilis, naturalis, et ipsius morbi naturae artisque salutaris regulis apprime conueniens fuit, vti ipse faustus sanitatis recuperatae euentus luculenter postea docuit: Ita non video, quomodo eadem ipsa sanandi methodo, aequae feliciter et expedite curari quoque potuisset surditas, ex phrenitide orta, si emendatio quidem Reinesiana superius examinata, et modeste reiecta, admitteretur: Quo enim pacto, per leues frictiones, tepidos fots, et blandas inunctiones, ex oleo paratas, item per vini nigri modicum potum, et panis crassioris esum, surditas in intimis aurium recessibus labyrinthis, vt vere ita vocantur, abscondita, feliciter dispelli, et meatus auditorius sic dictus, hucusque obturatus, recludi demum commode possit; id equidem fateor, mihi perquam arduum et aegre comprehensibile omnino videri: inprimis, quum, quantum mihi certe constet, manifesta exempla adhuc desint, eiusmodi surdorum, per ista nempe remedia simplicia, ab HIPPOCRATE hic in vsum aduocata, auspicato sanatorum et pristinae integritati restitutorum. Longe aliam enim, et quidem plerumque operosiores, emendendi rationem ad surditatem expugnandam, requiri, patet ex ipso HIPPOCRATE, *Lib. v. Epid. p. 788. et Lib. vii. p. 858.* praesertim autem GALENO, AETIO, *Lib. vi. Cap. lxxx. p. 118.* AEGINET. *Lib. iii. Cap. xxiii. p. 36. seqq.* NONO, *Cap. xc.* THEODORO PRISC. *Lib. i. Cap. viii.* et aliis pluribus. Immo ipsa docente per saepe tristi experientia, omnia quidem incassum contra illam δύσλυτον κώφωσιν, vt significanter eam vocat GALENVS, *Comm. in Aph. xxviii. Sect. iv. pag. 150. Tom. ix.* adhibentur remedia, quantumuis valentissima.

EXERCITATIO SEXTA.

DE

SCARIFICATIONE ET VSTIONE
OCULORVM

A B

HIPPOCRATE DESCRIPTA.

Scarificationis Oculorum, siue accuratius loquendo, cruentae frictio-
nis, frequens passim mentio facta fuit apud Medicos Graecos ve-
teres; rarior apud medios, seu Arabes; rarissima vero, immo fere
nulla, apud recentiores, qui tamen arduam illam artem, quae manu
medetur, indefesso studio et solertissima cura, hactenus, vt notum, ex-
coluerunt. Altissimis ergo quasi tenebris submersa per aliquot fere
saecula, delituit ista subtilioris Chirurgiae oculariae pars, donec eam,
anni nunc fere quadraginta effluxere, ingenti animo ausuque, denuo
in lucem desuetam, abolitamque paene hominum memoriam reuoca-
ret, et in vsum nouum reduceret celeberrimus Medicus ocularius, IO-
ANNES THOMAS WOOLHOVSIVS, nobilis et natalibus, et literis
meritisque iuxta, Britannus.

Adeo vero vsque hic ipse istam suam nouam, aut rectius nou-an-
tiquam oculos scarificandi methodum dilexit, et inter potiora sua arca-
na habuit, vt nemini fere istius copiam faceret, nec, nisi soluto prius
ingenti pretio, et religioso insuper sacramento interposito, si vera qui-
dem sint, quae eo tempore, publica fama circumferebantur, vel aman-
tissimis et selectissimis suis discipulis, parce tamen et subobs-
cure, istam impertiret. ^{a)}

Inuenit tamen, vt fieri solet, per hos ipsos ingenuos et publicae
utilitatis studiosos discipulos, ipso Magistro frustra prohibente, grande
istud arcanum tandem, late patentem riuam, per quam in publicum
elaberetur. Prodierunt enim ex eo quidem tempore, intra angustum
octo

a) Vid. MAVCHARTI Diff. mox lau-
dandam, pag. 5. et pag. 9. item pag. 14.
Conf. Ill. HEISTERI Institut. Chirurg.

Tom. I. Part. II. Sect. II. Cap. 52. pag.
503. vbi plura,

octo annorum interuallum, ex celeberrima ista schola Woolhusiana, tanto Magistro dignissimi discipuli, qui de ista oculorum scarificatione huc usque fere inaudita, doctissime et diligentissime commentarentur.

Signum quasi primus sustulit cl. IO. HENRICVS HAMPE, ^{b)} edita in vulgus praeclara Dissertatione, 1721. *de scarificatione oculari Hippocratica*: quem mox quinquennio post, 1726. simili commentatione egregia, *de ὀφθαλμοζύσει Nou-Antiqua, seu Woolhusiano-Hippocratica*, sequutus est vir praestantissimus, BURCHARD. DAVID MAVCHART: ^{c)} hunc denique, nondum visa ea ipsa MAVCHARTI Diatriba, ^{d)} proximo interuallo, 1728. excepit excellentissimus IO. ZACHARIAS PLATNERVS, ^{e)} quem praemature nimis viuis ereptum non Lipsia solum, sed vniuersus orbis eruditus, adhuc merito acerbè luget, publicata elegantissima ac doctissima Dissertatione, *de scarificatione oculorum*, quam promeritis laudibus ornauit magnus noster HOFFMANNVS, ^{f)} ne plures alios laudatores iam producam. Quum igitur absconditum hoc Mysterium Chirurgicum, paucissimis arte initiatis Eoptis intra sacra profundi silentii siparia, hactenus tantum concreditum, per hos ipsos tres clarissimos Viros, eosque postea sequutos alios plures, etiam profanis quasi et ab istis sacris remotis hominibus sic innotesceret, materiaque tum publica fieret, quae huc usque, priuata tantum, immo priuatissima, fuisset: protinus, vt miramouitati plerumque inesse solet gratia, omnium curiosorum oculi conuersi erant in hanc nouam oculorum scarificationem, adeo, vt vix vllis,

b) Ipse huius Dissertationis Titulus est: *Dissertatio Medico-chirurgica, de scarificatione oculari Hippocratica, eiusque in plurimis oculorum affectibus, insigni vtilitate*, ab IO. HENR. HAMPE, etc. *Duisburgi ad Rhen. 1721.*

c) Ista Dissertatio sic inscripta: *ὀφθαλμοζύσις. Nou-Antiqua, seu Woolhusiano-Hippocratica, Nobilissima Operatio ocularia, e textu graeco eruta, et bis mille annos neglecta, nunc demum penitus emergens, per BURCHARD. DAVID. MAVCHART, Tubingae 1726.*

d) Vid. Cel. PLATNERI programma, quo Exercitationes Chirurgicas indixit, *Lips. 1735.*

e) Breuiorem et modestiorem Titulum eximiae suae Commentationi praefigere voluit Cel. PLATNERVS, sic enim integer iste habet: *De scarificatione oculorum, praefide IO. ZACHARIA PLATNERO, Lipsiae, 1728.*

f) In Dissert. *de Morbis oculorum praecipuis recta medendi ratione*, *Halae, 1728. pag. 15. add. ill. HEISTERI Inst. Chirurg. T. I. p. 504. sqq.*

lis, reperiretur, qui non saeculo, de tam insigni felicitate, gratulatus fuisset, qua nimirum effectum esset, vt multis in posterum miserrimis caecis, aut oculorum tabe correptis noua et insperata dies tandem aliquando, haud dubie, auspicato reluceret. Ipse vero interea WOOLHVSIVS, ne alienae scientiae famam sibi soli aucupaturus videretur; sed vt potius cum PLINIO, publice ostenderet, benignum et plenum esse ingenii pudoris, fateri, per quem profecisset: palam gratus professus est, g) sese prima scarificationis oculorum vestigia ac signa in ipso HIPPOCRATE deprehendisse, licet adeo obscondita et caliginosa quasi nocte, per ignaros aut negligentes interpretes, circumfusa, vt sine vana iactantia, gloriari quidem posset, sese post tot elapsa interim saecula, omnium primum et solum omnino fuisse, qui loci illius Hippocratici obscurissimi iuxta et difficillimi verum sensum intus latentem vnice perspexerit, operta quae huc vsque fuerant, aperta fecerit, et veritatem, in altissimo quasi puteo haecenus demersam, singulari temporis et ingenii felicitate, in liquidam lucem extulerit, et in publica commoda, et de praesenti, et de futuro saeculo bene meriturus, manifestauerit. Quam singularem felicioris huius inuentionis laudem celeberrimo huic suo Magistro postea plena quoque manu admensi sunt dignissimi illo discipuli, superius iam laudati. h) Quousque vero id ipsum, quod et ipse de se credidit WOOLHVSIVS, et de ipso quoque crediderunt ipsius aedecae, veritati sit consentaneum, nunc paucis, si lubet, sine vilo tamen praeiudicio, aut foeda alienae laudis obtreptione, dispiciamus, vbi prius ipsum illum HIPPOCRATIS

g) Vid. *Ephemerid. Nat. Curios. ad Cent. V. et VI. Append. pag. 134. An. 1717.* apud MAVCHART. *Diss. cit. pag. 6.* et ipsius WOOLHVSII *Dissertat. ophthalmicas*, An. 1719. per cl. LE CERF, latino sermone, publicatas, pag. 336. sqq. apud cl. PLATNER. *Dissert. laudat. pag. 13.*

h) Vid. MAVCHARTI *Dissert. p. 6. sqq.* et PLATNERI *Dissertat. laudatam, p. 13. sqq.* item eiusdem *Exercitationem*

Academicam de Chirurgia Artis Medicae parente, Lipsiae, 1721. p. 8. denique ipsius *Institutiones Chirurgiae rationalis, p. 183. sq.* Conf. etiam HAMPII *Dissert.* superius allegatam, quam iam abesse merito dolemus, quum eam sub ingenti Dissertationum farragine alicubi absconditam, nunc inter festinandum, contra votum nostrum, reperire haud potuerimus.

TIS locum, cuius verum quidem sensum vnice sese peruidisse opinatus est WOOLHVSIVS, produxerimus, et celeberrimi illius ophthalmiatri nouam eiusdem explicationem ad seuerius, simul tamen modestius, examen reuocauerimus.

Iste autem controuersus HIPPOCRATIS locus legitur, in *Libello de Visu*, HIPPOCRATI vulgo tributo, pag. 353. Opp. per LINDEN. Tom. II. his quidem verbis:

Ὅταν δὲ ξύης βλέφαρα ὀφθαλμοῦ, ξύειν, εἰς ἰώμιλησίῳ, ἔλω, καθάρῳ, περὶ ἀτρακτον περιειλῶν, αὐτὴν τὴν στεφάνην τῷ ὀφθαλμῷ φυλασσόμενος, μὴ διακαύσης πρὸς τὸν χόνδρον.

Quae vulgo ita Latine redduntur:

Quum vero palpebras oculi raseris, Lana Milesia crispa, pura, circum Fusum obuoluta, radito, ipsam oculi coronam vitando, ut ne ad Cartilaginem usque, peruras.

Sub his igitur obscuris verborum ambiguorum inuolucris, verum istud certumque instrumentum Chirurgicum absconditum latere, existimauit laudatus supra WOOLHVSIVS, quo ad radendas, siue scarificandas palpebras, quondam vsus fuerit Chirurgorum princeps HIPPOCRATES.

Inuenit autem illud, sua quidem opinione, siue rectius forte, mea sententia, frustra quaesivit, in voce ἀτρακτος, quam non tam per *fusum*, vt haecenus omnes fecerant HIPPOCRATIS Interpretes; i) quam potius, per *carduum*, seu *herbam quandam spinosam et aculeatam*, reddendam esse, censuit.

Ἀτρακτον nempe HIPPOCRATI hic idem esse ingeniose, non nego, statuit, quam ἀτρακτυλίδα, vt alias rei herbariae scriptoribus vocatur, hoc est Cnicum siluestrem, seu rectius, Cnecum, seu Carduum vulgarem, aut carthamum siluestrem, foliis non nihil aculeatis hinc inde armatam, et Capitulo spinis spiculisque cristato horridam: k) idque

i) Vid. et Celeb. SCHVLZII *Hist. Med. period. I. Sect. III. cap. 4. p. 286.*

k) Vid. MAVCHART. *Diff. pag. 7. et PLATNERI Diff. p. 26. 27. et program-*

ma de Vet. Chirurg. p. 8. Sed dubitari tamen hic plurimum adhuc potest, an scilicet illius quidem *Cnici syluestris* spinæ aut aculei molles plerumque, teneri at-

idque tanto magis, quod rusticas olim mulieres ex huius Atractylidis scapo longo laeuique, fusos ac colus sibi confecisse, affatim constet ex ipso THEOPHRASTO ERESIO, ^{l)} DIOSCORIDE, ^{m)} Scholiaste THEOCRITI, ⁿ⁾ PLINIO, ^{o)} aliisque: p) adeo, vt hinc, ex ingeniosa quidem Viri clarissimi opinione, perquam probabile videatur, ἀτρακτον, atque ἀτρακτυλίδα, synonyma quasi esse, atque inde promiscue vsurpari posse, sicut hoc quidem loco, fecerit ipse HIPPOCRATES, quum scilicet ἀτρακτον scriberet, et tamen τὴν ἀτρακτυλίδα, seu Carduum, aculeis asperum, intelligeret; quam nimirum isti subtiliori oculorum scarificationi felicius peragendae longe tutius commodiusque conuenire crederet, quam quidem rudem illum durumque fustum, vt vulgo legitur, et explicatur, ad hoc quippe arduum et periculi plenum negotium rite tractandum, ineptum plane atque incongruentem. Quare et Carduum illum aculeatum lanis Milesiis crispis mollissimis inuoluendum perquam prudenter hic praeceperit ipse HIPPOCRATES, ne scilicet rigida ipsius spicula, altius, quam par, aut necesse esset, inuersis palpebris infingerentur, neue ipsa scarificationem

Nnn 2

istam

que flexibiles, apti satis atque adcommo-
dati sint ipsis oculis scarificandis? quod
vix verisimile videtur. Igitur melius forte
atque probabilius hic substituisset WOOL-
HVSIVS alterum Carduum illum gran-
dem, aculeisque rigidis et solidis horri-
dum, *Dipsacum*, seu *Fullonum Carduum*,
vulgo dictum. Sed tum rursus ex altera
parte, ipsa illa Dipsari spicala rigidiora et
rudiora commodum securumque vsum vix
praestitissent in scarificandis tenerrimae
quidem texturae et exquisitioris sensus
oculis. Accedit his vel maxime, inge-
niosum WOOLHVSII lusum de *Atracty-
lide*, penitus tum fuisse turbatum, imo
sublatum, quoniam nempe Dipsacus nun-
quam vocatus fuit *Atractylis*, nec sic vn-
quam vocari poterit. Igitur vel sic in-
certior illa de *Cnico*, seu *Atractylide*, con-
iectura, adhuc incertior fit eo, quod aegre

illa inferuire possit oculorum scarifica-
tioni.

l) *Histor. plantar. Lib. VI, cap. 4. pag. 612.*

m) *De Mater. Med. Lib. III. cap. 107. pag. 219.*

n) *Ad Idyll. IV. 52. p. 87.*

o) *Hist. Natural. Lib. XXI. Cap. 15.*

p) Vid. inprimis IO. BOD. a STAP-
PEL in *Comment. ad dictum THEO-
PHRASTI locum, pag. 617. sqq.* item
CLAUD. SALMAS. in *Homonym. Hyl.
Iatric. cap. LXXVI. p. 103. sqq.* Add. his
MATTH. SILVATICI *Pandect. Med.
cap. LXIX. fol. XXVI. GORRAEI Definit.
Med. pag. 62. SARACENI Scholia in
DIOSCORID. l. c. p. 67. et SCALI-
GERANA prima, pag. 23.*

istam administrantis manus iisdem vulneraretur, aut cruentaretur. 9)
Haec quidem satis acute ac speciose.

Quoniam vero facile praeuidebat Vir iste oculatissimus, Vix quenquam Eruditorum, in re praesertim hac critica ac philologica, sine graui et idoneo teste, plenam atque integram fidem habiturum esse huic suae nouae, lubricae atque ancipiti coniecturae, ἀτρακτον nempe in praesenti HIPPOCRATIS loco, tantundem valere, ac quidem ἀτρακτυλίδα: mature atque sapienter circumspicere coepit praesidia atque testimonia, quibus hanc suam sententiam adhuc male firmam et quasi vacillantem, contra imminentem forte ruinam, valide suffulciret ac sustentaret. Neque ipsi in hoc laudabili conatu, defuit, ut ipsi quidem visum, laetabilis successus. Protinus enim vel in ipso HIPPOCRATE, quod tanto maius robur iure addere videtur ipsius argumento, vnum singularem plane atque eximium inuenit locum, ex quo manifestissime nempe pateat, ἀτρακτον apud ipsum, idem rursus significare, ac ἀτρακτυλίδα, siue *cardium aculeatum*.

Iste vero locus, omnia scilicet probaturus et confirmaturus, legitur *Lib. v. de Morb. Epidem. pag. 777. Tom. 1. Opp. per LINDEN.* ubi de quadam intrepidi animi Muliere sermo habetur, quae manu, in naturam famulae cuiusdam animi defectionem passae, immissa, extraxerit lapidem asperum, οσον σπόνδυλον ἀτράκτε, hoc est, *ad magnitudinem capitis Cardui sativi*, seu ἀτρακτυλίδος, non vero, *verticilli fusi*, uti haecenus omnes perperam latine reddiderunt interpretes, velut nimirum censet cel. WOOLHVSIVS, suae profecto scenae nimium hic inseruiens, si dicere quidem libere liceat, illique omnes cum eo existimant, qui ingeniosae non nego, coniecturae ipsius calide nimis suffragantur. 1)

Nos

9) Vid. MAVCHARTI *Dissert. p. 6.*
et PLATNERI *Dissert. p. 25. sqq.*

1) Vid. B. PLATNERI *Dissert. pag. 27.* et eiusdem *prolusionem Academ. de Chirurgiae Artis Med parente, pag. 8.* Qui tamen, nimio forsan in hunc suum praeceptorem amore ac praeiudicio abreptus,

magnam ipsi graecarum praesertim literarum peritiam tribuit; quam tamen, ut ingenue fatear, vix mediocrem in eo fuisse, ex hoc infelici et inscito ipsius specimine, cuius graecae linguae artisque imprimis Criticae vel modice tantum perito nunc manifestius, spero, patebit.

Nos vero vt spes est, si quidem liceat, decenti tamen cum modestia, et ipsos illos probos interpretes ab ista immerita criminatione tutos et liberos praestabimus, et bonis quoque mulierculis, vt ita per iocum dicam, fusum suum, fusoque verticillum, male ipsis ereptum, reddemus. ^{s)}

Haec igitur ipsa vera est WOOLHUSII sententia, de hoc dubio et obscuro HIPPOCRATIS loco, superius producto, quam, licet in arctius compendium hic a me coactam, ita tamen diligenter ac fideliter, vbique retuli, vt nihil quidquam potiorum rationum et momentorum, ab ipso quidem aut stabilimenti, aut ornamenti causa, in medium allatorum, a me oscitanter omitteretur. Maiore vero colorum pulchritudine et varietate, eandem floridiorem reddiderunt celeberrimi tanti Viri discipuli, superius iam aliquoties merito laudati, qui nempe id demum sua adiecta arte atque industria, effecerunt, vt ista quasi Helena Woolhusiana, nunc tanto amabilior tantoque desiderabilior appareret. ^{t)}

Ego vero, quod pace omnium illorum, et sine vlllo indecoro partium studio, aut cuiusquam praeiudicio, a me ingenue dictum sit, haec cuncta ingeniosa quidem esse, non nego; vera autem esse, vix credo, immo vehementer dubito, et quidem ex rationibus sat grauibus, nisi fallor, mox hic infra subiiciendis.

Primo enim nondum probatum est, nec vnquam, vt equidem putem, ab vlllo probabitur, ἀτραχτον, apud HIPPOCRATEM, aut vllum alium Auctorem graecum, quotquot hactenus nobis certe innotuerunt, idem esse, aut esse posse, ac ἀτραχτυλίδα, seu *carduum spinosum et aculeatum*; quum ne vnicum quidem liquidum et manifestum, in hunc vsque diem, productum sit exemplum, ex quo certissime, et sine vlla contradictione, colligi possit, vsitatam atque indubitatam istam esse

Nnn 3

syno-

s) Licet ceterum non negemus, σπόνδυλον, ceu vocem πολύσημόν, vt ex omnibus Lexicis notum, interdum quoque significare ipsa plantarum capita, conf. cl. PLATNERI Diff. p. 27. et in citato iam programme, vt vulgo dicitur.

t) Vid. MAVCHART. Diff. p. 7. sqq. item PLATNERI Diff. laudat. p. 26. sqq. et in Exercitat. Academ. de Chirurgia Art. Med. parente, p. 8 nec non in alia scriptione, qua Exercitationes chirurgicas indixit, Lips. 1735. publicata.

synonymiam inter ἀτρακτον, et ἀτρακτυλίδα, quam WOOLHVSIVS in suam potius rem, ingeniose finxit, quam in lectorum assensum, aut certiolem persuasionem et adstipulationem, serio probauit, aut HIPPOCRATI ipsi solide vindicauit.

Neque enim ipsum quidquam iuuat alter ille, ad quem prouocauit, locus, ex Quinto HIPPOCRATIS Libro, de Morbis Epidem. desumptus, et supra iam productus, eum potissimum in finem, vt nudae suae atque infirmae coniecturae varias plumas, nouosque colores, si ita quidem dicere liceat, induceret. In eo enim in suum vsum, allegando, nimis festinanter confidenterque illud iamiam extra omnem litem esse, prius supposuit, quod adhuc vel maxime in lite versabatur, rem sic valde incertam dubiamque, pro certa et confessa, sine vniuersae eruditorum curiae suffragio, assumsit, atque principii quasi petitionem, vt in philosophorum quidem scholis loquuntur, aperte commisit.

Inde ergo, mea certe opinione, nihil quidquam peccasse, quin potius optime suas hic partes peregissem mihi videntur boni isti Interpretes, et ipse inprimis FOESIVS, in Oeconom. voce ἀτρακτος, quum verba illa graeca: γυνή, καθεῖσα τὴν χεῖρα, ἐξεπίσει λίθον ὅσον σπόνδυλον ἀτράκτου, τηχύν, ita latine redderent: *Mulier, immissa manu, expressit lapidem asperum, magnitudine verticilli fusi.* His enim ipsis clavis et perspicuis per se verbis nulla plane subest necessitas, vt statim quiuis a praeiudiciis liber, manifesto deprehendit, quae nos cogat, sensum τῷ σπόνδῳ τῷ ἀτράκτου, pro *fusi verticillo*, vulgarem, receptum et huic quidem loco apprime conuenientem, sine vlla ratione, relinquere, et e contrario, alium, plane nouum, longe remotiorem, adhuc valde ambiguum, nondum probatum, nec vnquam credo, probandum, de capitulo nempe cardui siluestris aculeato, ex solo inani nouitatis studio, temere adsciscere nos impellat. Praesertim, quum sic inter instrumentum foeminarum sedularum domesticum, semper coniunctim recenseatur a quibusuis Auctoribus optimis, ἀτρακτος καὶ σπόνδυλος, seu *fusus ac verticillum ipsius.* Ita enim, vt pauca tantum, in re quippe dudum notissima, producam iam exempla, PLVTAR-

CHVS, ^{u)}) consueto scilicet more, apte coniunxit ἀτράκτες, ἡλακά-
τας, καὶ σπονδύλεις, (Attice nempe, vt notum, pro σπονδύλεις, hoc
est, *fusos, colus et verticula*: et POLLUX, ^{x)}) ad Gynaeei vascula,
seu apparatus domesticum consuetum, pariter refert ἀτράκτον καὶ
σπόνδυλον, *fusum et verticillum*. Quorsum et spectat istud, in eleganti
PHILIPPI Epigrammate, cuius et meminit SVIDAS: δακτυλότριπ-
τον ἀτράκτον, Σπονδυλοδινήτω νήματι νηχόμενον. *Digitis attritum Fu-
sum, suspensum e filo, quod verticillo torquetur*. ^{y)}) ACHMET denique
FIL. SEIRIM, ^{z)}) vtrumque etiam sic scite copulauit: εἰ δὲ ἴδῃ γυνή,
ὅτι τὸ σπονδύλιον ἔπεσε τῷ ἀτράκτι, κ. τ. λ. *Si videre visa fuerit Mu-
lier, quasi verticillum fusi ceciderit*. Siue, vt id verbis OVIDIANIS, *Lib.*
IV. Metamorph. elegantius exprimam:

Et colus, et fusus digitis cecidere remissis.

Atque sic etiam alii Auctores loquuntur saepissime, quorum tamen
testimonia, ceu superuacua, iam studio praetermittimus. Prae-
sertim, quum ex haecenus allatis paucis exemplis, iam luculentissime,
opinor, pateat, nequaquam alium peregrinum, incertum, ac de capi-
tello Cardui cuiusdam acuto, longius petatum sensum reddi posse ac
debere his ipsis verbis Hippocraticis; quam quidem vulgarem, vsita-
tum et cunctis cognitum, de fuso nempe eiusdemque tereti Verticil-
lo. Nullus igitur in hoc quidem HIPPOCRATIS loco,

Carduus, et spinis surgit paliurus acutis,
sed potius, vt affatim, nisi fallor, probauimus,

Hinc et foemineus labor est, hinc pensa, colusque,

Fusus, et appposito pollice, versat opus.

Neque enim vllum alium, praeter eum, quem iam dixi, adnittunt sen-
sum, illa ipsa HIPPOCRATIS verba, prout ea diligentius aliquanto in-
spici-

^{u)} Lib. IX. *Symposiac. Quaest. XIV.* pag. 745. Opp. Tom. II. ex ipso PLATONE.

^{x)} *Onomastic. Lib. X. cap. XXVIII.* segment. 125. p. 1305. Tom. II.

^{y)} *Antholog. Graec. Lib. VI. cap. VIII.*

Epigr. 16. pag. 708. et apud SVIDAM, pag. 373. T. I. Edit. KÜST.

^{z)} *Oneirocrit. Cap. CCLXIV. pag. 244.* Edit. RIGALTII. Conf. 10. BODAEI a STAPEL *Comment. ad THEOPHRA-
STI ERES. Hist. plant. Lib. III. Cap.* XVII. pag. 260.

spicienti protinus liquido patebit. Dicitur enim ibi illa praesentis animi, et plusquam virilis audaciae foemina, e miserandae istius famulae secretioribus locis, manu intrepide immissa, extraxisse λίθον τεχνικόν, ^{a)} lapidem asperum, ὅσον σπόνδυλον ἀτράκτους, quod ad externam quidem formam ac magnitudinem attinebat, fusi verticillo similem. Cuiusmodi lapides verticillati, ut ita loquar, siue fusorum verticillorum ad instar, externam speciem formati, tam ex viuis hominum corporibus arte exsecti, quam e mortuis sine arte, exempti, vel hodie, frequentius adhuc videntur in instructioribus Anatomicorum ac physicorum Museis: ^{b)} quales etiam olim nosmet ipsi saepius conspeximus Lutetiae parisiiorum, Amstelodami, Lugduni Batauorum, Basileae, Argentorati, et alibi, item et potissimum, in locupletissimo rerum naturalium Thesauro regio Dresdensi, ubi scilicet plures eiusmodi rarissimae formae lapides asseruantur. Sed haec quidem hactenus de primario illo HIPPOCRATIS loco, quem in lubricae suae et incertae coniecturae praesidium ac defensionem, frustra licet, ut perspicue ostendimus, adduxerat WOOLHUSIVS. Nunc ex hoc diuerticulo, iterum in orbitam redeamus, hem tempus est! atque reliqua nostra argumenta Woolhusianis rationibus merito opponenda, sine mora, strenue persequamur.

Secun-

a) λίθον, enim, hic rectius legitur in aliquot vetustis Codd. MStis regiis parisiensibus, quod post diligentissimum FOESIVM, qui tamen ad vnum tantum provocat exemplar, longo temporis, ab ipso, interuallo, ante hos viginti, et quod excedit, annos, nos quoque ipsi observaui-
mus: Vulgata enim lectio λίθς, vix commodum ac tolerabilem habet sensum. Sed haec obiter.

b) Vid. cl. RYNDMANNI *Rariora Natur. et Art. Sect. III. Obsf. Med. singul. Artic. XV. pag. 894. sqq.* Conf. VALLES. in *Comment. ad hunc ipsum Hipp. locum*, pag. 493. et FOES. ad eundem, pag. 1150. item MARCELL. DONATI *Hist. med. Lib. IV. cap. 30. pag. 522.* REM-

BERT. DODONAEI *Obsf. Med. XLV. pag. 112. sqq.* HOLLER, in *Aph. Hipp. 79. Sect. IV. pag. 242.* SCHENCKII *Obsf. Med. Lib. IV. 311. pag. 295. sqq. Tom. II.* REGN. de GRAAF, de *Mulier. Organ. Generat. c. VII. p. 171.* BONETI *Polyalb. Lib. V. cap. 12. pag. 73. Tom. III. et Sepulchret. Sect. I. Obsf. 19. p. 17. Tom. II.* BLANCARD. *Anat. Pract. Cent. I. Obsf. 74. pag. 206. et Cent. II. Obsf. 80. pag. 374.* BARTHOLIN. *Ep. Med. 28. Cent. III. pag. 104. et Hist. Anat. 64. Cent. IV. pag. 364.* SCHROECK. ad HELLWIG. *Obsf. Med. CXIV. pag. 318.* et FRID. RVYSCH. *Obsf. Anat. Chir. I. ut plures alios taceam.*

Secundo igitur, vt pergamus, illud quoque probe notandum hic est, non omnes olim fusos, siue ἀτράκτες, ex Atractylide fuisse confectos; sed eos tantum, quibus viliores ac pauperiores foeminae agrestes, Sabinae quales, aut perustae solibus Appulae, vt poëta ait, in suum usum domesticum vterentur; vt ex Auctoribus supra iam laudatis abunde patet: beatiorum contra ac nobiliorum matronarum colos fusosque potius ex buxo, cedro, ebено, cupresso, citro aliaque pretiosiore materie, immo et interdum ex auro adeo ipso atque argento, fuisse in luxum quoque et ostentationem, paratos, prout id ex ipso HOMERO, item THEOCRITO, MOSCHO, aliisque, erudite probauit EVERHARDVS FEITHIVS, ^{c)} ne plures iam alios, in re quippe, cuius antiquitatum studioso notissima, producam testes.

Quod si igitur non omnes olim, sed pauciores saltem vilioris plebeculae fusi ex ista Atractylide aculeata formati fuerint, vt haëtenus ostendimus; quomodo quaeso, nomen istud generale ad omnes in vniuersum fusos transire potuerit, vt scilicet omnes ab atractylide denominarentur, quum tamen non omnes, vt modo diximus, ex atractylide, sed longe nobiliore materie, essent adornati? Quare equidem haud satis bene perspicio, quo scilicet pacto, per generalem quendam synonymiam, vel arctiorem affinitatem, ἀτράκτος, ἀντί τῆς ἀτράκτυλίδος, et vicissim, ἀτράκτυλῖς, ἀντί τῆς ἀτράκτε, promiscue sumi, ac, prout libitum, sine vlla distinctione, adhiberi licuerit, ita vt ἀτράκτος nunc significaret ἀτράκτυλῖδα, nunc vero rursus ἀτράκτυλῖς, τὸν ἀτράκτον, quod nempe pro certo et explorato, assumunt benigni nimis nouae istius sententiae Woolhusianae fautores, quum tamen, vt iam monitum, non omni ἀτράκτῳ seu fuso, materiam praebuerit Atractylis; adeo, vt hinc nec nomen semper traxerit ἀτράκτος, ἀπὸ τῆς ἀτράκτυλίδος, nec rursus ἀτράκτυλῖς, ἀπὸ τῆς ἀτράκτε, nec inde vtriusque synonymia, siue, si quis malit, metonymia locum vbique commo-

c) *Antiquitat. Homericar. IV. Cap. III. pag. 303 sqq.* Conf. ANDREAE CIRINO, *de Vrbe Roma, Cap. XLVI. p. 517.*

apud ALB. HENR. DE SALLENGRE, *Noui Antiquitatum Romanarum Thesauri, Tomo II.*

commodum habere potuerit. Scio quidem, idem fere hic ex parte, responderi ad haec posse, quod acute iam olim regeffit SENECA ipse^{d)} de *pyxide aurea et argentea*, proprie tamen primitus a *buxo* sic denominata, item de *charta plumbea*, nec non de *poculis Thericleis*, sic dictis aliisque huiusmodi dictionum periculis; de quibus singularibus ac figuratis loquendi modis alibi iam egimus aliquanto distinctius ac disertius.^{e)} Verum hic longe alia subest ratio, quare nec in hoc specioso licet obtentu, ac uelamento, ullum praesidium ac tutamentum inuenire possit coniectura ista Woolhusiana, audacior sane, quam felicior, quoniam nempe adhuc plane negamus, ueritatis ipsius uiribus impulsu, ἀτρακτον unquam significasse, aut significare posse τὴν ἀτρακτυλίδαν, siue Carduum aculeatum, et ad scarificandos oculos, olim adhibitum; de quo mox pluribus ex instituto, sumus acturi. Sed transeat iam hoc ipsum argumentum, ceu leuius, et ex Grammaticorum scholis desumptum.

In sequenti igitur Argumento tertio, seu ultimo, siue potius primario, totius huius rei cardo potissimum uertitur, quoniam ipsi, me quidem iudice, tantum roboris, tantumque firmitudinis et efficaciae in contrarium inest, ut mihi exinde, propemodum inexpugnabile, uideatur. Ita enim ipse HIPPOCRATES noster, loco illo praecipuo, e *Lib. de Visu*, superius iam producto, sapienter praecepit, postquam nempe prius docuerat, quid cum instrumento illo chirurgico, (quod ἀτρακτον, aliquanto obscurius uocat,) lanis mollissimis Milesiis crispis antea diligenter circumuoluto, faciendum sit: uitandum scilicet ante omnia, artifici chirurgo esse, ne coronam oculi attingat, aut laedat, multo minus usque ad Cartilaginem, hoc est, Tarsum palpebrae, ut recte id explicant Viri docti, perurat; αὐτὴν τὴν στεφάνην τῆς ὀφθαλμοῦ φυλασσόμενος, en ipsa uerba Auctoris notatu certe dignissima! μὴ διακάυσης πρὸς τὸν χόνδρον, hoc est, ipsam oculi

CORO-

d) *Lib. V. de Beneficiis, cap. 13.* ubi vid. LIPS. et IO. FR. GRONOVII, *Not. ad Lib. II. de Benefic. cap. 12. p. 150.*

e) *Observat. Criticar. Lib. IV. cap. 8. p. 343. sq.* et alibi. Conf. IS. CASAVBONI *Not. ad SYETONII Neron. cap. XX. p.*

514. *Edit. Graeu.* item in *Praefatione*, variis IOS. SCALIGERI opusculis postumis a se editis, praemissa, et ipsum ibidem SCALIGERVM, in *Animaduersionibus*, in GUILANDINI *Comment. de Papyro*, pag. 27.

coronam vitando, vel custodiendo, ne usque ad cartilaginem peruras. Haec quidem ille.

Sed quid ista, quaeso, ad ipsam scarificationem? quomodo, obsecro, siue fusus, siue carduus, perurere poterat ipsam Cartilaginem, quum eam tantum vterque natura sua, leuiter lancinaret, aut punctum scarificaret? De alia ergo prorsus re, quam de sola scarificatione, hic quidem loquutum fuisse HIPPOCRATEM, tam ex his ipsis, quam et sequentibus mox verbis, confestim, opinor, palam liquet.

Quod et probe animaduertentes ipse WOOLHVSIVS et Woolhusiani, quorum nimirum oculos hic de vstione, locus, vehementer quasi vrebat, varia ingeniose hinc tentarunt, quo obiectum hunc sibi ingentis molis lapidem commode amolirentur, haecque ipsa HIPPOCRATIS Verba, suae recens natae coniecturae vel maxime contraria, etiamsi inuita et quasi reluctancia, in suam sententiam nunc ad-mota vi, nunc vero blando tactu tractuque, deflecterent. Fuerunt enim ex illis, qui ipsum hunc locum mendi quasi quadam tenebrosa amaurosi, vel aspero trachomate laborare crederent, atque hinc quadam veluti scarificatione critica, vt ita dicam, indigere censerent. ^{f)}

O o o 2

Sed

f) Ita pro vulgato illo, *μη διακαύσης*, celeb. PLATNERO, in *Dissert.* saepius iam laudata, pag. 30. legendum quondam videbatur, *μη διαβήσης*, aliquanto remotiore, si fateri quidem liceat, a priscis literarum uestigiis, scriptura. Vbi tamen facilius meliusque, si necesse, forsan legere potuisset, eodem scilicet sensu, *διαψήσης*, vel *διαψεύσης*: quemadmodum alibi loquutus est ipse HIPPOCRATES: vt mox in antecedenti, de *Haemorrhoidibus*, *Libello*, p. 350. similis plane verbis, sensuque: *καῦσαι*, *φυλλάσσομενος*, *ὥς μη ἄψῃ τῷ σιδήρῳ*, et infra rursus, *Lib. I. de Morb. Mulier.* pag.

484. *ὅπως μη ψεύσης τῆς ὑτέρας*, et aliis locis saepissime: quo et illud, quod ad sensum attinet, spectat, *Lib. de Locis in Homine*, pag. 376. *Tom. I.* *τάμνην δὲ ἄχρι τέτῃς, ἄχρις ἂν τῇ ὅσῃς θίγῃς*, vbi τὸ θίγῃς, idem, ac ψεύσης, vt notum. Sic et PAVLLVS AEGINETA, *Lib. VI. Cap. 18. pag. 83.* *φυλαττόμενοι, τῇ κερατοειδῇ ἄψαδαι χιτῶνος*: item AETIVS, *Lib. VII. Cap. 95. pag. 139. b.* *παραφυλασσόμενος σφόδρα, μη ἄψαδαι τῶν προταφίτων μυῶν*. Vel et perquam commode, pro *διακαύσης*, scribi potuisset, *διακόψης*, sicuti ipse scripserat HIPPOCRATES, *Lib. de Morbo Sacro*, pag. 338. *Tom. II.* *ἢν διακόψῃς τὴν*

Sed fuerunt et alii, qui tutiorem viam ingressi, sensum huius loci duriores, ut quidem videbatur, blandiore explicatione et mitiori circumscriptione, non nihil emollire studerent, atque istam vstionem, adpersa veluti frigida aqua, temperare allaborarent. g) Frustra et incassum profecto utrique! Neque enim quidquam in his ipsis HIPPOCRATIS Verbis, moliendum, neque quidquam in iisdem, molliendum: sed omne illud potius sensu consueto, obuius et vfitato, de vstione, accipiendum et interpretandum; praecipue, quum eodem semper verbo alibi vtatur HIPPOCRATES, vbi de vstionibus, per cauteria factis, sermo ab ipso habetur. h)

Nimirum, ut rem paucis nunc expediam omnem, non tam in hoc quidem loco, scarificationem oculorum solam descripsit HIPPOCRATES, quam potius eorundem vstionem; neque etiam instrumentum nobis vllum indicauit, quo ipso scarificatio ista perageretur, quod AEGINETA et aliis, ab effectu scilicet, vocatur vulgo βλε-

φάρ-

την κεφαλὴν, atque sic etiam alibi frequentius. Verum in hoc quidem HIPPOCRATIS loco primario, nec διαβήσης, legendum esse, nec διαψύσης, nec denique διακόψης, nec alio modo, sed potius διακαύσης, ut in omnibus quidem Codd. tam impressis, quam manu exaratis, constantissime scriptum exhibetur, iam plenius luculentiusque, in sequentibus, docebitur.

g) Sic enim perquam callide et ingeniose de his ipsis uerbis Hippocraticis controuersis, commentatur cl. MA VCHART, in *Dissertat.* pag. 8. τὸ μὴ διακαύσης πρὸς τὸν χόνδρον, metaphorico sensu accipiendum erit, quatenus nimia isthaec laceratio exquisitum, quasi vstionis sensum inferat: vel ad alteram operationis partem, et appendicem spectat, quatenus Hippocrates iubet, si opus sit, post abrasionem, adhiberi etiam ferramenta, minime, seu leuiter, candentia, quibus palpebrae intus debeant inuri, maxime, in Casu durioris

occallescentiae. Haec ille V. C. vbi in postremis, proxime a vero absuit, sed blando praeiudicio auctoritatis Woolhufianae, illectus, illud amplecti noluit: Conf. cl. PLATNERI *Diff.* pag. 30.

h) Sic *Lib. de Intern. Affect.* pag. 230. *Tom. II.* μετὰ φυλακῆς πολλῆς, καὶ τηρέσιος, ὅπως μὴ πέρην διακαύσης, et *Lib. de Artic.* pag. 767, ὅταν δὲ διακαύσης ἐς τὸ πέρην, κ. λ. quo et illud pertinet, *Lib. II. de Morbis* pag. 55, φυλασσόμενος, μὴ κατακαύσῃ τὴν φάρυγγα: et paullo post, ibidem, pag. 69. φυλασσόμενος, ὅπως μὴ κατακαίηται, atque ita alibi saepissime, ut ex *Libb. de Articul. Vulner. Capit. Officina Med. Morbis*, et aliis, passim luculenter admodum patet. Res enim doctis satis nota. Ita et PAVLLVS AEGINETA, *Lib. VI. Cap. 42.* pag. 87. b. πεπυραντῶμένοις καυτηρίοις διακαῦσαι, quomodo et alibi saepius, item AETIVS, ALEXANDER TRALLIANVS, ORIBASIVS et alii.

φαρόξυστον, vel et βλεφαρόξυστρα, i) sed quo potius ipsa vstio perficeretur, nempe καυτήριον ὀφθαλμικόν, siue βλεφαροκαυτήρα, id vero solum manifestius significauit. Quum igitur ipsa illa palpebrarum vstio, praesertim male administrata, plus omnino damni ac periculi inferre posset, quam scarificatio ista tametsi etiam negligenter peracta: ideo hic prudentissime, pro more solito, cautiones adiecit necessarias, ad quas potissimum in opere ipso, diligenter respiceret Chirurgus ocularius, palpebras prius scarificaturus, et post, mox vsturus. vtrumque enim in hoc ipso, de *Visu, Libro*, semper fere arcte coniunxit, et in antecedentibus his verbis, pag. 352. τὰ βλέφαρα λεπτόναι ζύων, καὶ, ἢν δοκέει προσδέεσθαι, (vel προσδέχεσθαι, quomodo et legi posset, vti statim sequitur,) ἐπικαίων ἐνδοθεν, μὴ διαφανέειν, κ. λ. et maxime mox sequentibus, post hunc ipsum nostrum locum praesentem, verbis: ὕστερον δὲ τὸ τῆς ζύσης, καὶ τὸ τῆς καύσης, ὅταν αἱ ἐσχάραι ἐκπέσωσι, post peractam autem scarificationem iuxta et vstionem, quando ipsae crustae exciderint. Qui praesertim locus, notatu certe

O o o 3

dignissi-

i) Inde emendandus MATTH. SILVATICVS, in *Pandect. Med. Cap. C. fol. 35. b.* scribens: *Blefarunxista Instrumentum, ad scalpendum palpebras*, legendum nempe, *Blefaroxystra*, vel *Blefaronxystra*, scilicet diuissim, βλεφάρων ξύστρα, quod et alias dicitur βλεφαροξύλη, vel βλεφάρων ξυήλη, vt et βλεφαροσαρώριον: Ceterum de hoc βλεφαροξύστρ Instrumento, vid. MAVCHART. p. 8. et PLATNER. pag. 32. vocabatur vero istud instrumentum *Blepharoxyston*, etiam ῥινομήλη, vt patet ex eodem SILVATICO, fol. 146. b. etsi rursus vitiosissime ita ibi scriptum: *Rinomelis, Ribinomelis, græc. ferrum Instrumentum asperi capitis, vt Lima, qua asperitas palpebrarum eradicatur*, DEMOSTHENES, Medicus nempe Vetus ocularius celebr. hodie deperditus, vid. tamen passim AET.) quae palpebrarum crassior asperitas ab eodem DEMOSTHENE dicitur παχύτης βλεφάρων, vt nempe

certissime legendum apud eundem SILVAT. fol. 139. pro monstrosis illis: *pachides Beleseron*, et rursus fol. 162. *Trachites Bleffaron*, DEMOSTHENES, est asperitas palpebrarum in interioribus, nempe pro τραχύτης βλεφάρων. Haec obiter. Sed et σπαδομήλη idem dicitur Instrumentum: sic enim idem corruptus valde Auctor, fol. 157. *Spatomelle est oculis raspatorium*: item λευρομήλη, vt et κυαθισκομήλη, et κυαθισκον, de quibus vid. eundem, fol. 55. pag. 144. b. item AET. Lib. VII. C. 82. pag. 137. b. praesertim autem REINES. *Var. Lect. Lib. III. C. 16. p. 673.* et PAUL. LEOPARD. Lib. XIII. *Emend. Cap. 2. idem RHOD. ad SCRIBON. LARG. pag. 81.* Denique et ista illius Instrumenti nomina, quanquam rarius, occurrunt, nempe βλεφαροεινάριον, item βλεφαροκόρηθρον, et ὀφθαλμορίνιον. Sed haec obiter, haftenus.

dignissimus; manifestissime, opinor, ostendit, antecedentia illa: *μὴ διακαύσης πρὸς τὸν χόνδρον*, non de alia prorsus re, quam quidem de sola vstione, ope cauterii mitioris, facta, esse intelligenda. ^{k)}

Igitur, me quidem iudice, *ἄτρεακτος*, in hoc HIPPOCRATIS loco, nec fusuū significat, nec telum, nec mali in naue, partem, nec hastae lignum, nec radium textorium, nec denique Carduum aculeatum, nec quidquam aliud, quod vulgo sub isto *τῷ ἄτρεακτε* nomine, comprehendi solet: ^{l)} sed potius certam quandam Cauterii, lignei forte, speciem, qua in vrendis palpebris, aliisque delicatioribus corporis partibus, vfi olim forsan fuerint veteres Chirurghi. Id autem, ne sine idoneo ac venerabili teste, perhibeatur, et sicut Carduus ille Woolhusianus, in volantes pappos quasi euanescat; en grauiissimum et simul liquidissimum ipsius HIPPOCRATIS nostri testimonium, ex quo nempe protinus manifestissime constabit, *ἄτρεακτον*, idem interdum esse, ac Cauterem, seu instrumentum Cauterium: quod nempe, ut cum poeta Christiano loquar: ^{m)}

Punctisque feruens stridulis,

Sparsim per artus figitur.

Legitur vero iste memorabilis oppido locus, *Libro, de internis Affectionibus*, pag. 236. Tom. II. Opp. per LINDEN. vbi de difficili et molesto Morbo hepatico, tandem, per ignes et cauteria, expugnando, sermo habetur, his quidem Verbis luculentissimis: *Καῦσαι*

^{k)} Sic et rursus, post haec, pag. 354. *τῆς καύσεως τῶν βλεφάρων* clare meminit: ὕστερον δὲ τὸ βλέφαρον ἐπικαῦσαι μὴ διαφανέσι, φυλασσόμενος τὴν φύσιν τῶν τριχῶν: postea palpebram inurito, non candentibus ferramentis, vitando naturam, vel generationem, seu prouentum pilorum: vt alios iam plures eiusmodi locos taceam.

^{l)} Vid. Glossaria HESYCHII, POLLVCIS, SVIDAE, GALENI, FOESSII, STEPHANI et aliorum; add. PROCOPII Gothicor. Lib. IV. pag. 329. Conf. et cl. MAVCHART. *Dissertat.* pag. 7. item cl. PLATNERI *Dissert.* pag. 26.

praesertim autem IO. BOD. a STAPEL *Comment. ad THEOPHRASTI Hist. Plant. Lib. VI. cap. 4. pag. 617.* et SALMAS. de *Homonym. Hyles Iatr. Cap. LXXVI. pag. 105.* item WASSE et DVCKER. ad *THUCYDID. Lib. IV. C. 40. pag. 263.* BARNES. ad *EURIPID. Rhes. v. 312. pag. 117.* et MVRETI *Var. Lect. Lib. XIV. C. 18.*

^{m)} PRVDENTIO nempe, in *peristephan. Hymn. V. 227.* licet ibi, ipsi de salis candefacti excussu cum dolore summo coniuncto, sermo sit.

σαι δὲ ἐν πυξίνουσιν ἀτρακτοῖσι, βάπτων ἐς ἔλαιον ζέον, hoc est: *urito autem, istam scilicet elatiorem hepatis eminentis regionem, instrumentis cauteriis, e buxi ligno paratis, in oleum feruens tinctis*; ita enim omnino vertendum, sensu ipso exigente, non, vt vulgo fit, sine com-
moda sententia: *Urto autem per buxeos fusos, in oleum feruens tinctos, siue, FOESIO interpretante: per buxeos autem fusos oleo feruenti in-*
tinctos, vstionem facito. Τὰς ἀτρακτὺς enim hoc quidem in loco, non vulgares muliercularum fusos significare posse, quibus quippe hic nullus plane esse potest locus; sed potius per instrumenta quaedam chirurgica adurentia, siue cauteria, reddi debere, cuius credo, a partium studio alieno, ac praeiudicatis opinionibus libero, illico manifestissime apparebit. ⁿ⁾ Interea vero vehementer miror, hunc ipsum singularem plane HIPPOCRATIS locum nec a diligentissimo alias FOESIO, in *oeconomia*, adnotatum, nec a quoquam alio, quantum equidem sciam, fuisse obseruatum, ^{o)} nam nec ipse BOD. a STAPEL illius meminit, pag. 232. *Comment.* in THEOPHRAST. vbi tamen omnia fere Instrumenta e buxo olim parata, diligentissime recenset; quum tamen unicus forsan sit ac solus, ex quo liquido colligi et intelligi possit, quid proprie significet vox ἀτρακτὺς, in hoc ipso, quem hucusque pertractauimus, obscurissimo loco, e *Libello, de Visu*, deprompto. Quomodo autem ex buxo, alioque duriore ligno,

ⁿ⁾ Inde ingeniosa quidem est cl. MAVCHARTI coniectura, pag. 7. *Dissert.* legentis, in *Glossario* GALENI, pro vulgatis, ἀτρακτον, τὸν εἰς ἱερεγγόν, χρῆσιμον, potius, χειρουργικόν: vera tamen non est; legendum enim ibi haud dubie, ἐρεγγόν, seu, quod idem, εἰρεγγόν, Ianificium. Ita XENOPHON, *Lib. V. Hist. Graec.* pag. 443. ἡ γυνὴ εἰρεγγῶσα, et de *Lacedaemon. Republ.* pag. 534. εἰρεγγεῖν ἀξιῶσι: atque sic alibi saepissime, quod et apud alios Auctores frequentissime, vt notum, occurrit. Conf. WASSE et DVKER. ad THVCYD. *Lib. IV.* pag. 263. ἔγια autem atque ἱεγῖα, in Veteribus

Codd. interdum confundi, obseruauit ad DIODOR. SICVL. *Lib. V.* pag. 367. *Tom. I.* celeb. WESSELINGIUS.

^{o)} Vid. tamen IO. MARTINI *Comment.* in hunc ipsum HIPPOCRATIS, de *Intern. Affect. Librum*, pag. 314. quem et de vstionibus, apud Veteres, vid. ibidem, pag. 279: inprimis autem VID. VI-
DII *Chirurg. Lib. IV. Cap. XI.* pag. 103. RESTAVRANT. de *Inustionibus Hippo-*
crat. Potissimum autem THOM. FIENI *Lib. V. de Cauteriis Veterum et recentio-*
rum, vt alios plures iam taceamus: vid. tamen FREIND. *Hist. Med.* pag. 386. *Opp.*

ligno, paratum ac formatum fuerit illud ipsum singulare cauterium, cuius hic, ceu suo quidem tempore, notissimi, paucis tantum, et obiter quasi, meminit noster HIPPOCRATES, id certe in tanta Veterum Chirurgorum penuria, haud satis hodie liquet: p) ideo vanis hic ac veri inanibus coniecturis nimis indulgere, noster non fert animus. Ceterum vero AEGINETA, *Lib. VI. cap. 47. pag. 88.* vbi de eadem Hepatis affecti vstione agit, pro πυξίνοις illis ἀτράκτοις Hippocraticis, commendat in eundem vsum, καυτήρια λεπτὰ πυρηνοειδῆ, *Cauteria tenuia rotundiora et oliuae aut nuclei formam obtusiores habentia*, quae inde forsan eadem esse videntur, ac isti quidem ἀτράκτοι πυξίνοι. Sed haec obiter.

Interea tamen his tenebris quasi Hippocraticis magna ac luculenta lux, opinor, affulgebit ex sequentibus singularibus PAVLLI AEGINETAE, AETII AMIDENI et CAELII AVRELIANI locis, ex quibus liquido nempe apparet, *radices Aristolochiae longae*, item *Struthii*, seu *Lanariae*, *Gentianae*, aliarumque plantarum, oleo feruenti prius intinctas, vicem olim mitiorum Cauteriorum pariter praestitisse, quemadmodum hic buxea instrumenta oleo etiam feruido imbuta, cauterii blandioris vsum praebuisse, traditum fuit ab HIPPOCRATE nostro. Conf. huc inprimis THOMAE REINESII *Var. Lect. Lib. III. Cap. I. p. 311.* vbi et de veterum Medicorum et Chirurgorum ἰσχαίς, seu ὀσχαίς et Εἰσὶς Latinor. agit, quibus cauterium loco, olim vtebantur, vti patet ex ALEXANDRO TRALL. *Lib. XI. pag. 625.* AET. *Lib. VII. Cap. 91. p. 138. b.* THEODOR. PRISCIAN. *Lib. II. Cap. 21.* GARIOPONTO, *Lib. I. Cap. 10.* inprimis AEGINETA, *Lib. VI. Cap. 49. pag. 88.* aliisque. Conf. huc praesertim CANGII *Glossar.*

p) Qua de insigni veteris chirurgiae iactura, iure conqueritur Vir summus, THOM. REINESIUS, *Lib. III. Var. Lect. Cap. 16. pag. 673.* Quam tamen nuperrime refarcire praelare studuit celeb. COCCHIUS, edendo Florentiae, 1754. partem primam *Collectionis NICETAE Veterum Chirurgorum Graecorum*, in qua multa profecto lectu et scitu digna habentur.

Vtinam vero et reliqua illius praestantissimae Collectionis pars adhuc maior, proxime sequeretur; tum sane haud dubie eximium prorsus et utilissimum Veteris Chirurgiae Thesaurum habituri essent omnes Veteris Medicinae cultioris et solidioris studiosi amatores. Sed haec obiter.

Glossar. Graec. pag. 522. et pag. 1650. eiusdemque Glossar. Latin. Tom. III. pag. 135. item SALMASII Exercitat. Plinian. pag. 127. et FREIND, Histor. Med. pag. 386. Opp. per celeb. 10. WIGAN curatorum.

Audiamus igitur ipsum PAVLLVM AEGINETAM, ita quidem vulgo loquentem, *Lib. VI. Cap. 44. pag. 87. b. πρακτικώτατον βόηθημα τοῖς ἐμπύοις ἢ καύσις ἐυρηται· δεῖ ἔν τῆς μακρᾶς ἀριστολοχίας τὴν ῥίζαν ἐλαίῳ δεύσαντας, ἐντιθέναι αὐτοῖς πεπυρακτωμένας τὰς ἐσχάρας κ. τ. λ.* *Efficacissimum auxilium pectore suppuratis, vstio inuenta est. Oportet igitur Aristolochiae longae radice oleo (feruenti scil.) prius imbuta, ignitas crustas ipsis ingerere. 9)*

Eandem

q) Plurimum hic conqueritur IANVS CORNARIVS, in *Dolabellis*, ut vocat, in PAVLL. AEGINET. pag. 733. *Tom. I. Med. Art. princip. Vett.* per HENR. STEPHAN. de ingenti quidem huius loci obscuritate ac deprauatione, putatque inde, etsi timide et verecunde, ita quasi scriptum olim fuisse ab ipso nempe Aegineta: *δεῖ ἔν τῆς μακρᾶς ἀριστολοχίας τὴν ῥίζαν ἐλαίῳ δεύσαντας ἐντιθέναι καυθεῖσι, τοῖς πεπυρακτωμένοις καυτηρίοις εἰς τὰς ἐσχάρας.* hoc est, ipso interpretante: *oportet igitur Aristolochiae longae radicem oleo imbutam, ipsis per ignita cauteria, vstis, in crustas indere*: quibus deinde subiungit sequentem explicationem: *Videtur autem Aristolochiae longae radicem oleo imbutam, in crustas propterea indere, ut et inustas crustas mitiget oleum, et ipsa radix, sua tenuium partium facultate, quam simul extersoriam habet, pus extractum extergeat.* Sic quidem ille. Verum haec omnia, quod tamen pace manium Viri, alias de bonis literis meritissimi, dictum sit, cauterio, ut ita dicam, critico feruenti inurenda et penitus abolenda sunt, quoniam

et AEGINETAE et aliorum veterum chirurgorum menti e directo plane aduersantur. Nam, quomodo quaeso escharis, siue crustis, non profundis, sed tantum in superficie cutis, aut carnis, excutatis, ut ipse hic praecepit AEGINETA, radices illae inferi, et implantari quasi potuerint, et quem potissimum in finem? id equidem fateor, me comprehendere haud posse, nec quisquam alius facile illud comprehenderit, aut explicuerit. Interim tamen non nego, mendosum non nihil et empyum quasi esse hunc ipsum AEGINETAE locum, atque inde medela indigere; praesertim, quum quidam Vett. Codd. hic habeant, *αὐτῆς πεπυρακτωμέν.* Ut obseruauit ipse CORNARIVS et nos, post ipsum, in MSt parisiensis, deprehendimus. Inde hunc fere in modum scripsisse olim ipsum AEGINETAM, nunc suspicamur: *δεῖ ἔν τῆς μακρᾶς ἀριστολοχίας τὴν ῥίζαν δεύσαντας, ἐντιθέναι, αὐτῆς πεπυρακτωμένης, τὰς ἐσχάρας, h. e. Oportet Aristolochiae longae radicem oleo feruenti prius intingere, sicque ea feruesceta, crustas infigere, seu imprimere; sen-*
fu

Eandem quoque in Empyicis, medendi et inurendi methodum obseruat AETIVS AMIDEN. *Lib. VIII. Cap. 64. pag. 170. b.* omiffa tamen illa ipsa Aristolochiae longae radice. Manifestius autem in eam ipsam rem, Archigenes, apud eundem, et Aristolochiae et struthii radicum, Cauterii loco, adhibitarum, his meminit, *Tetrabibl. III. Serm. IV. Cap. 3. pag. 583. Tom. II. Med. Art. princip. Vett.* vbi tamen admodum doleo, huius quidem in AETIO, partis, tantum latinam hodie Versionem extare, graecis ipsis nondum, vt notum, publicatis: Sed en ipsa illa verba latina: *Veteres, inquit Archigenes, etiam vftione, in Ischiadicis, vfi sunt, tum per cauteris ferreos, igni candefactos, tum per struthii et Aristolochiae radices, coxae iunctura in altum perusta, itemque cruri, per intervalla quaedam, circa dolentes maxime locos, cauteris admoto.* Haec vero cuncta et inprimis hic ipse perquam notabilis AETII locus, apprime inferuiunt explicandis illis CAELII AVRELIANI obscurissimis haftenus verbis, *Lib. V. de Morb. Chron. Cap. I. pag. 554.* Alii denique ex radice herbae, quam struthium vocant, loca ulcerari praecipunt: *Vsta etenim Radix, concepta flamma, cuti appofita, pustulationem necessario facit.* Ibidem, paucis interiectis, mox aliam proponit methodum Cauterii, ex eo ipso struthio parandi, a prior, plane diuersam: *Tabulae tiliari apponentes struthium herbam, concidunt in breues particulas, ac deinde ferramento igneo singulas partes oleo tingentes, accensas imponunt tabulae scilicet tiliae: hoc secundo, vel tertio facientes, per intervalla, donec materia carbonefcatur, atque pustulas cutis efficiat.* Haftenus CAELIVS AVRELIANVS: qui et in antecedentibus, pag. 553. de oleo per cauteris ignitos calefacto et corpori applicato, tractat. Illud autem interea nunc ex his, certum esse arbitror ac manifestum, HIPPOCRATEM scarificatis modo palpebris mox applicuiffe cauteria

fu perspicuo. Melius enim πεπυρακτωμέν. construitur cum ἀριστολοχίας seu ῥίζης, quam cum ἐσχάρας. Ita Cap. 42. πεπυρακτωμένοις καυτηρίοις, dixit, et rursus, Cap. 48. καυτηρίω πεπυρακτωμένω: Conf. AET. *Lib. VII. Cap. 88. pag. 138. et Cap. 89.* Nam πεπυρακτωμένας ἐσχάρας, vix putem, bene

graece dici posse. Ceterum ἐντυθέναι ἐσχάρας hic scripsit, quomodo mox Cap. 47. ἐσχάραν τιθέντες, et alibi. Ipse quoque HIPPOCRATES dixit *Lib. de Artic. p. 769. ἐσχάρην ἐνδέχεται ἐνθέναι*, vt et AETIVS. Sed haec sufficiant.

cauteria non ferrea quidem candentia, ^r) sed lignea potius calentia, mitiora, ex solida et ignis patientiore buxo, aliove duriore ligno, aut radice crassiore ac tenaciore, parata, ^s) istaque maioris prouidentiae et diligentioris cautionis causa, ne nimis vehementer scilicet adurerent ipsas teneras et sensiles admodum palpebras, lana Milesia, crispa, puraque, prius curiose circumuoluisset. ^t)

P p p 2

Inde

^r) Quod scilicet clarissime patet ex hoc ipso, de Visu, libello, ubi bis iubet HIPPOCRATES, in hac delicata oculorum Chirurgia, scarificatas modo palpebras ἐνδοθεν ἐπικαίειν μὴ διαφανέσιν p. 352. et rursus, p. 354. βλέφαρον ἐπικαῦσαι, μὴ διαφανέσι, scilicet σιδηρείοις, quod semper hic subaudiendum, bene obseruante FOESIO, in oeconomia, pag. 98. ubi plura loca collecta exhibet. add. GORRAEI Defin. Med. pag. 109. Ista vero σιδήρεια μὴ διαφάνεα, CAELIVS AVRELIANVS, Lib. III. de Morb. Chron. c. 4. p. 451. inde vocasse videtur cauterēs frigidos, haud frigide, nisi fallor, male autem ibi legit ALMELOVEENIVS, rigidos, pag. 644. Ita enim manifeste ac perspicue THEODORVS PRISCIANVS, Lib. I. cap. 20. pag. 40. Quae ignis non poterunt sustinere tormenta. [Sic hic vocat cauterēs ignitos, de quibus in antecedentibus dixerat] frigidō rectius Cautere hoc utimur, qui frequenter a nobis adhibetur, profuit. Vbi et mox ipsum modum eiusmodi cauteris frigidi parandi, accuratius docet, qui ibi legi commodè potest: nam paullo ille fusior est, quam ut totus huc transcribatur. Ignea igitur cauteria ferrea hic prohibuisse HIPPOCRATEM, lignea contra, ceu tutiora et tolerabiliora, prae illis saeuioribus, ad vsum commendasse potissimum, ex his nunc abunde, putem, constabit.

^s) Huc illa PLINII, Lib. XVI. cap. 16. In igne quoque Buxo duritia, quae ferro, nec flamma, nec carbone vrili. Conf.

THEOPHRASTI Hist. plant. Lib. V. cap. 4. p. 517. et ibi IO. BOD. A STAPEL, item ad Lib. III. cap. 15. pag. 232. Fortè autem, si conicere non nihil liceat, hic per hos ipsos πυξίνης ἀτράκτης intellexerit HIPPOCRATES illas ipsas etiam Aristolochiae longae radices, in Cauterii vsum adhibitas, ut supra probauimus, praesertim, quum eas interne πυξοειδεῖς, seu buxæ colore praeditas esse, manifesto scribat DIOSCORIDES, Lib. III. cap. V. Vid. inprimis IO. BOD. A STAPEL, ad THEOPHRAST. Hist. plant. L. IX. cap. 13. pag. 1108. πυξινον autem idem saepe esse, ac colore buxæ tinctum, ex Lexicis notissimum.

^t) Obiicit quidem ex his, sequentia cl. MAVCHART. Diff. pag. 8. Minime tamen hinc consequitur, Hippocratem in hac razione et attritione palpebrarum, vsum fuisse telo, ferreoue Instrumento candenti et ignito, quum vel sola lanæ circumuolutio repugnet, quae hinc incensa, palpebris et oculo periculosam intulisset inflammationem. Haec quidem satis ingeniose satisque speciose: Sed facilis admodum contra hanc obiectionem, erit responsio, ad vanos istos quidem metus leuandos, immo penitus, ut arbitror, tollendos, dum enim Cauteria illa buxæ potius, ac lignea, aut ex solidioribus radicibus parata, quam ignea, aut ferrea, calebant magis, quam calebant, atque oleo tantum feruenti intincta, aut alio modo calefacta erant, illa lana crispa istis circumuoluta, nec ipsa adu-

ri

Inde ergo iam abunde liquidoque cunctis, opinor, patebit, incognitam quidem HIPPOCRATI olim haud fuisse ipsam oculorum rasuram, seu scarificationem: Instrumentum autem ipsum chirurgicum, quo illa perageretur, nequaquam hic ab ipso descriptum, multo minus vero Carduum aculeatum, ipsius loco, adhibitum esse: Sed e contrario, oculorum vstionem, vtpote, propter metuenda inde damna ac pericula, maxima cum circumspectione, peragendam, diligentissime ab eodem hic fuisse enarratam, et ipsum quoque cauterium, ἀτράκτον dictum, ad istam quidem Chirurgiam oculariam commodum et idoneum, simul indicatum. ^{u)} Quare omnis iste HIPPOCRATIS locus, haecenus illustratus, rectius fortassis, nisi admodum fallor, in posterum, ita erit latine vertendus:

Quum

ri poterat, nec oculum ipsum adurere: quin potius, e contrario, perquam comoda et apposita erat, ad ipsum quidem oculum a vehementiore feruore et altiore inprimis Cauterii ipsius impressione, tanto certius defendendum, adeo, vt nullum plane exinde periculum metuendum, eo maior autem securitas speranda esset. Hoc est, quod sic CELSVS elegantissime, pro more solito expressit, *Lib. VII. cap. XII, 6. Necessarium est, tenui ferramento adurere, quod spathae simile, quasi transcurrere, non imprimi, debet.* Sic igitur et hic cauteria illa tenuia e buxo parata, et feruenti oleo intincta, ac praecautiois gratia lana tenerrima nonnihil obuoluta, palpebras transcurrere tantum leuiter debebant; non autem iisdem altius imprimi. Quid ergo nunc clarius? Conf. HIPPOCRAT. de *Haemorrhoid.* pag. 350. Tom. II. et IO. BOD. A STAPEL, ad THEOPHRAST. de *Hist. plant. Lib. IV. cap. 12.* pag. 473. seqq. item FOES. in *Oecon.* voce καυτήρ.

^{u)} Ita vel apud PLVTARCHVM, vel APPIANVM, aliumue Auctorem veterem historicum, (locus enim ipse, quod

vehementer certe doleo, memoriae, alias satis fidae, iam non succurrit,) de saeuo quodam Tyranno, me olim legere memini: τοῖς πεπυρακτωμένοις ἀτράκτοις ἐκκαῦσαι τὰς ὀφθαλμοὺς, Ignitis instrumentis exurere oculos: vbi pariter per τὰς πεπυρακτωμένους ἀτράκτους, intelligenda ignita Cauteria, non autem de *fusis* vulgaribus, accipiendum, vt et ibi perperam latine redditum erat. Conf. EVSEB. L. I. de *Vit. Constant.* Cap. 58. p. 438. Inde vero perquam luculentam lucem accipere ipsum hunc nostrum locum Hippocraticum aliquanto obscuriorem, nemo non opinor, protinus videbit. Ceterum huc et nonnihil spectat, quod scholiastes SOPHOCLES, ad *Antigon.* 1092. illas κερκίδων ἀκμὰς, seu radios textorios, quibus crudeliter excaecasse binos suos filios innocentes dicitur phineus, impiae nouercae nimium credulus, scite explicuit, διὰ σιδηρῶν ἀτράκτων, per *fusos ferreos*, seu potius, *instrumenta ferrea*. Vnde vero simul manifestissime patet, quam πολύσημος et πολωνύμος sit ea ipsa Vox ἀτράκτος: vt paullo superius iam iam opportune monuimus.

Quum vero palpebras oculi radere velis, prius istae radendae sunt: deinde illis applicandum cauterium instrumentum, lana Milesia, crispata, pura obuolutum, ita, ut ipsam oculi coronam vites, ne usque ad Cartilaginem peruras.

Atque haec quidem solo veritatis studio impulsī, non vana obloquendi cupidine illecti, nec famae posthumae clarissimorum Virorum, quos propter sua praeclara merita, merito veneramur, quidquam temere detrahendi foeda libidine agitati, qui quippe teterrimus minuti ac plebei animi morbus a moribus nostris alienissimus, data hac commoda occasione, commentari de hoc ipso arduo et obscuro argumento, volumus.

Animus quidem nunc erat, per omnes Medicos Veteres graecos et latinos, libere diuagari, atque ex iis singulis, diligenter ostendere, quomodo ipsi, et quibus potissimum instrumentis Chirurgicis, eam ipsam oculorum scarificationem peregerint: item et simul antiquissimam huius Chirurgiae oculariae originem, ab ipsa Natura creatrice, ut cum poëta sic loquar, primitus monstratam, curatius aliquanto euolvere. Sed chartae temporisque angustia prohibente, eam quidem tractationem non iniucundam forsan nec incuriosam futuram, in aliud commodius tempus reiicere, iam necessitate urgemur; quod vero, ubi proxime, ut spes quidem est, nacti fuerimus; tum diligentius accuratiusque, pro nostris nempe modicis viribus, agemus de *Scarificationis Oculorum Historia, Antiquitate atque Origine.*

EXERCITATIO SEPTIMA.

DE

SCARIFICATIONIS OCVLORVM
HISTORIA ANTIQVITATE ET ORIGINE.

Polliciti nostri adhuc bene memores, occasione ita opportune ferente, praemissae nuper nostrae *Commentationi de scarificatione atque Vstione oculorum*, ab HIPPOCRATE descripta, ea nunc hic subiungemus,

mus, quae de istius *scarificationis Oculorum Antiquitate atque Origine*, adhuc dicenda restant. Nobis enim iniquis temporis chartaeque spatiis, tum quidem iuuitis, fateor, exclusis, Telam istam semel ibi exorsam, contra Votum plane nostrum, detexere haud licuit.

Quare promissum istud decenter exsoluturi, iam per paucos illos Veteres Auctores Medicos Graecos, benigniore fato, ex multis, vel iniuria temporum, vel incuria hominum, olim deperditis, adhuc nobis relictos, citato quasi gradu, libere eamus, atque ex singulis liquido ostendamus, istam oculorum scarificationem ipsis nec incognitam fuisse, nec inexercitatum; sed potius, summa urgente necessitate, frequentius adhibitam. Minime enim cum Celeb. WOOLHVSI^O, eiusque discipulis clarissimis nonnullis, existimandum est, raram tantum apud Medicos Veteres graecos et latinos, ab HIPPOCRATIS quidem aevo, aliquanto remotiores, occurrere istius chirurgiae oculariae mentionem, atque non nisi GALENO, PAVLLO AEGINETAE et CORNELIO CELSO, eam fuisse commemoratam: ^{a)} Contrarium enim ex mox producendis testibus grauissimis, manifestissime, ut equidem arbitror, nunc patebit.

Audiamus ergo, si lubet, ita primum loquentem ipsum DIOSCORIDEM: ^{b)} Παράτρίβεται δὲ αὐτοῖς τῶν Ὀλύνθων φύλλοις, καὶ τὰ συνώδη καὶ τραχέα τῶν βλεφάρων, h. e. *perfricantur quoque ipsis ficuum foliis, tam ficosae, quam asperae palpebrae*. Alibi vero adhuc luculentius: ^{c)} Ζύειν δὲ δεῖ τὰ τετυλωμένα, ἐκτρέφοντα βλέφαρα, σὺν φύλλοις τραχέ-

^{a)} Ita B. PLATNERVS, in Differt. de scarificatione oculorum, p. 32. scribit: hanc chirurgiam sequentibus, post HIPPOCRATEM, temporibus, non frequenter exercitatum fuisse, suspicamur. Post CELSUM, GALENUM, seu obscurum potius Libri obscuri de Oculis, Auctorem, atque imprimis PAVLL. AEGINETAM, allegat. Deinde perquam dubitanter, haec demum subiungit: Num praeter hos, alii Graecorum Latinorumque Medicorum, hanc enchiresin commendauerint? nobis haud adeo

certo constat. Idem fere antea statuerat Cl. MAVCHART. in Diff. de ὀφθαλμοζύσει, pag. 8. item Cl. HAMPE, quem vid. ibidem, pag. 9.

^{b)} Lib. 1. de Materia Medica, Cap. 185. pag. 87.

^{c)} Lib. 1. de Medicament. facile parabil. Cap. 47. pag. 12. ibi vero vulgo male προ σὺν φύλλοις, legitur ἰς, ut recte in margine notatum. Σὺν φύλλοις rectius hic habent AEGINETA, AETIVS, ALEXANDER TRALLIANVS et alii.

τραχέειν, ἢ σμιλίῳ, ἢ σηπίας ὀτράκω, σχηματισθέντι εἰς κολλύριον, *Callosas autem palpebras, euersas, radere, seu scarificare oportet, fici foliis asperis, aut scalpello subtili, aut sepiae testa in collyrium conformata. Quae postrema iam supra, alio loco, ^{d)} in hunc usum, ita commendauerat: Τὸ δὲ ἀπὸ τῆς σηπίας ὀτράκων, σχηματισθὲν εἰς κολλύριον, ἀρμόζει πρὸς παγὰ τριψιν τραχέων βλεφάρων, sepiae testa, in collyria efformata, commodum praestat usum ad frictionem, seu scarificationem asperarum palpebrarum.*

DIOSCORIDEM, praestantissimum istum Veterum Herbariorum, ordine, iam sequatur GALENVS, loco isto perquam memorabili, ^{e)} καταστάντες ἐν εἰς ἀπορίαν τῆς τοιαύτης ἐπιπλοκῆς τῶν παθῶν, (scil. τραχωμάτων, κ. τ. λ.) οἱ Ἱατροί, μόνην ἐξευρήκασι βοήθειαν, ὡς ἐν ἀπόροις, ἐκτρέφοντες τὰ βλέφαρα, διαρρύπτειν αὐτὰ, καὶ ἀποσμᾶν ἀνευ φαρμάκων. Ἐνιοὶ μὲν αὐτῷ τῷ κυαθίσκῳ τῆς σμίλης, ἐπιπολῆς ἀποξύοντες, ^{f)} εἴτα σπόγγῳ μαλακῷ, τὸ ἀπορρέον ἐκλαμβάνοντες, προσέλλοντές τε τὰ βλέφαρα, τὸ λοιπὸν τῆς τραχύτητος. Ἐνιοὶ δὲ καὶ δέρματα θαλαττίων ζώων τινῶν, ἐπιπολῆς τραχέα, συμμέτρως, εἰς τὴν τοιαύτην χρεῖαν, παραλαμβάνουσι· εἰς δὲ τις τῶν ἐμῶν διδασκάλων, καὶ κολλύριον ἐποίησε διὰ κισσῆγώς, καὶ τὰς τραχύτητας ἀπερρύπτειν, ἐκτρέφον,

d) *Lib. II. de Mat. Med. Cap. 23. pag. 94.*

e) *Lib. IV. de Compos. Medicamentor. secundum Locos, Cap. 2. pag. 425. Tom. XIII. Opp. per RENAT. CHARTE- RIVM.*

f) *Κυαθίσκῳ τῆς σμίλης*, legunt hic pleraque Vetera Exemplaria, itaque rectius verti deberet, *concaua scalpelli parte*, aliud enim est *μήλη*, aliud *σμίλη*, licet frequentissime inter sese confundantur. *μήλη* enim est *specillum*, *σμίλη* autem *scalpellum*. Vid. huc imprimis CL. COCCHII Not. ad ORIBAS. de Fractur. in Collect. Vett. Chirurg. NICETAE, pag. 94. 95. add. SALMAS. Exercit. plin. pag. 361. *μήλη* vero in hac chirurgia ocularia saepius occurrit, ut apud ALEX. TRALLIAN. AEGINETAM et alios, item *ἀνομήλη*, *σπαθο-*

μήλη, *λαυρομήλη*, *κυαθισκομήλη*, item *μηλω- τρίδος κυαθίσκος*; pluraque in hunc sensum censumque, alia, apud DEMOSTHE- NEM praesertim, celeb. illum Medicum ocularium Veterem, ex quo eadem, quamvis vitiosissime et monstrosissime, passim repetit MATTH. SILVATICVS, in *Pandect. Med.* quae tamen maximam iam partem emendauimus et illustrauimus, in superiore Exercitat. de Scarificat. et vstione Oculorum Hippocratica. Conf. huc interim REINES. Var. Lect. L. III. cap. 16. p. 673. PAUL. LEOPARD. Lib. XIII. Emend. cap. 2. RHOD. ad SCRIBON. LARG. pag. 81. ut alios taceam. *Σμιλίῳ* tamen scil. ἀπὸ τῆς σμίλης, de eadem re, vsurpauit supra DIOSCORIDES, ut vidimus: Vtrumque ergo ferri potest; ipso affirmante CELSO.

τρίφων τὰ βλέφαρα. In huiusmodi itaque affectuum complexu, medici, ad consilii inopiam redacti, solum Remedium, velut in desperatis, reppererunt, ut ipsas palpebras inuersas citra Medicamentorum usum, repurgent, et abstergeant; Aliqui quidem specilli concauo, superficiem deradentes, deinde molli spongia, id, quod defluit, excipientes, palpebrasque, quod ad reliquum aspritudinis, ad aequalitatem redigentes. Aliqui vero etiam marinorum quorundam animalium coria in superficie aspera, in eiusmodi usum, congrue assument. Quidam autem ex praeceptoribus meis, etiam ex pumice, Collyrium fecit, atque eo ipso, versis palpebris aspritudines deradebat. g)

Maximum hunc Doctorem Pergamenum excipiat nunc AETIVS AMIDENVS, h) qui tamen paucis saltem, huius ambiguae Chirurgiae meminit, quoniam eam, ob ancipitem plerumque, euentum, proscribit potius, quam praescribit, vti in sequentibus, paulo distinctius docebimus. En autem ipsa illius verba: Τινες μὲν ἐν ξέειν τὰ τραχώματα πειρῶνται· οἱ μὲν σιδήρῳ i) οἱ δὲ φύλλοις συκῆς. Quidam igitur palpebrarum aspritudines radere ac scarificare tentant; nonnulli quidem instrumento quodam ferreo; alii vero fici foliis.

AETIVM

g) De quo Collyrio rasorio, vt ita dicam, eiusque praeparatione, vid. supra, in antecedentibus, bina DIOSCORIDIS loca singularia.

h) Lib. VII. Cap. 45. fol. 131. b. Edit. Graec. Aldin. Conf. et ibidem, cap. 82. pag. 137. b.

i) Σιδήρῳ, hic idem est, ac σμίλῳ, supra, apud DIOSCORIDEM, aut κατὰ δίσκῳ τῆς σμίλης, seu μήλης, mox apud GALENUM, et paullo post, apud ALEXANDRVM TRALLIANVM, aut denique βλεφαροξύτῳ, apud PAVLLVM AEGINETAM, de quo statim in sequentibus. Sed siue σμίλην legeris, siue μήλην, vtrumque certe ad scarificationem rite peragendam, idoneum fuit instrumentum, vt modo monebamus. Inde et ipse CORNELIVS CELSVS, Lib. VI. c. 6. bene ob-

seruat, duras crassasque palpebras interdum asperato specillo, h. e. μήλη, interdum autem etiam scalpello, h. e. σμίλη, fuisse erasas. Ceterum huc etiam pertinet sequens ORIBASII locus, de Loc. affect. Curat. Lib. IV. cap. 27. pag. 184. Vers. Lat. quoniam iam ipsum exemplum graecum, quod doleo, non est ad manum: palpebras inverte, ac specillo calido laeuigabis, aut foliis ficulneis, et melle deinde subunge. Vnde vel liquido patet, omnibus propemodum Medicis antiquis graecis, vnam eandemque fuisse sententiam, circa istam methodum chirurgicam oculos scabros et dura aspritudine affectos, curandi ac tractandi. Quam tamen ob metuendum inde inflammationis periculum, merito damnat ANTOINE, Tract. de Morbis Oculorum, part. IV. cap. 17. pag. 763. de quo infra.

AETIVM VERO AMIDENV M comitetur iam, ordine suo, ALEXANDER TRALLIANVS, qui quae hac de Chirurgia consignauit, maximam quidem partem, ex ipso hausit GALENO. In hunc autem modum, ipsius fluunt verba: ^{k)} Ἐὰν γὰρ ἑλκος εἶναι τύχη τῇ τραχύτητι τῶν βλεφάρων βελτίον ἔστω, ἐκτρέφοντα μᾶλλον αὐτὰ ὅπως σμήχειν, ἢ τῷ κυάθῳ τῆς μήλης, ἢ φύλλοις συκῆς. Ἐνιοὶ δὲ καὶ σηπίας ὀτράκω, ἢ δέρματι τραχυτέρω χεῶνται, καὶ ἄλλοι πάλιν τῆς διὰ κισσῆρας, κολλυγίοις ὑπαλείφουσιν. Hoc est: *Si enim Vlcus cum aspritudine palpebrarum esse contigerit, satius est, ipsas potius inuersas ita fricare, aut specilli concaua parte mucronata, aut ficulneis foliis. Nonnulli vero etiam sepiae testa, aut pelle asperiore utuntur: Alii rursus, collyriis ex pumice, sublinunt.*

Succedat ipsi ALEXANDRO TRALLIANO, nunc PAVLLVS AEGINETA, ^{l)} his quidem verbis: Εἰ δὲ σκληρὸς ὢν ὁ τύλος, μὴ τέτοις εἴκοι, ἐκτρέψαντες τὸ βλέφαρον, ξέσωμεν, διὰ κισσῆρας, ἢ σηπίας ὀτράκω, ἢ φύλλων συκῆς, ἢ καὶ διὰ τῆς ὀργάνης, τῆς βλεφαροξύστῃ καλεμένης. Id est latine: *Si vero durus sit Callus, et his non cedat (Collyriis superius commemoratis) inuersam palpebram per pumicem, rademus, aut per sepiae testam, aut fici foliis, aut etiam per instrumentum, Blepharoxyston, ab hac opera appellatum.* ^{m)}

Agmen denique Medicorum horum Graecorum omnium claudat Hippiatrus potius, quam Andriatrus, vt sic loquar, videlicet APSYRTVS, ⁿ⁾ qui et huius Chirurgiae oculariae meminit, in scarificandis oculis equorum morboſis: Ἐὰν δὲ μὴ ἀνοίγῃ τὸν ὀφθαλμὸν ὁ ἵππος, ἐκτρέψας αὐτῷ τὰ βλέφαρα, σμιλαρίῳ κατὰσχασων. *Quod si autem* oculum

k) Lib. II. Medicinal. Cap. 6. p. 148.

l) Lib. III. Cap. 22. pag. 34. Quem ipsum vero singularem PAVLLI AEGINETAE locum allegarunt iam MAVCHARTVS, HAMPE, PLATNERVS et alii, vt supra iam monitum; sed dudum ante hos omnes, MARC. AVREL. SEVERINVS, de efficaci Medicina, Part. II. Cap. CVII. pag. 114.

m) De quo Instrumento oculoſario, vid. ſi lubet, priorem noſtram commentationem nuperam, de Scarificatione et uſtione oculorum Hippocratica, pag. xv. de quo et in ſequutura proxime, Commentatione Tertia, ſi Deo nempe ita uſum fuerit, accuratius acturi ſumus.

n) Lib. I. HIPPIATRIC. Cap. XI. pag. 47. Edit. Graec. Baſil.

oculum haud aperiat equus, ipsius palpebras extrorsum prius versas, scalpello scarificato.

Et haec quidem haecenus de Medicis Graecis. De Latinis vero, nemo, quantum equidem sciam, huius oculariae scarificationis mentionem fecit, praeter vnum CORNELIVM CELSVM, cuius digna proinde sunt verba, quae hic infra adscribantur: °) *In hoc genere valetudinis, (scilicet aspritudinis oculorum) quidam crassas durasque palpebras, et ficulneo folio, et asperato specillo, et interdum scalpello, eradunt; versasque quotidie Medicamentis suffricant.*

Sed haec de Scarificationis Oculorum Antiquitate et Historia, iam sufficient. Nunc ad ipsam eiusdem originem antiquissimam, si lubet, progrediamur. Ea autem, ne quid dissimulem, adeo mirabilis et insolita est, vt vix fidem habitura videretur, nisi grauissimorum Auctorum testimoniis luculentissimis abunde confirmata esset. Non enim ea prudentiorum hominum solertiae, aut longae exercitissimorum Medicorum experientiae debetur: sed potius, quis credere ausit? lasciuarum caprarum et olidorum caprorum ingeneratae sagacitati, qui monstrante ipsis natura ipsa, viam et curationis rationem, hanc subtiliorem chirurgiam oculariam primi inuenisse dicuntur ab AELIANO, P) cuius memorabilem oppido locum, etsi aliquanto diffusio-rem, pace tamen, vt spes est, Lectorum, hic infra integrum adscribam, quum operae omnino pretium videatur. En autem ipsum: Ἀγαθὴ δὲ ἄρα ἦν ἡ αἰξ καὶ τὴν τῶν ὀφθαλμῶν ἀχλὺν, ἣν περὶ παῖδες Ἀσκληπιῶς ὑπόχυσιν καλεῶσιν, ἀκέσασθαι· καὶ λέγονται γε οἱ ἄνθρωποι παρ' ἐκείνης μαθεῖν τόδε τὸ ἴαμα· τὸ δὲ ἄρα τοιοῦτόν ἐστιν. Ὅταν αἰξ νοήσῃ τὸν ὀφθαλμὸν ἐπιβολωθέντα αὐτῇ, πρόσσει βατῶ, καὶ παραβάλλει τῇ ἀκανθῇ τὸ ὄμμα, νύξαι αὐτὸ καὶ ἡ μὲν ἐκέντησε, τὸ δὲ ὑγρὸν ἐξεχώρησε, μένει δὲ ἀπαθὴς ἡ κόρη, καὶ ὁρᾷ αὐτῆς· καὶ δαίται σοφίας καὶ χειρουργίας ἀν-

θρωπικῆς

o) *Lic. VI. de Medicina, Cap. VI. Sect. 26. pag. 363.* perquam notum vero hunc latini Medicorum Ciceronis locum CL. PLATNERVS iamiam laudauerat, et, nisi fallor, etiam HAMPIVS, dudam au-

tem ante ipsum SEVERINVS, GORRAEVS, BLANCARDVS, et alii.

p) *Lib. VII. de Animalium Natura, Cap. XIV. p. 501. Tom. I. Edit. Londinens.* per celeb. ABRAHAM. GRONOVIVM, cum Notis nostris, editae.

Ὠρωπικῆς ἐδὲ ἐν. Hoc est: Caliginem oculorum, quam suffusionem vocant Aesculapii filii, caprinum pecus probe curare scit: et ab ipsa capra remedium eiusdem, homines quoque mutuati dicuntur. Quum enim capra conturbatum oculum, et non probe affectum ad videndum, sentit, ad rubum accedit, eiusque spinæ propius admouet oculum, ut ipse ab ea compungatur: Haec autem ut pupugit, pituita statim effluit, illaesa tamen manente Pupilla, ipsaque capra videndi usum recuperat, neque vlla humana sapientia aut chirurgia unquam ad haec indiget. Quam ipsam caprinam, ut ita loquar, chirurgiam breuius sic retulit PLINIVS: ^{q)} Oculos suffusos capra iunci puncto, sanguine exonerat, caper, rubi. ^{r)}

Multo autem luculentius GALENVS, ^{s)} sequentibus quidem verbis, notatu dignissimis: Τινὰ δὲ (φάρμακα) ἐκ περιπτώσεως φασὶ ἐπινενοῆσθαι, ὡς τὸ παρακεντεῖν τὰς ὑποκεχυμένους, ἐκ τῆς περιπεσεῖν αἰγᾶ, ἥτις ὑποχυθεῖσα, ἀνέβλεψεν, ὅξυσχόινθ ἐμπαγείσης εἰς τὸν ὀφθαλμόν. Id est: Quaedam Remedia dicuntur ex casu, obseruata fuisse: ut oculis suffusos compungere, inde, quod capra quaequam ex suffusione male habens, iunco aculeato in oculum impacto, visum receperit.

Hoc ipso autem GALENVS, siue Auctor illius libri, respexisse videtur ad singularem illam de Capella caeca, historiam, de qua sequens perquam lepidum atque acutum, in Anthologia Graeca, ANTIPHILI extat Epigramma: ^{t)}

Ἐκ θοίνης, φάος ἔσχεν, ἐπ' ἀχράδα μηκὰς ἰῆσα,

Ἐκ δ' ἐφάνη, τυφλὴν μηκέτ' ἔχουσα κόρην.

Δισσῶν τὴν ἐτέρην γὰρ ἐκέντρισεν ὅξυς ἀκάνθης

Ὅζος ἴδ' ὡς τέχνης, δένδρον ἐνεργότερον.

Q q q 2

Hoc

q) Lib. VIII. Histor. Natural. cap. 50.

r) Possit etiam sanie, legi: quoniam ὑγρὸν, habet AELIANVS; et Humorem, CELSVS, Lib. VII. Cap. 7, 14: Sed et sanguine, ferri potest, si recte explicetur, ipsaque vox ὑπόχυσις, seu suffusio, sensu aliquanto latiore, sumatur.

s) Introduct. seu Medic. Cap. I. quomodo inuenta sit Medicina, p. 360. Tom.

II. Opp. per RENAT. CHARTERIVM.

t) Lib. VI. Anthol. Cap. XXIX. Epigr. 2. pag. 513. Corp. Poet. Graec. Tom II. Part. II. et in Anthologia Riuiiana, Graeco Latin. Lib. I. Cent. III. Cap. 29. p. 450. Conf. CASPAR. a REIES, Elys. iucundar. Quaestion. Camp. Quaest. III, 6. pag. 54. et DANIEL VINK, Amoenitat. Philol. Med. Cap. II. pag. 46. item AM-

Hoc est, ELIA CVCHLERO scite interpretante: ^{u)}

E pastu, fruticem depasta Capella Pyrastris,

Luce potita, redit, lucis egena prius.

Nam spinæ ramo pupilla est altera puncta,

Ecce! Machaonia, plus valet, arte, frutex.

Sic ergo et ipsa haec ocularia scarificatio et punctio doctores et monstratores animalia bruta habet; sicuti praestantissima et valentissima remedia alia, potioresque medendi partes pariter debemus iisdem mutis magistris, a quibus ea nempe reperta sunt, quae et homini vsui futura. Sic vomitionum et purgationum vtilitatem primi hominibus ipsis monstrasse narrantur sagaces canes; opportunam sanguinis e venis turgidis missionem, et scarificationem, item et vulneris obligationem, saeui Hippopotami Nilotici; commodum denique iniectionum per inferius guttur, clysterum, vsum, Ibes Aegyptiae, infestae illae dirorum serpentum venatrices, quae molestam sibi saturitatem sensim emissurae, rostri aduncitate, per eam partem, aqua marina sese proluunt, qua reddi ciborum onera maxime salubre est: de quibus, ut et aliis pluribus eius modi salutiferis repertis animalium medicis, multa miranda multi consignarunt Auctores, tam veteres, quam recentiores, inprimis autem ex illis ARISTOTELES, ^{x)} PLUTARCHVS, ^{y)} GALENVS, ^{z)} AELIANVS in utroque opere, ^{a)} SEXTVS EMPIRICVS, ^{b)} BASILIUS MAGNVS, ^{c)} ANATOLIVS,

BROS. PARAEVS, *Lib. I. de Animant. et Hominis praestantia*, pag. 43. Opp. et CAMERARIUS, *Memorabil. Med. Cent. I. Cap. 13.* ut et DAN. CLERICVS, *Hist. Med. Part. I. L. I. c. 18. p. 54.*

^{u)} Ex diuersis huius Epigrammatis graeci versionibus Latinis metricis, ab ANDREA RIVINO collectis et coniunctim exhibitis, hanc solam ELIAE CVCHLERI versionem, ceu omnium optimam, nostra certe opinione, hic elegimus.

^{x)} *Lib. IIX. de Hist. Animal. Cap. 5 et Lib. IX. Cap. 6. et 7. atque passim, item Lib. de Mirabil. Auscult.*

^{y)} *Lib. de Solertia Animal. per totum, et de Causis Physic. Quaest. XXVI.*

^{z)} *Lib. de Venae Sect. contra ERASIST. Cap. 6. pag. 399. Tom. X. et Introduct. C. 1. p. 360. T. II.*

^{a)} *Lib. I. Hist. Var. Cap. 7. 8. 9. 10. et Lib. XIII. C. 35. Opere autem de Natura Animal. per totum.*

^{b)} *Lib. I. Pyrrhon. Hypotypof. Cap. 14. pag. 20. ibique in Notis FABRICIUS.*

^{c)} *Opp. Tom. I. pag. 98. 99. et Tom. III. pag. 586. Conc. XXII. de Providentia.*

LIVS, ^{d)} CICERO, ^{e)} PLINIVS, ^{f)} alique plures, quos, praeter alios, iam maximam partem, vna collectos, exhibuit DAN. VINKIVS. ^{g)}

Haec igitur generatim de *Oculorum Scarificationis Antiquitate, Historia et Origine*, indicatis tantum, et exserto quasi digito, monstratis, ipsis Auctorum potiorum fontibus, quam copiose illustratis, aut curatius explicatis singulis.

Q q q 3

Restant

d) Fragment. de Antipath. et Sympath. apud FABRIC. *Bibl. Graec. Lib. IV. Part. II. Cap. 29. pag. 295. sqq.*

e) *Lib. II. de Natura Deorum, Cap. 50.*

f) *Lib. VIII. Histor. Nat. Cap. 26 et 27. atque alibi passim, per magnum illud opus. Add. inprimis PISIDAE Carmen de Opificio Mundi, v. 915. sqq.*

g) In *Amoenitatibus philolog. Med. Cap. II. pag. 46. et 49. vbi plerisque priscis Auctoribus allegatis aliquot etiam recentiores laudat, vt VOSSIVM, de Idololat. L. III. Cap. 67. POLYDOR. VIRGIL. PIER. VALERIAN. PROSPER. ALPIN. ROD. a CASTRO et IO. LANGIVM; quibus tamen longe plures addi possunt ac debent, veluti CASP. a REIES, Elys. iucund. Quaest. Camp. Quaest. III, 6. pag. 53. sqq. AMBROS. PARAEVS, Opp. Lib. I. de Animant. pag. 43. RITTERSHVSIVS, ad OPPIANI Cyneg. Lib. II. pag. 64. et ibid. passim in seqq. SIMON MAIOLVS, Dier. Canicul. Tom. I. Colloqu. xx p. 229. sqq. et T. V. Coll. I. pag. 714. IO. RVD. CAMERARIVS, Memorab. Med. Cent. I. Cap. 5-16. Tom. I. WILLIS, de Anima Brut. GASSENDVS, Physf. Sect. III. Memb. post. Lib. VIII. Cap. 4. PASCHIVS, de Nouis Inuent. Cap. VI. pag. 402. sqq. ROLFINC. de Plantis, Lib. I. Cap. I. GROTIVS, de Veritat. Rel. Christ. Lib. I. ex*

vers. OPITII Metr. Tom. IV. Opp. Poet. p. 743. sq. vbi vid. notas nostras: CONRINGIVS et BORRICHIVS, de Med. Hermet. DAN. CLERICVS, Hist. Med. P. I. Lib. I. C. 18. pag. 53. sq. BARCHVSEN, Hist. Med. Dial. VI. pag. III. CYPRIANVS, ad FRANZ. de Animal. Hist. passim, BOCHART. Hieroz. per totum opus, RENDTORFIVS, in Not. ad ANATOL. de Antipath. et Sympath. apud FABRIC. *Bibl. Graec. Lib. IV. Part. II. Cap. 29. pag. 308. sqq. copiose: MENAGIVS, ad DIOG. LAERT. Lib. VIII. Segm. 30. pag. 366. et quos ibi allegat Auctores plures: MOTH. VAYER. Opp. Tom. VII. Cap. 22. pag. 199. sqq. SYLV. BOCCON. Obseruat. Curiosf. Physf. xx. pag. 431. sqq. DERHAM, Physico-Theol. Lib. IV. Cap. XI. sqq. IENKIN. THOMASIVS, de Anima Brutor. VIII, 4. inprimis autem HIERON. RORARIVS, Lib. II. de Ratione Brutor. et ibi in Not. CL. RIBOVIVS, pag. 279. sqq. item in adiecta longa Differt. de Anima Brutorum, vt et PETR. BAYLIVS, Dict. Hist. Crit. Tit. RORARIVS, et, vt alios iam taceam, GESNERVS, ALDROVANDVS, RAIVS, SWAMMERDAM, et alii, qui, de Animalibus, scripserunt: quibus denique addas, si placet, Apologiam nostram pro HIPPOCRATE, pag. 37. sqq.*

Restant nunc aliqua, his adiicienda, de ipsis diuersis instrumentis et remediis, ad hanc ipsam Chirurgiae subtilioris partem rite tractandam, olim adhibitis, quorum iam quaedam supra, ab ipsis illis Medicis Graecis commemorata fuerunt. Sed supersunt adhuc nonnulla, de quibus, Deo volente, proxima occasione, distinctius agemus, haud neglectis simul iis, quae de ipsius oculorum scarificationis usu et abusu, monenda videbuntur.

Interim tamen paucis tantum hic monendum, istam quidem oculorum scarificationem, ceu operationem, ambigui admodum euentus, ingentis periculi, et acerrimi inprimis doloris plenissimam, a priscis Medicis, ad consilii inopiam demum redactis, in extremo tantum necessitatis casu, tentatam fuisse, vbi scilicet diutius inveterata et pertinacius callosa palpebrarum Trachomata omnem mitiorem et securiorem medelam eluderent. Sic enim AETIVS, loco supra citato, prudenter monet: ἐστὶ δὲ ἐπιβλαβὲς τὸ ἐπιχέεινμα ἐπιπλεῖον γὰρ ταῦτα ἐπαύξῃσι, καὶ σκληρὰς τὰς ἐλὰς ἐπάγῃσι, καὶ αἰτίοι συνεχῶν ρευμάτων γίνονται, νυττομένων, (sic enim omnino legendum pro vitiose vulgato, κυττομένων,) ἀπὸ τῶν ὀφθαλμῶν, ἐκ τῶν ἐπιγιγνομένων σκληροτέγων ἐλῶν: *Est autem haec ipsa scarificationis oculariae methodus operatio admodum periculosa et nociva: Ista enim adhibita remedia, ferrum scilicet atque aspera fici folia, ipsas palpebrarum aspritudines adhuc magis augent, et duriores cicatrices inducunt, causaeque demum fiunt perpetuarum fluxionum, dum nempe semper oculi ex succedentibus durioribus cicatricibus, compunguntur.* A quo sapientissimo consilio etiam ipse CORNELIVS CELSVS alienus non fuit: enarrata enim hac ipsa scarificandi oculos, ratione, mox, loco supra iam laudato, sequentem cautionem saluberrimam addit: *Haec neque, nisi magna vetustaque aspritudine, neque saepe, facienda sunt.* Idem vero denique ipse suadet GALENVS, vt ex loco superius allegato, patet. Sed hac nostra aetate, WOOLHOVSIVS, eiusque affeclae, priscis illis Medicis probis et circumspectis non prudentiores, sed audaciores, ipsam hanc durissimam et molestissimam scarificandi methodum in omni fere oculorum inflammatione et lippitudine secure adhibendam esse festinanter nimis et incon-

considerate censuerunt, et quidem, quod omnium pessimum, instrumento quodam recens inuento; sed ad hoc ipsum officium praestandum, longe ineptissimo et incommodissimo, nempe ex acutissimis fecalis glumis, ordine compositis, et in fasciculum, seu penicillum collectis ac colligatis, parato; quod palpebras radendo et cruentando, spicula illa subrilissima abrafa ipsis palpebris altius infingeret, ita, vt non solum vetus illa inflammatio non tolleretur; sed et noua insuper ipsa priore adhuc vehementior, eo ipso excitaretur. Adeo, vt plures aegrotorum, post intolerabiles paene dolores, febres, vigilias, imo et furores, ipsum tandem dulcissimum ante omnia, visum sic miserrime perdiderint, atque ita auxiliaris illa ὀφθαλμόζυσις, vt quidem falso credebatur, facta demum fuerit exitialis ὀφθαλμόσηψις, siue putrida oculorum corruptio. Vnde et paullo post factum, vt ista quidem per tales scopulas fatales ophthalmicas, methodus oculos scarificandi, a WOOLHOVSIO, infausto fidere, introducta vbique fere, a Medicis et Chirurgis, praesertim vero parisiis, propter atrocissima pericula exinde merito metuenda, penitus reiecta et damnata fuerit: sicut nosmet ipsi ibi frequentissime audiuius, quum olim, ante hos triginta quasi annos, in Regia ista vrbe, siue rectius, splendidissimo elegantioris orbis compendio, magno cum studiorum fructu, nec minore animi voluptate, diutius moraremur. Tum vero crudelis huius asperique instrumenti Woolhusiani loco, acun potius adhibebant, in hunc quidem scarificationis vsum, concinne efformatam et apte accomodatam, quae nec tam longum saeuumque dolorem inferret, nec magnum adeo periculum induceret, et certius simul securiusque auxilium praestaret: de qua videndus quoque in Chirurgia HEISTERVS. Ceterum ex hoc ipso singulari WOOLHOVSI exemplo luculentius nunc patet, quanto iudicio, ingenio, attentione et eruditione opus sit, ad recte intelligendos et interpretandos veteres auctores medicos, praesertim graecos, ne ex sensu male percepto ingens damnum ac periculum redundet in ipsam Vitam, aut sanitatem humanam. Quod si enim ipse WOOLHOVSIVS rectius interpretatus fuisset obscurum illum HIPR. locum, e *Libro de Visu*, superiore

riore Exercitatione, accuratius a nobis explicatum; tum sane nec carduum acutum ibi inuenisset, nec ex isto carduo, ad imitationem, suam postea efformasset scopulam ex aristarum spiculis acerrimis infeliciter paratam, ipso illo carduo longe nocentio rem ac deterio rem, seu βλεφαρόξυστον illud nouum, quod tamen potius esset βλαβερόξυστον, vt sic loqui liceat. Hoc igitur notabili tristisque exemplo moniti, Medicinae praesertim Tirones nunc discant grammatica haec, aut philologica maiore in pretio habere, et nocturna diurnaue manu, exemplaria Veterum Medicorum graeca diligentius versare. Ex his minimis enim, vt quibusdam, perperam licet, videtur, constant omnino maxima, et per verba prius recte intellecta, facilius certiusque postea pervenitur ad ipsa vera rectius intelligenda. Hinc perquam apposite acuteque dixit ARISTIDES, *Serm. Sacr. I. p. 278. T. I.* ἐκ ἁρᾶ πανταχῶς τόγε μείζον αἰρετώτερον, ἀλλ' ἐστὶ τις καὶ μικρῶς χάρις. *Et parvis gratia inest magna.*

EXERCITATIO OCTAVA.

DE

REMEDIIS VETERVM COSMETICIS
EORVMQVE NOXIS.

Omnibus fere foeminis curam atque industriam in eo potissimum esse positam, ne formae suae decus singulari benignioris Naturae munere, ipsis concessum detrimenti quid capiat; tam notum cuius atque perspectum esse arbitror, vt operam omnino luderem, si id quidem multis exemplis ac testimoniis, in Veterum monumentis ubique larga oppido copia obuiis, iam operose probare susciperem, praesertim, quum affatim illud doceat quotidiana experientia, adeo, vt in hunc vsque diem, verissimum sit istud Ovidianum: *)

Est

*) *De medicamine Faciei, Add. et Lib. III. de Art. Am. 199. sqq. ubi plura, quae huc spectant: quae scite illustrat W E D E-*

LIVS, Exercit. Medico philol. Cent. I. Dec. VIII. Exercit. 9. pag. 64. sqq. Conf. et Cent. II. Dec. V. Exercit. 5. pag. 27. sqq.

Est etiam placuisse sibi quotacumque voluptas:

Virginibus cordi grataque forma sua est.

Non vero ipsis sufficit, solam diligentiam in eo collocare, quo Naturae creatricis beneficio, ornatae appareant, sed et bonis suis inemtis quasi ac gratis concessis haud contentae, ulterius audacter progrediuntur, idque praecipue curant, ut artis adiutricis lenociniis adiectis, cultiores atque magis commundatae videantur. Quorsum omnino spectare arbitramur illud Vlpiani, ^{a)} *Est aliqua Mulier ex somno statim ornata; non tamen commundata.* Vbi male olim in quibusdam Codd. legebatur *commodata*, quod bene in *emundata*, mutabat maximus HUGO GROTIUS, ^{b)} melius vero in *commundata*, AEGIDIUS MENAGIUS, ^{c)} auctoritate praesertim COLVMELLAE et Glossarum Veterum, inductus et adiutus, quibus CATONEM, IULIUM OBSEQUENTEM, PETRONIUM, et alios addit NICOL. HEINSIUS: ^{d)} quae vox rarior et aliquanto infrequentior apud Veteres quidem Auctores, reddenda proinde etiam videtur CORNELIO CELSO nostro, loco mox infra adscribendo. ^{e)} Hoc igitur nimium et assiduum formae non solum conseruandae, sed et mutandae et augendae, studium foeminarum, cultus sui iusto studiosiorum, laudatus modo CORNELIUS CELSVS mitius increpat, vocando *ineptias*, his quidem verbis: ^{f)} *Pene ineptiae sunt, curare varos, et lenticulas, et ephelidas:*

a) L. 25. §. 10. ff. de auro, argent. mund. legat.

b) In *Florum Spars.* ad Ius Iustinian. p. 188. Conf. Scip. Gentilis Orig. ad pandect. pag. 283.

c) In *Amoenitat. Iuris Civil.* Cap. 39. pag. 309.

d) In *Not. ad Petron.* Cap. 47. pag. 238. Edit. Burmann.

e) Libro nempe VI, Cap. 18. haec vulgo alias, apud Cornel. Celsum, leguntur: *Apud nos foediora verba, ne consuetudine quidem aliqua verecundius loquentium, commendata sunt.* Vbi quidem qui-

busdam legendum placet *accommodata*, vna cum Roberto Keuchenio, in *Not. ad Serenum Samon.* pag. 233. nobis contra, potius scribendum videtur: *commundata*, eleganti, nisi fallor, antithesi, antecedentibus *foedioribus Verbis*, iuste opposita. Licet, quod haud prorsus negauerim, etiam vulgatum illud *commendata*, tolerari posse videatur. Certe melius et accommodatius hoc quidem est, quam istud, quod vulgo substituunt, *accommodata*. Sed haec obiter, et in transcurso.

f) *Lib. VI. Cap. 5.*

das: Sed eripi tamen foeminis cura cultus sui non potest. Seuerius autem atque vehementius idem castigat Tertullianus, peccata, immo artes diabolicas, dicendo, sequenti quidem sermone, gravitatis ac veritatis plenissimo: g) *Non supergrediendum ultra, quam simplices et sufficientes munditiae concupiscunt, ultra, quam Deo placet. In illum enim delinquant, quae cutem medicamentis urgent, genas rubore maculant, oculos fuligine porrigunt.* *) *Displicet nimirum illis plastica Dei: in ipsis se nimirum arguunt, et reprehendunt artificem omnium. Reprehendunt enim, eum emendant, cum adiiciunt, utique ab aduersario artifice sumentes additamenta: Is est diabolus.* Verum vid. ibi reliqua, bene quidem longa, sed notatu et lectu longe dignissima: qualia et ista sunt in superioribus: h) Vbi pari modo praeter alia plura, acrius damnat, ceu artes a malo et immundo daemone edoctas et productas, *Medicamenta ex fuco, quibus genae colorantur, et illum ipsum nigrum pulverem, quo oculorum exordia producuntur.* Sic enim ibi legendum, nempe genae, et non lanæ, quod vulgo circumfertur, et ipse sensus manifesto docet, qui nullum hic lanis locum concedit, et locus praeterea alter, modò adductus, liquidius confirmat, qui pariter exhibet: *genas rubore maculant, quod idem nempe est, quam quod hic dicitur: fuco, quo genae colorantur.* Quomodo et loquutus est CYPRIANVS, i) *Genas mendacio ruboris inficere, oculos circumducto nigrore fucare.* Vtrumque vero sic graece exprimit CLEMENS ALEX. k) *τὰς παρειὰς φουξῇ, καὶ τὰς ὀφθαλμοὺς ὑπογράφεισθαι, ἢ τιβίζεσθαι,* et HERODIANVS Lib. v. Cap. vi. *ὑπογραφόμενος τὰς ὀφθαλμοὺς, καὶ τὰς παρειὰς ἐρυθραίνων.* Ceterum de hoc veterum fuco, et nigro praesertim pulvere, ex antimo-

g) Lib. ii. de Cultu Foeminarum, Cap. 5. pag. 156. Edit. Rigalt.

*) Collinunt, hic legunt ELMENHORST ad ARNOB. Lib. ii. pag. 89. HERALDVS, ad MARTIAL. Lib. ix. pag. 179. et RIGALTIVS ad ARTEMIDOR. pag. 12. qui tamen ad ipsum Tertull. rectius defendit illud porrigunt, respicit enim ad *platyophthalmion*, de quo PLINIVS, xxxiii. vbi vid. HARDVIN,

et DIOSCORID. Lib. v. Cap. 99. item GEOFFROY, Tom. i. de Mat. Med. pag. 219. et denique Obseruat Crit. nostr. mox citand. pag. 400.

b) Lib. i. de Cultu Foemin. Cap. 2. pag. 150.

i) De disciplin. Virgin. pag. 210.

k) Lib. iii. paedagog. Cap. 2. pag. 217. add. Lib. ii. Cap. 10. pag. 199.

timonio, seu stibio potissimum parato, alibi iam distinctius et copiosius a nobis actum fuit,¹⁾ quare ea hic incassum repetere, nec libet propter brevitatis studium, nec licet, propter angustum spatium. Cum Tertulliano autem, in easdem iustas acerbisque querelas effunduntur quoque splendidissima illa Veteris Ecclesiae lumina et decora, CLEMENS ALEXANDRINVS,^{m)} BASILIUS MAGNVS,ⁿ⁾ IOANNES CHRYSOSTOMVS,^{o)} GREGORIUS NAZIAN.^{p)} ISIDORVS PELUSIOTA,^{q)} item PHILO IVDÆVS,^{r)} ARNOBIUS,^{s)} CYPRIANVS,^{t)} HIERONYMVS,^{u)} et alii, qui omnes ubique occasionem avide arripiunt, immundum illum Mulierum lasciuiorum mundum fucumque eumentum et adscititium acrius infectandi, damnaque ex hoc inuenusto venustatis studio, animae iuxta corporique et sanitati certissime metuenda, fideliter atque luculenter demonstrandi: quorum vero copiosiores locos hanc in rem plane eximios exserto quasi digito, indicasse iam sufficiat, quoniam eos integros exscribere nunc nec licet, nec vacat.

Ingenue ergo fatendum est, damnosas illas artes ad formam naturalem emendatiorem et cultiorem reddendam, a male solertibus ar-

R r r 2

tificibus

1) Vid. si placet, *Obseruat. Crit. Lib. iv. Cap. 15. pag. 400. sqq.* ubi et cum plures Auctores alios simul laudauimus, qui de eodem argumento accuratius tractarunt, quos inter facile eminent GROTIUS, SALMASIUS, BOCHARTVS, CASAVBONVS, HERALDVS, le MOYNE, SPANHEMIUS, PRICAEVS, GONSALIVS, WEDELIVS, et pauci alii.

m) *Paedagog. Lib. II. Cap. 12. et Lib. III. Cap. 2. sqq. et alibi.*

n) *Tom. II. Opp. pag. 114. et Tom. III. pag. 575. et multis aliis locis passim; praecipue Tractatu, de Vera Virginitate. Conf. in primis ibi FRONTONIS DVCAEI Not. pag. 92.*

o) *Tom. I. in Vet. Test. pag. 498. Tom. II. pag. 863. Tom. III. pag. 846. Tom. IV.*

pag. 80. et pag. 335. Tom. VI. pag. 640. et Tom. I. in Nou. Test. pag. 366. Tom. V. pag. 1034. it. Tom. VI. pag. 252. etc. etc.

p) *Orat. XI. pag. 182. Tom. I. Opp. et alibi passim.*

q) *Lib. I. Epist. 461. pag. 18. et Lib. II. Epist. 53. pag. 198.*

r) *Lib. de mercede meretr. non recip. pag. 667. Lib. de Vita Contempl. pag. 693. de Ioseph, et de Special. Legg. pag. 604.*

s) *Lib. II. aduersus Gentes, pag. 72. ubi vid. ELMENHORST. pag. 88. 89. it. HERALD. pag. 102. quem et vid. ad MARTIAL. pag. 179. sqq.*

t) *Lib. de Habitu, seu disciplin. Virginum, pag. 210.*

u) *De Viduitate, ad Furiam, Tom. I. Epist. x. Cap. II. et ad MARCELL. Epist. XXIII. pag. 66.*

tificibus infelicitèr excogitatas, cum sanctissimis illis viris, ad grauissima potius peccata quin etiam abominanda prorsus flagitia referendas esse, quam quidem cum CELSO, ad meras leues ineptias; praesertim, si istae offuciae sanitati, immo et Vitae adeo ipsi officiunt, quod saepe numero accidisse compertum est. Audiamus igitur, si placet, hanc in rem, CLEMENTEM ALEXANDRINVM grauissime declamantem. Cuius ipsum locum, etsi verbosum et copiosum, integrum tamen huc transferre haud pigrabor, inprimis quum triplici naevo insigni contaminatus mihi videatur, quem, si per exiguas quidem ingenii vires, licuerit, emaculare conabor. Sic autem ille habet: w)

ἅμα γὼν ἡμέρα σπαρασσόμεναι, καὶ ἀποστεινόμεναι, καὶ φεράμασί τισι καταπλαττόμεναι, ψύχουσι μὲν τὸν χεῶτα, ὀρύττεσι δὲ τὴν σάρκα τοῖς φαρμάκοις, καὶ τῇ περιεργίᾳ τῶν ῥυμμάτων τὸ οἰκτεῖον μαθαίνουσι ἄνδρος. διὰ τῆς τοι ὥχραι μὲν ἐκ καταπλασμάτων καταφαίνονται, εὐάλωτοι δὲ ὑπὸ νόσων γίνονται, τακερὰν ἤδη τὴν σάρκα φαρμάκοις, τὴν ἐσκιαγραφημένην ἔχουσι. τῶν ἀνδρώπων τὸν διμειργὸν ἀτιμαζουσι, ὥς ἔκαστ' ἀξίαν δέδωρημένον τὸ κάλλος. Quae ita quidem vulgo Latine redduntur: *Summo itaque mane, foeminae, se lacerantes et extendentes, variisque ac confusis mixtionibus effingentes, viuum quidem cutis-colorem refrigerant, carnem autem Venenis effodiunt, curiosisque ac superfluis abstersionibus proprium decoris florem corrumpunt, et marcidum efficiunt. Quocirca a Cataplasmatibus quidem pallidae cernuntur, a morbis autem facile arripiuntur, ut quae adumbratam carnem venenis iam liquefactam habeant: Hominum opificem contumelia afficientes, tanquam, qui pro meritis, non fuerit eis largitus pulchritudinem. Sed, ut iam studio, plura alia praeteream, in hac quidem Versione iure notanda, ego potissimum hic nunc quaero, quid sit illud, ψύχουσι τὸν χεῶτα; Cutis colorem refrigerant? deinde, quid sibi ista velint: ὀρύττεσι τὴν σάρκα τοῖς φαρμάκοις; Carnem venenis effodiunt? et quis ex hoc profundo et abdito loco, perspicuam quasi lucem effodiat? et denique, quid istud significet: τακερὰν ἤδη τὴν σάρκα φαρμάκοις, τὴν ἐσκιαγραφημένην; adumbratam carnem, venenis iam liquefactam? Certae non umbrae solum hic mihi*

w) Lib. III. paedagog. Cap. 2. pag. 217.

mihi videntur; sed merae potius densaeque tenebrae, vbique offusae. Quare mea quidem opinione, in priore loco, pro illis vulgaris ψύχσει τὸν χρῶτα, melius substituendum ψήχσει, h. e. *abstergunt, perfricant cutem*, vid. HESYCH. SVIDAS et alii. Altero vero loco, pro istis olim editis: ὀρύττει τὴν σάρκα φαρμάκοις, hinc rectius forsitan legendum fuerit: Θρύπτει τὴν σάρκα, hoc est: *tundunt, comminunt, atterunt, frangunt, seu emolliunt nimis carnem medicaminibus et pigmentis cosmeticis*, sensu, nisi fallor, antecedentibus ψήχσει χρῶτα, admodum conuenienti ac perspicuo. φάρμακα enim proprie θρύπταιν dicuntur σώματα, σάρκας et νόσους, unde et λιθοθρυπτικά, seu τὰ λίθων θρυπτικά, aliaque id genus remedia θρυπτικά nota sunt ex Lexicis medicis, et aliunde. Quam facile autem nimia festinatione et incuria supinorum scribarum, ex Θρύπτει, fieri potuerit ὀρύττει, iam alibi, similibus exemplis a nobis dudum liquido demonstratum fuit. *) In tertio denique loco, pro obscuris istis: τὴν σάρκα ἐσκιαγραφημένην ἔχσαι, vnius tantum literae mutatione, certius et elegantius nobis scribendum videtur: τὴν ἐσκιαγραφημένην, h. e. *carnem habentes natura iam in umbra educatam, desidem, mollem et effoeminatam; per adhibita vero medicamina faciei, adhuc molliorem et effoeminatiorem redditam*. †)

R r r. 3

DRI

x) Lib. IV. Obseruat. Crit. Cap. 18. p. 416. vbi ostendimus, facillimum esse lapsum inter literas, forma fere sibi similes, nempe τὸ Θ. et τὸ Ο. quod et dudum obseruauit GALENVS, Lib. VII. de Comp. Med. per Gen. Cap. IX. pag. 846. Tom. XIII. et Comment. in Lib. II. Epid. Hipp. pag. 141. et in Lib. VI. Epid. pag. 354. Tom. IX. atque ex ipso CLERICVS, Art. Crit. P. III. S. I. Cap. 9. pag. 117. sq. Vid. et STEPH. le MOYNE Obss. ad Var. Sac. pag. 129. IS. VOSSIVS ad MELAE Lib. II. Cap. 2. pag. 436. et LAMB. BOS. Obss. Crit. Miscell. Cap. 48. pag. 190. vt alios taceam. Ceterum ista consimilium fere literarum Θ. et Ο. confusio innume-

ros paene errores apud solum HESYCHIVM, peperit: vt alibi, liquidissime et copiosissime docebimus. Quum vero vulgatum istud ὀρύττει, sensum etiam satis commodum et emphaticum efficiat; inde forsitan in eo nihil fuerit mutandum.

y) Scilicet ἐσκιαγραφημένοι, seu, quod idem, ἐσκιαγραφηναίαι, vocantur contemtim, frequentissime, foeminae deliciores, in umbra quasi enutritae, domisedae, et inertis otio ac mollitiae paene diffuentes; illisque inde σκιαγραφία, in opprobrium veluti, vbique obiicitur. Ita DIO CHRYSOST. Orat. 69. pag. 622. ἐσκιαγραφημένος, καὶ ἀπαλός, καὶ μάλιστα εἰκῶς ταῖς γυναῖξιν. PLUTARCHVS, in Lycurg. pag.

DRINVS: Τὰς γυναῖκας φιλοκόσμους καὶ φιλοκόμους γίνεσθαι εὐαλό-
 τες ὑπὸ τῶν νόσων, Foeminas cultus sui conseruandi et augendi amantiores
 et studiosiores facilius corripitur a multis magnisque ac grauib. morbis. Quod
 tanto certius euenit, quo magis suspecta, periculosa et venenatae
 sunt indolis illa ipsa medicamina, quibus ad infucandam, aut incru-
 standam faciem, illae utuntur, aut rectius, abutuntur, qualia prae-
 fertim esse constat omnia saturnina, seu ex plumbo praeparata, nem-
 pe Cerussam, Minium, Lithargyrium, et ipsum denique illud sic di-
 ctum Saturni Saccharum, tam dulci blandoque nomine vix dignum.
 Quorum in censum atrum ea quoque merito veniunt, quae ex dolo-
 so Mercurio, aut ipso diro Arsenico, conficiuntur Remedia, ad for-
 mam conseruandam, immo verius perdendam, et vitam ipsam ra-
 piendam, infeliciter reperta. Quod perquam multis funestis exem-
 plis passim vberius docetur ab illis praesertim Medicis, qui de usu et
 abusu Remediorum cosmeticorum, seu commoticorum, data opera
 tractarunt.²⁾ Qui tanto maiorem fidem et grauiorem auctoritatem
 merito

pag. 47. scite coniunxit θρόνον, καὶ σκία-
 τράφιαν, καὶ θηλύτητα πάσαν: qui et alibi
 dixit: σώματων λευκῶν, καὶ ἀπαλῶν, διὰ τὰς
 σκιατράφιας, quale et legitur *Lib. de Liber.*
Educat. Conf. et huc POLLUX, *Lib. iv.*
Cap. 19. pag. 437. et *Lib. vi. Cap. 40. pag.*
670. sqq. vbi vid. *Comment.* praesertim
 vero BVDAEVS, *Comment. Ling. Gr.*
pag. 1029. et ex quo sua hausit, HENR.
 STEPHANVS. Plures vero adhuc prae-
 termisere isti Auctores Veterum locos,
 hic strictim saltim indicandos, v. g. LV-
 CIAN. *de Gymnas. pag. 287.* et *pag. 290.*
 MAX. TYR. *Diff. xii. pag. 121.* HERO-
 DOT. *Lib. iii. pag. 163.* GALEN. *Tom.*
vi. pag. 47. IO. CHRYS. *Tom. vi. in Nov.*
Test. pag. 939. Florileg. Stob. Grot. *pag.*
393. et DIODOR. SIC. *Tom. ii. pag. 452.*
 vbi vid. Celeb. WESSELING. Sed haec
 iam sufficiant. Ex quibus nunc spero,
 apparebit, certissimam paene esse nostram

Emendationem ἐσκιατράφιας. Quam
 vero an forsitan cum reliquis, iam praeoc-
 cupauerit POTERIUS, me plane fugit,
 quoniam splenda ipsius Editio CLEM.
 ALEX. mihi non est ad manus.

2) Veluti VILLANOVANVS, NI-
 COLAVS, TROTVLA, KRAVT,
 FALLOPIVS et MERCVRIALIS, *de*
Decoratione, IO. STEPHANVS, *de*
Cosmetice, RONDELETIVS et FO-
 RESTVS, *de Fucis*; VARIGNANA, *de*
faciei et Corporis Mundificationibus, BE-
 SARDVS et ZIMARA, *de eximia forma*
Corpori humano inducenda, MINADOVS,
de Corporis humani turpitudinibus cogno-
scendis et curandis, et tandem, vt finem
 faciam, HAFENREFFERVS, *de Cutis*
Affectibus. Quibus omnibus et aetate,
 et labore improbo, huic vanitati impen-
 so, longe prior est CRITO, qui quatuor
 olim grandes *Cosmeticorum* euulgauit
 Libros;

merito accipiunt a binis praecipue Medicis longe per orbem Celeber-
rimis, IOANNE inquam LANGIO, atque HERMANNO BOER-
HAAVIO, quorum testimonia ipsa fida experientia confirmata, tan-
to maiorem attentionem et existimationem merentur. Sic autem

prior LANGIVS: ^{a)} *Aliptae Hispanorum et Italarum ex Hydrargyro, Cerussa, et Minio, una maceratis, fucum praeparant; quocum Mulieres genas quacunque inunxerint, his dentes brevi marcescunt, anhelitus male olet, fronteque corrugata, oculi caligant, et senescentes, asthmate pereunt. Sed nunc audiamus etiam BOERHAAVIVM, ita grauissime monentem: ^{b)}*

*Acetum plumbi, si dilutum, cuti affricatur, pustulas, rubedines, erysipelas, phlegmonas, multum levat, cuti candorem, nitoremque conciliat; sed cor-
pori nocet, tandem in phthisin deducendo: ut tristissimis saepe constitit exem-
plis: Sex enim, vel septem nobiles puellas, huius fuci usu, mortuas novi. Haec ille. Praesertim vero huc diligenter inferi, et plus semel atten-
te legi meretur stupenda illa Historia, de Muliere quadam curae cultus
sui nimis dedita, et inde graui a deo, poena manifestissime punita;
quam facundissime et nitidissime, pro more suo, ita enarrat IANVS
NICIVS ERYTHRAEVS, iste veteris eloquentiae romanae nouus
imitator felicissimus et stili vere latini artifex potentissimus, in prae-
stantissimo opere, de Virtutum et Vitiorum Exemplis, notatu dignissi-
mis, sect. CLXXII. pag. 335. Sed non est passus Deus, exquisitam illam,
atque inutilem, in tuenda augendaque forma, mulieris sedulitatem, cum
tanta diuinae ipsius Maiestatis contumelia, atque hominum offensione, con-
iunctam, inultam abire; neque diem supplicio distulit: Sed repente indidem,
ubi illa peccabat, graues ab ea poenas ac iustas expetiit. Nam primum ca-
put illi praeter modum, intumuit, cuius capillis, Cosmianis, ut veteres lo-
quebantur, medicamentis, aureum fulgorem conabatur inducere, quosque tan-*

ta

Libros; sed hodie exigua certe utilitatis
publicae iactura, deperditos: quorum
tamen singula capita diligenter recensuit
GALENVS, passimque ampla satis ex
iisdem dedit excerpta, Lib. I. de Comp.
Med. secund. Loc. Cap. 3. sqq. pag. 341.
sqq. Tom. XIII.

a) Epist. Med. 43. Lib. I. pag. 194.

b) Element. Chem. Tom. II. Part. III.
Proc. 172. pag. 396. Add. B. SCHVLZII
praelect. in Dispensat. Brand. pag. 4. et
pag. 182.

ta disponebat arte, ut partim, sicut nunc mos est, ad genas fluere sineret, partim eleganti modo deuinctos, vertici daret, ut inde inextricabiles incautis spectantium oculis laqueos intexeret: Tum malae, quas cerussa purpurisque non infecerat; sed incrustauerat, tam foedum, tam atrum nigrorem contraxerant, ut horrorem iis, qui aderant, incuteret: oculi ita extabant, prominebantque, ut paene e suis sedibus discederent; linguam, foras eiectam, crebris sibi morfibz dilacerabat; et in hoc oris habitu, animam edidit. Singulare Mulieribus illis exemplum, quibus carior est forma corporis, quam animi, pulcritudinis, quam pudicitiae. Haec tenus quidem scriptor iste elegantissimus, siue rectius, artificiosissimus pictor, ERYTHRAEVS, cuius spirantem hanc ac veluti animatam Tabulam utinam omnes molles, lasciuiae et formae suae conseruandae, aut amplificandae iusto studiosiores Mulieres, ad cauendum, aut resipiscendum, per omnem suam vitam, quam attentissime intuerentur. Quibus denique, si placeat, illud nouissimum exemplum perquam flebile, adiungatur, quod alibi nuper produximus, de matrona illustri non minus stirpe, quam ingenio ac doctrina, quae properantibus in perniciem fati, ex improvido eiusmodi virosae Aquae cosmeticae usu, subito visum perdidit, et paulo post, vitam ipsam, ut duplici sic quasi morte, miserrime periisse videretur. ^{c)} Quantum vero damni periculique sanitati et vitae saepius ipsi immineat a sola varia Capillorum lotura ac tinctura, iam dudum grauiter gnauiterque monuit TERTULLIANVS, his nempe verbis, pio quidem zelo plenissimis: ^{d)} *Atquin et detrimentum crinibus medicaminum vis inurit, et cerebro perniciem etiam cuiuslibet sinceri humoris assiduitas reseruat, tum solis animando simul et siccando capillo, exoptabilis ardor nocet. Quis decor cum iniuria? quae cum immunditiis pulchritudo?* Cui Theologo Africano suffragatur Medicus Africanus, CAELIVS nempe AVRELIANVS, parciore verbis, pon-

^{c)} Vid. si lubet, *Dissertat. nostr. de paradoxo Hippocrat. Veritate etc.* §. x. pag. 10. Simile autem fere exemplum funestum obseruauit B. PLATNERVS, in progr. *de pallore, per aduersam Valetudinem quaesito*, pag. 8. vbi plura, quae huc spectant.

^{d)} *Lib. II. de Cultu Foeminar. Cap. 6. pag. 156. Add. CLEM. ALEX. Lib. III. Paedog. Cap. II. pag. 248. Vid. et HADRIAN. IVNII Comment. de Coma, Cap. 7. fuse.*

dere vero haud carentibus: e) *Cephalaea vehementius foeminas tenet, ob diligentiam capillorum. Sed longe atrociora mala ex hoc infano fingendorum et pingendorum crinium studio iure metuenda fufius notauit GALENVS, et quidem e sua experientia, cuius ipsa verba, etfi copiofa, operae tamen omnino videtur pretium, hic infra, integra adfcribere: f) 'Ου μόνον ἐν κινδύνῳ γενομένας οἶδα πολλάκις γυναῖκας, ἀλλὰ καὶ ἀποθανέσας ἐκ τῆ καταψυχθῆναι τὴν κεφαλὴν ὑπὸ τῶν τοιούτων φαρμάκων. ἡ βλάβη δὲ αὐταῖς μάλιστα γίνεται, ποτὲ μὲν εἰς ἀποπληξίαν, ἢ ἐπιληψίαν, ἢ καταφορὰν, ἢ κἄρον, ἢ τὴν καλεσμένην κατάληψιν ἐμπίπτουσαι. ἔστι δ' ὅτε κατάρροις ἀλισκομέναις δισλύτοις, ὡς φθάσαι τὸν πνεύμονα παθεῖν, καὶ φθόνην ἐξ αὐτῶν ἀκολυθῆσαι, κ. τ. λ.* hoc est: *Non solum in periculo versatas saepe scio foeminas; sed et mortuas, ex perfrigeratione capitis, per huiusmodi pharmaca, inducta. Laesio autem eis maxime accidit, aliquando quidem in stuporem attonitum, aut comitiales, aut veternum, aut soporem profundiorum, aut catochen delabentibus: Aliquando vero destillationibus solutu difficilibus capiuntur, ut, antequam soluantur, pulmones male habere incipiant, exindeque tabes consequatur. Haecenus quidem GALENVS. Cuius verissimum hoc effectum tristissimo exemplo, modo producto, inter mille alia, abunde confirmavit laudatus supra politissimus ERYTHRAEVS, qui et in eodem*

e) *Lib. I. de Morb. Chron. Cap. I. pag. 269.*

f) *De Compos. Medicam. secundum Loc. Lib. I. Cap. 3. pag. 340. Tom. XIII. Opp. per CHARTER. Ad quam noxiam capillorum curam ac loturam etiam respexisse videtur ACHMET. Oneirocrit. Cap. XXXVIII. pag. 30. εἰ τις ἴδῃ, ὅτι ἐκ τῆς βαφῆς ἐβλάβησαν αἱ τρίχες αὐτῆ, καὶ ἔτος εἰς ἐρημίαν τῆ πλῆθους αὐτῆ καὶ θλίψιν μεγάλην ἐλεύσεται: Si quis viderit, pilos suos per tincturam, laesos ac corruptos fuisse; is opum suarum desolationem, magnamque calamitatem patietur. Vbi male vulgo legitur ἐρημίαν, pro ἐρημίαν, quod vnice nempe verum. Sicut et pari vitiosa per*

mutatione, in nonnullis vetustis STRABONIS exemplaribus, *Lib. XVI.prehenditur: ἐρημνεία μεγάλη, ἢ μεγάλη πόλις, nempe pro ἐρημία. Liceat vero iam hac ipsa commoda occasione, grauiorem adhuc mendam facile tollere ex eodem ACHMETE, Cap. CLXX. pag. 148. vbi sic vulgo legitur: εἰς τὰς εἰδὲ τῶν ἀστέρων ἐν ἀληθείαι, ἢτοι ἐν τύπῳ γραμμάτων, et ita male vertitur: Si quis videat sidera per res veras et existentes, puta in figura literarum. Sed falsae omnino hic sunt res istae verae: Legendum enim haud dubie: ἐν ἄλλῃ θέσει, in alia et insolita positione, veluti literarum. De quo alibi plura. Sed haec obiter.*

eodem elegantissimo Libello, *sect. xxxviii. pag. 63. de alia libidino-
sa et impudica foemina hoc refert. Illa morbo capitis, ex medicamento,
quo fucatum capillis nitorem inducebat, contracto, in ipso aetatis flore de-
cessit.*

Sed vnicum hic adhuc addam Remedium Cosmeticum, Chirur-
gicum quasi, vt ita dicam, paucissimis quidem cognitum, sed fae-
uum, crudele ac detestabile prorsus, hincque vix habiturum apud
lectores fidem. Solebant scilicet olim prouectioris iam aetatis puellae,
marcescente sensim nitidioris formae flore, truculentas manus in te-
neram suam faciem armare, atque variis adhibitis artibus ac cataplasma-
tis, veterem ipsi pellem detrahere, quo noua et iuuenilior Cutis suc-
cresceret, quae praeteritos quidem annos velaret, reductum vero
noua quasi vernatione, aetatis amoenioris florem callide mentiretur;
Veluti

Anguibz exuitur tenui cum pelle, vetustas.

Fidem vero huius incredibilis fere infaniae facit potissimum TIBUL-
LVS, cuius en ipsa verba, notatu sane digna, g)

*Tollere tunc cura est, albos a stirpe capillos,
Et Faciem, demta pelle, referre nouam.*

Putabam, inquit ibi, mirabundus quasi, maximus IOSEPHVS SCA-
LIGER, nostro tempore, tantum hoc incepisse. Sed, quantum video, non
minus illae veteres lupae insaniebant; quam hae nostrae aetatis. h) Idem
plane, vt ingenue fatear, tunc mihi accidit, quum primum hos ipsos
singulares versus Tibullianos legerem: Omnino enim putabam, illos
non tam proprie et secundum ipsa nuda verba, quam potius, poeti-
ce, aut allegorice, esse intelligendos; donec Vir quidam et natalium
splendore, et amplissimorum munerum dignitate, et summa denique
eruditione illustrissimus, iam ante complures annos, coelitibus ad-
scriptus, mihi serio affirmaret, quum forte de vero huius ipsius loci
sensu,

g) Lib. I. Eleg. ix. 45.

h) In Castigat. in TIBULLVM, pag.
148. vbi vid. et alios etfi patricos, recen-
tiores Interpretes. Nihil tamen hic ob-

seruauit cl. HEYNE, amicus noster cla-
rissimus, in nouissima sua suauissimi hu-
ius poetae Editione, multo magnoque
labore curata.

sensu, sermo incidisset, sese quondam in ipsa sua familia, nobilem habuisse virginem, quae iisdem quasi furiis exagitata, idem crudele facinus in se tentasset, et vix praesentissimum Vitae periculum salua effugisset, nisi assidua solertiorum Medicorum cura atque industria sero tandem ipsam a proximo rapacis leti limine reuocasset. Addebat praeterea, in Italia praesertim, hanc quidem cruentam insaniam frequentius regnare, aut rectius loquendo, impunius saeuire, inter puellas publicati maxime pudoris, quae crudelissimo hoc et ancipiti remedio, veterem quasi pellem rugasque seniles exuerent, quo renato veluti prioris iuuentae flore, ex impermissis gaudiis sic diutius captare possent sordidum et inhonestum lucrum a pretiosis suis dedecorum emtoribus, vt nempe poëta lepidissimè de re turpissima loquitur. Quorsum et nonnihil pertinet Casus ille Tragico-Comicus, vt sic loquar, relatus a VITO RIEDLINO, *Curar. medicar. Obs. 745. Cent. VIII. pag. 464.* de quadam nempe Ancilla, formae suae sat iam venustae, per remedia cosmetica, adhuc tamen magis augendae, iusto studiosiore, quae loco consuetae sibi aquae cosmeticae mitioris, aquam sic dictam fortem, a iuvene nequam, illi clanculum substitutam, temere arripiendo, totamque faciem eadem lauando, inter saeuissimos certe dolores et ardores, erosionesque, veterem quidem cuticulam perdidit; sed felici veluti ac lucrosa iactura, nouam plane, illa ipsa longe teneriorem ac nitidiorem sensim recuperauit, adeo, vt ille quidem nebulo et sceleris artifex postea, magnam potius ab ea gratiam ex hac fausta fraude, inierit. Magis tamen violentum ac periculosum Cosmeticum Matronae faciei foedissimis pustulis ardentibus vndiquaque obfitae, inito consilio, applicandum censuerunt magni illi Medici, HOLLERIUS, PARAEVS, alique, imponendo nempe ipsi emplastrum ex cantharidibus paratum: vnde quidem dirissima mox et ipsum interitum minitancia subsequuta sunt symptomata; quibus tamen per idonea remedia, feliciter sedatis, et effusa interim simul eruptis totius faciei exulceratae vesicis, ingenti saniei purulentae copia, omnis illa insanabilis prius deformitas in perpetuum euauit, faciesque ipsa noua, quasi luna renata, longe purius pulchriusque enituit, adeo, vt et opu-

lentum sponsum eadem alliceret, felixque coniugium iniret. Vid. PARAEI *Opp. Lib. XX. cap. 28. pag. 593.* et FREIND *Comment. 9. in Hipp. Epid. p. 159.*

Sed nolo iam plura de fuko, ab omni scil. mendaci fuko alienissimus. Nam, vt cum PRUDENTIO, *Hamartigen. 273. seqq.* tandem finiam,

*Taedet sacrilegas matrum percurrere curas,
Muneribus dotata Dei quae plasmata fuko
Inficiunt, vt pigmentis cutis inlita perdat
Quod fuerat, falso non agnoscenda colore.*

EXERCITATIO NONA.

IN

DIFFICILEM PLINII LOCVM

LIB. VII. CAP. 50.

DE

MORBO PER SAPIENTIAM MORI.

Perosque Mortalium per Moriam mori, siue per stultitiam suam, in frangendis perdendisque animi et corporis viribus, subinde commissam, grauissimos sibi morbos contrahere, mortesque subitas ante diem, arcessere, ita, vt ista consueta stultitia, non tam Coelum ipsum, quod olim notabat poëta, quam orcum potius atque sepulchrum, petere videantur: id adeo vsque frequenti constantique experientia, ab omni quidem aeuo, vbiuis confirmatum esse arbitror, vt nemo forsan reperiatur, qui de tam explorata ac manifesta veritate vel minimum dubitare audeat. Inde igitur mirum semper, immo paene morum, visum fuit eruditis Viris quam plurimis, qui PLINIVS ^{a)} sensu prorsus contrario, in hunc quidem modum, scribere olim potuerit: *Atque etiam Morbus est aliquis per Sapienciam mori.* Hinc nescio quis sapientiae, aut alius certe morbus illorum mentes inuasit, vt in hoc quidem

a) *Lib. VII. Cap. 50.*

dem *Sapientiae Morbo* explicando, acerrimas inter sese lites agitarent et infestis quasi signis concurrerent, ac si de ipsa Sapientiae arce aut occupanda, aut defendenda, pugnandum esset. *) Quorum multas diversas de hoc loco, sententias operose produxit, ac acute diiudicavit CASP. AREIUS, b) ipse simul diligens Pliniani huius oraculi obscurioris Indagator et interpret: et post eum, ut iam monui, WALDSCHMIDIVS, plures autem adhuc collegit ANDR. SCHOTTVS, c) quas inter tamen, ut ingenue fatear, multae occurrunt, quae ab ipsa sapientia minime dictatae videntur; quorsum et ista pertinet, quae a DAN. HEINSIO prolata potius, quam probata fuit, *): neque ipse SCHOTTVS hic meliorem elegit partem, quam sequeretur. Quod nec praestitit ex eadem societate, sodalis, IO. HARDVINVS, d) licet ibi nouam minusque astutam, ut ipse ait, interpretationem sese inuenisse ac tradidisse gloriatur, quod ipsi quidem ambabus, quod dicitur, largimur; quoniam illa omnino minus astuta est. Sapientius vero atque felicius de hoc sapientiae morbo, olim inter sese disputarunt praestantissimi Viri IO. BEVEROVICIUS, e) et CLAVD. SALMASIVS, f) praeuntibus nempe lucidamque facem praeferebantibus ipsis maximis quondam ingeniis, IO. DALECHAMPIO, g) IOSEPHO SCALIGERO, h) HIERON. MERCVRIALI, i) aliisque nonnullis. Quibus omnibus nouissime accessit Cel. HEVMANNVS, qui relictis

S S S 3

et

*) Conf. huc inprimis WILHELM HVLDERICI WALDSCHMIDII, *Disquisitio Academ. de hoc ipso PLINII loco*, Kiliae, 1703. ubi omnes fere discrepantes inter sese eruditorum variorum circa hunc locum controuersum, sententias diligenter recenset, et accurate examinat. Add. FRANCK. de FRANCKENAV *Satyr. Med.* IX. p. 174.

b) In *Elysio iucundar. Quaestion. Campo, Quaest. C.* p. 1236. sqq.

c) *Observat. Human. Lib. V. Cap. X.* pag. 217. sq.

*) Cuius vid. de hoc PLINII loco, *Epistola*, in *Epistolicis Quaestionibus* IO. BEVEROVICII, pag. 28. sqq.

d) In *Not. ad istum PLINII locum*, p. 406. copiosius vero ibidem, pag. 429. Tom. I. opp. cuius et vid. praefat. de hac controuersia.

e) In *Epistol. Quaestion.* pag. 65. sqq.

f) Ibidem, pag. 69. sqq. et in *Op. Epistolar. Salmas. Epist. 36. p. 79. sqq.* et *Epist. 40. pag. 86.* praesertim autem in *Exercit. PLIN.* pag. 283.

g) In *Not. ad PLIN.* pag. 465. Tom. I. *Opp. cum Not. Varior.*

h) In SCALIGERANIS *primis*, p. III.

i) *Varior. Lektion. Lib. VI. Cap. XX.* p. 129. b.

et reiectis aliorum sententiis, hucusque quidem cognitis, nouam plane viam, pro more, ingressus est, qua explicaret et emendaret PLINIVM, quo vero successu illud factum fuerit, aliorum esto iudicium. Nobis enim iam per Chartae temporisque angustiam, et instituti nostri rationem, nec licet, nec libet, aut hanc nouissimam, aut RAMAZZINIANAM, *) aut ceteras antiquiores circa hunc locum PLINII controuersum, a REIESIO, SCHOTTO, HARDVINO et WALDSCHMIDIO, larga quasi manu allatas, diligentius referre, vel operosius refellere, praesertim, quum a moribus nostris maxime abhorreat, crambem toties iam coctam inani opera recoquere, et fastidiosa copia lectores a dapibus nostris, forsan haud satis scite conditis, abstertere, ut nauseam scilicet capiant, et impransi quasi, abeant.

Vt igitur nunc omnia paucis complectar, quae circa hunc quidem tot controuersis nobilem PLINII locum, ambitiosus dici et adferri poterant; ea certe illius explicatio visa mihi semper fuit ceu simplicissima et simul verissima, quam partim iuenerunt, partim autem inuentam et adoptatam, propagarunt ac propugnarunt Viri per orbem celeberrimi superius iam cum merita laude allegati, nimirum IO. DALECHAMPIVS, HIERON. MERCVRIALIS, IOS. SCALIGER, IO. BEVEROVICIUS et CLAVD. SALMASIVS, cum paucis aliis, quos inter potissimum eminet WALDSCHMIDIUS, iam supra aliquoties laudatus, item, quod inprimis maximum firmamentum sententiae isti addit, ill. VAN SWIETEN, **) qui nempe, mea certe opinione, sat liquido solideque demonstrarunt, per istum quidem *Sapientiae Morbum*, in PLINIO, nihil intelligendum esse aliud, quam diram phrenitin, seu atrocem Meningum Cerebri inflammationem, cum ferocissimo mentis emotae delirio, ceu cuius notum, coniunctam. Quorum verissimillimae sententiae grauissimum praesertim pondus solidissimumque robur ipse mox adiicit PLINIVS, ceu optimus fidelissimusque verborum

*) Vid. egregium RAMAZZINI Libellum de *Morbis Artificum*, Cap. ultimo, pag. 315. Conf. huc de la CERDA, *Comment.* ad VIRGILII GEORG. Lib. IV. pag. 520.

**) *Comment. in Aphorif.* BOEHAAV. Tom. II. p. 579. vbi et plura vid. in seqq. quae huc maxime spectant, pag. 585. sqq. et pag. 329. sqq.

rum suorum interpretes, Capite proxime sequenti 51. haec vberioris veluti explicationis gratia, et quidem ex HIPPOCRATE ipso, sapienter subiungens: *Iam signa letalia: In furoris morbo risum: Sapientiae vero aegritudine, fimbriarum curam et stragulae vestis plicaturas.*

Ex quibus nunc luculenter admodum, opinor, patet, ipsum sub *Sapientiae Morbo*, vel aegritudine, potissimum descripsisse saeuum phrenitidis morbum. Constat enim Medicos inter omnes, singularia illa signa, seu symptomata, *fimbriarum* inquam, *curam*, et *stragulae Vestis plicaturas*, siue, vt vulgo apud Medicos veteres audiunt, *Crocidiſmum* et *Carphologiam* inter primaria praesentis phrenitidis signa diagnostica et diacritica, merito censerī, nec perfectam et adultam quasi phrenitidem sine iisdem, facile reperiri. Sic enim post ipsum HIPPOCRATEM nostrum, qui primus frequentius huius ipsius funesti indicii meminit, ^{k)} et HIPPOCRATEM alterum, puta ARETAEVM, ^{l)} item GALENUM, ^{m)} omnes fere Medici veteres, illos quidem subsequuti, anxium istud, etsi inane, floccos, festucas, pilosque vellendi ac legendi studium, ceu praecipuum et eminens veluti signum, in phreniticis, sedulo adnotarunt, quod aliquot singularibus locis, ex ipsis petitis, iam probare, haud alienum, aut inconueniens, spero, erit. Ita nempe ALEXANDER TRALLIANVS, ⁿ⁾ ἐπὶ πλέον δ' ἐπιτείνόμενος τῷ πάλῳ, ἀρχονται καὶ κροκιδίζειν καὶ καρφολογεῖν, si autem affectus magis intendatur, incipiunt et floccos carpere et festucas legere: nec non PAVLLVS AEGINETA,

k) V. g. in praenot. pag. 451. T. I. Edit. Lind. I. praedict. p. 474. et Coac. praenot. p. 527. item III. Epid. sect. III. p. 741. VII. Epid. pag. 834. de Intern. Affect. p. 253. Tom. II. et de Victu Acutor. pag. 304. Conf. FOES. in Oecon. p. 190. et p. 218. item PROSP. ALPIN. de praesag. Vita et Morte, Lib. II. Cap. III. pag. 81. et THOM. FIENI semiot. part. II. Cap. VI. pag. 214. vt et CASAVB. ad THEOPHRAST. Charact. p. 121.

l) pag. 73. et ibi PETR. PETITVS, in Comment. p. 226.

m) Lib. IV. de Loc. affect. Cap. II. pag. 455. Tom. VII. opp. item Lib. V. cap. 4. p. 489. et in Comment. ad HIPPOCRAT. Prognost. pag. 607. Tom. VIII. vbi simul scite obseruat, posteriores omnes Medicos vsitatas sibi voces κροκιδίζειν, et καρφολογεῖν, de signis phreniticorum, ab illis HIPPOCRATEIS mutuatos fuisse: quem et Vid. Tom. IX part. I. pag. 84. et Tom. II. pag. 379. et alibi saepius.

l) De Morbor. Acutor. Cur. Lib. I. Cap.

n) Lib. I. Cap. XIII. pag. 44.

NETA, ^o) καὶ κροκιδίζουσιν, καὶ καρφολογῶσι, καὶ πυρέττειν ὀξέως παρ' ὅλον τῷ νοσήματος τὸν χρόνον, et floccos vellunt, et festucas colligunt, et peracuta febre laborant per omne morbi tempus: NONVS quoque ^p): παρέπεται αὐτοῖς πυρετὸς ὀξύς, καὶ παραφροσύνη, καὶ κροκιδισμὸς τῶν χειρῶν, Comitatur phreniticos febris acuta, delirium, et manibus floccos euellere videntur. Sed clarius adhuc rem explicat CAELIVS AVRELIANVS, ^q) ita scilicet scite definiens atrocem illum morbum: Phrenitim esse alienationem mentis celerem, cum febre acuta, atque manuum vano errore, ut aliquid suis digitis attrectare videantur, quod Graeci κροκιδισμόν, siue καρφολογίαν vocant, et paruo pulsu ac denso. Iterum in sequentibus, ^r) intelligimus, phrenitim ex concurrenti febre acuta, et alienatione mentis, et pulsu paruo atque crebro, attestante Carphologia et Crocidismo. Ex his enim intelligitur passionis genus. Omnium autem luculentissime paullo post, ^s) vbi de discernenda, ab aliis morbis acutis, phrenitide, accuratius tractat: Ab aliis deliriis ita discerni, vel internosci potest, cum neque Crocidismum in aegrotantibus viderimus, quod est ex operimentis fimbriarum veluti decerptio; neque Carphologiam, quae est festucarum leuiam a parietibus veluti detractio, quam necesse est phreniticos facere. Neque sane diuersum ab his sentit THEODORVS PRISCIANVS, ^t) Phreneticorum, scribens, causas certa accidentia et manifesta designant. Sunt enim acutae febres cum terribili mentis alienatione, sunt iuges insomnietates, ex Meningae incensione, vel indignatione venientes, et quod speciale accidens his tantummodo manifestum est, de parietibus, aut straminibus paleas, vel floccos legunt. Qui singularis THEODORI locus in primis hanc in rem, notari meretur. Interea tamen non diffitemur, etiam in aliis morbis acutis, Carphologiam et Crocidismum, phreniticis alias quasi proprium, nonnunquam obseruari: licet hic non tam de eo sit quaestio, quid saepe, aut aliquando; quam potius, quid semper fiat. Sic enim ipse HIPPOCRATES: ^u) ὁκόσοισι ἐν πυρετοῖσι κοιλίη ὑγρὴ, καὶ γνώμη τεταραγμένη

^o) Libr. III. Cap. VI. pag. 28.

^p) De Morborum particularium Curat. Cap. xxv. pag. 28.

^q) Acutarum Passionum Lib. I. Prooem. pag. 8. fine.

^r) Ibidem, Cap. III. pag. 13.

^s) Eodem Libro I. Cap. v. pag. 19.

^t) Lib. II. seu Logic. Cap. II. pag. 67.

^u) De Victu acutor. pag. 304. Tom. II. Opp. Lind. Edit.

γμένη καὶ οἱ πολλοὶ τῶν τοιγτέων τὰς κροκίδας ἀφαιρέσει. Quibus au-
tem in febris, alius liquida est, et mens perturbata, et multi ex talibus,
floccos auferunt: item alibi manifestius, x) ὁκοσοισιν ἐν πυρετοῖσιν ὀξέσιν,
ἢ περιπλευμονήσιν, ἢ φρενίτισιν, ἢ κεφαλαλγίῃσι, πρὸ τῆ προ-
σώπῃ φερόμενας, καὶ θηρεύσας διὰ κενῆς, καὶ ἀποκαρφολογέσας, καὶ
κροκίδας ἀπὸ τῶν ἱματίων ἀποτιλλέσας, καὶ ἀπὸ τῆ τοίχῃ ἀχυ-
ρα ἀποσπώσας, πάσας εἶναι κακὰς καὶ θανατώδεις: Quae ita elegan-
ter, vt solet, plerumque, Latine reddidit Romanus ille HIPPOCRA-
TES, CORN. CELSVS: y) Illa quoque Mortis indicia sunt: si manibus
quis in febre, et acuto morbo, vel insania, pulmonisue dolore, vel capitis, in
Veste floccos legit, fimbriasque diducit, vel in adiuncto pariete, si qua minuta
eminent, carpit. Vnde nunc perspicue, opinor, patet, quam temera-
riam, immo paene phreniticam, vt ita loquar, Censuram in CORNE-
LIUM CELSUM hic exercuerit nouus ille optimorum Auctorum Ve-
terum ZOILVS, aut ARISTARCHVS, et vitio creatus Censor,
CLAVDIVS VERDERIVS, z) quum ex vanissimo obloquendi et re-
prehendendi studio, ita contra ipsum insurgere haud erubesceret:
Apud CELSUM observationes quaedam sunt ludicrae: qualis haec, si nimi-
rum aegrotus summis digitis extrema parietum euellat, hoc est, lapillos ex mu-
ro exradicet, signum mortis esse. Quodsi enim bonus iste, aut malus,
homo ipsum HIPPOCRATEM, ceterosque Medicos veteres hacte-
nus laudatos, paullo diligentius legisset, aut recentiores peritos in ar-
te salutari doctores consulisset, prudenter haud dubie pudenterque
ab ista sua frivola ac ieiuna censura abstinuisset, certiusque tum didi-
cisset, istam quidem de phreniticorum *Crocidismo* et *Carphologia*, ob-
serua-

x) In Praenot. Tom. I. pag. 451. vbi
vid SPON. Apb. Nou. pag. 184.

y) Lib. II. Cap. VI. pag. 55.

z) In sic dicta Censura in Auctores, pag.
144. de quo portentoso et plerumque pei-
fimo optimorum Auctorum Censore, cae-
terum Vid. MORHOF. Polyhist. Tom. 1.
Lib. I. pag. 191. STRVVI Introduc. ad
Norit. Rei Litter. Cap. V. pag. 237. THOM.

BARTHOLINI Epist. Med. 4. Cent. III.
pag. 16. sqq. B. MENCKEN. de Histrio-
nia seu Charlataneria Eruditor. pag. 43.
VOSSII Lib. IV. et V. Rhetor. KOENI-
GII Bibl. Vet. et Nou. p. 81. BAILLET
iudic. Eruditor. etc. Tom. II, 61. pag. 7.
aliosque plures, qui insanabile illud Ca-
put acerrimo lixiuio ex iusta indignatio-
ne et vindicta, merito perfricuerunt.

feruationem non tam ludicram esse, ut ipse sat ludicre opinabatur, quam potius maxime seriam solidamque, cum ipso quippe ineluctabili fere vitae periculo plerumque coniunctam *) Quare fatalem istum praecocis sapientiae morbum, quo mens aegra VERDERII laborabat, in CELSO, quin et HIPPOCRATE ipso, primo quidem huius singularis observationis Auctore, et toto Medicorum ordine, temere redarguendo, non sine acri iustaque censura, merito dimisit Celeb. MOR-
GAGNVS. a)

Quum igitur sat luculenter abundeque, nisi fallor, haecenus demonstratum sit, funestam illam *Carphologiam* atque *Crocidismum* semper esse signa phrenitidi propria, perpetuo ipsi adiuncta et inseparabilia, verbo, vera pathognomonica, per quae potissimum illa ab aliis morbis acutis ac deliriis accuratius discerni et internosci possit: hinc iam non dubitamus amplius, in maximorum Virorum SCALIGERI nempe, atque SALMASII eosque feliciter sequuti WALDSCHMIDII, atque SWIETENII, sententiam lubentissime descendere, atque cum illis confidenter asserere, quo mentem nostram praecipue propendere, iam supra subindicauius, PLINIVM nempe per *Sapientiae Morbum*, aut *aegritudinem*, nihil intellexisse aliud, quam quidem ipsam phrenitidem; idque ideo vel maxime, quod mox, ceu signum ipsi proprium, speciale, eminens atque inseparabile, illi ex ipso, quem laudat, HIPPOCRATE, adiungat *fimbriarum curam atque stragulae vestis plicaturas*, hoc est *Crocidismum* et *Carphologiam*, quod quidem certissimum. Sed praestat iam, ipsa illa bina Reipublicae litterariae oracula splendidissima, SCALIGERVUM inquam, atque SALMASIVM, suis quidem verbis, adyto quasi dignis, audire. Sic ergo ille maximus non Veterum solum Auctorum; sed et ipsorum temporum Emenda-
tor

*) De quo plura exempla memorabilia vid. apud PETR. FORESTVM, *Obs. Med.* 2. *Lib.* x. *pag.* 17. et *ibid.* *Schol.* *pag.* 23. et *pag.* 28. item *Obs.* 3. *pag.* 35. et *Schol.* *pag.* 38. ac denique *Obs.* II. *pag.* 93. ut iam HILDANVM, ZACVT.

LVSITANVM SENNERTVM, FERNELIVM, DVRETVM, HOLLERIVM, BELLINVM, PORTVM, aliosque plures observationum medicarum collectores, taceam.

a) *Epist. in CELSVM*, *pag.* II. *sqq.*

tor felicissimus: ^{b)} *Sapientiae Morbus* duobus locis, apud PLINIVM, Lib. VII. est *Complicatio stragulorum*, κροκυλεγμός Graecis, floccorum lectio: Κροκιδίζω, siue κροκιδίζω, floccos lego, verbum est Medicorum, de Phreniticis dici solitum. Φρένες autem saepe prudentiam significant: Φρενίτις Morbus, quo Sapientia laborat, vel aegritudo Sapientiae. PLINIVS, Lib. VII. Cap. LI. inter signa letalia ponit fimbriarum curam et stragulae vestis plicaturas, in Sapientiae Morbo. Haecenus SCALIGER de hoc Sapientiae Morbo, sapientissime.

Cui nunc suffragatur SALMASIVS, ^{c)} et successionis honore, et vasta eruditione, et hac ipsa denique sententia, ipsi SCALIGERO haud impar; cuius en ipsa iam accipe verba, lectu sane digna: κροκυδισμός in sapientiae morbo. GALENVS in Medico: Φρενίτις μὲν ἔν ἐστὶ ἐκτασις διανοίας μετὰ παρακοπῆς σφοδρᾶς, καὶ χειρῶν ἀλλοίωσιν περιφορᾶς, καὶ κροκυδισμῶ, καὶ καρφολογίας, καὶ πυρετῶ ὀξέος. PLINIVS, Φρενίτιν vocat sapientiae morbum, Lib. VII, Cap. 51. cui et fimbriarum curam et vestium plicaturas tribuit. Vt ἀρθρίτις dicitur articulorum morbus, quo laborant articuli: πλευρίτις, quo latera aegra sunt: πνευμονίτις, quo pulmones: ita et Φρενίτις, morbus, quo sapientia laborat, vel aegritudo sapientiae. Igitur sapientiae aegritudinem vocat τὴν Φρενίτιν, at furoris morbum ibidem, τὴν μανίαν. Idem ille alibi, ^{d)} τὴν Φρενίτιν PLINIVM intellexisse per sapientiae aegritudinem, plane mihi constat, vel τὴν Φρενῶν νόσον: quoniam nempe ipsum HIPPOCRATEM primum signa illa letalia, Crocidismum scilicet et Carphologiam, in aegritudine sapientiae, de phrenitide prodidisse autumat. Iam hinc certo certius Sapientiae morbum, vel aegritudi-

Ttt 2

nem

^{b)} In SCALIGERANIS primis, pag. III. Add. CASAVB. ad THEOPH. p. 121. et KÜSTER. ad SVIDAM, voce ἀφαιρῆν κροκίδας, pag. 392. Tom. I. item Cel. WESSELING. ad HERODOT. Lib. III. pag. 196. Ceterum illud κροκυλεγμός, laudatum a CASAVBONC, IOS. SCALIGERO atque SALMASIO, occurrit apud HESYCHIVM, hoc quidem modo: κροκυλεγμός, τὸ κολακευτικῶς τὰς κροκίδας ἀπολέγειν τῶν ἱματίων: pro quo vero in

perronianis, pag. 221. male, nisi fallor, ita legitur: κροκόλεργος, genus adulationis, a legendis floccis Vestium: quo ipso ad hunc ipsum HESYCHII locum manifesto respici, vix vllum, puto, superest dubium. Sed haec obiter.

^{c)} Exercitat. PLINIAN. pag. 283.

^{d)} Epist. SALMAS. XXXVI. p. 80. sq. et in Quaest. Epistol. BEVEROVICII p. 71. sqq.

nem ab eo vocari, quae graeco auctori, unde accepit, φρενίτις nominatur. Ita ergo et sapientiam usurpauerit in illis verbis paullo obscurioribus et intricatam sententiam continentibus: atque etiam Morbus est aliquis, per sapientiam mori. Quod graecis verbis hic forsitan expressum fuerit: ἐστὶ καὶ τὸ νόσος, τὸ φρενιτικὸν ἀποθνήσκειν. etc. Sed de his haecenus. Quae quum blanda veritatis specie sese cuius facile commendarent, mirum profecto haud erat, hanc ipsam planam ac perspicuam obscurioris illius loci PLINIANI explicationem, vtpote ex ipsa atrocis istius morbi natura et indole depromptam, ac tantorum Virorum auctoritate simul communitam plures eruditorum in liberum assensum protinus pertraxisse. Quos inter, vt alios iam praeteream, praecipue eminet Medicus quondam insignis, WEDELIVS, e) qui ipsi sapientem quoque de hoc sapientiae morbo, Exercitationem publicauit, in qua tamen in eo discessionem fecit a ceteris, quod statuit, PLINIVM quidem intellexisse phrenitin, sed non veram illam ac proprie sic dictam, quam potius alteram spuriam, siue notham, vt vulgo dicitur, ex sauciato, vel inflammato diaphragmate ortam. Qua vero impensa sua opera commodius supersedere potuisset, si tempestiue meminisset, CASPARVM A REIES iam olim hanc ipsam opinionem strenue et operose defendendam primum suscepisse. f) Vterque autem in hanc sententiam ideo potissimum inductus fuit, quod inter omnes constet, φρενῶν nomen olim diaphragmati fuisse impositum, quia ibi, ex communi fere veterum opinione, magna sapientiae humanae pars recondita quasi sit, indeque ipsius affectionem, seu phrenitin, vel ex violenta laesione, vel vehementi inflammatione, obortam, commodissime et ingeniosissime a PLINIO vocari potuisse *Sapientiae Morbum*, quod nempe αἱ φρένες et diaphragma denotent, et sapientiam, seu ipsam mentem humanam, ceu notissimum. Speciosa haec sunt, fateor, prima quidem fronte, et ad assensum facile impetrandum, non inepta, aut incommoda. Forsan enim in aliquo Medico vetere PLINIVS legerit: ἐστὶ δὲ καὶ νόσος τις, διὰ φρενῶν ἀποθνήσκειν, idque, ambiguo vocis φρενῶν sensu

e) *Exercitat. Med. Philol.* 10. Decad. x. pag. 77. sqq.

f) *Elys. iucundar. Quaest. Camp. Quaest.* 100. seu vltima, pag. 1257. sqq.

fenſu deceptus, per feſtinationem, negligentiam, aut Medicinae imperitiam, infeliciter verterit, (vt ſaepe nempe ſolet, copioſe id oſtendentibus SCALIGERIS, CAGNATO, REINESIO, HOFMANNO, BODAEIO A STAPEL, SARACENO, et aliis; praefertim autem SALMASIO, in vaſto *Exercit. PLIN.* opere, per omnes fere paginas, itemque HARDVINO,) in hunc nempe modum: *Atque etiam Morbus eſt aliquis, per ſapientiam mori*; quum potius reddere debuiffet: *Atque etiam Morbus eſt aliquis, per Diaphragma, ſeu Diaphragmatis inflammationem, mori.* Sic et apud HIPPOCRATEM ſaepe legitur: *φρένες ἀλγέσαι, φρένες πονέσαι, φρένες ὑσέσαι*, et ſimilia, quae pariter a rerum medicarum ignaro verti vitioſe poſſent per: *Mens, ſeu ſapientia dolet, laborat, aut aegrotat*; quum tamen de diaphragmate potius fermo eſſet, quod nempe proxime accedit ad Plinianam interpretationem. Sed illud incertum; hoc autem certius, iam antiquiſſimo HOMERI ævo, ad GALENI, AEGINETAE, THEOPHILI, quin et inferiora tempora, *φρένας* ſignificaffe diaphragma, ſeu ſeptum tranſverſum, longeque ſerius ipſum diaphragmatis nomen licet iam a PLATONE, in TIMAEIO, primum inuentum, obſervante GALENO, *Lib. v. de Loc. affect. Cap. 4.* in Scholis Medicorum fuiſſe receptum, vt iam alibi obiter oſtendi. Quod quum ab aliis multis, praefertim autem DIETERICO, 8) dudum vberius demonſtratum ſit, nolo incuſſum actum hic agere. Vnicum tamen mihi hanc in rem, proferre liceat HESYCHII locum, quod emendatione maxime indiget. Sic enim ille: *φρένες, μέρος τι τῶν ἐν τοσθίων, τὸ ὑπὸ τῷ ἥπατι κείμενον, τὸ διάφραγμα τῆς στήθους.* En vero hic nouum et inauditum hucusque diaphragmatis ſitum, *ὑπὸ τῷ ἥματι*, ſeu *ſub hepate*, quum tamen, vt vel lippis et tonſoribus notum, non *ſubter*, ſed potius *ſuper hepate*,

Ttt 3

diaphra-

g) In IATREO HIPPOCRAT. N. *Miſcell. L. v. Cap. xiv.* DALECAMP. ad 908. pag. 1372. ſp. add. COEL. RHODIGINI *Lib. ii. Antiq. Lect. Cap. li.* pag. 99 ſqq. item *Lib. iv. Cap. xxi.* WOVWER. *Polymath. Cap. ix. p. 58. ſqq.* HOFMANN. in GALEN. *de uſu part. iv.* 14. 238. p. 75. LAVRENT. *Anat. Lib. ix.* C. iv. qu. 4. pag. 736 ſqq. BRODAEI

PLIN. xi, 37. p. 805. Tom. i. et inprimis SANCTA CRVZ. ad HIPPOCR. *de Morbo Sacro. text. 73.* II. LINDEN. *physiol. Lib. i. Cap. vi. Art. 8. p. 150. ſqq.* vt iam FOESSIVM in Oecon. GORRAEVM alioſque Lexicographos taceam.

diaphragma circumtentum sit. Quare hic haud dubie legendum: ἐπὶ τῷ ἥπατι, *super hepate*, quomodo longe melius POLLUX: ἐπὶκαίται τῷ ἥπατι τὸ διάφραγμα, non autem ὑπόκειται. Vnde longe rectius ipse HOMERVS^{h)} nec Anatomes, nec Chirurgiae imperitus, ut alibi probavi: Πρὸς τῆθος, ὅθι φρένες ἥπαρ ἔχουσι, *ad pectus, ubi diaphragma hepar continet, sibi nempe annexum*: ubi videndus EUSTATHIUS, qui et alibi hac de re sic egregie: i) Φρένες, ἃ μόνον ἀσωμάτως καὶ νοητῶς, ἐπὶ λογισμῶ, ἀλλὰ καὶ μέρος τί τῶν σπλάγχων, ὃ καὶ διάφραγμα λέγεται. Ἔστι δὲ ὑμὴν ἀποχωρίζων τὸ ἥπαρ, μετὰ τῷ σπληνός, τῷ τε πνεύμονος καὶ τῆς καρδίας. Sed haec obiter. Hoc porro etiam extra omne dubium positum, ut pergamus, quod creditum olim fuerit, φρένας istas, seu diaphragma humanae Mentis ac Sapientiae amicam esse potissimum sedem et interius receptaculum, quod scilicet animaduertent boni isti prisci mortales, vulnerata, inflammata, aut quocunque alio modo laesa, nervosa imprimis diaphragmatis parte, ferocissimum illico oriri delirium, cum amaro risu et spasmo cynico et morte plerumque ipsa, coniunctum. Διὸ καὶ καλεῖνται φρένες, inquit ARISTOTELES, k) ὥς μετέχουσαι τι τῷ φρονεῖν: Sed sapientissime noster contra respondet HIPPOCRATES: l) εἴδε ὁἶδα ἔγωγε, τίνα δύναμιν ἔχουσιν αἱ φρένες, ὥστε φρονεῖν τε καὶ νοεῖν: Cui et suffragatur ipse ARISTOTELES, qui haec omnia HIPPOCRATI debet; sed maligno suo more, muneris Auctorem ingratus reticet. PLINIVS vero, dum haec ARISTOTELIS Latine verteret, sed nimis festinanter, ut plerumque solet, haec ipsa meliora perperam omisit. Sic enim ille: m) Quae praecordia appellant, quia Membrana Cordi praetenditur, Graeci appellarunt φρένας. Huic certe refertur accepta subtilitas Mentis: ideo nulla est

h) Lib. IX. Odyss. v. 301. quem locum merito laudat GALENVS, Lib. IV. de usu partium, Cap. XIV. p. 385. Tom. IV. opp. per CHARTER. Add. HOFMANNI Comment. l. c. p. 74.

i) In Comment. ad ILIAD. Lib. I. pag. 57. et ad Lib. III. p. 939. et alibi.

k) Lib. III. de Part. Animal. Cap. X. pag. 74. Edit. WECHEL.

l) Lib. de Morbo Sacro, p. 343. Opp. T. II. Edit. LINDEN. Conf. BALLON. Consil. Med. Lib. II. Hist. I. p. 16. Tom. III. et de Virg. et Mul. Morb. p. 119. Tom. IV. Opp. Venet. 1735.

m) Lib. XI. Hist. Nat. Cap. XXXVII. pag. 805. Tom. I. Opp. cum Var. Not.

ei Caro, sed nervosa exilitas. Bella vero ratio, et insuper quoque falsa; quum nemo hodie nesciat, ipsum diaphragma ex parte tam carnosum, quam nervosum, constare: quod in eodem loco iam ipse docuit ARISTOTELES, quem vero prae manibus potius, quam prae oculis, tum habuisse videtur PLINIVS. Verum, si et haec omnia ultro largiamur, si et praeterea sponte concedamus, illud quidem atrox delirium ex diaphragmate laeso obortum, recte vocari posse phrenitin, quod negabat quidem olim, cum aliis, ALEXANDER TRALLIANVS ⁿ⁾ rectius vero affirmat his HIPPOCRATES ^{o)}: φρενίτιδες γίνονται καὶ ἐξ ἐτέρων νόσων τὰς φρένας ἀλγέουσιν, ὥστε μὴ εἶσαι ἀν' ἀφ' εἰσθαι. Καὶ πῦρ ἡκεῖ, καὶ ἐκφρονές εἰσι, καὶ ἀτενὲς βλέπουσιν, vt GALENUM, AEGINETAM, ORIBASIVM aliosque, et ex recentioribus, praesertim BALLUNIVM, illis cunctis doctrina et experientia omnino parem, iam taceam: Tamen ne sic quidem satis bene perspicio, quid noua hac sua ac singulari opinione potissimum iuuerint PLINIVM CASPARVS AREIUS, licet triumphum quasi ante Victoriā, canat, et agonotheam audacter poscat, et eum sero post, ignorato hoc suo doctore ac ductore, sequutus, WEDELIVS? Siue enim sub isto *sapientiae Morbo*, ipsa illa phrenitis vera ac proprie sic dicta, intelligatur, quae in Cerebri eiusque Meningum inflammatione, fontem quasi suum ac fundum habet; siue de altera phrenitide, seu paraphrenitide, accipiatur, quae in diaphragmate laeso, aut inflammato, sedem sibi constituit: Vtraque certe commodissime et acutissime dici omnino poterat *Morbus sapientiae*, hoc est: νόσος φρενός, seu φρενῶν, ψυχῆς πόνος, πάθος σοφίας καὶ διανοίας, vt HIPPOCRATES noster saepe loquitur, qui et aliquoties in Aphorismis et alibi, dixit, φρενὶν item γνώμη νοσέει, et ὑπὸ σοφίης νοσέειν: quae de loquendi ratione elegantissima nos alibi plura adnotauimus: ^{p)} Non enim

ⁿ⁾ Lib. I. Cap. XIII. pag. 45.

^{o)} Lib. III. de Morbis, 9 pag. 101.

Tom. II. Opp. vbi vid. PROSP. MARTIAN. in Comment. pag. 189. et p. 191. et ARNOLD. VILLANOVAN. de parte operat. pag. 262. Add. inprimis DIETERICI Iatreum HIPPOCR. pag. 1375.

sq. LAVRENT. Anat. Lib. IX. Cap. IV. quaest. 4. p. 736. sq. et ipse rursus HIPPOCRATES, de Affect. pag. 166.

^{p)} Lib. IV. Observat. Crit. Cap. XIII. pag. 377. vbi et plures Auctores alios laudauimus, qui illas similesque phrasas metaphoricas scite et diligenter explicarunt.

enim PLINIVS respexisse solum videtur ad locum affectum, siue cerebrum fuerit, siue diaphragma, sed potius ad ipsum Morbi effectum, Mentis nempe alienationem et sapientiae turbationem. Inde ergo vtraque phrenitis semper est φρενὸς νόσος, siue *sapientiae Morbus*, quoniam nempe in eo Mens potissimum sana mirum quantum turbatur, et tristibus vmbis, horrendisque visis inquietatur.

Praeterea quoque vera illa Cerebri phrenitis frequentissime per consensum nempe neruorum et mutuam συμπάθειαν, monstrante bene DIEMERBROECKIO, *) coniuncta est cum altera illa diaphragmatis, quod vel ex difficili, suspiriosa et anxia respiratione, praesertim vero dolore, tumore ac tensione ipsius diaphragmatis et hypochondriorum, etiam ab ipso HIPPOCRATE superius observata, manifestius patet. Inde huc post GALENUM, Libb. de Affect. egregie PAVLLVS AEGINETA: †) ἔστιν ὅτε καὶ τῷ διαφράγματι συμπάσχει ὁ ἐγκέφαλος, διὰ τῶν κατασπειρωμένων ἐν αὐτῷ νεύρων, τὸ πάθος ὑπομένει: et mox, paucis interiectis: εἰ δὲ κατὰ συμπάθειαν τῶν φρενῶν, φρενίτις γίγνεται, ἢ τε ἀναπνοὴ ἀνώμαλός ἐστιν, καὶ τὰ ὑποχόνδρια ἀνασπᾶται. Denique his omnibus accedit, quod proprium et primum verae phrenitidis signum sit *Crocidisimus* et *Carphologia*, vt supra latius demonstraui: quum e contrario, illa altera diaphragmatis phrenitis risum potius inconditum, acerbum ac paene Sardonium, vna cum horrendo vultus spasmo cynico, ceu signum eminens pathognomonicum, sibi adiunctum habeat. Sicut ipse HIPPOCRATES ‡) funesto TYCHONIS infelicis exemplo, praeter alia, probat,

*) *Anat. Lib. II. Cap. III. pag. 257. add. BARTHOLIN. RIOLAN. LAVRENT. et alios, qui de diaphragmate scripserunt.*

†) *Lib. III. Cap. VI. pag. 27. b. et p. sqq. 28. Conf. FOREST. Lib. X. Obs. 2. pag. 30. sqq. schol. BALLON. Consil. Med. Lib. II. Hist. I. pag. 16. Tom. III. opp. Venez. 1735. item de Virg. et Mul. Morb. pag. 119. Tom. IV. WILLIS de Anima Brutor. etc. Part. II. Cap. XI. pag.*

257. et Prosp. ALPIN. de praesag. Vit. et Mort. Lib. II. Cap. III. pag. 85. sqq. item FRANC. PORTI Dec. Med. Lib. II. Cap. II. pag. 43.

‡) *Lib. V. Epidem. pag. 794. et Lib. VII. pag. 877. it. Lib. I. Epid. Sect. 3. Aeg. 2. pag. 673. et ibi GALEN. pag. 102. T. IX. Opp. Part. I. Conf. SCALIGER. Exercit. in CARDAN. CCCXVIII. 6. pag. 976. sqq. et SCVLTTET Armament. Chir-urg.*

bat, qui in obsidione circa Datum, catapulta diaphragma traiectus, *συν γέλωτι θορυβώδει ἐτελεύτεσεν*, cum risu tumultuoso, moriebatur: quale quid etiam ARISTOTELES^{s)} de bellatoribus, diaphragma percussis, refert, et ex eo sic PLINIVS: ^{t)} *In proeliis, gladiatorumque spectaculis, mortem cum risu, traiecta praecordia attulerunt.* Quum ergo ipse hic PLINIVS in *Sapientiae Morbo*, aut aegritudine, *simbriarum curam et stragulae vestis plicaturas*, ceu potissimum et singulare signum, adnotauerit, *risum autem furoris morbo*, vel ex diaphragmatis laesione, vel quacunque alia denique causa, oborto, tribuerit; quod pessime quidem hic inuertit et in PLINIO transponit REIES, merito inde notatus ob infelicem audaciam, a WALDSCHMIDIO: Sat valide, me quidem iudice, exinde sequi videtur, illum per *sapientiae Morbum*, solam veram phrenitin, a *Crocidismo* et *Carphologia* semper comitatam, intellexisse.

Haec vero omnia iam perscripseram, quum mihi, nihil tale cogitanti, forte fortuna, ab Amico adfertur B. nostri quondam STENZELII Exercitatio bene longa, de hoc ipso PLINII loco, hic 1736. publicata, in qua variis allatis prius, moxque iterum relictis, coniecturis, tandem, ceu de ipsa veritate certissime persuasus, aperte pronunciat, nullum alium hic a PLINIO descriptum fuisse morbum, quam quidem diram *αὐτοχειρίαν*, seu Mortem manu impia et inhumana, in proprio corpore, factam. Quae vero an ipsa PLINII mens fuerit? alii diligentius disquirant et ingenue diiudicent: Ego certe lubens prudensque iudicium meum quaecunque hic suspendo, ne in pios B. Antecessoris nostri manes temere forsan peccasse videar. Sed ne nimia loquacitate in ipsum forte *sapientiae morbum* incidamus, nunc demum *modum quasi teneamus ex sapientia*, quod TACITVS merito olim iudicabat difficillimum.

Haec

urg. Part. II. Obs. LIII. pag. 117. vbi similem fere Casum retulit. Add. CAME-
RARIJ Memorab. Med. P. II. Obs. 88.
Cent. x. pag. 835. sqq. et REIES, Quaest.
100. pag. 1261. sqq.

s) Lib. III. de Partibus Animal. Cap.
x. pag. 57.

t) Lib. XI. Cap. XXXVII.

Haec autem qualiacunque vt commentaremur, opportunam nobis occasionem vberemque differendi materiam nobis benigne prae-
buit haec ipsa docta et elegans dissertatio *de Crocidismo et Carphologia*,
Signo in Morbis acutis plerumque letali.

ORNATISSIMO ET DOCTISSIMO CANDIDATO

S. P. D.

DANIEL WILHELMVS TRILLERVS

FAC. MED. H. T. DECANVS.

Quum TIBI inaugurale quoddam specimen in publicam lucem edituro, haud satis placerent vulgaria quidem illa et millies iam pertractata et recocta quasi, dissertationum argumenta, quae quotidie, de pallidis febribus, nodosa podagra, rigida arthritide, foeda scabie, similibusque humanae gentis calamitatibus, vulgo notissimis, ingenti lectorum delicatiorum cum nausea, ceu merces fastiditae ac periturae, in forum publicum extruduntur: dubitanti TIBI ac circumspicienti, rogatus, inter alia, Auctor fui, vt de *Crocidismo et Carphologia*, memorabili illo et singulari atrocis phrenitidis signo, dissertationem TVAM conscriberes, de quo nempe in Veterum quidem Graecorum et Latinorum Medicorum monumentis, frequens fieret mentio, in Recentiorum vero Libris, paene nulla, aut certe perquam rara ac parca, adeo, vt ne vllam quidem, de isto argumento, dissertationem me vnquam conspexisse, recorder. Quare vix dubito, quin vel ex Medicis ipsis, in Veterum Auctorum lectione haud satis versatis, futuri sint nonnulli, quibus ipse tuae dissertationis Titulus obscurus, peregrinus, atque plane incognitus visus fuerit. Candido ergo meo Consilio libenter obsequutus, argumentum illud, TIBI a me propositum, breuiter quidem, sed tamen simul tam docte et perite tractasti, vt nihil propemodum desiderari possit, quod ad ipsam quidem rem sufficienter explicandam, quidquam conferat. Quod si
vero

vero quidam forsan adhuc defint Veterum Medicorum loci, eos haud dubie, in Lectorum commodum, supplebit Programma nostrum, ipsi dissertationi TVAE doctissimae subiunctum. Gratulor ergo TIBI ex animo, de hoc primo eruditionis tuae medicae specimine egregio, ex quo perspicue patet, quantos indefesso studio, in arte nostra feceris progressus. Gratulor quoque venerando TVO Patri, doctrina pio, Vita probo, et TE denique, tam bonae indolis Filio, felici, quod spes suas in tenera adhuc aetate, de TE conceptas, hodie non solum largissime impletas, sed et fausto sane et iucundo errore, longissime superatas spectat, atque ex summis honoribus, TIBI merito collatis, incredibilem paene capit animi voluptatem, quam nemo certe persentiscere, aut explicare valet, nisi qui ipse fuerit pater. Gratulor porro ipsi ordini nostro, de tam bonae frugis discipulo, in quo erudiendo, et expoliendo ipsum nunquam poenitere debet impensae quondam operae ac diligentiae. Gratulor denique omnibus aegris, qui a tuis salutaribus consiliis in posterum, non solum auxilium petent, sed et, ut spe fere certa praesumo, impetrabunt. Ita ergo Vale ex voto TVO, meoque, ac mihi, vna cum reuerendo tuo patre, amico et fautore nostro integerrimo, fauere perge. Scribebam raptim inter negotia priuata, et calamitares publicas, Wittebergae, D. XXVII. Septembr. A. O. R. cio id cclvii.



EXERCITATIO DECIMA.

DE

NOVA VERAQVE EXPLICATIONE

LOCI CVIVSDAM HIPPOCRATICI

HACTENVVS OBSCVRISSIMI

E LIB. VII. DE MORB. EPIDEM. EXTREM.

DE

MENSIBVS PER NARES

LEONIDAE FILIAE ERVMPENTIBVS

AB IMPRVDENTI AVTEM MEDICO CVM IPSIVS

INTERITV INFELICITER REPRESSIS.

Tam variae, insolitae, immo paene incomprehensibiles sunt viae Menstruorum, naturali suo atque consueto itinere variis de causis, exclusorum, vt nulla fere corporis pars, nullumque membrum inueniatur, in quod, turbato rerum ordine, impetum non fecerint, atque per idem, violenta quasi effugia quaesiverint. Sic enim, horresco fere referens, qua data veluti porta, subinde proruperunt, per capitis cutem ac verticem, frontem, tempora, palpebras, oculos, nares, genas, maxillas, mentum, labia, os, linguam, ductus saliuales, gingiuas, dentium alueolos, aures, dorsum, mammas, axillas, umbilicum, brachia, manum, pollicem, singulosque digitos, inguina, genua, pedes, illorumque talos ac digitos, naturae muliebris labia, vesicam vrinariam, atque extremum denique anum. Quae tamen omnia, quantumuis satis miranda ac propemodum incredibilia, portentosa sua nouitate et dira insoliti casus atrocitate, longissime vincit illud quidem exemplum prodigiosum, immo horrendum prorsus, a magno quondam RVYSCHIO, ^{a)} plus semel obseruatum,

a) *Aduersarior. Anatom. Decad. III. pag. 69. et MARC. AVREL. SEVERINI de Abscess. Lib. IV. Cap. 7. pag. 197. Obs. 3. pag. 13. sqq. Tom. I. Opp. Conf. IDON. WOLFII Obs. Chirurg. xx. Lib. I.* vbi simile portentum de quodam Iuvene,

seruatum, ac deinde fideliter relatum, de puella quadam, quae ceu per totidem noua quasi ostia, *uiuum simul emisit sanguinem, per capitis cutem, aures, os, oculos, umbilicum, mammasque: et quidem ex his, tantum exiliebat sanguinis, ut necesse foret, vitris supra papillas impositis, profluentem cruorem excipere.* ^{b)} Cui tamen perquam simile exemplum aliud adnotauit SCHVRIGIVS, ^{c)} in foemina quadam Dresdensi: qui nobis simul laudabili sua industria, in colligendis id genus variis, *de insolitis Mensum viis*, obseruationibus rarioribus, apud complures Auctores sparsim obuiis, gratas commodasque ferias quasi fecit, ^{d)} ne nobis dura nunc necessitas imposita sit, de hoc ipso arduo Argumento vberius differendi, ipsiusque inconcussam veritatem contra quosuis incredulos et rerum medicarum ignaros prorsus oblocutores, paulo operosius defendendi, qui has ipsas violentas mensium aberrantium molitiones, pro terroribus magicis, inauditis miraculis, et portentis

V v v 3

tentis

EX SCHENCKIO, refert, vt et WEDELIVS, *Amoenitat. Mat. Med. Lib. II. Sect. 2. Cap. 19. pag. 499.* Similem autem portentosam haemorrhagiae quasi vniuersalis speciem RVYSCHIANAE illi descriptioni in omnibus fere exacte conuenientem, obseruauit ac descripsit POTERRIVS, in *Singular. obseruat. Med. Cent. II. Cap. 56. pag. 156.* vbi conferendus omnino in *Notis*, HOFFMANNVS. Sed omnem paene fidem et rationem superat, mirandus ille, imo stupendus paene Casus de puella quadam decem annorum, tota fere per omnia membra, in sanguineos quasi riuulos resoluta, quem in *scriniis BOERHAAVIANIS* repertum et haeredum beneficio, impetratum, lectorum commodo et emolumento, benigne publicauit BOERHAAVIUS ille alter, seu, quod idem, *Illustr. van SWIETEN, Commentar. in Aphorismos Boerhaau. Tom. IV. pag. 426. sqq.* dignissimus vtique, qui plus semel ab omnibus rerum medicarum studiosis et curiosis, diligentissime legatur et expendatur.

^{b)} Misellae huic puellae vndique *αἱμορροσση*, commode aptari possunt illa, spirantem quasi ac loquentem picturam repraesentantia, grandisoni LVCANI, *Lib. IX. Pharsal. 808. sqq.* de magnanimo Tullo, a pestilentissimo serpente Libyco, Haemorrhoo dicto, letaliter admorso:

*Vtque solet pariter totis se effundere signis
Corycii pressura Croci; sic omnia membra
Emisere simul rutilatum sanguine Virus.*

Sanguis erant lacrimae: quaecunque foramina nouit

*Humor, ab his largus manat Cruor: Ora
redundant,*

*Et patulae nares: Sudor rubet: Omnia
plenis*

Membra fluunt Venis: totum est pro vulnere Corpus.

^{c)} In *Parthenolog. Sect. II. Cap. 8. pag. 208.*

^{d)} Ibidem, *Sect. II. Cap. 3. pag. sqq.* vsque ad pag. 118. quod totum quam diligentissime et copiosissime tractat de *Insolitis Menstruationis Viis.*

tentis quasi Theffalis, impudenter imprudenterque forte habebunt, quae tamen intemerata tot praestantissimorum Auctorum fide firmiter nituntur, de qua vel tantillum dubitare, nefas profecto foret atrocissimum. e)

Ex omnibus autem istis Viis inconsuetis, quas sibi Menses molliuntur, consueta sua familiarique via prohibiti, haec quidem vulgo habetur frequentissima, et, si non semper tutissima, respectu tamen reliquarum nonnullarum, plerumque minus periculosa, quae per apertas potissimum nares, liberum expeditumque illis praebet ostium: id quod praeter quotidianam experientiam, multis exemplis, vndique ex variis auctoribus, diligenter collectis, idem probat SCHVRIGIVS, f) quibus longe plura, si necesse, adiici hic a nobis possent; quum inter mille forsan puellas, paucissimae tantum reperiantur, quae ante primam sanguinis menstrualis eruptionem, largam frequentemque narium haemorrhagiam passae non fuerint. Sed nec id ipsum iam sua aetate, incognitum fuit ipsi nostro HIPPOCRATI, quin potius,

e) Varios istos Auctores, qui de insolitis Mensium Viis, scripserunt, iam dudum, ante ipsum SCHVRIGIVM, ingenti quidem copia, allegarunt SENNERTVS noster, *Lib. IV. prax. Cap. II. pag. 192.* DIETERICVS, *Iatr. Hipp. pag. 602. et pag. 120. sqq.* MOEBIVS, *Physiol. Cap. 20. p. 572.* DONATVS, *Hist. med. mir. Lib. IV. Cap. 19. pag. 409. sqq.* HORSTIVS, *Problem. med. Dec. 9. p. 258.* HOFMANN. pater, *de Method. med. Lib. I. C. 17. p. 249.* BONETVS, *Med. sept. Tom. II. p. 36.* BARTHOLINVS, *Hist. anat. 16. Cent. I. p. 31. sqq.* VERZASCHA, *Obs. med. 13. p. 36.* STALP. *van der WIEL, Obs. med. 18. et 19. Cent. I. p. 85. et p. 87. it. Obs. 79. p. 348. et Cent. post. Obs. 17. p. 197.* VALENTINI, *Pandect. medic. Legal. Cas. 16. p. 50.* SCHENCKIVS, *Obs. med. Lib. IV. Tom. II. pag. 257. sqq.* LANZON. *Ani. maduers. var. med. xxxiii. pag. 159. sqq. ut*

et maxime ill. *van SWIETEN, Comment. in Aphorism. BOERHAAV. Tom. IV. p. 421. sqq. et STAHL, Diss. de insolitis Mensium Viis, item in Tract. Germ. de eodem argumento: praesertim autem, ut iam plures alios consulto omittendo, mihi laborem minuam, Lectori vero fastidium, numerosissimam istorum Auctorum veluti cateruam, quam diligentissime collectam, vna produxerunt, GEORG. FRANK de FRANCKENAV, *Satyr. Med. xv. pag. 269. sqq. item Dissert. de Haemorrhoid. pag. 439. sqq. et denique IO. GOTHOFRED. SCHEID, in Annor. ad de LA MOTTE Tractat. de Morbis Grauidar. et puerperarum, pag. 234. sqq. sed haec sufficiant.**

f) *Parthenolog. laudat. Sect. II. Cap. 3. pag. 92. sqq. Adde SCHENCK. Obs. Med. Lib. IV. pag. 258. sqq. Tom. II. aliosque plures, modo laudatos.*

tius, apud illum, frequens passim interiecta legitur mentio illius quidem vicariae et quasi succedaneae sanguinis menstrui, per nares, evacuationis, vbi nempe consueta solitaque per ipsum pudoris sinum, via illi, diuersis ex causis, denegata fuerit. g)

Quo et praesertim pertinet memorabilis illa simulque flebilis apud eundem, Historia, de miseranda *Leonidae filia*, h) quae simili menstruali narium haemorrhagia primum correpta, nec suo, nec naturae vitio, sed sola imperiti et temerarii Medici latissima et inexcusabili prorsus culpa, in ipso amoeno aetatis flore, in letale vitae exitium praecipitata fuit.

Iste vero HIPPOCRATIS locus, de quo nobis iam sermo, ab interpretibus paene omnibus, vel nimium festinantibus, vel stili breuioris et dictionis inusitatoris haud satis gnaris, adeo quidem male tractatus ac sordidis tenebris inuolutus fuit, pudet taedetque fateri, vt, si HIPPOCRATES ipse rursus in nostrum hoc aeuum delatus foret, ipse, credo, haud intellecturus esset, quae quondam scripsisset.

Quare nos operae forsan pretium facturos putauimus, si comoda quidem hac occasione, sponte nobis oblata, hunc ipsum caliginosum HIPPOCRATIS locum accuratiori aliquanto examini subiceremus, ipsumque, disiectis illis prius tenebris, ab interpretum vel incuria, vel imperitia, ipsi circumiectis, clariore nonnihil ac certiore luce perfunderemus. Audiamus igitur, si placet, iam ipsum HIPPOCRATEM loquentem:

Τῇ Λεωνίδεω θυγατρὶ ἡ φύσις ὀρμήσασα ἀπετρέφῃ ἀποτραφεῖσα ἐμυκτῆρισε μυκτῆρίσασα διηλλάγῃ ὁ ἰητὺς ἐξ ἑωυτοῦ ἢ πατρὸς ἀπέθανεν

Sed nunc attendamus etiam, si lubet, quomodo ipsam HIPPOCRATIS mentem perceperint, atque in suis versionibus exprefferint interpre-

g) Exempli causa, *Aph.* 33. *Secl.* v. 665. et saepius, in sequentibus eiusdem *Lib.* i. de *Morb.* pag. 8 *Lib.* i. de *Morb.* Argumenti Libris.
Mulier. pag. 458. et passim, in sqq. et h) *Lib.* vii. de *Morbis Epidemicis*, pag. 888. *Tom.* i. fine.
 denique *Lib.* i. de *Morb. Epidemicis*, pag.

interpretes! CORNARIVS ergo, quem postea, hic, nimis secure, sequuti sunt MERCVRIALIS, atque LINDANVS, ita vertebat:

Leonidae Filiae Natura concitata, auersa est: auersa, in iram excanduit: ubi ira excanduit, reconciliata est. Medicus non intellexit: Puella mortua est.

Sed quis, quaeso, in his quidem, sensus sanus, facilis aut perspicuus? quin potius iste cum ipsa illa Filia mortua, mortuus quasi et funeratus videtur: quomodo enim obsecro, puella ista post incandescentiam illam, blande reconciliata, atque hinc rursus mentem placide composita, exinde subito mori potuit? Quare vix dubitem, quin, si ipse HIPPOCRATES hanc quidem obscuram et a sua certe mente tam alienam, versionem legere posset, ipse forsan ira concitatiores ita incandesceret, vt aegerrime reconciliaretur, diceretque indignabundus: *Hic Medicus interpretes me plane non intellexit: Quod etiam haud dubie pronunciaturus esset de sequenti nunc versione FRANCISCI VALLESII:*

Leonidae Filiae Natura conuersa est; conuersa vero subsannabat: Subsannans pacata est; Medicus non intellexit: Puella mortua est.

Ecquis enim, paullo emunctioris naris Lectorum, his modo perlectis, fanna certe ac risu non indignis, tantum a se impetrare poterit, vt

Ira cadat Naso, rugosaque fanna?

Quare etiam prudens, iam abstineo a producendo hic eiusdem in haec verba, Commentario, quippe qui falsae huic et ab HIPPOCRATIS mente prorsus abhorrenti Versioni superstructus, nihil quidquam sane complectitur, vt quiuis certe iam per se conicere ac diuinare potest, quod aut HIPPOCRATEM ipsum illustret, aut Lectorem erudiat, vel oblectet.

Superest denique adhuc vnus FOESIVS, qui propius, inter omnes, verum quidem vidit; sed non penitus affecutus est, quum nempe ita hunc Locum Latine redderet:

Leonidae

Leonidae Filiae Natura ad impetum incitata, sese auertit, atque, ubi auersa est, sanguinem ex Naribus effudit; quo effuso, permixta est: quod non vidit Medicus; puella mortua est.

Scilicet huic soli FOESIO, mira certe felicitate, hic datum erat, habere Nasum, quum ipsi vel eminus suboleret, τὸ μυκτηρίζειν, in quo potissimum verbo totius rei cardo nunc vertitur, non posse hic obtinere vulgarem quidem significationem; ita, vt idem scilicet sit, ac χλευάζειν, καταγελάειν, ἐξεδεινέειν, h. e. *subsannare*, *Naso adunco suspendere*, vt acute ait HORATIUS, *irridere, ludibrio exponere, nihili facere*, ac *parui pendere*, alias recte sic exponentibus SVIDA, HESYCHIO, ETYMOLOGICO MAGNO, POLLUCE, EVSTATHIO, BYDAEO, STEPHANO et aliis: *) quem vulgarem huius verbi sensum inconsiderate arripiendo, in errorem delapsus est VALLESIVS, vt supra vidimus; et ante eum, in paullo maiorem, CORNARIUS, quum τὸ μυκτηρίζειν verteret, per *ira excandescere*, qualem significatum, quantum equidem memini, vix admiserit verbum illud graecum, ἀπὸ τῶν μυκτῆρων, seu a *crispante Naso*, *rugosaeque Sanna*, petitum. Licet igitur laudatus FOESIUS, cum in *Not. tum Oeconomia*, istam suam coniecturam timide dubitanterque, vt semper fere solet, proponat; nihil tamen certius, nihilque verius, quam τὸ Μυκτηρίζειν, in hoc quidem loco, idem denotare, ac vulgo alias, τὸ αἱμορραγεῖν διὰ μυκτῆρων, seu διὰ ῥινῶν, hoc est, *sanguinem per Nares emitte*: sed novo prorsus et inusitato huc vsque sensu, ab ipsa tamen analogia verbi nequaquam alieno, hincque in Lexicis graecis, in posterum, sedulo adnotando. Neque enim apud ipsum HIPPOCRATEM,

*) Conf. huc imprimis TIBER. HEMSTERHVS. *Not. ad LVCIANI Dial. Mort. pag. 353. Tom. I. IO. BRODAEI Miscellan. Lib. IV. Cap. 32. in Thesauro Crit. IAN. GRVTERI, Tom. II. pag. 530. et VOSSII Instit. Orat. Lib. IV. Sect. 5. pag. 239. item FABRICII Not. ad SEXT. EMPIR. Lib. I. aduers. Grammat. Cap.*

IO. pag. 262. SCHOTTI Adag. sac. pag. 128. IOACH. CAMERARII Comment. vtriusque Linguae; pag. III. et pag. 113. et ELSNER. Obsf. sac. Tom. II. pag. 199. qui vero, nescio fane, quare, rara huius verbi exempla esse, ibi pronunciat, quum tamen obuia vbique sint: Praesertim autem apud LXX. INTERPRETES.

TEM, neque vllum Auctorem graecum alium, quantum equidem recordor, μυκτηγίζειν idem significare obseruauī, ac *sanguinem per Nares effundere*, adeo, vt hinc, hoc ipsum Verbum nouo quidem et insolito isto sensu fuitum, inter sic dicta ἅπαξ λεγόμενα, iure forsan referendum videatur. Etsi autem SEXTVS EMPIRICVS recte negat, τὸ μυκτηγίζειν, secundum analogiam, idem designare posse, ac εἰς τὴν ῥίνα τύπτεσθαι, *in Naso feriri*; tamen negaturus, credo, haud esset, hoc certe loco Hippocratico viso, idem commode nonnunquam valere posse, ac αἷμα ἐκ ῥινός τάζειν, ἢ ἐκ μυκτῆρος ἐκχέειν. LXX. quidem INTERPRETES, EZECH. VIII. 17. τὸ μυκτηγίζειν, pro *Naribus quidquam admouere, vel odorari*, accepisse videntur: de quo tamen arduo loco hic plura dicendi, iam spatium non est. HIPPOCRATES vero i) illius verbi loco, frequentius passim potius vtitur phrasibus: ἀπὸ μυκτῆρων, ἢ ἀπὸ ῥινῶν τάζειν, vnde τάξεις ἐκ μυκτῆρων, ἢ ἐκ ῥινῶν, vt et ῥήξεις μυκτῆρων, et μυκτῆρ ῥηγνύμενος, nec non ῥύσις ἐκ μυκτῆρος, item αἷμα διὰ μυκτῆρων ἐκχέειν, ἢ ἐκκρίνειν, et διὰ μυκτῆρος ῥέειν, quomodo et loquutus ipsius felicissimus imitator, ARETAEVS, et denique, ἐς τὰς ῥίνας μεταπεσεῖν τὸν ῥόον τῆς αἵματος, item τὸ ῥεῦμα τῆς αἵματος ἐκπεσεῖν τῶν μυκτῆρων. Vt alia id genus plura iam taceam, in ipsius quidem Operibus, vbique fere occurrentia.

Sic etiam pari modo, μυκτῆρ ἀποτάζει, AETIVS dixit, k) qui et saepius, in sequentibus, commemorat τὰς ἐκ τῶν μυκτῆρων αἱμορραγίας, quod subinde quoque occurrit apud DIOSCORIDEM, l) AEGINETAM, ALEXANDRVM TRALLIANVM et GALENVM inprimis ipsum: qui ipse alio loco, m) in simili fere casu, de foemina

i) V. g. *Libb. de Coac. Praenot.* item *prognost.* nec non *de praedict.* vt et *de iudicat.* et praecipue, in *Libb. de Morb. Epidem* etc. FOESIVS autem hic, in *Oeconomia*, voce *Μυκτῆρ*, contra morem suum, perquam parcus et auarus quasi est, in allegandis locis, huc quidem facientibus. Quod obiter notare liceat.

k) *Lib. VI. Cap. 3. pag. 100. b.*

l) *Lib. III. Cap. 52. pag. 194. et Lib. IV. Cap. 46. pag. 260. et alibi saepe.*

m) *Lib. de Venae sectione contra ERASISTRATVM, Cap. 1. pag. 407. Tom. X. Opp. per CHARTERIVM.*

na loquens, post diuturnam mensium suppressionem, largissimam tandem narium haemorrhagiam cum leuamine, passa, dixit: φύσις αἷμα ἐκ μυκτῆρων ἐκχέασα πάμπολυ, quod profecto idem est, ac hic, in nostro quidem loco, φύσις μυκτηρίσασα: Denique, nam omitto studio, plura alia, CEDRENVS pag. 217. de TITII imperatoris morbo et morte, dixit: αἱμορραγήσας διὰ τῶν μυκτῆρων, hoc est breuiore stilo HIPPOCRATES noster nobili felicique audacia, breuissime, et simul bellissime ac significantissime, expressit per vnicū illud verbum Μυκτηρίζειν, quod propter novitatem suam insolitam, hic paullo diligentius a nobis merito fuit explicandum.

Verum iam vnus adhuc restat scrupulus, circa verbum διηλλάγη, prius quoque eximendus, ad quod quippe, ceu ad praeruptum quendam scopulum, etiam obhaeserunt Interpretes, adeo, vt inde tam miras, paene dixissem, tam miseras versiones nobis procuderent. Est enim τὸ διαλάττειν, et διαλάττεσθαι, vulgari quidem sensu, quem isti praepropere nimis et incaute, arripuerunt, idem, ac καταλλάττειν, h. e. *reconciliare, in gratiam et amicitiam cum aliquo redire, item litem dirimere*, quod ex mille DEMOSTHENIS, ISOCRATIS, PLUTARCHI, LUCIANI, APPIANI, et aliorum locis, quin et EXMATHAEO ipso, satis superque constat, vt vel ex BVDAEO, STEPHANO et aliis Glossariis, cuius cognitum est. Sed et simul idem significat, ac *immutare, sedare, pacare, liberare et dissoluere*, quem sensum praesens hic noster locus potissimum requirit, tumque tantundem valet, ac ἀπαλλάττειν, μεταλλάττειν, παραλλάττειν, et διαλύειν, testibus HESYCHIO, SVIDA, EVSTATHIO et aliis. Inde DIONI inprimis CASSIO, διαλλάττειν, et διαλλαγή, nunc sumitur, pro *reconciliare et reconciliatione*; nunc autem rursus, pro *permutare, et permutatione*. Ne de multis aliis iam dicam.

Ceterum nemo, quaeso, procaci fastu, aut moroso fastidio, haec grammatica ac philologica vilipendat: ex his minimis enim constant omnino maxima; et a verbis, prius recte intellectis, facilius certiusque deinde ad res ipsas peruenitur, vt vel ex hoc ipso HIPPO-

CRATIS loco clarissime patet; nec nucleus bene capitur, multo minis estur, nisi diffractis prius corticibus; inde ergo perquam bene et acute alicubi PLATO: ἔκ' ἀνευ σμικρῶν, τὰς μεγάλας φασὶν οἱ λιθο-λόγοι λίθους ἐκκεῖσθαι. Sed haec obiter, et vix ex necessitate.

His ergo praemissis, ac fundamenti quasi loco, substratis, nunc tandem ipsam nostram huius obscuri hactenus, loci versionem, siue, si quis malit, paraphrasin, producite liceat:

Leonidae Filiae Natura mensibus primum eruptura, seu, primum mensium impetum factura, auersa fuit a via sua consueta. Sic auersa, conuersa est ad Nares, ex quibus nempe sanguinem large effudit. Illud vero sanguinis profluvium subito sedatum ac repressum fuit a Medico quodam, qui imprudens, non intellexit, quid scilicet Natura ibi per Nares moliretur. Vnde puella misere interit.

Nimirum Medicus iste, quisquis ille tandem fuerit, nam bene est, quod latet, larga forsan et diuturna nimis narium haemorrhagia, ita subito perterritus, vt vitae quidem ac saluti istius puellae, metueret; Naturae, per ipsum HIPPOCRATEM, ⁿ⁾ clare loquentis, plane ignarus, imprudenter et infeliciter Remedia styptica et staltica externa adhibuisse videtur: vnde perquam credibile est, ferocem sanguinis adeo repente cohibiti ac repressi, impetum mox caput ipsum, aut pectus, aut forsan vtrumque simul, quam violentissime inuasisse, moleque sua oppleuisse; vt inde miseranda illa puella vel phrenitide, vel apoplexia, vel denique epilepsia, aut suffocatione, alioque eiusmodi diro symptomate, nam de vero morbi mortisque genere HIPPOCRATES hic plane filet, subito extingueretur: forsan tamen ad hunc

n) *Aphorif.* nempe 33. *Secl.* v. qui sic habet: Γυναικί, τῶν καταμηνίων ἐκλείπόντων, αἷμα ἐκ τῶν ῥινῶν ῥυῆναι, ἀγαθόν. Quae CELSVS ita vertebat *Lib. II. Cap. 8. pag. 69.* Quae menstruis non purgatur, si sanguinem ex naribus fudit, omni periculo vacat. Sed non satis bene ad ipsam HIPPOC. mentem, qui nempe genera-

tim dixit, ἀγαθόν, h. e. ἄλυτον, bene hic exponente GALENO, *Comment.* in h. l. pag. 214. *Tom. IX.* non vero ἀκίνδυνον, aut ἀνευ κινδύνος ἁπαντος: quod esset scil. contra experientiam. Sed raro Hippocratica accurate vertit CELSVS, vt alibi multis exemplis euidentissime ostendam.

hunc ipsum nostrum locum respexerit idem; scribendo ita in *Coac. praenot. pag. 553.* τὰ ἐκ ῥινῶν λάβρα βίη ἀποληφθέντα, ἔστιν ὅτε σπασμὸν ἐπικαλεῖται φλεβοτομὴ δὲ λύει: *Fluxiones ex naribus largae, per vim suppressae, quandoque convulsionem prouocant: Venae sectio autem soluit:* prout eiusmodi funesta exempla quam plurima apud TVLPIVM, °) WEDELIVM, P) SCVLTVM, q) LOSSIVM, r) BONE- TVM, s) BALLONIVM, t) SENNERTVM, u) SCHVRIGIVM, x) aliosque, passim adnotata, prostant. Hanc autem, quam modo propofui, veram certamque ipsius HIPPOCRATIS esse sententiam, magna me vtique spes tenet, immo maior adhuc fiducia.

Cui igitur ex cunctis his versionibus, ceu faciliori, euidentiori, et ipsi experientiae medicae conuenientiori, prima veluti palma iure sit deferenda; ipsi nunc cordati, aequi, rerumque medicarum intelligentes Lectores splendide arbitrentur.

Vnum vero hic, sub finem, idque paucissimis, adicere nobis adhuc liceat: HIPPOCRATEM nempe nostrum, eo ipso in loco, haftenus explicato, eleganti ista Figura rhetorica vsum fuisse, quae ab HERMOGENE quidem, LONGINO, ARISTIDE, PLVTARCHO aliisque, vulgo κλίμαξ, aut κλιμακωτὸν, vocatur, ab ARISTOTELE autem, EVSTATRIO, ATHENAEO et aliis, ἐποικοδόμησις: a Latinis vero Rhetoribus, vt CICERONE, AVTORE *Rhet. ad HERENN. Lib. IV. DIOMEDE, QVINTILIANO, Lib. IX. Cap. 3. Inst. Orat.* et aliis, *Gradatio*, siue, vt AQVILAE placuit, *Adscensus*. Cuius venustae figurae quam plurima passim occurrunt exempla apud omnes vtriusque linguae Auctores, immo in ipsis *Epistolis Paullinis*, praecipue in ea, ad *Romanos*, quae maximam iam partem, diligenter colle-

XXX 3

o) *Obs. med. Lib. I. Cap. 28. pag. 57.*

p) *Opiolog. Lib. II. Sect. III. Cap. 3. pag. 146.*

q) *Armament. Chirurg. Part. II. Obs. 97. pag. 224.*

r) *Observat. medicinal. XI. Lib. IV. pag. 348.*

s) *Medicin. Septentrional. Tom. II. Lib.*

IV. pag. 37. sqq.

t) *Consilior. Medicinal. Lib. II. Hist. 4. pag. 116. sqq. Tom. II.*

u) *Pract. Lib. IV. Part. 3. Sect. 2. Cap. 5. pag. 524.*

x) *Parthenolog. Sect. II. Cap. 3. pag. 92. sqq. et Cap. 6. pag. 159. sqq.*

collegit VOSSIVS *Lib. v. Instit. Orat. Sect. 8. pag. 294. sqq.* et praefertim, THOMAS GATAKERVVS, *Aduersar. Miscell. Lib. 1. c. 1. pag. 171. sqq.* quibus add. LVCIANVS, in *Hermotim. pag. 553. Tom. 1.* ARISTIDES, *Sermon. Sacr. IV. pag. 333. Tom. 1.* per IEBB. et ARTEMIDORVS, *Lib. 1. Oneirocrit. cap. 37. pag. 35.* vt plures alios iam taceamus. Res enim vulgo notissima.

Sed ne plura de hac quidem rhetorica κλίμακος, aut *Gradationis* et *Adscensionis* figura, iam commemoremus, id nunc prohibet potissimum alia *Honorum Gradatio*, seu *Adscensus*, ἄλλη τε τιμιώτερον κλίμαξ, ad quam laudabili nisu gressuque, vt speramus, nunc contendit Candidatus Noster, etc.

EXERCITATIO VNDECIMA.

DE

VINO MODICO HYPOCHONDRIACIS

SALVARI

AD SACRVM LOCVM I TIMOTH. V, 23.

NONNIHIL ILLUSTRANDVM.

Hypochondriaco malo, vulgo sic dicto, affectis, generosum praefertim Vinum, parcius, per intervalla, sumtum, apprime conducere, non neglectis tamen simul ceteris medendi legibus; de eo quidem neminem Medicorum rectius sentientium vel aliquantulum dubitare arbitror, quorum inde testimonia, vbiuis facile obvia, et ab aliis iam diligenter collecta, operosius hic producere nec vacat, nec opus est. Quum enim pertinax illud Malum hypochondriacum infaustam suam originem potissimum debeat ventriculo frigido, soluto, inflato, et ad ingestos cibos promte concoquendos supino nimis atque languido, item intestinis iusto suo aequalique motu peristaltico destitutis, flatibusque distentis, vna cum mesenterio, sordida colluvie oppleto, atque hinc inde obstructo, vnde vicinae quoque partes, veluti hepar atque lien, aliaeque in consensum simul rapiuntur; recte sic censi-

bus

BUS CONRINGIO, WEDELIO, ETTMÜLLERO, HIGHMORO, NEEDHAMIO, HOFFMANNO, et aliis paene innumeris: Inde per se iam satis liquido patescit, eximium nobileque vinum modice et tempestiue in vsum vocatum, pro innata sua diuersa variaque virtute, cuncta haec mala coniuncta sensim leuare, et accedentibus aliis remediis idoneis, tandem expugnare posse. Recte ergo sapienterque, vt semper fere solet, HIPPOCRATES noster ^{a)}: Ὅσα τῶν σιτίων ἢ φύσαν, ἢ καῦμα, ἢ δῆξιν παρέχει, ἢ πλησμονὴν, τροφὸν, οἶνος ἐπιπινόμενος ἀκρητος ἀπαλλάσσει τῶν τοιούτων: *Quicumque cibi aut flatum, aut aestum, aut morsum, aut repletionem, aut tormen faciunt, a talibus liberat Vinum meracum, insuper potatum.* Quorsum et potissimum spectat illud ALEXANDRI TRALLIANI ^{b)}: Οἷς τὸ σῶμα τῆς γαστρὸς ἀσθενὲς, καὶ ψυχρότερον φύσει, ἐπὶ τούτων εὐκαιρὸς ἐστὶν ἢ τῷ οἶνῳ ἐπίδοσις, συμμέτρως παραληφθεῖσα: *Quibus os ventriculi imbecillum, et natura frigidius est, in his tempestiue est vini potio, si modice assumatur.* Quo et denique istud pertinet PLINII, ^{c)} *Vino modico nerui iuuantur, stomachus recreatur, appetentia ciborum inuitatur, tristitia et cura hebetatur, urina et alior expellitur, somnus conciliatur:* quae consueto PLINII more, maximam quidem partem, transfumta sunt, ex DIOSCORIDE ^{d)}: ita enim ille: Οἶνος εὐστόμαχος, ὀρεκτικὸς, θρεπτικὸς, ὑπνοποιὸς, ῥωστικὸς, εὐχρόιας παρασκευαστικὸς, κ. τ. λ. Sed plures Vini laudes operose hic conscribere, nec nostri nunc est otii, nec instituti: nec Lectores, credo, id a nobis expectabunt, aut desiderabunt: praesertim, quum Vino iam per se laudabili, nullae vnquam suspensae hederæ defuerint, nulli, inquam, eloquentes laudatores, tam ex veteribus, quam recentioribus, *foecundi enim calices quem non fecere disertum?* quorum tamen ingentem copiam in scenam quasi hic producere, intempestiuae sane atque

a) *Lib. de Affect. pag. 194. Tom. II. Opp.*

b) *Lib. I. cap. 13. pag. 55.*

c) *Lib. XXIII. Cap. I. pag. 819. Tom. III. Opp. et Lib. XIV, cap. 5. alibique saepius.*

d) *Lib. V. Cap. I. Conf. huc imprimis PLVTARCH. III. Sympos. 5. p. 652, vbi*

sequentia notari merentur: τοῖς ἐκλελυμένοις, καὶ τὸν τινα δεομένοις, κατὰ τῆς ἀδυναμίας τομάχου, ἰατροὶ οἶνον δίδοντες βοηθεῖσι. *Resolutis et robore indigentibus propter stomachi infirmitates, Medici Vinum ordinantes, auxilium praestant.*

que superuacuae foret industriae. Interea vero rationem nunc liquido patere arbitror, quare *S. Apostulus* PAVLLVS TIMOTHEO suo praeceperit, vt sanitate sic exigente, dietam hucusque consuetam, mutaret, et relictâ aqua, ad modicum Vini generosioris vsum transiret. Hunc enim in modum monendo, ad ipsum scribit: Μηκέτι ὕδωρ πότει, ἀλλ' ὄινω ὀλίγῳ χρῶ, διὰ τὸν στόμαχόν σε, καὶ τὰς πυκνὰς σε ἀσθενείας: *Noli amplius aquam bibere; sed vino potius utere modico, propter stomachum tuum, et crebras infirmitates tuas.* Hic itaque cum ex ipsius morbi descriptione, tum remedii dietetici praescriptione Paulina, haud obscure colligi posse videtur, vel ipsum TIMOTHEVM molesto illo et eruditis plerumque familiari, morbo hypochondriaco fuisse conflictatum. Quum enim ille corpus suum, quod ab ipsa natura fluxum et imbecillum acceperat, in tenera adhuc aetate, continuis laboribus, vigiliis et itineribus attriuisset, dum iam Ephesum, iam Corinthum peteret, et in Macedonia saepe, in Italia, vbique terrarum, vbique marium, cum praeceptore PAVLLO, appareret, vt IOANNES loquitur CHRYSOSTOMVS, e) deinde Ecclesiae Ephesinae recens plantatae, atque difficillimis illis temporibus, multis magnisque periculis et persecutionibus expositae, ordinandae et regundae, tum admodum iuuenis, praefectus esset, vti fama quidem vulgo tenet, teste EVSEBIO: perquam credibile inde videtur, eum vigilando, laborando, precando, meditando, et arduum hoc suum munus ex omni quidem parte, sancte, pie et circumspecte curando, exiguas corporis vires adhuc residuas, sensim magis fregisse, atque, vt fieri solet, morbum hypochondriacum sibi demum contraxisse, praesertim, quum his accederet victus tenuis ac parvus, et inerae aquae, fortassis non semper optimae, potus, vt taceam frequentiora ieiunia, veteri olim ecclesiae consueta: de quibus multa passim BASILIVS MAGNVS, IO. CHRYSOSTOMVS, vterque GREGORIUS, et alii plures. *Continuatio enim litterati laboris, vt scite vereque ait APVLEIVS, f) omnem gratiam*

e) Homil. 1. ad populum Antiochen. pag. 7. sqq. Tom. I. Opp. in Vet. Test. vbi plura, quae huc spectant, et hoc nostrum Argumentum egregie illustrant.

f) Apologia, pag. 276. vbi vid. Not. ELMENHORSTII, pag. 324. et P. CAEI, pag. 9.

gratiam corpore deterget, habitudinem tenuat, succum exsorbet, colorem obliterat, vigorem debilitat. Frigidus ergo, laxus languensque ΤΙΜΟΤΗΙ stomachus his dictis ex causis, nec cibi satis appetens erat, nec eiusdem tenax; ex quo vitioso fonte deriuata deinde clades in vniuersum corpus defluxit. Post commemoratam enim primam mali causam, nempe τὸν στόμαχον, scil. ἀσθενέστερον καὶ κακός τιτον, siue vno verbo, κακοστομαχίαν, ΜΟΧΡΑΥΛΛΥΣ, ceu peiores eiusdem effectus, subiungit τὰς πυκνὰς ἀσθενείας, *infirmitates crebras et assiduas*, hoc est τὰς ἐπαλλήλους ἀρρώστιας, siue morbos sibi inuicem continua quasi ferie succedentes, et per totum paene corpus sese sensim diffundentes, vt perquam significanter τὰς πυκνὰς ἀσθενείας hic interpretatur ΙΩΑΝΝΕΣ CHRYSOSTOMVS, 8) Quo ipso viva fere spiransque ipsius diri mali hypochondriaci imago nobis ob oculos ponitur. Est enim illud re ipsa numerosum malum, Lerna quasi malorum, calamitatum Ilias, foecundissima variorum morborum parens ac seminarium, vt ROLFINCIVS ait, et, vt Medici loqui amant, Morbus complicatus et ex multis aliis quasi compositus: praesertim, vbi iam inueterauit, et longiores in corpore vitiato moras traxit: Tum enim non solum cuncta paene abdominis viscera occupat, vt supra iam monitum; sed et altiora petens, ipsum thoracem inuadit, ibique anxias spirandi difficultates, acerrimas praecordiorum expansiones, tremulas cordis palpitationes, pleuritides spurias, aliasque plures eiusmodi luctuosas traegedias concitat. Verum nec intra hos limites solos, subsistit semper indomita atrocis illius mali ferocitas: quin potius in cerebrum saepe ipsum impetum facit, istamque sublimem nobilemque sensuum officinam variis vanis imaginibus, horrendis paucoribus, tristibusque umbris

et

g) *De Ingluvie et Ebrietate, Homil. XII. pag. 655. Tom. VI. Opp. in Vet. Testament. et alibi: praecipue vero Homil. XIV. in I Timoth. I. p. 517. Tom. VI. in Nov. Test. vbi commemorat τὰς πυκνὰς ἀσθενείας, ἀπό τε στομάχου, ἀπό τε τῶν ἄλλων μερῶν, quo ipso sententia nostra magis adhuc confir-*

matur. Conf. huc inprimis HENR. SMETII Miscellan. Med. Lib. XI. Sect. 3. pag. 604. sqq. et praecipue pag. 618. 619. vbi diffuse et exacte de hac ipsa ΤΙΜΟΤΗΙ sobrii ὑδροποσία, ipsiusque in κακοστομαχίᾳ, noxa grauissima, tractat.

et insomniis opplet ac conturbat, adeo ut miserandi aegroti aliena videant, audiant et loquantur, atque ab imaginoso quasi morbo, aut exsomni Corybantiasino subinde exagitari videantur.

Tam calamitosa igitur Hypochondriacorum est conditio, tam male viuat isti agunt, aut trahunt potius, vitam: nulla lux illis vnquam prospera exoritur, nulla placida ac tranquilla occidit: semper metuunt, diffidunt, trepidant, aestuant, dubitant, desperant, sibi et omnibus aliis oneri sunt atque taedio, et, ut cum poeta loquar, vbique quasi *post equitem atra sedet cura*. In omnibus fere corporis partibus, tam externis, quam internis, aut veri, aut ficti et imaginarii, doloris sensu, sua certe opinione, tanguntur, et semper abunde habent, de quo acerbè conquerantur, adeo, ut vniuersus hic mundus ornatissimus ipsis fere solis vasta horridaque solitudo, inuisus squalidusque Carcer, vel aerumnosum denique ergastulum esse videatur. Conf. huc WED-
ELII *Exercitat. Medico-philol.* IV. Decad. IX. pag. 30. Haec ergo symptomata cuncta atrocia sunt forsitan istae PAVLLI πυκναὶ ἀσθενεῖαι, et CHRYSOSTOMI ἐπάλληλοι ἀρρώστιαι.

Contra hanc vero numerosam malorum cateruam, duplicem nunc medelam TIMOTHEO suo proponit PAVLLVS, ceu duplex Medicus, animae nempe atque corporis, docendo ipsum primo, quid omit- tendum sit; deinde quid agendum. Primo nimirum loco, prohibet τὴν ὕδροποσίαν, huc vsque scilicet ipsi consuetam: μηκέτι, inquit, ὕδρο- πότει, *noli amplius aquam bibere*. Quoniam nempe aqua, praesertim aliquanto frigidior, copiosius ingesta, exilem ventriculi laxi frigidique tonum adhuc superstitem, penitus tandem infringit et euertit, exiguam ciborum appetentiam, eosdemque concoquendi facultatem ex- tinguit, ipsum ventriculum iam flatibus distentum, magis grauat, et nouis flatibus auget, hinc τὰ ὑποχόνδρια μετέωρα reddit, καὶ διαβορ- βοῦζοντα, h. e. *elevata et murmurantia*, ut HIPPOCRATES ait, ^{h)} sicque malis mala addit: πίπτει γὰρ ὁ στόμαχος ταῖς συνεχέσιν ὕδροπο- σίαις, *concidit enim stomachus continuo aquae potu*, ut vere pronunciat

LIBA-

h) Aph. 73. Sect. IV.

LIBANIVS. *) Quare ex his rationibus, Aqua simplex frigida hypochondriacis aut penitus erit interdicenda; aut certe, vbi bibendi cupido fuerit iniecta, dimidia fere vini generosioris mensura permiscenda. Ex altera vero parte, ΤΙΜΟΤΗΕΟ nunc suadet Apostolus τὴν οἶνοποσίαν, ex allatis nempe iam supra rationibus, his quidem verbis: ἀλλ' οἶνω ὀλίγω χρεῶ, *sed Vino modico utere*: hoc est: *nimio sed parcito vino*, vt SERENVS SAMMONICVSⁱ⁾ loquitur; verum tibi ab aqua diutius olim consueta, ad vinum nunc transiture initium primo faciendum est ab exigua tantum vini quantitate, donec sensim sensimque natura nouum generosioris potus genus impune ferre ac sustinere assueuerit. E quo saluberrimo Consilio summa Apostoli prudentia, vt ita dicam, medicaluculenter admodum elucet: idem enim dudum sapientissime sic praeceperat ipse HIPPOCRATES^{k)}: καὶ γὰρ πᾶν τὸ πολὺ τῇ φύσει πολέμιον· τὸ δὲ κατ' ὀλίγον, ἀσφαλές· καὶ ἄλλως, ἢ καὶ τις ἐξ ἑτέρων ἐφ' ἑτέρον μεταβαίνει. *Etenim omne multum naturae est inimicum: quod vero paulatim fit, tutum est: tum alias, tum si quis ex altero ad alterum transeat*: quo et respexit haud dubie CORNELIVS CELSVS,^{l)} HIPPOCRATIS quasi interpres: *Ergo, quum quis mutare aliquid volet, paulatim debet assuescere*. Namque omnis mutatio subita nimis et celeri quasi vertigine, ab vno extremo ad alterum, deuoluta, cum in diaeta, tum in ipso corpore humano, summe perniciofa est, et non solum sanitatem, sed vitam etiam ipsam saepius in atrox discrimen adducit: quae vero contra gradatim quasi et pedetentim, debita cum circumspectione, instituitur, metuendo periculo vacat, et corpori ipsi plerumque salutem et solatium adferre solet; ceu nemini Medicorum, opinor, ignotum.

Yyy 2.

Non

*) *Epist.* 1578. Edit. B. WOLFII, pag. 715. vbi vid. reliqua, huc omnino spectantia. Plura in hunc sensum, vid. apud. WETSTEN. *Comment.* in hunc ipsum nostrum locum paulinum, pag. 345. Tom. II. N. T. Conf. huc inprimis SMETII iam laudati *Miscell. Med. Lib.* XI. pag. 618. sq.

i) de *Medicina*, Cap. de *Ischiad.* et *Morbo articul.*

k) *Aph.* 51. Sect. II.

l) *Lib.* I. cap. 3, pag. 25. Sed plura hanc in sententiam dicta ac collecta a nobis vid. in *Dissertat.* nostra, de *Tabacipar-mici abusu*, pag. 25. sq. proxime a fine. Conf. SALLVSTII SALVIANI *Variarum Lectionum de Re medica*, Lib. III. cap. XI. pag. 255. seqq.

Non solum autem ὀλιγοποσίαν τῷ οἴνῳ, seu parcio rem vini vsum ab initio; ob dictam iam caussam grauissimam, commendat hic suo TIMOTHEO Apostolus; sed et eandem salutarem regulam ipsi in posterum, per omnem vitam obseruandam praescribit, etiam tum, quum ipsius iam natura per quotidianum vsum, vini aliquanto patientior fuerit reddita, vt nempe parcius semper vtatur vino, licet per stata intervalla, quoties exigeret necessitas, paullo frequentius: quem Apostoli sensum acute hic perspexisse videtur IO. CHRYSOSTOMVS, ita scribens ^m): ἔ μὴν ἀνῆκεν αὐτὸν ἀνέσθην ἐμφορεῖσθαι τῷ οἴνῳ, ἀλλ' ὅσον πρὸς ὑγείαν, ἔ πρὸς τευφὴν: *Non tamen ipsum Timotheum vino permisit effuse nimis impleri; sed ad sanitatem, non ad delicias, praecepit bibere.* Quae prudenti cautione tanto magis hic opus erat; quanto generosiora ac valentiora vina asiatica, speciatim graeca, plerumque fuisse, constat ex ipso HIPPOCRATE, GALENO, THEOPHRASTO, ATHE-
NAEO, SIMEONE SETHO, PLINIO, CASSIODORO, et aliis *) Quare iustus inde suberat metus, ne per vina ista ob suauissimum suum saporem, et adiecta insuper ex more, condimenta, palato quidem gratiora, feruore vero interno, tanto nocentiora, liberalius hausta, nouus morbus calidior, maiore cum periculo, accenderetur, dum vetus frigidior, extingueretur, sicque ipsum remedium deterius fieret ipso morbo: vt iterum egregie prorsus in hunc nostrum locum commentatur laudatus modo CHYSOSTOMVS, ⁿ) Τοσῶτον κελεύων πίνειν, ὅσον διορθῆν ἀσθενείαν, ὅσον ὑγείαν παρέχειν τῷ σώματι, ἀλλὰ μὴ νόσον ἐτέραν: *Tantum Vini bibere iubet, quantum valetudinem adiuvet, quantum corpori sanitatem, haud vero alterum morbum ingerat.* TIMOTHEO igitur οἶνον ὀλίγον commendans PAVLLVS, iterum perite scienterque respexit ad ipsas artis salutaris regulas. Sic enim veteres quoque Medici

^m) Homil. XIV. in I. Epist. ad TIMOTH. cap. I. pag. 517. Tom. VI. in Nov. Test. ubi plura. add. AMBROS. Epist. 82.

*) Conf. huc HIERON. MERCURIAL. Var. Lect. Lib. II. cap. 13. et Lib. V. cap. I. item TVRNEBVM, BACCI-

VM, SACHSIVM, et alios plures, qui ex instituto, de Vinis, scripserunt: quibus add. SMETII Miscell. Med. Lib. XI, 4. pag. 620. seqq.

ⁿ) Homil. I. ad populum Antiochen. pag. 7. Tom. I. Opp. in Vet. Test.

Medici omnibus illis aegrotis, quibus secundum Artis praecepta, vinum indulgendum erat, pariter οἶνον tantum ὀλίγον permittebant. Ita

HIPPOCRATES, ^o) πινέτω οἶνον ὀλίγον, μὴ πολλόν, Bibat aegrotus Vinum modicum, non multum. Idem alibi ^p) οἶνος ἀσθενέσσι ξὺν καιρῷ,

καὶ μετρίότητι προσφερόμενος: Vinum aegrotis tempestiue et modice oblatum: Pariter in antecedentibus: πίνειν οἶνον ὑδαρῆα, λευκόν, ὀλίγον,

Vinum bibere, aquosum, album, modicum, et alio loco, huc imprimis perquam apposito, apud eundem, de Eudemo, splenem vehementer

dolente, ^q) προσετάπτετο ὑπὸ τῶν ἰατρῶν, πίνειν οἶνον ὀλίγον, λεπτόν, Imperabatur a Medicis, Vinum bibere modicum, tenue. Quemadmodum

etiam ARISTOTELES dixit Lib. de Somno ac Vigilia, cap. III. pag. 24.

δεῖ οἶνον ὑδαρῆ καὶ ὀλίγον πίνειν, oportet Vinum aquosum et modicum bibere.

ALEXANDER quoque TRALLIANVS, ^r) τοῖς δὲ ἔχουσιν ἀσθενέστε-

ρον τὸν στόμαχον, καὶ ὀλίγον οἶνον δεῖ παρέχειν, qui imbecilliores habent stomachum, iis etiam paulum vini propinare conuenit. Quo et respexit

ARTEMIDORVS ^s): οἶνον δὲ πίνειν ὀλίγον, ἀγαθόν, vinum bibere modicum, bonum est. Huc quoque apposite CAELIVS AVRELIA-

Yyy 3

NVS

^o) Lib. de Intern. Affect. pag. 208. Tom.

II. Ibi vero, vt id obiter hic notem, τὸ οἶνον ὀλίγον, μὴ πολλόν, est pleonasmus, vt

notum: de quo post VOSSIVM, aliosque, plura STANLEI. ad AESCHYL.

p. 830. et Cl. ABRESCH noster, ad eundem, p. 405. et ad N. T. item POTTER.

ad LYCOPHRON. v. 353. alique plures: qui tamen hic apud HIPPOCR. maiorem

emphasin et efficaciam inferre omnino videtur.

^p) Lib. de Affect. pag. 195. Tom. II. opp. alter vero locus extat, Lib. II. de

Morb. p. 64. ibid. sed plura id genus loca alia passim in istis HIPPOCR. Libris, occurrunt. Sic ibidem Lib. de Intern. Affect.

pag. 224. legitur: πινέτω τῷ οἶνῳ ὀλίγον ἀκρετέστερον, et paucis interiectis, pag. 226.

οἶνον δὲ πινέτω μέλανα, στυφνόν, ὀλίγον Vinum vero bibat nigrum, acerbum, modicum:

qui locus praesertim egregie huc facit.

Sed plura id genus alia studio iam taceamus.

^q) Epidem Lib. VII. pag. 876. Tom. I.

Quem singularem HIPPOCR. locum dudum produxeram in *Curis philol. Wolf.* in h.

l. p. 481. Tom. III. qui tamen nouissime quoque iterum huc allatus fuit a WET-

STENIO, p. 346. Tom. II. quod casu potius, quam consilio, sic accidisse, puta-

rem; nisi passim, ex aliis etiam locis, haud paucis, mihi constaret, eum tenues ob-

seruationes nostras in vsus suos convertisse. Quod tamen placide potius, quam

aegre, ferimus, ob utilitatem nempe publicam, cui cuncta nostra qualiacunque

vnice dicata sunt.

^r) Lib. I. cap. 10. pag. 27. Conf. GALEN. de Affect. Ren. pag. 541. Tom. X.

^s) Oneirocrit. Lib. I. cap. 68. pag. 56.

NVS ^{t)} *si necessitas coeperit, (leg. potius coëgerit, ut alibi saepe,) etiam vinum, sed omnino paruum, ad releuandas corporis vires, dandum: Et rursus ^{u)}: Dabimus mediocriter vinum lene, paruum. Quibus, ut et aliis, locis, passim hinc inde apud ipsum, occurrentibus, vinum paruum idem est, ac οἶνος ὀλίγος, hic in nostra Epistola paulina. Accedat his demum alius eiusdem CAELII AVRELIANI locus, propter argumenti scilicet similitudinem ^{x)}: In nutriendis Viribus, vinum dari constituit, prout ibi, ex nostra quidem emendatione, haud dubie legendum videtur: ita enim prorsus PLINIVS, Lib. XXIII, cap. I. *Vino aluntur vires, et iterum Lib. XIV. cap. 5. pulcherrime: Neque Viribus corporis utilius aliud, Vino, neque aliud voluptatibus perniciosius, si modus absit.* Sed ipsa hic potius loquatur quotidiana experientia. Omitto iam plura id genus alia, passim apud ipsum obuia. Huc tamen et apprimè CORNELIVS CELSVS ^{y)}: *Vinum meracius quidem; sed non ita multum, dari debet:* quod et saepius alibi, prudenter monuit. Sed de his haecenus: *ὃ γὰρ πρέπει περὶ οἶνος ὀλίγος πολυλογεῖν, ἀλλὰ μᾶλλον ὀλίγον λόγον ποιεῖν*, nec vini parcos prodigos esse decet verborum. Si quis vero praeter iam a nobis hic allata, plura hanc in rem collecta cognoscere aueat; is, quaeso, post HVG. GROTIUM, euoluat praesertim IO. PRICEVM, ^{z)} IO. IAC. WETSTENIUM, ^{a)} WOLFIUM nostrum, eheu! desideratissimum ^{b)}, et alios Interpretes, quibus demum addat DIETERICVM ^{c)} et praecipue IO. RHODIVM. ^{d)}*

Tracta-

t) *Acutor. Morbor. Lib. I, cap. II. pag. 34.*

u) *Morbor. chronicor. Lib. I, cap. 4. pag. 305.*

x) *Acutor. Morb. Lib. I. cap. 15. pag. 59.* ybi tamen vulgo, in omnibus Edit. sic inepte et ridicule prorsus legitur: *In nutriendis virginibus, vinum dari constituit:* ineptior vero magisque ridicula est adiecta ibi explicatio: *Forſan meretriculis, quarum procacia mero incenditur.* Sed nec meretriculis, nec virginibus, locus ibi esse potest ullus, ut ipsum CAELIVM inspicitur protinus clarissime patebit. Simile vero turpe mendum, ut id obiter hic interponere liceat, foedauit etiam SALLV-

STIVM, cap. 99. de Bell. Iugurth ubi sine vlllo sensu, in omnibus Codd. hodie legitur: *Vectigales, item tubicines simul omnes signa canere:* pro quo tamen scribendum omnino, *Vigiles*, ut iam olim obseruauimus, et forte etiam alii dudum viderunt: Libri enim iam non sunt ad manum.

y) *Lib. III, cap. 21. pag. 166.*

z) *Comment. in h. l. pag. 807. sq.*

a) *Comment. in h. l. pag. 346. Tom. II.*

b) *Cur. philol. Tom. III. in Epist. Paul. pag. 481. in h. l.*

c) *In Iatro Hippocrat. p. 1042.*

d) *Lexic. Scribon. p. 381. sq. ubi plura, quae huc spectant, lectu digna.*

Tractarunt quidem iam alii, ante nos, hoc ipsum nostrum Argumentum, quos inter potissimum eminent HENRICVS SMETIVS ^{e)} THOMAS BARTHOLINVS ^{f)}, GEORG. WOLFGANG. WEDELIVS ^{g)}, et VALENT. HENR. VOGLERVS ^{h)}, quibus demum accessit BENIAMIN EWALDT ⁱ⁾, laudabili quidem consilio et instituto sibi pares; ingenio autem, eruditione et fortuna, praesertim, quod ad postremum spectat, multum inter sese dispares. Omnes vero diuersam a nobis, viam ingressos esse, illico patebit illorum quidem dicta cum hac nostra Exercitatione, vel obiter tantum conferentibus. SMETIVS enim atque BARTHOLINVS, item, ex parte, WEDELIVS quoque, non tam ipsum TIMOTHEI morbum speciatim attingunt; sed operam potissimum suam in eo collocant, vt de indagando vero vocis ὀλίγος, sensu, nimis solliciti, in genus, naturam et virtutem vini diligentius inquirant, ab Apostolo in medelam, TIMOTHEO commendati: Inde igitur parum hic nobis profuerunt viri hi alias praestantissimi; inprimis, quoniam simul plerisque, ex illis, iam fatali quadam necessitate, nobis carendum fuit: Laudatus tamen modo VOGLERVS ipsum quoque TIMOTHEI morbum, seu κακοστομαχίαν, nonnihil illustrare instituit, qui inde videatur, si libuerit. De postremo autem EWALDI labore, aut conatu, ne quid nos ipsi paullo inclementius in illum dixisse videamur; ipsi, quaeso, Lectores candidi, rerumque periti aequum ferant iudicium, vel ex vnico ipsius loco, hic infra, a nobis, sed intra spem impetrandae prius veniae, speciminis veluti gratia, producendo: ^{k)}

Verum

e) *Miscellan. Med. Lib. XI, 4. pag. 620. seqq.* vbi perquam copiose, sed et perquam egregie et exacte, de hoc ipso nostro loco sacro tractat.

f) *de Morb. Biblic. Cap. xxv. p. 85. seqq.*

g) *Exercitat Medico-philol. Decad. IX. Exercitat. IV. pag. 27. seqq.*

h) *De Rebus natural. et med. in scriptura sacra, pag. 364. seqq.*

i) *In Scrutinio Med. Timothei Infirmi-
tatum Vini ὀλίγῳ curandarum, Regiomon-
ti, 1706.*

k) *Praesumitur haud vane, verba sunt Auctoris, §. x. pag. 6. appetitum Timothei exulem fuisse, ructusque subinde tonitruantes obortos, vel continuo horrendoque ventris murmure, et veluti arietantium in se spirituum rugitibus, etiam variato toties per gradus musicos, sono, circumstantium fors auditorum, vel proprias duntaxat aures offendisse. Haec tamen Auctor. Mira vero observatio, tonitruans quasi, et veluti arietantium in se spirituum rugitibus plena*

Verum haec qualiacunque haftenus commentati sumus, non quantum libuit; sed quantum potius licuit, ob Librorum meliorum ac potiorum penuriam, inuisis iam eheu! claustris abditorum, medias inter turbas, et calamitates publicas, temporibus hisce afflictissimis, quibus ad cor moestum ac deiectum fulciendum et reficiendum, οἶνω ἐκ ὀλίγω, ἢ ὀλιγοφώρῳ, ἀλλὰ μᾶλλον πολλῷ καὶ πολυφώρῳ, ἀνευ δὲ μέθης καὶ κραιπάλης, opus esse videtur. Ipsam autem scribendi occasionem opportune nobis praebuit haec ipsa Dissertatio Inauguralis Medica, de *Malo Hypochondriaco*.

EXERCITATIO DVODECIMA.

DE

MACIE CORPORIS

EX

OBSIDIONE CONTRACTA

AD

QVENDAM GALENI LOCVM A MAGNIS CRITICIS

FRVSTRA TENTATVM ILLVSTRANDVM

ET VINDICANDVM.

Dira illa duraque obsidio, quam, triennium nunc fere effluxit, non quidem diu, at tanto grauius, perpeffi sumus, cuiusque tristem horridamque memoriam nulla vnquam apud nos delebit aetas; com-
mode nunc me memorem facit loci cuiusdam singularis apud GALE-
NVM ^{a)} occurrentis, in quo inter alias maciei et atrophiae causas, ipsa quoque *obsidio* relata legitur. Qui tamen, quum a Viris quibus-
dam eruditissimis et in maxima quidem fama positis, praeter omnem
ratio-

plena eloquentia, et suauifona denique
Musica scilicet. Sed nec tempus, nec lo-
cus hic iocandi. *Iam frons laeta parum,
et deiecto lumina vultu: Et nox atra capat*

*tristi circumvolat umbra, ut cum poeta sic
eheu! loqui liceat.*

a) *Comment. I. in HIPPOCRAT. Lib.
de Articul. Text. xxix. pag. 308, Tom. XII.
Opp. per CHARTER.*

rationem, aut necessitatem, diuersis modis tentatus, siue rectius, vexatus fuerit; nostra certe opinione, utique meruisse visus est, ut opportuna hac occasione, nobis hic forte subministrata, nostra qualicunque opera, et liquido illustraretur, et potissimum ab intempestiuis illis emendationibus et infelicibus coniecturis, heu! piget fateri, solide vindicaretur.

En vero nunc ipsa GALENI verba, prout hodie quidem, in melioribus Operum Editionibus, leguntur:

Ὅσοι διὰ λιμὸν, ἢ διὰ πολιορκίαν ἢ πένθος, ἢ λύπην, ἢ ἀνορεξίαν, ἐνδεῶς προσφερόμενοι τροφήν, ἐλεπτύνθησαν, ἐκ εὐθείας αἱ σάρκες αὐτοῖς γίνονται ξηραὶ. κ. τ. λ.

Quae ita recte sciteque latine redduntur:

Quicumque seu fame, seu obsidione, seu luctu, seu moerore, siue etiam cibi fastidio, alimenti non satis sumentes, extenuati sunt; caro non statim siccescit.

Haec igitur, licet tam clara planaue omnino videantur, ut nulla fere explicatione indigeant; tamen, quis non valde miretur? ita obscura atque vitiosa, ex parte, visa sunt MARSILIO CAGNATO, ^{b)} Medico cetera doctissimo et Critico solertissimo, ut falsam deprauatamque lectionem illius loci infelicitè arriperet, eamque infelicius adhuc defendendam et commendandam serio censeret.

Quum enim olim in vulgatis antiquioribus GALENI exemplaribus, aut scribentis negligentia, aut imprimentis errore, πολιοργίαν, legeretur; maluit CAGNATVS iste illam vitiosam lectionem secure nimis, sequi, eamque per *iracundiam*, vertere; quam rectiorem sanioresque VIDI VIDI interpretationem tutius approbare, qui reddiderat istam vocem per *obsidionem*, legendo nempe acute prorsus feliciterque, πολιορκίαν; quae scilicet lectio vnice vera et proba, immo vnice necessaria est, hoc quidem loco, uti mox pluribus, solide spero, perspicueque satis, docebitur.

Sed

b) *Variar. Observat. Lib. II. Cap. 13. Critico- IAN. GRVTERI, Tom. III. Parte Secunda.*
pag. 545. sqq. in *Lampade*, seu *Thesauro*

Sed audiamus nunc, si lubet, ipsius rationes, quibus sese potissimum inductum credidit, ut admitteret potius vulgatum, etsi obscurum adhuc et ambiguum, nempe πολυοργίαν, quam rectum et emendatum, πολιορκίαν, ut VIDIO merito videbatur.

Ita igitur, quasi re iamiam transacta, et lite plane decisa, severe pronunciat: *Si sententiam spectemus; nusquam apparet huius mutationis necessitas: Non enim dubitatur, quin aliquis ob iracundiam, exiguo sumto cibo, possit emaciari: Obsidionis autem mentio opportuna non videtur: etenim confundit et perturbat orationem. Nam famem, luctum, dolorem, inappetentiam inedia sequi potest; simili modo et iracundiam. Inediam vero sequitur macies: at obsidionem non sequitur inedia, nisi eam praecedat fames, aut animi aliqua perturbatio, aut quid aliud, quod prohibeat hominem nutriri, seu cibum sumere. Scilicet Obsidio non est eiusdem causarum ordinis, cuius fames, luctus, moeror, inappetentia, quippe hae propinquiores; illa remotior est; at non est verisimile, unam hanc ex remotis causis, cum propin quarum multis confundere Galenum voluisse. Iracundia vero est eiusdem ordinis, cuius sunt aliae ab ipso commemoratae, ideo videtur eius mentio, quam obsidionis, opportunior, si ad verborum, graecique sermonis integritatem animum attendamus.*

Haec quidem ille: quae tamen nollem ita inconsiderate excidisse viro doctissimo; quoniam, si candide fateri liceat, haec omnia nec villo solido fundamento nituntur, nec apte et concinne inter se cohaerent; quin potius sibi inuicem manifesto vehementerque aduersantur, adeo, ut haec ipsa veri inania commenta referre, ac refellere, prope modum vnum idemque sit. Cur enim, quaeso, ut pauca tantum iam moneam, sola obsidionis mentio, ex Auctoris quidem opinione, hic minus opportuna videatur, et sola confundat ac perturbet orationem; quum tamen fames ac cibi fastidium eandem non confundant? Verum respondet mox CAGNATIVS noster: *Obsidio non est eiusdem causarum ordinis, cuius nempe fames, luctus, moeror, inappetentia. Sed hoc sane perquam mirum mihi videtur: fames enim et inedia haud magis eiusdem sunt causarum ordinis, ac moeror, luctus, tristitia et iracundia. Quod si ergo ad eandem hanc classem referri haec com-*
mode

mode possint, ut prudenter hic factum videmus ab ipso GALENO; cur, obsecro, sola obsidio, quae eiusdem nempe est generis atque ordinis, ac fames et cibi fastidium, hic temere excludatur? quae tamen, ut eheu! notissimum, et corpus horrida macie consumit, et mentem simul edacibus curis, luctibus, et paucioribus obruit ac deprimat, ut inde miserrimi obsessi duplici quasi flagello crudelissime caedantur. Quare perquam frigidum et paene ridiculum, sit venia dicto, mihi videtur, quando Auctor noster statim subiungit: *Obsidionem non sequitur inedia, nisi eam praecedat fames, aut animi aliqua perturbatio, aut aliud quid, quod hominis nutritionem prohibeat.* Quasi vero non in plerisque obsidionibus, praesertim diuturnioribus, aut praecedat, aut sequatur dira fames, aut certe ciborum fastidium; in omnibus vero perpetua animi perturbatio, moeror, angor, cura ac vigiliae, aliaque plura mala, quae corpus tum male curatum, lenta macie conficiant, viribusque sensim exhauriant. Causas ergo et physicas et ethicas hic scite et apte coniungere voluit GALENVS, quae corpus cum anima arctissime sociatum arida macie limant atque extenuant. Obsidio nimirum, et fida foedaque ipsius comes, fames, cum inedia, aut ciborum nausea, spectant ad corpus; luctus vero, moeror atque anxia cura ad animum, ut nemini non notissimum. Sed de his inferius plura.

Quodsi vero cuncta haec momenta, mea certe opinione, haud leuia, etiam non obstarent; nullo tamen prorsus modo tolerari commode hic posset vox ista GALENI Libris illata, et frustra a CAGNATO defensa, scilicet πολυοργία: Tota enim barbara est, et vniuersae Graeciae prorsus ignota. Scribendum vero tum rectius fuisset πολυοργησία, ut ad hanc normam formamque, ἀοργησία legitur apud ARISTOTELEM, ANDRONICVM RHODIVM et alios, inprimis autem PLVTARCHVM qui integrum περὶ ἀοργησίας, Librum conscripsit, ceu notum, item δυσοργησία, apud HIPPOCRATEM nostrum, εὐοργησία, apud PHILONEM IYDAEVVM, BASILIVM M. IOANNEM CHRYSOST. et alios: Πολυοργία, vero aut πολυοργησία apud nullum probatae notae Auctorem, quantum equidem me-

mini, vsquam occurrit. Quis ergo nunc credat, GALENUM, atticarum elegantiarum callentissimum Virum, earumque studiosissimum sectatorem, vt saepe ipse de se vere praedicat, praeter vllam necessitatem, voce tam horrida et inficeta, atque hinc acerrima omnium Musarum πολυοργία aut πολυοργησία, digna, vt sic barbare loquar, vnquam vsum fuisse? Sed ipsi iam CAGNATO prudenter obiectum fuit, a Viro quodam graece doctissimo, πολυοργίαν haud esse vocem graecis auribus cognitam et auditam; quem tamen scrupulum ipsi mox exemit alius superueniens, illo in graecae linguae notitia si non peritior; at certe audacior, qui hic ad consuetam Graecorum licentiam in componendis alio atque alio modo, Vocabulis, ipsamque Linguae analogiam prouocauit, addendo insuper, ne quid fuco, aut scenae deesset, sese apud alios quoque Auctores hanc ipsam vocem controuerfam πολυοργίαν, quondam legisse, licet iam ipsorum locorum haud amplius recordaretur. Sed qui poterat quaeso, bonus iste homo illorum locorum recordari, quos, certus sum, nusquam viderat, nusquam legerat, quoniam in ipsa rerum natura haud extabant? Nihilominus tamen ipse CAGNATVS vano hoc fumo fucoque fraudulenter inductus et turpiter delusus, nimis profecto confidenter, etiam sic recte iudicante REINESIO, scripsit: *propterea omnis incendi suspicio in voce πολυοργία, auferenda videbatur.* Mox tamen, quasi de Vadis aut Vatis illius fide haud satis adhuc certus, rursus fluctuat, et a sagacissimo MVRET O admonitus, mauult πολυωρίαν, hoc est curam, legere, quam πολιορκίαν, admittere, quae vox, nescio quare, ipsi mirum in modum molesta et odiosa videtur.

Verum quod ad vocem πολυωρίαν a MVRET O quidem substitutam, attinet; eam, licet probe graeca sit, haud tamen hic locum commode inuenire posse crediderim, ideo, quoniam semper fere non tam curam anxiam et cum moerore et luctu coniunctam; qualem nempe hic GALENI locus proprie requirit, quam potius, curam nobilem ac prouidam, siue custodiam cum auxilio, honore, praesidio, et liberali beneficentia unitam significat, vt ex AELIANO probat SVIDAS, item EYSTATHIUS, HESYCHIUS cum aliis, luculentius

lentius vero patet ex DIODORO SIC. *Lib. I. pag. 69. et pag. 102. Lib. XI. pag. 469. et Lib. XVIII. pag. 206.* item PLUTARCHO, *Lib. an seni gerenda sit Respubl. pag. 792. Tom. II. et alibi*, quibus addas licet BVDAEVM, STEPHANVM et alios. Inde ergo LXX. INTERPRETES τὸ πολυωγείη, et πολυωγίαν, frequentius Deo ipsi attribunt, vt in Psalnis et alibi, videre est, item et apud CLEMENTEM ALEX. *Paedagog. II. 8.* bene obseruante CASAUBONO: ^{c)} cui profecto curam humilem, abiectam, vitiosam et cum moerore ac tristitia sociatam adscribere, nefas omnino foret.

Quoniam igitur nec πολυωγία hic locum habere potest, quia nempe omni auctoritate caret, vt modo perspicue demonstratum; vnde et nihil reperire potuit, licet operose quaereret, vt solebat, DAVMIUS, ^{d)} quo iuuaret aliquantulum ambiguum CAGNATI sententiam, aut desperatam propemodum causam aliquo modo defenderet: neque porro MYRETI πολυωγία, ob rationem supra datam, curam vllam, aut attentionem hic meretur; hinc vtramque hanc coniecturam, tanquam infelici sub fidere natam, omnino reiiciendam censemus.

Vnus vero adhuc superest THOMAS ille REINESIUS, Vir in hoc amoenò vtilique studiorum genere, sui saeculi, per Germaniam nostram, facile primus, immo paene vnicus, qui, vt erat nempe iudicio acerrimo, ingenioque foecundissimo, duplici modo hunc ipsum GALENI locum emendare adgreditur, sicque tandem pro summa sua, qua tum in docto orbe pollebat, auctoritate, seuere ac confidenter pronuntiat: ^{e)} *Vera Lectio est: πολλὴν ἀγρυπνίαν, continuæ enim et pertinaces Vigiliae non minus extenuant corpus, quam fames et moeror diuturnus. At, quum etiam nimia Venus et frequentior coitus corpora resoluat et extenuet; videndum, an legi possit, quod edito esset propius: πολλὴν ὀχέϊαν: HIPPOCRATES Lib. II. περὶ Διαίτης λαγνείη μὲν ἰσχυαίνει διὰ κένωσιν.*

ZZZ 3

c) In *Casaubonianis*, a B. WOLFIO heu! quondam nostro, editis, pag. 81. Conf. Cel. WESSELIUS, ad DIODOR. SIC, *Lib. I. pag. 69.*

d) *Epist. XLV. ad REINES. pag. 125. sqq.*

e) In *Appendice suis et DAVMII Epistolis ἀποβαταῖς* adiecta, pag. 342.

κένωσιν. Haec ille ἰατρὸς τε καὶ κριτικὸς πολλῶν ἀντάξιός ἄλλων. Equidem ingenue hic fateor, vtramque hanc Viri magni coniecturam ingeniosam vtiq̃ue esse, verisimilem, locoque huic longe conuenientiore, ac quidem praecedentes CAGNATI atque MVRETI; praefertim vero priorem, de multis continuisque Vigiliis, quippe quae non leue vtiq̃ue fulcrum ex isto consimili fere ipsius GALENI^{f)} loco accipere videtur: λύπαι δὲ, καὶ ἀγωνίαι, καὶ θυμοί, καὶ φροντίδες, ἐν οἷσιν τρέπω καὶ αἱ πλείους ἀγευπνίαι, βλάβεσσιν, καταλύεσθαι τὴν δύναμιν, *Tristitia vero, et anxietates, et ira, et cura, eo genere sunt noxiae, quo frequentes Vigiliae, quod Vires resoluant.* Interim tamen, quod pace tanti Viri manium, dictum sit, neutra istarum emendationum mihi hic necessaria videtur; ob grauissimas, nisi fallor, rationes, iam supra late productas, quoniam nempe ipsam πολιορκίαν, ceu primariam causam, semper pressio quasi pede, tanquam tristes effectus, sequuntur λύπαι, ἀνορεξίαι, καὶ ἀγευπνίαι, et ex his sensim λεπτύσμενός, siue ἰσχνότης; *moerores, cibi fastidia, vigiliae, et inde totius corporis macies et cachexia, vti notissimum.*

Quare nunc vehementer miror, ipsum illum REINESIVM, pro mira sua sagacitate et coniectandi felicitate, illico non animaduertisse, vnice in hoc GALENI loco legendum esse πολιορκίαν: quum tamen ipse omne genus bellicarum calamitatum, per infausta sua tempora, expertus esset, nempe ciuium stragem, vrbium vastationes, agrorum depopulationes, aedium incendia, rapinas, propriaeque domus expilationes, fugam, famem, pestilentiam, et sexcenta alia furibundi Martis discrimina, vt passim ipse acerbissime conqueritur: g) vnde haud dubie probe nosset, non pinguescere in obsidionibus miseros incolas inclusos; sed extrema potius macie extenuari. In vrbe enim a feris hostibus arctius obsessā, et ingentibus machinis igniuomis nocte dieque, nulla interiecta mora, quassata, vbi immensa fere ferri igniti pon-

f) Lib. XII. de Methodo Med. Cap. 5. pag. 283. Opp. Tom. X. Conf. et eiusdem Comment. III. in VI. Epid. HIPPOCR. Text. 29. pag. 461. Tom. IX.

g) In Variis Lectionibus, et potissimum in Epistolis ad HOFMANNVM et ad NESTEROS. Vid. in primis Epist. II. VII. XVI. et XXX. etc. ad HOFMAN.

pondera horrendo cum stridore, per apertum aërem rotata voluuntur, quae aedes tremefactas perrumpunt, incendunt, euertunt, disiiciunt; ubi miserabile vulgus, domibus suis male fidis ac nutantibus relictis, cum terrifico ululatu, per desertos vicos pauide discurret, omnis consilii, spei, salutis vitaeque ipsius incertum, imo et peritaesum: ubi simul iustus metus mentem sollicitam perpetuo exagitat, ne ingens pulueris pyrii moles specu abdita, a vicinis undique flammis subito correpta, horrido fragore explodatur, totamque sic urbem imis e sedibus euersam in miserandum bustum conuertat, hominesque ipsos communi illa ruina inuoluat, ut auulsi lacerique hinc inde artus in sublime rapti, faxis trabibusque intermixti, horrendum visu! circumuolitent: ubi denique omnia clamore militum, strepitu armorum, mulierum puerorumque ploratu, sonitu flammae, fragore ruentium tectorum, terrore, tumultu, trepidatione, imo caede, sanguine et rapinis miscentur: In tali inquam vrbe, mille calamitatibus oppressa, quis obsecro, tum tam ferus est ac ferreus, ut apparatissimas etiam epulas iucunde et auide appetat, vel attingere tantum cupiat; vel noctu, placidam ac tranquillam quietem, metu nempe omni solutus, sui que plane securus, capere possit? Nemini certe, nemini prorsus, tanta tunc mentis est constantia, nisi forte rectius, tantus stupor: Experti eheu! hic loquimur, qui, *quod miserrimum est in bello, ipsi saeuam obsidionem passi sumus*, ut EIV MENES olim apud LIVIVM ^{h)} dolens, merito exclamabat. Eo ipso enim moesto funestoque truculenti obsidii tempore, omni profecto, omni inquam,

Distriktus ensis cui super anxia

Ceruice pendet, non siculae dapes

Dulcem elaborabunt saporem;

Non auium Citharaeque cantus

Somnum reducent.

Inde igitur tam turbulento et desperato rerum statu, ipsa humana corpora curis, vigiliis, pauoribus, inedia, situ, squalore, et sexcentis aliis taediis et aerumnis hebetata et attrita, tandem, viribus sensim spo-

h) Lib. xxxvii. Cap. 53.

spoliata, lenta tabe macieque exarescant, plane necesse est. Hinc etiam de omnibus fere Obsidionibus, praesertim atrocioribus et diuturnioribus, quales potissimum ex antiquitate notae sunt *Numantina*, *Perusina*, *Praenestina*, *Brundusina*, *Metia*, *Saguntina*, *Atheniensis*, *Petolina*, *Rheginensis*, *Pyliana*, seu *Sphacteriana*, *Carthaginensis*, *Mutinensis*, *Byzantina*, *Messenica*, *Pydnaea*, *Tauromenitana*, *Massiliensis*, *Alesiana*, *Rhodia*, *Calaguritana*, *Azotia*, *Hierosolymitanae*, aliaeque plures passim commemoratae, a POLYBIO, DIODORO SICULO, DIONE CASSIO, PLUTARCHO, ATHENAEO, STRABONE, DIONYSIO HALICARNASS. IOSEPHO, LIBANIO, LIVIO, aliisque, praesertim vero APPIANO, observatum fuit, miserandum prorsus spectaculum post feram tandem deditionem, praebuisse ipsos ciues, laruarum, aut infernarum imaginum ad instar, macie tetra paene confuntos,

Hostibus ipsis

Pallorem et maciem, et tenues miserantibus artus,

ut Vascones Calaguritanos, saevam obsidionem diutius passos graphice describit IUVENALISⁱ⁾ Quo et praesertim spectat viua illa spiransque Obsidionis Dertonensis descriptio GUNTHERI, sui saeculi Maronis:^{k)}

*Quis referat miserae squalorem plebis, et aegro
Tabida membra situ, detestandumque colorem?
Quum velut e tumultu, permissu Regis, ab arte,
Non homo, sed pallens hominis prodiret imago.
Tunc licuit miseris, quam sit miserabile, longa
Obsidione premi, proprio perpendere casu.*

Sed

i) Satyra xv. 100. vbi vid. GRAN GAEI et reliquorum Interpp. Notas, apud HENNINIVM. Conf. DAYSQVEI. ad SIL. ITAL. Lib. II. pag. 89. sqq.

k) In *Ligurino*, Lib. III. 168. sqq. add. et antecedent. v. 19. sqq. vbi vid. RITTERSMYSIVS. Imitatur vero hic

ipse GUNTHERVS potissimum SILIVM ITALICVM, modo laudatum in spirante quasi descriptione horrendae famis saguntinae obsidionis, Lib. II. 463. sqq. vbi in Notis plura similia opportune adfert citatus modo DAYSQVEIVS, pag. 87.

Sed regrediamur, si placet, ad antiquiora aliquanto tempora. Ita igitur ARISTOPHANIS *scholiastes*, ¹⁾ et ex illo SVIDAS ^{m)} de Obsidione Pylina, siue Sphacteriana: διὰ τὸ πολλαῖς μὲν ἡμέραις πολιορκεῖσθαι ἐν ἐρήμῳ νήσῳ, καὶ ἀφ' ἧς εἰδὲν τῶν ἐπιτηδείων ἦν λαβεῖν, πολλῷ δὲ μετὰ τὴν ἀλῶσιν, συγκεκλείσθαι χρόνῳ, δεδεμένους ἐν ξύλῳ, ὥχρους τε καὶ ἰσχυρὸς, καὶ δυσειδῆς γεγονέναι: Quare necesse erat, illos propter obsidionem diuturnam, quam in Insula deserta, omniumque rerum ad victum necessariarum inopia laborante, sustinuerant, et quod post captiuitatem, compedibus et neruis vincti, in carcere diu detenti fuissent, pallore et macie confectos fuisse, et tetrum sui spectaculum praeuisse. Sic et de Romanis in tumulto quodam congregatis, et a Veientibus ibi arctius inclusis et obsessis, ut omnibus Vitae subsidiiis necessariis aegerrime carerent, DIONYSIUS scripsit HALICARNASS. Lib. XI. pag. 571. ἐμάχοντο κεκμηκότες οἱ πλεῖστοι τὰ σώματα λιμῷ τε καὶ δίψει, καὶ ἀγρυπνίᾳ, καὶ τῇ ἄλλῃ κακώσει: pugnabant, plerique fame, siti, insomnia, aliisque incommotis fracti. Pariter de Rheginis diuturna obsidione cinctis, ita DIODORVS SICVLVS: ⁿ⁾ τὰς ζῶντας νεκρῶν ἔχοντας διάθῃσιν, καὶ παρειμένους τὰ σώματα καταλαβὼν ὁ Διονύσιος: Quos viuos adhuc accepit Dionysius, mortuorum potius similitudinem referebant, habebantque corpora vigore destituta et emaciata: Quale quid etiam de Atheniensibus diu obsessis, retulit APPIANVS: ^{o)} Qui et alibi ^{p)} ita non sine legentium horrore, depingit nobis pertinaces trucesque Numantinos: σώματα ἦν ἀκάθαρτα, καὶ τριχῶν, καὶ ὀνύχων, καὶ θριπῶν, καὶ ῥύπαις μετὰ, Corpora ipsis erant sordida, et pilis, unguibus, vermibus ac squallore plena, prout scilicet hunc locum probabiliter legendum esse, alibi docuimus, ^{q)} sicut et paullo infra, apud eundem ^{r)} pro αὐτὰς ὄν-
τας

1) Ad Nubes ipsius, pag. 134.

m) Tom. I. pag. 880. Edit. KÜSTERI.

o) Bibl. Hist. Lib. XIV. Cap. III. p. 726.

Tom. I. Edit. WESSELIINGII Conf.

Lib. XIX. Cap. 49. pag. 355. Tom. II.

o) De Bellis Mithridaticis, pag. 331.

Tom. I. Edit. ALEX. TOLLII.

p) De Bellis Hispan. pag. 532. Tom. I.

q) In Obseruat. Criticis, Lib. IV. Cap.

18. pag. 416. vbi pro monstroso ὀρεῦπῶν, recte forsan legimus θριπῶν.

r) De Bellis Annibal. pag. 552. Tom. I.

Mendum quidem huius loci bene perspexerunt

τας ἀπ' ἀγρυπνίας καὶ κόπῃς, scribendum omnino videtur ἄνους ὄντας, *siccus, aridos et infirmos a vigiliis et laboribus*, quomodo eleganter saepius loquuntur LUCIANVS, AELIANVS, GALENVS, IOSEPHVS, LIBANIVS, HELIODORVS et alii plures; sed de quo alibi plenius et accuratius. Denique huc etiam eximie pertinet sequens THEODORETI locus, ^{s)} de Daniele, tribusque ipsius sociis in captiuitatem Babylonicam, aut, quod fere idem, in aulam regiam abductis: αὐτὰς δὲ ἐκέλευσε ὁ βασιλεὺς τὴν ἐκ τῆς πολιορκίας, καὶ τῆς ὁδοιπορίας ἀποδύσασθαι κακῆς χίαν, *Iussit Rex, ut macilentum infirmumque corporis habitum ex obsidione et itinere contractum exuerent, siue deponerent*. Verum hic potius ipsum sanctissimum Vatem IEREMIAM, testem scilicet αὐτόπτην grauissimum, audiamus, qui longa pertinacique obsidione pressos a Nabuchodonosore, ciues hierosolymitanos miserimos, ceu tenues potius et exangues umbras, quam viuos vigentesque homines, ita describit, seu rectius depingit: ^{t)} Ἐπάγη δέμα αὐτῶν ἐπὶ τὰ ὀστέα αὐτῶν, ἐξηράνθησαν, ἐγενήθησαν ὥσπερ ξύλον: *Arcte adhaesit*

xerunt TOLLIVS et PALMERIVS; sed non bene correxerunt. Ille enim inferendum censet μαλακῆς; hic vero in *Exercitat. in Auctores Graec.* pag. 162. legendum coniicit κάμνοντας, vel potius ἐκλύτῃς ὄντας. Verum rectior haud dubie est lectio nostra ἄνους: Sic ἄνους ὑπὸ λιμῆ, dixit ALCIPHRON, *Ep. 4. Lib. III.* et *Ep. 70.* ἄνους ὡν ὑπὸ τῆς τῶν ἀναγκαίων ἐνδείας: quomodo et LUCIANVS saepe, ἄνους ὑπὸ λιμῆ, ἀγρυπνίας, πόνῃς, et APPIANVS ipse ἄνους ὑπὸ πολιορκίας: Taceo alia plura. Sed et ita Latini: *Fame siccus*, dixit CATVLLVS et MARTIALIS, *Mulier cibi abstinentia sicca*, PETRONIVS, *ieiuniis aridus*, TERTVLLIANVS in *Apolog.* Quibus vel maxime accedit, frequentissime in Vett. Codd. confundi ἄνους et ἀντὸς, ut apud IOSEPHVM, LUCIANVM, AELIANVM et alios. Vid. GRAEV. ad LUCIAN. *Tom. II. pag. 888.* Cl. GRO- NOV. ad AELIAN. de *Nat. Animal. Lib.*

II. *Cap. 5. pag. 992. Tom. II HUDSON,* ad IOSEPH. *Lib. VI. de Bell. Iud. Cap. 4. pag. 348. Tom. II. et IS. VOSS. ad MELAE Lib. I. Cap. 14. pag. 383.* denique etiam IO. PIERSON. *Verisimil. Lib. I. Cap. 3. pag. 37.* vbi in ANTONIN. LIBERAL. *Cap. 24.* αὐτὴν ὑπὸ πολλῆ καίματος, rectius legit, pro vulgato αὐτὴν, quod et dudum ipsi videramus: alias enim sensus sibi non constat. Sed plura huius frequentis confusionis exempla collegit THOM. GATAKERVVS, in *Aduers. Miscell. posthum. Cap. XIV. pag. 554. sqq.* et post eum, Auctor ignotus, in *Miscell. Obseruat. Crit. Vol. V. Tom. III. pag. 42. sqq.* Igitur de hac nostra emendatione vix dubitandum. Sed de his alias, ut dixi.

^{s)} *Serm. VIII. de Providentia, pag. 286. Edit. Paris.* cuius et vid. *Quaest. 21. in IV. Regg. Libr.*

^{t)} THREN. IV. 8.

adhaesit eorum cutis ossibus eorum, exaruerunt, et facti sunt sicut lignum: et mox in sequentibus: ^{u)} Τὸ δέγμα ἡμῶν, ὡς κλίβανος ἐπελιώθη, συνεσπάσθησαν ἀπὸ προσώπου καταιγίδων λιμῶν: Cutis nobis sicut furnus, nigra et contracta fuit, a facie; seu praesentia violentissimarum famis tempestatum. ^{x)} Quibus consona prorsus est ista significantissima PHILO-
LONIS IUDAEI descriptio, Lib. de Execrat. pag. 723. οἱ πρὸ μικρῶν
πίονες, ἔυσαρκοί τε, καὶ ἐνεξία μάλιστα θάλλοντες, ἕτως αἰφνίδιον ἐκ-
τακέντες, ῥικνοὶ γεγόνασιν, ἴνες αὐτὸ μόνον, καὶ λεπτὴ δορὰ. Qui paulo
ante obesi, carnosi, lusculentaque habitudine florentes conspecti fuerunt, tam
repentina tabe colliquati sunt, rugosi redditi, et vix nervis haerentes atque
ossibus, opertique tenui cuticula. Hoc est vt facundia Liuiana elegantius
id exprimam: Effigies, imo umbrae hominum, fame, frigore, illuue,
squalore enecti, contusi ac debilitati inter saxa rupesque. Lib. XXI. Cap. 40.
Conf. FRANCISCI IVNII Lib. III. de pictura Vet. Cap. 10. pag. 272.
Sed haec haecenus.

Possẽm quidem adhuc longe plura exempla et testimonia similia
huc larga admodum manu adferre, ex PLVTARCHO, ARISTIDE,
POLYAENO, PROCOPIO, NICETA CHONIIAT et aliis, inprimis
autem ex LIBANIO, ^{y)} nisi haecenus producta abunde sufficere me-
rito crederẽm, ad liquido demonstrandum, nullam plane aliam lectio-
nem in GALENO locum commodẽ habere possẽ, nisi solam illam
πολιορκίαν; omnesque inde hariolationes et coniecturas CAGNATI,
MVRETI et REINESII, magnorum cetera Virorum, inutiles pror-
sus esse ac superuacaneas.

A a a 2

EXER-

^{u)} Ibidem, Cap. v. 10.

^{x)} Nempe studio hic retinuimus grae-
cam LXX. INTERPRETVM versionem,
quoniam ipsum S. HEBRAEI COD. sen-
sum, hoc certe loco, alias quidem sae-
pius aberrantes, optime expresserunt. Sic
עפר עור bene reddiderunt per ἐπάγη
δέγμα αὐτῶν, item עור per ἐξηράνθησαν:
nec male quoque Cap. v. 10. נכמר inter-
pretati sunt per πελιώθη et συνεσπάσθησαν,
(forte rectius, συνεσπάσθη) sic ad vtrum-
que Verbi נכמר significatum, nempe deni-

gravi et contrahi, respicientes: Nisi for-
san ibi rectius fuerit legendum: τὰ δέγμα-
τα ἡμῶν ἐπελιώθησαν, συνεσπάσθησαν: In ipso
enim Cod. sacro est עור נכמר h. e. pel-
les nostrae attratae aut conuolutae sunt. Sed
haec obiter. Omnium accuratissime au-
tem et elegantissime reddiderunt עור עפר
עור Zalhapthoth Rahab, per καταιγίδας
λιμῶν, hoc est, tempestates famis rapidissi-
mas, insigni certe cum emphasi. Sed
de his nunc satis; sunt enim alterius loci.
^{y)} Declamat. XIX. p. 509, et passim alibi.

EXERCITATIO DECIMA TERTIA.

DE

PLANTA QVADAM VENENATA

EIVSQUE FVRIOSO EFFECTV

ΑΙΘΟΟΣΤΡΟΦΩ.

COPIIS ANTONIANIS OLIM EXITIALI

AD

ILLVSTRANDVM QVENDAM APPIANI LOCVM
IN PARTHICIS.

Lectu digna magis, quam iucunda illa est singularis Historia, quae luculenter illud miserandum enarrat fatum, quod M. Antonii exercitum dira fame diutius obsessum et oppressum adeo usque afflixit, ut plurima illius pars foeda et ignaua veluti morte occumberet, quum bellum ille gereret atrox aduersus feroces et inhumanos Parthos. Rem omnem, prout tum acta fuit, stupentibus cunctis videntibus, diserte ita exponit APPIANVS ALEXANDRINVS: ^{a)}

Iamque fame tentabatur Exercitus, quod frumentatio impediretur crebris proeliis, et instrumentum pistorium deficeret, relictum ex parte maxima. Iumenta quoque partim perierant; partim occupabantur vehendis aegris et sauciis. Fertur, Choenicem Atticam tritici quinquaginta drachmis tum venisse, et hordeaceos panes repensos pari argenti pondere. Versi deinde ad radices et olera, pauca inueniebant usitati generis: et quum cogerentur experiri, quae nunquam gustauerant; primum inciderunt in Herbam, ducentem ad mortem, per insaniam. Quisquis enim hanc in cibo sumserat, aliorum negotiorum ignarus, et immemor, unum agebat; mouebat nempe et vertebat omnem lapidem, putans, se rem valde seriam agere. Ita totus campus repletus

a) Lib. de Bellis Parth. pag. 284. Tom. I. Opp. per ALEX. TOLLIVM. Sed proposita hic tantum studio, Versione La-

tina. In Edit. autem HENR. STEPHANI graeca, pag. 110.

pletus est effodientibus et transmouentibus lapides. Tandem euomendo bilem, moriebantur, quando etiam Vinum, quod solum erat remedio, defecerat.

Sic ergo miserrimi isti milites Antoniani a fame, hoste quidem crudeli, longe crudeliore coacti, Vitae quasi suae precariae prodigi, ad insolita, peregrina, dubia, nociua, quin et mortifera vescenda, duro saeuae necessitatis imperio, compellebantur; qualem quoque male suadam famem, vt poeta significanter ait, quondam, prope Dyrrhachium, tolerare cgebantur ipsae copiae Caesarianae, quum ab acerrima et indefessa aduersariorum Pompeianorum vigilantia, commeatus vnice necessarius et aliquoties iugulo, et cum vitae discrimine, frustra petitus et quaesitus, ipsis interciperetur: quam atrocissimam calamitatem ita quidem describit, imo vero rectius, viuis et spirantibus quasi coloribus, depingit ingentis spiritus vastique ingenii poeta, cuius pharfalica aeternum legentur: ^{b)}

Sed patitur saeuam, veluti circumdatus arcta

Obsidione, famem: nondum surgentibus altam

In segetem culmis, cernit miserabile vulgus

In pecudum cecidisse cibos, et carpere dumos,

Et morsu spoliare nemus, lethumque minantes

Vellere ab ignotis dubias radicibus herbas:

Quae mollire queunt flamma, quae frangere morsu,

Quaeque per abrasas utero demittere fauces,

Plurimaque humanis antehac incognita mensis

Diripiens miles, saturum tamen obsidet hostem.

Sed reuertamur iam potius, si lubet, ad nostrum APPIANVM, et sequentia ipsius verba, ceu notatu perquam digna, potissimum consideremus, atque paullo diligentius expendamus, quae tamen, vt

A a a a 3

inge-

b) LVCANVS, Lib. VI. 108. sqq. Conf. CAESARIS Lib. III. de Bell. ciuil. APPIAN. Lib. II. de Bell. ciuil. pag. 745. et pag. 763. Tom. II. SVETON. in Iul. Caes. Cap. LXVIII. et PLVTARCH. in eiusdem Vita, pag. 726 Tom. I. Opp. Ceterum similem fere rabidae famis, in Ob-

sidione saguntin. descriptionem habes apud SILIVM ITALICVM, Lib. II. 463. sqq. vbi vid. omniuo DAVSQUEIVM in Notis, pag. 87. qui plura ibi collegit tristitia eiusmodi omniuorae famis exempla, non sine horrore legenda.

ingenue fateamur, ex PLVTARCHO ^{c)} potius, ad verbum penitus, sunt desumpta, ex solito nempe APPIANI more, dum aliena, Aucto-ribus tamen ipsis haud nominatis, saepius in vsum suum conuertere confuevit, ceu notum: En autem ista ipsa: ἤσαντο τινὸς πόας ἐπὶ θάνατον διὰ μανίας ἀγέσης. Ὁ γὰρ φαγὼν, εἰδὲν ἐμέμνητο τῶν ἄλλων, εἰδὲ ἐγίνωσκεν. Ἐν δὲ εἶχεν ἔργον, κινεῖν καὶ τρέφειν πάντα λίθον, ὥς τι μεγάλης σπυδῆς διαπραττόμενος ἄξιον. ἦν δὲ μετὸν τὸ πεδίον κεκυφόντων χαμάζε, καὶ τὰς λίθους διορυττόντων καὶ μεδισάντων. Τέλος δὲ χολὴν ἐμῶντες, ἐθνησκον. ἐπεὶ καὶ ὁ μόνον ἀντιπαθεὶς ἦν, ὁ οἶνος ἀπέλιπε. Hoc est, ex nostra subita quidem, at, nisi fallor, aliquanto accura-tiore versione: *Herbam quandam gustando attigerunt, ad mortem per in-saniam, ducentem. Quisquis enim illam comederat, nihil quidquam aliud recordabatur, aut intelligebat. Id unum autem negotium agebat solum, nempe, ut omnem lapidem moueret et inuerteret, quasi vero rem valde seriam et maxima industria dignam, tractaret. Inde ergo omnis campus repletus erat militibus in terram pronis et inclinatis, lapidesque effodientibus ac trans-ferentibus. Tandem autem bilem euomentes, moriebantur: postquam etiam vinum, quod solum scilicet esse poterat Remedium huic malo oppositum, de-fecerat. Haecenus igitur APPIANVS, aut rectius, vt dixi modo, PLVTARCHVS.*

Nunc vero et nos omnem hic lapidem moueamus, sed saniore sensu, et laetiore, vt quidem speramus, euentu, quam factum est ab illis ipsis infelicibus militibus Antonianis, miserando fato pereuntis, vt quantum certe in nostris exiguis viribus repositum, vënenatam at-que manicam istam plantam parthicam indagemus, eiusque praesertim stupendum plane effectum λιθοσφόρον nonnihil explicemus. Iuste au-tem hic statim dolemus, inter eruditos quidem Medicos ac Philolo-gos, nondum nobis repertum esse quenquam, qui hoc quasi saxum voluisset, lucidam nobis facem in his tenebris praetulisset, atque hunc ipsum singularem APPIANI locum data veluti opera, iusto commen-tario illustrasset. Qui enim operose et copiose de ipsis Venenis, eo-rumque

c) In ANTONII Vita, pag. 937. Bibl. Graec. Lib. IV. Cap. 12. pag. 396. Tom. I. Opp. conf. huc FABRICII Tom. II.

rumque diuersa natura ac mirandis effectibus, scripserunt, Medici longe clarissimi doctissimique, vt MERCVRIALIS, CARDANVS, PARAEVS, GREVINVS, CAESALPINVS, ARDOYNVS, SCHENCKIUS, PONZETTUS, ZACCHIAS, BACCIUS, SCHARFFIUS, LIBAVIUS, SENNERTUS, KOENIGIUS, IONSTONVS, LINDERVS, aliique plures, ingens quippe eorum est numerus, et nouissime quoque illustris Anglorum Aesculapius, RICHARDVS MEAD, Fautor noster et amicus, dum Deus fataque sinebant, coniunctissimus integerrimusque, hi, inquam, omnes, quantum equidem recordamur, aut loci huius APPIANI plane non meminerunt, aut si etiam illius forte rarius parciusque meminerint, rem tamen istam serio atque ex instituto, haud tractarunt; sed leui potius brachio tantum attigerunt, ac obiter saltim, et veluti in transcurso, subitas quasdam dubiasque adhuc coniecturas in medium attulerunt. Sic igitur nouus ille Veteris illius Campi Elysii quasi fabricator, CASPARA REIES,^{d)} Vir alioqui pertinacis industriae et diffusae lectionis, ita mentem suam de hoc praesenti quidem loco, paucis declarat: *Colligo ergo, Herbam illam, quam APPIANVS in exercitu Antonii milites, extrema fame pressos, comedisse ait, Cicutam fuisse, aut Mandragoram.* Sed hoc profecto perquam dubitanter atque titubanter. Neque vero maiore sese veritatis specie commendabit, opinor, altera LINDERI supra modo laudati, coniectura, ita nimirum scribentis: ^{e)} *Eiusdem forte generis, scilicet Mandragorae, aut Daturae, aut Coriandri, vel Solani manici, seu Belladonnae, vel denique Baccarum Solani cuiusdam, nomine aureorum pomorum, vel Amoris, vulgo venientium, Herba ista fuit, quae in Parthorum regione, ab Antonii exercitu, prae fame, comesta, insaniam, obliuionem et mortem excitabat, ut prodit PLVTARCHVS.* Sed et haec cuncta pariter vage nimis, obscure, atque inconstanter, licet interea haud plane negandum, etiam has inter nominatas modo varias plantas venenatas atque furiosas, latere quoque eam ipsam herbam manicam λιδοςφόρον, ab APPIANO indicatam magis, quam descriptam, ex nostra

d) Quæst. XLIII. Elys. incund. Quæst. Camp. pag. 515.

e) Exercitaz. de Venenis, Cap. VI. pag. 122.

nostra certe opinione, forsan haud prorsus improbabili, de qua mox in sequentibus plura.

Vnus igitur, quantum mihi quidem constat, adhuc superest Medicus Parisiensis Celeberrimus, nempe NICOLAUS ANDRY ^{f)} sagax ille Vermium explorator, et pertinax expugnator, qui nouam plane, inauditam et inexpectatam prorsus viam est ingressus, ad hunc ipsum APPIANI locum commode sciteque explicandum. Putat nimirum Vir iste clarissimus, ex succo herbarum noxiarum stimulante imperiosa fame, improuide ingesto, enatos potissimum subito fuisse tetros atque mordaces vermes, in ipso illorum miserorum militum esurientium cerebro, qui illud vellicando et irritando, insolitam illam concitauerint insaniam, per apertos vndique campos vno impetu, veluti ex compacto, discurrendi, terram effodiendi, lapides ibi forte repertos eruendi, erutosque tandem operose transferendi; donec mors cum vehementissimo bilis amarae vomitu, subito superveniret, illosque ipsos inscios veluti, aut praescios iam, sui proximi sepulchri fossiores, sub illis ipsis lapidibus, a se acerrimo studio, quali in sepulturam, aut monumentum, congestis, protinus contumularet. Quod si tamen vinum praesto fuisset, tum necari haud dubie atque expelli commode potuisse ipsius singulari virtute anthelmintica, novos illos inuisosque cerebri incolas, siue vermes istos, modo in capite exortos, eoque ipso remedio infelices istos milites ab interitu feliciter tandem vindicari. Quibus mox subnectit Vir ingeniosissimus, sese in istam verisimilem de hoc APPIANI loco, sententiam potissimum inductum fuisse pari fere exemplo, sibi a fide digno amico relato, de quodam nempe generoso Viro e Delphinatu, qui inter epulandum, apud amicum, posteaquam vix quicquam acetariorum ex salubribus insalubribusque iuxta herbis, raptim collectis, paratorum, degustasset, de mensa surgens, protinus male sese habuerit, atque iam aeger, domum delatus fuerit: donec, triduo vix exacto, furore subito

f) *Tract. de Generat. Vermium, in Corpore humano, Cap. III. Artic. I. pag. 34. sqq. In quo Libro nemo forte quaereret*

hunc ipsum APPIANI locum explicatum, nisi forsan rectius, implicatum.

subito exagitatus, in campum pariter procurreret, infixis acriter unguibus terram praepropere effoderet, atque repertos ibi lapides congestos in aceruum, aut struem diligenter componeret; sed imminentis iam fati sui prorsus immemor, quod ipsum nempe paucis, interiectis diebus, e viuis rapuerit, et molesto ipsius inanique labori lapides frustra eruendi reuoluendique, finem tandem imposuerit. Tum vero aperto ipsius post obitum, cadauere, repertum fuisse in capite praesertim, vermem quendam insolitum, erucæ non nihil similem, qui in aquam tepidam coniectus, per biduum vixerit; instillatis vero in istam tribus quatuorue Vini guttis, protinus exanimatus fuerit. Vnde ergo liquido pateat ratio, ex Cl. nempe Auctoris praesumta opinione, cur ex Vini defectu, adeo misere perierint deplorandi isti milites Antoniani, quoniam nempe isti Vermes in cerebro concepti, nullo alio modo, aut remedio, nisi per solum Vinum, necari potuerint. Haftenus quidem Vir iste Celeberrimus. An vero hic ἀνδρῶδες τι fecerit Cl. ANDRY, ut sic loquar, hoc est aliquid Viro Medico gravi, solerti et rationali dignum? de eo equidem, placide mihi ignoscant ipsius manes, vehementer dubito. Nemini enim Lectorum, nemini, inquam, credibile, fat scio, multo minus probabile, videbitur, summa etiam vi ipsi sanæ rationi admota, tot millibus militum, vno eodemque temporis puncto, vermes eiusmodi grandes atque adultos in cerebro tam subito enasci potuisse, qui miserrimos istos protinus saevis quasi furiis atque furoribus exagitarent, ut veluti lymphatici, in spatiosos campos excurrerent, et lapides incassum eruerent ac prouoluerent. Quin potius inde certissime sum persuasus, omnes istos mecum, insolitam et inexpectatam prorsus Cl. Viri de subnatis in cerebro, vermibus, opinionem, magis esse admiraturos, quam quidem calculo suo adiecto, adprobaturos. Praesertim, quum variae insuper inde quoque emergant quaestiones, satis profecto arduae et solutu difficillimae: Scilicet, quomodo ex solo herbae venenatae succo, vermis perfectus et omnibus suis membris organisque concinne instructus, tam subito generari potuerit? quum secundum illam vnice veram, et a MALPIGHIO, GREWIO, SWAM-

MERDAMIO, LEEVWENHOECKIO, VALLISNERIO, DERHAMO, aliisque pluribus, magnis Viris, inprimis vero REAUMVRIO, amico heu! quondam nostro; quin et ab ipso nostro ANDRY, dudum receptam et solide defensam sententiam, vermis quilibet, etiam si minimus, et visu alias vix comprehensibilis, per ipsam rerum naturam, vermem semper sui similem progenerare debeat, neque vnquam casu fortuito, aut ex sordida putredine, sine maximo profecto miraculo, oriri possit. Porro, qua occulta et incognita prorsus via, vermis iste in ventriculo prius conceptus, tam subito cerebrum ipsum petere potuerit, et cur non potius in isto suo loco natali spatioso alimentario remanserit, ibique sedem quasi commodiorem fixerit? ac quomodo denique nouus ille et ingratus molestusque cerebri hospes, per vinum potu exhibitum, ibi necari, et qua demum via mortuus, aut putridus, salua tamen ipsius hominis vita ac sanitate, inde commodè educi potuerit? Quae sane dubia cuncta, omiſſis iam breuitatis studio, aliis, istis vtique haud leuioribus, me certe iudice, ita omnino comparata videntur, vt qua ratione, solida, certa, et ex omni quidem parte satisfactura responsio ad eadem, a quoquam reperiri et suggeri commodè possit, pro mea scilicet ingenii mediocritate, nullus profecto perspiciam. Praesertim, quum contra ipsam illam Vermium in Cerebro ipso, generationem, praesentiam et existentiam, olim nimis facile ac festinanter creditam ac descriptam, tot magna, grauiaque dubia, post ipsum perspicacissimum VALLISNERIVM, maxima cum ratione, in medium attulerit venerandus ille annis, meritis ac Virtutibus senex, ill. nempe MORGAGNVS, in opere illo nouo praestantissimo, *de Sedibus et causſis Morborum*, Tom. I. Lib. I. *Epist. anat. med.* I. pag. 7. sqq. Ecquid vero tum obseruo, dicturus fuisset hic ipse Vir incomparabilis, si quidem huius ipsius portentosae et incredibilis plane ἐλμινθογονείας, in tot millibus militum, vno veluti temporis puncto, protinus abortae, commodè meminisset? Forſan, credo, risum vix continuisset grauiſſimus ille senex. Neque porro, vt pergam, Cl. ANDRY quidquam iuuat altera illa de nobili isto equite ex Delphinatu oriundo, Historia, illustrationis quidem et confir-

matio-

mationis gratia, huc ob ipso allata; sed auditu potius alieno, quam visu proprio percepta et explorata: quam quippe eadem, imo adhuc maiores et grauiore difficultates premunt, quae dubiam nempe atque improbabilem prorsus iamiam reddiderant duram illam atque coactam APPIANI explicationem. Nimirum neminem quidem repertum iri confido, qui mente sana sobriaque concipere facile possit, quomodo a picridibus siue intubis noxiis forte, aut venenatis, intra breuissimum scilicet triduum, tam subito istius miselli equitis cerebro ingenerari potuerit eiusmodi vermis fatalis et formidabilis, erucae mordaci perquam similis; aut per quos demum caecos, angustos atque abstrusos cuniculos, idem ille, in ventriculo prius conceptus, aut exclusus, in cerebrum ipsum tam cito erepere ibique tantos motus fluctusque insanos ciere potuerit? Lepidum quoque, praeterea, imo rectius loquendo, ridiculum et propemodum absonum est, praesertim illud, vermem istum terribilem tribus tantum quatuorue Vini guttis, magna adiectae aquae tepidae copia dilutis atque disiectis, necari protinus potuisse. Sed omnis ista de Vino allata concludendi ratio est minus profecto appositae et cohaerens, aut vrgens; quin potius mera principii petitio, ut in scholis quidem loquuntur: Scilicet ideo pereundem fuisse infelicibus illis Militibus Antonianis, quoniam nempe vinum tum defecisset, quod solum interficere potuisset vermes illos in istorum quidem cerebro conceptos. Hoc enim omnino adhuc erat in quaestione, et in lite quasi nondum decisa; seu τὸ ἀμφισβητούμενον ἀντὶ ὁμολογούμενον, h. e. *controuersum adhuc pro confesso et concesso*, ut est apud GELLIVM, *Lib. xvii. Cap. 5.* Praesertim, quum aduersus omnis generis venena, tam plantarum, quam animalium, solis exceptis fossilibus, aut metallis pestiferis, Vinum vna cum Aceto, succo Citri, et omnibus acidis, sit generatim praestantissimum et praesentissimum remedium, vno ore clamantibus ac fatentibus, THEOPHRASTO, NICANDRO, GALENO, PLINIO, CORNELIO CELSO, SCRIBONIO LARGO, MACROBIO, ATHENAEO, et imprimis DIOSCORIDE g) atque

B b b b 2

PLV-

g) *Lib. v. Cap. ii. Lib. iv. Cap. 79. et Alexipharm. Cap. xi. pag. 406.*

PLVTARCHO, ^{h)} aliisque, quos laudat MERCVRIALIS ⁱ⁾ qui et cum innumeris aliis recentioribus, eandem merito tuetur sententiam, et ipsa sana ratione, et fida quoque experientia diuturna, vberime confirmatam. Igitur nihil quidquam plane hic de Vermibus cogitandum, inprimis, quum ipse APPIANVS aperte et liquido meminerit *πόας, ἐπὶ θάνατον, διὰ μανίας, ἀγέσης*, siue *plantae, per subitam insaniam, ad mortem ducentis*. Sed quomodo, quaeso, illa ad mortem ducebat? an per vermes? minime, sed potius, obseruante ipso APPIANO et PLVTARCHO, *δι' ἐμέτεχ χολῆς*, siue *per vehementem et continuum Bilis vomitum, aut lethalem Choleram*. Quod sane maximo et manifestissimo est indicio, plantae huius funestae virus, more nempe omnium aliorum venenorum, ore assumptorum, pestiferas suas vires vellicando, rodendo atque inflammando, primum praesertim exeruisse aduersus ipsum ventriculum eiusque vicinas partes, duodenum nempe, hepar, atque reliquas, quod scilicet ille fatalis bilis corruptae vomitus liquidissime confirmat; deinde vero virosam istam anathymiasin per neruos mutuo contactu sibi amice respondentes, ad ipsum cerebrum adscendisse, mentem quasi ipsam sauciasse, atque illam male sanam variis vanis ac turbulentis imaginibus impleuisse; praesertim vero ipsi acre illud et flagrans desiderium lapides latentes eruendi et circumuoluendi, simul iniecisse. Sic ergo nulli vermes physici in horum miserorum cerebro latuerunt; licet interea non negem, ethicos atque fatuos, aut fatuorum, ingenti copia tum ibi adfuisse. Frustra igitur omnino, vt tandem finiam, CL. ANDRY in hoc quidem loco, quaesuit potius vermes, quam re ipsa inuenit; et si forsitan quoque inuenerit, ipse potius ex sua tantum notissima hypothesis, de Vermibus, in omnibus paene morbis, inueniendis, istos secum attulit. Sed longe facilius omnino est, alienam coniecturam incertam refellere, quam quidem certiore ac meliorem ex suo ingenio

^{h)} Lib. de Garrulitate, pag. 509. Tom. II. Opp. et Symposiac. Lib. III. Quaest. V. pag. 653. conf. MACROB. Lib. VII. Saturnal. Cap. 6. pag. 511. vbi pro more solito, PLVTARCHVM ipsum exscripsit,

sed male intellexit, bene quoque obseruante MERCVRIALI, loc. cit.

ⁱ⁾ Lib. III. Var. Lect. Cap. 4. pag. 58. sqq. conf. eiusdem Lib. de Venenis, passim: praesertim pag. 51. et pag. 99. sqq.

nio proferre: ipsis praesertim hic silentibus Auctoribus nostris, PLUTARCHO nempe atque APPIANO, et generatim potius herbam venenatam indicantibus, quam speciatim nominantibus. Ferocem vero inprimis Parthiam mortiferarum plantarum fuisse feracem, STRABO, THEOPHRASTVS, PLINIVS alique testantur, accedente quoque et succinente poeta:

Parthica quin etiam tellus herbasque nocentes

Rupibus ingenuit.

Inde et barbaram illam Parthorum gentem tela sua Venenis armasse et vt SILIVS ITALICVS eleganter ait, infamasse, constat e LVCANO: ^{k)}

Spicula nec solo spargunt fidentia ferro,

Stridula sed multo saturantur tela veneno:

Vulnera parua nocent, fatumque in sanguine summo est.

In quo expressit Magistrum suum VIRGILIVM, ¹⁾ imo, vt ingenue fatear, felicissime superavit. Notum vero inter haec, praesertim est

Bbbb 3

Aco-

k) *Pharsal. Lib. VIII. 303 sqq.* vbi vid. OVDENDORP in *Not. conf.* inprimis DAVSQVEI. ad *Sil. Ital. Lib. XV. pag. 681.* HVG. GROTH, *Lib. III. de Iure Belli et Pac. Cap. 4, 16. pag. 512.* et CAEL. RHOD. *Antiq. Lect. XII. 42. p. 644. sqq.*

1) *Lib. XII. Aeneid. 857.* vbi vid. SERVIVS, inprimis de la CERDA, in vasto *Commentario* quem, et vid. ad II. *Georg. pag. 325.* Ceterum autem fere vereor, ne ipsum LVCANVM hic certo tantum respectu, ipsi VIRGILIO praeferendo, iterum iniustam cl. IVSTI iram sim provocaturus, qui me nuper, in *specim. Obs. 15. Crit. pag. 77.* ideo *furiis ipsis agitatum fuisse*, blande et modeste pronuntiavit, quod scil. in meis observat. *Crit.* ipsum LVCANVM ob sublimen spiritum, foecundum ingenium, et eximias praesertim vtilissimasque sententias ethicas et politicas, ubique frequentes apud ipsum,

poetam summum vocassem. Quid igitur? Ita ne vero GROTH, RUTGERSIVS, LIPSIVS, TURNER. HEINS. BARTH. MARESIVS, PALMER. PATIN. maxime BRIOSIVS, quin et ipsa REGINA CHRISTINA; immo, ipse PAPIN. STAT. MARTIAL. QVINTILIAN. et alii plures, alibi iam a me laudati, furiis quoque agitati fuerint, qui pariter LVCANVM optimum summumque imo diuinum poetam vocarunt? Cum tantis autem Auctoribus ita sapienter furere, summa potius est gloria, quam ignominia. Duplicem vero ad instar nempe Iani bifrontis, mihi habere faciem videor apud cl. censorem. In eodem enim docto Libello, me plus semel appellat *omnigenae eruditionis promum condum*: quod tamen nimium; vnde merito crubesco. Hic vero, mutata subito scena, ipsi *furiis agitatus* dicor, quod rursus nimium: Sed placide hic

Aconitum Parthicum, quo Phraates detestabili facinore, Patrem suum Orodem aquae intercutis morbo laborantem interimere ausus est, quanquam tum, contra impium degeneris illius filii votum, mira naturae oblucentis virtute, diro isto veneficio in beneficium atque salutem potius conuerso, ceu pluribus refert ipse noster APPIANVS, ^{m)} praeunte nempe ipso PLVTARCHO, ⁿ⁾ quem iterum more solito, penitus exscripsit.

Ecquis igitur nunc ex tam vasta et spatiosa feralium ac furialium plantarum filua, a magno nostro SENNERTO, ^{o)} IONSTONO, ^{p)} ZACCHIA, ^{q)} SCHENCKIO, ^{r)} aliisque, diligenter collecta et explicata, illam nunc praecipue herbam decerpere quasi, et certissime monstrare confidenter audeat, quae quondam copiis Antonianis fuerit exitiosa? meris ergo hic potius coniecturis timide est agendum; quam certi quicquam temere statuendum. Ideo etiam iam supra laudati Auctores, REIES nempe et LINDER, recte dubitanter tantum hic proposuerunt Cicutam, Mandragoram, solanum furiosum, seu Belladonnam, alterius Solani, Lycopersici alias dicti, aurea, siue amoris, poma, atque denique Daturam, vel Stramonium. Ex quibus tamen omnibus, quaedam tantum ex aliqua parte, huc conueniunt, quaedam ex magna, nullae vero ex omni, nisi sola forte excepta illa Datura, alieni tori alienaeque crumenae dolosis insidiatoribus tam grata atque familiari planta: de cuius miranda natura, stupendisque, plane effectibus in mente humana turbanda variique atque peregrini generis deli-

hic rideo, nec ira excandescio. quin potius hunc subitum ingenii iuuenilis aestum ipsi candide condono, gratiasque insuper ago pro tam blanda et paterna quasi castigatione, licet illam vilo modo promeruisset, aegre adhuc agnoscam. Sed haec obiter, et data hic opportune occasione, dicta a me sunt; qui ceterum ex animo faueo egregiis studiis et nascenti inde sensim famae iuuenis illius doctissimi et laude dignissimi.

^{m)} In *Parthicis*, pag. 262. Tom. I.

ⁿ⁾ In *M. CRASSI Vita*, pag. 565. *Opp. Tom. I.*

^{o)} *Pract. Med. Lib. VI. Part. 7. a pag. 286. vsque ad pag. 321.*

^{p)} *Syntag. Med. Pract. Lib. VI. Tit. II. Cap. 2. pag. 1097. sqq.*

^{q)} *Quaest. Med. Legal. XII. Lib. II. pag. 188. Tom. I.*

^{r)} *Observat. Med. Lib. VII. pag. 797. sqq. add. inprimis huc KOENIGII Regn. Vegetab. quadripart. pag. 107. sqq. p. 868. et passim,*

deliriis portentosis ac prodigiosis inducendis, perquam multi Auctores tam veteres, quam recentiores, et inter ipsos B. quoque HEVCHERVS noster, ^{s)} quem honoris, amoris et piae memoriae causa, hic nomino, diligentissime tractarunt; quorum nomina ac sententias quum nuper admodum alibi, maiore opere, ^{t)} magna copia, studiose iam produxerim, nolo nunc actum denuo agere, atque ibi modo dicta, fastidiose hic repetere. Hanc igitur Daturam, aut certe parem ipsi nocendi et infatuandi viribus, plantam, illam ipsam fuisse herbam, quae tantam olim stragem ediderit inter misere peritura Antonii agmina; ego interim hic modeste coniicio, non autem arroganter pronuntio, nec pertinaciter propugno: Inductus praesertim in hanc ipsam sententiam, aut coniecturam, isto quidem pari fere exemplo perquam memorabili, ab Ill. quondam *Lib. Bar. VALVASORE* ^{u)} fideliter relato, et ex verna cula ipsius lingua, in latinam hic a me accurate translato: *Ann. 1685. in Arce Freyhoffensi, Domestici quidam, errore forsan, cum lente coxerant Daturam ibi sua sponte crescentem; unde factum, ut omnes ex illa incautius comesta, miro diroque furoris genere subito corriperentur. Quidam enim operose Ligna congerebat, eaque congesta mox in latrinam deportabat: Alter binas secures sibi inuicem imponebat, Ligna quasi fissurus: Tertius Ligna sumebat, tanquam perterebraturus: Vnus denique, admoto mordicus ore, ad instar porci, rostro humum effossuri, terram ipsam eruebat. Vt reliqua iam taceam deliramenta varia, fusius ibi a VALVASORE relata. Hi igitur omnes pari fere modo, solum circa ligna congerenda, findenda atque terebranda, occupati erant in furore suo; quemadmodum milites isti Antoniani in suo delirio, soli occupati erant in lapidibus ex agro eruen- dis atque prouoluendis. Par igitur fere vtriusque furoris species, et idem paene effectus; sed dispar tantum nonnihil materia, aut obiectum furoris:*

^{s)} In *Novo Prouentu Horti Medici Acad Witemberg. Tom. II. Opp. pag. 570. fqq.*

^{t)} *Thesaur. pharmaceut. vniuersal. Part. I. Cap. 4. pag. 170. Regni Vegetab. vbi et pag. 71. de Mandragora, pag. 97. de Bel- ladonna, pag. 105. de ipsa dira, aut diua*

Cicuta, vt hodie quidam volunt, et pag. 140. de Solano, diligenter a nobis tractatum fuit.

^{u)} In magno splendidoque opere, sub honorifico Titulo, euulgato: *Die Ehre des Herzogthums Crain, Tom. III. pag. 152. fqq.*

furoris: quod tamen parum certe hic refert, siue lapides nempe fuerint, siue ligna. Sed eadem forte, aut simili certe, herba virosa et furiosa pastus olim fuerit a Chrysame Theffala, Hecates sacerdote et Venefica simul insigni, Taurus iste votiuus, qui inde in furorem actus, mox in aduersa Erythraeorum castra caeco impetu delatus, tandem ab illis captus, ceu grata Diis victima, inactatus, et inter milites diuisus ac manducatus, uniuersum statim exercitum simili prorsus insania infecit et contaminauit, ut omnes exilirent, saltarent, et relictis temere custodiis, in apertos undique campos excurrerent. Vnde illis, imminentis fati sui ignaris, crudeliter interfectis, ipse Cnopus, hostis, vafro hoc strategemate, magna et florentissima Erythraeorum vrbe facillime potitus est, mirandam hanc historiam fusius elegantiusque enarrant POLYAENO ^{x)}.

Verum plura hic possem adhuc, quin etiam vellem, adiacere, hoc ipsum argumentum vberius illustratura: nisi dura necessitate imperante, his ipsis lapidibus diutius haecenus motis, Lapis Terminus nunc esset demum ponendus. Vnum tamen mihi adhuc obiter hic monere liceat paucissimis: Nimirum, notissimum illud Graecorum et Latinorum prouerbium, πάντα λίθον κινεῖν, omnem Lapidem mouere, de studio acerrimo, vulgo adhiberi solitum, non tam suam originem debere huic ipsi tristi historiae, ut nempe quibusdam doctis haud satis accurate visum; quam potius ad antiquiora longe tempora, scilicet ipsius infelicis expeditionis, a vesano quondam Xerxe, plagoso illo furdi maris Orbilio, ut ita cum poëta loquar, contra Graeciam susceptae, esse referendum, bene docentibus DIDYMO, ^{y)} MICHAELE APOSTOLIO, ^{z)} aliisque veteribus paroemiographis, item SVIDA et HESYCHIO, quos recte quoque sequutus ipse ERASMVVS ROTERODAMVS. ^{a)} Sed de his haecenus.

^{x)} Lid. VIII. Strategemar. pag. 619.
Edit. Casaub. Conf. ABR. BERKELII
Not. ad STEPH. BYZANT. de Urbib.
pag. 354.

^{y)} Collect. prouerb. per ALDVM,
pag. 140.

^{z)} Paroem. Graec. Cent. xv. Prov. 65.
pag. 199. ex Edit. Petr. PANTINI.

^{a)} Adag. 30. Cent. IV. Chil. IV. pag. 163.